


Diusu sa mimi



New Testament in Tacana (BL:tna:Tacana)

# Diusu sa mimi

## New Testament in Tacana (BL:tna:Tacana)

copyright © 2009 Wycliffe Bible Translators, Inc.

Language: Tacana

Translation by: Wycliffe Bible Translators, Inc.

Tacana [tna], Bolivia

### Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

#### **The New Testament**

in Tacana

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 22 Feb 2024 from source files dated 29 Jan 2022

d0732984-534c-583e-85d6-df2586e256b7

## Contents

SAN MATEO . . . . .	1
SAN MARCOS . . . . .	90
SAN LUCAS . . . . .	146
SAN JUAN . . . . .	235
HECHOS . . . . .	302
ROMANOS . . . . .	383
1 CORINTIOS . . . . .	419
2 CORINTIOS . . . . .	453
GÁLATAS . . . . .	476
EFESIOS . . . . .	489
FILIPENSES . . . . .	501
COLOSENSES . . . . .	509
1 TESALONICENSES . . . . .	516
2 TESALONICENSES . . . . .	524
1 TIMOTEO . . . . .	528
2 TIMOTEO . . . . .	538
TITO . . . . .	545
FILEMÓN . . . . .	549
HEBREOS . . . . .	551
SANTIAGO . . . . .	579
1 PEDRO . . . . .	588
2 PEDRO . . . . .	598
1 JUAN . . . . .	604
2 JUAN . . . . .	613
3 JUAN . . . . .	615
JUDAS . . . . .	617
APOCALIPSIS . . . . .	621

## EL SANTO EVANGELIO SEGÚN SAN MATEO

Ye quirica da Mateo chenu ja Cristo jepuiti deretaidha. Tueda da Jesús sa discípulo puina.

Da su beju Jesús sa discípulo pu putsu, tuahueda judío cuana quirica tiametaidha Jesucristo jepuiti equisa huecuana puji. Jesucristo huecha hue jepuiti biahua tiempo profeta chenu cuana ja Antiguo Testamento su deretaidha Mateo quisa epuani. Cuaja judío chenu cuana ja Jesús baja mahue, inatsuja mahue ataidha quisa epuani. Daja huecha cuaja curusu su tatataidha huecuana quisa epuani. Da su beju Jesús id'eyu putsu, cielo su tsuatidha quisa epuani.

Beju pamapa ye ai cuana Mateo quisa epuani ye quirica su: Cuaja Jesús bataji puidha. Capítulo 1,2.

Jesús, Diosu sa puji yahui neje jaichaderametitaidha. Capítulo 3.

Ishahua ja Jesús pirutaidha. Capítulo 4.

Jesús ja cuaja Diosu ecuatsasaiti su nubime pu taji cristiano cuana buetsuatana Capítulo 5-13.

Cuaja ai cuana epu tu esiapatiicha su, Jesús ja discípulo cuana buetsuataidha. Capítulo 24,25.

Cuaja Jesús manume puidha. Capítulo 26,27.

Cuaja Jesús id'eiyume puidha. Capítulo 28.

### *Jesucristo sa familia chenu cuana*

*(Lucas 3.23-38)*

<sup>1</sup> Jesucristo da David, Abraham chenu detse sa familia jenetia bataji puana. Beju ye cuana da pamapa mecuana sa ebani cuana derejiji yani Abraham chenu peje jenetia epupiruani.

<sup>2</sup> Abraham chenu da Isaac chenu sa tata puidha. Isaac chenu da Jacob chenu sa tata puidha. Jacob chenu da Judá chenu sa tata puidha. <sup>3</sup> Judá chenu da Fares chenu, Zara chenu detse sa tata puidha. Tamar chenu da tuatse sa cuara puidha. Fares chenu da Esrom chenu sa tata puidha. Esrom chenu da Aram chenu sa tata puidha. <sup>4</sup> Aram chenu da Aminadab chenu sa tata puidha. Aminadab chenu da Naasón chenu sa tata puidha. Naasón chenu da Salmón chenu sa tata puidha. <sup>5</sup> Salmón chenu da Booz chenu sa tata puidha. Rahab chenu da Booz chenu sa cuara puidha. Booz da Obed chenu sa tata puidha. Rut chenu da Obed chenu sa cuara puidha. Obed chenu da Isaí chenu sa tata puidha. <sup>6</sup> Isaí chenu da echua puji David chenu sa tata puidha. Da su piada tunca pushi ejaitiana

familia cuana jaitianatana. David, Betsabé chenu detse da Salomón chenu sa tata detse puidha. Betsabé chenu da Urías chenu sa ehuané puidha.

<sup>7</sup> Salomón chenu da Roboam chenu sa tata puidha. Roboam chenu da Abías chenu sa tata puidha. Abías chenu da Asa chenu sa tata puidha. <sup>8</sup> Asa chenu da Josafat chenu sa tata puidha. Josafat chenu da Joram chenu sa tata puidha. Joram chenu da Uzías chenu sa tata puidha. <sup>9</sup> Uzías chenu da Jotam chenu sa tata puidha. Jotam chenu da Acáz chenu sa tata puidha. Acáz chenu da Ezequías chenu sa tata puidha. <sup>10</sup> Ezequías chenu da Manasés chenu sa tata puidha. Manasés chenu da Amón chenu sa tata puidha. Amón chenu da Josías chenu sa tata puidha. <sup>11</sup> Josías chenu da Jeconías chenu sa tata puidha. Da tiempo su Jeconías meabajatana templo su. Da tiempo su Babilonia soldado cuana ja pamapa israelita cuana eteri puji dusutana Babilonia yahua su. Da su piada tunca pushi ejaitiana familia cuana jaitianatana.

<sup>12</sup> Jeconías chenu da Salatiel chenu sa tata puidha. Salatiel chenu da Zorobabel chenu sa tata puidha. <sup>13</sup> Zorobabel chenu da Abiud chenu sa tata puidha. Abiud chenu da Eliaquim chenu sa tata puidha. Eliaquim chenu da Azor chenu sa tata puidha. <sup>14</sup> Azor chenu da Sadoc chenu sa tata puidha. Sadoc chenu da Aquim chenu sa tata puidha. Aquim chenu da Eliud chenu sa tata puidha. <sup>15</sup> Eliud chenu da Eleazer chenu sa tata puidha. Eleazer chenu da Matán chenu sa tata puidha. Matán chenu da Jacob chenu sa tata puidha. <sup>16</sup> Jacob chenu da José sa tata puina. José da María sa yahue puina. María da Jesús sa cuara puina. Beju Jesús da Cristo.

<sup>17</sup> Beju piada tunca pushi ejaitiana familia cuana putaidha Abraham chenu jenetia David chenu teje. David chenu jenetia Babilonia soldado cuana ja pamapa israelita cuana Babilonia yahua su dusutana teje beju piada tunca pushi ejaitiana familia cuana putaidha. Israelita cuana dusutana huecuana jenetia Cristo bataji puana teje beju piada tunca pushi ejaitiana familia cuana putaidha

*Jesús bataji puana*  
(Lucas 2.1-7)

<sup>18</sup> Beju uja Jesús bataji puana: Mesa cuara María ja José yahueti jamitsuti tiatana. José neje jahuetiji mahue su hue, Espíritu Santo ja María dheji ametana. <sup>19</sup> Beju José ja María dheji shanapatana su, María neje jameseatija pudhaana. Tueda da deja saida, butsepi putsu, tsada mahue batana cristiano cuana bahue paputa puji. Da putsu, cuatsa mahue María neje jameseatija pudhaana. <sup>20</sup> Beju José ja tueda ai

cuana epibatani cama, Diusu sa ángel ja tueda tahui su uja atana:

—José, David chenu sa ebacua, be tsada mahue baji María neje ehuaneti puji. Tueda tusa yanana bataji epu da Espíritu Santo jenetia beju. <sup>21</sup> María da piada ebacua chidi ebacuinati. Tueda yanana chidi sa Jesús ebani miada eicha. Daja da banime epu, tusa cristiano cuana tuna sa jucha cuana jepuiti d'eji su yameta putsu.

<sup>22</sup> Beju daja da tueda ai cuana puana, cuaja Diusu sa profeta Isaías chenu ja biahua tiempo deretaidha batame. Uja dere-  
taidha:

<sup>23</sup> Deja shanapa bue mahue epuna da dheji epu.

Ebacuinati piada ebacua.

Tueda ebacua sa ebani da Emanuel epu. Tueda ebani da,  
“Diusu ecuana neje yani”, epuani.

<sup>24</sup> Beju José id'ecuina putsu, cuaja ángel ja tahui su tueda cuatsasiatana nime, daja atana. María neje jahuanetiana.

<sup>25</sup> Jahuanetiana biame, José ja María aimue ehuanne nime quinatana mahue yanana chidi bataji puana teje. Beju yanana bataji puana su, José ja Jesús ebani ichatana.

## 2

### *Bahue eni deja cuana yanana Jesús peje su cuinatana*

<sup>1</sup> Jesús da Belén ejude su bataji puana. Tueda ejude da Judea provincia su anina. Da tiempo su Jesús bataji puana su, dapia echua puji Herodes banime anina. Da su beju bahue eni deja cuana pia yahua uqueda id'eti ecuinanani bene jenetia Jerusalén ejude su cuinatana. <sup>2</sup> Cuina putsu, uja quisabatana huecuana:

—¿Quepia da judío cuana sa echua puji bataji puana? Beju ecuanaju sa yahua jenetia atujai ecuanaju bana. Tueda atujai jepuiti yanana bataji puana ecuanaju bahue puana. Da putsu beju, ecuanaju pueitia tu emitsutsua puji.

<sup>3</sup> Beju bahue eni deja cuana ja daja quisabatana putsu, Herodes japibatipeitiana, tueda da judío cuana sa echua puji putsu. Pamapa cristiano cuana Jerusalén ejude quitana di japibatipeititana. <sup>4</sup> Da su beju Herodes ja pamapa judío sacerdote cuana sa echua puji cuana ihuatana. Pamapa Moisés chenu sa jacuatsasiati ebuetsuaji cuana di ihuatana. Beju uja quisabatana huecuana:

—¿Quepia da Diusu sa Jabeituti Deja bataji epu?

<sup>5</sup> Da su uja jeutsutana huecuana:

—Beju Belén ejude, Judea provincia su bataji epu, cuaja Diusu sa profeta Miqueas chenu ja biahua tiempo deretaidha batame. Uja deretaidha:

<sup>6</sup> Belén ejude da Judea provincia su ejude huai chidi papu biame, ejude aida epu, tueda ejude jenetia Echua Puji ecuinana putsu.

Tuahueda quema israelita cristiano cuana saida ecuatsasi-atayu.

Daja deretaidha profeta Miqueas chenu ja.

<sup>7</sup> Da su Herodes ja bahue eni deja cuana cuatsa mahue ihuatana. Quisabatana huecuana ai tsine su ai hora su atujai bapirutana huecuana. <sup>8</sup> Quisabape putsu, beju bahue eni deja cuana Belén ejude su beitutana. Uja atana huecuana:

—Meputique dapia ejude su. Mequisachacutique tueda yanana jepuiti. Teje putsu, mequisaque ema yama di tu emitsutsuati puji.

Tuna ebaseainia je, Herodes ja daja quisatana huecuana, yanana Jesús manunameja adhaatana putsu.

<sup>9</sup> Da su bahue eni deja cuana echua puji Herodes id'abape putsu, putitana huecuana. Beju mecuana sa yahua jenetia tuna bapirutana atujai tuna hui su putiana tuna ehuidusu puji. Daja putiana atujai yanana Jesús yani teje. Dapia da netiseuana. <sup>10</sup> Bahue eni deja cuana ja dapia atujai netiseuana ba putsu, beidaji putana huecuana. <sup>11</sup> Ete su enubihu je, yanana Jesús batana huecuana tusa cuara María neje. Ba putsu, janana chidi butse su tururutana huecuana tu emitsutsua puji. Oro, incienso, mirra yanana tiatana huecuana. Tueda tiajiji ai cuana chujeneda saida puina. <sup>12</sup> Da su beju Diosu ja bahue eni deja cuana tahui su cuatsasiatana Herodes peje je pasiapatita mahue huecuana puji. Da putsu, jasiapatitaibana huecuana tuna sa yahua su pia edid'i je. Aimue echua puji Herodes quisa atana huecuana mahue yanana Jesús jepuiti.

*José, mesa familia neje Egipto yahua su jududuana*

<sup>13</sup> Beju bahue eni deja cuana jasiapatitaibana su, Diosu sa ángel José peje su tahui su bataji puana. Uja cuatsasiatana José:

—Tipeida netianaque. Yanana, mesa cuara neje jududuque Egipto yahua su. Dapia meanitique yama mi neicha equisa teje. Beju Herodes ja yanana Jesús echacutani tu emanuame puji.

<sup>14</sup> Da su José netianana. Yanana Jesús, mesa cuara neje da dhidha su tipeida putiana Egipto yahua su. <sup>15</sup> Dapia Egipto yahua su anititana huecuana Herodes emanu teje.

Beju daja puana, cuaja Diosu sa profeta chenu ja biahua tiempo deretaidha batame. Uja Diosu sa profeta Oseas chenu deremetaidha: “Egipto yahua jenetia quema ebacua yama siapameibana.”

*Herodes ja yanana cuana manuamemetana*

<sup>16</sup> Beju bahue eni deja cuana ja Herodes mue jei a atana putsu, Herodes ebia su duininiana. Pamapa Belén ejude su aniji beta maraji teje deja yanana cuana manuamemetana. Pamapa Belén ejude naja su aniji beta maraji teje deja yanana cuana di manuamemetana. Daja Herodes ja deja yanana cuana manuamemetana, beta mara beju bahue eni deja cuana ja atujai bapirutana putsu. <sup>17</sup> Pamapa tueda ai cuana daja puana, cuaja Diosu sa profeta Jeremías chenu ja biahua tiempo deretaidha batame. Uja deretaidha:

<sup>18</sup> Ramá ejude su aniji cristiano cuana ebia su epadarititani. Cuaja paciencia pu taji mahue jibatitana huecuana, yanana chidi cuana manutana putsu.

Daja profeta Jeremías chenu ja deretaidha.

<sup>19</sup> Da su beju Herodes manuana su, Diosu sa ángel neicha tahui su José peje su bataji puana, Egipto yahua su anina su. Uja ángel ja José cuatsasiatana:

<sup>20</sup> —Beju netianaque. Yanana, mesa cuara neje jasiapatique Israel yahua su. Yanana Jesús manuameja pudhaana Herodes beju manujiji.

<sup>21</sup> Da su beju José ja yanana, mesa cuara neje Israel yahua su jasiapatibana. <sup>22</sup> Beju da tiempo su Herodes chenu sa ebacua Arquelao banime da Judea provincia su echua puji puina mesa tata chenu eturuca. José da Arquelao echua puji epuani bahue pu putsu, iyuame puana Belén ejude su esiapati puji. Da su ángel neicha tahui su José peje su bataji puana. “Be Judea provincia su meputiji”, ángel ja cuatsasiatana. Da su José Galilea provincia su putiana yanana, mesa cuara neje. <sup>23</sup> Galilea su cuinati putsu, Nazaret ejude su anititana huecuana. Beju daja pamapa tueda ai cuana puana, cuaja Diosu sa profeta chenu cuana ja deretaidha batame. Cristiano cuana ja Jesús, “Nazareno”, yata, deretaidha huecuana.

### 3

*Juan Bautista da d'anita yahua su quisaquisa puana*  
(Marcos 1.1-8; Lucas 3.1-9, 15-17; Juan 1.19-28)

<sup>1</sup> Da tiempo su Juan Bautista d'anita yahua su Judea yahua su cristiano cuana quisaquisa atanetina. <sup>2</sup> Uja quisaquisa punetina:

—Diosu peje su mepibaturucatique, Diosu ecuatsasiati beju enariatiani putsu.

<sup>3</sup> Biahua tiempo da Diosu sa quisa puji Isaías chenu ja deretaidha Juan jepuiti. Uja deretaidha: Piada etsui jubida d'anita yahua su uja epuani: “Mebasetatique Echua Puji epue su puji.”



<sup>4</sup> Beju Juan sa ejud'uji da camello einua etad'i jenetia, mesa eturisiji ebiti jenetia puina. Dhequere aida, huasa ena diataina. <sup>5</sup> Pamapa Jerusalén ejude su, Judea yahua su Jordán ena naja je aniji cuana tu peje su pue bahue putaina tu eid'aba puji. <sup>6</sup> Pamapa Diosu peje su tuna sa jucha cuana jatuaquisatitana cuana Juan ja yahui neje ichaderatana Diosu sa puji Jordán ena su.

<sup>7</sup> Juan ja fariseo, saduceo cuana dapia eneti batana putsu, uja atana huecuana:

—Micuaneda da bacua d'aida cuana nime. Micuaneda ema peje su epusiu yahui neje Diosu sa puji eichaderameti puji Diosu sa castigo jubida jenetia ejududu puji. Beju micuaneda mu Diosu peje su japibaturucatija mahue. <sup>8</sup> Da su beju equene mepibaturucatique Diosu peje su. Saida, butsepi mepuniunetique, yahui neje jaichaderatiji mahue su. <sup>9</sup> Be ebia su aida mebatiji, micuaneda da Abraham chenu sa familia jenetia biame. Da neje mu mue ai biame beju. Yama micuana butsepi equisainia, Diosu ja ye tumu cuana di Abraham chenu sa ebacua cuana tsa piata cua. <sup>10</sup> Beju hacha basetajiji eneti aqui cuana equé puji. Pamapa equi cuana ejaja saida pu bue mahue equepeta. Cuati su ed'ed'apeta pamapa. Daja Diosu ja yatayu tu peje su japibaturucatija mahue cuana. <sup>11</sup> Enei hue, yama Diosu peje su japibaturucatiiji cuana yahui neje eichaderainia Diosu sa puji. Daja yama yahui neje eichaderainia huecuana ene quita japibaturucatiitana Diosu sa puji ebame puji. Yama yahui neje micuana eichaderainia biame, pia epusiu ema tije. Tuahueda micuana eichaderata Diosu sa puji Espíritu Santo sa tucheda neje. Tueda da ema ebia su huaraji tucheda putsu, aimue ema tupu mahue tu emebaja puji. <sup>12</sup> Tueda epusiu cristiano cuana arusa pu cua nime etsabihue puji. Ejaja chujemame eichaderata etsabi jenetia. Ejaja beju eichasetata tusa ichasetata jude ete su. Etsabi mu da cuati su ed'ed'ata. Beju pamapa tu peje su jei eputani cuana da ejaja nime. Diosu neje cielo su yanienititayu huecuana. Pamapa tu jei aja mahue yatani cristiano cuana da etsabi nime. Cuati castigo su epuenititayu huecuana. Dapia cuati da tiju bue mahue.

*Juan ja Jesús yahui neje ichaderatana  
(Marcos 1.9-11; Lucas 3.21-22)*

<sup>13</sup> Da su beju Jesús Jordán ena su pueana Galilea yahua jenetia. Juan peje su pueana Juan ja tu yahui neje paichaderata puji. <sup>14</sup> Beju equene su Juan ja aimue aja atana mahue. Uja tuahueda Jesús atana:

—Beju miqueda ema yahui neje Diusu sa puji ichadera taji biame, mida ema peje su pueitia yama mi yahui neje eichadera puji.

<sup>15</sup> Da su Jesús ja Juan uja atana:

—Daja hue aque, yama mi ecuatsasiainia nime. Pamapa Diusu sa jacuatsasiati cuana etse sa a taji.

Da su Juan ja Jesús Diusu sa puji ichaderatana yahui neje.

<sup>16</sup> Jesús ena jenetia cuinanana su, cielo jadhatiana. Espíritu Santo ebuteni huaitucu nime beju Jesús ja batana. Tueda Jesús bia su netiuteana. <sup>17</sup> Da hora su Diusu cielo jenetia uja puana:

—Ye da quema ibuneda ebacua. Tu neje ema beidaji.

## 4

### *Ishahua ja Jesús pirubatana*

(*Marcos 1.12-13; Lucas 4.1-13*)

<sup>1</sup> Da su beju Espíritu Santo ja Jesús d'anita yahua su dusutana Ishahua ja papirubata puji.

<sup>2</sup> Dapia d'anita yahua su Jesús dhemanuana, pushi tunca tsine diadiaji mahue putsu. <sup>3</sup> Da su Ishahua ja tueda nariatana tu epiruba puji. Tuahueda Jesús uja atana:

—Ahua mida Diusu sa ene quita ebacua su, cuatsasiaque ye tumu cuana ai dia taji cuana su patsapiati.

<sup>4</sup> Da su Jesús ja uja Ishahua jeutsutana:

—Aimue daja yama ya mahue. Uja derejiji yani: “Aimue cristiano cuana ai dia taji cuana neje bahui eid'e yanita mahue. Pamapa Diusu sa mimi neje di eid'e yanita huecuana.”

<sup>5</sup> Da su Ishahua ja Jesús Jerusalén ejude sa templo matina du dusutana. <sup>6</sup> Dapia Jesús uja atana:

—Ahua mida Diusu sa ene quita Ebacua su, tenaque yahua su u jenetia, uja derejiji yani putsu:

Diusu ja ángel cuana ecuatsasiata mi painatsihuata huecuana puji.

Tuna sa eme neje mi einatsuta huecuana mique ehuaitsi tumu su edhapujuti mahue puji.

<sup>7</sup> Da su Jesús ja Ishahua uja jeutsutana:

—Aimue yama daja ya mahue. Daja huecha uja derejiji yani: “Be abaji mique Diusu.”

<sup>8</sup> Da su Ishahua ja Jesús dusutana emata bauda matina su. Da jenetia pamapa ye mundo sa ejude aida cuana Jesús bametana. <sup>9</sup> Uja Ishahua ja atana:

—Ahua mida ema butse su, tururu putsu, ema emitsutsua su, yama mi pamapa ye ejude aida cuana etiape miada ecuatsasia puji.

<sup>10</sup> Da su Jesús ja Ishahua uja jeutsutana:

—Netideraque ema naja jenetia, Ishahua. Daja huecha derejiji yani: “Mique Diosu bahui mitsutsua taji. Tueda bahui mique mebaja taji.”

<sup>11</sup> Da su beju Ishahua netiderana Jesús peje jenetia. Netiderana su, ángel cuana Jesús peje su cuinatana tu emebaja puji.

*Jesús da Galilea yahua su quisaquisa pupiruana*

*(Marcos 1.14-15; Lucas 4.14-15)*

<sup>12</sup> Beju Juan Bautista terijiji yani Jesús bahue puana su, Galilea yahua su putiana. <sup>13</sup> Nazaret ejude su cuinati putsu, jaitianana Capernaum ejude su dapia yaniti puji. Tueda ejude da bai maje su anina. Tueda ejude da Zabulón, Neftalí yahua detse naja su anina. <sup>14</sup> Beju tueda ai cuana puana, cuaja Isaías chenu ja biahua tiempo deretaidha batame. Uja deretaidha:

<sup>15</sup> Zabulón yahua su aniji cuana ja hueda jubida batana.

Daja huecha Neftalí yahua su aniji cuana ja batana.

Tueda yahua detse da Galilea yahua, Jordán ena chu maje yani.

Dapia dueji judío mahue cuana yani.

<sup>16</sup> Tuneda apuda su yani biame, beju hueda jubida batana huecuana.

Manu su hue yanita huecuana biame, beju Diosu sa hueda tuna peje su cuinana.

<sup>17</sup> Da tsine jenetia da Jesús quisaquisa pupiruana uja:

—Mepibaturucatique, Diosu ecuatsasiati beju enariatiani putsu.

*Jesús ja pushi esia puji cuana dharetana*

*(Marcos 1.16-20; Lucas 5.1-11)*

<sup>18</sup> Jesús ja Galilea bai maje je epuhu je, beta deja detse batana. Piada Simón Pedro banime. Pia Andrés banime. Tuatseda edue tatse puina. Esia puji putsu, tarrafa siatasaina tse bai su. <sup>19</sup> Jesús ja uja atana tse:

—Metseda se cuana jemi bahue. Ema tije meaque. Jiahue jenetia yama metseda cristiano cuana ema peje su duseji yame.

<sup>20</sup> Da hora su hue tarrafa cuana ichajusiatana tse Jesús ebuque puji. Beju putiana tse Jesús neje.

<sup>21</sup> Chuadera pad'i puti putsu, Jesús ja pia beta deja detse batana. Piada Jacobo banime. Pia Juan banime. Tuatseda edue tatse puina. Tuatse sa tata Zebedeo banime. Canoa aida su netina tuatse sa tata neje. Tarrafa cuana jabasetatitasaina huecuana. Jesús ja ihuatana tse. <sup>22</sup> Da su beju tuatseda metse sa tata canoa su ichajusiatana Jesús ebuque puji.

*Jesús ja dueji cristiano cuana buetsuatana*  
(Lucas 6.17-19)

<sup>23</sup> Beju Jesús da pamapa Galilea yahua je putiana. Pamapa jadhitati jude ete cuana su cristiano cuana buetsuatana. Diusu ecuatsasiati jepuiti quisaquisa puana. Pamapa cristiano cuana sa tsapiapiati chiqui cuana saisiametana. <sup>24</sup> Siria yahua su aniji cristiano cuana di Jesús jepuiti bahue putana. Pamapa tsapiapiati chiquiji, nedaji cuana dusutana huecuana Jesús peje su. Einid'u madhadaji, riaria neje enimetaitanani, ase bue mahue cuana dusutana huecuana. Beju Jesús ja pamapa saisiametana huecuana. <sup>25</sup> Dueji cristiano cuana ja Jesús tije atana. Galilea yahua, piada tunca ejude cuana, Jerusalén ejude, Judea yahua, Jordán ena chu maje je jenetia beju puetana huecuana Jesús tije ya puji.

## 5

*Jesús ja cristiano cuana buetsuatana murucu aida bia su*

<sup>1</sup> Jesús ja cristiano cuana dueji ba putsu, murucu aida bia su tsuatiana. Dapia aniuteana. <sup>2</sup> Mesa discípulo cuana tu naja su anibareretana putsu, Jesús ja buetsuapirutana huecuana uja:

<sup>3</sup> —Nimebeidaji da Diusu ebia su shanapaja cuana, Diusu ecuatsasiati su yanienititayu huecuana putsu.

<sup>4</sup> Nimebeidaji da enimepibapibatani cuana, Diusu ja epacienciatayu huecuana putsu.

<sup>5</sup> Nimebeidaji da nimemitsida cuana, Diusu ja yahua etiata huecuana putsu.

<sup>6</sup> Nimebeidaji da Diusu peje su nimebutsepi puja eputani cuana, Diusu ja tu peje su nimebutsepi yametayu huecuana putsu.

<sup>7</sup> Nimebeidaji da pia ichenubaji cuana, Diusu ja daja huecha eichenubatayu huecuana putsu.

<sup>8</sup> Nimebeidaji da miesumu butsepiji cuana, Diusu ebatayu huecuana putsu.

<sup>9</sup> Nimebeidaji da cristiano cuana neje saida ani bahue cuana, Diusu ja mesa ebacua cuana yatayu putsu.

<sup>10</sup> Nimebeidaji da Diusu jepuiti sufri eputani cuana, Diusu ecuatsasiati su yanienititayu huecuana putsu.

<sup>11</sup> Ahua pia cuana ja micuana emadhabata, nedaneda yata su, ahua ema jepuiti bid'umimi neje micuana etuaquisata su, nimebeidaji mepuque, Diusu ja micuana dapia cielo su ebia su pamapa ai saida cuana etiatayu putsu. <sup>12</sup> Beju daja da biahua tiempo cristiano madhada cuana ja Diusu sa profeta chenu cuana madhabataidha.

Daja Jesús ja buetsuatana huecuana.

*Jesús peje su jei eputani cuana da banu, hueda nime  
(Marcos 9.50; Lucas 14.34-35)*

Jesús ja daja hue cristiano cuana buetsuainiame atana:

<sup>13</sup> —Micuaneda da banu pu cua nime cristiano cuana duju su. Ahua banu sa bueda etaitana su, ¿cuaja ni da banu neicha bueda puyu cua? Mue ai puji saida beju banu. Ejusia puji bahui beju cristiano cuana ja patidhitidhiata puji.

<sup>14</sup> Micuaneda da hueda pu cua nime cristiano cuana Diosu sa ene quita quisa cuana ebuetsua puji. Ejude da emata bia su yani beju cuaja jarubuti taji mahue. Pamapa cristiano cuana ja tueda ejude ebatani. <sup>15</sup> Hueda huitso putsu, aimue detse etse d'iti neje biateri cua mahue. D'eji su hueda pautsuneti ete dume su yanita cuana pajurabata puji. <sup>16</sup> Daja huecha cristiano cuana duju su micuaneseda hueda nime pu taji. Beju cristiano cuana ja micuana sa ai saida yainia cuana ba putsu, micuana sa Tata Diosu cielo su yani sa puji saida emimita huecuana.

*Daja hue Jesús ja Moisés chenu sa jacuatsasiati cuana jepuiti  
buetsuainiame atana*

<sup>17</sup> Aimue ema pue Moisés chenu sa jacuatsasiati cuana etaitanamepe puji mahue. Daja huecha aimue ema pue Diosu sa profeta chenu cuana sa jabuetsuati cuana etaitanamepe puji mahue. Beju ema pueana tueda jacuatsasiati, jabuetsuati cuana yamepe puji. <sup>18</sup> Enei hue, yama micuana equisainia, buepa, mundo yani tupu, tueda jacuatsasiati cuana da aimue etaitana mahue pamapa pu taji ai cuana epupe teje. <sup>19</sup> Ahua quebata ja huai chidi jacuatsasiati biame jei aja mahue yata su, ahua tuahueda cristiano cuana daja ebuetsuata su, tueda da tije eni epu Diosu ecuatsasiati su. Ahua quebata ja pamapa jacuatsasiati cuana jei yata su, ahua tuahueda cristiano cuana daja ebuetsuata su, tueda da ebia su aida epu Diosu ecuatsasiati su. <sup>20</sup> Yama micuana butsepi equisainia, micuaneseda fariseo, jabuetsuati ebuetsuaji cuana ebia su nimebutsepi pu taji Diosu ecuatsasiati su enubi puji.

*Be meduininiji*

*(Lucas 12.57-59)*

<sup>21</sup> Beju micuaneda bahue Moisés chenu ja ecuana sa tata chenu cuana jacuatsasiati cuana tiataidha. Piada jacuatsasiati uja epuani: “Be deja manunameji puji. Quebata ja pia emanuameta su, tueda matse taji.” <sup>22</sup> Beju yama mu tueda jacuatsasiati eyapaca. Yama micuana uja equisainia, ahua quebata mesa edue neje eduinini su, matsejiji epu. Daja huecha ahua quebata ja mesa edue emadhabata su, tata edhi huaraji cuana sa matse taji. Ahua quebata ja mesa edue eduinibata su, cuati castigo su puti cua.

<sup>23</sup> ‘Ahua miada altar su eirutsuaji edusuti su, ahua dapia altar su mida mique edue neje aimue mi saida mahue epibati su, da su altar butse su mique eirutsuaji ichaque. <sup>24</sup> Putiyuque tueda edue peje su tu neje saida pamapa ebase-tati puji. Beju mique edue neje jabasetati putsu, jasiapatique altar su mique eirutsuaji Diusu peje su eirutsua puji. Diusu mitsutsuaji mahue su, mique edue neje jabasetati taji.

<sup>25</sup> ‘Beju yama micuana ebuetsuainia, ahua quebata mique manu ja mi echujebajata su, ahua tuahueda mi huaraji peje su edusuta su, edid’i su hue mebasetatique saida huaraji peje su cuinatiji mahue su, mi huaraji peje su emenajatiata mahue puji. Ahua mahue su, huaraji ja mi policia cuana peje su emenajatiata. Da su mi eteriichata huecuana. <sup>26</sup> Enei hue beju, yama micuana equisainia, dapia mida yaniti pamapa mique manu echujetiape teje.

*Pia sa ebutse neje jaquinatiji jepuiti quisa*

<sup>27</sup> ‘Micuaneda bahue Moisés chenu sa jacuatsasiati uja epuani: “Be pia sa ebutse neje mequinatiji.” <sup>28</sup> Beju yama mu micuana uja equisainia, ahua quebata deja ja epuna eutsatabata su, tueda da mesa enime su jucha aida epuani, tueda epuna neje jaquinati cua nime putsu.

<sup>29</sup> ‘Ahua mique bai eni bene etua ja mi jucha yameta su, huija putsu, uqueda jusiaque. Ebia su saida quita piada etua mahue cielo su enubi puji, aimue betana etua neje cuati castigo su eputi mahue puji. <sup>30</sup> Ahua mique bai eni bene eme ja mi jucha yameta su, riji putsu, uqueda jusiaque. Ebia su saida quita piada eme mahue cielo su enubi puji, aimue betana eme neje cuati castigo su eputi mahue puji.

*Daja hue Jesús ja jamesiati jepuiti buetsuainiame atana (Mateo 19.9; Marcos 10.11-12; Lucas 16.18)*

<sup>31</sup> ‘Micuaneda bahue ecuana sa tata chenu cuana sa jacuatsasiati uja derejiji yani: “Quebata mesa ehuané mesiaja epuani su, ehuané mesiata cua, jamesiati quirica derejiji tia putsu.” Daja cuatsasiataidha tata chenu cuana ja. <sup>32</sup> Beju yama mu micuana equisainia, ahua quebata deja ja mesa ehuané jucha mahue biame emesiata su, ahua tueda epuna pia deja neje neicha jahueti cua su, tueda equene yahue ja epuna jucha aida yametani, epuna pia deja neje jahuetiana putsu. Mesa beta puji yahue eichacua ja di jucha aida yata, epuna mesiajiji neje jahuanetiana putsu.

*Daja hue Jesús ja Diusu bahue jepuiti buetsuainiame atana*

<sup>33</sup> ‘Micuaneda bahue tata chenu cuana sa jacuatsasiati uja derejiji yani: “Mique jamitsuti Diusu bahue neje Diusu butse su ape taji.” <sup>34</sup> Beju yama mu micuana equisainia, be ai

papu jepuiti Diusu bahue mepuji. Be cielo jepuiti Diusu bahue mepuji, tueda da Diusu sa ani jude putsu. <sup>35</sup> Be mundo jepuiti Diusu bahue mepuji, Diusu sa jatidhiti jude putsu. Be Jerusalén ejude jepuiti Diusu bahue mepuji, Echua Puji sa ejude putsu. <sup>36</sup> Be micuana sa echua jepuiti Diusu bahue mepuji. Ahua daja micuaneda epu su, Diusu jepuiti micuaneda Diusu bahue epuani, Diusu bahui bahue cuaja micuana sa echuaina epu putsu. <sup>37</sup> Be Diusu bahue mepuji. Tupu saida micuaneda ahua “Ehe” ahua “Mahue” epu puji. Ishahua tije eputani cuana bahui ebia su Diusu bahue pu bahueta.

*Daja hue Jesús ja jabiahuanati jepuiti buetsuainiame atana (Lucas 6.29-30)*

<sup>38</sup> ‘Micuaneda bahue tata chenu cuana sa jacuatsasiati uja derejiji yani: “Ahua quebata ja pia sa etua ejemita su, huecha tuseda di pajemita. Daja huecha etse.” <sup>39</sup> Beju yama mu micuana uja equisainia: Be mebiahuanatiji deja madhada cuana neje. Ahua quebata ja mi ebuichetani su, bupe ebud di tiaque. <sup>40</sup> Ahua quebata ja mique camisa mejemija yatani su, tiaque hue. Mique saco di tiaque hue. <sup>41</sup> Ahua quebata ja mi mesa quipi piada kilómetro yabuametani su, beju beta kilómetro abuque. <sup>42</sup> Quebata ja mi ai papu ebajata su, tiaque hue. Ahua quebata ja mi ai prestaja yatani su, prestaque hue.

*Daja hue Jesús ja majai cuana ibuneda ba taji buetsuainiame atana (Lucas 6.27-28, 32-36)*

<sup>43</sup> ‘Micuaneda bahue tata chenu cuana sa jacuatsasiati uja derejiji yani: “Mique eshanapa ibuneda baque. Mique majai duininibaque.” <sup>44</sup> Beju yama mu micuana uja equisainia: Micuana sa majai cuana ibuneda mebaque. Micuana madhabaji, neda aji cuana sa puji di Diusu mebajaque. <sup>45</sup> Ahua micuaneda daja ya su, micuaneda da Tata Diusu sa ene quita ebacua cuana epu. Tuahueda id'eti ed'iametani cristiano madhada, saida cuana bia su tupupai. Nai di edajajametani cristiano nimebutsepi, nimebutsepi mahue cuana bia su tupupai. <sup>46</sup> Ahua micuaneda micuana ibuneda ebatani cuana bahui ibuneda ebainia su, ¿ai puji saida ni da tueda pu cua? Daja Diusu shanapaji mahue a bahue. <sup>47</sup> Ahua micuaneda micuana sa eshanapa cuana bahui emitsu su, ¿ai puji saida ni da tueda pu cua? Daja Diusu shanapaji mahue cuana a bahue. <sup>48</sup> Beju micuaneseda butsepi, saida pamapa ai su pu taji, micuana sa Tata Diusu cielo su yani da saida, butsepi putsu.

## 6

*Daja hue Jesús ja cuaja ame ai mudu saida cuana buetsuaini-ame atana*

<sup>1</sup> 'Be cristiano cuana butse su ai saida cuana meaji micuana echamata huecuana puji bahui. Ahua micuaneda daja ya su, aimue Tata Diosu ja micuana cielo su echuje etiata mahue. <sup>2</sup> Puri quitaita cuana micuaneda etsahua su, be aidhe biame mequisaji. Be bubeta cuana ja yatani nime meaji. Tuneda da puri cuana tsahua putsu, pamapa cristiano cuana mecuana sa quisata tsada. Jadhitati jude ete cuana su, ejude duje di mecuana sa quisata tsada. Daja yatani huecuana cristiano cuana ja saida pabata huecuana puji. Beju yama micuana ene putsu equisainia, ahua cristiano cuana tuna jepuiti saida emimita su, tueda da mecuana sa echuje pu cua nime. Aimue Diosu ja echuje etiata huecuana mahue. <sup>3-4</sup> Da putsu beju, puri quitaita cuana micuaneda etsahua su, be aidhe biame quisaja meaji. Ahua daja micuaneda ya su, Diosu ja micuana echuje etiatayu. Tsahuataja cuana cuatsa mahue tsahua taji. Be aidhe biame bahue papu micuaneda yainia ai cuana. Be micuana sa eshanapa quitaita cuana biame bahue paputa. Beju micuana sa Tata Diosu ja pamapa micuaneda etsia neje yainia ai saida cuana ebatani putsu, micuana echuje etiatayu.

*Daja hue Jesús ja cuaja Diosu mitsume buetsuainiame atana (Lucas 11.2-4)*

<sup>5</sup> 'Be Diosu memitsuji bubeta cuana ja emitsutani nime. Tuneda da jadhitati jude ete cuana su, ejude duje di mecuana sa netita tsada Diosu emitsu puji, cristiano cuana ja pachamata huecuana puji. Beju yama micuana ene putsu equisainia, ahua cristiano cuana tuna jepuiti saida emimita su, tueda da mecuana sa echuje pu cua nime. Aimue Diosu ja echuje etiata huecuana mahue. <sup>6</sup> Da putsu, micuaneda Diosu mitsuja su, micuana sa ete su menubique. Meterique ete. Tata Diosu neje bahui meanique tu emitsu puji. Beju pamapa micuaneda etsia neje ai ebajainia cuana Diosu ja id'aba putsu, micuana etiatayu.

<sup>7</sup> 'Beju micuaneda Diosu emitsunia je, be tueda hue atiyu atiyu meaji. Daja da Diosu mue shanapa cuana ja a bahue. Tuna sa piba su tueda hue atiyu atiyu a putsu, Diosu ja eid'abata pepe eputani huecuana. <sup>8</sup> Be tuna nime mepuji. Micuana sa ai mahue ai cuana beju Tata Diosu bahue, micuaneda bajaji mahue su. <sup>9</sup> Da putsu, uja mitsume meaque:

Ecuanaja sa Tata, cielo su yani, mique ebani iyuda papu. Cuatsasiapiruenique ye mundo su.



<sup>10</sup> Mique ai tsada cuana bahui cristiano cuana ja ye mundo su paata, cuaja cielo su aniji cuana ja yatani nime.

<sup>11</sup> Pamapa tsine ecuanaju tiaque ai dia taji cuana.

<sup>12</sup> Perdonaque ecuanaju sa jucha cuana, cuaja ecuanaju madhada aji cuana eperdonainia nime.

<sup>13</sup> Be ecuanaju Ishahua peje su pirubameji.

Tusa eme jenetia d'oji su ecuanaju aque.

Tucheda neje cuatsasiaenique.

Daja papu.

<sup>14</sup> 'Daja hue micuaneseda Diusu mitsu taji. Ahua micuaneda micuana madhada aji cuana eperdonata su, daja huecha Tata Diusu ja micuaneda di eperdonatayu. <sup>15</sup> Ahua aimue micuaneda micuana madhada aji cuana perdonaja mahue ya su, daja huecha Tata Diusu ja micuana sa jucha cuana aimue eperdonata mahue.

*Daja hue Jesús ja ayuno jepuiti buetsuainiame atana*

<sup>16</sup> 'Beju micuaneda ayuna epuani je, be etacuamadhatiani ebuji mepuji. Daja bubeta cuana pu bahue cristiano cuana ja tuneda ayuna eputani pabata puji. Beju yama micuana ene putsu equisainia, tueda da tuneseda puji echuje pu cua nime. Aimue Diusu ja echuje etiata huecuana mahue. <sup>17</sup> Beju micuaneda mu ayuna epuani je, meburucuatique, mepesutique aimue cristiano cuana micuaneda ayuna epuani bahue paputa mahue puji. <sup>18</sup> Micuana sa Tata Diusu bahui bahue papu. Tuahueda micuana echuje etiatayu.

*Daja hue Jesús ja ye mundo sa ai cuana jepuiti buetsuainiame atana*

*(Lucas 12.33-34)*

<sup>19</sup> 'Be meradanetiaji ai cuana ye mundo su, beju pamapa etaitanape putsu. Rahuirahui epupeta. Tsena ja ediapeta. Tsi puji cuana ja etsita. <sup>20</sup> Ebia su saida ai saida cuana cielo su eradanetia puji. Dapia mu da aimue ai biame emadhatiani mahue. Aimue musu, tsi puji yani mahue. Dapia mu da aimue ai biame etaitanape mahue. <sup>21</sup> Quepia micuana sa ai saida cuana eradaneti su, dapia micuaneda anija epu.

*Daja hue Jesús ja hueda jepuiti buetsuainiame atana*

*(Lucas 11.34-36)*

<sup>22</sup> 'Micuana sa etua da lámpara nime micuana sa equita sa puji. Ahua micuana sa etua saida su, saida echamati. <sup>23</sup> Ahua micuana sa etua saida mahue su, aimue saida echamati mahue. Daja huecha ahua micuaneda ai madhada cuana su bahui epibatiani su, apuda saida su micuaneda epuniuneti.

*Daja hue Jesús ja chipilu jepuiti buetsuainiame atana*

*(Lucas 16.13)*

<sup>24</sup> 'Beju aiya biame beta echua puji tupupai mebajata cua mahue. Piada echua puji bahui hue mebaja taji. Pia cuana mu aimue tsada ba taji mahue. Daja huecha ahua etse Diusu mebajaja su, aimue detse etse Diusu mebaja cua mahue chipilu ebia su tsada ebainia neje tupupai.

*Diusu ja mesa ebacua cuana inatsihua bahue*  
(Lucas 12.22-31)

<sup>25</sup> 'Be ebia su mepibapibaji ai dia taji, ejud'uji cuana jepuiti. ¿Ai puji saida ni da ye ai cuana jepuiti ebia su epibapiba puji? <sup>26</sup> Mechamaque d'ia janana cuana. Banabana bue mahue. Huiru putsu, ichaseta bue mahue biame, Tata Diusu ja emihuatani huecuana. Micuaneda mu d'ia janana cuana ebia su chujeme Diusu peje su. <sup>27</sup> Aimue detse etse ebia su bauda bauna cua mahue, pibapiba putsu. Daja huecha aimue detse etse sa ai dia taji cuana ani cua mahue, ebia su pibapiba putsu.

<sup>28</sup> '¿Ai puji ni da micuaneda ejud'uji jepuiti ebia su epibapibani? Mechamaque shasha cuana. Ania chidi emurutani mudu, badu bue mahue ta biame. <sup>29</sup> Beju yama micuana ene putsu equisainia, aimue echua puji Salomón chenu jajud'utidha ania shasha cuana nime mahue, tueda da ebia su chipiluji puidha biame. <sup>30</sup> Shasha neje Diusu ja nutsa ania chidi yatani. Beju jahue quita nutsa shasha neje ania chidi biame, mueta beju sarajiji cuati puji bahui saida epuani. Mepibatique nutsa cuana su. Ahua Diusu ja nutsa cuana ania chidi shasha neje yatani su, ¿aimue jia maida micuana Diusu ja ejud'utayu mahue? ¿Jucuaja su ni da micuaneda Diusu peje su aimue enimetucheatiani mahue? <sup>31</sup> Da su be ebia su mepibapibaji ai dia taji, ejud'uji cuana jepuiti. <sup>32</sup> Daja Diusu peje su jei eputani mahue cuana pu bahue. Beju micuaneda mu da aimue daja epu mahue, micuana sa aimue ai cuana Tata Diusu bahue putsu. <sup>33</sup> Equene Diusu bahui tsada mebaque. Tu butse su nimebutsepi bahui tsada mebaque. Ahua micuaneda daja ya su, Tata Diusu ja micuana pamapa ai saida cuana etiatayu. <sup>34</sup> Be ebia su mepibapibaji micuaneda cuaja mueta epu cuana su. Tsine meamea Diusu ja micuana etsahuatayu.

## 7

*Be pia cuana metuaquisaji*  
(Lucas 6.37-38, 41-42)

<sup>1-2</sup> 'Be pia cuana metuaquisaji. Ahua micuaneda pia cuana etuaquisa su, daja huecha Diusu ja micuaneda di eturuca etuaquisatayu, cuaja micuaneda pia cuana etuaquisainia nime. <sup>3</sup> ¿Jucuaja su ni da micuaneda pia edue sa etua su ai

d'ape chidi echamainia, beju micuana sa etua quitaita dume su aqui riji aida esa biame? <sup>4</sup> Ahua micuana sa etua su aqui riji aida esa su, ¿cuaja ni da micuana sa edue sa etua su ai d'ape chidi jemicuina cua? <sup>5</sup> ¡Bubeta micuaneda! Equene tsuhu mejemique aqui riji aida micuana sa etua jenetia. Daja a putsu, saida eba ai d'ape chidi edue sa etua su esa ejemi puji. Beju micuaneda jucha aidaji putsu, pia jucha huai chidi cuana micuaneseda puji cuaja tuaquisa taji mahue. Equene tsuhu micuana sa jucha mebasetatique pia cuana tuaquisaji mahue su.

<sup>6</sup> 'Aimue detse etse chujeneda ai cuana uchi, cuchu cuana jusiattia cua mahue, tueda chujeneda ai cuana tidhitidhiata cua putsu. Ejusiatiaji beju tsuita cua uchi, cuchu cuana ja. Daja huecha Diusu sa jabuetsuati ai cuana id'abaja mahue cuana be mequisaji.

*Jubida Diusu baja taji*

*(Lucas 11.9-13; 6.31)*

<sup>7-8</sup> 'Mebajaque Diusu. Ahua micuaneda Diusu ebaja su, tuahueda micuana etiatayu. Chacu putsu, micuaneda etejeyu. Meturubaderaque. Turuba putsu, etsequed'iatiyu.

<sup>9</sup> 'Ahua micuana sa ebacua cuana ja pan ebajatani su, ¿ai micuaneda tumu etia bata? <sup>10</sup> Ahua micuana sa ebacua cuana ja se ebajatani su, ¿ai micuaneda bacua etia bata? <sup>11</sup> Micuaneda deja juchaji cuana biame, micuana sa ebacua cuana ai saida cuana tia bahue. Beju Diusu mu da ebia su saida putsu, tu bajaji cuana ebia su ai saida cuana tia bahue.

<sup>12</sup> 'Da su cuaja micuana sa tsada pia cuana ja micuana yata su, daja micuaneda di meaque huecuana. Daja Moisés chenu ja cuatsasiataidha mesa jacuatsasiati cuana su. Diusu sa profeta chenu cuana ja di daja deretaidha.

*Daja hue Jesús ja buetsuainiame atana edid'i upahai chidi jepuiti*

*(Lucas 13.24)*

<sup>13</sup> 'Beju menubique eteriji upahai chidi je. Cuati castigo su ecuinahu edid'i mu pahaida. Mesa eteriji di pahaida. Da da dueji cristiano cuana enubitani. <sup>14</sup> Beju Diusu peje su ecuinahu edid'i mu da beju upahai chidi hue. Mesa eteriji di beju upahai chidi hue. Da da quejucua chidi hue cristiano cuana enubitani.

*Daja hue Jesús ja buetsuainiame atana ejaja cuana jepuiti*

*(Lucas 6.43-44)*

<sup>15</sup> 'Merejatique bid'umimi puji cuana neje. Tuneda, "Ecuanaaju da Diusu sa puji emimiani", eputani. Tuneda huisha nime nimeme micuana peje su eputani biame, beju micuana duju su iba d'aida nime eputani huecuana. <sup>16</sup> Tuna

sa ai puiti cuana jepuiti hue micuaneda eshanapaeni tuneda saida ahua mahue. Aimue detse etse junu requerequeji jenetia ejaja saida huiru cua mahue. <sup>17</sup> Beju pamapa equi saida cuana mu ejaja saida eputani. Daja huecha pamapa equi saida mahue cuana ejaja saida mahue eputani. <sup>18</sup> Beju equi saida mu aimue detse ejaja saida mahue pu cua mahue. Daja huecha equi saida mahue aimue detse ejaja saida pu cua mahue. <sup>19</sup> Pamapa equi saida mahue cuana ejaja saida pu bue mahue beju que putsu, d'ed'a taji. <sup>20</sup> Beju micuaneda deja bid'umimi puji cuana eshanapaeni, tuna sa ai puiti madhada cuana ba putsu.

*¿Aidhe da cielo su enubiti?*  
(Lucas 13.25-27)

<sup>21</sup> 'Piada piada cuana ja ema: "Echua Puji", yatani biame, ahua Diosu sa tsada aja mahue eputa huecuana su, aimue cielo su enubita huecuana mahue. Quema Tata Diosu sa tsada aji cuana bahui cielo su enubitayu. <sup>22</sup> Beju castigo tsine ecuina su, jucuada cristiano cuana ja ema equisata uja: "Echua Puji, ecuanaju da mique ebani su mimiana. Einid'u madhada cuana cristiano cuana peje jenetia ecuanaju jusiacuina mique ebani neje. Mique ebani neje da jucuada ai nimetiuda aida cuana ecuanaju ana." <sup>23</sup> Beju daja ema yata huecuana su, yama uja ejeutsu huecuana: "Aimue yama micuana shanapa. Menetideraque ema peje jenetia, micuaneda da cristiano madhada putsu."

*Daja hue Jesús ja beta ete detse jepuiti buetsuainiame atana*  
(Marcos 1.22; Lucas 6.47-49)

<sup>24</sup> 'Quebata ja quema jabuetsuati yatani su, tueda da ete muduji deja bahue eni nime. Tueda deja ja ete mudutana eti jude saida bia su. <sup>25</sup> Beju nai jubida puana putsu, ena aida nubiana. Jubida dhapujutana ete. Beni ja di ete dhapujutana jubida. Beju dhapujutana biame, mue dajajame atana ete, eti jude saida bia su ajiji putsu. <sup>26</sup> Beju quebata ja quema jabuetsuati aimue yatani mahue su, tueda da ete muduji deja bue mahue nime. Tueda deja ja ete mudutana yahua saida mahue bia su. <sup>27</sup> Beju nai jubida puana putsu, ena aida nubiana. Jubida dhapujutana ete. Beni ja di ete dhapujutana jubida. Beju dajajana ete, ebia su dhapujutana putsu. Taitanapetana pamapa beju. Daja nime quema jabuetsuati aja mahue yatani cuana.

<sup>28</sup> Daja Jesús ja buetsuapetana su, cristiano cuana ebia su nimetiunetitana, Jesús ja huaraji aida mimi neje buetsuatana huecuana putsu. <sup>29</sup> Mesa jabuetsuati quitaita cuana buetsuatana. Aimue jacuatsasiati ebuetsuaji cuana nime

buetsuame atana mahue. Tuna ebia su saida buetsuataina, tuneda pia sa jabuetsuati cuana buetsuataina putsu.

## 8

*Jesús ja lepraji deja saisiametana*  
(*Marcos 1.40-45; Lucas 5.12-16*)

<sup>1</sup> Beju Jesús ja cristiano cuana buetsuape putsu, murucu aida je buteana. Dueji cristiano cuana ja tije atana. <sup>2</sup> Piada deja lepraji ja Jesús nariatana. Tu butse su tururu putsu, uja atana Jesús:

—Echua Puji, ahua mique tsada su, miada ema saisiametana.

<sup>3</sup> Da su Jesús ja deja d'apabatana. Uja atana deja:

—Tsada quema. Mida esaisi.

Jesús daja epuani cama, deja lepraji saisiana. <sup>4</sup> Neicha Jesús ja atana deja:

—Be aidhe biame quisaji. Jabametitique sacerdote peje su tuahueda mi saisijiji pabata puji. Da su beju Diosu irutsuaque, cuaja Moisés chenu sa jacuatsasiati epuani batame, pamapa cristiano cuana ja mida saisijiji pashanapata puji.

*Capitán sa emebajaji nedaji Jesús ja saisiametana*  
(*Lucas 7.1-10*)

<sup>5</sup> Da su beju Jesús Capernaum ejude su putibana. Dapia ejude su romano soldado cuana sa capitán ja Jesús uja bajatana:

<sup>6</sup> —Echua Puji, quema emebajaji da nedaji ete su esa. Rubu-rubu bue mahue. Ebia su sufri epuani tueda neda neje.

<sup>7</sup> Da su Jesús ja capitán uja atana:

—Eputi da ema tu esaisiametana puji.

<sup>8</sup> Capitán ja uja jeutsutana:

—Echua Puji, ema mu aimue aidhe eni mahue quema ete su mida enubi puji. Beju mi yani jenetia cuatsasiaque hue quema emebajaji pasaisi puji. <sup>9</sup> Ya di quema echua puji sa jacuatsasiati ema su yani.

Daja huecha quema soldado cuana yani. Quema jacuatsasiati ema su yanita huecuana. Pamapa quema jacuatsasiati cuana yatani huecuana. Quema emebajaji cuana ja di quema jacuatsasiati cuana yatani. Da su ema bahue ahua miada u jenetia hue cuatsasia cua su, quema emebajaji saisi cua.

<sup>10</sup> Jesús ja daja id'aba putsu, nimetiunetiana. Mesa ebuqueji cuana uja atana:

—Ene putsu, yama micuana equisainia, pamapa Israel yahua je aimue yama aidhe biame ye deja nime ba. Aimue aidhe biame Diosu peje su tu enimetuheatiani nime yama ba. <sup>11</sup> Ene putsu, jucuada israelita mahue cristiano cuana

ye capitán nime pamapa mundo je cielo su enubita. Dapia yaniuteta huecuana Abraham, Isaac, Jacob chenu cuana neje ediadia puji. <sup>12</sup> Beju Diosu ecuatsasiati da israelita cuana sa puji biame, aimue pamapa tuneda enubita mahue. Jucuada tuneda uqueda, apuda su Diosu ja ebeituta. Dapia apuda su ebia su epata, etsedhaitita ebia su sufri eputa huecuana putsu. <sup>13</sup> Da su Jesús ja neicha hue capitán atana:

—Putiyuque mique ete su. Mi jei puitia batame beju epu.  
Da hora su beju emebajaji saisiana.

*Jesús ja Pedro sa ehuané sa cuara nedaji saisiametana*  
(*Marcos 1.29-31; Lucas 4.38-39*)

<sup>14</sup> Da su beju Jesús da Pedro sa ete su putiana. Dapia Pedro sa ehuané sa cuara nedaji saina. <sup>15</sup> Jesús ja tusa eme inatana cama, beju saisiana. Da su epuna netiana putsu, bapirutana huecuana.

*Jesús ja ebia su nedaji cuana saisiametana*  
(*Marcos 1.32-34; Lucas 4.40-41*)

<sup>16</sup> Beju dhidha su cristiano cuana ja einid'u madhadaji cuana dusutana Jesús peje su. Mesa mimi neje hue tuahueda einid'u madhada cuana jusiacuinatana cristiano cuana peje jenetia. Pamapa dapia nedaji cuana di saisiametana. <sup>17</sup> Beju daja puana, cuaja Diosu sa profeta Isaías chenu ja deretaidha batame. Uja derejiji yani: “Tuahueda ecuana sa ai neda cuana saisiametana.”

*Cuaja Jesús tije ame*  
(*Lucas 9.57-62*)

<sup>18</sup> Beju Jesús ja dueji cristiano cuana tu ebarereatani batana putsu, cuatsasiatana discípulo cuana bai chu maje paania-petuta huecuana puji. <sup>19</sup> Dapia piada jacuatsasiati ebuetsuaji ja Jesús atana:

—Ebuetsuaji, yama mi tije aja quepia mi epuhu su.

<sup>20</sup> Jesús ja jeutsutana:

—Cuacuacuacua cuana sa rara yanita. D'ia cuana sa esaji yanita. Beju quema mu ai mahue quepia echua epahuati puji.

<sup>21</sup> Da su pia Jesús sa ebuqueji ja uja atana:

—Echua Puji, quema tata papa putsu chu, yama mi tije ya.

<sup>22</sup> Da su Jesús ja tueda jeutsutana:

—Jiahue ema tije aque. Diosu shanapaji mahue cuana ja hue tuna sa manujiji cuana papapata.

*Jesús ja beni, bai mitanametana*  
(*Marcos 4.35-41; Lucas 8.22-25*)

<sup>23</sup> Da su beju Jesús da discípulo cuana neje canoa aida su nubiana bai epetu puji. <sup>24</sup> Yanipetutasa cama, beni ebia su jubida pupiruana. Ena netianametana aida. Canoa dume

su ena nubiana. Daja epuani biame, Jesús da canoa dume su tahuisaina. <sup>25</sup> Da su discípulo cuana ja tueda id'edeatana. Jubida atana huecuana uja:

—¡Echua Puji, d'eji su ecuanaju aque! ¡Beju canoa yaninubiani!

<sup>26</sup> Jesús ja jeutsutana huecuana:

—¿Ai puji ni da micuaneda iyuame cuatajuse epuani? ¿Jucujaja su micuaneda aimue Diusu peje su enimetucheatiani mahue?

Jesús daja mimi putsu, netianana. Beni, bai d'ayatana. Da su beju mitanasaisiana pamapa. <sup>27</sup> Discípulo cuana beju nimetiunetitana. Tuneda cama uja jaquisatitana:

—¿Ai deja jia ye? Beni ja biame tueda eid'abatani. Bai ja di tusa jacuatsasiati eiyubatani.

*Beta deja einid'u madhadaji detse  
(Marcos 5.1-20; Lucas 8.26-39)*

<sup>28</sup> Jesús da bai chu maje satsuati putsu, beta deja einid'u madhadaji detse dapia panteo jenetia cuinanana. Tuatseda einid'u madhadaji putsu, ebia su ate cristiano cuana neje puina. Da putsu, cristiano cuana dapia edid'i su aimue jaitianaja mahue putaina. Beju tuatseda Jesús peje su janariatiana. <sup>29</sup> Tsiatsia neje uja Jesús atana tse:

—Jesús, Diusu sa Ebacua, ¿ai mique etseju neje yani? ¿A da miada etseju castigo su ebeitu, etseju sa castigo hora cuinaji mahue su?

<sup>30</sup> Chuadera beju dueji cuchí cuana diadianiunetitaina. <sup>31</sup> Beju einid'u madhada cuana ja Jesús atana:

—Ahua miada ecuanaju ye deja detse peje jenetia ejusiacuina su, d'eji ecuanaju tiaque cuchí cuana sa equita cuana su enubi puji.

<sup>32</sup> Da su Jesús ja d'eji tiatana huecuana.

Beju einid'u madhada cuana deja detse peje jenetia cuinana putsu, cuchí cuana sa equita cuana su nubitana huecuana. Nubitana su, cuchí cuana jududutana bai su. Bai equehuehueji butsepi je dajajautetana. Dajajaute putsu huidipetana. <sup>33</sup> Da su beju cuchí quinaji cuana tipei pume ejude su tipeida jududutana. Dapia beju pamapa cuaja ai puana cuana quisapupirutana huecuana. <sup>34</sup> Da su pamapa ejude cristiano cuana putitana Jesús peje su ebati puji. Tu peje su cuinati putsu, beju jubida Jesús bajapirutana huecuana papuenitiyu tuna sa yahua jenetia puji. Da su Jesús putibana.

## 9

*Jesús ja deja ase bue mahue saisiametana*  
(*Marcos 2.1-12; Lucas 5.17-26*)

<sup>1</sup> Da su beju Jesús canoa aida su nubiana. Neicha bai su anipetutaibana u maje je. Satsuati putsu, mesa ejude su putibana. <sup>2</sup> Dapia Jesús yani su, deja ase bue mahue chahui su dusutana huecuana. Beju Jesús ja nedaji duseji cuana tu peje su ebia su enimetuheatitani ba putsu, uja atana nedaji:

—Deja, janimetuheatique, yama mique jucha cuana perdonaitia putsu.

<sup>3</sup> Da su piada piada jabuetsuati ebuetsuaji, dapia netitana cuana tuneda cama japibatitana uja: “¿Ai deja ja juchaji cuana perdonata cua bata? Diusu ja bahui juchaji cuana perdonata cua. Ye Jesús ja mesa mimi neje Diusu emadhabatani. Beju Diusu puja epuani.” <sup>4</sup> Da su Jesús ja tuna sa piba cuana eshanapatani putsu, uja atana huecana:

—¿Ai puji micuaneda daja madhada epibatiani? <sup>5</sup> Ahua yama deja, “Mique jucha cuana yama eperdonainia”, ya su, ahua yama, “Netianaque, asequé”, ya su, beju quema puji mu tupupai hue. <sup>6</sup> Daja yama deja yainia micuana ebame puji, ye mundo su ema tucheda eni cristiano cuana sa jucha cuana eperdona puji.

Da su Jesús ja uja deja nedaji cuatsasiatana:

—Netianaque. Mique chahui jemitsuaque. Putiyuque mique ete su.

<sup>7</sup> Da su beju deja netianana. Mesa ete su saisijiji putibana.

<sup>8</sup> Cristiano cuana ja ba putsu, ebia su nimetiunetitana huecuana. Diusu sa puji saida mimitana huecuana, Diusu ja Jesús daja tucheda tiatana putsu.

*Jesús ja Mateo dharetana*  
(*Marcos 2.13-17; Lucas 5.27-32*)

<sup>9</sup> Beju da jenetia Jesús putiana. Chuadera pad'i deja Mateo banime batana. Tueda impuesto chujebaja jude su anina. Jesús ja tueda uja atana:

—Tije ema aque.

Da su Mateo netianana Jesús ebuque puji.

<sup>10</sup> Jesús da Mateo sa ete su putiana mesa discípulo cuana neje ediadia puji. Tuna neje misha su ediadia puji deja juchaji cuana anitaina. Impuesto chujebajaji cuana di anitaina. <sup>11</sup> Da su fariseo cuana ja ba putsu, discípulo cuana uja quisabatana huecuana:

—¿Jucuaja su ni micuaneda impuesto chujebajaji, juchaji deja cuana neje ediadiani?

<sup>12</sup> Jesús ja fariseo daja equisabatani id'abatana putsu, uja atana huecuana:



—Beju jaiduenetiji da aimue saida cuana sa puji mahue. Nedaji cuana sa puji bahui. <sup>13</sup> Uja Diusu ja deremetaidha mesa quirica su: “¿Ai puji saida ni da pu cua ema peje su animalo cuana eirutsua emitsutsua puji, micuaneda edue cuana aimue ibuneda ebainia mahue biame?” Da su jabuetsuati taji Diusu puidha derejiji ai cuana. Aimue ema pue butsepi ebatitani cuana ema peje su eihua puji mahue. Juchaji cuana bahui eihua puji ema pueana Diusu peje su papibaturucatita huecuana puji.

*Jesús ayuno jepuiti quisabatana*  
(Marcos 2.18-22; Lucas 5.33-39)

<sup>14</sup> Da su beju Juan Bautista sa ebuqueji cuana ja Jesús nariatana. Uja quisatana huecuana:

—Ecuanaaju fariseo cuana neje tupupai ayuna epuani. ¿Jucuaaja su ni da mique discípulo cuana aimue ayuna eputani mahue?

<sup>15</sup> Jesús ja bahue quisa neje uja jeutsutana huecuana:

—¿Ai jahuaneti tsine su ihuajiji cuana ebia su japadaritita cua bata, ehuanetisa deja tuna neje yani tupu? Ehuanetisa deja tuna neje yani tupu, ihuajiji cuana aimue ayuna eputa mahue. Tueda ihuajiji cuana duju jenetia ejemicuinata su chu, da hora su ihuajiji cuana ayuna eputa, aimue tueda tuna neje yani mahue putsu. Daja nime da quema discípulo cuana. Aimue ayuna eputani mahue huecuana, ema tuna neje yani hue putsu.

*Jesús sa jabuetsuati da eichacua*

<sup>16</sup> ‘Aimue detse etse ejud’uji edhi remetia cua mahue pia eped’u eichacua neje. Beju tueda remetia eichacua ja ejud’uji edhi d’iuta cua. Da su d’iujiji detse ebia su ainameta cua. <sup>17</sup> Daja huecha aimue vino eichacua etse emeji edhi su ichaseta cua mahue. Ahua daja etse a cua su, vino eichacua ja emeji pujuta cua. Da su vino, emeji neje tupupai taitana cua. Da putsu, vino eichacua emeji eichacua su icha taji. Daja a putsu, pamapa saida epu. Vino, emeji neje tupupai saida epu.

Daja Jesús ja bahue quisa neje buetsuatana huecuana. Mesa jabuetsuati eichacua cuana da vino, eped’u eichacua nime. Fariseo cuana sa jabuetsuati cuana mu emeji, ejud’uji edhi nime. Beju aimue huamahuama ehuaruti mahue.

*Jesús ja epuna saisiamé tana. Jairo sa ebaquepuna id’emetaibana*  
(Marcos 5.21-43; Lucas 8.40-56)

<sup>18</sup> Beju Jesús ja daja ebuetsuatani cama, piada judío cuana sa edusuji cuinana. Jesús butse su tururuana. Tururu putsu, uja atana Jesús:

—Quema ebaquepuna beju jiahue quita manuitia. Pueque ema neje quema ete su. Dapia mique eme tu bia su ichaque tu eid'eyu puji.

<sup>19</sup> Da su Jesús netiana putsu, tu neje putiana. Discípulo cuana di tu neje putitana. <sup>20</sup> Beju tuneda epuhu cama, piada epuna nedaji ja Jesús etibeini je nariatana. Tueda epuna piada tunca beta ejaitiana mara aimue mesa ami riji puja mahue puana. Beju naria putsu, Jesús sa ejud'uji tihue d'apabatana. <sup>21</sup> Uja epuna japibatiana: “Ahua mesa ejud'uji biame yama d'apaba cua su, ema saisi cua beju.” <sup>22</sup> Jesús da jababarereati putsu, epuna batana. Beju uja atana:

—Epuna chidi, janimetuheatique. Mi ema peje su jei puitia putsu, beju mida saisitia.

Da hora su hue epuna saisiana.

<sup>23</sup> Beju Jesús da edusuji sa ete su cuinati putsu, mui turuji deja cuana ebasetatitani epapapapati puji batana. Cristiano cuana di ebia su epadarititani batana. <sup>24</sup> Da su uja Jesús ja atana huecuana:

—Mecuinanaque u jenetia. Epuneje aimue emanu mahue. Tueda mu etahuisa hue.

Da su cristiano cuana tu neje jaid'ebatitana, Jesús ja daja atana huecuana putsu. <sup>25</sup> Da su etseque su cuinanametana huecuana. Epuneje esa su nubiana. Mesa eme ina putsu, id'emetaibana. <sup>26</sup> Beju Jesús ja epuneje id'emetaibana jepuiti, cristiano cuana pamapa tueda yahua je ebia su quisaquisa putana.

### *Jesús ja beta deja padha detse tuaji ametana*

<sup>27</sup> Jesús da jenetia cuinanana su, beta deja padha detse ja tije atana. Beju tsiatsia neje uja bajatana tse:

—¡Jesús, David chenu sa familia jenetia, ibunebaque etseju!

<sup>28</sup> Jesús da ete su cuinati putsu, nubitiana. Deja padha detse ja nariatana. Da su Jesús ja tuatseda uja quisabatana:

—¿A da metseda jei epuani yama metse tuaji yame puji?

Da su jeutsutana tse:

—Ehe, Echua Puji. Jei epuani etseju.

<sup>29</sup> Da su Jesús ja tuatse sa etua d'apaba putsu, uja atana tse:

—Beju daja papu cuaja metse jei epuani batame.

<sup>30</sup> Da hora su beju tuaji puana tse. Jesús ja jubida cuatsasiatana tse aimue tuatseda aidhe papu paquisata mahue puji.

<sup>31</sup> Jesús ja daja cuatsasiatana biame, pamapa cuaja Jesús ja atana tueda yahua je quisapuniunetiana.

### *Jesús ja mimi bue mahue saisiametana*

<sup>32</sup> Beju tuatseda ete jenetia cuinanana su, deja mimi bue mahue Jesús peje su dusutana pia cuana ja. Tueda deja einid'u madhadaji puina. <sup>33</sup> Jesús ja einid'u madhada deja

peje jenetia jusiacuinatana su, deja mimipiruana. Dapia aniji cristiano cuana nimetiunetitana. Uja putana huecuana:

—Quetsunu su biame ecuana sa yahua su ye nimetiuda aida cuana ba bue mahue.

<sup>34</sup> Beju fariseo cuana sa tsada mahue puana. Uja atana huecuana:

—Ye deja ja nimetiuda ai cuana yatani Ishahua sa tucheda neje.

### *Jesús ja cristiano cuana ibunebatana*

<sup>35</sup> Beju Jesús da ejude meamea ebuetsua puniunetiana. Jadhitati jude ete cuana je buetsuatana. Diusu sa ai quisa saida cuana quisaquisa puniunetiana. Pamapa piapiati nedaji cuana saisiametana. <sup>36</sup> Daja ba putsu, Jesús ja ebia su ichenubatana cristiano cuana, huisha cuana equinaji mahue nime batana huecuana putsu. Ebia su jatacuamadhatitana huecuana. <sup>37</sup> Da su Jesús ja mesa discípulo cuana uja atana:

—Enei hue, dueji yani ehuru puji biame, ehuruji cuana beju pishihue. Cristiano cuana da ejaja esuru ehuru puji quitaita nime. <sup>38</sup> Diusu da huiruhuru emetse nime. Meba-jaque tueda mesa quisaquisa puji cuana cristiano cuana peje su pabeituta puji, mesa quisa saida cuana tuna peje su quisaquisa epu puji.

## 10

### *Jesús sa piada tunca beta ejaitiana discípulo cuana* (*Marcos 3.13-19; Lucas 6.12-16*)

<sup>1</sup> Da su beju Jesús ja mesa piada tunca beta ejaitiana discípulo cuana tu peje su ihuatana. Huaratitana huecuana einid'u madhada cuana cristiano cuana peje jenetia ejusi-acuina puji, pamapa piapiati nedaji cuana esaisiame puji.

<sup>2-4</sup> Ye da discípulo cuana sa ebani cuana:

Simón. Mesa pia ebani da Pedro.

Andrés. Pedro sa edue.

Jacobo. Juan sa edue.

Juan. Jacobo sa edue. Tuatseda da Zebedeo sa ebacua detse.

Felipe.

Bartolomé.

Tomás.

Mateo. Tueda da impuesto chujebajaji.

Jacobo. Alfeo sa ebacua.

Lebeo. Mesa pia ebani da Tadeo.

Simón. Partido cananista jenetia.

Judas Iscariote. Tueda da Jesús menajatiaji. Tuneda da

Cristo sa piada tunca beta ejaitiana discípulo cuana.

*Jesús ja mesa discípulo cuana beitutana quisaquisa epu puji*  
(*Marcos 6.7-13; Lucas 9.1-6*)

<sup>5</sup> Da su beju Jesús ja mesa discípulo cuana beitutana quisaquisa epu puji. Uja cuatsasiatana huecuana:

—Be meputiji judío cuana yani mahue su. Be menubiji Samaria yahua su. <sup>6</sup> Israel yahua cristiano cuana peje su bahui meputique. Tuneda da huisha jeitid'ujiji nime. <sup>7</sup> Uja mequisatique huecuana: “Beju Diosu ecuatsiasiati enariatiani.” <sup>8</sup> Nedaji, lepraji cuana mesaisiametique. Manujiji cuana meid'edeatique. Einid'u madhada cuana mejusi-acuinatique cristiano cuana peje jenetia. Be cristiano cuana mechujebajaji, Diosu ja mesa tucheda micuana cha tia hue atana putsu.

<sup>9</sup> ‘Be chipilu, shitara medusutiji. <sup>10</sup> Piada ejud'uji cama hue medusutique. Be beta medusutiji. Piada pulucu butseji cama hue medusutique. Piada cama hue eituneji medusutique. Micuana id'abajaji cuana sa micuana sa ai ediaji cuana tia taji, pamapa mudu puji cuana sa inatsu taji echuje putsu.

<sup>11</sup> ‘Beju micuaneda quebata ejude su cuinati putsu, dapia da piada deja butsepi mechacuke. Tusa ete su meanique. Tueda ete su hue meanique tueda ejude jenetia ecuinana teje. <sup>12</sup> Quebata ete su micuaneda enubiani je, uja memitsuque ete emetse: “Diosu ja menimepijajametaque.” <sup>13</sup> Ahua ete su aniji cuana ja micuana sa quisa saida cuana eid'abata su, Diosu ja eibunebata huecuana, cuaja micuaneda mitsuana batame. Ahua ete su aniji cuana ja micuana sa quisa saida cuana aimue eid'abata mahue su, aimue Diosu ja eibunebata huecuana mahue. Da su micuana sa enubihu je, jamitsuti mimi tuneseda puji aimue saida mahue. <sup>14</sup> Ahua micuana id'abaja mahue yatani huecuana su, mecuinanaque tueda ete ahua ejude jenetia. Micuana sa pulucu jenetia med'i metaraque, Diosu tuna neje eduininiani pashanapata huecuana putsu. <sup>15</sup> Enei hue, yama micuana yainia, castigo tsine ecuina su, Diosu ja tueda ejude su aniji cristiano cuana Sodoma, Gomorra ejude detse su aniji cristiano cuana ebia su ecastigatayu.

*Cristiano cuana ja Jesús peje su jei eputani cuana eduinini-bata Jesús ja daja hue quisainiame atana huecuana*

<sup>16</sup> ‘Meid'abaque ema. Micuaneda da huisha nime. Yama micuana ebeituinia deja iba d'aida cuana nime duju su. Da su nimemitsida biame, pirida mepuque. <sup>17</sup> Merejatique, cristiano cuana ja micuana huaraji cuana peje su emenajatiata putsu. Jadhitati jude ete cuana su micuana eicheta huecuana. <sup>18</sup> Huaraji aida cuana butse su micuana etuaquisata huecuana, micuaneda quema ebuqueji cuana putsu. Da su

tuna butse su eneti su, ema jepuiti micuaneda equisaneti-acuinati. Judío mahue cuana butse su di ema jepuiti equisaneti-acuinati. <sup>19</sup> Da hora su micuana huaraji aida butse su edusuta huecuana su, be mepibapibaji cuaja micuaneda ja-jeitsutime epu. Micuaneda emimi hora su Diusu ja micuana mimi cuana etiata ejeitsu puji. <sup>20</sup> Beju Espiritu Santo quitaita ja mesa piba cuana micuana peje jenetia emimi.

<sup>21</sup> 'Da tiempo su beju cristiano cuana ja ema peje su jei eputani cuana huaraji cuana peje su emenajatiata pamanuameta huecuana puji. Edue cama emenajatiata. Tata cuana ja mecuana sa ebacua cuana emenajatiata. Daja huecha ebacua cuana ja mecuana sa tata cuana emenajatiata pamanuameta huecuana puji. <sup>22</sup> Pamapa cristiano cuana ja micuana eduininibata ema jepuiti. Daja biame, quebata emanu teje ema peje su daja hue enimetuheaderati su, tueda da d'ejí su epueni. <sup>23</sup> Ahua piada ejude su micuana eichetani huecuana su, pia ejude su mejududuque. Beju micuaneda pamapa Israel yahua sa ejude cuana je quisaquisa pupeji mahue su, ema epueicha.

<sup>24</sup> 'Beju ebuetsuatiani da aimue mesa ebuetsuaji ebia su aida pu cua mahue. Daja huecha emebajaji aimue mesa emetse ebia su aida pu cua mahue. <sup>25</sup> Ema da micuana sa Echua Puji, Ebuetsuaji. Cristiano cuana ema pa Ishahua peje jenetia eputani. Daja ema emadhabatani huecuana biame, micuaneda ema ebia su emadhabata huecuana, micuaneda da quemá emebajaji cuana putsu.

*¿Aidhe ni etse ebia su iyuba cua?*  
(Lucas 12.2-9)

<sup>26</sup> 'Beju daja papu biame, be jamadhabatiji cuana meiyubaji. Pamapa ai etsia piba neje ajiji ai cuana Diusu ja ebameta. Pamapa etsia quisa cuana Diusu ja cristiano cuana eshanapameta. <sup>27</sup> Da su yama micuana etsia neje ebuetsuainia cuana jubida mequisaque. <sup>28</sup> Ate cristiano cuana be meiyubaji. Micuana manumeta cua huecuana biame, aimue micuana sa enid'u mu cuaja madhada ata cua mahue. Beju Diusu bahui iyuba taji, tuahueda cristiano cuana manuame putsu, tuna sa enid'u cuana cuati castigo su beituta cua.

<sup>29</sup> 'D'ia janana chujeneda mahue ebaja puji biame, aimue detse yahua su dajaja cua mahue, ahua Tata Diusu sa tsada mahue su. <sup>30</sup> Beju pamapa micuana sa echuaina cuana idadajiji. Piada piada cama Diusu ja eshanapatani. <sup>31</sup> Da su be iyuame mepuji, micuaneda da Diusu peje su d'ia janana ebia su chujeji putsu.

*Cristo jepuiti jaquisanetiacuinati taji cristiano cuana butse su*  
(Lucas 12.8-9)

<sup>32</sup> 'Ahua quebata cuana, "Ecuanaaju da Jesús sa ebuqueji cuana", cristiano cuana butse su eputa su, da su ema, "Tuneda da quema puji cuana", quema Tata Diosu butse su epu. <sup>33</sup> Daja huecha quebata cuana, "Jesús neje ecuanaju sa mue ai biame a taji", eputa su, ema, "Tuna neje quema mue ai biame a taji", quema Tata Diosu butse su epu.

*Jesús jepuiti cristiano cuana jasajasajatitana*  
(Lucas 12.51-53; 14.26-27)

<sup>34</sup> 'Beju ye mundo su ema pueana cristiano cuana pasajasajatita puji. Ema pueana putsu, aimue cristiano cuana tuneda cama huamahuama saida edusutita mahue. <sup>35</sup> Ema jepuiti ebacua mesa tata neje eduininibati. Ebaquepuna mesa cuara neje eduininibati. Eba cuasane mesa yahue sa cuara neje eduininibati. <sup>36</sup> Beju familia cama quitaita da eduininibatita ema jepuiti.

<sup>37</sup> 'Quebata quema ebuqueji puja epu su, ema mesa tata, cuara detse, ebacua cuana ebia su ibuneda pabata. <sup>38</sup> Quebata quema ebuqueji puja epu su, tuseda ema tije a taji emanu teje. <sup>39</sup> Quebata ja cuaja ebia su saida quita ani taji echacuta su, pamapa etaitanamepeta. Quebata ja mu cuaja ebia su saida quita ani taji echacuta mahue su, ema ibuneda ebatani putsu, tueda da saida Diosu neje eid'e epueniti.

*Diosu ja echuje etiata*  
(Marcos 9.41)

<sup>40</sup> Beju Jesús ja mesa discípulo cuana daja hue hue uja quisainiame atana:

—Quebata ja micuana ebatsuta su, tuahueda ema ebatsutani pu cua nime. Quebata ja ema ebatsuta su, tuahueda Tata Diosu ebatsutani pu cua nime, Diosu ja ema beitutana putsu.

<sup>41</sup> Beju quebata ja Diosu sa profeta ebatsuta su, Diosu ja profeta sa echuje huecha tueda cha tiayu hue yata. Quebata ja deja nimebutsepi saida ebatsuta su, Diosu ja deja nimebutsepi sa echuje huecha tueda cha tiayu hue yata. <sup>42</sup> Quebata ja quema ebuqueji ai chidi neje biame etsahuata su, beju Diosu ja tueda saida echuje etiatayu.

Daja Jesús ja mesa discípulo cuana quisapetana.

## 11

*Juan Bautista ja mesa ebuqueji detse Jesús peje su beitutana equísaba puji*  
(Lucas 7.18-35)

<sup>1</sup> Beju Jesús ja mesa piada tunca beta ejaitiana discípulo cuana daja quisape putsu, beitutana huecuana. Tueda di tu mehua putiana dapia yahua sa ejude cuana je quisaquisa epu puji.

<sup>2</sup> Da tiempo su Juan Bautista terijiji anina. Terijiji yani biame, Jesús ja ai yatani cuana shanapatana. Da su Juan ja beta mesa ebuqueji detse Jesús peje su beitutana tu equisaba puji. <sup>3</sup> Jesús peje su cuinati putsu, beju quisabatana tse uja:

—¿A da mida ecuanaju eid'uainia Diusu sa Jabeituti Deja cuaja Juan Bautista quisa puana nime? ¿Ahua ecuanaju pia eid'ua?

<sup>4</sup> Beju Jesús ja jeutsutana tse:

—Mequisatique Juan pamapa ai metse ebainia, eid'abainia cuana. <sup>5</sup> Mequisatique yama padha cuana beju tuaji yainia. Turu cuana yasemeinia. Lepraji cuana esaisiameinia. Jaid'abati bue mahue cuana eid'abameinia. Manujiji cuana eid'edeainia. Puri cuana peje su Diusu sa quisa saida cuana ema quisaquisa epuani d'eji su paputa huecuana puji. <sup>6</sup> Mequisatique Juan be ema peje su panimetuchearijiti. Quebata ema peje su daja hue enimetuchederati su, tueda da beidaji epu.

<sup>7</sup> Da su Juan sa jabeituti detse jasiapatibana su, Jesús ja dapia netina cristiano cuana uja quisapirutana Juan jepuiti:

—¿Ai eje ni da micuaneda putiana d'anita yahua su Juan peje su? ¿Ai eba puji micuaneda putiana? ¿Ahua bue enana beni ja ehuidhutaneti nime eba puji micuaneda putiana? <sup>8</sup> ¿Ahua deja ejud'uji chujeneda neje jud'ujiji eba puji micuaneda putiana? Beju deja ejud'uji chujeneda neje jud'ujiji cuana da echua puji sa ete aida su bahui yanita. Aimue d'anita su yanita huecuana mahue. <sup>9</sup> Beju, ¿ai eba puji micuaneda d'anita yahua su putiana? ¿A da Diusu sa profeta micuaneda batiana? Enei hue, Juan Bautista da pamapa Diusu sa equene profeta chenu cuana ebia su aida.

<sup>10</sup> Juan jepuiti Diusu sa quirica su uja derejiji yani:

Quema quisa puji yama ebeitu mi hui su cristiano cuana pabasetatita mi epue su puji. <sup>11</sup> Yama micuana ene putsu yainia, Juan Bautista da pamapa cristiano cuana ebia su aida. Beju daja biame, quebata ai eni mahue biame da Diusu ecuatsasiati su, tueda da Juan ebia su aida.

<sup>12</sup> 'Beju Juan da Diusu ecuatsasiati epusiu quisaquisa pupiruana jenetia, dueji cristiano cuana tueda quisa saida cuana su jubida neje jei eputani. <sup>13</sup> Juan quisaquisa pupiruji mahue su, pamapa Diusu sa equene profeta chenu cuana quisaquisa putaidha Diusu ecuatsasiati epusiu jepuiti. Moisés chenu ja di Diusu ecuatsasiati jepuiti deretaidha.

<sup>14</sup> Beju Juan da Diosu sa profeta Elías chenu nime tuchedame Diosu ecuatsasiati epusiu cristiano cuana equisa puji.

<sup>15</sup> Ahua micuaneda id'ajararaji su, meid'abaque.

<sup>16</sup> '¿Cuaja ni da jiahue tiempo cristiano cuana? Tuneda da yanana chidi cuana etseque je esitutitani nime. <sup>17</sup> Uja tsiatsia neje yatani huecuana mecuana sa eshanapa cuana: "Ecuanaju mui turuana micuaneda beidaji etiritiri puji. Beju micuaneseda tsada mahue puana, paja puana putsu. ¡Jade! Da su beju ecuanaju beidaji mahue satsu cuana satsuana micuaneda epa puji. Daja biame, micuaneda paja mahue puana, beidaji puja puana putsu. Beju ecuanaju micuana cuaja beidaji ame taji mahue ebainia." Beju tueda jasituti-  
tiji yanana cuana nime jiahue tiempo cristiano cuana mu. Cuaja beidaji ame taji mahue huecuana. <sup>18</sup> Juan Bautista ja pia cristiano cuana neje aimue diadiaina mahue. Vino di aimue id'itaina mahue. Da putsu, micuaneda, "Juan einid'u madhadaji", epuani. <sup>19</sup> Yama mu ai papu ediainia cristiano cuana neje. Vino di eid'inia. Da putsu, micuaneda, "Jesús da diadia aida, jaid'iti aida", epuani. Micuaneda ema pa juchaji, echujebajaji cuana sa eshanapa epuani, ema tuna neje diadia bahue putsu. Beju micuana sa japitsati piba cuana da saida micuaneseda puji bahui. Micuaneda ema, Juan daja emadhabainia biame, etseju da Diosu sa piba saida cuana yainia ebameinia.

*Ejude su aniji a taji mahue cuana*

*(Lucas 10.13-15)*

<sup>20</sup> Daja Jesús ja fariseo cuana quisape putsu, piada piada ejude cuana su aniji cuana d'ayapirutana. Tueda ejude je aniji cuana aimue Diosu peje su japibaturucatitana mahue, Jesús ja tuna duju su ebia su ai nimetiuda cuana atana biame. Beju uja d'ayapirutana huecuana:

<sup>21</sup> —¡Aba quitaita Corazín, Betsaida ejude detse su aniji cuana! Tueda ejude detse su dajucua ai nimetiuda cuana yama ana biame, aimue Diosu peje su japibaturucatitana putana huecuana mahue. Ahua Diosu ja biahua tiempo su Tiro, Sidón ejude detse su tueda nimetiuda aida cuana ataidha su mu detse, dapia anitaidha cristiano cuana Diosu peje su japibaturucatitaidha detse. Tuna sa jucha cuana jepuiti ebia su janimepibapibametitaidha detse. <sup>22</sup> Beju yama micuana equisainia, Diosu sa castigo tsine ecuina su, Diosu ja Corazín, Betsaida ejude detse su aniji cuana Tiro, Sidón ejude detse su anitaidha cuana ebia su ecastigatayu. <sup>23</sup> Daja huecha Capernaum ejude su aniji cuana yatayu. "Diosu ja ecuana cielo su edusutsuatita", eputani huecuana biame, beju Diosu ja cuati castigo su ebeituta huecuana. Ahua Diosu



ja biahua tiempo su Sodoma ejude su tueda nimetiuda aida cuana ataidha su mu detse, dapia anitaidha cristiano cuana Diusu peje su japibaturucataidha detse. Da su aimue detse Diusu ja Sodoma ejude taitanamepeta cua puidha mahue. Jiahue teje beju tueda ejude ani cua hue. <sup>24</sup> Yama micuana equisainia, Diusu sa castigo tsine ecuina su, Diusu ja Capernaum ejude su aniji cuana Sodoma ejude su anitaidha cuana ebia su ecastigatayu.

*Jesús ja cristiano cuana nimepijajameta cua  
(Lucas 10.21-22)*

<sup>25</sup> Da su beju Jesús ja Tata Diusu mitsutana uja:

—Quema Tata, yama mi emitsutsuainia. Mida da aida eni. Mida da cielo, mundo emetse. Nimemitsida cuana bahui mirada shanapameana mique piba cuana. Bahue eni ebatitani cuana mu aimue shanapameana mahue mique piba cuana. <sup>26</sup> Daja mique tsada.

<sup>27</sup> Jesús ja cristiano cuana daja hue quisainiame atana uja:

—Quema Tata Diusu ja ema pamapa ai cuana menajati-atana. Aimue ema aiya biame saida eshanapaenitani mahue. Quema Tata Diusu ja bahui ema saida eshanapaenitani. Daja huecha aimue quema Tata Diusu aiya biame eshanapaenitani mahue. Yama bahui tueda saida eshanapaeninia, ema tusa ebacua putsu. Quebata quema tsada cuana bahui quema Tata Diusu yama eshanapameinia. <sup>28</sup> Pamapa jucha, pibapiba jabuti, jaduitiji cuana ema peje su papueta yama ejanahuame huecuana puji. <sup>29</sup> Ahua ema tije yata huecuana su, aimue yama jubida ecuatsasia huecuana mahue. Ema jepuiti mebuetsuatique. Ema da paciencia aidaji, nimemitsida. Ema neje micuana saida enimepijaja. <sup>30</sup> Quema jacuat-sasiati cuana da aimue tadada mahue ya puji. Aimue quipi biqueda saida yabuinia nime mahue.

## 12

*Discípulo cuana ja d'ije eju janahua tsine su raritana  
(Marcos 2.23-28; Lucas 6.1-5)*

<sup>1</sup> Da tiempo janahua tsine su Jesús, mesa discípulo cuana neje d'ije duje ejaitianasa je, discípulo cuana ja eju cuana raridujuduatuana, dhemanu putsu. Ejaja iruruatana huecuana edia puji. <sup>2</sup> Fariseo cuana ja daja ba putsu, discípulo cuana tuaquisatana huecuana. Uja Jesús atana huecuana:

—Chamaque, mique discípulo cuana janahua tsine su emudumudutani. Daja a taji mahue janahua tsine su, jacuat-sasiati cuana daja epuani putsu.

<sup>3</sup> Da su Jesús ja uja jeutsutana huecuana quisaba neje:

—¿Aimue jia maida micuaneda mimiameana mahue cuaja David chenu ja ataidha mesa ebuqueji cuana neje, dhemanu-  
taidha huecuana su? <sup>4</sup> Tueda nubidha Diosu sa templo su  
pan iyuda edia puji. Ebuqueji cuana pan iyuda tiataidha  
padiata huecuana puji. Beju tueda pan iyuda mu sacerdote  
cuana sa bahui dia taji puidha. <sup>5</sup> ¿Aimue jia maida micuaneda  
mimiameana mahue sacerdote cuana jepuiti Moisés chenu sa  
quirica su? Tueda sacerdote cuana templo su emudumudu-  
tani putsu, janahua tsine su aimue ejanahuatani mahue.  
Tuneseda puji beju jucha mahue janahua tsine su emudu-  
mudu puji. <sup>6</sup> Beju yama micuana butsepi equisainia, ema  
da sacerdote cuana ebia su aida. Cristiano cuana sa ema  
sacedote cuana ebia su iyuda ba taji. <sup>7</sup> Aimue micuaneda  
Diosu sa derejiji yani mimi eshanapainia mahue. Uja Diosu  
puidha mesa quirica su: “Tsada quema micuaneda cristiano  
cuana eibuneba puji. Ahua aimue micuaneda eibuneba  
mahue su, ¿ai puji saida ni da micuaneda animalo cuana ema  
peje su eirutsua puji? Ebia su saida quita cristiano cuana ei-  
buneba puji aimue ai eirutsuaji cuana eirutsua puji mahue.”  
Beju aimue micuaneda tueda Diosu sa mimi eshanapainia  
mahue. Micuaneda jucha mahue cuana tuaquisa bahue,  
aimue eibunebainia huecuana mahue putsu. <sup>8</sup> Da su beju  
meshanapaenique ema da janahua tsine emetse. Quema  
bahui janahua tsine su ai a taji cuana cuatsasia taji, ema da  
Diosu sa Jabeituti Deja putsu.

Beju daja Jesús ja jeutsutana fariseo cuana.

*Jesús ja deja mechhui saisiametana*  
(Marcos 3.1-6; Lucas 6.6-11)

<sup>9</sup> Da su beju Jesús fariseo cuana peje jenetia putiana. Jad-  
hitati jude ete su putiana. <sup>10</sup> Tueda ete su deja mechhui  
anina. Fariseo cuana di dapia netitaina. Tuneda Jesús jubida  
tuaquisaja atana putsu, uja Jesús quisabatana huecuana:

—¿Ahua saida janahua tsine su nedaji esaisiame puji?

<sup>11</sup> Da su Jesús ja uja jeutsutana huecuana:

—Ahua quebata micuana sa huisha janahua tsine su rara  
su dajaja cua su, ¿aimue jia maida micuaneda ejemicuina  
mahue? <sup>12</sup> Beju deja da huisha ebia su chujeme. Da su saida  
da janahua tsine su ai saida cuana ya puji.

<sup>13</sup> Da su Jesús ja deja mechhui uja cuatsasiatana:

—Piraraque mique ebai.

Beju deja ja mesa ebai epiraratani cama, saisiana mesa  
eme. <sup>14</sup> Dapia enetita fariseo cuana beju jubida duininitana.  
Tuneda cama uja jaquisabatitana: “¿Jucuaja ni da ecuaneda  
Jesús manuameme a cua?”

15 Da su Jesús cuinanana jadhitati jude ete jenetia, fariseo cuana sa japibati madhada cuana bahue pu putsu. Dueji cristiano cuana tu tije putitana. Pamapa nedaji cuana Jesús ja saisiameniunetitana. 16 Tueda saisijiji cuana cuatsasiatana tu jepuiti quisa paputa mahue huecuana puji. 17 Daja atana Jesús ja, cuaja Diosu sa profeta Isaías chenu biahua tiempo quisaquisa puidha batame. Uja Diosu puidha, Isaías chenu ja deretaidha:

18 Ye da quema emebajaji.

Yama tueda dhareana.

Yama tueda ebia su ibuneda ebainia.

Tu neje ema beidaji.

Quema Espíritu Santo sa tucheda yama tueda etia.

Pamapa ye mundo su ejude cuana su aniji cuana tuahueda butsepi ecuatsasiata.

19 Aimue tueda epucuicuina mahue.

Aimue ejude duje jubida emimi mahue.

20 Nimetucheda mahue cuana enimetucheametayu.

Ebia su japibachucuatiji cuana etsahuatayu.

Pamapa huaraji cuana pishitiame putsu, butsepi neje ecuatsasiata.

21 Pamapa cristiano cuana tu peje su enimeid'uatita.

*Fariseo cuana ja Jesús tuaquisatana*

*(Marcos 3.19-30; Lucas 11.14-23; 12.10)*

22 Beju piada deja padha, mimi bue mahue Jesús peje su dusutana huecuana. Tueda deja einid'u madhadaji puina. Jesús ja tueda saisiametana putsu, beju jabatimimipiru puana. 23 Pamapa cristiano cuana ba putsu, beju nimetiunetitana huecuana. Da su tuneda cama uja jaquisabatitana:

—¿Ye jia da Diosu sa Jabeituti Deja?

24 Beju fariseo cuana ja tsada mahue batana cristiano cuana Jesús jepuiti daja pamimita. Da su cristiano cuana uja atana huecuana:

—Ye Jesús da aimue Diosu peje jenetia mahue. Einid'u madhada cuana cristiano cuana peje jenetia ejusiacuinatani Ishahua sa tucheda neje.

25 Beju Jesús bahue puana tu jepuiti fariseo cuana daja eputani. Da su uja atana huecuana:

—Ahua quebata huaraji aida sa cristiano cuana esajasajata su, ahua tuneda cama eichetita su, beju tueda huaraji aida sa tucheda etaitanapeyu. Quebata familia edue cama, ejude su aniji cuana eichetita su, tuneda quitana etaitanape. 26 Daja huecha ahua Ishahua ja quitaita mesa einid'u madhada cuana jusiata cua su, mesa tucheda etaitanape. Aimue mesa einid'u madhada quitaita ejusiata mahue. Ahua daja yata su, tueda quitaita emajaitiani pu cua nime. 27 Beju micuaneda

cristiano cuana peje jenetia yama einid'u madhada cuana ejusiacuainainia Ishahua sa tucheda neje epuani. Ahua daja su, ¿aidhe sa tucheda neje micuana sa ebuqueji cuana ja einid'u madhada cuana ejusiacuinatani? Jiahue yama micuana equisaba. ¿Aimue jia maida Diosu sa tucheda neje einid'u madhada cuana ejusiacuinatani huecuana mahue? Da su, ¿jucuaaja su micuaneda yama einid'u madhada cuana Ishahua sa tucheda neje ejusiacuainainia epuani? Micuana sa ebuqueji cuana ja ebametani micuaneda da japitsatijiji. Aimue yama Ishahua sa tucheda neje einid'u madhada cuana cristiano cuana peje jenetia ejusiacuainainia mahue. <sup>28</sup> Yama einid'u madhada cuana ejusiacuainainia Diosu sa Espiritu Santo sa tucheda neje bahui. Diosu ja mu tueda ai nimetiuda cuana yatani micuana duju su. Aimue Ishahua ja tueda ai nimetiuda cuana ema yametani mahue.

<sup>29</sup> 'Ahua tsi puji ja deja tucheda sa ai cuana tsija su, equene tsuhu risi taji. Daja a putsu bahui, tsi puji ja tusa ai cuana mejemita cua. Daja huecha yama Ishahua a cua, ema tu ebia su tucheda putsu.

<sup>30</sup> 'Quebata ja aimue ema saida ebatani mahue, tueda ema neje emajaitiani. Quebata ema neje echuduchuduani mahue, tuahueda eberebreatani.

<sup>31-32</sup> 'Diosu ja quebata juchaji papu biame perdonata cua. Ahua quebata quema puji madhada hue emimiani su, tueda Diosu ja perdonata cua. Beju aimue Diosu ja eperdonata mahue Espiritu Santo sa puji madhada hue emimitani cuana.

### *Equi ejaja cuana*

*(Lucas 6.43-45)*

<sup>33</sup> Jesús ja daja hue fariseo cuana quisainiame atana uja:

—Equi saida da ejaja saida epuani. Equi saida mahue mu ejaja saida mahue epuani. Pamapa equi cuana ejaja jepuiti etse eshanapainia. <sup>34</sup> Beju micuaneda da deja ate, bacua d'aida nime. Ai saida mimi cuana a bue mahue, micuaneda da deja madhada hue putsu. Beju etse emimiani, cuaja etse epibainia batame. <sup>35</sup> Saida epibatiani deja beju ai saida cuana jepuiti bahui emimiani. Daja huecha madhada hue epibatiani deja beju ai madhada cuana bahui emimiani. <sup>36</sup> Ene putsu, yama micuana equisainia, Diosu sa castigo tsine su pamapa micuaneda mimi madhada mimiana cuana jepuiti ejeutsutiyu. <sup>37</sup> Ahua micuana sa mimi cuana da saida, ahua madhada hue Diosu ja ebata.

*Cristiano madhada cuana ja Jesús bajatana nimetiuda aida paata puji*

*(Marcos 8.12; Lucas 11.29-32)*

<sup>38</sup> Da su beju piada piada fariseo, jacuatsasiati ebuetsuaji cuana ja Jesús uja atana:

—Ebuetsuaji, piada nimetiuda aida aque. Bameque ecuanaju ahua mida ene quita Diosu sa Jabeituti Deja su.

<sup>39</sup> Jesús ja atana huecuana:

—Beju micuaneda da deja madhada bubeta cuana. Micuaneda ema ebajainia yama nimetiuda aida ya puji biame, aimue yama ya mahue. Cuaja Diosu sa profeta Jonás chenu puidha, tueda da micuaneseda puji nimetiuda aida papu. <sup>40</sup> Cuaja Jonás chenu se aida sa edhe su quimisha tsine badeidha nime, daja nime ema tumu epa sepulcro su quimisha tsine esa. <sup>41</sup> Nínive ejude su anitaidha cristiano cuana Diosu peje su japibaturucatitaidha, Jonás chenu ja Diosu sa quisa saida 8uana quisaquisa ataidha huecuana su. Beju jiahue upia ema Jonás chenu ebia su aida biame, aimue micuaneda quema quisa cuana jei aja mahue yainia. Aimue micuaneda Diosu peje su japibaturucatiya mahue, cuaja Nínive ejude su anitaidha cristiano cuana putaidha nime. Da putsu, Diosu ja micuana ematsetayu. <sup>42</sup> Biahua tiempo echua puji aida epuna chenu uqueda yahua jenetia putidha echua puji Salomón chenu peje su mesa bahue eni quisa cuana eid'aba puji. Beju jiahue upia ema Salomón chenu ebia su bahue eni biame, aimue micuaneda quema euisa id'abaja yainia mahue. Da putsu, Diosu ja micuana ematsetayu castigo tsine su, micuaneda quema bahue eni quisa cuana id'abaja mahue ana putsu, cuaja tueda echua puji aida epuna chenu ja Salomón chenu sa bahue eni quisa cuana id'abataidha nime.

*Einid'u madhada cuana jepuiti quisa*

*(Lucas 11.24-26)*

<sup>43</sup> Jesús ja daja hue buetsuainiame atana uja:

‘Einid'u madhada deja peje jenetia ecuinanani su, d'anita yahua je yaseni janahua jude echacu puji. <sup>44</sup> Aimue teje yatani su, epibapirutiani uja: “Ema pasiapati ema cuinanaitia ete su.” Da su beju deja peje su esiapatiani su,

tueda deja da ete saida, memahue, basetajiji nime ebatani. <sup>45</sup> Da su neicha ecuinana pia siete tu ebia su madhada einid'u cuana eduse puji. Beju pamapa su deja sa equita dume su enubitani dapia yaniti puji. Da su tueda deja biahua puina ebia su madhada epuani. Daja da pamapa cristiano madhada cuana epu.

*Jesús sa cuara, edue cuana tu yani su putitana*

*(Marcos 3.31-35; Lucas 8.19-21)*

<sup>46</sup> Beju Jesús ja ete su cristiano cuana daja equisatani cama, mesa cuara, edue cuana cuinatana. Etseque su hue

netisenatana huecuana. Jesús neje jamitsutija pudhaatana huecuana. <sup>47</sup> Da su piada ja Jesús uja quisatitana:

—Mique cuara, edue cuana etseque su enetita. Mi neje jamitsutija huecuana.

<sup>48</sup> Da su Jesús ja jeutsutana uja:

—Yama da micuana equisa aidhe quema cuara, edue cuana.

<sup>49</sup> Da su Jesús ja mesa discípulo cuana mehuitu putsu, uja atana:

—Ye cuana da quema cuara, edue cuana pu cua nime.

<sup>50</sup> Quebata cuana ja Diosu sa tsada ai cuana yatani, tuneda da quema cuara, edue cuana pu cua nime.

## 13

*Deja ejaja cuana huararaji jepuiti quisa*

*(Marcos 4.1-9; Lucas 8.4-8)*

<sup>1</sup> Beju pia tsine Jesús ete jenetia cuinanana. Bai maje su puti putsu, aniuteana. <sup>2</sup> Tu peje su dueji cristiano cuana jadhítapirutitana putsu, Jesús canoa aida su nubiana. Dapia canoa dume su aniuteana. Cristiano cuana bai maje su anititana. <sup>3</sup> Da su Jesús ja bahue quisa cuana neje buetsuapirutana huecuana uja:

<sup>4</sup> —Beju piada deja putiana ejaja cuana ehuararati puji. Ehuararatani cama, piada piada ejaja cuana edid'i je dajajatana. D'ia janana cuana pue putsu, beju edid'i je dajajatana ejaja cuana diapetana. <sup>5</sup> Pia ejaja cuana dajajatana tumu med'i pamuda mahue su. Beju tipeida huid'atatana. <sup>6</sup> Med'i pamuda mahue putsu, beju sarapetana huid'atatana cuana, id'eti sinada puana putsu. <sup>7</sup> Pia ejaja cuana junu quid'aji cuana duju su dajajatana. Beju murutana cuana junu quid'aji cuana ja babubabuatana. Babubabuatana putsu, beju man-uamepetana. <sup>8</sup> Pia ejaja cuana mu med'i saida su dajajatana. Saida murutana. Dueji ejaja putana. Piada piada equi cuana cien ejaja putana. Pia cuana sucuta tunca ejaja putana. Pia cuana quimisha tunca ejaja putana. Daja jajucuatitana ejaja cuana. <sup>9</sup> Ahua micuaneda id'ajararaji su, beju meid'abaque.

*Jesús ja deja ejaja cuana huararajiji jepuiti bahue quisa cuja epuani discípulo cuana quisatana*

*(Marcos 4.10-12; Lucas 8.9-10)*

<sup>10</sup> Da su discípulo cuana ja Jesús quisabatana uja:

—¿Jucuaja ni da miada bahue quisa neje bahui cristiano cuana ebuetsuainia?

<sup>11</sup> Da su Jesús ja jeutsutana huecuana uja:

—Diosu ja micuaneda bahui tu ecuatsasiati etsia ai quisa cuana eshanapametani. Aimue pia cuana mu eshanapametani mahue. <sup>12</sup> Quebata ja Diosu sa piba shanapaja su,

Diusu ja mesa piba cuana ebia su eshanapameenitayu. Quebata ja aimue shanapaja mahue su, Diusu ja tueda aimue ai biame eshanapameta mahue. <sup>13</sup> Da putsu, yama bahue quisa neje bahui ebuetsuainia huecuana. Tuneda echamatani biame, aimue ebatani huecuana mahue. Eid'abatani huecuana biame, aimue eshanapatani huecuana mahue. Da putsu, yama bahue quisa neje ebuetsuainia huecuana, aimue shanapaja yatani huecuana mahue putsu. <sup>14</sup> Isaías chenu ja biahua tiempo uja deretaidha tuna jepuiti:

Tuneda eid'abatani biame, aimue eshanapatani huecuana mahue.

Echamatani huecuana biame, aimue ebatani huecuana mahue.

<sup>15</sup> Daja eputani huecuana, mecuana sa muesumu tadada putsu.

Aimue id'abaja, baja yatani huecuana mahue.

Aimue saida shanapaja yatani huecuana mahue.

Aimue ema peje su pueja eputani huecuana mahue yama esaisiame huecuana puji.

'Daja da Isaías ja deretaidha biahua tiempo tueda cristiano cuana jepuiti.

<sup>16</sup> Daja hue Jesús ja mesa discípulo cuana quisainiame atana:

—Beju micuaneda beidaji epuani yama ai ana cuana ebainia putsu, quema quisa saida cuana eid'abainia putsu.

<sup>17</sup> Ene putsu, yama micuana equisainia, biahua tiempo profeta, Diusu peje su jei eputani chenu cuana ja jiahue micuaneda ebainia cuana baja adhaataidha. Jiahue quema micuaneda eid'abainia quisa cuana di id'abaja adhaataidha huecuana. Cuaja a taji mahue bataidha huecuana, biahua tiempo jenetia anitaidha putsu. Beju micuaneda mu beidaji, ema neje yani putsu.

*Jesús ja deja ejaja cuana ehuararaji jepuiti quisa discípulo cuana quisatana*

*(Marcos 4.13-20; Lucas 8.11-15)*

<sup>18</sup> 'Meid'abaque ema. Yama micuana equisa ejaja cuana huararaji bahue quisa cuaja epuani. <sup>19</sup> Piada piada ejaja cuana edid'i su dajajatana. Daja nime da Diusu sa quisa eid'abatani cuana. Id'aba putsu, aimue eshanapatani huecuana mahue. Ishahua pue putsu, tueda Diusu sa quisa cuana mecuana sa muesumu su yani emejemitani. <sup>20</sup> Beju pia ejaja cuana dajajatana tumu med'i pamuda mahue su. Daja nime da pia Diusu sa quisa eid'abatani cuana. Tipeida, beidaji neje tueda quisa cuana eid'abatani huecuana. <sup>21</sup> Quejucua tsine hue saida eputani huecuana. Beju ema jepuiti mecuana sa sufri pu taji su, neicha hue equene su puina nime eputaniyu.

Da su cuaja d'au pamuda ehuid'atatani cuana emanutani nime, daja tuneda quema quisa saida cuana jenetia enetideratani sufrimiento cuana jepuiti. <sup>22</sup> Beju pia ejaja cuana dajajatana junu quid'aji cuana duju su. Daja nime da pia Diusu sa quisa eid'abatani cuana. Diusu sa quisa cuana eid'abatani huecuana biame, ye mundo sa madhada ai cuana ebia su tsada ebatani huecuana. Chipilu di ebia su tsada ebatani huecuana. Tuneda quitaita ebaseatitani, tueda ai cuana ema ebia su tsada ba putsu. Cuaja junu quid'aji cuana ja saida emurutani cuana etaitanamepetani nime, daja da ye mundo sa ai madhada cuana ja tueda quema quisa eid'abatani cuana emadhatiatani. <sup>23</sup> Beju pia ejaja cuana mu dajajatana med'i saida su. Daja nime da pia Diusu sa quisa eid'abatani cuana. Butsepi eshanapatani huecuana. Cuaja med'i saida su ejaja cuana ebia su ejucuatitani nime, daja Diusu sa puji ebia su ai mudu saida cuana yatani huecuana. Ejaja jajucuatitana nime da huecuana. Piada piada cien ejaja putana. Pia sucuta tunca ejaja putana. Pia quimisha tunca ejaja putana. Daja da mecuaana sa Diusu sa puji mudu saida cuana ejucuatitani.

*Id'ene madhada jepuiti quisa*

<sup>24</sup> Beju Jesús ja pia bahue quisa discípulo cuana uja quisatana:

—Diusu ecuatsasiati da uja: Piada deja ja arusu ejaja banatana te su. <sup>25</sup> Beju dhidha su pamapa etahuitasa su, te emetse neje eduininiani deja te su putiana arusu duje id'ene madhada ebana puji. <sup>26</sup> Beju arusu saida muruana su, id'ene madhada di arusu neje tupupai muruana. <sup>27</sup> Da su te quinaji cuana ja ba putsu, emetse quisatitana huecuana uja: “Echua puji, ¿que je bataji pujiji arusu duju su id'ene madhada? ¿Aimue jia maida ejaja saida ecuaneda banana mahue? ¿A mique tsada ecuanaju id'ene madhada emutsuti?” <sup>28-29</sup> Da su emetse ja uja jeutsutana huecuana: “Ema duininibaji ja id'ene madhada banatana. Be memutsuji tsuhu. Cuapuitime arusu di id'ene neje tupupai micuaneda mutsu cua. <sup>30</sup> Ebia su saida tupupai pamuru. Beju eraja tiempo ecua su, mudu puji cuana yama te su ebeitu id'ene madhada cuana arusu neje tupupai pamutsuta huecuana puji. Da su id'ene madhada cuana jeji a putsu, parisita huecuana ed'ed'a puji. Beju arusu quema ichaseta jude su paichasetata huecuana.”

‘Daja da Diusu ja eichaderatayu chujemame tu peje su jei eputani cuana jei puja mahue cuana peje jenetia.

*Mostaza ejaja jepuiti quisa*

*(Marcos 4.30-32; Lucas 13.18-19)*

<sup>31</sup> Da su Jesús ja pia bahue quisa discípulo cuana quisatana. Uja atana huecuana:



—Diusu ecuatsasiati da mostaza ejaja nime. <sup>32</sup> Tueda ejaja da pamapa pia ejaja cuana ebia su huai chidi biame, bana putsu, pamapa pia equi cuana ebia su aida emuruani. D'ia janana cuana echa su esaji cuana yatitani. Daja da Diusu ecuatsasiati epupiruani mostaza ejaja nime. Da su beju aida epuani. Equene quejucua chidi cristiano cuana tu peje su jei eputani biame, da su beju pamapa ejude su aniji cuana jei eputayu.

*Levadura jepuiti quisa*  
(Lucas 13.20-21)

<sup>33</sup> Jesús ja pia bahue quisa neje discípulo cuana quisatana uja:

—Diusu ecuatsasiati da levadura harina bebajiji dume su nime. Epuna ja levadura harina neje ehuarutani. Tueda levadura ja pamapa harina bebajiji ettsuametani. Daja nime da Diusu ecuatsasiati. Equene quejucua chidi cristiano cuana tu peje su jei eputani biame, da su beju pamapa ejude su aniji cuana jei eputayu.

*Jesús ja cristiano cuana bahue quisa neje bahui buetsuatana*  
(Marcos 4.33-34)

<sup>34</sup> Jesús ja cristiano cuana tueda ai cuana buetsuatana bahue quisa cuana neje bahui. <sup>35</sup> Daja puana Jesús, cuaja Diusu sa profeta chenu ja biahua tiempo deretaidha batame. Uja Diusu puidha, profeta chenu ja deretaidha: Yama bahue quisa neje bahui ebuetsua huecuana. Diusu sa etsia quisa cuana yama bahue quisa neje equisa huecuana.

*Id'ene madhada bahue quisa cuaja epuani Jesús ja discípulo cuana quisatana*

<sup>36</sup> Jesús ja cristiano cuana buetsuape putsu, ete su putibana. Discípulo cuana neje ete su nubiana. Nubi putsu, discípulo cuana ja tueda uja atana:

—Quisaque ecuanaju butsepi cuaja epuani mique id'ene madhada jepuiti bahue quisa.

<sup>37</sup> Da su Jesús ja uja quisatana huecuana:

<sup>38</sup> —Mundo da te pu cua nime. Ema da te emetse pu cua nime. Ema da ejaja huararaji pu cua nime, cristiano cuana yama saida equisainia putsu. Arusu ejaja cuana da ema peje su jei eputani cuana pu cua nime. Id'ene madhada da ema peje su jei puja mahue cuana pu cua nime. Tuneda da Ishahua sa cristiano cuana. <sup>39</sup> Id'ene madhada banaji da Ishahua pu cua nime. Eraja tiempo da Diusu sa castigo tsine epusiu pu cua nime. Rajarajaji cuana da Diusu sa ángel cuana pu cua nime. <sup>40</sup> Beju cuaja id'ene madhada ejemitsu-atani huecuana ed'ed'a puji nime, daja ángel cuana ja yatayu

cristiano madhada cuana, Diusu sa castigo tsine ecuina su.  
<sup>41</sup> Da hora su beju yama quema ángel cuana ebeitu pamapa cristiano cuana jucha amejí, ai madhada yatani cuana Diusu ecuatsasiati jenetia ejemicuina puji, cuati castigo su ejusianubia huecuana puji. <sup>42</sup> Dapia epadaritita, etsedhaitita, ebia su sufri eputa huecuana putsu. <sup>43</sup> Diusu sa dharejiji cuana mu Tata Diusu sa ecuatsasiati su beidaji neje yanienititayu. Ahua micuaneda id'ajarañari su, beju meid'abaenique.

*Chipilu erubuani, perla chujeneda jepuiti quisa*

<sup>44</sup> Daja hue Jesús ja buetsuainiame atana huecuana:

—Diusu ecuatsasiati da chipilu yahua ped'u su erubuani pu cua nime. Piada deja ja tueda chipilu etejetani su, neicha dapia hue erubuataniyu. Beju putiyu putsu, beidaji neje mesa pamapa ai cuana eirupetani tueda yahua ped'u tipeida ebaja puji.

<sup>45</sup> Daja huecha Diusu ecuatsasiati da perla chujeneda saida pu cua nime. Piada iruiruji deja da pamapa ejude cuana je epuniuneti perla chujeneda, saida cuana eteje puji. <sup>46</sup> Beju piada perla ebia su aida, chujeneda teje putsu, beidaji neje mesa pamapa ai cuana eirutani tueda perla tipeida ebaja puji. Daja nime quema quisa saida cuana. Chipilu erubuani, perla chujeneda pu cua nime.

*Tarrafa aida jepuiti quisa*

<sup>47</sup> Diusu ecuatsasiati da tarrafa aida pu cua nime. Esia puji deja cuana ena su jusia putsu, dueji tsapiapiati se cuana ejemitsuatani huecuana. <sup>48</sup> Tarrafa beju sejea su, eriretsuatani huecuana emaje su. Dapia se cuana edharepirutani huecuana. Pamapa se saida cuana beju d'iti cuana su eichasetatani huecuana. Pamapa saida mahue se cuana beju ejusiatani huecuana. <sup>49</sup> Daja da epu castigo tsine su, ye mundo epupe su. Da hora su Diusu sa ángel cuana ja eichaderatayu chujemame Diusu sa dharejiji cuana cristiano madhada cuana peje jenetia. <sup>50</sup> Dhare putsu, cristiano madhada cuana cuati castigo su ejusinubiata huecuana. Dapia tueda cristiano madhada cuana ebia su epadaritita, etsedhaitita, ebia su sufri eputa huecuana putsu.

<sup>51</sup> Beju daja Jesús ja discípulo cuana buetsuatana. Buet-suape putsu, uja quisabatana huecuana:

—¿A da micuaneda eshanapainia quema quisa?

Da su jeutsutana huecuana uja:

—Ehe, Echua Puji. Eshanapainia ecuanaju.

<sup>52</sup> Da su Jesús ja uja atana huecuana:

—Ahua quebata Moisés chenu sa jacuatsasiati ebuetsuaji da quema jabuetsuati su jei epu su, beta ai chujeneda saida detse

mesa pu cua nime. Jacuatsasiati edhi, quema jabuetsuati eichacua di mesa tupupai yani, ahua ema peje su jei epu su.

*Jesús Nazaret ejude su putiana*  
(*Marcos 6.1-6; Lucas 4.16-30*)

<sup>53</sup> Beju Jesús ja daja quisape putsu, mesa ejude Nazaret su putiana. <sup>54</sup> Dapia cuinati putsu, jadhitati jude ete su buetsuapirutana. Dapia cristiano cuana tu jepuiti nimetiutana. Tuneda cama jaquisabatitana uja:

—¿Que jenetia jia da ye deja tueda bahue eni ai cuana jabuetsuatiana? ¿Cuaja ni da tuahueda ye ai nimetiuda cuana ame yatani? <sup>55</sup> ¿Aimue jia maida tueda carpintero José sa ebacua mahue? Mesa cuara da María. Mesa edue cuana da Jacobo, José, Simón, Judas. <sup>56</sup> Mesa dudu cuana di upia yanita. Beju pamapa mesa familia cuana upia ecuana duju su yanita. Da su, ¿cuaja ni da tueda ai bahue eni cuana nime bahue pu cua?

<sup>57</sup> Da putsu, aimue Jesús peje su jei putana huecuana mahue. Da su Jesús ja uja atana huecuana:

—Diusu sa profeta sa ejude quitaita su aniji cristiano cuana ja aimue tueda saida ebatani mahue. Mesa familia quitaita cuana ja di aimue tueda saida ebatani mahue. Pia ejude su aniji cuana ja bahui profeta saida ebatani.

<sup>58</sup> Da su Jesús ja dapia mesa ejude quitaita su quejucua hue ai nimetiuda cuana atana, dapia cristiano cuana tu peje su jei puja mahue putana putsu.

## 14

*Juan Bautista manuametana huecuana*  
(*Marcos 6.14-29; Lucas 9.7-9*)

<sup>1</sup> Da tiempo su echua puji Herodes Antipas da huaraji aida puina Galilea yahua su. <sup>2</sup> Tuahueda Jesús jepuiti id'abatana putsu, mesa emebajaji cuana uja atana:

—Tueda Jesús da Juan Bautista manujiji cuana duju jenetia id'eyujiji. Da putsu, tueda tucheda eni ai nimetiuda aida cuana ya puji.

<sup>3</sup> Daja mimiana Herodes Antipas Juan Bautista manuametana putsu. Equene Juan teriichanubiametana. Daja Herodes ja Juan atana, Juan ja tueda tuaquisatana putsu. Juan ja Herodes Antipas jubida d'ayatana, Herodes Antipas ja mesa edue Felipe sa ehuané Herodías neje jahuanetiana putsu, Felipe eid'e hue biame. Da putsu, Herodes Antipas ja Juan teriametana. <sup>4</sup> Uja equene Juan ja Herodes Antipas jubida d'ayatana:

—Be Herodías mique ehuané nime dusuji, Felipe neje jahuanetijiji tupu.

<sup>5</sup> Da su Herodes Antipas ja Juan tipeida manuameja adhaatana. Daja biame, mue manuame atana, cristiano cuana iyuba putsu, Juan da Diosu sa quisa puji batana huecuana putsu. <sup>6</sup> Da su beju Herodes Antipas sa tu bataji puana tsine cuinana su, Herodías sa ebaquepuna ihuajiji cuana butse su tu mehua tiritiriana. Beju Herodes Antipas sa ebia su tsada puana. <sup>7</sup> Da su Herodes ja epuneje uja atana:

—Diosu bahue ema epu. Ai papu mique jabajati cuana yama mi etia, mique tiritiri quema ebia su tsada putsu.

<sup>8</sup> Da su epuneje mesa cuara neje jaquisabatiana. Herodías ja tueda uja quisatana:

—Bajatique Juan Bautista sa echua dhepe su.

<sup>9</sup> Beju daja epuneje ja bajatana su, Herodes Antipas ebia su jatacuamadhatiana. Ihuajiji cuana butse su Diosu bahue puana putsu, daja mesa a taji puana. <sup>10</sup> Beju da hora su cuatsasiatana soldado cuana Juan pachuarijita huecuana puji. <sup>11</sup> Da su beju echua dusetana huecuana dhepe su. Epuneje menajatiatana huecuana. Da su tuahueda mesa cuara tiaderatana.

<sup>12</sup> Juan sa ebuqueji cuana mesa equita dusu putsu, papatana huecuana. Da su Jesús quisatitana huecuana. <sup>13</sup> Jesús ja shanapa putsu, mue aidhebiame ani eti jude su putiana tu mehua yaniti puji. Canoa aida su putiana. Beju cristiano cuana bahue puputsu, pamapa ejude jenetia cuinanatana huecuana Jesús tije ya puji.

*Jesús pishica mil deja cuana mihuatana*

*(Marcos 6.30-44; Lucas 9.10-17; Juan 6.1-14)*

<sup>14</sup> Jesús beju chu maje cuinati putsu, cristiano cuana murida je putitana tu etejetiyu puji. Jesús ja canoa aida jenetia cuinana putsu, dueji cristiano cuana tu peje su epusiu batana. Jesús ja ba putsu, ebia su bataichenu batana huecuana. Pamapa nedaji cuana saisiamepirutana. <sup>15</sup> Beju tsinecua edhememehu su discípulo cuana ja Jesús uja quisatana:

—Beju tsinecua edhememehu. Ye cristiano cuana sa ete cuana uqueda. Da putsu, beityuque huecuana ejude cuana naja je tuna sa ai dia taji cuana pachacutitita huecuana puji, beju upia mu mue ai biame ani putsu.

<sup>16</sup> Jesús ja jeutsutana huecuana:

—Aimue da eputitayu mahue. Micuaneda hue memihuaque huecuana.

<sup>17</sup> Da su uja atana huecuana:

—Beju pishica pan chidi cuana, beta se chidi detse bahui ecuanaju sa yani. Ai detse tueda tupu pu cua.

<sup>18</sup> Da su Jesús ja cuatsasiatana huecuana:

—Pan chidi cuana, se detse meduseque.

<sup>19</sup> Jesús ja cristiano cuana cuatsasiatana pamapa paniuteta huecuana puji nutsa bia su. Pamapa aniutetana su, Jesús ja pishica pan chidi cuana, se detse di inatana. Cielo huabata jachamati putsu, diusulupai atana Tata Diosu. Pan cuana, se detse ped'uped'ua putsu, discípulo cuana menajatiatana cristiano cuana paberereatiata huecuana puji. Discípulo cuana ja cristiano cuana eberereatiatani cama, pan, se ped'u cuana jajucuatitana. <sup>20</sup> Beju pamapa cristiano cuana diadiatana tupu. Pan cuana, se detse beju puchu puana. Eped'u cuana chudutana huecuana. Piada tunca beta ejaitiana d'iti cuana sejeatana huecuana puchu cuana neje. <sup>21</sup> Beju pishica mil deja cuana diadiatana. Dueji epuna, yanana cuana dapia anitaina. Tuneda di diadiatana tupu.

*Jesús da ena bia je aseana*  
(Marcos 6.45-52; Juan 6.16-21)

<sup>22</sup> Da su beju Jesús ja mesa discípulo cuana canoa aida su nubiametana bai papetuta huecuana puji tu hui su. Tuna yanipetutahu cama, Jesús ja cristiano cuana tuna sa ete cuana je beitungetaibana. <sup>23</sup> Beju tuna pupetitaiba su, Jesús murucu aida bia su tsuatiana tu mehua quejucua hora chidi yaniti puji, Diosu emitsu puji. Beju dhidha teje dapia tu mehua aniana. <sup>24</sup> Mesa discípulo cuana da bai dusetse su anipetutasaina cama, beni ja ena jubida dhapujutana putsu, ena canoa su nubipiruana. <sup>25</sup> Beju huenahua su Jesús batana huecuana ena bia je quitaita yasesiu. <sup>26</sup> Daja ba putsu, rubutanapirutana huecuana. Jubida tsiatsiatana huecuana, iyuame pu putsu. Uja tsiatsia neje mimitana huecuana:

—¡Beju enid'u ecuaneda ebainia!

<sup>27</sup> Da su Jesús ja jubida uja atana huecuana:

—¡Menimetuheatique! ¡Beju ema hue! ¡Be iyuame mepuji!

<sup>28</sup> Pedro ja atana Jesús:

—Echua Puji, ahua enei hue mida su, tsahuaque ema mi peje su ena bia je ecuinati puji.

<sup>29</sup> Da su Jesús ja Pedro jeutsutana:

—Pueque hue da.

Pedro canoa jenetia cuinana putsu, ena bia je asepiruana Jesús peje su. <sup>30</sup> Beju beni jubida epuneti ba putsu, Pedro tipeida iyuame puana. Ena su nubipiruana. Enubiani jabati putsu, jubida tsiatsia neje uja atana Jesús:

—¡Echua Puji, tsahuaque ema!

<sup>31</sup> Da hora su beju Jesús ja Pedro eme su inatana. Uja atana Pedro:

—¿Jucuaaja su ni mi ema peje su mue janimetuheatí?

<sup>32</sup> Beju tuatseda canoa su nubitiana su, beni mitanana.

<sup>33</sup> Canoa dume su Jesús butse su tururutana huecuana pamapa. Uja atana huecuana:

—Enei hue, mida da Diosu sa Ebacua.

*Jesús ja nedaji cuana Genesaret yahua su saisiametana  
(Marcos 6.53-56)*

<sup>34</sup> Daja anipetutitana huecuana. Genesaret yahua su sat-suatitana huecuana. <sup>35</sup> Beju tueda yahua su aniji cristiano cuana ja Jesús ba putsu, pamapa ejude su aniji cuana quisametana huecuana. Da su cristiano cuana bahue pu putsu, pamapa nedaji cuana dusetana huecuana Jesús peje su. <sup>36</sup> Jesús sa ejud'uji tihue dhucuana d'apabaja atana huecuana. Pamapa ejud'uji d'apabatana cuana beju saisitana.

## 15

*¿Ai ja cristiano cuana madhata cua?  
(Marcos 7.1-23)*

<sup>1</sup> Da su beju piada piada fariseo, jacuatsasiati ebuetsuaji cuana ja Jesús nariatana. Jerusalén ejude jenetia puetana huecuana Jesús yaba puji, tu etuaquisadhaa puji. Beju uja quisabatana huecuana Jesús:

<sup>2</sup> —¿Jucuaja su mique discípulo cuana ja ecuana sa tata chenu sa puiti cuana jei aja mahue? Beju aimue tuna sa eme erucuatitani huecuana mahue ediadia puji ecuana sa puiti daja biame.

<sup>3</sup> Da su Jesús ja uja quisatana huecuana:

—Micuaneda Diosu sa jacuatsasiati cuana aimue aja yainia mahue, micuana sa ai puiti cuana bahui aja putsu. <sup>4</sup> Uja Diosu ja cuatsasiataidha: “Iyubaque mique tata detse. Ahua quebata papu mesa tata detse emadhabata su, tueda pamanu.” <sup>5</sup> Beju micuaneda mu cristiano cuana tsapia hue ebuetsuainia uja: “Ahua quebata papu mesa chipilu Diosu etiata su, beju aimue mesa tata, cuara detse chipilu neje tsahua taji mahue, pamapa Diosu tiatana putsu.” <sup>6</sup> Beju aimue daja epuani mahue Diosu sa jacuatsasiati. Micuaneda micuana sa puiti cuana bahui buetsua putsu, tueda jacuatsasiati cuanaai eni mahue nime yameinia. <sup>7</sup> Micuaneda da bubeta cuana. Diosu ja uja butsepi ataidha micuana jepuiti Isaías ja deretaidha:

<sup>8</sup> Ye cristiano cuana ja ema eiyubatani mimi neje bahui.

Aimue ema ene putsu tuna sa muesumu neje eiyubatani huecuana mahue.

<sup>9</sup> ¿Ai puji saida tuna sa ema peje su jamitsutsuati cuana pu cua?

Beju tueda da yanacane hue, tuna sa jabuetsuati quitaita cuana bahui ebuetsuatani huecuana putsu.

Aimue quema jabuetsuati cuana mu ebuetsuatani huecuana mahue.

Daja Diosu puidha micuana jepuiti Isaías chenu ja dere-  
taidha.

<sup>10</sup> Da su Jesús ja cristiano cuana uja atana:

—Meid'abaque ema. Meshanapaenique. <sup>11</sup> Etse ediania cuana ja aimue detse etse madhata cua mahue. Beju etse emimiani cuana ja mu ene putsu etse emadhatani.

<sup>12</sup> Da su discípulo cuana ja Jesús naria putsu, uja atana huecuana:

—Echua Puji, fariseo cuana da duininitaitia, mique mimi cuana daja id'aba putsu.

<sup>13</sup> Da su Jesús ja uja jeutsutana huecuana:

—Pamapa Tata Diosu ja banatana mahue equi cuana chu ed'auna emutsupeta. Daja huecha Diosu ja id'ene madhada nime cristiano cuana emutsupeta cuati castigo su ebeitueniyu puji. <sup>14</sup> Be jatacuamadhatiji fariseo cuana neje, beju padha nime huecuana putsu. Padha nime huecuana biame, cristiano cuana huidusuja eputani huecuana. Da su padha nime cama pahuidusutita huecuana. Ahua piada padha ja pia padha ehuidusuta su, betana su rara su edajajati tse.

<sup>15</sup> Beju Pedro ja Jesús atana:

—Quisaque ecuanaju cuaja mique quisa epuani.

<sup>16</sup> Da su Jesús ja atana huecuana:

—¿A da micuaneda di pia cuana nime aimue eshanapainia mahue? <sup>17</sup> Beju pamapa ediatiani ai cuana ecuatsa je enubiani putsu, edhe su ecuinahu. Da su beju equita jenetia ecuinanani. <sup>18</sup> Aimue detse tueda ai cuana ja deja madhata cua mahue. Mimi madhada cuana ja mu ecuatsa jenetia ecuinanani putsu, deja emadhatani, tueda mimi madhada cuana muesumu jenetia ecuinanani putsu. <sup>19</sup> Beju cristiano cuana sa muesumu madhada hue putsu, pamapa ai madhada cuana yatani huecuana. Cristiano emanuametani huecuana. Pia sa ebutse quinaji eputani huecuana. Utsatada madhada cuana yatani huecuana. Tsi eputani huecuana. Bid'umimi eputani huecuana. Pia sa ebani cha jemitsua hue yatani huecuana. Beju pamapa tueda ai madhada cuana yatani huecuana, tuna sa muesumu madhada hue putsu. <sup>20</sup> Tueda ai madhada cuana muesumu jenetia ecuinanani ja cristiano cuana emadhatani. Beju ahua etse jamerucuatiji mahue edia dia su, aimue etse emadhati mahue.

*Pia yahua jenetia epuna Jesús peje su jei puana  
(Marcos 7.24-30)*

<sup>21</sup> Da su beju Jesús da jenetia cuinanana. Tiro, Sidón ejude detse naja su beju putiana. <sup>22</sup> Dapia yahua su piada judío mahue epuna tu peje su pueana. Tueda epuna da Canaan yahua jenetia puina. Tuahueda jubida Jesús tsiatsia neje uja bajatana:

—¡Echua Puji, David chenu sa familia jenetia, ibunebaque ema! Quema ebaquepuna einid'u madhadaji. Tuneda ebia su sufri yametani.

<sup>23</sup> Jesús ja mue jeutsu epuna. Da su mesa discípulo cuana ja uja atana:

—Cuadeque tueda epuna, ecuana tije etsiatsiasiu putsu.

<sup>24</sup> Da su Jesús ja epuna atana uja:

—Diusu ja ema beitutana tu peje jenetia judío jeitid'ujiji cuana peje su bahui. Beju aimue mida judío mahue.

<sup>25</sup> Da su epuna ja Jesús naria putsu, tu butse su tururuana. Jubida uja Jesús bajatana:

—¡Echua Puji, tsahuaque ema!

<sup>26</sup> Da su Jesús ja epuna jeutsutana uja:

—Saida mahue ebacua sa jana mejemi putsu, uchi cuana etia puji.

<sup>27</sup> Beju daja Jesús ja jeutsutana biame, epuna ja uja atana:

—Ehe, Echua Puji, mida ene putsu butsepi emimiani biame, uchi cuana ja di puchu cuana emetse sa misha jenetia yahua su edajajatani cuana ediatani.

<sup>28</sup> Da su Jesús ja epuna uja atana:

—Epuna, ebia su mida ema peje su enimetuheatiani yama ebainia. Da putsu beju, mique jabajati daja papu.

Da hora jenetia epuna sa ebaquepuna beju saisibana.

### *Jesús ja dueji nedaji cuana saisiametana*

<sup>29</sup> Da su beju Jesús da jenetia Galilea bai maje je jaitianana. Murucu aida su tsuati putsu, dapia aniuteana. <sup>30</sup> Tu peje su dueji cristiano cuana puepirutana. Pamapa piapiati nedaji cuana dusetana huecuana. Tida, padha, mimi bue mahue, bai riji cuana beju dusetana huecuana tuahueda pasaisiameta huecuana puji. Beju Jesús ja saisiametana huecuana pamapa. <sup>31</sup> Da su cristiano cuana ebia su nimetiunetiana, pamapa tueda nedaji cuana saida, saisijiji ba putsu. Diusu saida mitsutsuapirutana huecuana.

### *Jesús ja pushi mil deja cuana mihuatana*

*(Marcos 8.1-10)*

<sup>32</sup> Jesús ja cristiano cuana dueji ba putsu, discípulo cuana uja atana:

—Ebataichenubainia yama ye cristiano cuana. Beju quimisha tsine upia ema neje yanita putsu, jana mahue ta



beju. Yama beituja mahue huecuana tuna sa ete su diadiaji mahue. Cuapuitime edid'i su nimetaitanata cua huecuana.

<sup>33</sup> Da su mesa discípulo cuana ja uja quisabatana:

—¿Que jenetia ni da ecuana teje cua jana tupu dajucua cristiano cuana emihua puji? Ye eti jude su aimue aidhe biame ani ai dia taji cuana ebaja puji.

<sup>34</sup> Da su Jesús ja quisabatana huecuana:

—¿Quejucua pan chidi cuana micuana sa yani?

Beju jeutsutana huecuana:

—Siete pan chidi cuana ecuanaju sa yani. Quejucua chidi se cuana di ecuanaju sa yani.

<sup>35</sup> Da su Jesús ja cuatsasiatana cristiano cuana yahua su paaniuteta puji. <sup>36</sup> Beju siete pan chidi, se cuana di ina putsu, diusulupai Diosu atana. Pan chidi, se cuana ped'uped'ua putsu, discípulo cuana menajatiatana cristiano cuana paberereatiata huecuana puji. Discípulo cuana ja cristiano cuana eberereatiatani cama, pan, se ped'u cuana jajucuatitana.

<sup>37</sup> Beju pamapa cristiano cuana diadiatana tupu. Pan chidi, se cuana beju puchu puana. Eped'u cuana chudutana huecuana. Siete d'iti cuana sejeatana huecuana puchu cuana neje. <sup>38</sup> Pushi mil deja cuana diadiatana. Jucuada epuna, yanana cuana dapia anitaina. Pamapa tuneda di diadiatana tupu. <sup>39</sup> Da su beju Jesús ja cristiano cuana beitutana tuna sa ete cuana je. Beituyu putsu, canoa aida su nubiana Magdala yahua su eputi puji.

## 16

*Fariseo, saduceo cuana ja Jesús bajatana piada nimetiuda aida paata puji*

*(Marcos 8.11-13; Lucas 12.54-56)*

<sup>1</sup> Fariseo, saduceo cuana da Jesús peje su putitana mimi neje yaba puji, tu etuaquisa puji. Da su Jesús bajatana huecuana piada nimetiuda aida paata puji. <sup>2</sup> Beju Jesús ja jeutsutana huecuana uja:

<sup>3</sup> —Tsinecua su micuaneda buepa echamainia ahua saida ahua mahue ehuenati eshanapa puji. Daja huecha apudaya su buepa chama putsu, beju micuaneda bahue tsine saida epu ahua mahue. Micuaneda da bubeta cuana. Buepa ba putsu, micuaneda nai epu ahua mahue eshanapainia. Daja biame, aimue micuaneda mu Diosu ja ai yatani cuana eshanapainia mahue, quema ai nimetiuda ajiji cuana ba putsu. Mue shanapa micuaneda Diosu ja ema ye nimetiuda aida yametani. <sup>4</sup> Micuaneda da deja bubeta, ate cuana. Micuaneda ema ebajainia yama nimetiuda aida ya puji. Beju

aimue yama ya mahue. Cuaja Diosu sa profeta Jonás chenu puidha, tueda da micuaneseda puji nimetiuda aida papu.

Beju Jesús ja netiajusia huecuana putsu, putiana.

*Fariseo cuana sa jabuetsuati madhada cuana da levadura nime*

*(Marcos 8.14-21)*

<sup>5</sup> Da su Jesús, mesa discípulo cuana neje bai chu maje anipetutiana. Beju discípulo cuana ja jana edusu puji setatana. <sup>6</sup> Jesús ja uja atana huecuana:

—Merejatique fariseo, saduceo cuana sa levadura neje.

<sup>7</sup> Da su discípulo cuana uja jaquisabatitana:

—¿Cuaja su Jesús daja epuani? Mue ecuaneda pan duse aitia putsu jia, daja epuani.

<sup>8</sup> Jesús ja tuna daja equisatitani shanapatana. Da su uja quisabatana huecuana:

—¿Jucuaja su daja micuaneda epuani? Aimue micuaneda ema peje su jubida enimetuheatiani mahue. <sup>9</sup> ¿Jiahue teje jia maida micuaneda aimue eshanapainia mahue? ¿Aimue jia maida micuaneda cuaja yama pishica mil deja cuana pishica pan chidi cuana neje mihuana epibainia mahue? ¿Quejucua d'iti cuana puchu cuana neje micuaneda sejeana? <sup>10</sup> ¿Aimue jia maida micuaneda cuaja yama pushi mil deja cuana siete pan chidi cuana neje mihuana epibainia mahue? Da tsunu, ¿quejucua d'iti cuana puchu cuana neje micuaneda sejeana?

<sup>11</sup> ¿Jucuaja su micuaneda aimue eshanapainia mahue? Beju aimue ema pan jepuiti quisa puitia mahue, micuana yama levadura jepuiti quisaitia su.

<sup>12</sup> Da su beju ye chu discípulo cuana ja shanapaenitana Jesús ja quisatana huecuana fariseo, saduceo cuana sa jabuetsuati cuana neje parejatita puji. Aimue pan sa levadura neje parejatita puana mahue.

*Pedro, Jesús da Diosu sa Jabeituti Deja, puana*

*(Marcos 8.27-30; Lucas 9.18-21)*

<sup>13</sup> Da su beju Jesús, mesa discípulo cuana neje Cesarea Filipo yahua su putiana. Dapia mesa discípulo cuana uja quisabatana:

—¿Cuaja ni da cristiano cuana ema jepuiti eputani?

<sup>14</sup> Beju jeutsutana huecuana:

—Piada piada mida pa Juan Bautista chenu id'eyujiji eputani. Pia cuana mida pa Eliás chenu id'eyujiji eputani. Pia cuana mida pa Jeremías chenu id'eyujiji eputani. Pia cuana mida pa pia Diosu sa profeta eputani.

<sup>15</sup> Jesús ja quisabatana huecuana:

—¿Aidhe ni da ema pu cua micuaneda epibatiani?

<sup>16</sup> Da su Simón Pedro ja Jesús jeutsutana uja:

—Mida da Diusu sa Jabeituti Deja. Diusu eid'e eni sa Ebacua da mida.

<sup>17</sup> Da su Jesús ja Pedro atana:

—Beidaji mida, Simón, Jonás sa ebacua. Butsepi mida jajeut-sutaitia, quema Tata Diusu ja mida shanapametana putsu. Aimue aidhe deja ja biame mida tueda shanapametana mahue. <sup>18</sup> Beju yama mida equisainia, mique ebani da Pedro. Tueda ebani tumu epuani. Yama quitaita edhareinia quema dharejiji cuana pamapa ejude jenetia. Aimue Ishahua, einid'u madhada cuana ja tuna epishitiata mahue. <sup>19</sup> Pamapa mique piba su aja yainia, aja mahue yainia cuana Diusu ja etsabatayu.

<sup>20</sup> Da su Jesús ja discípulo cuana cuatsasiatana, tueda da Diusu sa Jabeituti Deja aidhe biame paquisata huecuana mahue.

*Jesús quisa puana cuaja manume epu  
(Marcos 8.31-9.1; Lucas 9.22-27)*

<sup>21</sup> Da hora jenetia Jesús ja mesa discípulo cuana quis-apirutana cuaja pia cuana ja tu emanuameta. Jerusalén ejude su mesa puti taji quisatana huecuana. Judío cuana sa ehuidusuji, sacerdote huaraji aida, jacuatsasiati ebuetsuaji cuana ja cuaja Jesús ebia su sufri yameta quisatana huecuana. Cuaja tu emanuameta huecuana quisatana huecuana. Beju emanuameta huecuana su, quimisha tsine jaitianaja su, tueda eid'eyu manujiji cuana duju jenetia quisatana huecuana. <sup>22</sup> Daja Jesús ja quisapetana huecuana su, Pedro ja tueda chuadera dusutana. Chuadera tu mehua dusu putsu, d'ayapirutana Jesús uja:

—Aimue Diusu sa tsada epu mahue mida daja yata huecuana.

<sup>23</sup> Beju Jesús ja Pedro chamaeni putsu, uja atana:

—Netideraque ema naja jenetia, Ishahua. Mida da ema naja su d'ejí mahue eneti yama Diusu sa tsada ya puji. Deja cuana sa piba bahui mi emimiani. Aimue mi Diusu sa piba diuana mu emimiani mahue.

<sup>24</sup> Da su Jesús ja mesa discípulo cuana uja atana:

—Quebata ja ema tije aja su, pamapa muesumu neje ema tije paata. <sup>25</sup> Tusa manu teje ema tije paata, manuameja paata huecuana biame. Ema pamapa mesa ai cuana quitaita ebia su tsada pabata. <sup>26</sup> ¿Ai puji saida ni da etse sa pamapa mundo sa chipilu cuana paani pu cua, etse cuati castigo su eputi biame. ¿Ai etse d'ejí su epu puji chujetia cua bata? ¡Mahue! <sup>27</sup> Diusu sa Jabeituti Deja da ema. Quema Tata Diusu sa tucheda neje ema esiapatiyu. Pamapa quema ángel cuana neje ema esiapatiyu pamapa cristiano cuana ejuzgayu puji. Cuaja pamapa tuna ye mundo su atana cuana batame yama

eturuca echuje etiayu huecuana. <sup>28</sup>Ene putsu, yama micuana butsepi equisainia, piada piada micuaneda upia eneti aimue emanu mahue Diosu ecuatsasiati eba teje.

## 17

*Jesús da japiatiana*

*(Marcos 9.2-13; Lucas 9.28-36)*

<sup>1</sup> Beju sucuta tsine jaitianaja su, Jesús ja Pedro, Jacobo, Juan cuana dusutana murucu aida bia su. Tuneda bahui dusutana. <sup>2</sup> Dapia cuinati putsu, Jesús japiatiana tuna butse su. Mesa ebu id'eti nime cuarecuare puana. Mesa ejud'uji pasapasa cuarecuare hueda nime puana. <sup>3</sup> Da su Elías, Moisés chenu detse bataji puana eid'e batana huecuana. Jesús neje quisaquisa epuani tse batana huecuana. <sup>4</sup> Da su Pedro ja Jesús uja atana:

—Echua Puji, saida ecuaneda upia pamapa su meanija. Quimisha epahuaneti cuana ecuanaju paaiti, ahua mique tsada su. Piada miqueda puji, piada Moisés sa puji, piada Elías sa puji ecuanaju paaiti.

<sup>5</sup> Beju Pedro daja emimiani cama, judu cuarecuare ja dunutana huecuana. Judu duju jenetia Tata Diosu ja atana huecuana uja:

—Ye da quema ibuneda Ebacua. Tu neje ema beidaji. Tueda bahui meid'abaenique.

<sup>6</sup> Da su tueda quimisha discípulo cuana ja daja Tata Diosu epuani id'aba putsu, ebia su iyuame putana. D'epesatana huecuana yahua su. <sup>7</sup> Da su Jesús tuna peje su janariatiana. D'apaba putsu, uja atana huecuana:

—Menetianaque. Be iyuame mepuji.

<sup>8</sup> Da su jababarereati huecuana putsu, Jesús tu mehua batana huecuana. Aimue Moisés, Elías detse netina mahue beju.

<sup>9</sup> Da su beju murucu aida jenetia ebutetasa cama, Jesús ja uja atana huecuana:

—Be aidhe biame mequisaji tsuhu micuaneda baitia ai cuana. Beju ema manujiji cuana duju jenetia enetianayu tsine su chu quisa mepuque.

<sup>10</sup> Tuneda murucu jenetia ebutesa cama uja Jesús quisabatana huecuana:

—¿Jucuaja su ni da jacuatsasiati ebuetsuaji cuana ja cristiano cuana uja ebuetsuatani: “Diosu sa Jabeituti Deja pueji mahue su, Elías chenu sa equene pue taji.”? Beju mida Diosu sa Jabeotito deja pueana biame, aimue ecuanaju Elías chenu bana mahue.

<sup>11</sup> Da su Jesús ja jeutsutana huecuana uja:

—Ene putsu, Elías chenu ema equene pueana cristiano cuana ebaseta puji, ema painatsuta huecuana puji. <sup>12</sup> Beju tueda pueana biame, aimue shanapatana huecuana mahue. Madhada hue atsutana huecuana tu emanuame teje. Daja huecha cuaja tueda atana huecuana nime, ya di sufri yameta huecuana.

<sup>13</sup> Da hora su chu, tueda quimisha discípulo cuana ja shanapaenitana Jesús Juan Bautista jepuiti quisa puana. Beju Juan da Diosu sa profeta Elías chenu nime puina, da su chu shanapaenitana huecuana.

*Jesús ja edeahue einid'u madhadaji saisiametana*  
(Marcos 9.14-29; Lucas 9.37-43)

<sup>14</sup> Beju cristiano cuana yanita su cuinatana huecuana su, piada deja ja Jesús nariatana. Tu butse su tururu putsu, uja atana:

<sup>15</sup> —Echua Puji, ichenubaque quema ebacua einid'u madhadaji. Ai hora papu enimetaitanani. Cuati, ena su dajaja bahue. <sup>16</sup> Yama upia duseitia mique discípulo cuana peje su tu pasaisiameta huecuana puji. Beju cuaja jusiacuina taji mahue batana huecuana.

<sup>17</sup> Da su Jesús ja anititana discípulo cuana d'ayapirutana uja: —¡Ai! ¿Jucuaja su jia micuaneda jei puja mahue? ¿Que tupu teje jia quema micuana neje ani taji?

<sup>18</sup> Edeahue dusetana huecuana su, Jesús ja einid'u madhada d'ayatana. D'aya putsu, edeahue peje jenetia cuinanametana. Da hora jenetia beju edeahue saisiana.

<sup>19</sup> Cristiano cuana putitaibana su, discípulo cuana ja Jesús uja quisabatana:

—¿Jucuaja su ni da ecuanaju einid'u madhada cuaja jusiacuina taji mahue baitia?

<sup>20-21</sup> Jesús ja jeutsutana huecuana:

—Micuaneda einid'u madhada cuaja jusiacuina taji mahue baitia, Diosu peje su micuaneda huai chidi hue enimetucheatiani putsu. Ene putsu, yama micuana equisainia, ahua micuaneda Diosu peje su mostaza ejaja chidi nime aihua dhucuaana enimetucheatu su, da su micuaneda ye emata: “U jenetia pia eti jude su puderaque”, cuatsasia cua. Ahua daja micuaneda ecuatsasia su, beju emata epudera. Pamapa ai atadhada eni cuana a cua, Diosu peje su enimetucheatiani putsu.

*Jesús neicha quisa puana tu emanu jepuiti*  
(Marcos 9.30-32; Lucas 9.43-45)

<sup>22</sup> Beju Jesús da mesa discípulo cuana neje Galilea yahua je epuniuneti cama, quisapirutana huecuana cuaja deja madhada cuana ja tueda menajatiame yata emanuame puji. <sup>23</sup> Beju emanuameta huecuana biame, quimisha tsine

jaitianaja su, tueda eid'eyu manujiji cuana duju jenetia quisatana huecuana. Daja Jesús ja quisapetana huecuana su, ebia su jatacuamadhatitana huecuana.

### *Templo sa impuesto*

<sup>24</sup> Jesús da mesa discípulo cuana neje Capernaum ejude su cuinatiana su, templo sa impuesto echujebajaji deja cuana ja Pedro batitana. Uja Pedro quisabatana huecuana:

—¿A da mique ebuetsuaji ja templo sa impuesto echujetiata?

<sup>25</sup> Pedro ja jeutsutana huecuana:

—Ehe, echujetiata da.

Da su ete su nubiana su, Pedro mimiji mahue su, Jesús ja tueda uja quisabatana:

—Quisaque ema, Simón, ¿aidhe cuana da ye mundo sa echua puji huaraji cuana ja impuesto cuana echujebajatani? Ahua tuna sa cristiano quitaita cuana, ahua extranjero cuana?

<sup>26</sup> Pedro ja jeutsutana uja:

—Extranjero cuana.

Da su Jesús ja atana:

—Da su beju tuna sa cristiano quitaita cuana sa aimue chujetia taji mahue. Daja huecha yama templo sa impuesto aimue quema chujetia taji mahue, ema Diosu sa Jabeituti Deja putsu. <sup>27</sup> Daja biame, yama impuesto echujetia eduininita mahue puji. Esia putique bai su. Equene se miada ejemitsua su, ecuatsa su piada chipilu eteje. Tueda chipilu neje beju chujetiati que impuesto.

## 18

*¿Aidhe ebia su aida epu Diosu sa ecuatsasiati su?*

*(Marcos 9.33-37; Lucas 9.46-48)*

<sup>1</sup> Da su beju discípulo cuana janariatitana Jesús peje su. Uja quisabatana huecuana:

—¿Quebata ecuanaju ebia su aida epu Diosu ecuatsasiati su?

<sup>2</sup> Da su Jesús ja piada yanana ihuatana. Tuna duju su netia putsu, uja quisatana huecuana:

<sup>3</sup> —Ene putsu, yama micuana butsepi equisainia, etse sa nimemitsida pu taji ye yanana nime Diosu ecuatsasiati su enubi puji. Ahua aimue daja epu mahue su, aimue micuaneda Diosu ecuatsasiati su enubi mahue. <sup>4</sup> Quebata micuaneda yanana nime nimemitsida epu su, tueda da ebia su aida epu Diosu ecuatsasiati su. <sup>5</sup> Quebata ja piada ema peje su jei epuani cristiano saida ebatsuta su, tueda da ema quitaita saida ebatsutani pu cua nime.

*Pia jucha ame taji mahue*

*(Marcos 9.42-48; Lucas 17.1-2)*

<sup>6</sup> 'Quebata ja piada eichacua ema peje su jei epuani cristiano tusa Diosu peje su janimetucheati etaitanameta su, tuseda puji ebia su saida pamanu bai dueda su tueda eichacua jei epuani cristiano sa janimetucheati taitanameji mahue su hue. <sup>7</sup> Beju ye mundo su jucuada ai cuana yani cristiano cuana sa Diosu peje su janimetucheati cuana etaitaname puji. Quebata ja daja etaitanameta huecuana su, Diosu ja tueda ematsetayu. ¡Aba tueda, ahua pia cuana daja etaitanameta su!

<sup>8</sup> 'Miada eme ahua ehuaitsi neje jucha ya su, riji putsu, jusiaque uqueda. Ebia su saida meriji, huatsiriji cielo su eid'e eni eputi puji, aimue cuati castigo su meji, huatsiji eputi mahue puji. <sup>9</sup> Daja huecha ahua miada etua neje jucha ya su, huijajuseque. Ebia su saida tua mahue cielo su eid'e eni eputi puji, aimue cuati castigo su tuaji eputi mahue puji.

### *Huisha jeitid'ujiji jepuiti quisa*

*(Lucas 15.3-7)*

<sup>10</sup> 'Be quebata ja biame ema peje su eichacua jei eputani cristiano cuana mue ai puji saida nime mebaji. Butsepi yama micuana equisainia, Diosu ja mesa ángel cuana ebeitutani tuna saida ebata puji. <sup>11</sup> Beju ema pueana Diosu peje jenetia jeitid'ujiji cuana d'eji su ya puji.

<sup>12</sup> 'Mepibaenique. Ahua quebata sa cien huisha ani cua su, ahua piada mesa jeitid'u cua su, ¿aimue jia maida tuahueda mesa pia huisha cuana taraca su terijiji eichajusiata mahue tueda piada jeitid'ujiji huisha echacuti puji? <sup>13</sup> Ahua etejetita su, ene putsu beidaji epu. Terijiji enetita cuana jenetia ebia su beidaji epu, piada tejeju putsu. <sup>14</sup> Daja nime da Tata Diosu sa tsada mahue piada biame mesa jadhareti eichacua cristiano pataitana mahue.

### *Mique edue perdona taji*

*(Lucas 17.3)*

<sup>15</sup> 'Ahua mique edue ja mi ai jucha yata su, butseatique tu jucha yatani jepuiti. Ahua tusa jucha eshanapata su, da su neicha miada mique edue saida yameinia. <sup>16</sup> Ahua tuahueda shanapaja mahue yata su, da su beju piada ahua beta edue detse neje neicha putique tu peje su tuatse butse su di tusa jucha jepuiti equisaba puji. <sup>17</sup> Ahua tuatse butse su di shanapaja mahue yata su, beju mequisatique pamapa edue cuana neicha tusa jucha jepuiti paquisabata huecuana puji. Ahua tuahueda pamapa edue cuana butse su shanapaja mahue su, da su tueda Diosu peje su jei puja mahue deja nime hue mebaque.

18 ‘Ene putsu, yama micuana equisainia, pamapa micuana sa tupupai piba su aja yainia, aja mahue yainia cuana Diosu ja etsabatayu.

19 ‘Ahua micuana duju jenetia beta tupupai epibatiani Diosu ebaja puji, beju Tata Diosu ja metse sa jabajati etiatayu. 20 Quepia beta ahua quimisha quema dharejiji cuana edhitatani su, dapia ema yani tuna duju su.

21 Da su beju Jesús quisa pupeja su, Pedro ja tueda uja quisabatana:

—Echua Puji, ¿quejucua nuati quema edue perdona taji? ¿Ahua siete nuati teje?

22 Da su Jesús ja Pedro jeutsutana:

—Aimue siete nuati bahui mahue. Daja hue mique pamapa hora su perdona taji.

*Emebajaji ja perdonaja mahue atana*

23 ‘Beju Diosu ecuatsasiati da uja: Piada echua puji huaraji aida anina. Da su mesa emebajaji cuana sa manu cuana tu peje su dusetana ebaseta puji. 24 Mesa equene emebajaji deja tu peje su dusetana. Tueda manu dueji echua puji peje su puina. 25 Beju aimue mesa chipilu anina mahue manu echujetia puji. Da su echua puji ja mesa emebajaji cuana cuatsasiatana tueda deja, tusa ehue, ebacua cuana neje pamapa tusa ai cuana di pairuta huecuana puji, tusa manu echujetia puji. 26 Da su tueda deja echua puji butse su tururuana. Jubida bajatana uja: “Echua puji, paciencia tsuhu puque ema neje. Pamapa quema manu mi neje yani yama echujetia.” 27 Da su echua puji ja ibunebatana deja. Mesa manu perdona putsu, d’ejí su atana deja. 28 Beju deja ete jenetia cuinana putsu, piada mesa ebuqueji tsutana. Tueda ebuqueji sa tu peje su manu chidiji puina. Da su tipeida deja ja ebuqueji inatana enaja su. Najapuduja adhaa putsu, uja atana ebuqueji: “¡Chujetiaque ema mique manu!” 29 Da su ebuqueji deja butse su tururuana. Jubida bajatana: “Paciencia puque ema neje. Pamapa quema manu cuana mida yama echujetia.” 30 Beju deja ja tsada mahue batana. Teriichanubiametana ebuqueji dapia paani puji tusa manu echujetiapeti teje. 31 Da su pia ebuqueji cuana ja ba putsu, ebia su duininitana huecuana. Echua puji peje su putitana huecuana pamapa cuaja putana cuana tu butsepi equisa puji. 32 Da su beju echua puji ja ihuametana deja. Deja echua puji peje su cuinati putsu, uja echua puji ja tueda atana: “Mida da deja ebia su ate. Cuaja yama mique manu perdonaitia nime, daja mique ebuqueji sa manu miqueda perdona taji aitia. 33 Cuaja yama mida ibunebaitia nime, daja mique ebuqueji miqueda ibuneba taji aitia.” 34 Da su echua puji ebia su



duinini putsu, cuatsasiatana deja pacastigata huecuana puji, pateriichanubiata huecuana puji deja ja pamapa mesa manu echujetiata teje.

<sup>35</sup> Daja Jesús ja perdona jepuiti quisa cuana quisapetana huecuana. Daja hue quisainiame atana huecuana uja:

—Cuaja echua puji ja deja castigatana nime, daja da quema Tata Diosu ja micuana yatayu, ahua micuaneda micuana sa edue cuana perdonaja mahue yainia su.

## 19

*Jesús ja jamesiati jepuiti buetsuatana*  
(*Marcos 10.1-12; Lucas 16.18*)

<sup>1</sup> Jesús ja tueda ai cuana quisape putsu, Galilea yahua jenetia cuinanana Judea yahua su eputi puji. Tueda yahua da Jordán ena id'eti ecuinanani bene su anina. <sup>2</sup> Beju dueji cristiano cuana ja tije atana. Dapia Jesús ja pamapa nedaji cuana saisiametana. <sup>3</sup> Da su beju piada piada fariseo cuana ja Jesús nariatana mimi neje tu yaba puji. Uja Jesús quisabatana huecuana:

—¿Ai jepuiti da, etse sa ehuané neje jamesiati cua? ¿Cuaja jacuatsasiati cuana epuani?

<sup>4</sup> Da su Jesús ja jeutsutana huecuana uja:

—¿Aimue jia maida micuaneda mimiameana mahue Diosu sa quirica? Tueda quirica su Moisés chenu ja uja deretaidha: “Equene su Diosu ja deja, epuna ataidha.” <sup>5</sup> Neicha Moisés chenu ja deretaidha uja: “Da putsu, deja ja mesa tata, cuara detse ichajusia taji mesa ehuané neje yaniti puji. Beju tuatseda mu piada hue pu cua nime epu.” <sup>6</sup> Beju daja Diosu sa quirica su epuani. Aimue Diosu ja tuatseda beta nime ebatani mahue. Piada nime hue ebatani tse. Da putsu beju, aimue detse aidhe sa biame jamesiati taji pu cua mahue, Diosu ja tuatseda dunemetana putsu.

<sup>7</sup> Daja da Jesús ja fariseo cuana jeutsutana. Da su Jesús neicha quisabatana huecuana uja:

—Ahua enei hue mida epuani su, ¿jucujaja su ni da, da su Moisés chenu ja cuatsasiataidha deja ja quirica derejiji neje ehuané mesiata cua?

<sup>8</sup> Da su Jesús ja jeutsutana huecuana:

—Micuana sa tata chenu cuana sa ebia su tsada puidha putsu, Moisés chenu ja daja cuatsasiataidha. Beju epupiruji su, aimue Diosu ja tsada mahue bataidha. <sup>9</sup> Moisés chenu ja daja cuatsasiataidha biame, yama mu micuana uja equisainia: Ahua quebata yahue ja mesa ehuané jucha mue biame emesiata su, ahua tueda deja pia epuna neje ehuaneti su, tuahueda jucha aida yatani. Daja huecha quebata deja

meseajiji epuna neje ehuaneti su, tuahueda di jucha aida yatani.

<sup>10</sup> Jesús da daja mimipe putsu, discípulo cuana ja tueda quisatana uja:

—Ahua daja su mu, cuaja jahuanetija pu taji mahue.

<sup>11-12</sup> Da su Jesús ja atana huecuana:

—Ehe, butsepi micuaneda emimiani biame, beju aimue detse pamapa su jabutsenetiji mahue anita cua mahue. Piada piada cuana aimue ebutsenetitani mahue, daja hue bataji eputani jenetia huecuana putsu. Pia cuana aimue ebutsenetitani mahue, deja cuana ja micuana sa equita etsapiatani putsu. Daja huecha pia cuana aimue ebutsenetitani mahue Diusu bahui tuna mehua emebaja puji. Beju Diusu ja jabutsenetija mahue cuana etsahuatani daja hue paaniti puji. Da su quebata daja anija su, daja paani.

*Jesús ja yanana chidi cuana ibunebatana*  
(*Marcos 10.13-16; Lucas 18.15-17*)

<sup>13</sup> Da su beju piada piada yanana chidi cuana Jesús peje su dusetana huecuana Jesús ja mesa eme tuna bia su huana putsu, tuneseda puji Diusu ebajata puji. Beju discípulo cuana sa tsada mahue puana. Yanana chidi duseji cristiano cuana d'ayapirutana huecuana. <sup>14</sup> Da su Jesús ja discípulo cuana uja atana:

—Yanana chidi cuana d'ei metiaque ema peje su papueta, Diusu ecuatsasiati da tuna nime cuana su putsu.

<sup>15</sup> Jesús daja epuani je, mesa eme yanana chidi cuana bia su huanatana. Daja ape putsu, da jenetia beju putiana.

*Piada deja chipiluji Jesús neje jamitsutiana*  
(*Marcos 10.17-31; Lucas 18.18-30*)

<sup>16</sup> Piada deja Jesús peje su putiana. Uja quisabatana:

—Echua Puji, mida da saida. ¿Ai ni quema a taji Diusu neje cielo su eid'e yanieniti puji?

<sup>17</sup> Da su Jesús ja tueda jeutsutana:

—¿Jucuaja su miada ema saida yainia? Diusu bahui da saida. Ahua mida cielo su eid'e anienija su, Moisés chenu sa jacuatsasiati cuana apeqque. <sup>18</sup> Da su deja ja neicha Jesús quisabatana:

—¿Quebata jacuatsasiati cuana quema a taji?

Jesús ja deja jeutsutana:

—Be cristiano manuameji. Be pia sa ebutse quinaji. Be tsi puji. Be bid'umimi puji. <sup>19</sup> Mique tata, cuara detse iyubaque. Mida quitaita ibuneda ebatiani nime, daja pia cuana ibuneda baque.

<sup>20</sup> Da su deja ja Jesús atana:

—Beju pamapa tueda jacuatsasiati cuana yama butsepi yainia ema yanana jenetia jiahue teje. ¿Ai pia ni da quemana taji yani?

<sup>21</sup> Beju Jesús ja tueda uja atana:

—Ahua mida nimebutsepi puja su, irutique pamapa mique ai cuana. Pamapa mique chipilu cuana puri cristiano cuana tiaque. Tiape putsu, tije ema aque. Ahua daja ya su, cielo su pamapa ai eichacua cuana mique yani.

<sup>22</sup> Beju deja ja daja id'aba putsu, ebia su jatacuamadhapirutiana, tueda ebia su chipiluji putsu.

<sup>23</sup> Da su deja putibana su, Jesús ja mesa discípulo cuana uja atana:

—Ene putsu, yama micuana equisainia, atadhada chipiluji cuana Diusu ecuatsasiati su enubi puji. <sup>24</sup> Ebia su atasaida caballo acusha id'aja je ejaitiana puji.

<sup>25</sup> Da su discípulo cuana da Jesús daja epuani id'aba putsu, ebia su nimetiunetitana huecuana. Uja jaquisabatitana huecuana:

—¿Aidhe jia da d'ejí su pu cua?

<sup>26</sup> Beju Jesús ja tuna chama putsu, uja atana huecuana:

—Cristiano cuana aimue tuna mehua quitaita hue d'ejí su jaatita cua mahue. Diusu sa puji mu mue ai biame atadhada mahue. Beju Diusu ja aidhe papu biame d'ejí su ata cua.

<sup>27</sup> Da su Pedro ja Jesús uja atana:

—Echua Puji, ecuanaju beju pamapa ecuanaju sa ai cuana ichajusiana mi tije ya puji. Da su, ¿ai da miada ecuanaju etia?

<sup>28</sup> Jesús ja Pedro jeutsutana:

—Ene putsu, yama micuana equisainia, ema cielo jenetia esiapati hora ecuina su, ema ecuatsasiapiruti su, pamapa ai cuana eichacua yayu. Beju micuaneda ema tije ana putsu, ema esiapati hora su yama micuana huaraji aida cama yameyu. Pamapa israelita cuana ema neje micuaneda ecuatsasiatiyu. <sup>29</sup> Da hora su beju pamapa ema tije atana cuana yama echuje etiayu. Pamapa ete, edue, tata, cuara, ebacua, yahua cuana, ema emebaja puji ichajuseatana cuana yama ebia su dueji eturuca etiayu. Beju eid'e yanienitita huecuana Diusu neje cielo su. <sup>30</sup> Upia ye mundo su ai eni mahue eputani cuana da Diusu ja equene aida yametayu tu ecuatsasiati su. Daja huecha equene, aida eputani cuana da ai eni mahue tije eputayu Diusu ecuatsasiati su.

## 20

### *Mudu puji cuana jepuiti quisa*

<sup>1</sup> Diusu ecuatsasiati da uja: Beju piada yahua emetse aida anina. Tueda da apudaya eni eni cuinanana huiruhuiruji cuana echacuti puji. <sup>2</sup> Teje putsu, mudu tsine quejucua

echujetia jabutsepiatitana huecuana. Beju emetse ja te su beitutana huecuana ehuiruhuru puji. <sup>3</sup> Da su beju neicha apudaya las nueve tupu su beju cuinanana. Pia deja mudu mahue cuana ejude su tejetana. <sup>4</sup> Da su emetse ja atana huecuana: “Meputique micuaneda di quema te su ehuiruhuru puji. Yama micuana echujetia pia equene mudu puji cuana neje tupupai.” Da su putitana huecuana. <sup>5</sup> Neicha emetse cuinanana beju buepatia su. Pia deja mudu mahue cuana tejetana. Tuneda daja huecha atana emetse ja. Beju buepatia badeute uqueda su las tres tupu su neicha cuinanana. Pia deja mudu mahue cuana teje putsu, daja huecha atana. <sup>6</sup> Neicha beju cuinanana emetse tsinecua enariatiani su las cinco tupu su. Ejude su pia deja mudu mahue tejetana. “¿Jucuaja su micuaneda upia mudu mahue eneti?” atana huecuana. <sup>7</sup> Da su tuneda jeutsutana: “Beju aimue aiya biame ecuanaju tia.” Da su emetse ja uja atana huecuana: “Meputique micuaneda di quema te su ehuiruhuru puji. Micuaneda tsinecua enariatiani su, emudumudupiru biame, yama micuana pia equene mudu puji cuana echujetia nime tupupai echujetia.” <sup>8</sup> Beju dhidha cuinana su, emetse ja pamapa mudu puji cuana ihuametana. Uja emetse ja mudu puji cuana sa edusuji atana: “Chujetiaque mudu puji cuana. Equene chujetiapiunque tije nubitaitia mudu puji cuana. Da su pia equene nubitaitia mudu puji cuana chujetiaque.” <sup>9</sup> Da su tije tsinecua nubitaitia mudu puji cuana emetse butse su netisenatana. Beju pamapa su piada mudu tsine echuje quitana inatsutana, tsinecua nubitaitia biame. <sup>10</sup> Da su beju equene apudaya nubitana mudu puji cuana macha netisenatana emetse butse su. Tuneda japibatitana ebia su dueji echuje einatsu pepe putana. Daja pibatana biame, piada mudu tsine echuje bahui inatsutana huecuana. <sup>11</sup> Beju duininitana huecuana emetse neje. <sup>12</sup> Da su uja emetse atana huecuana: “Ye mudu puji cuana tsinecua nubitaitia biame, miada ecuanaju neje tupupai chujetiaitia huecuana. Beju piada hora chidi hue mudumudutaitia huecuana. Ecuanaju mu tsine tupu id'eti sinada duje jubida mudumuduitia. Da su, ¿jucuaja su miada ecuanaju chujetiaitia tupu huecha hue chujetiaitia huecuana?” <sup>13</sup> Beju emetse ja uja jeutsutana huecuana: “Eshanapa cuana, aimue micuana yama madhada hue echujetiainia mahue. Daja micuana sa jamitsuti ema neje puitia dajucua micuana yama piada mudu tsine echujetia puji. <sup>14</sup> Da su meinatsuque micuana sa echuje. Beju meputiyuque. Quema tsada yama tsinecua nubitaitia mudu puji cuana micuana sa echuje tupu huecha echujetia. <sup>15</sup> Ai papu biame yama a cua, quema chipilu putsu. ¿Jucuaja su

micuaneda enimepuani, yama saida neje mudu puji cuana echujetiainia, ba putsu?"

<sup>16</sup> Daja da Jesús ja bahue quisa neje buetsuapetana huecuana. Neicha quisatana huecuana uja:

—Diusu ecuatsasiati da beju uja: Upia ye mundo su ai eni mahue nime ebatani cuana da Diusu ecuatsasiati su equene, aida eputa. Daja huecha ye mundo su equene, aida eputani cuana da ai eni mahue tije eputayu Diusu ecuatsasiati su. Dueji ihuajiji cuana eputani biame, beju ucua chidi hue dharejiji cuana eputani.

*Neicha Jesús quisa puana tu emanu jepuiti  
(Marcos 10.32-34; Lucas 18.31-34)*

<sup>17</sup> Jesús da mesa discípulo cuana neje Jerusalén ejude su epuhu je, chujemame dusutana huecuana. Uja atana huecuana:

<sup>18</sup> —Beju Jerusalén ejude su ecuaneda epuhu. Tueda ejude su ema emenajatiata sacerdote huaraji aida, jacuatsasiati ebuetsuaji cuana peje su. Beju ema romano soldado cuana peje su emenajatiata huecuana ema pamanuameta huecuana puji. <sup>19</sup> Ema neje eshishatita, eicheta huecuana. Curusu su ema etatata huecuana. Beju quimisha tsine jaitianaja su, ema eid'eyu.

*Jacobo, Juan detse sa cuara ja Jesús bajatana  
(Marcos 10.35-45)*

<sup>20</sup> Da su beju Jacobo, Juan detse sa cuara ja Jesús nariatana tuatse neje. Zebedeo da metse sa tata puina. Tuatse sa cuara da Jesús butse su tururuana tu ebaja puji. <sup>21</sup> Da su Jesús ja epuna quisabatana:

—¿Ai mique tsada?

Beju epuna ja Jesús atana uja:

—Mi ecuatsasiati su quema ebacua detse mi neje pacuat-sasiati. Piada mique bai eni bene, pia mique d'ani bai bene paaniute.

<sup>22</sup> Da su Jesús ja epuna jeutsutana uja:

—Ene putsu, micuaneda ebia su ebajainia, aimue butsepi epibatiani mahue putsu. Quebata da ema ecuatsasiati su huaraji aida puja epu su, tuseda equene ebia su sufri pu taji. ¿A da, da su metseda sufri pu cua ema sufri epu nime?

Da su Jacobo, Juan detse ja Jesús uja jeutsutana:

—Ehe, sufri etseju pu cua, mi epu nime.

<sup>23</sup> Da su Jesús ja uja atanatse:

—Ene putsu, ema jepuiti metseda sufri epu biame, aimue quema puji dhare taji mahue aidhe biame ema naja su ya-niute puji. Quema Tata ja bahui edhareta.

<sup>24</sup> Beju pia piada tunca discípulo cuana ja id'aba putsu, tuatse neje duininitana huecuana. <sup>25</sup> Da su Jesús ja pamapa su ihuatana tu naja su. Uja atana huecuana:

—Micuaneda bahue pamapa ejude sa huaraji aida cuana ja ebia su tucheda neje cristiano cuana ecuatsasiatani. <sup>26</sup> Beju micuaneda mu aimue daja epu mahue. Quebata micuaneda huaraji aida puja epu su, tuseda pia cuana mebaja taji. <sup>27</sup> Quebata micuaneda ehuidusuji puja epu su, pia cuana sa emebajaji pu taji. <sup>28</sup> Ema da Diosu sa Jabeituti Deja biame, ema pueana ye mundo su aniji cristiano cuana emebaja puji. Aimue ema pue cristiano cuana ja ema pamebajata puji. Beju ema pueana emanu puji, dueji cristiano cuana d'eji su paputa puji.

*Jesús ja beta deja padha saisiametana*

*(Marcos 10.46-52; Lucas 18.35-43)*

<sup>29</sup> Beju Jericó ejude jenetia cuinanatana huecuana su, dueji cristiano cuana ja tije atana Jesús. <sup>30</sup> Edid'i su beju beta deja padha detse anina. Tuatseda Jesús ejaitianasa bahue puana putsu, jubida tsiatsiapiruana tse uja:

—¡Echua Puji, David chenu sa familia jenetia, ibunebaque etseju!

<sup>31</sup> Beju Jesús sa ebuqueji cuana ja:

—¡Mitanaque!

—atana deja padha detse. “Mitanaque”, atana huecuana biame, cha ebia su hue daja hue tsiatsiana tse. <sup>32</sup> Da su beju Jesús netianana. Ihuatana padha detse. Uja quisabatana tse:

—¿Ai ni metse sa yama cuaja ya tsada?

<sup>33</sup> Uja jeutsutana tse:

—Echua Puji, tuaji etseju aque.

<sup>34</sup> Da su Jesús ja tuatseda ibunebatana. Tuatse sa etua d'apabatana putsu, da hora su hue padha detse jabatiana. Da su beju Jesús tije apirutana tse.

## 21

*Jesús da Jerusalén ejude su nubiana*

*(Marcos 11.1-11; Lucas 19.28-40; Juan 12.12-19)*

<sup>1</sup> Beju Betfagé ejude chidi su nariatana huecuana. Tueda ejude da Jerusalén ejude, Olivo murucu aida naja su anina.

<sup>2</sup> Ejude butse su cuinati putsu, Jesús ja mesa beta discípulo detse cuatsasiatana uja:

—Meputique tueda ejude chidi su. Dapia da metse eba piada asunu jananaji risijiji eneti. Pidhu putsu, meduseque.

<sup>3</sup> Ahua aiya metse: “¿Jucuaja puji metse daja yainia?” yata su, uja mequisaque tueda: “Echua Puji ja etsatani. Beju tipeida ebeitutayu.”

<sup>4</sup> Beju daja Jesús ja cuatsasiatana tse, cuaja Diosu sa profeta chenu ja deretaidha batame. Uja Diosu ja deremetaidha mesa quirica su:

<sup>5</sup> Quisaaque Jerusalén ejude su aniji cuana uja:

“Mechamaque, micuana sa Echua Puji nimemitsida epusiu. Tueda micuana peje su epusiu asunu janana bia je.”

<sup>6</sup> Da su discípulo detse da putiana. Cuaja Jesús ja cuatsasiatana batame, daja atana tse. <sup>7</sup> Asunu janana, mesa cuara neje dusetana tse. Da su discípulo cuana ja mecuana sa ebia jud'uji asunu janana bia su íchatana. Beju Jesús ja asunu janana bianitana. <sup>8</sup> Dueji cristiano cuana ja di mecuana sa ebia jud'uji cuana jajemititana. Beju huanatana huecuana Jesús epuhu edid'i su. Pia cuana ja aqui echa cuana dheutana. Jesús epuhu edid'i su íchatana huecuana. Daja cristiano cuana ja a bahue ataina, huaraji aida cuana epuetani su. <sup>9</sup> Dueji cristiano cuana Jesús neje Jerusalén ejude su putitana. Pia cuana Jesús ehui su, pia cuana tije. Pamapa mimi neje tsiatsiapiurutana uja:

—¡Saida memimija ye David chenu sa familia jenetia deja sa puji! ¡Tueda epusiu Diosu sa ebani su! ¡Diosu ja tueda paibunebata! ¡Gloria Tata Diosu!

Daja tsiatsiatana huecuana.

<sup>10</sup> Da su Jesús Jerusalén ejude su nubiana su, pamapa cristiano cuana tipeijianatana. Uja tuneda cama jaquisabatitana:

—¿Aidhe ni da ye deja?

<sup>11</sup> Pia cuana ja jajeutsutitana uja:

—Tueda da Diosu sa profeta Jesús banime, Nazaret ejude, Galilea provincia jenetia.

*Jesús ja iruiruji, chipilu turucaji cuana templo jenetia jusi-acuinatana*

*(Marcos 11.15-19; Lucas 19.45-48; Juan 2.13-22)*

<sup>12</sup> Da su beju Jesús templo su nubiana. Dapia iruiruji, bajabajaji cuana etseque su cuadejusiacuinatana. Chipilu turucaji sa misha cuana busiapapetana. Huaitucu iruji cuana sa aniude cuana di busiapapetana. <sup>13</sup> Uja Jesús ja atana huecuana:

—Diosu sa quirica su uja derejiji yani: “Quema ete da pamapa cristiano cuana sa ema mitsu jude ete epu.” Micuaneda mu tsi puji sa ete ana.

<sup>14</sup> Beju dapia templo su piada piada padha, tida deja cuana ja Jesús nariatana. Jesús ja saisiametana huecuana. <sup>15</sup> Dapia yanana chidi cuana ba putsu uja tsiatsiatana huecuana: “¡Gloria ye David chenu sa familia jenetia deja!” Daja tsiatsiatana huecuana, Jesús ja nimetiuda aida cuana yatani ba putsu.

Beju sacerdote huaraji aida, jacuatsasiati ebuetsuaji cuana ja yanana chidi cuana neje ebia su duininitana, yanana chidi cuana Jesús sa puji daja saida mimitana putsu.

<sup>16</sup> Da su uja Jesús atana huecuana:

—¿Aimue jia maida miada yanana chidi cuana daja etsiat-siatani eid'abainia mahue? ¿Ai puji miada d'ejí etiainia daja patsiatsiata huecuana puji?

Da su Jesús ja jeutsutana huecuana uja:

—Ehe, eid'abainia yama. Aimue micuaneda epibainia mahue Diosu sa quirica su daja ema jepuiti derejiji yani. Uja da epuani:

Yanana chidi cuana ja mi jepuiti saida emimita.

<sup>17</sup> Da su beju Jesús mimipe putsu, ichajusiatana huecuana. Betania ejude chidi su putiana dapia etahui puji.

*Jesús ja higuera equi jaja mahue mimi neje madhatana*  
(*Marcos 11.12-14, 20-26*)

<sup>18</sup> Beju apudaya eni eni Jesús cuinanana Jerusalén ejude su eputi puji. Edid'i su epuhu je, beju dhemanuana. <sup>19</sup> Higuera equi edid'i naja su batana. Da su janariatiana equi sa ejaja edia puji. Enariahu cama, jaja mahue batana. Eina cama bahui beju puina. Da su Jesús ja higo equi uja atana:

—Aimue mi beju quetsunu su biame jajaji epuicha mahue.

Da hora su beju equi saranetiana. <sup>20</sup> Da su discípulo cuana ja equi sarajiji eneti ba putsu, nimetiunetitana huecuana. Jesús quisabatana huecuana:

—¿Jucuaja ni da ye equi tipeida saranetitia?

<sup>21</sup> Jesús ja jeutsutana huecuana:

—Ene putsu, yama micuana equisainia, ahua micuaneda Diosu peje su enimetuheatiani su, daja detse yama equi aitia nime, micuaneda a cua. Daja ebia su detse micuaneda a cua. Ahua micuaneda Diosu peje su enimetuheatiani su, ye emata uja cuatsasia cua: “U jenetia mar su puderaque.” Beju da su emata epudera. <sup>22</sup> Pamapa micuaneda Diosu ebajainia cuana tuahueda etiatayu, ahua tu peje su enimetuheatiani su.

*Jesús da huaraji aida*  
(*Marcos 11.27-33; Lucas 20.1-8*)

<sup>23</sup> Da su beju Jesús templo su nubiana. Dapia cristiano cuana buetsuapirutana. Jesús dapia eneti cama, sacerdote huaraji aida, judío cuana sa tata edhi ehuidusuji cuana ja naria putsu, uja quisabatana huecuana:

—¿Aiya mida huaratitana ye ai cuana ya puji?

<sup>24</sup> Da su Jesús ja jeutsutana huecuana uja:

—Equene yama micuana equisaba. Ahua micuaneda ema ejeutsu su, beju yama di micuana ejeutsu. <sup>25</sup> ¿Aiya Juan



Bautista huaratiatana cristiano cuana Diusu sa puji yahui neje eichadera puji? ¿Diusu ja, ahua cristiano ja?

Da su tuneda cama uja jaquisatitana:

—Ahua ecuaneda, “Diusu ja Juan huaratiatana”, ejeutsu su, tuahueda, “Da su, ¿jucuaaja su micuaneda aimue Juan peje su jei puana mahue?” ecuana equisabata. <sup>26</sup> Ahua ecuaneda, “Cristiano ja Juan huaratiatana”, ejeutsu su, da su pamapa cristiano cuana ecuana neje eduininita, Juan da Diusu sa profeta ebatani huecuana putsu.

<sup>27</sup> Da su Jesús uja jeutsutana huecuana:

—Aiya jia Juan huaratiatana bue mahue ecuanaju.

Jesús ja atana huecuana:

—Da su yama di, aiya ema huaratiatana aimue micuana equisa mahue.

### *Beta ebacua jepuiti quisa*

<sup>28</sup> Jesús ja daja hue quisainiame atana huecuana uja:

—Meid'abaque ye quema quisa cuana. Piada deja sa beta ebacua anina. Tuahueda piada ebacua uja atana: “Ebacua, putique te su emudumudu puji.” <sup>29</sup> Da su ebacua ja, “Tsada mahue quema”, jeutsutana mesa tata. Daja jeutsutana biame, japibaturucati putsu, beju putiana te su emudumudu puji. <sup>30</sup> Da su beju pia ebacua daja huecha quisatana te su pamudumuduti puji. Pia ebacua ja, “Ehe, tata, eputi da ema”, jeutsutana biame, mue puti puana. <sup>31</sup> Da su, ¿quebata ebacua detse ja mesa tata sa tsada atana?

Beju jeutsutana huecuana:

—Equene ebacua ja mesa tata sa tsada atana.

Jesús ja atana huecuana uja:

—Ene putsu, yama micuana equisainia, juchaji impuesto echujebajaji, epuna chuamadhada cuana japibaturucati putsu, Diusu ecuatsasiati su beju enubitayu. Micuaneda mu aimue enubiyu mahue, japibaturucati ja mahue putsu. <sup>32</sup> Juan Bautista ja micuana cuaja anime butsepi pu taji ebuet-sua puji pueana. Beju micuaneda da sacerdote, judío cuana sa ehuidusuji cuana epuani biame, aimue Juan sa jabuetsuati cuana jei ana mahue. Juchaji impuesto echujebajaji, epuna chuamadhada cuana mu jei putana. Beju micuaneda tuneda daja japibaturucati ba putsu, aimue Diusu peje su tuna nime japibaturucati ja puana mahue. Aimue Juan sa jabuetsuati cuana jei ana mahue. Da su micuaneda da tije puji ebacua nime hue, jei puja mahue putsu.

### *Mudu puji madhada cuana jepuiti quisa*

(Marcos 12.1-12; Lucas 20.9-19)

<sup>33</sup> Jesús daja hue quisainiame atana huecuana uja:

—Meid'abaque ye pia bahue quisa. Piada emetse ja uva jude banametana. Baname putsu, taracametana. Uva pudu jude ametana. Ete pacha baqui bauda di ametana uva jude einatsihua puji. Da su beju tueda emetse ja uva jude pia mudu puji deja cuana menajatiatana pamuduta huecuana puji. Menajatia putsu, emetse putiana pia yahua su. <sup>34</sup> Beju huiruhuru tiempo cuinana su, emetse ja mesa emebajaji cuana beitutana mudu puji deja cuana peje su emetse sa tupu pachujebajata huecuana puji. <sup>35</sup> Beju tueda mudu puji deja cuana ja emetse sa emebajaji cuana madhada neje batsutana. Piada ichetana huecuana. Pia manuametana huecuana. Pia maracatana huecuana tumu neje. <sup>36</sup> Da su emetse ja neicha beitutana emebajaji cuana. Beju daja huecha mudu puji deja cuana ja madhada neje batsutana huecuana.

<sup>37</sup> 'Da su beju emetse ja mesa ebacua macha beitutana mudu puji deja cuana peje su. Uja emetse japibatiana: "Tueda da quema ebacua quitaita putsu, eiyubata huecuana." <sup>38</sup> Beju mudu puji deja cuana ja emetse sa ebacua ba putsu, tuneda cama jaquisatitana uja: "Ye ebacua da uva jude emetse epu, mesa tata emanu su. Da su tueda pamanuametija yahua emetse ecuaneda epu puji." <sup>39</sup> Da su ebacua ina putsu, uva jude jenetia jemicuinatana huecuana. Dapia etseque su emetse sa ebacua manuametana huecuana.

<sup>40</sup> Jesús ja quisape putsu, uja quisabatana huecuana:

—Uva jude emetse ecuinayu su, ¿cuaja ni da tuahueda yata tueda mudu puji deja madhada cuana?

<sup>41</sup> Da su uja jeutsutana huecuana:

—Emetse ja mudu puji deja madhada cuana pamapa emanuamepeta. Uva jude pia mudu puji deja saida cuana emenajatiata, pia huiruhuru tiempo su mesa tupu patiata huecuana puji.

<sup>42</sup> Da su Jesús ja atana huecuana:

—¿Aimue jia maida micuaneda Diusu sa quirica mimiameana mahue? Uja derejiji yani:

Ete muduji cuana ja yapiruji tumu jusiaderatana biame, tueda tumu macha beju Diusu ja dharetana.

Tueda pia tumu cuana ebia su saida ametana.

Tueda da nimetiuda ecuaneda ebainia. <sup>43</sup> Beju micuaneda da ate tueda mudu puji deja madhada cuana nime. Diusu ja micuana aimue enubiameta mahue tu ecuatsasiati su. Pia tu jei yatani cuana mu enubiametayu, Diusu sa tupu tiatana huecuana putsu, mudu puji deja saida cuana ja atana nime. <sup>44</sup> Quebata da Diusu sa jadhareti tumu bia su edajaja su, beju tueda eped'uped'uati. Ahua tumu etse bia su edajaja su, etse emedimediata.

<sup>45</sup> Da su sacerdote huaraji aida, fariseo cuana ja Jesús sa mimi cuana id'abatana putsu, beju jashanapatitana huecuana Jesús tuna jepuiti mimiana. <sup>46</sup> Da putsu, Jesús inaja adhaatana huecuana tu emanuame puji. Beju cristiano cuana iyubatana huecuana putsu, cuaja ina taji mahue batana huecuana, cristiano cuana ja Jesús da Diosu sa profeta batana putsu.

## 22

### *Jahuaneti tsine jepuiti quisa*

<sup>1</sup> Neicha Jesús ja cristiano cuana buetsuapirutana bahue quisa cuana neje. Uja atana huecuana:

<sup>2</sup> —Uja da Diosu ecuatsasiati: Piada echua puji ja jahuaneti tsine atana mesa ebacua sa puji. <sup>3</sup> Emebajaji cuana beitutana ihuajiji cuana paihuatita huecuana puji. Beju ihuajiji cuana aimue putija putana mahue. <sup>4</sup> Da su neicha echua puji ja pia emebajaji cuana beitutana. Uja cuatsasiatana huecuana: “Mequisatique ihuajiji cuana papueta huecuana beju, pamapa quema jana cuana basetajiji putsu. Quema huaca, pia animalo tseida cuana beju manuameitia. Mequisatique papueta huecuana, pamapa basetajiji putsu.” Da su beju putitana emebajaji cuana. <sup>5</sup> Daja quisatana huecuana biame, beju ihuajiji cuana ja jei aja mahue atana. Piada piada cuana mecuana sa te su putitana. Pia cuana eiruiru puji putitana. <sup>6</sup> Pia cuana ja emebajaji cuana ina putsu, nedaneda atana huecuana emanuame teje. <sup>7</sup> Da su beju echua puji ebia su duininiana tuna neje. Mesa soldado cuana beitutana ihuajiji deja manuameji madhada cuana pamanuametita huecuana puji, tuna sa ejude di pad'ed'ata huecuana puji. <sup>8</sup> Daja a putsu, neicha echua puji ja mesa emebajaji cuana ihuatana. Uja cuatsasiatana huecuana: “Pamapa beju basetajiji. Be neicha ihuaji tueda equene ihuajiji madhada cuana. <sup>9</sup> Meputique ejude duje. Pamapa micuaneda eteje cuana meihuaque quema jahuaneti tsine su papueta huecuana puji.” <sup>10</sup> Da su emebajaji cuana putitana ejude duje. Pamapa tejetana cuana dusetana huecuana jahuaneti tsine su. Jucuada saida, saida mahue cuana dusetana huecuana. Da putsu, echua puji sa ete sejeana cristiano cuana neje. <sup>11</sup> Da su echua puji nubiana ihuajiji cuana eba puji. Beju ihuajiji cuana duju su piada deja jahuaneti tsine su eputi puji jud'uderaji mahue puina batana. <sup>12</sup> Da su echua puji ja deja uja atana: “Eshanapa, ¿jucuaja su mida daja jud'ujime nubitia?” Beju aimue deja ja jeitsu atana. <sup>13</sup> Da su echua puji ja emebajaji cuana cuatsasiatana uja: “Mehuatsirisique. Eme detse di merisique. Beju mejusiacuinaque etseque, apuda su. Dapia da ebia su epa,

etsedhaiti beju, ebia su sufri epu putsu.” <sup>14</sup> Dueji ihuajji cuana eputani biame, beju ucua chidi hue dharejiji cuana eputani.

*Jesús ja impuesto jepuiti quisatana huecuana*  
(Marcos 12.13-17; Lucas 20.20-26)

<sup>15</sup> Beju Jesús daja quisape putsu, fariseo cuana putitaibana. Japibapirutitana huecuana cuaja quisababapebape putsu, Jesús mimi madhada emimiampe puji, tu etuaquisa puji.

<sup>16</sup> Da su beju fariseo cuana ja piada piada mecua sa, Herodes sa ebuqueji cuana beitutana Jesús peje su tu mimi madhada pamimiameta huecuana puji, quisababapebape putsu. Beju Jesús tuaquisaja adhaatana huecuana. Jesús peje su cuinati putsu, uja quisabatana huecuana:

—Ebuetsuaji, bahue ecuanaju mida butsepi quisa epuani. Miada Diosu sa ene quita quisa cuana ebuetsuainia. Pamapa cristiano cuana miada tupupai ebainia. Aida puji, puri cuana beju miada tupupai ebainia. <sup>17</sup> Da putsu, quisaque ecuanaju, ¿ahua saida ecuaneda impuesto cuana romano echua puji aida echujetia puji ahua mahue?

<sup>18</sup> Beju Jesús shanapatiana tuna madhada piba neje daja quisabatana. Ahua Jesús, “Saida echujetia puji”, epu su, da su judío cuana tu neje eduininita. Ahua, “Saida mahue echujetia puji”, epu su, da su romano soldado cuana ja einata. Da putsu, Jesús ja uja jeutsutana huecuana:

—Beju micuaneda da bubeta cuana. ¿Jucua su micuaneda ema mimi neje pitsameja yainia? <sup>19</sup> Piada chipilu metiaque ema.

Da su beju piada chipilu tiatana huecuana. <sup>20</sup> Chipilu ina putsu, Jesús ja quisabatana huecuana uja:

—¿Aidhe sa ebu eimea, ebani da ye chipilu bia su derejiji yani?

<sup>21</sup> Da su jeutsutana huecuana:

—Tueda ebu eimea, ebani da romano echua puji aida sa beju.

Da su Jesús ja atana huecuana uja:

—Da su beju metiaque echua puji aida sa epuani ai cuana. Diosu di metiaque tuseda epuani ai cuana.

<sup>22</sup> Jesús sa jajeutsuti id'aba putsu, nimetiunetitana huecuana. Beju putitaibana huecuana, basea putsu, cuaja Jesús pitsame taji mahue batana huecuana putsu.

*Saduceo cuana ja Jesús quisabatana manujiji cuana jepuiti*  
(Marcos 12.18-27; Lucas 20.27-40)

<sup>23</sup> Tueda tsine su huecha hue piada piada saduceo cuana Jesús peje su putitana. Tueda saduceo cuana da, manujiji cuana neicha eid'etayu aimue jei putana mahue. Da su uja Jesús atana huecuana:

24 —Ebuetsuaji, Moisés chenu ja buetsuataidha uja: “Ahua quebata deja bacua mahue emanu su, manujiji sa edue ahue manujiji neje jahuaneti taji, ebacua cuana edue manujiji sa bataji epu puji.” 25 Beju siete edue cuana anitaina. Edue equene puji jahuanetiana. Beju bacua mahue manuana. Da su tu tije puji edue da manujiji sa ahue manujiji neje jahuanetiana. Tueda macha beju manuana bacua mahue. 26 Tu tije puji edue macha daja huecha puana. Beju pamapa tije puji edue cuana daja cama putana ahue manujiji neje. Beju manutana huecuana pamapa. 27 Da su beju epuna macha manuana. 28 Da su ahua ene mi epuani nime enetianatayu huecuana su, ¿quebata edue sa jia da tueda epuna ehuanepu? epuna?

29 Da su Jesús ja uja jeutsutana huecuana:

—Beju ebia su epitsatiani micuaneda ye ai cuana jepuiti, Diusu sa mimi derejiji yani mue shanapa putsu, Diusu ja pamapa ai atadhada cuana ata cua, jei epuani mahue putsu. 30 Diusu ja manujiji cuana enetianametayu su, aimue neicha ebutsenetita huecuana mahue, cielo su Diusu sa ángel cuana nime eputa huecuana putsu. 31 Beju yama micuana butsepi equisainia manujiji cuana jepuiti. Ene putsu, neicha eid'etayu huecuana, micuaneda jei epuani mahue biame. ¿Aimue jia maida micuaneda Diusu sa quirica su mimiaméana mahue? 32 Uja Diusu ja Moisés chenu ataidha mesa quirica su derejiji yani: “Ema da Abraham, Isaac, Jacob cuana sa Diusu.” Beju manutaidha huecuana biame, Diusu neje eid'e yanita huecuana, Diusu da eid'e cuana sa bahui Diusu putsu. Da putsu, micuaneda epitsatiani.

33 Beju cristiano cuana ja Jesús sa jajeutsuti id'aba putsu, nimetiunetitana huecuana, mesa jabuetsuati jepuiti.

### *Jacuatsasiati ebia su aida*

*(Marcos 12.28-34)*

34 Beju fariseo cuana ja shanapatana Jesús ja saduceo cuana mitanametana. Da su beju jadhitatitana huecuana jacuatsasiati ebuetsuaji cuana neje. 35 Piada jacuatsasiati ebuetsuaji ja quisaba putsu, Jesús abaja atana. Uja Jesús quisabatana huecuana:

36 —Ebuetsuaji, ¿quebata Diusu sa jacuatsasiati da pia cuana ebia su aida?

37 Da su Jesús ja jeutsutana uja:

—Beju uja da Diusu sa jacuatsasiati ebia su aida: “Ibuneda baque Diusu pamapa mique muesumu neje.” 38 Tueda da pamapa Diusu sa pia jacuatsasiati cuana ebia su aida. 39 Beju pia tije jacuatsasiati di daja huecha aida. Uja da epuani: “Cuaja mida quitaita ibuneda ebatiani nime, daja mique

pia cuana ibuneda ba taji.”<sup>40</sup> Tueda jacuatsasiati detse da pamapa Moisés chenu sa jacuatsasiati, profeta chenu cuana sa jabuetsuati cuana ebia su aida quita. Quebata ja ye beta jacuatsasiati detse yata su, tuahueda pamapa Moisés chenu sa jacuatsasiati, profeta chenu cuana sa jabuetsuati cuana yatani.

*¿Aidhe da Cristo sa tata?*

*(Marcos 12.35-37; Lucas 20.41-44)*

<sup>41-42</sup> Fariseo cuana dhitajiji yani cama, Jesús ja quisabatana huecuana uja:

—¿Cuaja micuaneda epibatiani Diusu sa Jabeituti Deja jepuiti? ¿Aidhe da tusa tata?

Da su fariseo cuana ja Jesús jeutsutana:

—Beju tueda da echua puji David chenu sa ebacua.

<sup>43</sup> Da su Jesús ja quisabatana huecuana uja:

—Ahua ene quita tueda da David chenu sa familia jenetia bataji puana su, ¿cuaja ni da, da su David chenu ja tueda, “Quema Echua Puji”, ataidha? Beju uja Espíritu Santo ja David chenu daja mimiametaidha:

<sup>44</sup> Tata Diusu ja quema Echua Puji uja ataidha:

“Aniuteque quema bai eni bene yama pamapa mique majai cuana pishitiame putsu, mique ema su eicha teje.”

<sup>45</sup> Ahua ene quita Diusu sa Jabeituti Deja da David chenu sa familia jenetia bataji puana su, ¿cuaja ni da da su David chenu ja quitaita tueda, “Quema Echua Puji”, ataidha?

<sup>46</sup> Da su beju aimue quebata ja biame cuaja jeutsu taji mahue batana. Mitanatana huecuana. Da tsine jenetia aiya biame Jesús ai quisabayuja atana mahue.

## 23

*Jesús ja fariseo jacuatsasiati ebuetsuaji cuana tuaquisatana*  
*(Marcos 12.38-40; Lucas 11.37-54; 20.45-47)*

<sup>1</sup> Da su beju Jesús ja cristiano mesa discípulo cuana uja atana:

<sup>2</sup> —Moisés chenu sa jacuatsasiati ebuetsuaji, fariseo cuana tueda jacuatsasiati cuana tuneda bahui cristiano cuana buetsua bahue pepe hue eputani. <sup>3</sup> Da su Moisés chenu sa jacuatsasiati cuana micuana ebuetsuatani huecuana su, jei a taji. Jabuetsuati cuana jei yainia biame, aimue micuaneseda tuna yatani nime a taji mahue, bubeta huecuana putsu. “Ye paatija”, eputani huecuana biame, pia ai hue yatani huecuana. <sup>4</sup> Cuaja tuchea taji mahue cristiano cuana ebatani biame, jacuatsasiati jubida etiatani huecuana, tuneda quitaita tueda jacuatsasiati a bue mahue biame. <sup>5</sup> Pamapa yatani

huecuana cristiano cuana ja aida pabata huecuana puji. Diusu sa mimi derejiji quirica ped'u cuana su ejud'uji nabai su, emata su dusu bahueta huecuana. Mecuana sa ejud'uji tihue cuana su pia cristiano cuana sa ebia su pahaida blonda cuana jaichati bahueta huecuana. <sup>6</sup> Tuneseda tsada aniude saida eni bahui tsine cuana su misha naja su yaniute puji. Jadhitati jude ete su di daja huecha aniude saida eni bahui tuneseda tsada. <sup>7</sup> Tuneseda tsada cristiano cuana ja, ejude duje tsu putsu, iyuda neje pamitsuta huecuana. Tsada saida tuneseda cristiano cuana ja, "Ebuetsuaji", paata.

<sup>8</sup> 'Beju aimue micuaneda mu daja fariseo cuana nime ya mahue. Be tsada mebaji cristiano cuana ja micuana, "Ebuetsuaji", yata puji, micuaneda da pamapa tupupai edue cama putsu. Beju micuaneseda piada Ebuetsuaji bahui yani. Tueda da Cristo. <sup>9</sup> Be aidhe biame, "Tata", meaji ye mundo su, micuaneseda piada Tata bahui cielo su yani putsu. <sup>10</sup> Be tsada mebaji cristiano cuana ja micuana, "Echua puji", tata puji, Cristo bahui micuana sa Echua Puji putsu. <sup>11</sup> Quebata ja micuana duju su pia cuana emebajata su, tueda da pia cuana ebia su aida epu. <sup>12</sup> Quebata da tueda quita ebia su aida puja ebati su, Diusu ja tueda mue ai eni mahue nime yatayu. Quebata da ai emi mahue ebati su, tueda Diusu ja ebia su aida yatayu.

<sup>13</sup> '¡Aba, jacuatsasiati ebuetsuaji, fariseo cuana, micuaneda da bubeta cuana putsu! Cristiano cuana micuaneda aimue Diusu ecuatsasiati su panubi yainia mahue, micuaneda quitaita aimue enubi mahue biame. Cristiano cuana nubija eputani biame, micuaneseda tsada mahue panubita huecuana puji.

<sup>14</sup> '¡Aba, jacuatsasiati ebuetsuaji, fariseo cuana, micuaneda da bubeta cuana putsu! Micuaneda ahue manujiji cuana sa ete cuana mejemi bahue. Tsabauda risha cuana micuaneda a bahue tuna butse su micuana iyuda neje pabata huecuana puji. Da putsu, Diusu ja micuana pia cuana ebia su ematsetayu cuati castigo su.

<sup>15</sup> '¡Aba, jacuatsasiati ebuetsuaji, fariseo cuana, micuaneda da bubeta cuana putsu! Micuaneda pamapa ejude je puti bahue cristiano cuana ebuetsua puji, micuana sa puiti cuana tije paata huecuana puji. Da su tuneda micuana ebia su quitaita madhada hue eputa.

<sup>16</sup> '¡Aba, micuaneda, ehuidusuji padha cuana nime putsu! Uja micuaneda cristiano cuana ebuetsuainia: "Ahua quebata mu templo jepuiti Diusu bahue epu su, aimue tuseda mesa jamitsuti a taji mahue. Ahua quebata mu templo sa oro jepuiti Diusu bahue epu su, da su beju tuseda mesa jamitsuti

a taji.” <sup>17</sup> Micuaneda da padha bue mahue cuana nime. ¿Ai oro templo ebia su iyuda bata? Templo ja beju oro iyuda yatani. <sup>18</sup> Daja huecha micuaneda uja ebuetsuainia cristiano cuana: “Ahua quebata altar jepuiti Diusu bahue epu su, aimue tuseda mesa jamitsuti a taji mahue. Ahua quebata mu altar bia su eirutsuaji jepuiti Diusu bahue epu su, da su beju tuseda mesa jamitsuti a taji.” <sup>19</sup> Beju micuaneda da padha, bue mahue cuana nime. ¿Ai eirutsuaji altar bia su iyuda bata? Altar ja beju eirutsuaji iyuda yatani. <sup>20</sup> Ene putsu, yama micuana equisainia, ahua quebata altar jepuiti Diusu bahue epu su, tueda da altar bia su eirutsuaji jepuiti di Diusu bahue epuani pu cua nime. <sup>21</sup> Daja huecha quebata templo jepuiti Diusu bahue epu su, tueda da Diusu jepuiti di Diusu bahue epuani pu cua nime, Diusu templo dume su yani putsu. <sup>22</sup> Daja huecha quebata cielo jepuiti Diusu bahue epu su, tueda da Diusu ani jude jepuiti di Diusu bahue epuani pu cua nime, Diusu dapia yani putsu.

<sup>23</sup> ¡Aba, jacuatsasiati ebuetsuaji, fariseo cuana, micuaneda bubeta putsu! Pamapa micuana sa enubiani ai cuana sa piada décimo chidi hue eichaderainia Diusu sa puji biame, butsepi puniuneti ai cuana esetainia. Ibuneda mahue micuaneda. Aimue micuaneda pia ebia su saida jabuetsuati cuana ebuetsuainia mahue. Aimue cristiano cuana Diusu butse su butsepi paputa puji ebuetsuainia mahue. Aimue ebuetsuainia huecuana mahue huamahuama paibunebatita huecuana puji. Aimue ebuetsuainia huecuana mahue Diusu peje su panimetuheatita huecuana puji. Tueda jabuetsuati saida cuana di micuaneseda buetsua taji yainia. Beju aimue micuaneda mu daja yainia mahue. <sup>24</sup> ¡Micuaneda da ehuidusuji padha cuana nime! Diusu sa jacuatsasiati ebia su saida cuaja a taji mahue ebainia. Beju ai eni mahue jacuatsasiati, ai puiti cuana mu micuaneda atasaida ebainia.

<sup>25</sup> ¡Aba, jacuatsasiati ebuetsuaji, fariseo cuana! Micuaneda da emeji dume adhida nime, ebia je bahui saida, rucuajiji. Micuaneda di ebia je bahui saida nime. Muesumu su mu ai piapiati madhada micuana sa yani. <sup>26</sup> Fariseo padha nime, equene micuana sa muesumu jabasetati taji. Da su beju ebia je macha saida epu. <sup>27</sup> ¡Aba, jacuatsasiati ebuetsuaji, fariseo cuana! Beju micuaneda da sepulcro nime. Ebia je bahui saida, ania chidi pasane batame. Beju edume su mu manujiji cuana sa etsau neje sejeajiji. Pamapa ai adhida cuana neje sejeajiji. <sup>28</sup> Daja nime da micuaneda. Cristiano cuana butse su micuaneda saida nime ebametiani. Beju micuana sa muesumu su mu pamapa ai madhada cuana ape taji mahue yani.



29-30 ‘¡Aba, jacuatsasiati ebuetsuaji, fariseo cuana! Micuaneda Diusu sa profeta chenu cuana sa sepulcro cuana saida baseta bahue. Uja micuaneda pu bahue: “Ahua ecuanaju tata edhi chenu cuana sa tiempo su anidha su, beju aimue ecuanaju Diusu sa profeta chenu cuana manuame cua aidha mahue.”<sup>31</sup> Beju yama micuana butsepi equisainia, micuana sa tata edhi chenu cuana ja Diusu sa profeta chenu cuana manuametaidha. Micuaneda di tuna manuameji cuana nime.<sup>32</sup> Da su meapeque micuana sa tata edhi chenu cuana ja apirutaidha ai madhada cuana.

<sup>33</sup> ‘¡Micuaneda da bacua d'aida nime! Aimue Diusu sa jamatseti su d'ejí su epu mahue.<sup>34</sup> Da su yama micuana peje su ebeitu profeta, deja bahue eni ebuetsuaji cuana. Piada piada tuneda micuaneda, curusu su tata putsu, emanuame. Pia cuana micuaneda eiche jadhitati jude ete cuana su. Ejude meamea micuaneda tijetije ya huecuana.<sup>35</sup> Micuana peje su cama Diusu sa enime epu, profeta cuana manuametaidha huecuana jepuiti. Manuamejiji putaidha profeta cuana da Abel chenu jenetia Equene Abel chenu jenetia Berequías chenu sa ebacua Zacarías chenu teje micuaneda peje su cama Diusu sa enime epu.<sup>36</sup> Ene putsu, yama micuana equisainia, jahue tiempo cristiano cuana da juchaji eputa pamapa bihua tiempo manuametaidha cuana jepuiti.

*Jesús pana Jerusalén ejude sa puji*

*(Lucas 13.34-35)*

<sup>37</sup> ‘¡Uja Jesús puana Jerusalén ejude su aniji cristiano cuana jepuiti:

—Jerusalén ejude su aniji cristiano cuana, micuaneda Diusu sa profeta cuana manuame bahue! ¡Tumu neje maraca bahue micuana peje su Diusu ja ebeitutani cuana! ¡Quejucua nuati biame yame micuana dhitaja adhaana, huaripa ja yanana cuana edhitatani enabai ema su nime! ¡Beju micuaneseda tsada mahue puana!<sup>38-39</sup> Da su ema meid'abaenique. Yama micuana eichajusia. Beju aimue micuana ema eba mahue, ema esiapati teje. Ema esiapati su, da su ema jepuiti micuaneda uja epu: “Diusu ja tueda paibunebata, Diusu sa ebani su epusiu putsu.”

## 24

*Templo edajajape*

*(Marcos 13.1-2; Lucas 21.5-6)*

<sup>1</sup> Pia tsine Jesús templo jenetia cuinanana su, tu epuhu cama, discípulo cuana ja nariatana. Templo da ania, saida jepuiti quisapirutana huecuana.<sup>2</sup> Da su Jesús ja atana huecuana uja:

—Mechamaque ye templo. Butsepi yama micuana equisainia, tumu aida cuana jenetia ajiji biame, edajajape. Aimue piada tumu biame pia tumu bia su yaniti mahue.

*Jamatseti tsine cuinaji mahue su, nimetiuda aida ai cuana epu*

*(Marcos 13.3-23; Lucas 21.7-24; 17.22-24)*

<sup>3</sup> Da su Jesús, discípulo cuana neje Olivo murucu su tsuatiana. Dapia Jesús aniuteana su, discípulo cuana ja nariatana tu equisaba puji uja:

—Quisaque ecuanaju, ¿quetsunu da templo edajajape? ¿Ai nimetiuda ni da ecuanaju eba, mi jasiapatiji mahue su? ¿Ai nimetiuda ni da ecuanaju eba, jamatseti tsine cuinaji mahue su?

<sup>4</sup> Da su Jesús ja atana huecuana:

—Merejatique. Be mebaseametiji. <sup>5</sup> Beju ema jasiapatiji mahue su, ebia su quema ebani neje epueta. “Ema da Cristo”, eputa huecuana. Beju bid'umimi puji eputa huecuana. Jucuada cristiano cuana ebaseata huecuana. <sup>6</sup> Ema jasiapatiji mahue su, ebia su emajaitita ye mundo su, micuaneda eid'aba. Be merubutanaji. Daja da epu, mundo pupeji mahue su. <sup>7</sup> Beju piada ejude su aniji cuana eichetita pia ejude su aniji cuana neje. Mid'e, chiqui epu. Yahua eruburubu pamapa yahua je. Beju daja da equene epu, mundo pupeji mahue su. <sup>8</sup> Tueda ai nimetiuda cuana da epupiruji. Ebia su sufri eputa tsuhu ye mundo su aniji cristiano cuana, mundo pupeji mahue su.

<sup>9</sup> Beju micuana emenajatiata huecuana huaraji cuana peje su nedaneda ya puji, emanuame puji. Micuana eduininibata huecuana, micuaneda da quema dharejiji cuana putsu. <sup>10</sup> Beju da tiempo su dueji Diusu tije aji cuana ja tije yarijita. Mecuana sa Diusu peje su janimetucheati cuana etaitanametita huecuana. Tuneda cama duininida ebatita. Beju emenajatiatita huecuana. <sup>11</sup> Da tiempo su ema cuinaji mahue su, dueji bid'umimi puji cuana batiji epu. Uja eputa huecuana: “Ecuana Diusu sa puji butsepi emimiani.” Beju aimue tuneda mu Diusu peje jenetia mahue. Dueji cristiano cuana ebaseata huecuana. <sup>12</sup> Da tiempo su ebia su jucha epu putsu, cristiano cuana huamahuama tsada mahue ebatita. <sup>13</sup> Beju quebata da Diusu peje su emanu teje daja hue ebia su enimetuheaderati su, tueda da d'ejiji su epueni. <sup>14</sup> Pamapa yahua je Diusu sa quisa saida cuana quisapejiji epu su, da hora su beju mundo epupe. Da su ema esiapatiyu.

<sup>15</sup> Diusu sa profeta Daniel chenu ja deretaidha tueda Diusu sa ai saida cuana madhaji deja jepuiti. Beju meshanapaque ye quema quisa cuana. Tueda deja madhadada templo

su ebia su iyuda ani jude su Diosu pu cua nime enetiti. Micuaneda ye ai cuana eba su, da su micuaneseda jududu tiempo beju cuinaitia. <sup>16</sup> Judea yahua su aniji cuana emata cuana su pajududuta. <sup>17</sup> Da hora su quebata da mesa ete epa pachata bia su yani su, bute putsu, tipeida pajududu. Be ete su panubi mesa ai cuana ejemicuinati puji. Butsepi hue pajududu. <sup>18</sup> Beju da hora su quebata da te su yani su, be pasiapati mesa ete su mesa ejud'uji ejemicuinati puji. <sup>19</sup> ¡Aba quitaita epuna dheiji, edhereji cuana! Putadhada tuneseda ejududu puji. <sup>20</sup> Diosu mebajaque, be huinahuina badi cuana su ejududu hora papu. Daja huecha be janahua tsine su, ejududu hora papu. <sup>21</sup> Da tiempo su cristiano cuana ebia su sufri eputa. Quetsunu su biame daja sufri pu bue mahue ta biame, beju da tsunu su sufri eputa huecuana. <sup>22</sup> Ahua Diosu ja tueda sufrimiento tiempo aimue ubu hora hue yata mahue su, aimue aidhe biame d'ejí su epu mahue. Beju Diosu ja tueda sufrimiento tiempo ubu hora hue yatayu mesa dharejiji cuana d'ejí su paputa puji, tuahueda ibuneda ebatani huecuana putsu.

<sup>23</sup> 'Ahua quebata ja micuana, "U hue da Cristo", yata su, be jei mepuji, jucuada deja cuana Cristo nime ebametita putsu. <sup>24</sup> Diosu sa quisa puji cuana nime ebametita huecuana biame, tuneda da jabaseatiji cuana. Pamapa ai nimetiuda aida cuana yatayu huecuana. Diosu sa dharejiji cristiano cuana baseaja yadhaatayu huecuana. <sup>25</sup> Beju yama jiahue micuana butsepi equisainia, tueda ai cuana cuinaji mahue su. <sup>26</sup> Da putsu, ahua quebata ja micuana, "Dapia d'anita yahua su Cristo yani", yatani su, be jei mepuji. <sup>27</sup> Beju ema neicha esiapati su, pamapa cristiano cuana ja ema epusiu ebata. Tserutseru sa hueda nime da quema jasiapati epu ye mundo su cristiano cuana ja ebata. <sup>28</sup> Ai ihui esa su, samani cuana tipeida edhitatitani nime, daja huecha ema tipeida esiapati ye mundo su aniji cristiano cuana ecastiga puji, beju ebia su madhada hue eputa huecuana su.

*Cristo ye mundo su epueicha jepuiti quisa*

*(Marcos 13.24-37; Lucas 21.25-33; 17.26-30, 34-36)*

<sup>29</sup> 'Tueda sufrimiento tiempo beju ejaitianani cama, id'eti, badi da yapuna. Atujai cuana edajajata. Cielo quitana eruburubu. <sup>30</sup> Da su pamapa cristiano cuana ja ema cielo jenetia epusiu ebata. Judu duje quema hueda, tucheda neje ema epusiu ebata huecuana. Beju ema epue su, pamapa ye mundo su cristiano cuana da ebia su epata, iyuame pu putsu. <sup>31</sup> Pututu jubida eturuta su, yama quema ángel cuana ebeitu ye mundo su pamapa quema dharejiji cuana padhitata huecuana puji.

<sup>32</sup> —Mepibatique equi cuana. Beju eina eichacua chidi eturucatiñani su, da su jad'iati badi cuana enariatiani micuaneda eshanapainia. <sup>33</sup> Daja huecha tueda nimetiuda iyuda ai cuana ba putsu, ema epusiu tiempo huedhue beju. <sup>34</sup> Ene putsu, yama micuana equisainia, pamapa tueda ai nimetiuda ebapirutani cuana aimue emanuta mahue tsuhu ema epueicha teje. <sup>35</sup> Beju cielo, mundo epupe biame, quema mimi mu aimue epupe mahue.

<sup>36</sup> 'Aidhe biame bue mahue ai tsine su ema esiapati ye mundo su. Angel cuana biame bue mahue. Ema biame bue mahue. Tata Diosu quitaita bahui mahue ai hora su ema esiapati.

<sup>37</sup> Beju Noé chenu sa tiempo su puidha nime, daja da epu, ema esiapati su. <sup>38</sup> Da tiempo su Diosu ja cristiano cuana nai, ena neje manamepeji mahue su, diadiataina, jaid'ititaina, jabutsenetitaina huecuana Noé chenu arca su nubidha teje. <sup>39</sup> Aimue jei putaidha mahue huecuana Diosu sa jamatseti jubida epusiu. Tueda nai, ena jamatseti pupiruidha su chu, Diosu peje su japibatitaidha huecuana. Ena ja beju manamepetaidha huecuana pamapa. Daja huecha cristiano cuana jei puja mahue eputa, ema jasiapatiji mahue su. <sup>40</sup> Ema esiapati tiempo su beta deja detse te su emudumudusa epu. Beju piada Diosu ja edusuta. Pia mu enetiti. <sup>41</sup> Da tiempo su beta epuna detse edudududusa epu. Beju piada Diosu ja edusuta. Pia mu yaniti.

<sup>42</sup> 'Da putsu, menimepitique, micuaneda ema esiapati hora bue mahue putsu. <sup>43</sup> Beju jahue yama micuana bahue quisa neje equisa. Ete emetse ai hora su tsi puji mesa ete su enubiani bahue pu putsu, aimue detse tahui cua mahue. Aimue tsi puji ete su panubi yata mahue tsi papu puji. Ete epibatiani mahue hora quitaita su beju tsi puji ete su enubiani. <sup>44</sup> Daja micuaneseda ete emetse nime janimepitijiji ani taji, micuaneda epibatiani mahue hora quitaita su beju ema ye mundo su esiapati putsu. Mepibaenitique ye quema mimi cuana su.

*Emebajaji saida, saida mahue jepuiti quisa*  
(Lucas 12.41-48)

<sup>45</sup> 'Ete emetse ecuinanani su, pamapa mesa emebajaji cuana piada emebajaji emenajatiajusianatani saida pabata huecuana puji. <sup>46</sup> Ahua tueda emebajaji ja pamapa saida ebata su, ete emetse ja tueda saida echujetiata, jasiapati putsu. <sup>47</sup> Tueda emebajaji saida ebia su aida ai cuana emenajatiajusianata. <sup>48</sup> Ahua tueda emebajaji ja saida pamapa ai cuana ebata mahue su, ete emetse ja tueda ecastigata, jasiapati putsu. Tueda emebajaji uja madhada hue japibati cua:

“Quema echua puji mu aimue beju tipeida esiapati mahue.”  
<sup>49</sup> Ahua tuahueda pia emebajaji cuana icheta cua su, da su ete emetse ja tueda jubida castigata cua, jasiapati putsu. <sup>50</sup> Tueda echua puji ete emetse da esiapati emebajaji madhada ja tu eid'uatani mahue hora su. <sup>51</sup> Da su emebajaji madhada ete emetse ja ejusiacuinata. Castigo jude su ebeituta. Dapia ebia su epata, etsedhaitita ebia su sufri epata huecuana putsu.

## 25

### *Piada tunca epuneje cuana jepuiti quisa*

<sup>1</sup> ‘Diusu ecuatsasiati da beju uja: Piada tunca epuneje anitaina. Lámpara metse cama, jahuaneti tsine su putitana huecuana ehuaneti eid'ua puji, ehuaneti cuinaja su, tsu putsu, tsine ete su ebuque puji. <sup>2</sup> Beju pishica jabasetatiji mahue putaina. Pia pishica mu beju jabasetatijiji putaina. <sup>3</sup> Tueda pishica jabasetatiji mahue cuana ja aimue aceite dusutana mahue lámpara cuana esejea puji. <sup>4</sup> Tueda pia pishica jabasetatijiji cuana ja aceite tupu dusutana emeji chidi su, mecuana sa lámpara cuana neje tupupai. <sup>5</sup> Beju ehuaneti mue cuinapuda puana putsu, tahuitana huecuana. <sup>6</sup> Da su dhidha dusete su tsiatsia id'abatana huecuana uja epuani: “¡Ehuaneti beju epusiu! ¡Mecuinanaque tu etsu puji!” <sup>7</sup> Da su pamapa epuneje cuana netianatana lámpara cuana ehuitsuti puji. <sup>8</sup> Beju tueda pishica jabasetatiji mahue epuneje cuana ja pia pishica epuneje cuana uja bajatana: “Metiaque ecuanaju huai chidi micuana sa aceite, ecuanaju sa ehueitiani putsu.” <sup>9</sup> Da su pishica jabasetatijiji epuneje cuana ja uja jeutsutana huecuana: “Mahue. Ahua ecuanaju micuana etia su, ecuanaju sa macha da ehueiti. Da su aimue tupu epu mahue ecuaneseda puji. Mebajatitique aceite iruji cuana peje su.” <sup>10</sup> Da su beju tipeida putitana huecuana ebajatiti puji. Tuneda putitana cama beju ehuaneti cuinana. Da su pishica jabasetatijiji epuneje cuana da ehuaneti neje ete su nubitana jahuaneti tsine eba puji. Nubi putsu, ete teritana huecuana. <sup>11</sup> Da su beju tueda pia pishica aceite bajaji epuneje cuana cuinataibana su, ete terijiji batana huecuana. Ete terijiji ba putsu, uja tsiatsiatana huecuana: “¡Echua puji, tsequed'iaque ecuanaju!” <sup>12</sup> Da su beju echua puji ja jeutsutana huecuana uja: “Ene putsu, mue yama micuana shanapa.”

<sup>13</sup> Jesús ja daja quisape putsu, uja atana huecuana:

—Da su beju janimepitijiji meanique, aimue micuaneda eshanapainia mahue ai hora jia ema ye mundo su esiapati putsu.

*Chipilu cuana sa jepuiti quisa*

14 ‘Diusu ecuatsasiati da beju uja: Piada deja pia yahua su putiana. Beju putiji mahue su, deja ja mesa emebajaji cuana tu peje su ihuatana. Pamapa mesa chipilu cuana menajatiatana huecuana chipilu cuana payapacameta huecuana puji.

15 ‘Equene emebajaji pishica mil chipilu tiatana. Beta puji emebajaji beta mil chipilu tiatana. Quimisha puji emebajaji piada mil chipilu tiatana. Tuna sa tucheda tupu chipilu tiatana. Daja tiape putsu, emetse putiana. 16 Da su pishica mil chipilu tiatana emebajaji ja, inatsu putsu, pia pishica mil yapacametana. 17 Beta mil chipilu tiatana emebajaji ja, daja huecha inatsu putsu, pia beta mil yapacametana. 18 Piada mil chipilu tiatana emebajaji ja, inatsu putsu, rubuaichatana rara su.

19 ‘Beju pia mara su emetse cuinaibana su, mesa emebajaji cuana tu peje su ihuatana quejucua chidi chipilu yapacametana huecuana eshanapa puji. 20 Da su equene pishica mil tiatana emebajaji cuinana tu peje su. Piada tunca mil chipilu cuana emetse menajatiatana. Uja tuahueda emetse atana: “Echua puji miada ema pishica mil chipilu tiana. U hue piada tunca mil chipilu cuana yama mi etiainiayu. Beju pia pishica mil chipilu cuana yama yapacameana.”

21 Da su emetse ja tueda atana: “¡Saipie! Mida da emebajaji saida. Miada saida ana quejucua chidi chipilu neje putsu, yama mi huaraji aida yayu. Beju ema neje anitique. Beidaji puque ema neje.” 22 Da su beju beta mil tiatana emebajaji macha cuinana emetse peje su. Pushi mil chipilu cuana emetse menajatiatana. Uja tuahueda emetse atana: “Echua puji, miada ema beta mil chipilu cuana tiana. U hue pushi mil chipilu cuana yama etiainiayu.”

23 Da su emetse ja tueda atana: “¡Saipie! Mida da emebajaji saida. Miada saida ana quejucua chidi chipilu neje putsu, yama mi huaraji aida yayu. Beju ema neje anitique. Beidaji puque ema neje.” 24 Da su beju tije piada mil tiatana emebajaji macha cuinana emetse peje su. Piada mil chipilu cuana bahui emetse menajatiatana. Uja tuahueda emetse atana: “Echua puji, yama eshanapainia mida da deja iyuda. Miada da pia sa mudu neje mique chipilu eyapacameinia yama eshanapainia putsu, ema iyuame puana.

25 Da putsu, yama mique piada mil chipilu cuana rara su rubuaichana. Beju u hue mique piada mil chipilu.” 26 Da su emetse ja emebajaji uja jeutsutana: “Mida da emebajaji tunada, ate. 27 Mida bahue puana ema deja iyuda putsu, tueda chipilu banco su dhucuana ichati taji ana dapia payapacati puji ema esiapati teje.”

28 Da su emetse ja dapia eneti cuana cuatsasiatana uja: “Memejemique tusa piada mil chipilu. Metiaque tueda chipilu yama pishica mil tiana emebajaji. 29 Quebata sa yani, tueda yama etia ebia su quita. Quebata

sa yani mahue, tueda yama emejemi quejucua mesa ai chidi yani cuana. <sup>30</sup> Ye emebajaji mue ai puji saida medusuque. Etseque, apuda su mejusiaque. Dapia ebia su epa, etsedhaiti ebia su sufri epu putsu.”

*Diusu ja pamapa yahua su aniji cuana ejuzgatayu*

<sup>31</sup> ‘Beju ema esiapati su, Echua Puji Aida epu. Quema ani jude su ema yaniute ecuatsasia epu puji. Quema ángel cuana ja ema ebareta. <sup>32</sup> Ema butse su yama pamapa cristiano cuana edhitame. Yama eichaderayu huecuana, Diusu sa dharejiji cuana chujemame madhada cristiano cuana duju jenetia. <sup>33</sup> Beju Diusu sa dharejiji cuana, huisha nime, quema bai eni bene yama eicha. Madhada cristiano cuana, cabra nime, quema d’ani bai bene eicha. <sup>34</sup> Da su beju quema bai eni bene Diusu sa dharejiji cuana yama uja ya: “Menu-bique ema ecuatsasiati su, quema Tata Diusu ja micuana ibunebatana putsu. Meinatsuque micuaneseda puji Diusu ja basetataidha ai cuana. Mundo bataji puidha jenetia tu-ahueda tueda ai saida cuana basetapirutaidha micuaneseda puji. <sup>35</sup> Beju ema dhemanuana su, micuaneda ema mihuana. Ema jaid’itija puana su, micuaneda ema id’imeana. Ema extranjero puana biame, micuaneda ema saida batsuana. <sup>36</sup> Ejud’uji quema hueitiana su, micuaneda ema tiana. Nedaji ema puana su, micuaneda ema peretiana. Terijiji ema aniana su, micuaneda ema batiana.” <sup>37</sup> Da su beju, tueda Diusu sa dharejiji cuana ja ema equisabata uja: “Echua Puji, ¿quetsunu mi ecuanaju mihuana, id’imeana? <sup>38</sup> ¿Quetsunu mi ecuanaju saida batsuana extranjero nime? ¿Quetsunu mi ecuanaju ejud’uji tiana? <sup>39</sup> ¿Quetsunu mi ecuanaju nedaji su peretiana? ¿Quetsunu ecuanaju mi terijiji yani su batiana?” <sup>40</sup> Da su yama ejeitsu huecuana uja: “Ene putsu yama micuana equisainia, ahua micuaneda quebata quema edue daja saida ana su, beju micuaneda ema a cua nime daja ana.”

<sup>41</sup> ‘Da su beju quema d’ani bai bene madhada cristiano cuana yama uja ya: “Menetideraque ema peje jenetia, micuaneda mu ate cristiano cuana putsu. Cuati castigo su meputique. Tueda cuati castigo da Diusu ja basetatana Ishahua, mesa einid’u madhada cuana sa puji. <sup>42</sup> Beju ema dhemanuana su, aimue micuaneda ema mihuaja ana mahue. Ema jaid’itija puana su, aimue micuaneda ema id’imeja ana mahue. <sup>43</sup> Ema extranjero puana biame, aimue micuaneda ema saida batsuana mahue. Ejud’uji quema hueitiana su, aimue micuaneda ema tiaja ana mahue. Nedaji ema puana su, aimue micuaneda ema peretiana mahue. Terijiji ema aniana su, aimue micuaneda ema batiana mahue.” <sup>44</sup> Da su beju tueda cristiano ate cuana ja ema equisabata uja:

“Echua Puji, ¿quetsunu jia da mi ecuanaju daja madhada hue ana?” <sup>45</sup> Da su yama ejeutsu huecuana uja: “Ene putsu, yama micuana equisainia, aimue micuaneda quebata quemana edue nimemitsida saida bana mahue putsu, micuaneda ema a cua nime daja madhada hue ana. <sup>46</sup> Da su beju tueda cristiano ate cuana cuati castigo su yama ebeitueni. Diusu sa dharejiji cuana mu cielo su, Diusu neje eid'e yanienititayu.

## 26

*Cuana Jesús iname ya jaquisatitana*

*(Marcos 14.1-2; Lucas 22.1-2; Juan 11.45-53)*

<sup>1</sup> Jesús ja mesa discípulo cuana pamapa tueda ai cuana buetsuape putsu, uja atana huecuana:

<sup>2</sup> —Micuaneda bahue beta tsine hue beju pascua tsine puji. Da tsine su ema emenajatiata, curusu su ema patatata huecuana puji.

<sup>3</sup> Beju Jesús emimiani hora quitaita su sacerdote huaraji aida, jacuatsasiati ebuetsuaji, judío cuana sa tata edhi ehuidusuji cuana beju jadhitatitana. Sacerdote banime sa ete aida su jadhitatitana huecuana. <sup>4</sup> Dapia Jesús cuaja ina putsu, manuameme ya jaquisatitana huecuana. <sup>5</sup> Uja jaquisatitana huecuana:

—Be painatija Jesús pascua tsine su. Ahua daja ecuaneda ya su, cristiano cuana detse janimetipeitita cua.

*María ja Jesús sa echua bia su puida d'uichatana*

*(Marcos 14.3-9; Juan 12.1-8)*

<sup>6</sup> Beju Jesús da Simón sa ete su Betania ejude su anina. Equene Jesús ja tueda lepraji su saisiametana. <sup>7</sup> Beju dapia ete su yani cama, piada epuna ja Jesús nariatana. Tueda epuna ja chujeneda saida puida emeji su dusutana. Jesús misha naja su yani cama, epuna ja tusa echua bia su puida d'uichatana. <sup>8</sup> Da su beju discípulo cuana duininipirutana, epuna ja daja yatani ba putsu. Uja atana huecuana:

—¿Ai puji ni da ye epuna ja daja ataitia? <sup>9</sup> Ahua ecuaneda ye chujeneda saida puida iru cua su, dueji chipilu cuana ecuaneseda ani cua puri cristiano cuana etia puji.

<sup>10</sup> Beju Jesús ja id'abatana huecuana putsu, uja atana huecuana:

—¿Ai puji ni da micuaneda daja madhada emimiani ye epuna jepuiti? Tuahueda ema saida atana beju. <sup>11</sup> Puri cristiano cuana da micuana neje pamapa hora su yanita. Ema mu aimue micuana neje daja yani mahue. Quejucua tiempo chidi hue ema micuana neje yaniti. <sup>12</sup> Ye epuna ja ema bia su d'uichataitita puida ema papaji pu cua nime. <sup>13</sup> Ene putsu, yama micuana equisainia, quepia papu Diusu sa quisa



saida cuana quisaquisa eputani su, ye eoyba ja ataitia di quisa eputa tu jiahue quita ataitia pamapa cristiano cuana ja pashanapata puji.

*Judas ja sacerdote cuana neje mimicana cuaja Jesús menajatiame ya puji*

(Marcos 14.10-11; Lucas 22.3-6)

<sup>14</sup> Da su beju Judas Iscariote da sacerdote huaraji aida cuana peje su putiana. Tueda Judas da Jesús sa discípulo puina. Tuna peje su putiana cuaja Jesús menajatiame ya equisa puji. <sup>15</sup> Beju uja atana Judas ja sacerdote aida cuana:

—¿Quejucua chipilu micuaneda ema tia cua, ahua Jesús micuana yama menajatia cua su?

Da su sacerdote cuana ja Judas quimisha tunca chipilu cuana tiatana. <sup>16</sup> Da hora jenetia beju Judas ja ai hora jia Jesús tu mehua epu id'uatana sacerdote cuana tipeida equisati puji, Jesús painata huecuana puji.

*Jesús da discípulo cuana neje pascua tsine su diadiana*

(Marcos 14.12-25; Lucas 22.7-23; Juan 13.21-30; 1 Corintios 11.23-26)

<sup>17</sup> Beju pan levadura mahue tsine epupiruani su, discípulo cuana ja Jesús quisabatana:

—¿Quepia mique tsada ecuanaju ebaseta pascua tsine su ediadia puji?

<sup>18</sup> Da su Jesús ja jeutsutana huecuana:

—Meputique ejude su. Dapia piada deja sa ete su meputique. Mequisatiquetueda uja: “Echua Puji ja mi uja equisametani: ‘Quema manu hora beju nariatiani. Mique ete su ema pascua tsine su ediadia quema discípulo cuana neje.’ ”

<sup>19</sup> Da su cuaja Jesús ja cuatsasiatana nime, atana tse. Pascua tsine jana basetatana tse.

<sup>20</sup> Beju dhidha su Jesús, mesa discípulo cuana neje tuna ediadia ete su putiana. Dapia misha naja su aniutetana huecuana. <sup>21</sup> Ediadiatani cama, Jesús ja uja atana huecuana:

—Ene putsu, yama micuana equisainia, piada ja micuaneda ema emenajatia deja madhada cuana peje su.

<sup>22</sup> Da su ebia su jatacuamadhatitana huecuana. Piada piada ja Jesús quisabatana uja:

—Echua Puji, ¿yama jia? ¿Ahua yama?

<sup>23</sup> Da su Jesús ja jeutsutana huecuana:

—Ema neje tupupai dhepe su ediadiani ja ema emenajatiata. <sup>24</sup> Beju ema sufri epu, cuaja Diosu sa quirica su derejiji yani batame. ¡Aba quitaita, ema menajatiaji epu deja! Ebia su saida quita tuseda puji bataji epu mahue puji puina.

<sup>25</sup> Da su Judas ja di Jesús quisabatana:

—Echua Puji, ¿ahua yama?

Jesús ja tueda jeutsutana:

—Ehe, miada.

<sup>26</sup> Tuneda beju ediadiatani cama, Jesús ja pan jemitsua putsu, diusulupai Diosu atana. Pan ped'uped'ua putsu, discípulo cuana herereatiatana. Uja atana huecuana:

—Mediaque. Ye pan da quema equita pu cua nime.

<sup>27</sup> Daja huecha vinoji emeji jemitsua putsu, diusulupai Diosu atana. Vinoji emeji berereatiatana huecuana. Uja atana huecuana:

—Pamapa su meid'ique ye emeji jenetia. <sup>28</sup> Ye vino da quema ami pu cua nime. Quema ami ed'uichati putsu, Diosu ja cristiano cuana mesa jamitsuti eichacua etiata. Dueji cristiano cuana eperdonatayu, quema ami ed'uichati putsu. <sup>29</sup> Yama micuana equisainia, aimue ema eid'iicha mahue, quema Tata Diosu ecuatsasiati su micuana neje eid'i teje.

*Pedro, “Mue yama Jesús shanapa”, puana*

*(Marcos 14.26-31; Lucas 22.31-34; Juan 13.36-38)*

<sup>30</sup> Da su beju diadiape putsu, Disusu sa puji satsutana huecuana. Satsupe putsu, Olivo murucu su putitana huecuana.

<sup>31</sup> Dapia cuinati putsu, Jesús ja uja atana huecuana:

—Pamapa micuaneda ema mehua ejusianetia ye dhidha su. Daja micuaneda ya, cuaja Diosu sa quirica su epuani batame. Beju uja epuani: “Yama huisha quinaji emanuame su, huisha cuana ebereberatita.” <sup>32</sup> Ema biame, beju eid'eyu. Id'eyu putsu, ema micuana equene Galilea yahua su eputi dapia micuana emitsu puji.

<sup>33</sup> Da su Pedro ja Jesús uja atana:

—Echua Puji, pia cuana ja mi ejusianetiata biame, aimue mi yama mu daja ya mahue.

<sup>34</sup> Da su Jesús ja tueda jeutsutana:

—Pedro, ene putsu, mi yama yainia, ye dhidha su quitaita da quimisha nuati mida uja emimi: “Mue yama Jesús shanapa.” Huaripa deja queji mahue su, daja mida epu quimisha nuati.

<sup>35</sup> Da su Pedro ja uja jubida atana Jesús:

—Mi neje quema manu taji biame, aimue mi yama ejusianetia mahue.

Beju pamapa pia discípulo cuana di daja putana.

*Jesús ja Diosu jubida mitsutana Getsemaní eti jude su*

*(Marcos 14.32-42; Lucas 22.39-46)*

<sup>36</sup> Da su beju Jesús da mesa discípulo cuana neje cuinatiana Getsemaní banime et jude su. Dapia cuinati putsu, Jesús ja discípulo cuana uja atana:

—Meaniuteque upia. Yama Diosu emitsuti chuadera.

<sup>37</sup> Jesús ja Pedro, Jacobo, Juan cuana bahui tu neje dusutana. Pia cuana mu dapia hue anititana. Chuadera cuinati putsu, beju Jesús ebia su jatacuamadhapirutiana.

<sup>38</sup> Da su mesa quimisha discípulo cuana uja atana:

—Ebia su ema etajiatiani. Emanu nime ema ebatiani. Meanique upia. Ema neje meid'enique. Be metahuiji.

<sup>39</sup> Da su Jesús chuadera pad'i puderatiana. Dapia beju d'epesa putsu, Diosu mitsupirutana. Uja Diosu bajatana:

—Quema Tata, miqueda puji mu pamapa ai cuana atasaida. D'eji su aque ema curusu su sufrimiento epusiu jenetia. Daja biame, mique tsada bahui papu. Ba quema tsada mu papu.

<sup>40</sup> Da su beju quimisha discípulo cuana peje su jasiapati putsu, etahuitasa huecuana batana. Uja Pedro atana:

—¿A da aimue micuaneseda tucheda anitia mahue ema neje piada hora chidi dhucuana eid'eni puji. <sup>41</sup> Beju meid'enique. Diosu memitsuniaque Ishahua ja micuana epirubata mahue puji. Ene putsu, micuaneda jucha aja mahue yainia biame, daja micuaneda yainia, nimetucheda mahue putsu.

<sup>42</sup> Beju neicha Jesús chuadera pad'i putiana Diosu emitsu puji. Uja atana Diosu:

—Tata, ahua aimue miada ema ye sufrimiento jenetia d'eji su aja mahue su, beju saipie hue. Mique tsada bahui papu. Quema mu mahue.

<sup>43</sup> Da su beju neicha quimisha discípulo cuana peje su jasiapati putsu, etahuitasa huecuana batana. Tahui mecuana sa a taji mahue putsu, beju tahuitana huecuana. <sup>44</sup> Da su Jesús ja neicha ichajusiatana huecuana Diosu emitsu puji. Quimisha nuati puji Diosu mitsutana. Cuaja equene su Diosu mitsutana. Cuaja equene su Diosu mitsutana nime, daja huecha atana quimisha nuati puji. <sup>45</sup> Beju daja mitsupe putsu, neicha jasiapatibana quimisha discípulo cuana peje su. Uja atana huecuana:

—¿Ahua micuana etahuisa tsuhu? Beju mejanahuasaque hue. Beju tupu saida, juchaji deja cuana sa eme su ema emenajatiata hora cuinaitia putsu. <sup>46</sup> Menetianaque. Meputija. Mechamaque, ema menajatiaji epu deja beju epusiu.

*Jesús risijiji dusutana huecuana*

*(Marcos 14.43-50; Lucas 22.47-53; Juan 18.2-11)*

<sup>47</sup> Jesús da discípulo cuana neje daja epuani cama, Judas tu peje su cuinana. Tu neje jucuada deja cuana espadaji aida, judío cuana sa tata edhi ehuidusuji cuana ja beitutana huecuana Jesús painata huecuana puji. <sup>48</sup> Tuneda cuinatiji mahue su, Judas ja uja bahuequisatana huecuana:

—Quebata yama ebudhi, tueda da Jesús. Tueda meinaque.

49 Da su Judas ja Jesús naria putsu, “Ebuetsuaji”, yainia je, budhitana. 50 Da su Jesús ja tueda uja atana:

—Eshanapa, ai ya puji mi pueitia, aque hue.

Da su beju deja cuana ja Jesús inatana edusu puji.

51 Da hora su piada Jesús sa discípulo ja espada neje pia deja sa eid'aja siquijusiatana. Tueda deja da sacerdote aida sa emebajaji puina. 52 Da su Jesús ja tueda discípulo uja atana:

—Biuyuque mique espada. Quebata da espada neje eicheti su, tueda da espada neje emanu. 53 Bahue puque, ahua yama quema Tata baja cua su, tuahueda siete tunca ejaitiana mil ángel cuana quema beituta cua ema pabianetiata huecuana puji. 54 Beju aimue daja yama ebaja mahue. Jiahue ema risijiji mecuana sa dusu taji, cuaja Diusu sa quirica su derejiji yani batame.

55 Da su Jesús ja tu inaja puetana deja cuana uja quisabatana:

—¿Ai puji ni da micuaneda pueitia espadaji, aquiriji metse cama? ¿Ai ema tsi puji bata? Pamapa tsine ema templo su aniana cristiano cuana ebuetsua puji. Aimue micuaneda ema inana mahue. 56 Beju daja epuani, cuaja Diusu sa profeta chenu cuana ja deretaidha batame Diusu sa quirica su.

Da su beju discípulo cuana pamapa jududupetana. Jesús tu mehua jusianetiata huecuana.

*Pamapa judéo cuana sa huaraji aida cuana butse su Jesús dusutana huecuana*

*(Marcos 14.53-65; Lucas 22.54-55, 63-71; Juan 18.12-14, 19-24)*

57 Da su beju Jesús dusutana huecuana sacerdote cuana sa echua puji aida butse su, Caifás banime. Dapia jacuatsasiati ebuetsuaji, judío cuana sa tata edhi edhuidusuji cuana di netitaina. 58 Beju Pedro ja uqueda uqueda tije atana Jesús ete taraca etsequeini teje. Taraca su nubi putsu, Pedro aniuteana piada piada huaraji aida sa soldado cuana naja su, cuaja Jesús yata huecuana eba puji.

59 Da su pamapa tueda huaraji aida cuana ja Jesús tu-aquisaja atana tu emanuame puji. Bid'umimi neje tuaquisaja atana huecuana tu manu neje, ematseta puji. 60 Beju jucuada jatuaquisatiji cuana ja bid'umimi neje Jesús tuaquisatana biame, aimue teje atana huecuana tu ematseta puji. 61 Uja putana jatuaquisatiji bid'umimi puji cuana:

—Ye Jesús da uja puana: “Yama ye Diusu sa templo jusiaute cua. Quimisha tsine jenetia yama neicha netianameyu cua.”

Beju daja tueda jatua quisatiji bid'umimi puji cuana ja atana.

62 Da su sacerdote sa echua puji aida netiana putsu, Jesús uja quisabatana:

—¿Jucuaja su ni miada ye jatuaquisatiji cuana aimue ejeut-suinia mahue?

<sup>63</sup> Beju Jesús ja mue jeutsuja a. Da su sacerdote aida ja uja Jesús atana:

—Diusu sa ebani su yama mi ecuatsasiainia, butsepi ecuanaju quisaque. ¿A da mida Diusu sa Ebacua?

<sup>64</sup> Da su Jesús ja jeutsutana.

—Ehe, ema da. Diusu aida, tucheda eni sa bai eni bene yani micuaneda ema eba. Buepa su judu duju su ema epusiu micuaneda eba.

<sup>65</sup> Daja id'aba putsu, sacerdote aida ja mesa ebia jud'uji d'iud'iujatana, ebia su duinini putsu. Uja atana pia cuana:

—Beju ye deja ja Diusu madhabataitia mesa mimi neje. ¿Ai puji ni ecuaneda pia jatuaquisatiji cuana chacu cua. Micuaneda quitaita beju id'abaitia tusa mimi madhada cuana. <sup>66</sup> Beju ¿cuaja micuaneseda piba? ¿Tueda juchaji ahua mahue?

Da su jeutsutana huecuana uja:

—Tueda da juchaji. Pamanu beju.

<sup>67</sup> Da su Jesús ebu su0 equedi neje quid'uatana huecuana. Ichetana huecuana. <sup>68</sup> Pia cuana ja Jesús tuarisi putsu, ebu su ichepirutana huecuana. Daja iche putsu, uja atana huecuana:

—Ahua ene mida Diusu sa Jabeituti Deja su, quisaque ecuanaju aiya mida ebu su ichetaitia.

*Pedro, “Mue yama Jesús shanapa”, puana*

*(Marcos 14.66-72; Lucas 22.56-62; Juan 18.15-18, 25-27)*

<sup>69</sup> Beju daja Jesús yatani huecuana cama, Pedro etseque su anina. Piada sacerdote aida sa emebajaji epuneje ja nariatana. Tuahueda Pedro uja atana:

—Mida di tueda Galilea yahua jenetia deja Jesús neje puniunetina.

<sup>70</sup> Da su Pedro ja uja jeutsutana:

—Bue mahu ema ai jepuiti mida emimiani.

<sup>71</sup> Da su beju Pedro taraca etibeini su epuhu cama, pia emebajaji epuneje ja batana. Uja atana epuneje ja dapia netitana cuana:

—¡Mechamaque jichu deja! Tueda di tueda Nazaret ejude jenetia deja Jesús neje puniunetina.

<sup>72</sup> Beju neicha Pedro ja uja atana:

—Mue yama shanapa tueda deja.

<sup>73</sup> Da su dapia enetita cuana ja Pedro nariatana. Tu chama putsu, uja atana huecuana:

—Ene putsu, mida da tueda deja sa ebuqueji. Ecuanaju eshanapainia mique mimi jepuiti. Galilea cuana sa mimi nime mique mimi.

<sup>74</sup> Da su Pedro Diosu bahue pupiruana. Uja jeutsutana huecuana:

—Beju yama micuana quisaitia aimue yama tueda deja shanapa. Diosu ja ema pamatseta, ahua ema bid'umimi epuani su.

Da hora quitaita su Pedro mimipeitia su beju huaripa deja queiana. <sup>75</sup> Da su Pedro japibatiana Jesús sa uja mimi cuana su: “Huaripa deja queiji mahue su, mida, ‘Mue yama Jesús shanapa’, epu quimisha nuati.” Da su Pedro taraca jenetia tipeida cuinana putsu, jubida pana.

## 27

*Jesús romano huaraji aida Pilato butse su dusutana huecuana*

(Marcos 15.1; Lucas 23.1-2; Juan 18.28-32)

<sup>1</sup> Beju ehuenani su, pamapa sacerdote aida cuana, tata edhi ehuidusuji cuana neje jadhitatitana. Tuneda jaquisatitana cuaja Jesús manameme ya. <sup>2</sup> Jesús risijiji dusutana huecuana huaraji aida Poncio Pilato banime peje su.

*Judas manuana*

<sup>3</sup> Beju Judas ebia su jatacuamadhatiana, Jesús manameja yatani huecuana bahue pu putsu. Beju putiana sacerdote huaraji aida, tata edhi ehuidusuji cuana peje su quimisha tunca chipilu cuana tu tiatana huecuana etiatiyu puji. <sup>4</sup> Tiatiyu putsu, uja atana huecuana:

—Ema da jucha aida puitia, deja jucha mahue yama menajaitia putsu.

Da su jeutsutana huecuana uja:

—Ecuanaju sa mu mue ai biame a taji. Tueda mu miqueda.

<sup>5</sup> Da su Judas ja chipilu cuana huararatana templo su. Huarara putsu, templo jenetia cuinanana. Beju janajaribiatiana.

<sup>6</sup> Da su sacerdote aida cuana chipilu cuana chudutana. Tuneda cama jaquisatitana uja:

—Aimue ye chipilu templo sa caja su ecuaneda icha cua mahue, ye chipilu da deja emanuame puji tiajiji putsu.

<sup>7</sup> Da su yahua eped'u bajatana huecuana chipilu neje. Tueda yahua da extranjero judío mahue emanutani cuana epapa puji. Tueda yahua ped'u da Eicha Jutu Muduji Jude banime puina.

<sup>8</sup> Da tsine jenetia cristiano cuana ja tueda yahua ped'u Ami Yahua ebani ichatana. <sup>9</sup> Beju daja puana, cuaja bi-ahua tiempo Diosu sa profeta Jeremías chenu ja deretaidha batame. Uja deretaidha: “Tueda quimisha tunca echuje tupu hue israelita cuana ja ichatana. <sup>10</sup> Tueda chipilu neje Eicha

Jutu Muduji Jude banime bajatana huecuana. Daja yama ana, cuaja Diusu sa tsada puana batame.”

*Jesús da romano huaraji aida Pilato butse su eneti*  
(*Marcos 15.2-5; Lucas 23.3-5; Juan 18.33-38*)

<sup>11</sup> Da su Jesús dusutana huecuana huaraji aida Pilato butse su. Beju tuna cuinatana su, Pilato ja uja quisabatana Jesús:

—¿A da mida judío cuana sa echua puji?

Da su Jesús ja Pilato jeutsutana uja:

—Ehe, ema da cuaja mi mimitia batame.

<sup>12</sup> Beju sacerdote huaraji aida, tata edhi ehuidusuji cuana ja Jesús tuaquisatana su, aimue Jesús ja jeutsuja atana huecuana mahue. <sup>13</sup> Da su Pilato ja Jesús uja atana:

—¿Mue mi id'aba mi etuaquisatani huecuana? ¿Jucuaja su ni mi aimue ejeutsutiani mahue? <sup>14</sup> Da su Pilato nimetiunetiana, Jesús ja mue jeutsu huecuana putsu. Beju tuahueda cuaja pibape taji mahue batana.

*Jesús manu su matsetana huecuana*  
(*Marcos 15.6-20; Lucas 23.13-25; Juan 18.38-19.16*)

<sup>15</sup> Beju tsine epuetai cama, Pilato ja piada terijiji d'eji tia bahue puina. Daja mesa puiti puina. Quebata terijiji cristiano cuana ja edharetani, tueda da Pilato ja d'eji tia bahue puina. <sup>16</sup> Beju piada terijiji anina Barrabás banime. Pamapa cristiano cuana ja tueda shanapatana. <sup>17</sup> Da su Pilato ja cristiano cuana quisabatana uja:

—¿Quebata deja micuaneseda tsada yama d'eji etia puji? ¿Barrabás ahua Jesucristo? Mequisaque ema.

<sup>18</sup> Daja Pilato ja quisabatana cristiano cuana, sacerdote aida cuana ja Jesús duininiba putsu, tu peje su menajatiatana bahue pu putsu.

<sup>19</sup> Beju Pilato ja tueda ai cuana ebutsepia puji ebatani cama, mesa ehuané tu quisametana uja: “Be cuaja biame aji tueda deja, dhidha su yama pia iyuda tahuibaja putsu.”

<sup>20</sup> Beju sacerdote huaraji aida, tata edhi ehuidusuji cuana ja cristiano cuana jubida bahue quisatana Pilato uja pajeutsuta huecuana puji: “Barrabás d'eji tiaque. Jesús manuameque.”

<sup>21</sup> Da su Pilato ja neicha quisabatana cristiano cuana uja:

—D'eji tiaque Barrabás.

<sup>22</sup> Da su Pilato ja quisabatana huecuana:

—¿Ai ni da ema pu cua Jesucristo neje?

Da su pamapa su jubida tsiatsiatana uja:

—¡Curusu su tataque!

<sup>23</sup> Da su Pilato ja uja atana huecuana:

—¿Ai madhada ni da ye deja ja atana?

Da su neicha jeutsutana huecuana uja:

—¡Curusu su tataque!

<sup>24</sup> Beju Pilato ja cristiano cuana janimetipeitija eputani batana. Mesiaja mahue Jesús yatani huecuana batana. Da putsu, yahui paduseta cuatsasiatana. Beju yahui dusetana su, Pilato jamerucuatiana cristiano cuana butse su. Uja atana huecuana:

—Aimue ema juchaji mahue ye deja jucha mahue emanu-ame puji. Uja da ema emerucuatiani micuaneda bahue epu puji ema jucha mahue. Beju micuaneda da juchaji epu, ye deja manumeja yainia putsu.

<sup>25</sup> Da su uja jeutsutana huecuana:

—Ecuanaju da ecuanaju sa ebacua cuana neje beju ejeitsu tu emanu jepuiti.

<sup>26</sup> Da su beju Pilato ja Barrabás d'eji tiatana. Jesús huacabiti neje icheme putsu, menajatiatana curusu su patatata huecuana puji.

<sup>27</sup> Da su soldado cuana ja Jesús dusutana huaraji aida Pilato ete su. Dueji soldado cuana Jesús yani su jadhitatitana.

<sup>28</sup> Mesa ebia jud'uji mejemitana huecuana. Pia ebia jud'uji idhiria tu bia su ichatana huecuana, tu neje eshishati puji.

<sup>29</sup> Corona junu aquid'aji bauda jenetia atana huecuana. Da neje chuajud'utana huecuana. Mesa eme bai eni bene su huara ichatana huecuana. Daja a putsu, tu butse su tururutana huecuana tu peje eshishati puji. Uja atana huecuana:

—¡Viva judío cuana sa echua puji!

<sup>30</sup> Da su beju Jesús quid'uatana huecuana equedi neje. Huara neje chuataratana huecuana. <sup>31</sup> Beju shishape putsu, ebia jud'uji idhiria mejemitana huecuana. Neicha mesa ebia jud'uji quitaita neje jud'utana huecuana. Da su beju Jesús dusutana huecuana curusu su etata puji.

### *Jesús tatatana huecuana*

*(Marcos 15.21-32; Lucas 23.26-43; Juan 19.17-27)*

<sup>32</sup> Beju eputahu cama, piada deja Cirene yahua jenetia tsutana huecuana. Tueda da Simón banime puina. Tueda jubida cuatsasiatana huecuana Jesús sa curusu pamapata puji.

<sup>33</sup> Daja cuinatitana huecuana Calavera banime eti jude su.

<sup>34</sup> Dapia Jesús vino huiaja neje huarujiji tiatana huecuana paid'ita puji. Jesús ja tsaba putsu, id'ija mahue atana.

<sup>35</sup> Beju Jesús curusu su tata putsu, soldado cuana ja mesa ejud'uji inatana. Aiya ejud'uji edusuta eba puji, suerte atana huecuana. Daja beju puana, cuaja biahua tiempo Diosu sa profeta chenu ja deretaidha batame. Uja derejiji yani:



“Suerte a putsu, quema ejud'uji tuneda cama jaberereatiati-tana.” <sup>36</sup> Da su beju soldado cuana dapia aniuteana einat-sihua puji. <sup>37</sup> Curusu su Jesús sa echua bia su mimi cuana deretaidha huecuana. Tueda mimi uja puana: “Ye da Jesús, judío cuana sa Echua Puji.”

<sup>38</sup> Daja huecha beta tsi puji detse macha tu naja su tata putsu, badeanatana huecuana. Piada, Jesús sa bai eni bene, pia, d'ani bai bene. <sup>39</sup> Da su jaitianatana cuana ja Jesús madhabatana uja:

<sup>40</sup> —Mida templo jusiaute putsu, quimisha tsine jenetia enetianameyu, epuani putsu, jiahue quita buteque curusu jenetia. Mi mehua d'oji su jaatique. Ahua mida Diusu sa ene quita Ebacua su, beju buteque.

<sup>41</sup> Daja huecha sacerdote huaraji aida, jacuatsasiati ebuet-saji, fariseo, tata edhi ehuidusuji cuana dapia anitaina. Tuneda cama uja jaquisatitana:

<sup>42</sup> Ye deja ja pia cuana d'oji su a bahue biame, jiahue quita tu mehua cuaja d'oji su jaati taji mahue ebatiani. Ahua tueda ene quita Israel sa Echua Puji su, pabute ecuanaju tu peje su jei epu puji. <sup>43</sup> Tueda pa Diusu peje su janimetuheatiana. Daja huecha Diusu sa ebacua pa epuani. Ahua ene daja su, ahua Diusu ja tueda ibuneda ebatani su, da su jiahue quita Diusu ja tueda d'oji su paata.

<sup>44</sup> Beju Jesús naja su curusu su tatajiji ebade tsi puji ja di Jesús madhabatana.

### *Jesús manuana*

*(Marcos 15.33-41; Lucas 23.44-49; Juan 19.28-30)*

<sup>45</sup> Beju buepatia jenetia badeute uqueda teje apunana.

<sup>46</sup> Da hora su Jesús jubida tsiatsiana uja:

—Quema Tata Diusu, quema Tata Diusu, ¿jucuaja su mi ema jusiabadeanaitia?

<sup>47</sup> Piada piada dapia netitaina cuana ja Jesús daja etsiat-siani id'aba putsu, uja putana huecuana:

—Diusu sa profeta Elías chenu eihuatani.

<sup>48</sup> Da su piada deja ja huapese nime vino edhi, tsetseda su tsabiatana. Aquí huiri bauta huitsana su icha putsu, Jesús sa ecuatsa su atsuatana tu paid'iti puji. <sup>49</sup> Beju da je netitaina cuana ja deja atana uja:

—Id'ua taji tsuhu. Pabatija, ahua Elías chenu epue tu curusu jenetia ejemiute puji.

<sup>50</sup> Da su neicha Jesús jubida tsiatsiana. Daja tsiatsia putsu, beju manuana. <sup>51</sup> Da hora quitaita su templo dume su telón aida, bauta, pamuda badeji beju ebia jenetia ema su cuata jabud'iutiana. Beju yahua di ruburubuana. Tumu aida cuana di jadhatitana. <sup>52</sup> Sepulcro cuana di jatsequed'iatitana.

(Daja biame, mue netianayu putana manujiji cuana. <sup>53</sup> Jesús id'eibana su chu, dueji Diusu peje su jei eputani manujiji cuana macha id'etaibana. Tueda sepulcro jatsequed'iatijiji cuana jenetia netianataibana huecuana. Ejude Jerusalén su putitana huecuana. Dapia jucuada cristiano cuana ja batana huecuana.) <sup>54</sup> Beju curusu naja su Jesús inatsihuaji soldado cuana mecuana sa capitán neje ebia su iyuame putana, yahua eruburubuaní, pamapa pia ai nimetiuda cuana ba putsu. Da su beju uja jaquisatitana huecuana:

—Ene putsu, ye deja da Diusu sa Ebacua.

<sup>55</sup> Jucuada epuna cuana di dapia curusu huabata netitaina. Galilea yahua jenetia Jesús buquetaina huecuana tu etsahua puji. <sup>56</sup> Tuna duju su María Magdalena, Jacobo, José detse sa cuara María banime netina. Zebedeo sa ehua ne di dapia netina.

### *Jesús papatana huecuana*

(*Marcos 15.42-47; Lucas 23.50-56; Juan 19.38-42*)

<sup>57</sup> Beju tsinecua dhememeta su piada deja saida, chipiluji José banime pueana. Tueda Arimatea ejude jenetia puina. Tueda da di Jesús tije aji puina. <sup>58</sup> Huaraji Pilato peje su putiana Jesús sa equita ebaja puji. Da su Pilato ja cuatsasiatana Jesús sa equita José patiata huecuana puji. <sup>59</sup> Tiatana huecuana su, José ja equita dusutana. Ebabuji saida neje babutana. <sup>60</sup> Equita babu putsu, mesa tumu epa sepulcro eichacua su huananubiatana. Sepulcro tsequeini tumu aida neje teri putsu, putibana. <sup>61</sup> Dapia sepulcro butse su María Magdalena, pia María neje anina.

### *Soldado cuana ja sepulcro inatsihuatana*

<sup>62</sup> Beju pia huenati sacerdote huaraji aida, fariseo cuana Pilato peje su putitana. <sup>63</sup> Uja Pilato atana huecuana:

—Echua puji, ecuanaju epibainia tueda bid'umimi puji Jesús, “Quimisha tsine jenetia ema eid'eyu”, puana. <sup>64</sup> Da putsu, cuatsiasiaque mique soldado cuana ja sepulcro painatsihuata quimisha tsine puji, cuapuitime Jesús sa equita mesa discípulo cuana ja dhidha su jemicuinata cua putsu. Beju equita jemicuina putsu, “Jesús id'eitiba”, cristiano cuana quisata cua huecuana. Da su tueda Jesús sa equene bid'umimi cuana ebia su aida pu cua.

<sup>65</sup> Da su Pilato ja uja atana huecuana:

—Beju micuaneseda soldado yani. Micuaneda hue sepulcro meinatsihuatique micuana sa tsada tupu.

<sup>66</sup> Da su putitaibana huecuana. Tumu aida bia su sello ichatana huecuana. Templo sa soldado cuana ichatana huecuana sepulcro painatsihuata huecuana puji.

## 28

*Jesús id'eibana**(Marcos 16.1-8; Lucas 24.1-12; Juan 20.1-10)*

<sup>1</sup> Janahua tsine beju jaitianaja su, beju domingo tsine ehuenani su, María Magdalena, pia María neje, sepulcro su neicha jasiapatiana. <sup>2</sup> Tuatse ecuinahu su, yahua jubida ruburubuana. Diusu sa ángel cielo jenetia bute putsu. Tuahueda sepulcro eteriji tumu aida ichaderatana. Tumu bia su aniuteana epuna detse ja batana. <sup>3</sup> Tueda ángel da tserutseru nime, huedame batana tse. Mesa ejud'uji da pasane, cuarecuare batana tse. <sup>4</sup> Inatsihuaaji soldado cuana ja ángel ba putsu, ebia su riariatana huecuana, iyuame epuani je. Yahua su manudajajapetana huecuana. <sup>5</sup> Da su ángel ja epuna detse uja atana:

—Be iyuame mepuji. Ema bahue metseda Jesús tatajiji echacuinia. <sup>6</sup> Aimue upia mahue. Beju id'eitiba, cuaja tueda equene quisa puana batame. Mechamaque tu esa mane eti jude. Beju mue ai biame. <sup>7</sup> Jiahue quita beju meputique mesa discípulo cuana peje su. Uja mequisatique huecuana: “Jesús manujiji cuana duju jenetia beju id'eitiba. Tueda mu beju Galilea yahua su putiba dapia micuana emitsu puji. Dapia micuaneda tueda eba.”

<sup>8</sup> Da su beju epuna detse tipeida putibana discípulo cuana daja equisati puji. Iyuame, beidaji neje putibana tse. <sup>9</sup> Beju tuatseda epuhu cama, Jesús ja tsu putsu, mitsutana tse. Jesús naria putsu, ebia su beidaji neje mesa etsaja su id'amitana tse. <sup>10</sup> Da su Jesús ja atana tse uja:

—Be iyuame mepuji. Mequisatique quema edue cuana Galilea yahua su paputita huecuana. Dapia ema ebata huecuana.

*Soldado cuana ja sacerdote huaraji aida cuana quisaitaibana.*

<sup>11</sup> Epuna detse epuhu cama, piada piada inatsihuaaji soldado cuana ejude su putitaibana sacerdote huaraji aida cuana pamapa cuaja ai puana cuana equisati puji. <sup>12</sup> Da su sacerdote huaraji aida cuana tata edhi ehuidusuji cuana peje su putitana tuna equisati puji. Tuneda cama soldado cuana jucuada chipilu etia puji jabutsepiatitana. <sup>13</sup> Chipilu etiania je, uja atana huecuana:

—Mequisatique cristiano cuana uja: Dhidha su Jesús sa discípulo cuana ja mesa equita jemicuinata sepulcro jenetia. <sup>14</sup> Ahua huaraji aida Pilato ye ai cuana bahue epu su, beju ecuanaju micuana ebianetia tu butse su.

<sup>15</sup> Da su beju soldado cuana ja chipilu ina putsu, putitana huecuana cristiano cuana daja equisati puji. Da putsu beju, jiahue teje judío cuana daja hue jei eputani.

*Jesús ja apóstol cuana cuatsasiatana*

*(Marcos 16.14-18; Lucas 24.36-49; Juan 20.19-23)*

<sup>16</sup> Da su discípulo cuana quepia Jesús ja quisatana eti jude su putitana. <sup>17</sup> Jesús ba putsu, ebia su beidaji neje mitsutsu-atana huecuana. Daja biame, piada piada cuana mu jei puja mahue tsuhu putana. <sup>18</sup> Da su Jesús ja naria putsu, uja atana huecuana:

—Ema da cielo, yahua su huaraji, ebia su aida, tucheda. <sup>19</sup> Da putsu, meputique pamapa ejude cuana su aniji cristiano cuana peje su. Ema tije aji meatique huecuana. Diosu sa puji meichaderatique huecuana yahui neje. Daja meaque Tata Diosu, Ebacua, Espíritu Santo sa ebani su. <sup>20</sup> Mebuetsuatique huecuana, pamapa yama micuana jacuatsasiati tiana cuana. Bahue mepuque, ema pamapa hora su micuana neje yani. Beju pamapa ai cuana epupe teje, ema micuana neje yani. Daja papu.

## EL SANTO EVANGELIO SEGÚN SAN MARCOS

Ye quirica da Marcos ja Cristo jepuiti deretaidha. Marcos da Bernabé, Pablo detse sa ebuqueji puidha, quisaquisa puniunetidha su, Pedro di tsahuataidha. Pedro sa quisaquisa id'aba putsu, deretaidha, cuaja quisaquisa batame.

Ye quirica ja Jesús da Tata Diosu sa Jabeituti Embajaji ebametani. Daja huecha tueda da Diosu sa Ebacua tucheda ebametani, ai nimetiuda cuana ataidha putsu. Ye quirica su cuaja Jesús ja ai cuana ataidha quisa epuani. Da neje cristiano cuana ebametani Jesús sa jatsahuati, jaibunebati cuana.

*Juan Bautista d'anita yahua su quisaquisa puana  
(Mateo 3.1-12; Lucas 3.1-9, 15-17; Juan 1.19-28)*

<sup>1</sup> Ye quirica da Jesucristo jepuiti quisa epuani. Cuaja tusa quisa saida cuana pupiruana quisa epuani. Cristo da Diosu sa Ebacua ye quirica su quisa epuani.

<sup>2</sup> Biahua tiempo da cuaja Diosu Cristo jepuiti quisa puidha ai cuana profeta Isaías chenu ja uja deretaidha: Quema quisa pui yama ebeitu mi hui su cristiano cuana pabasetatita mi epue su puji.

<sup>3</sup> Deja jubida quisaquisa epuani d'anita yaua su. Uja tueda epuani:

“Mebasetatique Ecu Puji ecuina su puji.”

<sup>4</sup> Da su beju Juan Bautista cuinana. Quisaquisa pupiruana cristiano cuana peje su Diosu peje su papibaturucatita huecuana puji. D'anita yahua su quisaquisa puana. Pamapa cristiano cuana ejude cuana jenetia Juan peje su putitana tusa quisaquisa cuana eida'aba puji. Ahua Diosu peje su epibaturucatita huecuana su, ahua tuseda puji yahui neje eichaderatita huecuana su, Diosu ja mecuana sa jucha cuana eperdonatayu. Daja Juan Bautista quisaquisa puana cristiano cuana peje su. <sup>5</sup> Beju pamapa cristiano cuana Juan peje su putitana tu eid'aba puji. Judea yahua, Jerusalén ejude jenetia putitana huecuana. Juan ja cristiano cuana yahui neje Jordán ena su Diosu sa puji ichaderatana, mecuana sa jucha cuana jatuaquisatitana huecuana su.

<sup>6</sup> Juan sa ejud'uji camello sa einua etad'i jenetia puina. Ebiti jenetia da mesa eturisiji puina. Mesa jana da dhequere aida, huasa ena puina. <sup>7</sup> Beju Juan cristiano cuana peje su uja quisaquisa puana:

—Pia ema tije epusiu. Tueda da ema ebia su huaraji aida putsu, ema mu mue ai eni mahue tu emebaja puji. <sup>8</sup> Yama

micuana yahui neje Diusu sa puji eichaderainia biame, tuahueda micuana Diusu sa puji eichaderata Espíritu Santo sa tucheda neje.

*Juan ja Jesús Diusu sa puji yahui neje ichaderatana*  
(Mateo 3.13-17; Lucas 3.21-22)

<sup>9</sup> Da tiempo su Jesús cuinanana Nazaret ejude jenetia. Tueda ejude da Galilea yahua su anina. Da su beju Jesús da Juan Bautista peje su cuinana. Cuinana putsu, Juan ja tueda Diusu sa puji ichaderatana yahui neje Jordán ena su. <sup>10</sup> Jordán ena jenetia cuinanana tse su, buepa jadhatiana Jesús ja batana. Espíritu Santo huaitucu nime tu bia su ebutesa Jesús ja batana. <sup>11</sup> Tata Diusu buepa jenetia jubida mimiana uja:

—Mida da quema ibuneda Ebacua. Mi neje ema beidaji.

*Ishahua ja Jesús nariatana Jesús epiruba puji*  
(Mateo 4.1-11; Lucas 4.1-13)

<sup>12</sup> Da hora su beju Espíritu Santo ja Jesús d'anita yahua su dusutana. <sup>13</sup> Dapia Jesús pushi tunca tsine aniana. Animalo d'aida cuana di dapia anitaina. Dapia Ishahua ja Jesús nariatana tu epiruba puji, jucha yamedhaa puji. Da su beju Diusu sa ángel cuana butetana Jesús etsahua puji.

*Jesús Galilea yahua je quisaquisa puniunetiana*  
(Mateo 4.12-17; Lucas 4.14-15)

<sup>14</sup> Beju Juan Bautista teriichatana huecuana su, Jesús Galilea yahua su putiana Diusu sa quisa saida cuana quisaquisa eputi puji. <sup>15</sup> Uja mesa quisaquisa puana:

—Beju tiempo cuinaitia. Diusu ecuatsasiati beju nari. Mepi-baturucatique Diusu peje su. Jei mepuque Diusu sa quisa saida cuana su d'ejí su epu puji.

Daja Jesús quisaquisa puniunetiana.

*Jesús ja pushi deja dharetana*  
(Mateo 4.18-22; Lucas 5.1-11)

<sup>16</sup> Galilea yahua bai maje je Jesús yasenioneti je, Simón, mesa edue Andrés neje tsutana. Tarrafa aida neje se cuana inatasaina tse. Esia bahui tuatse sa mudu puina. <sup>17</sup> Da su Jesús ja atana tse uja:

—Metseda se cuana memi bahue. Ema tije meaque. Yama metseda cristiano cuana ema peje su dusejí yame.

<sup>18</sup> Da hora su hue tarrafa cuana ichajusiatana tse Jesús ebuque puji. Beju putiana tse Jesús neje.

<sup>19</sup> Jesús chuadera aseti putsu, beta deja Jacobo, Juan banime tsutana. Tuatseda edue ta tse puina. Tuatse sa tata Zebedeo banime. Pamapa tuneda canoa dume su anitaina.

Tarrafa cuana basetatasaina huecuana. <sup>20</sup> Beju Jesús ja ihuatana tse tu tije paata puji. Da su beju tuatse sa tata Zebedeo, etsahuaji cuana ichajusiatana tse. Daja ichajusia putsu, Jesús tije atana tse.

*Deja einid'u madhadaji*  
(Lucas 4.31-37)

<sup>21</sup> Beju Capernaum ejude su cuinatitana huecuana. Janahua tsine su Jesús jadhitati jude ete su nubiana cristiano cuana ebuetsua puji. <sup>22</sup> Tuahueda ebuetsuatani su, dapia yanita cristiano cuana nimetiunetitana, Jesús ja huaraji aida mimi neje buetsuatana huecuana putsu. Mesa jabuetsuati quitaita cuana buetsuatana. Aimue jacuatsasiati ebuetsuaji cuana nime buetsuame atana mahue. Tuna ebia su saida buetsuatana, pia sa jabuetsuati cuana bahui buetsua bahue putaina huecuana putsu. <sup>23</sup> Da hora su beju piada deja einid'u madhadaji jadhitati jude ete su nubiana. Tuahueda tsiatsia neje Jesús uja atana:

<sup>24</sup> —Jesús, Nazaret ejude jenetia, ¿ai da miqueda ecuanaju neje a taji? ¿A mida pueitia ecuanaju ecastiga puji? Beju yama mi eshanapainia. Mida da Diosu sa Ebacua.

<sup>25</sup> Da su Jesús ja einid'u madhada jubida cuatsasiatana uja: —Mitanaque. Cuinanaque ye deja peje jenetia.

<sup>26</sup> Da hora su einid'u madhada ja deja eriariametani cama, jubida tsiatsiana. Tsiatsia putsu, deja mesiatana. <sup>27</sup> Pamapa yanita cristiano cuana ja ba putsu, nimetiunetitana huecuana. Da su tuneda cama jaquisabatitana uja:

—¿Ai jabuetsuati cuana da ye? Ye Jesús ja einid'u madhada cuana huaru jubida cuatsasia bahue. Beju tuneda jei yatani.

<sup>28</sup> Da putsu, tipeida pamapa cristiano cuana Galilea yahua su Jesús jepuiti bahue putana.

*Jesús ja Pedro sa ehuañe sa cuana saisiametana*  
(Mateo 8.14-15; Lucas 4.38-39)

<sup>29</sup> Da su beju Jesús jadhitati jude ete jenetia cuinanana su, Jacobo, Juan neje Simón, Andrés detse sa ete su putiana. Ete su cuinati putsu, nubitana huecuana. <sup>30</sup> Simón sa ehuañe sa cuara nedaji saina batana huecuana. Dapia yanita cuana ja epuna nedaji esa Jesús quisatana. <sup>31</sup> Da su beju Jesús ja epuna nedaji esa nariatana. Tusa eme ina putsu, beju netiainametana. Da hora su mesa neda jaitianana beju. Da su epuna saisi putsu, mebajapirutana huecuana.

*Jesús ja dueji nedaji cuana saisiametana*  
(Mateo 8.16-17; Lucas 4.40-41)

<sup>32</sup> Beju yapunahu su, dapia yanita cuana ja nedaji cuana dusepirutana Jesús peje su. Einid'u madhadaji cuana di

dusetana huecuana. <sup>33</sup> Pamapa ejude su aniji cristiano cuana ete tsequeini su jadhitatitana. <sup>34</sup> Jesús ja dueji nedaji cuana sa tsapiapiati neda cuana saisiametana. Dueji einud'u madhada cuana jusiacuinatana cristiano cuana peje jenetia. Einid'u madhada cuana ja Jesús shanapatana putsu, Jesús ja aimue d'ejí tiatana huecuana mahue pamimita puji.

*Jesús Galilea yahua je quisaquisa puniunetiana  
(Lucas 4.42-44)*

<sup>35</sup> Beju pia tsine id'eti cuinanaji mahue su, Jesús netianana. Ete jenetia cuinanana ejude tsahua su dapia tu mehua Diosu emitsu puji. <sup>36</sup> Da su Simón ja mesa ebuqueji cuana neje Jesús chacutitana. <sup>37</sup> Jesús teje putsu, uja quisatana huecuana:

—Beju pamapa ja mi echacutani.

<sup>38</sup> Da su Jesús ja uja atana huecuana:

—Meputija pia ejude nari cuana su, da je di ema quisaquisa epu puji. Daja epu puji ema pueana.

<sup>39</sup> Da su Jesús quisaquisa puniunetiana pamapa Galilea yahua je. Pamapa jadhitati jude ete cuana su quisaquisa puana. Einid'u madhada cuana jusiacuinatana cristiano cuana peje jenetia.

*Jesús ja lepraji deja saisiametana  
(Mateo 8.1-4; Lucas 5.12-16)*

<sup>40</sup> Beju piada lepraji deja Jesús nariatana. Jesús butse su tururu putsu, uja atana:

—Ahua mique tsada su, miada ema saisiamé cua.

<sup>41</sup> Jesús ja deja bataichenu batana putsu, mesa eme neje deja d'apabatana. D'apaba putsu, Jesús ja deja atana uja:

—Tsada quema Mida esaisi.

<sup>42</sup> Da hora su deja saisiana beju. <sup>43</sup> Da su Jesús ja jubida cuatsasiatana uja:

<sup>44</sup> —Be aidhe biame quisaji. Jabametitique sacerdote peje su tuahueda mi saisijiji pabata puji. Da su beju Diosu irut-suaque, cuaja Moisés chenu sa jacuatsasiati epuani nime, pamapa cristiano cuana ja mida saisijiji pashanapata puji.

<sup>45</sup> Da su beju deja putibana. Aimue atana mahue cuaja Jesús ja cuatsasiatana nime. Tipeida quisa pupiruana cuaja Jesús ja saisiameme atana. Daja deja ebia su quisa puana putsu, Jesús ejude cuana su cuaja nubisaita taji mahue jabatiana. Ejude jenetia uqueda putiana biame, dapia cristiano cuana ja Jesús batitana. Que jenetia papu cristiano cuana tu peje su putitana.



## 2

*Jesús ja deja ase bue mahue saisiametana*  
(Mateo 9.1-8; Lucas 5.17-26)

<sup>1</sup> Jesús da quejucua tsine jenetia

Capernaum ejude su jasiapatiana. Beju pamapa ejude su aniji cuana ja shanapatana. <sup>2</sup> Dueji cristiano cuana jadhitatitana Jesús yani ete su. Ete dume su d'ejí mahue puana. Etseque su di d'ejí mahue puana. Da su Jesús Tata Diosu sa quisa saida cuana quisaquisa punetina ete dume su. <sup>3</sup> Beju tu quisaquisa epuneti cama, pushi deja cuana cuinatana. Piada deja ase bue mahue chahui su mapabetana huecuana. <sup>4</sup> Dueji cristiano cuana anitaina putsu, cuaja Jesús naria taji mahue batana huecuana. Da putsu, ete epa pachata su raranetana huecuana Jesús eneti butse su. Beju rara a putsu, deja ase bue mahue chahui su rara je butemetana huecuana. <sup>5</sup> Da su beju Jesús nimetiñana, tueda pushi deja cuana sa janimetucheati cuana ba putsu. Da putsu, deja uja atana:

—Deja, yama mique jucha cuana perdonaitia.

<sup>6</sup> Beju pia jacuatsasiati ebuetsuaji cuana dapia anitaina.

<sup>7</sup> Uja japibatitana huecuana: “¿Cuaja su ni da ye deja uja emimiani? Tuahueda Diosu emadhabatani mesa mimi neje. ¿Ai deja ja jucha cuana perdonata cua bata? Tata Diosu ja bahui jucha cuana perdonata cua. Beju Diosu puja epuani tueda.” Daja japibatitana huecuana. <sup>8</sup> Beju Jesús ja tuna sa piba cuana shanapa putsu, uja quisabatana huecuana:

—¿Ai puji micuaneda daja madhada epibatiani? <sup>9</sup> Ahua yama deja, “Mique jucha cuana yama eperdonainia”, ya su, ahua yama, “Netianaque. Jemitsuaque mique chahui. Aseque”, ya su, quema puji mu tupupai hue. <sup>10</sup> Daja yama deja yainia micuana ebame puji, ye mundo su ema tucheda eni cristiano cuana sa jucha cuana eperdona puji.

Da su Jesús ja uja deja nedaji cuatsasiatana:

<sup>11</sup> —Netianaque. Mique chahui jemitsuaque. Putiyuque mique ete su.

<sup>12</sup> Da hora su beju deja netianana. Mesa chahui jemitsua putsu, ete jenetia cuinanana. Beju pamapa dapia aniji cuana nimetiunetitana. Diosu saida mitsutsuatana huecuana. Uja putana huecuana:

—Quetsunu biame ecuanaju uja ai ba bue mahue.

*Leví ja Jesús tije apirutana*  
(Mateo 9.9-13; Lucas 5.27-32)

<sup>13</sup> Neicha Jesús putiana bai maje su. Pamapa cristiano cuana ja Jesús nariatana su, tuahueda buetsuatana huecuana. <sup>14</sup> Buetsuape putsu, Jesús asepiruana cama, Leví

batana. Leví da impuesto chujebajaji jude su anina. Tueda da Alfeo sa ebacua puina. Da su Jesús ja Leví uja atana:

—Tije ema aque.

Da su Leví netiana putsu, tije apirutana Jesús.

*Jesús juchaji cuana neje diadiana*

<sup>15</sup> Beju Jesús, mesa discípulo cuana neje Leví sa ete su putiana ediadia puji. Jucuada impuesto chujebajaji, juchaji cuana dapia anitaina, tuneda da Jesús tije ataina putsu.

<sup>16</sup> Beju jacuatsasiati ebuetsuaji, fariseo cuana ja Jesús impuesto chujebajaji, juchaji cuana neje ediadiani batana. Tuneda ba putsu, uja quisabatana discípulo cuana:

—¿Jucuaja su da Jesús impuesto chujebajaji, juchaji cuana neje ediadiani?

<sup>17</sup> Jesús ja id'aba putsu, uja jeutsutana huecuana:

—Jaiduenetiji da aimue saida cuana sa puji mahue. Nedaji cuana sa puji bahui. Daja huecha aimue ema pue cristiano butsepi ebatitani cuana eihua puji mahue. Beju ema pueana juchaji cuana eihua puji, d'iji su paputa huecuana puji.

*Jesús quisabatana huecuana ayuno jepuiti*

*(Mateo 9.14-17; Lucas 5.33-39)*

<sup>18</sup> Beju Juan tije aji cuana, fariseo tije aji cuana neje tupupai quejucua tsine puji ayuna putanina. Da su piada piada cristiano cuana ja Jesús quisabatana:

—Juan tije aji cuana quejucua tsine puji ayuna putanina. Daja huecha fariseo tije aji cuana eputani. ¿Cuaja su jia da mique discípulo cuana aimue ayuna eputani mahue?

<sup>19</sup> Da su Jesús ja quisabatana huecuana:

—¿Ai jahuaneti tsine su ihuajiji cuana ayuna puta cua bata, ehuanetisa deja tuna neje yani tupu? Ehuanetisa deja tuna neje yani tupu, ihuajiji cuana aimue ayuna eputa mahue. <sup>20</sup> Tueda ihuajiji cuana duju jenetia eijemicuinata su chu, da hora su ihuajiji cuana ayuna eputa, aimue tueda tuna neje yani mahue putsu.

<sup>21</sup> Mesa jabuetsuati cuana bata saida epu puji, Jesús ja daja hue quisainiame atana huecuana:

—Aimue detse etse ejud'uji edhi remetia cua mahue pia eped'u eichacua neje. Beju tueda remetia eichacua ja ejud'uji edhi d'iuta cua. Da su tueda d'iuji detse ebia su ainameta cua. <sup>22</sup> Daja huecha aimue vino eichacua etse emeji edhi su ichaseta cua mahue. Ahua daja etse a cua su, vino eichacua ja emeji pujuta cua. Da su vino, emeji neje tupupai taitana cua. Da putsu, vino eichacua emeji eichacua su ichaseta taji. Daja a putsu, pamapa saida epu. Vino, emeji neje tupupai saida epu.

Daja Jesús ja bahue quisa neje buetsuatana huecuana. Mesa jabuetsuati eichacua cuana da vino, eped'u eichacua nime. Fariseo cuana sa jabuetsuati cuana mu emeji, ejud'uji edhi nime. Beju aimue huamahuama ehuaruti mahue.

*Discípulo cuana ja d'ije eju cuana raritana janahua tsine su (Mateo 12.1-8; Lucas 6.1-5)*

<sup>23</sup> Pia janahua tsine Jesús, mesa discípulo cuana neje d'ije duje ejaitianasa je, discípulo cuana ja eju cuana raridujudu-juatana, dhemanu putsu. Ejaja iruiruatana huecuana edia puji. <sup>24</sup> Fariseo cuana ja daja ba putsu, discípulo cuana tuaquisatana huecuana. Uja Jesús atana huecuana:

—Chamaque, mique discípulo cuana janahua tsine su emudumudutani. Daja a taji mahue janahua tsine su, jacuatsasiati cuana daja epuani putsu.

<sup>25</sup> Da su Jesús ja uja quisabatana huecuana:

—¿Aimue jia maida micuaneda mimiameana mahue cuaja David chenu ja ataidha mesa ebuqueji cuana neje, dhemanutaidha huecuana su? <sup>26</sup> Abiatar sacerdote cuana sa echua puji aida puidha tiempo su, tueda nubidha Diosu sa templo su pan iyuda edia puji. Ebuqueji cuana pan iyuda tiataidha padiata huecuana puji. Beju tueda pan iyuda mu sacerdote sa bahui dia taji puidha. <sup>27</sup> Daja huecha Diosu ja janahua tsine ichataidha cristiano cuana sa puji, tuna ejanahuata puji. Da puji bahui Diosu ja janahua tsine ichataidha. Beju daja biame, cristiano cuana ja ai saida cuana ata cua janahua tsine su. <sup>28</sup> Ema da Diosu sa Jabeituti Deja. Ema da janahua tsine emetse putsu, yama bahui cristiano cuana ebame ahua ai a taji, ahua ai a taji mahue janahua tsine su.

### 3

*Jesús ja deja mechhui saisiametana (Mateo 12.9-14; Lucas 6.6-11)*

<sup>1</sup> Neicha Jesús nubiana jadhitati jude ete su. Dapia piada deja mechhui anina. <sup>2</sup> Piada piada dapia Jesús cuadhiji cuana netitaina ahua Jesús ja janahua tsine su deja esaisiameta ahua mahue eba puji. Ahua daja Jesús ja deja esaisiameta su, da su tuneda Jesús etuaquisata. <sup>3</sup> Daja mecuana sa piba puana biame, Jesús ja deja mechhui uja cuatsasiatana:

—Pueque upia. Netianaque ecuanaju duju su.

<sup>4</sup> Da su Jesús ja dapia yanita ebaji cuana uja quisabatana:

—¿Ai ni da su saida ya puji janahua tsine su? ¿Ahua saida janahua tsine su ai saida cuana ya puji? ¿Ahua ai madhada cuana ya puji? ¿Ahua saida janahua tsine su quebata d'ejí su ya puji? ¿Ahua pamanu ja puji? Mepibaenique. ¿Ai ni saida ya puji janahua tsine su?

Beju pamapa dapia yanita cuana mitanatana. Cuaja jeutsu taji mahue batana huecuana. <sup>5</sup> Jesús ja chamapebarereatana huecuana pibapiba, duinini neje, tuna sa muesumu cuana tadada ba putsu. Da su Jesús ja deja mechehui cuatsasiatana:

—Piraraque mique ebai.

Beju deja ja mesa ebai piraratana. Mesa eme beju saida puibana. <sup>6</sup> Fariseo cuana beju daja ba putsu, tipeida cuinanatana. Echua puji Herodes sa deja cuana neje jadhitatitana huecuana. Tuneda cama cuaja Jesús emanuame puji jaquisatitana.

*Dueji cristiano cuana ja Jesús tije atana*

<sup>7</sup> Da su beju Jesús bai su putiana mesa discípulo cuana neje. Dueji cristiano cuana tu tije putitana. <sup>8</sup> Galilea, Judea, Idumea yahua, Jerusalén ejude netia puetana huecuana. Jordán ena chu bene, ejude detse banime Tiro, Sidón jenetia di puetana huecuana. Jesús ja ai nimetiuda cuana yatani shanapatana huecuana su, tu peje su puetana eba puji. <sup>9</sup> Cristiano cuana dueji putsu, Jesús ja mesa discípulo cuana cuatsasiatana canoa paduseta huecuana dapia enubi puji. <sup>10</sup> Jesús ja jucuada cristiano cuana saisiametana putsu, pamapa nedaji cuana jadhitatitana tu peje su. Janunununuati huecuana Jesús ed'apaba puji. Da putsu, Jesús canoa su nubiana. <sup>11</sup> Einid'u madhadaji cuana ja di Jesús chamatana su, tipeida tu butse su sanatana huecuana. Uja tsiatsiatana huecuana:

—Mida da Diusu sa Ebacua.

<sup>12</sup> Da su Jesús ja einid'u madhada cuana jubida cuatsasiatana uja:

—Be daja cristiano cuana quisaji.

*Jesús ja piada tunca beta ejaitiana discípulo cuana dharetana*

*(Mateo 10.1-4; Lucas 6.12-16)*

<sup>13</sup> Da su beju Jesús putiana murucu aida su. Tsua putsu, mesa dharejiji deja cuana ihuatana tu peje su. <sup>14</sup> Beju piada tunca beta ejaitiana deja cuana dharetana. Huaratiatana huecuana tu ebuqueta huecuana puji, mesa quisa saida cuana quisaquisa paputita puji. <sup>15</sup> Tucheda tiatana huecuana einid'u madhada cuana cristiano cuana peje jenetia ejusiacuina puji. <sup>16-19</sup> Uja banimeta huecuana:

Simón. Jesús ja tueda Pedro ebani tiatana.

Jacobo. Juan sa edue. Tata Zebedeo sa ebacua.

Juan. Jacobo sa edue. Tata Zebedeo sa ebacua. Jesús ja tuatseda Tiri esitu ebani tiatana.

Andrés.

Felipe.

Bartolomé.

Mateo.

Tomás.

Jacobo. Alfeo sa ebacua.

Tadeo.

Simón. Tueda da cananista partido jenetia.

Judas Iscariote. Tueda da Jesús menajataiji.

*Jesús sa familia cuana ja tueda dusuja adhaatana tusa ete su*

*(Mateo 12.22-32; Lucas 11.14-23; 12.10)*

<sup>20</sup> Da su beju Jesús pia ete su putiana ediadia puji. Neicha beju cristiano cuana dueji jadhitatitana. Da putsu, Jesús, mesa discípulo cuana neje cuaja diadia taji mahue jabatiana.

<sup>21</sup> Mesa edue cuana ja shanapa putsu, putitana huecuana tu yani su da jenetia mecuana sa ete su Jesús edusu puji. Daja dusuja adhaatana huecuana, “Jesús beju chuataitana-jiji”, cristiano cuana eputani putsu.

*Jacuatsasiati ebuetsuaji cuana Jesús madhabatana*

<sup>22</sup> Beju jacuatsasiati ebuetsuaji cuana Jerusalén ejude jenetia dapia anitaina. Tuneda di Jesús madhabatana. Uja atana huecuana:

—Ye Jesús da Ishahuaji. Pamapa mesa ai nimetiuda yatani cuana beju Ishahua sa tucheda neje yatani. Einid'u madhada cuana ejusiacuinatani Ishahua sa tucheda neje.

Daja Jesús madhabatana huecuana.

<sup>23</sup> Da su Jesús ja tu naja su ihuatana huecuana. Bahue quisa cuana neje quisapirutana huecuana uja:

—¿Ai Ishahua tu mehua jajusiacuinati cua bata? <sup>24</sup> Ahua quebata huaraji aida sa cristiano cuana esajasajata su, ahua tuneda cama eichetita su, beju tueda huaraji aida sa tucheda etaitanapeyu. <sup>25</sup> Daja huecha quebata familia edue cama eichetita su, tueda familia da etaitanape. <sup>26</sup> Daja huecha ahua Ishahua ja quitaita mesa einid'u madhada cuana jusiata cua su, mesa tucheda etaitanape. Aimue mesa einid'u madhada quitaita ejusiata mahue. Ahua daja yata su, tueda quitaita emajaitiani pu cua nime.

<sup>27</sup> ‘Daja huecha aidhe deja tucheda sa ete su nubija tsi epu puji, equene deja tucheda risi taji. Deja risi putsu, da su etse tsi pu cua.

<sup>28</sup> ‘Meid'abaenique. Yama micuana jubida equisainia, ai jucha papu biame cristiano cuana ja yatani, Diusu ja perdonata cua. Tu neje madhada hue emimitani cuana perdonata cua.

<sup>29</sup> Daja biame, quebata Espíritu Santo neje madhada hue emimi su, tueda aimue Diusu ja eperdonata mahue.

<sup>30</sup> Tuneda da, “Jesús da Ishahuaji”, putana putsu, Jesús ja daja jubida quisatana huecuana.

*Jesús sa cuara, edue cuana neje tu yani su putiana*  
(Mateo 12.46-50; Lucas 8.19-21)

<sup>31</sup> Da su beju Jesús sa cuara, edue cuana cuinatana. Ete etsequeini su netisenatana huecuana. Jesús ete etsequeini su pacuinana puji quisametana huecuana. <sup>32</sup> Beju cristiano cuana Jesús pehue je ete dume su anitaina. Uja Jesús quisatana huecuana:

—Mique cuara, edue cuana etsequeini su enetita. Beju echacutani huecuana mi.

<sup>33</sup> Da su Jesús ja quisatana huecuana uja:

—Yama micuana equisa aidhe quema cuara, edue cuana.

<sup>34</sup> Mesa discípulo cuana mehuitu putsu, uja quisatana huecuana:

—Ye cuana da quema cuara, edue cuana pu cua nime.

<sup>35</sup> Quebata cuana ja Diusu sa tsada ai cuana yatani, tuneda da quema cuara edue cuana pu cua nime.

## 4

*Deja ejaja huararaji sa quisa*  
(Mateo 13.1-9; Lucas 8.4-8)

<sup>1</sup> Neicha Jesús ja cristiano cuana buetsuapirutana bai maje su. Tu peje su dueji cristiano cuana jadhitapirutitana putsu, canoa aida su nubiana. Dapia canoa dume su aniuteana. Cristiano cuana bai maje su anititana. <sup>2</sup> Da su Jesús ja bahue quisa cuana neje buetsuapirutana huecuana uja:

<sup>3</sup> —Meid'abaque ema. Piada deja putiana ejaja cuana ehuararati puji. <sup>4</sup> Ehuararatani cama, piada piada ejaja cuana edid'i je dajajatana. D'ia janana cuana pue putsu, pamapa ejaja cuana diapetana. <sup>5</sup> Pia ejaja cuana tumuji med'i pamuda mahue su dajajatana. Beju tipeida huid'atana. <sup>6</sup> Med i pamuda mahue putsu, beju saratana huid'atana cuana, id'eti sinada puana putsu. <sup>7</sup> Pia ejaja cuana junu aquid'aji cuana duju su dajajatana. Beju murutana cuana junu quid'aji cuana ja manuametana, babubabuatana putsu. Jaja mahue putana. <sup>8</sup> Pia ejaja cuana mu med'i saida su dajajatana. Saida murutana. Dueji ejaja putana. Piada piada equi cuana da quimisha tunca ejaja putana. Pia cuana sucuta tunca ejaja putana. Pia cuana cien ejaja putana. Daja jajucuatitana ejaja cuana.

<sup>9</sup> Daja Jesús ja buetsuapetana huecuana. Buetsuape putsu, uja quisatana huecuana:

—Ahua quebata id'ajararaji su, meid'abaque.

*¿Jucuaja bahue quisa neje Jesús ja cristiano cuana ebuetsu-  
atani?*

(Mateo 13.10-17; Lucas 8.9-10)

<sup>10</sup> Da su cristiano cuana putitaibana su, Jesús sa piada tunca beta ejaitiana discípulo cuana ja Jesús nariatana pia eid'abaji cuana neje. Uja quisabatana huecuana:

—¿Cuaja jia da tueda bahue quisa cuana epuani?

<sup>11</sup> Da su Jesús ja jeutsutana huecuana uja:

—Diusu ja micuaneda bahui tu ecuatsasiati etsia ai quisa cuana eshanapametani. Aimue pia cuana mu eshanapametani mahue. Diusu ja mesa ai cuana bahue quisa neje bahui ebuetsuatani. <sup>12</sup> Daja Diusu ja yatani huecuana, tuneda ebatani biame, mue ba a cua nime. Eid'abatani huecuana biame, mue shanapa a cua nime. Daja Diusu ja yatani huecuana papibaturucata huecuana mahue puji, tuahueda paperdonata huecuana mahue puji.

*Jesús ja deja ejaja cuana huararaji jepuiti quisa discípulo cuana quisatana*

*(Mateo 13.18-23; Lucas 8.11-15)*

<sup>13</sup> Da su Jesús ja quisabatana huecuana:

—¿Ahua micuaneda ye bahue quisa mue shanapa su, cuaja jia micuaneda pia bahue quisa cuana shanapame a cua?

<sup>14</sup> Tueda deja ja Diusu sa mimi ehuararatani nime. <sup>15</sup> Piada piada ejaja cuana edid'i su dajajatana. Daja nime da Diusu sa quisa eid'abatani cuana. Id'aba putsu, aimue eshanapatani huecuana mahue. Beju Ishahua pua putsu, tueda Diusu sa quisa cuana mecuana sa muesumu su yani emejemitani. <sup>16</sup> Beju pia ejaja cuana dajajatana tumu med'i pamuda mahue su. Daja nime da pia Diusu sa quisa eid'abatani cuana. <sup>17</sup> Tipeida, beidaji neje tueda quisa cuana eid'abatani huecuana. Quejucua tsine hue saida eputani huecuana. Beju ema jepuiti mecuana sa sufri pu taji su, neicha hue equene su puina nime eputaniyu. Da su cuaja d'au pamuda ehuid'atatani cuana emanutani nime, daja tuneda quema quisa saida cuana jenetia enetideratani sufrimiento cuana jepuiti. <sup>18</sup> Beju pia ejaja cuana dajajatana junu quid'aji cuana duju su. Daja nime da pia Diusu sa quisa eid'abatani cuana. <sup>19</sup> Diusu sa quisa cuana eid'abatani huecuana biame, ye mundo sa madhada ai cuana ebia su tsada ebatani huecuana. Chipilu di ebia su tsada ebatani huecuana. Tuneda quitaita ebaseatitani, tueda ai cuana ema ebia sa tsada ba putsu. Cuaja junu quid'aji cuana ja saida emurutani cuana etaitanamepetani nime, daja da je mundo sa ai madhada tueda quema quisa eid'abatani cuana emadhatiatani. <sup>20</sup> Beju pia ejaja cuana mu dajajatana med'i saida su. Daja nime da pia Diusu sa quisa eid'abatani cuana. Butsepi eshanapatani huecuana. Cuaja med'i saida su ejaja cuana ebia su ejucuatitani nime, daja Diusu sa puji ebia su ai mudu saida cuana

yatani huecuana. Ejaja jajucuatitana nime da huecuana. Piada piada cien ejaja putana. Pia sucuta tunca ejaja tunca. Pia quimisha tunca ejaja putana. Daja da mecuana sa Diosu sa puji mudu saida cuana ejucuatitani.

*Hueda jepuiti quisa*  
(Lucas 8.16-18)

<sup>21</sup> Da su Jesús ja quisabatana huecuana:

—¿Ai micuaneda hueda d'iti ducu neje ebiad'utua bata? ¿Ai micuaneda hueda huaracha ema su eicha bata? ¿Aimue jia maida etse huaracha bia su hueda enetiainia mahue?

<sup>22</sup> Pamapa ai rubuajiji cuana batasaida epu. Pamapa ai rubuajiji etsia piba cuana Diosu ja cristiano cuana eshanapameta. <sup>23</sup> Ahua quebata id'ajararaji su, beju paid'abata quema quisa cuana.

<sup>24</sup> Jesús ja daja hue quisainiame atana huecuana:

—Saida meid'abaque. Cuaja micuaneda pia cuana ejuzgainia nime, daja ebia su Diosu ja micuana ejuzgata.

<sup>25</sup> Quebata ja Diosu sa piba shanapaja su, Diosu ja mesa piba cuana ebia su eshanapameenitayu. Quebata ja aimue shanapaja mahue su, Diosu ja tueda aimue ai biame eshanapameta mahue.

*Cuaja ejaja murume epuani quisa*

<sup>26</sup> Neicha hue Jesús ja quisatana huecuana:

—Uja nime da Diosu ecuatsasiati. Deja ja ejaja cuana te su huararatana. <sup>27</sup> Deja etahuiani, enetianani cama, ejaja cuana ehuid'atapurutani. ¿Cuaja jia da ejaja cuana murume eputani? Deja bue mahue. <sup>28</sup> Med'i jenetia da huid'ata putsu, ecuinanapurutani. Da tije mesa equi ecuinanani. <sup>29</sup> Equi tije da mesa eju. Esara su beju, deja ja tipeida eraritani, mesa tiempo cuinana putsu. Daja da Diosu sa mimi cristiano cuana duju su jajucuatime epuani.

*Mostaza ejaja jepuiti quisa*

(Mateo 13.31-32; Lucas 13.18-19)

<sup>30</sup> Jesús ja daja hue quisainiame atana huecuana uja:

—¿Ai nime jia da Diosu ecuatsasiati? ¿Ai bahue quisa cuana neje jia yama micuana quisa cua, micuana ebuetsua puji? <sup>31-32</sup> Diosu ecuatsasiati da mostaza ejaja chidi nime. Tueda ejaja da pamapa pia ejaja cuana ebia su huai chidi biame, bana putsu, beju pamapa pia equi chidi cuana ebia su aida emuruani. Echa aida cuana sa tanana su d'ia janana cuana ejanahuatani. Daja da Diosu ecuatsasiati epupiruani mostaza ejaja nime. Da su beju aida epuani. Equene queju-cua chidi cristiano cuana tu peje su jei eputani biame, da su beju pamapa ejude su aniji cuana jei eputayu.



Daja Jesús ja buetsuatana huecuana.

*¿Ai puji bahue quisa cuana?*

*(Mateo 13.34-35)*

<sup>33</sup> Tueda bahue quisa cuana neje Jesús ja cristiano cuana buetsuatana. Diusu sa mimi buetsuatana huecuana bahue quisa cuana neje. Cristiano cuana que tupu tuna eshanapata teje Jesús ja buetsuatana huecuana. Bahue quisa cuana neje bahui buetsuatana huecuana. <sup>34</sup> Mesa discípulo cuana mu cristiano cuana aimue su tusa quisa cuana id'abata saida mimi cuana neje shanapametana. Aimue bahue quisa neje bahui buetsuatana huecuana mahue.

*Jesús ja beni mitanametana*

*(Mateo 8.23-27; Lucas 8.22-25)*

<sup>35</sup> Beju dhidha puana su, Jesús ja discípulo cuana uja atana: —Meanipetutija chu maje.

<sup>36</sup> Da su cristiano cuana ichajusia putsu, Jesús mesa discípulo cuana neje canoa dume su nubiana. Pia canoa cuana dapia saina. <sup>37</sup> Tuna yanipetusa cama, beni ebia su jubida pupiruana. Ena putsuapiruana beju. Canoa dume su nubipiruana. Ena enubiani putsu, canoa sejepiruana. Beju nubicueana. <sup>38</sup> Jesús mu tahuisaina canoa tiani su. Mesa echua beju echua pahuaji bia su saina. Da su discípulo cuana ja tueda id'edeatana. Jubida Jesús quisatana huecuana:

—¡Echua Puji, canoa enubiani beju! Ahua ecuaneda huidi cua su, ¿aimue jia mique ai biame piba yani mahue?

<sup>39</sup> Beju Jesús id'ecuina putsu, beni d'ayatana. Bai cuatsasiatana uja:

—¡Mitanaque!

Da hora su beni netitiana. Bai mitanana. Pamapa beju mitanasaisiana. <sup>40</sup> Da su Jesús ja quisabatana huecuana:

—¿Cuaja su micuaneda iyuame epuani? ¿Aimue jia maida micuaneda Diusu peje su enimetucheatiani mahue?

<sup>41</sup> Tuneda beju ebia su rubutanatana putsu, jaquisatitana huecuana uja:

—¿Ai deja jia ye? Beni ja biame tueda eid'abatani. Bai ja di tusa jacuatsasiati eiyubatani.

## 5

*Deja einid'u madhadaji*

*(Mateo 8.28-34; Lucas 8.26-39)*

<sup>1</sup> Da su beju bai chu maje satsuatana huecuana. Tueda yahua da banime Gadara. <sup>2</sup> Jesús canoa jenetia cuinanana cama, piada deja ja tsutana. Tueda deja panteo jenetia cuinanana. Tueda einid'u madhadaji puina. <sup>3</sup> Sepulcro cuana duju su anina. Aimue aiya biame tueda cuaja risi taji mahue

batana. <sup>4</sup> Quejucua nuati biame beju mesa ebai detse cadena neje risitaina huecuana. Mesa ehuatse detse di piama sepo su tamitaina huecuana. Beju tuahueda cadena tibitaina. Piama sepo beju ped'uped'uataina. Mue aidhe biame anina mahue tu nime tuchedame tu emitaname puji. <sup>5</sup> Tsine, dhidha tueda jubida jejeina. Panteo, emata cuana su jubida jejeina. Tu mehua tumu neje equita jasiquiti bahue puina. <sup>6</sup> Beju Jesús uqueda jenetia batana putsu, Jesús peje su jududutiana. Jesús butse su sanana. <sup>7-8</sup> Da su einid'u madhada ja tsiatsiana uja:

—Mida da Diosu sa Ebacua. ¿Ai mique ema neje yani? Be ema castigo su beituji, yama mi Diosu sa ebani neje jubida ebajainia.

Daja einid'u madhada ja Jesús atana, Jesús ja tueda, “Mesi-aque ye deja”, atana putsu.

<sup>9</sup> Da su Jesús ja einid'u madhada quisabatana uja:

—¿Ai ni mi banime?

Tuahueda jeutsutana:

—Quema ebani da Legión, ecuanaju dueji putsu.

<sup>10</sup> Da su tuahueda Jesús jubida bajatana:

—Be beituji ecuanaju ye yahua jenetia.

<sup>11</sup> Chuadera beju jucuada cuchi cuana anitaina. Tueda cuchi cuana diadianiunetitaina murucu bia su. <sup>12</sup> Da su einid'u madhada cuana ja jubida bajatana Jesús:

—Beituque ecuanaju cuchi cuana su. D'eji tiaque ecuanaju cuchi cuana sa equita dume su enubi puji.

<sup>13</sup> Da su beju Jesús ja einid'u madhada cuana d'eji tiatana su, cuinanatana huecuana deja peje jenetia. Beju nubitana huecuana cuchi cuana sa equita dume su. Tueda cuchi cuana beta mil pucue putaina. Da su cuchi cuana jududutana. Bai equehuehueji butsepi je dajajautetana. Pamapa nubitana bai su. Beju huidipetana cuchi cuana.

<sup>14</sup> Da su cuchi quinaji cuana jududutana ejude, te cuana je aniji cristiano cuana equisati puji. Pamapa cuaja ai puana quisatana huecuana. Beju cristiano cuana ja tueda ai cuana id'abatana su, putitana huecuana eba puji. <sup>15</sup> Jesús yani su cuinati putsu, deja einid'u madhadaji puina yani batana huecuana. Tueda saida, jajud'uti yani batana huecuana. Mesa piba beju butsepi puina. Einid'u madhadaji mahue beju batana huecuana. Daja ba putsu, rubutanatana huecuana. <sup>16</sup> Beju tueda ai cuana baji cuana ja quisatana huecuana pamapa ai cuaja Jesús ja atana. Deja einid'u madhadaji, cuchi cuana jepuiti beju quisatana huecuana. <sup>17</sup> Da su ejude, te cuana jenetia cuana ja jubida Jesús bajapirutana tuna sa yahua jenetia papuenitiyu puji.

18 Da su beju Jesús canoa dume su enubiani cama, deja saisijiji ja uja bajatana Jesús:

—Dusuque ema. Mi neje putija ema.

19 Beju Jesús sa tsada mahue puana. Cuatsasiatana deja uja:

—Putiyuque mique ete su, mique edue cuana peje su. Quisatiyuque cuaja yama miqueda puji aitia. Cuaja mi yama ibunebame aitia mique edue cuana quisatiyuque.

20 Da putsu beju, deja putibana. Tueda yahua su aniji cuana quisapirutana beju. Dapia tueda yahua su piada tunca ejude cuana anina. Pamapa tueda ejude cuana je cuaja Echua Puji Jesucristo ja tuseda puji atana quisa pupiruana. Da su cristiano cuana id'aba putsu, nimetiunetitana huecuana beju.

*Jesús ja Jairo sa ebaquepuna saisiametana. Epuna nedaji ja Jesús sa ejud'uji d'apabatana*

*(Mateo 9.18-26; Lucas 8.40-56)*

21 Jesús beju bai u maje jasiapatibana canoa su. Tu esat-suani cama, dueji cristiano cuana ja tu peje su jadhitatitana.

22 Piada deja ja Jesús nariatana dapia bai maje su. Tueda da Jairo banime puina. Tueda da echua puji puina judío cuana sa jadhitati jude ete su. Tuahueda Jesús ba putsu, tu butse su turusatiana. 23 Jubida Jesús bajatana uja:

—Quema ebaquepuna chidi emanu piba esa beju. Pueque. Ichatique mique eme tu bia su pasaisi puji.

24 Da su Jesús tu neje putiana ebaquepuna nedaji butse esa su. Dueji cristiano cuana di tu neje putitana. Jesús naja je janununuati putitana huecuana. 25 Beju tuna duju su piada epuna nedaji puniunetina. Tueda epuna sa piada tunca beta ejaitiana mara mesa ami riji puja mahue puana. 26 Jucuada jaiduenetiji cuana ja ebia su hue ametana. Epuna ja pamapa mesa chipilu neje esaisi puji chujetiadhaatana huecuana. 27-28 Cha ebia su hue puana. Tuahueda Jesús ja ai atana cuana shanapataina putsu, uja japibatiana: “Ahua mesa ejud'uji dhucuana yama d'apaba cua su, saisi cua ema.” Da su Jesús etibeini bene nariatana. Tusa ejud'uji d'apabatana. 29 Da hora su mesa ami riji puana. Epuna jajinebatiana mesa equita beju saida. 30 Epuna ja ejud'uji d'apabatana su, Jesús aidhe saisitia tu d'apaba putsu, jajinebatiana. Da putsu, jababarereatiana cristiano cuana duju su. Uja quisabatana huecuana:

—¿Aiya da quema ejud'uji d'apabaitia?

31 Da su mesa discípulo cuana ja jeutsutana:

—Beju miada ebainia, jucuada ja mi ed'apabatani. ¿Jucuaja su mida daja equisabatiani?

<sup>32</sup> Jesús jababarereatiana aiya tu d'apabatana eba puji.  
<sup>33</sup> Jesús ja ebatani ba putsu, epuna riariapiruana. Ebia su iyuame puana. Da su epuna ja Jesús naria putsu, tu butse su turusatiana. Uja atana Jesús:

—Yama mida d'apabaitia.

<sup>34</sup> Da su Jesús ja epuna quisatana:

—Epuna chidi, ema peje su mi jei puitia putsu, beju mi saisitia. Puchiditiyuque. Ye neda ja aimue mi yata mahue.

<sup>35</sup> Daja Jesús emimiani cama, piada piada cristiano cuana Jairo sa ete jenetia cuinanatana. Uja quisatana huecuana Jairo:

—Mique ebaquepuna beju manuitia. ¿Ai puji detse Echua Puji yanacane puti cua?

<sup>36</sup> Jesús eid'abainia mue bid'u puana. Uja Jairo atana:

—Be iyuame puji. Ema peje su bahui janimetuheatique su, mique ebaquepuna esaisi.

<sup>37</sup> Da su quimisha discípulo cuana bahui dusutana Jairo sa ete su. Pedro, Juan, Jacobo dusutana. Juan da Jacobo sa d'au puina. <sup>38</sup> Jairo sa ete su cuinati putsu, Jesús ja jucuada cristiano cuana enetita batana. Jubida japadarititana huecuana batana. <sup>39</sup> Jesús ete su nubi putsu, quisabatana huecuana uja:

—¿Cuaja su da micuaneda daja epadaritiani? Epuneje mu aimue emanu mahue. Tueda mu etahuisa hue.

<sup>40</sup> Daja Jesús emimiani su, id'ebatana huecuana. Da su Jesús ja jusiacuinatana huecuana etseque su. Jusiacuina putsu, epuneje esa su nubiana. Epuneje sa tata, cuara tu neje nubiana. Quimisha discípulo cuana di nubitana. <sup>41</sup> Da su Jesús ja epuneje sa eme ina putsu, uja atana:

—Epuneje chidi, yama mi netianaque yainia.

<sup>42</sup> Da hora su beju epuneje netianana. Beju asepiruana. Tueda da piada tunca beta ejaitiana maraji puina. Pamapa echamatitaneti cuana ba putsu, ebia su nimetiunetitana huecuana. <sup>43</sup> Jesús ja jubida cuatsasiatana huecuana:

—Be mequisaji aidhe biame ai cuaja puitia cuana. Memihuaque epuneje chidi.

## 6

*Jesús mesa ejude su jasiapatibana*  
*(Mateo 13.53-58; Lucas 4.16-30)*

<sup>1</sup> Da su beju Jesús tueda ete jenetia putibana. Mesa ejude su jasiapatibana. Mesa discípulo cuana ja buquetana. <sup>2</sup> Beju janahua tsine putsu, Jesús jadhitati jude ete su putiana. Dapia buetsuapirutana cristiano cuana. Tuneda Jesús sa quisa

cuana id'aba putsu, nimetiunetitana huecuana. Jaquisabatitana huecuana uja:

—¿Que jenetia jia da ye deja tueda ai cuana jabuetsuatiana? ¿Aiya jia da tueda tueda ai cuana buetsuatana? ¿Cuaja tueda ai nimetiuda cuana jabuetsuatime puana? <sup>3</sup> ¿Aimue jia maida tueda carpintero mahue? ¿Aimue jia maida tueda María sa ebacua mahue? ¿Aimue jia maida tusa d'au cuana da Jacobo, José, Juda, Simón eputani mahue? ¿Aimue jia maida mesa dudu cuana upia ejude su yanita mahue?

Beju daja mimitana huecuana Jesús jepuiti. Aimue tu peje su jei puja mahue putana huecuana. <sup>4</sup> Da su Jesús ja atana huecuana uja:

—Diusu sa profeta sa ejude quitaita su aniji cristiano cuana ja aimue tueda saida ebatani mahue. Mesa familia quitaita cuana ja di aimue tueda saida ebatani mahue. Pia ejude su aniji cuana ja bahui profeta saida ebatani.

<sup>5</sup> Tu peje su jei puja mahue putana putsu, Jesús ja dapia mesa ejude su aimue nimetiuda ai cuana cuaja a taji mahue batana. Ucuca chidi hue nedaji saisiametana, eme detse tuna bia su huana putsu. <sup>6</sup> Jesús ja nimetiubatana huecuana, tu peje su jei puja mahue eputani ba putsu. Da putsu, pamapa pia ejude nari cuana je bahui quisaquisa puniunetiana.

*Jesús ja piada tunca beta ejaitiana discípulo cuana beitutana (Mateo 10.5-15; Lucas 9.1-6)*

<sup>7</sup> Da su beju Jesús ja mesa piada tunca beta ejaitiana discípulo cuana ihuatana tu peje su. Beta beta beitutana huecuana. Huaratiatana huecuana einid'u madhada cuana cristiano cuana peje jenetia pajusiacuinata huecuana puji. <sup>8</sup> Jubida quisatana huecuana uja:

—Pamapa su medusutique piada huara bahui yase puji. Be medusutiji pan, maricu, chipilu cuana. <sup>9</sup> Pulucu mechatique. Piada ejud'uji cama bahui medusutique.

<sup>10</sup> Ahua quebata ete su micuana enubiti su, dapia bahui meanique, ejude su yani tupu. Tueda ete su bahui micuana sa ani taji ejude jenetia ecuinana teje. <sup>11</sup> Ahua quebata ejude su aniji cristiano cuana ja aimue micuana saida ebatsuta mahue su, tueda ejude jenetia mecuinanaque. Cuinana putsu, metaraque tueda ejude sa med'i micuana sa pulucu jenetia Diusu tuna neje eduininiani pashanapata huecuana puji. Beju Diusu ja tuneda Sodoma, Gomorra ejude detse su aniji cuana ebia su ecastigatayu, castigo tsine epue su.

<sup>12</sup> Da su putitana huecuana. Quisaquisa pupirutana huecuana cristiano cuana Diusu peje su papibaturucatita puji, jucha cuana paichaderata huecuana puji. <sup>13</sup> Discípulo cuana ja jucuada einid'u madhada cuana cristiano cuana peje

jenetia jusiacuinatana. Jucuada nedaji cuana saisiametana huecuana. Aceite neje echua su papi putsu, nedaji cuana saisiametana huecuana.

*Echua puji Herodes Antipas ja cristiano cuana Jesús jepuiti emimitani id'abatana*  
(Mateo 14.1-12; Lucas 9.7-9)

<sup>14</sup> Da tiempo su pamapa cristiano cuana ja Jesús shanapatana. Tu jepuiti mimitana huecuana. Beju echua puji Herodes Antipas ja Jesús jepuiti cristiano cuana emimitani id'abatana. Piada piada cristiano cuana uja putaina:

—Juan Bautista beju eid'e. Manujiji cuana duju jenetia netianaibana putsu, nimetiuda ai cuana yatani.

<sup>15</sup> Pia cuana mu uja putaina:

—Tueda da profeta Elías.

Pia cuana di uja putaina:

—Tueda da Diosu sa profeta. Tueda da biahua tiempo profeta chenu cuana nime.

<sup>16</sup> Beju Herodes Antipas ja tueda ai cuana id'aba putsu, uja puana:

—Ye da Juan Bautista id'eyujiji. Yama tueda chuarijiana biame, jiahue eid'e beju.

*Cuaja Herodes Antipas ja Juan manuameme atana*

<sup>17</sup> Jiahue pad'i hue Herodes Antipas ja inametana Juan eteriichanubiame puji. Herodías sa tsada jepuiti, teriichanubiametana Juan. Herodes Antipas sa edue Felipe banime puina. Herodías da Felipe sa ehuan puina. Jiahue mu beju mahue. Echua puji Herodes Antipas tu neje jahuanetija puana putsu, Felipe peje jenetia mejemitana. <sup>18</sup> Da tiempo da Juan eid'e hue puina putsu, uja quisatana Herodes Antipas:

—Be Herodías mique ehuan nime dusuji, mesa yahue Felipe eid'e tupu.

<sup>19</sup> Da putsu, Herodías ja Juan dujubatana. Manuameja atana Juan. Daja biame, cuaja manuame taji mahue batana. <sup>20</sup> Juan da Diosu sa deja butsepi putsu, Herodes Antipas ja tueda iyubatana. Da putsu, manuameja mahue atana Juan. Juan quisaquisa puina su, Herodes Antipas ja id'abatana. Juan ja quisaquisa neje Herodes Antipas ebia su pibapibametaina. Daja biame, Herodes Antipas sa tsada puina Juan eid'aba puji.

<sup>21</sup> Beju Herodes Antipas sa ebani tsine cuinana su, mesa eshanapa chipiluji, soldado sa echua puji, huaraji aida cuana Galilea yahua jenetia ihuatana. <sup>22</sup> Da su beju Herodías sa ebaquepuna pamapa ihuajiji cuana butse su tiritiriana. Tu mehua tiritiri putsu, pamapa ihuajiji cuana beidaji ametana. Da putsu, echua puji Herodes Antipas ja epuneje uja atana:

—Bajaque ema ai papu mique tsada epuani. Beju yama mi etia.

<sup>23</sup> Diusu bahue pu putsu, epuneje uja atana:

—Miada ai ema ebajainia yama mi etia. Quema yahua edusete teje mi etia.

<sup>24</sup> Da su epuneje cuinana putsu, mesa cuara peje su tipeida putiana uja equisaba puji:

—¿Ai ni da yama baja cua?

Da su beju Herodías ja pibatana cuaja emanuame Juan puji. Uja jeutsutana epuneje:

—Juan Bautista sa echua bajatique.

<sup>25</sup> Da su epuneje echua puji Herodes Antipas peje su tipeida jasiapatiana. Uja atana beju:

—Jiahue quita hue tiaque ema Juan Bautista sa echua, dhepe su icha putsu.

<sup>26</sup> Da su echua puji Herodes Antipas ebia su jatacuamadhatiana. Ihuajiji cuana butse su Diusu bahue puana putsu, tia taji mesa puana. <sup>27</sup> Da hora su Herodes Antipas ja piada soldado ihuatana. Juan peje su beitutana tusa echua eduseta puji. <sup>28</sup> Soldado Juan peje su cuinati putsu, chuarijitana Juan. Daja a putsu, dusutana echua dhepe su. Epuneje menajatiatana. Inatsu putsu, epuneje ja echua mesa cuara tiaderatana.

<sup>29</sup> Juan sa discípulo cuana id'aba putsu, beju putitana Herodes Antipas peje su Juan sa equita ebajati puji. Da su tusa equita dusu putsu, papatana huecuana.

*Pishica mil deja cuana Jesús ja mihuatana  
(Mateo 14.13-21; Lucas 9.10-17; Juan 6.1-14)*

<sup>30</sup> Da su beju discípulo cuana jasiapatibana Jesús peje su. Cuaja ai buetsuatana, ai atana cuana Jesús quisatana huecuana. <sup>31</sup> Da putsu, Jesús ja discípulo cuana uja atana:

—Meputija cristiano cuana yani mahue su huai chidi cama ejanahua puji.

Jucuada cristiano cuana siapati eputani putsu, aimue mecuana sa d'eji ediadia puji biame. Da su aidhe cuana mue ani su putitana huecuana tuna mehua yani puji. <sup>32</sup> Canoa aida su nubi putsu, pudhaatitana huecuana cristiano cuana mue ani su. <sup>33</sup> Cristiano cuana ja tuna eputahu beju batana putsu, Jesús shanapaenitana huecuana. Pamapa ejude cuana jenetia cristiano cuana jududutana quepia Jesús epuhu eti jude su. Beju equene cuinatitana huecuana. <sup>34</sup> Jesús ja canoa jenetia cuinana putsu, dueji cristiano cuana tu id'ua eputani batana. Jesús ja bataichenu batana huecuana, huisha cuana

equinaji mahue nime huecuana putsu. Da su buetsuapirutana huecuana. <sup>35</sup> Beju tsinecua su, mesa discípulo cuana ja nariatana. Uja Jesús quisatana huecuana:

—Beju da tsinecua. Aimue ete cuana u je. <sup>36</sup> Beituque ye cristiano cuana pia ejude, te cuana je, ai chidi papu biame pachacutita huecuana puji.

<sup>37</sup> Da su Jesús ja uja jeutsutana huecuana:

—Micuaneda hue memihuaque huecuana.

Da su uja Jesús quisabatana huecuana:

—¿Ai ecuanaju pamapa sa puji beta cien tsine mudu echuje neje pan tupu baja cua bata?

<sup>38</sup> Da su Jesús ja quisabatana huecuana:

—¿Quejucua pan chidi cuana micuana sa yani? Mebatique.

Da su putitana huecuana eba puji. Beju jasiapati putsu, Jesús quisatana huecuana:

—Pishica pan chidi cuana, beta se chidi detse bahui yani beju.

<sup>39</sup> Da su Jesús ja cuatsasiatana discípulo cuana ja cristiano cuana dujiduji nutsa bia su paaniutemeta puji. <sup>40</sup> Da su beju dujiduji aniutetana huecuana pamapa. Pia cuana cien putana, pia cuana pishica tunca putana. <sup>41</sup> Jesús ja pan cuana, se detse chidi ina putsu, buepa huabata jachamatiana. Diusulupai Diusu atana. Diusulupai ape putsu, pan cuana, se detse chidi ped'uped'uatana. Mesa discípulo cuana menajatiatana cristiano cuana paberereatiata huecuana puji. Discípulo cuana ja cristiano cuana eberebereatiatani cama, pan, se ped'u cuana jajucuatitana. <sup>42</sup> Pamapa cristiano cuana beju diadiatana tupu. <sup>43</sup> Beju pan, se puchu puana. Da su eped'u cuana chudutana huecuana. Piada tunca beta ejaitiana d'iti cuana sejeatana huecuana puchu cuana neje. <sup>44</sup> Beju diadiatana cuana da pishica mil deja putaina. Jucuada epuna, yanana cuana di diadiatana tupu.

*Jesús bai bia je aseana*

*(Mateo 14.22-27; Juan 6.16-21)*

<sup>45</sup> Da su beju Jesús ja mesa discípulo cuana nubiametana canoa aida su Betsaida ejude su paanipetutita huecuana puji, tu equene pacuinatita huecuana puji. Tuna yanipetutahu cama, Jesús ja cristiano cuana tuna sa ete cuana je beitupeitaibana. <sup>46</sup> Beitupe putsu, Jesús murucu aida bia su tsuatiana Tata Diusu emitsu puji. <sup>47</sup> Beju apuda puana su, discípulo cuana canoa su bai dusetete su anipetutasaina. Jesús mu tu mehua yahua su netina. <sup>48</sup> Da su Jesús ja batana huecuana canoa su yanita bai dusetete su. Beni ja jubida dhapujutana putsu, discípulo cuana cuaja tarutarueni taji mahue, jad'uitijiji Jesús ja batana. Huenahua puana su, Jesús



ja nariatana huecuana, bai bia je aseti putsu. Butsepi jaitiana epu puji pudhaana. <sup>49</sup> Discípulo cuana ja tueda ena bia je ejaitianasa ba putsu, ai enid'u pepe japibatitana huecuana. Beju seniame putsu, tsiatsiapirutana huecuana. <sup>50</sup> Da su Jesús ja jubida mitsutana huecuana uja:

—Menimetuheatique. Ema hue da. Be iyuame mepuji.

<sup>51</sup> Da su Jesús canoa su nubiana. Da hora su beni mitanana. Discípulo cuana ebia su nimetiutana. <sup>52</sup> Mue japibati huecuana cuaja Jesús ja pishica pan, beta se neje dajucua cristiano cuana tupu mihuatana su, tuna sa piba cuana tadada tsuhu putsu.

*Jesús ja nedaji cuana Genesaret yahua su saisiametana*  
(Mateo 14.34-36)

<sup>53</sup> Da su beju anipetu putsu, bai chu maje satsuatitana huecuana. Tueda yahua Genesaret banime puina. Dapia canoa aida risitana huecuana bai queque su. <sup>54</sup> Jesús canoa jenetia ecuinanasa cama, dapia yanita cuana ja tueda shanapatana. <sup>55</sup> Shanapa putsu, jududupirutana huecuana pamapa pia cuana equisati puji. Da su nedaji cuana chahui su dusutana huecuana Jesús peje su. <sup>56</sup> Quepia Jesús ejaitiana su dapia nedaji cuana huanatana huecuana. Quepia yahua d'eji chidi su beju dapia huanatana huecuana. Ahua ejude, te cuana su, que je Jesús putiana je, dapia nedaji cuana huanatana huecuana. Jesús jubida bajatana huecuana aji tusa ejud'uji tihue dhucuana pad'apabata huecuana puji. Da su quebata nedaji cuana ja tusa ejud'uji d'apabatana su, beju saisitana.

## 7

*¿Ai ja cristiano cuana emadhatani?*  
(Mateo 15.1-20)

<sup>1</sup> Beju fariseo, jacuatsasiati ebuetsuaji cuana Jerusalén ejude jenetia puetana Jesús peje su. <sup>2</sup> Discípulo cuana diadiatana jamerucuatiji mahue beju batana huecuana. <sup>3</sup> Tuneda buetsuataina ediadia puji jamerucuatitaji, daja da judío tata chenu cuana sa puiti puidha putsu. <sup>4</sup> Fariseo cuana iruiru jude jenetia jasiapati putsu, equene erucuatitani huecuana ediadia puji. Jamerucuatiji mue su, aimue ediadiatani huecuana mahue. Beju jucuada mecuana sa ai puiti cuana anitaina. Emeji cuana rucuataina huecuana. Jutu cuana di rucuataina huecuana. <sup>5</sup> Da putsu, fariseo, jacuatsasiati ebuetsuaji cuana ja Jesús atana uja:

—Mique discípulo cuana mu jamerucuatitani bue mahue ediadia puji. Cuaja ecuana sa tata chenu cuana sa puiti puidha

nime, aimue yatani huecuana mahue. ¿Cuaja su jia daja ep-  
utani huecuana? ¿Cuaja su jia ediadiatani huecuana jameru-  
cuatiji mahue?

<sup>6</sup> Da su Jesús ja jeutsutana huecuana:

—Micuaneda da bubeta cuana. Profeta Isaías chenu but-  
sepi quisa puidha micuana jepuiti. Uja Tata Diusu ja tueda  
deremetaidha:

Ye cristiano cuana ja ema eiyubatani mimi neje bahui.

Aimue ema ene putsu tuna sa muesumu neje eiyubatani  
huecuana mahue.

<sup>7</sup> ¿Ai puji saida tuna sa ema peje su jamitsutsuati cuana pu  
cua?

Beju tueda da yanacane hue, tuna sa jabuetsuati quitaita  
cuana bahui ebuetsuatani huecuana.

Aimue quema jabuetsuati cuana mu ebuetsuatani huecuana  
mahue.

<sup>8-9</sup> Micuaneda Diusu sa jacuatsasiati cuana ichadera putsu,  
deja sa ai puiti cuana bahui yainia. <sup>10</sup> Moisés chenu uja  
puidha: “Iyubaque mique tata detse. Ahua quebata papu  
mesa tata detse emadhabata su, tueda pamanu.” <sup>11-12</sup> Beju  
daja Moisés chenu buetsuataidha biame, micuaneda mu et-  
sapiainia tusa jabuetsuati saida cuana. Uja micuaneda ebuet-  
suatani: “Quebata papu mesa chipilu Diusu etiata su, beju  
aimue mesa tata, cuara detse chipilu neje tsahua taji mahue,  
pamapa Diusu tiatana putsu.” <sup>13</sup> Daja micuaneda ebuet-  
suainia putsu, Diusu sa jacuatsasiati cuana etaitanameinia.  
Tueda jacuatsasiati cuana ai eni mahue nime micuaneda  
yameinia. Daja nime ebia su jucuada ai madhada cuana di  
micuaneda yainia.

<sup>14</sup> Neicha Jesús ja cristiano cuana ihuatana. Uja quisapiru-  
tana huecuana:

—Meid'abaque ema. <sup>15</sup> Meshanapaenique. Etse ediainia  
cuana ja aimue detse etse madhata cua mahue. Beju etse  
emimiani cuana ja mu ene putsu etse emadhatani. <sup>16</sup> Quebata  
idajararaji su, paidábata.

<sup>17</sup> Da su beju Jesús ja cristiano cuana jusiaicha putsu, ete su  
nubiana discípulo cuana neje. Nubipe putsu, discípulo cuana  
ja Jesús quisabatana uja:

—¿Cuaja epuani mique quisa cuana?

<sup>18-19</sup> Da su Jesús ja jeutsutana huecuana:

—¿A da micuaneda di pia cuana nime aimue eshanapainia  
mahue? Beju pamapa ediatani ai cuana ecuatsa je enu-  
biani putsu, edhe su ecuinahu. Da su beju equita jenetia  
ecuinanani. Aimue detse tueda ai cuana ja deja madhata cua  
mahue.

Jesús ja tueda quisa neje pamapa jana da saida buetsuatana  
huecuana. <sup>20</sup> Daja hue buetsuainiame atana huecuana uja:

—Mimi madhada cuana ja mu ecuatsa jenetia ecuinanani putsu, deja emadhatani, muesumu jenetia ecuinanani putsu. <sup>21-22</sup> Pamapa ai madhada cuana cristiano cuana sa piba jenetia ecuinanani. Tueda piba madhada cuana ja cristiano cuana jucha yametani. Tueda piba madhada ja tsi puji, jamanuametiji, pia sa ebutse neje jaquinatiji, pia sa ai cuana utsatabaji, jabaseatiji, envidia puji, mimi aida, aida jabatiji, saida piba mahueji yametani huecuana. <sup>23</sup> Pamapa tueda madhada ai cuana cristiano cuana sa piba jenetia ecuinanani. Tueda ai cuana ja bahui juchaji yametani cristiano cuana.

*Epuna ja pia yahua jenetia Jesús peje su jei puana*  
(Mateo 15.21-28)

<sup>24</sup> Da su beju Jesús tueda yahua jenetia putiana. Tiro, Sidón detse yahua naja su putiana. Dapia Jesús piada ete su nubiana. Tsada mahue mesa puana aiya pashanapata tu dapia yani. Uba hora quita chidi jarubutija pudhaana.

<sup>25</sup> Piada epuna ja Jesús yani id'abatana. Mesa ebaquepuna chidi einid'u madhadaji puina. Epuna Jesús peje su pue putsu, tu butse su turusatiana. <sup>26</sup> Tueda epuna da judío mahue pia yahua jenetia puina. Beju epuna ja Jesús uja bajatana:

—Jusiacuinaque einid'u madhada quema ebaquepuna peje jenetia.

<sup>27</sup> Da su Jesús ja epuna uja jeutsutana:

—Equene beju ebacua cuana padiadiata tupu. Saida mahue ebacua cuana sa jana mejemi putsu, uchi cuana etia puji. Ema equene pueana judío cuana emebaja puji. Beju judío cuana ja pamapa extranjero cuana uchi nime bame yatani.

<sup>28</sup> Da su epuna ja jeutsutana uja:

—Ehe, Echua Puji, mida ene putsu butsepi emimiani biame, uchi cuana ja di puchu cuana emetse sa misha jenetia yahua su edajajatani cuana ediatani.

<sup>29</sup> Jesús ja epuna sa jajeutsuti id'aba putsu, uja jeutsutana:

—Puchiditiyuque mique ete su. Miada ema saida jeutsutia putsu, mique ebaquepuna beju saisitia. Einid'u madhada beju cuinanaitia tu peje jenetia.

<sup>30</sup> Da su epuna mesa ete su putiyu putsu, ebaquepuna chidi tahui jude su einid'u madhadaji mahue beju batana.

*Jesús ja deja mimi bue mahue, jaid'abati bue mahue saisi-ametana*

<sup>31</sup> Jesús Tiro yahua jenetia putiana. Sidón yahua je jaitianana. Piada tunca ejude cuana je di jaitiana putsu, Galilea bai su cuinatiana. <sup>32</sup> Piada piada cuana ja deja jaid'abati bue mahue dusutana Jesús peje su. Tueda mimi bue

mahue puina. Da su Jesús bajatana huecuana tusa eme deja nedaji bia su pahuanata puji. <sup>33</sup> Da su Jesús ja deja nedaji chuadera dusutana. Mesa emejatsa detse nedaji sa eid'aja detse su nubiametana. Da su emejatsa su equedi icha putsu, nedaji sa yana d'apabatana. <sup>34</sup> Buepa huabata jabatsuati putsu, Jesús janasiatana. Uja quisatana deja:

—¡Jatsequed'iatique!

<sup>35</sup> Da hora su quitaita deja sa eid'aja detse jad'eatiana. Saida beju mimi bahue puibana. <sup>36</sup> Da su Jesús ja dapia aniji cristiano cuana cuatsasiatana be aidhe biame paquisata huecuana puji. Beju jucuada nuati daja jubida cuatsasiatana biame, ebia su quita, cuaja Jesús ja ai cuana atana quisa putana huecuana. <sup>37</sup> Pamapa nimetiunetitana huecuana. Uja jaquisatitana huecuana:

—Tuahueda pamapa ai cuana ebia su saida yatani. Jaid'abati bue mahue cuana biame eid'abametaniyu. Mimi bue mahue cuana di emimiametaniyu.

## 8

### *Jesús ja pushi mil cristiano cuana mihuatana* (Mateo 15.32-39)

<sup>1</sup> Neicha hue beju dueji cristiano cuana jadhitatitana. Ai ediaji mahue anitana huecuana. Da su Jesús ja mesa discípulo cuana ihuatana tu peje su. Uja quisatana huecuana:

<sup>2</sup> —Yama ye cristiano cuana bataichenuda ebainia. Beju quimisha tsine ema neje anitana huecuana. Jiahue aimue mecuana sa ai dia taji ani. <sup>3</sup> Ahua yama tuna sa ete cuana su diadiaji mahue ebeitu huecuana su, nimetaitanata cua huecuana edid'i su, piada piada cuana uqueda jenetia puetana putsu.

<sup>4</sup> Da su discípulo cuana ja uja atana Jesús:

—Ecuanedada d'anita yahua su yani beju. ¿Ai ecuaneda daju-cua cuatajuse cristiano cuana mihua cua bata?

<sup>5</sup> Da su Jesús ja quisabatana huecuana:

—¿Quejucua pan chidi micuana sa yani?

Beju jeutsutana huecuana:

—Siete pan chidi yani.

<sup>6</sup> Da su Jesús ja cristiano cuana cuatsasiatana paaniuteta huecuana yahua bia su puji. Pan chidi cuana ina putsu, diusulupai Tata Diosu atana. Pan cuana ped'uped'ua putsu, discípulo cuana menajatiatan paberereatiata huecuana puji. <sup>7</sup> Tuneseda ucu chidi se cuana di anitaina. Jesús ja neicha diusulupai Tata Diosu a putsu, cuatsasiatana discípulo cuana se cuana paberereatiata huecuana puji. Discípulo cuana ja

cristiano cuana eberereatiatani cama, pan, se ped'u cuana ja-jucuatitana. <sup>8</sup> Beju cristiano cuana diadiatana tupu. Siete d'iti d'ucu eped'u cuana neje sejeatana huecuana. <sup>9</sup> Diadiatana cristiano cuana da pushi mil pucue putaina. Da su beju Jesús ja tuna sa ete cuana su beitutana huecuana. <sup>10</sup> Canoa aida su nubiana mesa discípulo cuana neje. Beju putitana huecuana Dalmanuta yahua su.

*Fariseo cuana ja Jesús bajatana ai nimetiuda paata puji*  
(Mateo 16.1-4; Lucas 12.54-56)

<sup>11</sup> Tueda yahua su da fariseo cuana Jesús peje su puetana. Jubida neje jasatsiapirutitana Jesús neje. Uja bajatana huecuana:

—Ai nimetiuda aque. Bameque ecuanaju, ahua ene Diosu mi neje yani su.

<sup>12</sup> Daja Jesús atana huecuana tu yaba puji. Da su Jesús jubida janasiati putsu, uja puana:

—Jiahue tiempo cristiano cuana ja daja hue bajainiame ema yatani ai nimetiuda cuana. Enei hue yama micuana equisainia, aimue yama ai nimetiuda cuana ya mahue ye cristiano cuana sa puji.

<sup>13</sup> Da su Jesús ja fariseo cuana ichajusia putsu, canoa su nubiana. Bai chu maje putiana.

*Fariseo cuana sa jabuetsuati cuana da levadura nime*  
(Mateo 16.5-12)

<sup>14</sup> Beju discípulo cuana ja jana tupu edusu puji, setatana. Piada pan chidi bahui jadasutitana huecuana canoa su. <sup>15</sup> Da su Jesús ja uja quisatana huecuana:

—Merejatique fariseo cuana, echua puji Herodes Antipas sa levadura neje.

<sup>16</sup> Da su discípulo cama jaquisatitana:

—Mue ecuaneda pan duse aitia putsu jia, Jesús daja epuani.

<sup>17</sup> Jesús shanapatana cuaja jaquisatitana huecuana. Uja quisabatana huecuana:

—¿Cuaja su jia micuaneda cama daja equisatiani? ¿Jucuaja su micuaneda cuaja shanapa taji mahue ebainia? <sup>18</sup> Beju tuaji biame, aimue micuaneda ebainia mahue. Id'ajararaji biame, aimue eid'abainia mahue. ¿Jucuaja su micuaneda pan jepuiti emimiani? ¿Jucuaja su micuaneda epitsatiani, ecuana sa pan ehueitiani su? <sup>19</sup> ¿Ai micuaneda mue piba bata yama pishica pan chidi neje pishica mil deja mihuana? ¿Quejucua d'iti cuana puchu cuana neje micuaneda sejeana?

Da su jeutsutana huecuana:

—Piada tunca beta ejaitiana d'iti cuana sejeana.

<sup>20</sup> Jesús ja daja hue quisabainiame atana huecuana:

—Yama siete pan chidi cuana pushi mil cristiano cuana mihuana su, da tsunu, ¿quejucua d'iti cuana puchu cuana neje micuaneda sejeana?

Da su jeutsutana huecuana:

—Siete d'iti cuana ecuanaju sejeana.

<sup>21</sup> Jesús ja quisabatana huecuana uja:

—Da su, ¿jucuaaja su micuaneda daja japitsatime epuani, ecuanaju sa pan tupu mahue ba putsu? ¿Jucuaaja su detse micuaneda mue shanapa tsuhu a cua? Beju aimue ema pan jepuiti mimitia mahue, micuana yama levadura jepuiti quisaitia su.

*Jesús ja deja padha saisiametana*

<sup>22</sup> Da su cuinatana huecuana Betsaida ejude su. Dapia piada piada cristiano cuana ja deja padha Jesús peje su dusutana. Jubida bajatana huecuana Jesús ja deja padha pad'apabata puji. <sup>23</sup> Jesús ja deja padha sa eme ina putsu, ejude tsahua su huidusutana. Equedi neje papitana deja sa etuabeji su. Mesa eme detse di deja sa etua bia su huanatana. Daja a putsu, Jesús ja deja quisabatana:

—¿A mi jabati cua?

<sup>24</sup> Jachamati putsu, deja ja uja jeutsutana:

—Cuaja jabaeniti taji mahue ema ebatiani. Yama cristiano cuana aqui nime eputaniuneti ebainia.

<sup>25</sup> Neicha hue Jesús ja mesa eme detse deja sa etua bia su huanatana. Da su deja jubida jachamatiana. Beju saisi puana. Pamapa ai cuana saida batana beju. <sup>26</sup> Jesús ja deja tusa ete su beitu putsu, uja quisatana:

—Butsepi mique ete su putiyuque. Be jasiapatiji ejude su.

*Jesús da Diosu sa Jabeituti Deja Pedro ja quisaneti-acuinatana*

*(Mateo 16.13-20; Lucas 9.18-21)*

<sup>27</sup> Dapia yahua su beju piada ejude anina. Tueda ejude da echua puji Filipino sa ejude Cesarea banime. Tueda ejude tsahua je pia ejude huai chidi cuana anitaina. Dapia Jesús putiana mesa discípulo cuana neje. Tuneda yasetaneti cama, Jesús ja quisabatana huecuana:

—¿Cuaja da cristiano cuana ema jepuiti eputani? ¿Aidhe da ema eputani huecuana?

<sup>28</sup> Da su tuneda uja jeutsutana:

—Piada piada mida da Juan Bautista id'eyujiji eputani. Pia cuana mida da Elías chenu eputani. Pia cuana mida pa pia Diosu sa profeta eputani.

<sup>29</sup> Da su Jesús ja quisabatana huecuana:

—¿Cuaja micuaneda quisa epuani? ¿Aidhe ni da ema?

Pedro ja uja Jesús jeutsutana:

—Mida da Cristo. Diusu sa Jabeituti Deja da mida.

<sup>30</sup> Da su Jesús ja cuatsasiatana huecuana:

—Be aidhe biame mequisaji.

*Jesús ja discípulo cuana quisatana cristiano cuana ja tueda emanuameta*

(Mateo 16.21-28; Lucas 9.22-27)

<sup>31</sup> Yasetaneti cama, Jesús ja tu jepuiti uja buetsuapirutana huecuana:

—Ema da Diusu sa Jabeituti Deja. Ebia su sufri quema pu taji. Tata edhi ehuidusuji cuana, sacerdote aida, jacuat-sasiati ebuetsuaji cuana ema tsada mahue ebata. Ema da emanuameta huecuana. Beju quimisha tsine jenetia ema enetianayu.

<sup>32</sup> Jesús ja saida, butsepi quisatana huecuana. Quisapetana huecuana su, Pedro ja Jesús chuadera dusu putsu. Jesús d'ayapirutana. <sup>33</sup> Da su Jesús jababarereati putsu, chamatana huecuana. Pedro uja d'ayatana:

—Ishahua, netideraque ema naja jenetia, aimue mi Diusu sa piba cuana mu emimiani mahue. Deja cuana sa piba bahui mi emimiani.

<sup>34-35</sup> Da su beju Jesús ja mesa discípulo, Cristiano cuana ihuatana tu peje su. Uja quisapirutana huecuana:

—Quebata ja ema tije aja su, pamapa muesumu neje ema tije paata. Ema pamapamesa ai cuana quitaita ebia su tsada pabata. Ema tije paata, manunameja paata biame. <sup>36</sup> ¿Ai puji ni da etse pamapa mundo sa chipilu cuana gana pu cua, etse cuati castigo su eputi biame? <sup>37</sup> ¿Ai etse d'eji su epu puji chujetia cua bata? <sup>38</sup> Quebata da cristiano juchaji cuana butse su ema jepuiti, quema quisa cuana jepuiti di ebidhu su, ya di tu jepuiti ebidhu, ema neicha esiapati su.

## 9

<sup>1</sup> Jesús ja daja hue quisainiame atana huecuana:

—Ene putsu, yama butsepi micuana equisainia, hue enetita piada piada cuana aimue emanuta tsuhu mahue Diusu ecuatsasiati tucheda ecuina ebayu teje.

*Jesús japiatiana*

(Mateo 17.1-13; Lucas 9.28-36)

<sup>2</sup> Beju sucuta tsine jaitianajiji su, Jesús ja Pedro, Jacobo, Juan cuana dusutana murucu aida bia su dapia chujemame paanita huecuana puji. Jesús tuna butse su japiatiana.

<sup>3</sup> Mesa ejud'uji cuarecuare pasapasa puana. Aimue quebata d'acud'acuaji ja biame, daja pasada ata cua mahue. <sup>4</sup> Da su Elías, Moisés chenu detse eid'e bataji puana batana huecuana.

Jesús neje quisaquisa epuani tse batana huecuana. <sup>5</sup> Da su Pedro ja Jesús uja atana:

—Echua Puji, saida ecuaneda upia pamapa su meanija. Quimisha epahuaneti cuana ecuanaju paaiti, ahua mique tsada su. Piada miqueda puji, piada Moisés sa puji, piada Elías sa puji ecuanaju paaiti. <sup>6</sup> Quimisha discípulo da ebia su iyuame putana putsu, Pedro ja daja Jesús quisatana. Cuaja ai biame mimi taji mahue putana huecuana, ebia su iyuame putana putsu. <sup>7</sup> Da hora su judu ja dunutana huecuana. Diusu ja judu jenetia atana huecuana uja:

—Ye da quema ibuneda Ebacua. Tueda bahui meid'abaenique.

<sup>8</sup> Da hora su jababarereati putsu, aimue Moisés, Elías chenu detse batana huecuana mahue. Jesús bahui eneti batana hecuana.

<sup>9</sup> Da su beju murucu jenetia ebutetasa cama, Jesús ja cuat-sasiatana huecuana uja:

—Be aidhe biame mequisaji tsuhu micuaneda baitia ai cuana. Beju ema manujiji cuana duju jenetia enetianayu tsine su chu, quisa mepuque.

<sup>10</sup> Da su beju aimue aidhe biame quisatana huecuana mahue ai cuaja puana cuana. Tuneda murucu jenetia ebutesa cama, jaquisabatitana huecuana uja:

—¿Cueja jia da Jesús sa mimi cuana epuani? ¿Jucuaja su, “Manujiji cuana duju jenetia ema enetianau”, epuani?

<sup>11</sup> Da su beju Jesús uja quisabatana huecuana:

—¿Jucuaja su ni da jacuatsasiati ebuetsuaji cuanaja, “Diusu sa Jabeituti Deja pueji mahue su, Elías chenu sa pue taji”, cristiano cuana ebuetsuatani? Beju mida Diusu sa Jabeituti Deja pueana biame, aimue ecuanaju Elías chenu bana mahue.

<sup>12-13</sup> Da su Jesús ja jeutsutana huecuana:

—Enei hue, piada deja Elías chenu nime Diusu su Jabeituti Deja hui su pue taji, pamapa cristiano cuana ebaseta puji. Yama micuana butsepi equisainia, tueda ema hui su pueana beju. Tueda da Juan Bautista puina. Cristiano cuana ja mu tueda madhada hue a putsu, manuametana huecuana, Daja huecha ya di sufri epu. Cristiano cuana ja ema tsada mahue ba putsu, ema emanuameta huecuana. Daja da epu, cuaja profeta chenu cuana ja deretaidha batame.

*Jesús ja edeahue einid'u madhadaji saisiametana  
(Mateo 17.14-21; Lucas 9.37-43)*

<sup>14</sup> Beju tuneda pia discípulo cuana peje su cuina putsu, dueji cristiano cuana yani batana huecuana. Tuna duju su pia discípulo cuana anitaina batana huecuana. <sup>15</sup> Piada



piada jacuatsasiati ebuetsuaji cuana tuna neje jubida jasat-siatitanetina batana huecuana. Beju cristiano cuana ja Jesús ba putsu, nimetiutana huecuana. Jesús peje su jududutana huecuana tu emitsu puji. <sup>16</sup> Da su Jesús ja discípulo cuana quisabatana:

—¿Ai ni micuana esatsiatineti tuna neje?

<sup>17</sup> Beju piada deja ja cristiano cuana duju jenetia jeutsutana:

—Ebuetsuaji, quema ebacua einid'u madhadaji. Tuahueda quema ebacua mimi bue mahue ametana. Da putsu, mi peje su yama duseitia. <sup>18</sup> Quepia papu quema ebacua tueda einid'u madhada ja einatani putsu, yahua su ejusiautetani. Beju ecuatsa je equedi pura epuani. Etsedhaitiani beju. Mesa equita tadada epuani. Beju mique discípulo cuana yama bajaitia, einid'u madhada quema ebacua peje jenetia paju-siacuinata huecuana puji. Beju cuaja a taji mahue bataitia huecuana.

<sup>19</sup> Da su Jesús ja anititana discípulo cuana d'ayapirutana uja:

—¡Ai! ¿Jucuaja su jia micuaneda jei puji mahue? ¿Que tupu teje jia quema micuana neje ani taji? ¿Que tupu teje jia quema micuana tuchea taji?

<sup>20</sup> Da su dusetana huecuana. Einid'u madhada ja Jesús batana su, edeahue sa equita riatana. Yahua su daja-jametana. Edeahue busiapa pupiruana. Ecuatsa je equedi pura pupiruana. <sup>21</sup> Da su Jesús ja edeahue sa tata quisabatana:

—¿Quejucua tiempo jenetia mique ebacua daja?

Daja ja jeutsutana Jesús:

—Yanana jenetia daja hue. <sup>22</sup> Quejucua nuati biame cuati, ena su jusiautetana einid'u madhada ja emanuame puji. Ahua miada a cua su, ibunebaque ecuanaju. Tsahuaque ecuanaju.

<sup>23</sup> Da su Jesús ja tueda uja quisabatana:

¿Jucuaja su miada ema, “Ahua miada a cua su”, epuani? Quebata Diosu peje su jei epuani su, pamapa ai cuana atasaida tuseda puji epu.

<sup>24</sup> Da su edeahue sa tata tsiatsia neje atana:

—Ema mi peje su jei epuani. Tsahuaque ema ebia su jei ema papu puji.

<sup>25</sup> Jesús ja ebia su cristiano cuana edhitatitani ba putsu, einid'u madhada jubida cuatsasiatana:

—Einid'u madhada id'aja mahue, mimi bue mahue jaatiji, cuinanaque ye edeahue peje jenetia. Be neicha hue nubitiji.

<sup>26</sup> Beju einid'u madhada tsiatsia putsu, jubida neicha edeahue riatana. Daja a putsu, beju mesiataibana. Edeahue beju emanu nime pu huanana. Da putsu da, pamapa enetita

cuana, “Edeahue beju manuitia”, putana. <sup>27</sup> Jesús ja edeahue sa eme ina putsu, netianametaibana.

<sup>28</sup> Da su cristiano cuana putitaibana su, ete su nubiana discípulo cuana neje. Chujemame ete su nubi putsu, Jesús quisabatana huecuana uja:

—¿Jucuaja su ni da ecuanaju einid'u madhada cuaja cuatsasia taji mahue baitia?

<sup>29</sup> Da su Jesús ja jeutsutana huecuana:

—Ahua etse tueda einid'u madhada cuatsasiaja su, equene jubida Diosu baja taji ayuno neje. Da neje bahui etse tueda mu ejusiacuainainia.

*Neicha hue Jesús ja discípulo cuana quisatana cuaja mesa manu epu*

*(Mateo 17.22-23; Lucas 9.43-45)*

<sup>30</sup> Beju da jenetia putitana huecuana. Galilea yahua je jaitianatana huecuana. Jesús ja mesa discípulo cuana buetsuataina putsu, tsada mahue mesa puina cristiano cuana ja eshanapata quepia tuneda yanita. <sup>31</sup> Jesús ja discípulo cuana uja atana:

—Ema da Diosu sa Jabeituti Deja. Ema emenajatiata huecuana deja madhada cuana peje su cuana peje su ema pamanuameta huecuana puji. Beju quimisha tsine jenetia manujiji cuana duju jenetia ema enetianayu.

Daja Jesús ja quisatana huecuana. <sup>32</sup> Tuneda mu cuaja shanapa taji mahue batana Jesús sa mimi cuana. Iyubatana huecuana Jesús equisaba puji cuaja mesa quisa epuani.

*¿Aidhe da ebia su aida quita?*

*(Mateo 18.1-5; Lucas 9.46-48)*

<sup>33</sup> Da su beju cuinatitana huecuana Capernaum ejude su. Ete su beju yani cama, Jesús ja discípulo cuana quisabatana:

—¿Ai ni da micuaneda cama edid'i je jasatsiabetaitia?

<sup>34</sup> Beju cuatsa mahue putana huecuana. Tuna duju su quebata da ebia su aida quita epuani jepuiti jasatsiabetitana huecuana. Jajeutsutija mahue putana huecuana, bidhu putsu. <sup>35</sup> Da su beju Jesús aniuteana. Aniute putsu, ihuatana huecuana tu peje su. Uja quisatana huecuana:

—Quebata micuana duju su aida puja su, equene beju pamapa sa huai chidi, emebajaji pu taji.

<sup>36</sup> Da su tuna duju su piada yanana chidi Jesús ja netianametana. Id'amitana yanana chidi. Daja yanana id'ami putsu, uja quisatana discípulo cuana:

<sup>37</sup> —Quebata ja piada ye yanana nime quema ebani su ebatsuta su, ema ebatsutani pu cua nime beju. Daja huecha quebata ja ema ebatsuta su, Tata Diosu di ebatsutani, tuahueda ema beitutana putsu.

*¿Aidhe da Cristo sa ebuqueji?  
(Mateo 10.42; Lucas 9.49-50)*

<sup>38</sup> Da su Juan ja Jesús atana:

—Ebuetsuaji, bana ecuanaju piada deja ja mique ebani su einid'u madhada cuana ejusiacuinatani cristiano cuana peje jenetia. Ecuana neje mue puniuneti putsu, ecuanaju, “Be aji”, ana.

<sup>39</sup> Da su Jesús ja atana huecuana:

—Be memenhueji tueda deja. Ahua quebata ja nimetiuda ai cuana quema ebani su yatani su, aimue ema neje madhada hue epuani mahue. <sup>40</sup> Aimue ecuanaju neje puniuneti biame, tueda da ecua sa eshanapa. <sup>41</sup> Mepibaenique, quebata ja micuana ai chidi neje biame etsahuata su, micuaneda Cristo sa putsu, Diosu ja tueda saida echuje etiatayu.

*Pia jucha ame taji mahue  
(Mateo 18.6-9; Lucas 17.1-2)*

<sup>42</sup> ‘Quebata ja piada eichacua ema peje su jei epuani cristiano tusa Diosu peje su janimetuchteati etaitanameta su, tuseda puji ebia su saida pamanu bai dueda su tueda eichacua jei epuani cristiano sa janimetuchteati taitanameji mahue su hue. Beju ye mundo su jucuada ai cuana yani cristiano cuana sa Diosu peje su janimetuchteati cuana etaitaname puji. Quebata ja daja etaitanameta huecuana su, Diosu ja tueda ematsetayu. ¡Aba tueda, ahua pia cuana daja etaitanameta su! <sup>43</sup> Ahua mique eme ja mi jucha yameta su, rijique. Ebia su saida quita piada eme neje cielo su enubi puji, aimue meji cuati castigo su eputi mahue puji. <sup>44</sup> Dapia cuati castigo jude su cuati utsu pupe bue mahue. <sup>45</sup> Ahua mique ehua si ja mi jucha yameta su, rijique. <sup>46</sup> Ebia su saida quita piada ehua si neje cielo su enubi puji, aimue huatsiji cuati castigo su eputi mahue puji. Dapia cuati castigo jude su cuati utsu pupe bue mahue. <sup>47</sup> Ahua mique etua ja mi jucha yameta su, huijajusiaque. Ebia su saida quita piada etua neje cielo su enubi puji, aimue tuaji cuati castigo su eputi mahue puji. <sup>48</sup> Dapia cuati castigo jude su cuati utsu pupe bue mahue.

<sup>49</sup> ‘Cuaja aicha bia su banu eichatani nime, daja da cuati castigo su cuati utsu neje ebiaichata. <sup>50</sup> Banu da saida. Ahua banu mesa patseda etaitana su, ¿cuaja ni da banu neicha saida patseda puyu cua? Micuaneda banu nime mepuque saida huamahuama yaniti puji.

## 10

*Jesús ja jamesiati jepuiti buetsuatana  
(Mateo 19.1-12; Lucas 16.18)*

<sup>1</sup> Da su beju Jesús cuinanana Capernaum ejude jenetia. Judea yahua su putiana. Jordán ena chu maje anipetutiana. Neicha hue dueji cristiano cuana tu peje su jadhitatitana. Da su Jesús ja buetsuapirutana huecuana. <sup>2</sup> Beju piada piada fariseo cuana ja Jesús nariatana mimi neje tu yaba puji. Da su Jesús quisabatana huecuana:

—¿Ahua saida deja ja quirica derejiji neje mesa ehuanes emesiaenita puji?

<sup>3</sup> Da su Jesús ja quisabatana huecuana uja:

—¿Cuaja ni Moisés chenu ja cuatsasiataidha?

<sup>4</sup> Tuneda jeutsutana:

—Moisés chenu ja deja cuana d'ejí tiataidha quirica derejiji neje ehuanes emesiaenita puji.

<sup>5</sup> Da su Jesús ja quisatana huecuana:

—Judío cristiano cuana nimetadada putsu, Moisés chenu ja daja cuatsasiataidha. <sup>6</sup> Uja Moisés chenu deretaidha: “Equene su Diosu ja deja, epuna ataidha.” <sup>7-8</sup> Neicha Moisés chenu ja deretaidha uja: “Da putsu, deja ja mesa tata, cuara detse ichajusia taji mesa ehuanes neje yaniti puji. Beju tuatseda mu piada hue pu cua nime epu.” Beju daja Diosu sa quirica su epuani. Aimue Diosu ja tuatseda beta nime ebatani mahue. Piada nime hue ebatani tse. <sup>9</sup> Da putsu beju, aimue detse aidhe sa biame jamesiati taji pu cua mahue, Diosu ja tuatseda dunemetana putsu.

Daja Jesús ja jeutsutana huecuana.

<sup>10</sup> Da su beju ete su tuna mehua anitana su, discípulo cuana ja Jesús quisabatana tusa jabuetsuati jenetia. <sup>11</sup> Jesús beju jeutsutana huecuana uja:

—Ahua quebata yahue ja mesa ehuanes jucha mue biame emesiata su, ahua pia neje ehuaneti su, da su tuahueda jucha aida yatani. <sup>12</sup> Daja huecha ahua quebata ehuanes ja mesa yahue jucha mue biame emesiatu su, ahua pia neje yahueti su, tueda epuna ja di jucha aida yatani.

*Jesús ja yanana cuana bunebatana  
(Mateo 19.13-15; Lucas 18.15-17)*

<sup>13</sup> Da su beju piada piada yanana chidi cuana Jesús peje su dusetana huecuana, Jesús ja mesa eme tuna bia su huana putsu, tuneseda puji Diosu ebajata puji. Beju discípulo cuana sa tsada mahue puana. Yanana chidi duseji cristiano cuana d'ayapirutana huecuana. <sup>14</sup> Jesús ja daja ba putsu, discípulo cuana neje duininiana. Tuahueda atana huecuana uja:

—D'ejí metiaque yanana cuana ema peje su papueta. Be menahueji huecuana, Diosu ecuatsasiati da tuna nime cuana sa putsu. <sup>15</sup> Ene putsu, yama micuana equisainia, etse sa

nimemitsida pu taji ye yanana cuana nime Diosu ecuatsasiati su enubi puji.

<sup>16</sup> Da su Jesús ja yanana cuana id'amitana. Mesa eme detse yanana cuana bia su huana putsu, Diosu peje su ibuneda neje menajiatana huecuana.

*Deja chipiluji*

*(Mateo 19.16-30; Lucas 18.18-30)*

<sup>17</sup> Jesús epupiruhu cama, piada deja tu peje su jududubeara. Tu butse su beju tururuana. Da su deja ja Jesús quisabatana:

—Echua Puji, mida da saida. ¿Ai ni quema a taji Diosu neje cielo su eid'e yanieniti puji?

<sup>18</sup> Da su Jesús ja tueda jeutsutana:

—¿Jucua ja su miada ema, saida, yainia? Diosu bahui da saida. Ahua mida cielo su eid'e anienija su, Moisés chenu sa jacuatsasiati cuana apeque.

Da su deja ja neicha Jesús quisabatana:

—¿Quebata jacuatsasiati cuana quema a taji?

<sup>19</sup> Jesús ja deja jeutsutana:

—Be cristiano manuameji. Be pia sa ebutse quinaji. Be tsi puji. Be bid'umimi puji. Mique tata, cuara detse iyubaque. Mida quitaita ibuneda ebatiani nime, daja pia cuana ibuneda baque.

<sup>20</sup> Da su deja ja Jesús atana:

—Beju pamapa tueda jacuatsasiati cuana yama butsepi yainia ema yanana jenetia jiahue teje. ¿Ai pia ni da quema a taji yani?

<sup>21</sup> Beju Jesús ja tueda uja atana:

—Ahua mida nimebutsepi puja su, irutique pamapa mique ai cuana. Pamapa mique chipilu cuana puri cristiano cuana tiaque. Tiapa putsu, tije ema aque. Ahua daja ya su, cielo su pamapa ai eichacua cuana mique yani.

<sup>22</sup> Beju deja ja daja id'aba putsu, ebia su jatacuamadhapirutiana, tueda ebia su chipiluji putsu.

<sup>23-25</sup> Da su deja putibana su, Jesús ja mesa discipulo cuana uja atana:

—Ene putsu, yama micuana equisainia, atadhada chipiluji cuana Diosu ecuatsasiati su enubi puji. Ebia su atasaida caballo acusha id'aja je ejaitiana puji.

<sup>26</sup> Da su discípulo cuana da Jesús daja epuani id'aba putsu, ebia su nimetiunetitana huecuana. Uja jaquisabatitana huecuana:

—¿Aidhe jia da d'ejí su pu cua?

<sup>27</sup> Beju Jesús ja tuna chama putsu, uja atana huecuana:

—Cristiano cuana aimu tuna mehua quitaita hue d'ejí su jaatita cua mahue. Diusu sa puji mu mue ai biame atadhada mahue. Beju Diusu ja aidhe papu biame d'ejí su ata cua.

<sup>28</sup> Da su Pedro ja Jesús uja atana:

—Echua Puji, ecuanaju beju pamapa ecuanaju sa ai cuana ichajusiana mi tije ya puji.

<sup>29-30</sup> Da su Jesús ja Pedro jeutsutana uja:

—Enei hue yama micuana equisainia, quebata ja mesa edue, dudu, tata, cuara, ehua, yanana cuana, daja huecha ete, te cuana ema jepuiti eichajusiata su, Diusu ja tueda ai ichajusiájiji cuana ebia su dueji eturuca etiatayu ye mundo su. Daja biame, cristiano cuana ja madhada hue tueda yatayu. Beje Diusu ja tueda cielo su eid'e yameenititayu. <sup>31</sup> Da su beju jahue equene, aida eputani cuana da ai eni mahue tije eputayu. Daja huecha jahue ai eni mahue tije eputani cuana da equene aida eputayu.

*Neicha hue Jesús ja cuaja mesa manu epu quisatana*

*(Mateo 20.17-19; Lucas 18.31-34)*

<sup>32</sup> Beju tuneda edid'i su yaseti cama, Jerusalén ejude su epuhu je, Jesús da discípulo cuana hui su putiana. Discípulo cuana iyua neje Jesús tije putitana. Da su neicha hue Jesús ja chujemame ihua putsu, quisapirutana huecuana. Ai cuaja epu tu jepuiti quisapirutana huecuana uja:

<sup>33</sup> —Meid'abaque. Ecuaneda Jerusalén ejude su epuhu. Dapia sacerdote huaraji aida, jacuatsasiati ebuetsuaji cuana peje su ema emenajatiata. Romano soldado cuana peje su ema emenajatiata huecuana ema pamanuameta huecuana puji. <sup>34</sup> Ema neje eshishatita huecuana. Equedi neje ema equid'uata huecuana. Eicheta huecuana ema. Daja a putsu, ema emanuameta huecuana. Beju quimisha tsine ejaitiana su, ema manujiji cuana duju jenetia enetianayu.

*Jacobo, Juan detse ja Jesús bajatana*

*(Mateo 20.20-28)*

<sup>35</sup> Zebedeo sa ebacua Jacobo, Juan detse ja Jesús nariatana. Uja Jesús bajatana tse:

—Ebuetsuaji, tiaque etseju sa jabajati.

<sup>36</sup> Da su Jesús ja quisabatana tse:

—¿Ai ni da yama metseseda puji a cua?

<sup>37</sup> Beju jeutsutana tse uja:

—D'ejí tiaque etseju mi neje ecuatsasia epu puji, mi ecuatsasiati su. Piada mique bai eni bene, pia mique d'ani bai bene etseju paaniute.

<sup>38</sup> Da su Jesús ja tuatseda jeutsutana:

—¿Ai metseda ebajainia ai cuana bahue bata? ¿Ai metseda sufri pu cua, manu cua ema epu nime bata?

39 Da su tuatseda jeutsutana Jesús uja:

—A cua detse etseju.

Da su Jesús ja quisatana tse uja:

—Enei hue, ema sufri epu nime, daja metseda di sufri epu.

40 Daja biame, aimue metse sa jabajati yama tia cua mahue. Quema bai eni bene, quema d'ani bai bene metseda yaniute puji aimue quema puji aimue quema puji dhare taji mahue. Tata Diosu ja bahui tueda aniude detse tiata cua. Mesa beta dharejiji detse bahui etiata.

41 Da su beju pia discípulo cuanaja id'aba putsu, duininitana huecuana Jacobo, Juan detse neje. 42 Da su Jesús ja pamapa su ihuatana tu naja su. Uja atana huecuana:

—Micuaneda bahue pamapa ejude sa huaraji aida cuana ja ebia su tucheda neje cristiano cuana ecuatsasiatani. 43-44 Beju micuaneda mu aimue daja epu mahue. Quebata micuaneda huaraji aida puja epu su, tuseda pia cuana mebaja taji. Quebata micuaneda ehuidusuji puja epu su, pia cuana sa emebajaji pu taji. 45 Ema da Diosu sa Jabeituti Deja biame, ema pueana ye mundo su aniji cristiano cuana emebaja puji. Aimue ema pue cristiano cuana ja ema pamebajata puji. Beju ema pueana emanu puji, dueji cristiano cuana d'ejí su paputa puji.

*Jesús ja deja padha saisiametana*

*(Mateo 20.29-34; Lucas 18.35-43)*

46 Da su pia ejude su cuinatitana huecuana. Tueda ejude banime Jericó. Ejude jenetia ejaitianatani huecuana su, dueji cristiano cuana ja buquenatana huecuana. Beju edid'i buahua su ejude chu bene piada deja padha anina. Tueda deja banime Bartimeo puina. Tueda da Timeo sa ebacua puina. 47 Jesús enariatiani id'abatana putsu, tsiatsiapiruana uja:

—¡Jesús, David chenu sa familia jenetia, ibunebaque ema!

48 Da su pia cuana ja deja d'ayatana.

—Mitanaque —atana huecuana.

Da su cha ebia su hue jubida tsiatsiana deja uja:

—¡Jesús, David chenu sa familia jenetia, ibunebaque ema!

49 Da su Jesús netisenana. Cuatsasiatana huecuana uja:

—Meihuaque deja padha.

Da su deja padha ihua putsu, uja atana huecuana:

—Janimetuchteatique. Netianaque, tuahueda mi eihuatani putsu.

50 Deja ja beju mesa ebiad'amaji jusia putsu, tenana. Jesús nariatana.

51 Da su Jesús ja tueda quisabatana uja:

—¿Ai ni mique yama cuaja a cua?

Padha ja beju jeutsutana:

—Ebuetsuaji, ema jabatija.

<sup>52</sup> Da su Jesús ja cuatsasiatana deja:

—Puchiditiyunque. Ema peje su mi jei puitia putsu, saisitia mi beju. Da hora su beju padha jabatiana. Jesús tije apirutana edid'i je.

## 11

*Jesús Jerusalén ejude su nubiana*

*(Mateo 21.1-11; Lucas 19.28-40; Juan 12.12-19)*

<sup>1</sup> Beju Jerusalén ejude nariatana huecuana. Dapia beta ejude chidi Jerusalén ejude naja su anina. Tueda ejude chidi detse Betfagé, Betania banime puina. Tueda ejude detse Olivo murucu aida butse su anina tse. Beju murucu su cuinati putsu, Jesús ja beta discípulo detse beitutana ehui su. <sup>2</sup> Uja quisatana tse:

—Meputique ejude chidi su. Dapia asunu chidi risijiji eneti metseda eba. Tueda asunu chidi aiya biame tsuhu aimue bianibaji mahue. Mepidhuque tueda. Mejetique beju upia.

<sup>3</sup> Ahua aiya metse: “¿Jucuaja su metseda daja yainia?” equis-abata su, mequisaque tueda uja: “Echua Puji ja etsatani. Beju tipeida ebeitutayu.”

<sup>4</sup> Da su beju putiana tse. Asunu chidi risijiji ete etsequeini su batana tse. Da su asunu chidi pidhutana tse.

<sup>5</sup> Pidhu putsu, piada piada eneti cristiano cuana uja quisabatana tse:

—¿Ai da metse epuani? ¿Ai puji metseda asunu chidi epidhuinia?

<sup>6</sup> Tuatseda beju quisatana huecuana, cuaja Jesús ja cuatsasiatana batame. Da su d'eji tiatana huecuana edusuta tse puji. <sup>7</sup> Beju asunu chidi Jesús peje su dusutana tse. Ebia jud'uji cuana asunu bia su ichatsuatana discípulo cuana ja. Daja ape putsu, Jesús ja asunu bianitana. <sup>8</sup> Dueji cristiano cuana ja tuna sa ebia jud'uji cuana huanatana Jesús epuhu edid'i hui su. Pia cuana ja tumi nime sa ebai cuana dheu putsu, huanatana huecuana. Daja cristiano cuana ja a bahue ataina, huaraji aida cuana epuetani su.

<sup>9-10</sup> Beju equene eputahu cristiano cuana, daja huecha tije eputasiu cristiano cuana di tsiatsiatana uja:

—¡Gloria, Tata Diosu sa Jabeituti Deja epusiu! ¡Tueda da echua puji David chenu sa familia jenetia! ¡Diosu sa ebani su tueda epusiu! ¡Diosu ja tueda paibunebata! ¡Gloria Tata Diosu! ¡Saida pacuatsasiaenita!

<sup>11</sup> Da su Jesús Jerusalén ejude su nubiana. Templo su di nubiana. Nubi putsu, pamapa ai bajusiapetana. Beju



tsinecua eni putsu, Jesús, mesa piada tunca beta ejaitiana discípulo cuana neje Betania ejude su putiana.

*Jesús ja higo equi madhabatana*

*(Mateo 21.18-19)*

<sup>12</sup> Pia tsine Betania ejude jenetia cuinanatana huecuana. Jesús beju dhemanuana. <sup>13</sup> Uqueda jenetia higo equi inaji batana. Beju equi nariatana ahua ejaja ebade eba puji. Equi su cuinati putsu, eina cama beju batana. Aimue tsuhu higo jajaji puina mahue, aimue ejaja tiempo mahue putsu. <sup>14</sup> Da su Jesús ja higo equi uja atana:

—U jenetia su be aiya biame mique ejaja padiatayu.

Mesa discípulo cuana ja beju id'abatana.

*Jesús da huaraji jabametiana*

*(Mateo 21.12-17; Lucas 19.45-48; Juan 2.13-22)*

<sup>15</sup> Tuneda da Jerusalén ejude su cuina putsu, Jesús templo su nubiana. Dapia iruiruji, bajabajaji cuana etseque su cuadejusiacuinatana. Chipilu turucaji sa misha cuana busiapapetana. Huaitucu iruji cuana sa aniude cuana di busiapapetana. <sup>16</sup> Aimue aidhe biame d'ejí tiatana mahue tuna ai papu cuana pabutita puji templo dume su. <sup>17</sup> Uja atana huecuana:

—Diusu sa quirica su uja derejiji yani: “Quema ete da pamapa cristiano cuana sa ema mitsu jude ete epu.” Micuaneda mu tsi puji sa ete ana.

<sup>18</sup> Da su da sacerdote aida, jacuatsasiati ebuetsuaji cuana ja Jesús sa mimi id'aba putsu, cuaja tueda manuame ya puji pibapirutana huecuana. Aimue da hora su Jesús inatana huecuana mahue, cristiano cuana tusa sa jabuetsuati cuana tsada putana putsu. Sacerdote aida, jacuatsasiati ebuetsuaji cuana ja cristiano cuana iyubatana. <sup>19</sup> Beju dhidha puana su, Jesús ejude jenetia putiana, mesa discípulo cuana neje.

*Higo equi sarajiji*

*(Mateo 21.20-22)*

<sup>20</sup> Pia tsine apudaya enieni ete jenetia beju cuinanatana su, higo equi eneti je jaitianatana huecuana. Chu d'auna higo equi saranetiajiji batana huecuana. <sup>21</sup> Da su Pedro ja pibatana Jesús ja mimi neje higo equi madhatana. Tuahueda uja atana Jesús:

—Ebuetsuaji, chamaque higo equi miada mueta madhaja puicha. Beju jahue saranetiajiji.

<sup>22</sup> Da su Jesús ja atana huecuana:

—Jei mepuque Diusu peje su. <sup>23</sup> Ene putsu, yama micuana equisainia, quebata ja papu ye emata, “U jenetia mar su puderaque”, yata su, beju daja da epu, ahua tueda Diusu

peje su jei epuani su. Ahua aimue jei epuani mahue su, aimue detse daja pu cua mahue. <sup>24</sup>Yama micuana equisainia, micuaneda Diosu ebaja su, jei jubida mepuque tu peje su. Diosu peje su jei pu putsu, tuahueda micuana sa jabajati etiatayu. <sup>25</sup>Micuaneda Diosu bajaji mahue su, equene pia cuana perdona taji. Ahua micuana sa aidhe neje ai madhada yani su, perdona taji. Daja huecha micuana sa Tata Diosu ja cielo su yani micuana sa jucha cuana eperdonata. <sup>26</sup>Ahua micuaneda perdonaja mahue ya su, daja huecha micuana sa Tata Diosu ja micuana sa jucha cuana aimue eperdonata mahue.

*Jesús da huaraji ebia su aida quita*

*(Mateo 21.23-27; Lucas 20.1-8)*

<sup>27</sup>Da su beju Jerusalén ejude su jasiapatitana huecuana. Jesús templo dume su yasenioneti cama, sacerdote aida, jacuatsasiati ebuetsuaji, tata edhi ehuidusuji cuana ja Jesús nariatana. <sup>28</sup>Uja Jesús quisabatana huecuana:

—¿Aiya mida huaratitana ye ai cuana ya puji?

<sup>29</sup>Da su Jesús ja jeutsutana huecuana:

—Equene yama micuana equisaba. Ahua micuaneda ema ejeutsu su, beju yama di micuana ejeutsu. <sup>30</sup>¿Aiya Juan Bautista huaratitana cristiano cuana Diosu sa puji yahui neje eichadera puji? ¿Diosu ja ahua cristiano ja?

<sup>31</sup>Da su tuneda cama uja jaquisatitana:

—Ahua ecuaneda, “Diosu ja Juan huaratitana”, ejeutsu su, tuahueda, “Da su, ¿jucuaja su micuaneda aimue Juan peje su jei puana mahue?” ecuana equisabata. <sup>32</sup>Ahua ecuaneda, “Cristiano ja Juan huaratitana”, ejeutsu su, da su pamapa cristiano cuana ecuana neje eduininita, Juan da Diosu sa profeta ebatani huecuana putsu.

<sup>33</sup>Da su Jesús uja jeutsutana huecuana:

—Aiya jia Juan huaratitana bue mahue ecuanaju.

Jesús ja atana huecuana:

—Da su yama di, aiya ema huaratitana aimue micuana equisa mahue.

## 12

*Uva jude quinaji madhada cuana jepuiti quisa*

*(Mateo 21.33-46; Lucas 20.9-19)*

<sup>1</sup>Neicha hue Jesús ja quisatana huecuana bahue quisa neje: —Beju anina piada deja. Tueda deja uva jude banatana. Taracatana beju. Tumu pachata aida edusetse su rara atana uva ena epudu puji. Ete pacha baqui bauda di atana da bia jenetia uva jude pamapa einatsihua puji. Da su beju deja ja pia cuana uva jude menajatiatana paquinata huecuana

puji, tuneseda dajucua uva cuana ejemitita puji. Beju daja a putsu, emetse pia yahua su putiana. <sup>2</sup> Huiru taji tiempo beju cuinana su, emetse ja piada emebajaji deja beitutana uva jude quinaji cuana peje su emetse sa tupu patiata huecuana puji. <sup>3</sup> Tueda uva jude quinaji cuana ja emebajaji ina putsu, beju ichetana. Beitutaibana emebajaji ai biame tiaji mahue. <sup>4</sup> Da su beju emetse ja pia emebajaji beitutana tuna peje su. Uva jude quinaji cuana ja tueda ina putsu, tumu neje nedaneda a putsu, madhabatana huecuana madhabatana. <sup>5</sup> Neicha hue beju emetse ja pia emebajaji beitutana. Tueda mu beju manuametana huecuana. Daja huecha atana huecuana pia emebajaji cuana. Pia cuana ichetana huecuana. Pia cuana mu manuametana huecuana.

<sup>6</sup> 'Beju emetse sa piada hue mesa anina ebeitu puji. Tueda da mesa ibuneda ebacua puina. Tije da beju mesa ebacua beitutana tuna peje su. Emetse japibatiana uja: "Quema ebacua da enei hue eiyubata huecuana." <sup>7</sup> Beju uva quinaji madhada cuana ja emetse sa ebacua ba putsu, jaquisatitana huecuana, "Tueda da emetse sa ebacua. Tueda da ye pamapa ai cuana emetse epu. Pamanuametija tueda. Da su ecuaneda ye uva jude emetse cuana epu beju". <sup>8</sup> Da su emetse sa ebacua ina putsu, manuametana huecuana. Uva jude jenetia etseque su tusa equita jusiacuinatana huecuana.

<sup>9</sup> Da su Jesús ja quisabatana cristiano cuana:

—¿Cuaja ni da emetse ja uva jude quinaji ate cuana yata? Tueda jasiapati putsu, uva jude quinaji ate cuana emanuameta. Daja a putsu, uva jude pia mudu puji cuana emenajatiata.

<sup>10</sup> 'Beju Diosu sa quirica su uja derejiji yani:

Ete muduji cuana ja yapiruji tumu jusiaderatana biame, tueda tumu macha beju Diosu ja dharetana.

Tueda pia tumu cuana ebia su saida ametana.

<sup>11</sup> Tueda da nimetiuda ecuaneda ebainia.

<sup>12</sup> Beju judío cuana su ehuidusuji cuana ja Jesús tuna jepuiti mimiana jashanapatitana putsu, Jesús inaja adhaatana huecuana. Mue ina atana huecuana, cristiano cuana iyuba putsu. Beju putitaibana huecuana.

*Fariseo cuana ja impuesto jepuiti Jesús quisabatana (Mateo 22.15-22; Lucas 20.20-26)*

<sup>13</sup> Da su beju fariseo cuana Jesús peje su puetana tu quisababapebape putsu, Jesús mimi madhada emimiamie puji, tu etuaquisa puji. Herodes Antipas sa deja cuana di tuna neje puetana. <sup>14</sup> Beju Jesus quisatana huecuana uja:

—Ebuetsuaji, ecuanaju bahue mida butsepi emimiani. Miada Diosu sa ene quita jabuetsuati cuana ebuetsuainia.

Pamapa cristiano cuana miada tupupai ebainia. Aida puji, puri cuana miada tupupai ebainia. Da putsu, quisaque ecuanaju, ¿ahua saida ecuaneda romano echua puji aida impaesto echujetia puji, ahua mahue?

<sup>15</sup> Beju jashanapatiana tuna madhada piba neje daja quisabatana. Ahua Jesús, “Saida echujetia puji”, epu su, da su judío cuana tu neje eduininita. Ahua, “Saida mahue echujetia puji”, epu su, da su romano soldado cuana ja einata. Da putsu, Jesús ja uja jeutsutana huecuana:

—Beju micuaneda da bubeta cuana. ¿Jucuaja su micuaneda ema mimi neje pitsameja yainia? Piada chipilu metiaque ema.

<sup>16</sup> Da su beju piada chipilu tiatana huecuana. Chipilu ina putsu, Jesús ja quisabatana huecuana uja:

—¿Aidhe sa ebu eimea, ebani da ye chipilu bia su derejiji yani?

Da su jeutsutana huecuana:

—Tueda ebu eimea, ebani da romano echua puji aida sa beju.

<sup>17</sup> Da su Jesús ja atana huecuana uja:

—Da su beju metiaque echua puji aida sa epuani ai cuana. Diusu di metiaque tuseda epuani ai cuana.

Da su nimetiutana huecuana Jesús sa jajeutsuti jepuiti.

*Diusu ja manujiji cuana enetianamelayu*

*(Mateo 22.23-33; Lucas 20.27-40)*

<sup>18</sup> Tueda tsine su huecha hue piada piada saduceo cuana Jesús peje su putitana. Tueda saduceo cuana da, manujiji cuana neicha eid'etayu aimue jei putana mahue. Da su uja Jesús uja atana huecuana:

<sup>19</sup> —Ebuetsuaji, Moisés chenu ja buetsuataidha uja: “Ahua quebata deja bacua mahue emanu su, manujiji sa edue ahue manujiji neje jahuaneti taji, ebacua cuana edue manujiji sa bataji sa bataji epu puji.” <sup>20</sup> Beju siete edue cuana anitaina. Edue equene puji jahuanetiana. Beju bacua mahue manuana.

<sup>21</sup> Da su tu tije puji edue da manujiji sa ahue manujiji neje jahuanetiana. Tueda macha beju manuana bacua mahue.

<sup>22</sup> Tu tije puji edue macha daja huecha puana. Beju pamapa tije puji edue cuana daja cama putana ahua manujiji neje. Beju manutana huecuana pamapa. Da su beju epuna macha manuana. <sup>23</sup> Da su ahua ene mi epuani nime enetianatayu huecuana su, ¿quebata edue sa jia da tueda epuna ehueane epu?

<sup>24</sup> Da su Jesús ja uja jeutsutana huecuana:

—Beju ebia su epitsatiani micuaneda ye ai cuana jeputi, Diusu sa mimi derejiji yani mue shanapa putsu, Diusu ja

pamapa ai atadhada cuana ata cua, jei epuani mahue putsu. <sup>25</sup> Diusu ja manujiji cuana enetianametayu su, aimue neicha ebutsenetita huecuana mahue, cielo su Diusu sa ángel cuana nime eputa huecuana putsu. <sup>26</sup> Beju yama micuana butsepi equisainia manujiji cuana jepuiti. Ene putsu, neicha eid'etayu huecuana, micuaneda jei epuani mahue biame. ¿Aimue jia maida micuaneda Diusu sa quirica su mimiaméana mahue? Uja Diusu ja Moisés chenu ataidha mesa quirica su derejiji yani: “Ema da Abraham, Isaac, Jacob cuana sa Diusu.” <sup>27</sup> Beju manutaidha huecuana biame, Diusu neje eid'e yanita huecuana, Diusu da eid'e cuana sa bahui Diusu putsu.

Da putsu, micuaneda epitsatiani.

*Piada jacuatsasiati ebia su aida quita*  
(Mateo 22.34-40)

<sup>28</sup> Beju piada jacuatsasiati ebuetsuaji dapia aniana. Tuahueda Jesús ja ejeutsutani id'abapetana pamapa. Jesús ja saida saduceo cuana jeutsutana pepe puana. Beju uja quisabatana Jesús:

—¿Quebata jia Diusu sa jacuatsasiati ebia su aida quita?

<sup>29-30</sup> Da su Jesús ja jeutsutana:

—Beju ye jacuatsasiati da ebia su aida quita: “Id'abaque, Israel. Ecuana sa Diusu mu piada hue. Ibuneda baque Diusu pamapa mique muesumu neje.” Tueda da Diusu sa equene jacuatsasiati. <sup>31</sup> Pia tije jacuatsasiati da daja nime huecha. Uja epuani: “Cuaja mida quitaita ibuneda ebatiani nime, daja mique pia cuana ibuneda ba taji.” Tueda jacuatsasiati detse da pamapa pia jacuatsasiati cuana ebia su aida.

<sup>32</sup> Da su ebuetsuaji ja Jesús atana:

—Enei hue daja, ebuetsuaji. Diusu mu piada hue. Aimue pia ani tu ebia su aida. <sup>33</sup> Ecuaneseda Diusu ibuneda ba taji pamapa muesumu neje. Daja huecha ecuaneseda ibuneda ba taji, cuaja ecuaneda quitaita ibuneda ebatiani nime. Tueda da pamapa Diusu peje su tiumejiji eirutsuatiani cuana altar bia su ebia su saida quita.

<sup>34</sup> Beju ebuetsuaji ja daja saida mimiana putsu, Jesús ja tueda uja atana:

—Huai chidi hue mique ai mahue Diusu eshanapaeni puji.

Jesús ja daja saida jacuatsasiati ebuetsuaji cuana jeutsutana putsu, da hora jenetia aimue aiya biame tu quisabayuja atana mahue mimi neje tu ebasea puji.

*¿Aidhe da Cristo sa tata?*  
(Mateo 22.41-46; Lucas 20.41-44)

<sup>35</sup> Pia tsine Jesús templo dume su ebuetsua punetina. Uja cristiano cuana quisabatana:

—Jacuatsasiati ebuetsuaji cuana, “Diusu sa Jabeituti Deja da David chenu sa ebacua”, eputani. ¿Cuaja ni da, da su David chenu ja tueda, “Quema Echua Puji”, ataidha? <sup>36</sup> Espítu Santo ja David chenu quitaita mimiametaidha uja:

Tata Diusu ja quema Echua Puji uja: ataidha:

“Aniuteque quema bai eni bene ema neje tupupai ecuatsasia epu puji, yama mi neje jamajaiti cuana pishitiame putsu, mique eme su eicha teje.” <sup>37</sup> Ahua ene quita Diusu sa Jabeituti Deja da David chenu sa familia jenetia bataji puana su, ¿cuaja ni da, da su David chenu ja quitaita tueda, “Quema Echua Puji”, ataidha?

Beju dapia cristiano cuana ja beidaji neje id'abatana Jesús.

*Jesús ja jacuatsasiati ebuetsuaji cuana tuaquisatana*  
(Mateo 23.1-36; Lucas 11.37-54; 20.45-47)

<sup>38</sup> Jesús ja cristiano cuana daja hue quisainiame atana uja:

—Merejatique jacuatsasiati ebuetsuaji cuana neje. Tuneseda ebia su tsada ejud'uji bauda neje ejude duje epuniuneti puji. Tsada mecuana sa cristiano cuana ja iyuda neje saida pamitsuta. <sup>39</sup> Jadhitati jude ete cuana, tsine ete cuana su aniude eni bahui echacutani huecuana. <sup>40</sup> Ahue manujiji cuana sa ai ete cuana mejemi bahueta huecuana. Diusu sa puji risha tsabauda cuana pu bahueta huecuana cristiano cuana ja saida pabata huecuana puji. Da putsu, pia cuana ebia su Diusu ja casigo etiata huecuana.

*Epuna ahue manujiji ucua chidi hue chipilu ichatana*  
(Lucas 21.1-4)

<sup>41</sup> Neicha Jesús da templo su anina. Quepia cristiano cuana ja chipilu eichatani emeji naja su anina. Chamachama netina cristiano cuana ja emeji su eichatani. Ebia su chipiluji deja cuana ja jucuada eichatani Jesús ja batana. <sup>42</sup> Beju tije piada epuna ahue manujiji pueana. Beja chipilu chidi hue ichatana. <sup>43</sup> Jesús ja epuna ja eichatani ba putsu, mesa discípulo cuana ihuatana. Uja atana huecuana:

—Ene putsu, yama micuana equisainia, ye ahue manujiji puri ja pamapa pia chipiluji cuana ebia su ichataitia. <sup>44</sup> Pia cuana ja mecuana sa chipilu puchu epuani ichataitia. Ye puri epuna ichenu ja mu mesa yani chidi cuana ichapetaitia.

## 13

*Jesús quisa puana templo*  
(Mateo 24.1-2; Lucas 21.5-6)

<sup>1</sup> Beju Jesús, mesa discípulo cuana neje templo jenetia ecuinatasa cama, tumu butsama jenetia templo ajiji batana huecuana. Da su piada discípulo ja Jesús uja atana:

—Ebuetsuaji, chamaque ye ete, nimetiuda tumu butsama jenetia ajiji.

<sup>2</sup> Da su Jesús ja jeutsutana uja:

—Pamapa miada ye ete butsama ebainia cuana edajajape beju. Aimue piada tumu biame pia bia su yaniti mahue.

*Cristo epue tiempo enariati su*

*(Mateo 24.3-28; Lucas 21.7-24; 17.22-24)*

<sup>3</sup> Beju Olivo murucu aida su cuinatitana huecuana. Dapia murucu su jucuada aceituna aque cuana netitaina. Tueda emata chidi da templo butse su uqueda pad'i anina. Dapia Jesús aniuteana. Da su Pedro, Jacobo, Juan, Andrés cuana ja Jesús chujemame etsia quisa neje quisabatana uja:

<sup>4</sup> —Quisaque ecuanaju, ¿quetsunu jia templo edajaja? Dajajaji mahue su, ¿ai nimetiuda ni da ecuanaju eba?

<sup>5</sup> Da su Jesús ja jeutsutana huecuana uja:

—Merejatique. Be aiya biame micuana mebasea taji. <sup>6</sup> Jucuada deja cuana quema ebani su epueta. Tuneda da, “Ema da Cristo”, pu putsu, dueji cristiano cuana ebaseata huecuana.

<sup>7</sup> ‘Micuaneda emajaitita quisa eid'aba su, be merubutanaji. Equene tueda ai cuana sa daja pu taji. Daja biame, aimue tsuhu pamapa epupe mahue. <sup>8</sup> Equene beju ejude cuana huamahuama emajaitita. Yahua jubida erireta. Mid'e da epu pamapa yahua je. Ebia su cristiano cuana enimetipeitita. Tueda ai cuana da epupiruji sufrimiento cuana.

<sup>9</sup> ‘Merejatique micuaneda quitaita. Ejude huaraji cuana peje su micuana emenajatiata huecuana. Judío cuana sa jadhitati jude ete su micuana eicheta huecuana. Huaraji aida butse su micuana edusuta huecuana ema jepuiti. Da su tuna butse su micuaneseda ema quisanetiacuina taji. <sup>10</sup> Beju pamapa pupeji mahue su, equene pamapa yahua cuana je, Diosu sa quisa saida cuana quisaquisa epupeta. <sup>11</sup> Da hora su micuana huaraji aida butse su edusuta huecuana su, be mepibapibaji cuaja micuaneda jajeutsutime epu. Micuaneda emimi hura su Diosu ja micuana mimi cuana etiata ejebutsu puji. Beju Espíritu Santo quitaita ja mesa piba cuana micuana peje jenetia emimi. <sup>12</sup> Da tiemp su beju cristiano cuana ja ema peje su jei eputani cuana huaraji cuana peje su emenajatiata pamanuameta huecuana puji. Edue cama emenajatiatita. Tata cuana ja mecuana sa ebacua cuana emenajatiata. Daja huecha ebacua cuana ja mecuana sa tata cuana emenajatiata pamanuameta huecuana puji. <sup>13</sup> Pamapa cristiano cuana ja micuana ebia su eduinibata ema jepuiti. Daja biame, quebata emanu teje ema peje su daja hue enimetuheaderati su, tueda da d'ejí su epueni.

<sup>14</sup> ‘Profeta Daniel chenu ja deja madhada eni jepuiti dere-  
taidha. Cuaja Diosu sa ai cuana tuahueda emadhabata Daniel  
chenu ja deretaidha. Da su tueda deja madhada eni Diosu sa  
templo su yani micuaneda eba su, beju mejududuque. Judea  
yahua su aniji cuana pajududuta emata cuana su. <sup>15</sup> Da hura  
su quebata da mesa ete epa pachata bia su yani su, bute putsu,  
be ete su panubi ai biame ejemicuinati puji. Butsepi hue  
pajududu. <sup>16</sup> Quebata da te su yani su, be ete su pasiapati  
mesa ejud’uji ejemicuinati puji. <sup>17</sup> ¡Aba epuna dheji, bacua ed-  
hereji cuana epu da tiempo su, putadhada tuneseda ejududu  
putsu! <sup>18</sup> Diosu mebajaque, be huinahuina badi cuana su  
ejududu hora papu. <sup>19</sup> Da tiemp su cristiano cuana ebia su  
sufri eputa. Quetsunu su biame daja sufri pu bue mahue ta  
biame, beju da tsunu su sufri eputa huecuana. Aimue neicha  
daja nime jubida sufrimiento cuana epu mahue. <sup>20</sup> Diosu ja  
tueda sufrimiento tiempo ubu hora hue yata, mesa dharejiji  
cuana d’ejí su paputa puji. Ahua tueda sufrimiento tiempo  
ubu hora yata mahue su, aimue aidhe biame d’ejí su epu  
mahue.

<sup>21</sup> ‘Beju da tiempo su ahua quebata ja micuana,  
“Mechamaque, u hue da Cristo”, yata su, be jei mepuji.  
<sup>22</sup> Jucuada deja madhada cuana, “Ema da Cristo”, eputa. Daja  
huecha, “Ema, da Diosu sa quisaquisa puji”, eputa huecuana.  
Nimetiuda ai cuana yata huecuana. Diosu sa dharejiji cuana  
di baseaja yadhaata huecuana, nimetiuda ai cuana a putsu.  
<sup>23</sup> Micuaneda janimepitijiji meanique, beju yama micuana  
ye ai cuana jepuiti equene quisana putsu.

*Cuaja pueichame epu Diosu sa Ebacua  
(Mateo 24.29-35, 42-44; Lucas 21.25-36)*

<sup>24</sup> ‘Tueda sufrimiento tiemp ejaitianani cama, id’eti, badi  
da yapuna. <sup>25</sup> Atujai cuana edajajata. Pamapa buepa su  
yani ai cuana da eruburubuta. <sup>26</sup> Da hora su beju ema ebute  
cielo jenetia. Pamapa cristiano cuana ja ema ebata. Buepa  
judu duju je pamapa Diosu sa hueda, tucheda neje beju ema  
ebutesa pamapa ja ebata. <sup>27</sup> Da tiempo su quema ángel cuana  
yama ebeitu pamapa ye mundo su quema dharejiji cuana  
padhitata huecuana puji.

<sup>28</sup> ‘Mepibaenique aque cuana. Beju eina eichacua chidi  
cuana eturucatiyani su, da su micuaneda eshanapainia jad’iati  
badi cuana enariatiani. <sup>29</sup> Daja huecha tueda nimetiuda  
ai cuana ba putsu, meshanapaque ema epusiu tiempo beju  
huedhue. <sup>30</sup> Ene putsu, yama micuana equisainia, pamapa  
tueda ai nimetiuda ebapirutani cuana aimue emanuta  
mahue tsuhu ema epueicha teje. <sup>31</sup> Beju cielo, mundo epupe  
biame, quema mimi mu aimue epupe mahue.



<sup>32</sup> 'Aidhe biame bue mahue ai tsine su ema esiapati ye mundo su. Angel cuana biame bue mahue. Ema biame bue mahue. Tata Diosu quitaita bahui bahue ai hora su ema esiapati.

<sup>33</sup> 'Da su daja hue janimepitijiji meanique. Daja hue Diosu memitsuderaque, tueda hora quetsunu ecuina bue mahue micuaneda putsu. <sup>34</sup> Beju bahue quisa neje yama micuana equisa. Piada ete emetse uqueda eputiani su, eichajusiatani mesa ete emebajaji cuana sa eme su. Emetse ja putiji mahue su, metse su hue mudu cuana etiataniyu huecuana. Ete quinaji di ecuatsasiatani pamapa ai cuana saida paquinata puji. <sup>35-36</sup> Beju daja huecha da ema ete emetse nime. Micuaneda bue mahue ai hora ema esiapati. Ahua yapupuhu su, ahua dhidha dusetse su, ahua huaripa deja equeini su, ahua apudaya su, ai hora jia ema ecuina micuaneda bue mahue. Da putsu, beju daja hue janimepitijiji meanique. Ahua cuapuitime ema ecuina su, yama micuana janimepitijiji mahue huacuina cua. <sup>37</sup> Yama micuana, pia cuana nime, tupupai jubida equisainia. Janimepitijiji meanique.

## 14

*Cuaja Jesús iname ya puji pibatana huecuana*  
(Mateo 26.1-5; Lucas 22.1-2; Juan 11.45-53)

<sup>1</sup> Beju beta tsine hue beju anina pascua tsine epu puji. Tueda tsine su pan levadura mahue dia bahue putaina huecuana. Da su sacerdote aida, jacuatsasiati ebuetsuaji cuana ja cuaja Jesús basea putsu, eteriicha puji japibatitana. <sup>2</sup> Tuneda cama uja jaquisatitana:

—Be painatija Jesús pascua tsine su. Ahua daja ecuaneda ya su, cristiano cuana detse janimetipeitita cua.

*Epuna ja puida Jesús sa echua bia su d'uichatana*  
(Mateo 26.6-13; Juan 12.1-8)

<sup>3</sup> Jesús beju Betania ejude su putiana. Dapia cuinati putsu, Simón sa ete su nubiana. Tueda da Simón Lepraji banime puina. Beju tuneda ediadiatani cama, piada epuna tuna ediadiatani su pueana. Tuahueda alabastro emeji chidi dusetana. Emeji chidi su chujeneda saida puida badeina. Tueda puida nardo banime. Tueda da chujeneda saida puina. Da su epuna ja emeji chidi cuatsad'iatana. Cuatsad'ia putsu, Jesús sa echua bia su puida d'uichatana. <sup>4</sup> Da su piada piada dapia yanita cuana epuna neje duininitana. Tuneda cama uja jaquisabatitana:

—¿Ai puji jia ye epuna ja yanacane d'uichataitia ye chujeneda puida? <sup>5</sup> Ye puida da piada mara pu cue mudu

chuje tupu. Ahua ecuaneda iru cua su, dueji chipilu cuana ecuaneseda ani cua puri cuana etsahua puji.

<sup>6</sup> Da su Jesús ja uja atana huecuana:

—Be ye epuna med'ayaji. ¿Jucuaja su jia micuaneda tu neje eduininiani? Tuahueda quema puji saida atana. <sup>7</sup> Beju puri cuana micuana neje pamapa hora su yanita. Ai hora papu micuaneseda tsada su saida tsahua cua huecuana. Beju ema mu aimue micuana neje daja yani uteuteti mahue. <sup>8</sup> Ye epuna ja mesa yani tupu ataitia. Puida quema equita bia su d'uichataitia ema papaji pu cua nime. <sup>9</sup> Ene putsu, yama micuana equisainia, quepia papu Diosu sa quisa saida cuana quisaquisa eputani su, ye epuna ja ataitia di quisa eputa tu jahue quita ataitia pamapa cristiano cuana ja pashanapata puji.

*Judas ja Jesús menajiatana*

(Mateo 26.14-16; Lucas 22.3-6)

<sup>10</sup> Da su piada Jesús sa discípulo Judas Iscariote sacerdote aida cuana peje su putiana cuaja Jesús tuna peje su menajiatame ya equisa puji. <sup>11</sup> Sacerdote cuana ja Judas daja epuani id'aba putsu, beidaji putana huecuana. Da su chipilu etia jamitsuti tiatana huecuana. Da hora jenetia Judas japibapirutiana cuaja Jesús sacerdote cuana peje su emenajatia puji.

*Jesús da discípulo cuana neje pascua tsine su diadiana*

(Mateo 26.17-29; Lucas 22.7-23; Juan 13.21-30; 1 Corintios 11.23-26)

<sup>12</sup> Beju pascua tsine cuinana. Equene tsine su pamapa cristiano cuana ja huisha janana pascua tsine puji manumetana. Tueda huisha janana irutsuatana huecuana Diosu peje su. Da su discípulo cuana ja quisabatana Jesús:

—¿Quepia mique tsada ecuanaju ebaseta pascua tsine su ediadia puji, pascua tsine yati puji?

<sup>13</sup> Da su Jesús ja beitutana beta discípulo detse. Tuahueda uja quisatana tse:

—Meputique ejude su. Dapia piada deja yahui matu jadosuti metseda etsu. Tije meatique tueda. <sup>14</sup> Tueda enubiti ete su, ete emetse echacu. Mequisaque ete emetse uja: “Ebuetsuaji ja mi equisabametani uja: ‘¿Quepia d'ejí yani pascua tsine jana edia puji quema discípulo cuana neje?’ ”

<sup>15</sup> Da su tueda ete emetse ja diadia jude aida, basetajiji ete ebaque su ebameta. Dapia mebasetaque jana.

<sup>16</sup> Da su ejude su putiana tse. Daja cuaja Jesús puana batame, pamapa ai cuana batana tse. Pamapa basetatana tse tsine su puji.

<sup>17</sup> Apuda puana su, Jesús, mesa discípulo cuana neje putiana tueda ete su. Beju diadiapirutana huecuana. <sup>18</sup> Ediadiatani cama, Jesús ja quisatana huecuana uja:

—Ene putsu, yama micuana equisainia, micuana duju su piada ja ema emenajatiata sacerdote cuana peje su. Tueda da ema neje upia ediadiani jiahue quita.

<sup>19</sup> Da su ebia su jatacuamadhatitana huecuana. Piada piada tuneda Jesús quisabatana:

—¿Yama jia? ¿Ahua yama?

<sup>20</sup> Jesús ja jeutsutana huecuana:

—Micuana duju su yani beju. Ema neje dhepe su ediadiani ja da ema emenajatiata. <sup>21</sup> Beju ema sufri yameta huecuana, cuaja Diusu sa quirica su derejiji yani batame. ¡Aba, ema menajatiaji epu deja! Ebia su saida quita tuseda puji, bataji epu mahue puji puina.

<sup>22</sup> Da su beju tuneda ediadiatani cama, Jesús ja pan jemit-sua putsu, diusulupai Diusu atana. Pan ped'uped'ua putsu, berereatiatana huecuana. Daja ape putsu, atana huecuana uja:

—Mediaque ye pan chidi. Ye da quema equita pu cua nime.

<sup>23</sup> Daja mimipe putsu, vinoje emeji jemitsuatana. Diusulu-pai Diusu a putsu, emeji berereatiatana huecuana. Beju pamapa su jaid'ititana. <sup>24</sup> Da su Jesús ja atana huecuana uja:

—Ye vino da quema ami pu cua nime. Quema ami ed'uichati neje Diusu ja mesa jamitsuti eichacua cristiano cuana etiata. Diusu ja dueji cristiano cuana eperdonatayu, quema ami ed'uichati putsu. <sup>25</sup> Ene putsu, yama micuana equisainia, aimue yama eid'iicha ye vino mahue Diusu ecuatsasiati su eid'i teje.

*Pedro da, “Jesús mue yama shanapa”, epu, Jesús quisa puana (Mateo 26.30-35; Lucas 22.31-34; Juan 13.36-38)*

<sup>26</sup> Da su beju tuneda diadiape putsu, Diusu sa puji satsutana huecuana. Satsupe putsu, Olivo murucu aida su putitana huecuana. <sup>27</sup> Dapia cuinati putsu, Jesús ja atana huecuana uja:

—Pamapa micuaneda ema mehua ejusianetia ye dhida su. Daja micuaneda ya, cuaja Diusu sa quirica su epuani batame. Beju uja epuani, “Yama huisha quinaji emanuame su, huisha cuana eberebreatita.” Ema emanu biame, beju eid'eyu. <sup>28</sup> Id'eyu putsu, ema micuana equene Galilea yahua su eputi dapia micuana emitsu puji.

<sup>29</sup> Da su Pedro ja Jesús uja atana:

—Echua Puji, pia cuana ja mi ejusianetiata biame, aimue mi yama mu daja ya mahue.

<sup>30</sup> Da su Jesús ja tueda jeutsutana:

—Pedro, ene putsu, mi yama yainia, ye dhidha su quitaita da quimisha nuati mida uja emimi: “Mue yama Jesús shanapa.” Huaripa deja queiji mahue su, daja mida epu quimisha nuati.

<sup>31</sup> Da su Pedro ja uja jubida atana Jesús:

—Mi neje quema manu taji biame, aimue mi yama eju-sianetia mahue. Beju pamapa pia discípulo cuana di dajaputa putana.

*Jesús ja Tata Diosu mitsutana Getsemaní su*

*(Mateo 26.36-46; Lucas 22.39-46)*

<sup>32</sup> Da su tuneda putitana pia ania eti jude chidi Getsemaní banime su. Dapia Jesús ja uja quisatana discípulo cuana:

—Meaniuteque upia, ema da Diosu neje emitsutiani tupu.

<sup>33</sup> Da su Jesús ja Pedro, Jacobo, Juan cuana tu neje chuadera pad'i dusutana. Beju Jesús ebia su jatacuamadhapirutiana. Ebia su iyua me pupiruana mesa enime su. <sup>34</sup> Uja quisatana huecuana:

—Ebia su da ema etajiatiani. Emanu nime ema ebatiani. Meanique upia. Meid'enique.

<sup>35</sup> Da su chuadera pad'i Jesús putiana. Beju yahua su d'epesatiana Diosu emitsupiru puji. Bajatana Diosu curusu su sufri pu taji jenetia d'ejí su paata puji. <sup>36</sup> Beju uja Diosu atana:

—Quema Tata, miqueda puji mu pamapa ai cuana atasaida. D'ejí su aque ema curusu su sufrimiento epusiu jenetia. Daja biame, mique tsada bahui papu. Be quema tsada mu papu.

<sup>37</sup> Da su Jesús jasiapatibana discípulo cuana yanita su. Etahuitasa beju batana huecuana. Da su quisabatana Pedro:

—Simón, ¿a mi etahuisa? ¿Aimue mique tucheda anitia mahue, piada hora dhucuana eid'eni puji? Ene putsu, micuaneda ema buqueja biame, nimepishihue. <sup>38</sup> Beju meid'enique. Janimepitijiji meanique. Diosu memitsuni- aque Ishahua ja micuana epirubata mahue puji.

<sup>39</sup> Neicha Jesús chuadera pad'i putiana Diosu neje emit- suti puji. Equene Diosu bajatana nime, neicha hue Diosu bajatana. <sup>40</sup> Diosu mitsupe putsu, Jesús jasiapatibana. Ne- icha etahuitasa huecuana batana. Tahui mecuana sa a taji mahue putsu, beju tahuitana huecuana. Da su cuaja jeutsu taji mahue Jesús batana huecuana, bidhu putsu. Neicha quimisha nuati puji Jesús chuadera puderatiana Diosu neje emitsuti puji. <sup>41</sup> Mitsupe putsu, jasiapatiichana discípulo cuana peje su. Uja quisabatana huecuana:

—¿Ahua micuana etahuisa tsuhu? Beju mejanahuasaque hue. Beju tupu saida, juchaji deja cuana sa eme su ema eme- najatiata hora cuinaitia putsu. <sup>42</sup> Menetianaque. Meputija beju. Mechamaque, ema menajatiaji epu deja beju epusiu.

*Jesús risijiji dusutana huecuana**(Mateo 26.47-56; Lucas 22.47-53; Juan 18.2-11)*

<sup>43</sup> Jesús, discípulo cuana neje daja emimiani cama, Judas dueji deja cuana neje puetana. Espadaji, aquiriji metse cama puetana huecuana. Sacerdote, huaraji aida, jacuatsasiati ebuesuaji, tata edhi ehuidusuji cuana ja tueda deja cuana beitutana Jesús painata huecuana puji. <sup>44</sup> Judas ja deja cuana Jesús einati puji uja equene quisatana huecuana:

—Quebata yama ebudhi, beju tueda da Jesús. Meinaque tueda. Saida risieni putsu, medusuenique.

<sup>45</sup> Da su Judas ja tipeida nariatana Jesús. “Ebuetsuaji”, yainia je, budhitana. <sup>46</sup> Da su beju deja cuana ja Jesús inatana.

<sup>47</sup> Piada discípulo ja mesa espada jemitana. Da neje sacerdote sa emebajaji sa eid'aja siquijusiatana. <sup>48</sup> Da su Jesús ja quisabatana huecuana:

—¿A da micuaneda pueitia ema eina puji espada, aquiriji metse cama? <sup>49</sup> ¿Ai ema tsi puji bata? Pamapa tsine micuana duju su templo su yama buetsuaina biame, aimue micuaneda ema inana mahue. Beju daja epuani ye ai cuana, cuaja Diusu sa quirica su derejiji yani batame.

<sup>50</sup> Da su pamapa mesa discípulo cuana jududutana. Jesús jusianetiatana huecuana. <sup>51</sup> Beju piada edeahue ja Jesús tije atana ed'amaji neje bahui babujiji. Tueda di da deja cuana ja inadhaatana. <sup>52</sup> Inadhaatana huecuana su, edeahue jududua, ebabuji jusiaicha putsu. Beju jahuijati jududuana.

*Jesús huaraji aida cuana butse su netiana**(Mateo 26.57-68; Lucas 22.54-55, 63-71; Juan 18.12-14, 19-24)*

<sup>53</sup> Jesús dusutana huecuana sacerdote aida cuana peje su. Dapia da pamapa sacerdote huaraji aida, tata edhi, ehuidusuji jacuatsasiati ebuetuaji cuana beju jadhitatitana.

<sup>54</sup> Pedro uqueda uqueda tije atana Jesús, sacerdote sa echua puji aida sa ete etseque teje. Dapia soldado cuana naja su aniuteana. Tuna neje jayutianina cuati naja su.

<sup>55</sup> Pamapa sacerdote huaraji aida, ejude sa ehuidusuji edhi cuana dhitatana. Tuneda cama jaquisabatitana cuaja Jesús tuaquisa putsu, emanuame puji. <sup>56</sup> Piada piada deja cuana ja Jesús tuaquisatana tsapiapiati bid'umimi cuana neje. <sup>57</sup> Tuneda netianatana etuaquisa puji bid'umimi neje. Uja putana huecuana:

<sup>58</sup> —Ecuanaju da id'abana Jesús puana uja: “Ye deja cuana sa jamuduti templo yama ejusiautepe. Quimisha tsine su pia templo yama enetianameyu. Tueda aimue deja cuana sa jamuduti mahue.”

59 Beju daja etuaquisatani huecuana biame, aimue mecuana sa jatuaquisati cuana tupupai puana mahue. Beju huaruhuaru mimitana huecuana.

60 Da su sacerdote sa echua puji aida netianana pamapa cristiano cuana butse su. Uja quisabatana Jesús:

—¿Jucujaja su ni miada ye jatuaquisatiji cuana aimue ejeutsuinia mahue?

61 Beju Jesús aimue jajeutsutiana mahue. Da su neicha sacerdote sa echua puji aida ja quisabatana:

—¿A da mida Diosu sa Jabeituti Deja? ¿A da mida Diosu sa Ebacua?

62 Da su Jesús ja jeutsutana uja:

—Ehe, ema da. Diosu aida, tucheda eni sa bai eni bene yani micuaneda ema eba. Buepa su judu duju su ema epusiu micuaneda eba.

63 Da su sacerdote aida ja daja id'aba putsu, mesa ejud'uji d'iud'iujatana, ebia su duinini putsu. Uja quisabatana pia cuana:

—¿Ai puji ni da ecuaneseda pia jatuaquisatiji tsada pu cua?

64 Beju micuaneda quitaita id'abaitia tusa mimi madhada cuana. Tuahueda Diosu madhabatana tusa mimi neje, tueda da Diosu sa Ebacua puana putsu. ¿Cuaja micuaneda epibatiani?

Da hora su Jesús matsetana huecuana pamanu puji.

65 Da su beju Jesús quinaji soldado cuana ja tueda quid'uapirutana equedi neje. Jesús tuarisitana huecuana. Ichepirutana huecuana eme neje. Daja a putsu, quisabatana huecuana uja:

—Shanapaque aiya mi ichetaitia. Quisaque ecuanaju.

Beju daja atana huecuana Jesús.

*Pedro, “Aimue yama eshanapainia mahue Jesús”, puana (Mateo 26.69-75; Lucas 22.56-62; Juan 18.15-18, 25-29)*

66 Beju daja ete dume su Jesús yatani huecuana cama, Pedro etseque su aniana. Dapia piada epuneje tu naja su pueana. Tueda epuneje da sacerdote aida sa emebajaji puina.

67 Epuneje ja Pedro eyutiani ba putsu, chamaenitana. Da su epuneje ja Pedro uja atana:

—Mida di Jesús neje puniunetiana. Ema bahue.

68 Beju Pedro ja jeutsutana:

—Yama mue shanapa tueda. Bue mahue ema ai jepuiti mida emimiani.

Da su Pedro taraca etsequeini su netiderana. Da hora quitaita su huaripa deja queiana. 69 Neicha hue epuneje ja Pedro chamaenitana. Chama putsu, quisapirutana pia enetita cuana uja:

—Ye deja da Jesús sa ebuqueji.

<sup>70</sup> Neicha hue Pedro uja bid'umimi neje jajeutsutiana:

—Yama mue shanapa tueda.

Da su pad'i dapia echamachamataneti cuana ja quisatana Pedro:

—Enei hue, mida di Jesús sa ebuqueji. Mida da Galilea yahua jenetia ecuanaju mique mimi cuana jepuiti eshanapainia.

<sup>71</sup> Da su Pedro jubida mimi madhada neje Diosu bahue puana. Uja atana:

—Yama mue shanapa tueda.

<sup>72</sup> Da hora quitaita su beju neicha huaripa deja queiana. Huaripa deja queiana putsu. Jesús sa equene mimi cuana su Pedro japibatiana uja: “Qimisha nuati mida, ‘Yama mue shanapa Jesús’, epu, beta nuati huaripa deja queiji mahue su.” Da su Pedro Jesús sa equene mimi cuana piba putsu, jubida papiruana.

## 15

*Jesús romano huaraji Pilato butse su*

*(Mateo 27.1-2, 11-14; Lucas 23.1-5; Juan 18.28-38)*

<sup>1</sup> Pia tsine apudaya su sacerdote huaraji aida cuana, tata edhi ehuidusuji, jacuatsasiati ebuetsuaji cuana jadhitatitana. Beju Jesús risi putsu, huaraji aida Pilato peje su dusutana huecuana. <sup>2</sup> Tu peje su acuinatitana huecuana su, Pilato ja Jesús quisabatana uja:

—¿A da mida judío cuana sa Echua Puji?

Jesús ja jeutsutana Pilato:

—Ehe, ema da cuaja mi emimiani nime.

<sup>3</sup> Beju sacerdote huaraji aida cuana ja pamapa ai cuana jepuiti neicha Jesús tuaquisatana Pilato butse su. <sup>4</sup> Da su Pilato ja Jesús quisabatana:

—¿Jucuaja su mi aimue ejeutsutiani mahue? Ye deja cuana ja pamapa ai cuana jepuiti mi etuaquisatani.

<sup>5</sup> Jesús ja mue jajeutsuti putsu, Pilato nimetiua.

*Jesús matsetana huecuana*

*(Mateo 27.15-31; Lucas 23.13-25; Juan 18.38-19.16)*

<sup>6</sup> Beju pamapa mara ye tsine puji piada terijiji Pilato ja d'ejí su a bahue. Cristiano cuana ja edharetani quebata d'ejí su ya puji. <sup>7</sup> Beju terijiji anina piada deja Barrabás banime. Tueda deja manuameji puina. Romano soldado cuana neje jamajaitiana. <sup>8</sup> Da su Pilato peje su jadhitatitana huecuana piada terijiji dhare putsu, d'ejí su ya puji. <sup>9-12</sup> Beju Pilato bahue puana sacerdote aida cuana Jesús duininibatana, cristiano cuana ja Jesús tije atana putsu. Da putsu, Jesús menajiatana huecuana tu peje su tuahueda pamanuameta puji.

Pamapa ye ai cuana Pilato bahue puana. Tueda sacerdote aida cuana ja cristiano cuana cuatsasiatana Pilato pabajata puji, tuahueda Barrabás d'oji su paata puji. Da su Pilato ja cristiano cuana uja quisabatana:

—¿A da micuana sa tsada judío cuana sa Echua Puji yama d'oji su ya puji?

Beju jeutsutana huecuana:

—Mahue. D'oji su aque Barrabás.

Pilato ja quisabatana huecuana:

—¿Ai ni micuaneseda tsada yama ya micuaneda judío cuana sa Echua Puji yainia neje? banime yainia neje?

<sup>13</sup> Da su jubida tsiatsia neje jeutsutana huecuana:

—¡Tataque tueda curusu su!

<sup>14</sup> Pilato ja quisabatana huecuana:

—¿Jucuaja su? ¿Ai madhada ni da tuahueda atana?

Da su cha ebia su hue tsiatsiatana huecuana:

—¡Tataque tueda curusu su!

<sup>15</sup> Beju daja cristiano cuana sa ebia su tsada puana putsu, Pilato ja Barrabás d'oji su atana beidaji yame huecuana puji. Cuatsasiatana soldado cuana huaca biti neje Jesús paicheta huecuana puji. Iche putsu, curusu su patatata huecuana cuatsasiatana.

<sup>16</sup> Da su beju soldado cuana ja Jesús dusutana huaraji aida sa ete etsequeini su. Dapia pamapa soldado cuana jadhitatitana. <sup>17</sup> Jesús sa ejud'uji huijatana huecuana. Huija putsu, jud'utana huecuana eba buji idhiria neje. Junu quid'aji bauda jenetia corona atana huecuana. Jesús sa echua su ichatana huecuana. <sup>18</sup> Daja a putsu, eshishatiani je, Jesús bid'ida apirutana huecuana. Uja putana huecuana:

—¡Viva, judío cuana sa Echua Puji!

<sup>19</sup> Aquí riji neje chuatarapirutana huecuana. Tu bia su quid'uatana huecuana equedi neje. Tu butse su tururutana huecuana, eshishatiani je. <sup>20</sup> Jashishapeti putsu, eba buji idhiria mejemitana huecuana. Neicha Jesús jud'utana huecuana tusa ejud'uji quitaita neje. Daja a putsu, beju dusutana huecuana curusu su etata puji.

*Jesús tatatana huecuana*

(Mateo 27.32-44; Lucas 23.26-43; Juan 19.17-27)

<sup>21</sup> Beju eputahu cama, piada deja tsutana huecuana Simón banime. Tueda da ejude su epuhu tsutana. Tueda da Alejandro, Rufo detse sa tata puina. Tueda da Cirene ejude jenetia puina. Soldado cuana ja tueda cuatsasiatana Jesús sa curusu pamapata puji.

<sup>22</sup> Da su beju Jesús dusutana huecuana Gólgota banime murucu eti jude su. <sup>23</sup> Dapia da vino, mirra neje huarujiji



id'imeja atana huecuana. Beju id'ija mahue atana Jesús ja.  
 24 Da su beju curusu su tatatana huecuana. Suerte a putsu, Jesús sa ejud'uji cuana jaberereatiatitana huecuana.

25 Beju apudaya las nueve tupu su. 26 Jesús bia su curusu su deretana huecuana uja: “Ye da judío cuana sa Echua Puji.” Daja deretana huecuana ai jepuiti Jesús matsejiji cristiano cuana ebame puji. 27 Tu neje tupupai tsi puji detse pia curusu detse su tatatana huecuana. Piada mesa bai eni bene, pia mesa d'ani bai bene badeanatana huecuana. 28 Beju daja puana, cuaja biahua tiempo Diosu sa quirica su deretaidha batame. Uja derejiji yani: “Deja madhada detse dhedeje su ichatana huecuana.”

### *Jesús curusu su madhabatana huecuana*

29 Beju ejaitianatasa cuana ja Jesús madhabatana. Echua huajia putsu, uja atana huecuana:

—Mida, templo jusiautepe putsu, quimisha tsine jenetia neicha yama enetianameyu, puana. 30 Puana putsu, jiahue quita curusu jenetia buteque. D'ejí su jaatique.

31 Daja sacerdote aida, jacuatsasiati ebuetsuaji cuana putana. Beju jashishatitana huecuana Jesús neje. Uja tuneda cama jaquisatitana:

—Tuahueda pia cuana d'ejí su atana biame, aimue tueda tu mehua d'ejí su yatiani mahue. Ahua jiahue quita tueda curusu jenetia ebute su, beju ecuaneda jei epu tueda da judío cuana sa Echua Puji.

32 Tu naja su tatajiji detse ja di Jesús madhabatana.

### *Jesús manua*

(Mateo 27.45-56; Lucas 23.44-49; Juan 19.28-30)

33 Beju buepatia su pamapa yahua apunana. Quimisha hora puji apuda puana. 34 Quimisha hora jaitianana su, Jesús jubida tsiatsiana uja:

—¡Ai, quema Diosu! ¡Ai, quema Diosu! ¿Jucuaja su mi ema jusiabadeanaitia?

35 Piada piada dapia enetita cuana ja Jesús id'aba putsu, uja putana:

—Tuahueda Elías chenu eihuatani.

36 Da su piada deja ja huapese nime vino edhi tsetseda su tsabiatana. Aquí huiri bauda huitsana su icha putsu, Jesús sa ecuatsa su atsuatana tu paid'iti puji. Da su deja ja enetita cuana uja quisatana:

—Id'ua taji tsuhu. Pabatija ahua Elías chenu epue curusu jenetia tueda ejemiute puji.

37 Da su Jesús jubida tsiatsia putsu, manua. 38 Da hora quitaita su templo dume su telón aida, bauda, pamuda badeji beju ebia jenetia ema su cuata jabud'iutiana. 39 Curusu butse

su soldado cuana sa echua puji netina. Cuaja Jesús tsiatsia putsu, manuana ba putsu, uja puana:

—Enei hue, ye deja da Diosu sa Ebacua puina.

<sup>40</sup> Curusu uqueda piada piada epuna cuana di chamachamanetitaina. Tuna duju su María Magdalena, Jacobo, José detse sa cuara María di netina. Salomé di netina.

<sup>41</sup> Tueda quimisha epuna cuana ja Jesús tije ataina. Jesús Galilea yahua su puniunetina su, tueda quimisha epuna cuana ja ai chidi cuana su Jesús tsahuatana. Pia epuna cuana di dapia netitana tuna neje. Tuneda di Jesús buquetaina Jerusalén ejude su.

*Jesús sa equita huananubiatana huecuana*

*(Mateo 27.57-61; Lucas 23.50-56; Juan 19.38-42)*

<sup>42</sup> Beju viernes apuna puina. <sup>43</sup> Janahua tsine cuinaji mahue tsuhu puina putsu, piada deja José banime cuinana. Tueda da Arimatea ejude jenetia puina. Piada judío cuana sa ehuidusuji aida puina. Ebia su Diosu peje su janimetucheatiana. Diosu ecuatsasiati ed'uataina. Da su tueda janime-tucheati putsu, putiana Pilato peje su Jesús sa equita ebaja puji. <sup>44</sup> Beju Pilato da nimetiuana, Jesús manupudana jepuiti. Da su soldado cuana sa echua puji ihuatana tu equisaba puji ahua ene daja. Uja Pilato ja echua puji quisabatana:

—¿A da ene Jesús manuitia?

Echua puji ja jeutsutana Pilato:

—Ehe, Jesús manuitia beju.

<sup>45</sup> Da su Pilato ja daja id'aba putsu, José d'eji tiatana Jesús sa equita pajemiuteta puji. <sup>46</sup> Da su José putiana ebabuji chujeneda saida ebajati puji. Jesús sa equita jemiute putsu, babutana. Daja a putsu, tumu epa sepulcro su huananubiatana. Sepulcro etsequeini tumu butsama neje teritana.

<sup>47</sup> Beju María Magdalena ja batana quepia Jesús sa equita huananubiatana huecuana. José sa cuara María ja di batana.

## 16

*Jesús netianaibana*

*(Mateo 28.1-10; Lucas 24.1-12; Juan 20.1-10)*

<sup>1</sup> Beju janahua tsine jaitianana su, María Magdalena, María, Jacobo sa cuara, Salomé cuana ja ai puida bajatana Jesús sa equita etsitsipe puji. <sup>2</sup> Beju domingo tsine su apudaya enieni putitana huecuana Jesús huananubiajiji esa su. <sup>3</sup> Edid'i su yaseti je, jaquisabatitana huecuana uja:

—¿Aiya ni da tumu butsama sepulcro etsequeini jenetia ecuana sa eichaderata?

<sup>4</sup> Beju sepulcro su cuinatana su, tumu butsama ichaderajiji batana huecuana. <sup>5</sup> Sepulcro su nubi putsu, piada edeahue

nime bai eni bene yani batana huecuana. Tueda ejud'uji pasane, baudaji batana huecuana. Daja ba putsu, epuna cuana rubutanenetitana. <sup>6</sup> Da su tuahueda uja atana huecuana:

—Be merubutanaji. Micuaneda Jesús curusu su tatajiji echacuinia. Aimue upia yani mahue. Beju id'etitaba. Mechamaque upia tueda huanatana huecuana. <sup>7</sup> Pedro, pia discípulo cuana di mequisatique. Mepibamétique huecuana cuaja Jesús ja tuna equene quisatana ai cuana, tu manuji mahue su. Mepibamétique huecuana Jesús da id'eyu putsu, tuna equene Galilea yahua su ecuinati. Dapia tuahueda emit-suta huecuana, cuaja tuahueda quisatana huecuana batame.

<sup>8</sup> Da su beju quimisha epuna cuana cuinanatana. Jududutana huecuana sepulcro jenetia. Riariatana huecuana, ebia su rubutana putsu. Beju aimue aidhe biame quisatana huecuana mahue. Cuatsa mahue putana huecuana, rubutana putsu.

*Jesús bataji puana cristiano cuana peje su  
(Juan 20.11-18)*

<sup>9</sup> Beju domingo su semana epupiruani su, Jesús apudaya enieni manujiji duju jenetia netianaibana. Equene bataji puana María Magdalena peje su. Tueda María Magdalena peje jenetia Jesús ja equene siete einid'u madhada jusiacuinatana. <sup>10</sup> Beju tueda putiana Jesús sa ebuqueji cuana equisati puji. Tuna peje su cuinati putsu, ebia su epatani huecuana batana. <sup>11</sup> Da su María ja quisatana huecuana uja:

—Beju Jesús eid'e beju. Yama tueda baitia.

Daja jubida neje quisatana huecuana biame, aimue María jei atana huecuana mahue.

*Jesús beta discípulo detse peje su bataji puana  
(Lucas 24.13-35)*

<sup>12</sup> Da su beju Jesús bataji puana beta discípulo detse peje su. Pia batame jabametiana putsu, mue shanapa atana tse. Tuatseda te edid'i su epuniuneti cama, Jesús bataji puana tuatse peje su. <sup>13</sup> Da su tuatseda Jerusalén ejude su jasiapatibana pia discípulo cuana equisati puji. Daja huecha tuneda jei aja mahue atana.

*Jesús ja mesa discípulo cuana huaratiatana  
(Mateo 28.16-20; Lucas 24.36-49; Juan 20.19-23)*

<sup>14</sup> Tije beju Jesús da mesa piada tunca piada ejaitiana discípulo cuana peje su bataji puana. Tuneda ediadiatani cama, Jesús bataji puana. Tu peje su jei puja mahue, muesumu tadada ta putsu, d'ayatana huecuana. <sup>15</sup> D'ayape putsu, uja atana huecuana:

—Meputique pamapa ye mundo sa ejude cuana je. Diusu sa quisa saida cuana pamapa ye mundo sa aniji cuana peje su quisaquisa meputique. <sup>16</sup> Ahua aidhe papu biame jei epu su, ahua Diusu sa puji yahui neje eichaderati su, beju tueda d'oji su epu. Ahua jei puja mahue su, tueda da matsejiji epu. <sup>17</sup> Beju pamapa ema peje su jei eputani cuana ja ai nimetiuda cuana yatayu. Quema ebani tucheda neje einid'u madhada cuana cristiano cuana peje jenetia ejusiacuinatayu huecuana. Pia yana eichacua cuana su emimita huecuana. <sup>18</sup> Bacua ejemitsuata huecuana biame, aimue cuaja biame yata huecuana mahue. Ahua ai veneno eid'ita huecuana su, aimue cuaja biame yata huecuana mahue. Ahua mecuana sa eme cuana nedaji cuana bia su ehuanata su, beju esaisita huecuana.

*Jesús cielo su tsuatibana*

*(Lucas 24.50-53)*

<sup>19</sup> Echua Puji Jesús ja discípulo cuana daja quisape putsu, cielo su tsuatibana Diusu sa bai eni bene yaniute puji. Da su beju discípulo cuana putitaibana. <sup>20</sup> Pamapa ejude cuana je Diusu sa quisa saida cuana quisaquisa pupirutana. Cuaja cristiano cuana d'oji su puta cua quisa pupirutana huecuana. Echua Puji Jesús quitaita ja tsabatana huecuana cristiano cuana butse su, ai nimetiuda cuana a putsu. Daja papu.

## EL SANTO EVANGELIO SEGÚN SAN LUCAS

Ye quirica de Lucas ja deretaidha. Tueda da jaiduenetiji puidha. Pablo buquetaidha, Diosu sa quisa saida quisaquisa puniunetidha su.

Ye quirica ja Jesús sa jaibunebati cuana ebametani. Cuaja tuahueda nedaji, einid'u madhadaji, ebia su epibapibatani cuana tsahuataidha quisa epuani.

Daja huecha ye quirica ja Jesús de Tata Diosu sa Jabeituti Deja ebametani mesa ai nimetiuda, jabuetsuati cuana jepuiti.

Ye quirica su Jesús sa piada piada ai ataidha, jabuetsuati cuana derejiji yani. Beju tueda ai cuana aimue pia quirica cuana su derejiji yani mahue. Lucas sa quirica su ye ai cuana jepuiti uja epuani:

Juan Bautista bataji puana. Capítulo 1

Samaritano sida jepuiti quisa. Capítulo 10

Ebacua mesa tata peje jenetia netiderana jepuiti quisa.

Capítulo 15

Deja chipiluji saida, Lázaro neje jepuiti quisa. Capítulo 16

Piada tunca deja lepraji cuana Jesús ja saisiamentana.

Capítulo 17

Fariseo, impuesto chujebajaji detse ja Diosu mitsutana.

Capítulo 18

Zaqueo Jesús peje su jei puana. Capítulo 19

<sup>1</sup> Ibuneda Teófilo, mi peje su ye quirica yama ebeituinia pamapa Jesús ja ecuana duju su atana cuana equisa puji.

<sup>2</sup> Jesús batana cuana ja tu ai atana cuana ema quisaenitana. Tuneda Cristo sa quisa saida cuana quisaquisa putana.

<sup>3</sup> Saida yama pibana tueda ai cuana edere puji, pamapa tueda ai cuana yama butsepi quisachacuana putsu. Beju jiahue cuaja pupirume puana pamapa tueda ai cuana yama butsepi edereinia mi etiamé puji. <sup>4</sup> Ye quirica mi etiaméinia mi buetsuatana Cristo jepuiti ai cuana saida eshanapa puji. Beju jiahue mida yama tueda ai cuana equisa.

*Angel Juan Bautista bataji epu quisa puana*

<sup>5</sup> Da tiempo su Herodes Judea yahua sa echua puji puina. Tueda yahua su piada sacerdote di anina. Tueda banime puina Zacarías. Tuahueda pia sacerdote neje Diosu meba-jatana templo su. Tueda sacerdote cuana da Abías cuana puina. Zacarías sa ehuané Elisabet banime puina. Tueda di Zacarías nime Aarón chenu sa familia jenetia puina.

<sup>6</sup> Tuatseda Diosu butse su nimebutsepi puina. Aiya biame

cuaja tuaquisa taji mahue tse batana huecuana. Pamapa Diosu sa jacuatsasiati cuana jei ataina tse. <sup>7</sup> Betana su bacua mahue edhi puina tse, Elisabet jabuacuati bue mahue puina putsu.

<sup>8-9</sup> Beju Abías cuana sa jaturucati tsine cuinana su, Zacarías dharetana huecuana iyuda eti jude su enubi puji, Diosu butse su insensario neje ejudua puji. <sup>10</sup> Beju Zacarías ja ejuduatani tupu, pamapa cristiano cuana etseque su Diosu neje jamit-sunetitanetina. <sup>11</sup> Da hora su Diosu sa ángel Zacarías peje su bataji puana. Bai eni bene altar su ángel neticuinana. <sup>12</sup> Angel ba putsu, Zacarías rubutanana. Cuaja pu taji mahue jabanetiatiانا. <sup>13</sup> Da su ángel ja Zacarías uja atana:

—Zacarías, be iyuame puji. Diosu ja mique jabajati id'abatana. Elisabet beju ebacuati. Tueda yanana Juan miada ebaniicha. <sup>14</sup> Metseda ebia su beidaji epu. Tueda yanana bataji epu su, jucuada cristiano cuana di beidaji eputa. <sup>15</sup> Mique ebacua deja aida epu Diosu sa puji. Aimue vino tsetseda id'i bahue epu mahue. Tu bataji puji mahue jenetia Espíritu Santo sa tucheda mesa yani epu. <sup>16</sup> Tuahueda dueji israelita cuana Diosu peje su neicha esiapametayu. <sup>17</sup> Tueda da Echua Puji Jesucristo hui su epu. Tueda ebia su nimetucheda epu, cuaja profeta Elías chenu puidha nime. Tata cuana, mecuana sa ebacua cuana neje saida yameta. Diosu jei aja mahue cuana ebuetsuata Diosu sa jacuatsasiati cuana jei paata huecuana puji. Cristiano cuana ebasetata Echua Puji saida einatsu puji.

<sup>18</sup> Daja ángel ja Zacarías atana. Da su Zacarías ja ángel uja quisabatana:

—¿Cuaja ni da ye ai cuana pu cua? Etseju mu beju edhi.

<sup>19</sup> Da su ángel ja Zacarías uja jubida jeutsutana:

—Ema da Gabriel banime. Ema da Diosu sa ani jude butse su eneti tu emebaja puji. Diosu ja ema mi peje su beitutana ye quisa saida mi equisa puji. <sup>20</sup> Da su beju mida mimi bue mahue epu yanana bataji epu teje, miada quema jaquisati mue jei aitia putsu. Cuaja mi yama equisainia nime, beju daja epu.

<sup>21</sup> Da cama beju, etseque su cristiano cuana ja Zacarías ecuinana id'uatantetina. Uja tuneda japibatitana: “¿Jucuaja su da ebia su etsunutani Zacarías?” <sup>22</sup> Beju Zacarías cuinana putsu, cuaja mitsu taji mahue cristiano cuana batana. Eme neje bahui shanapametana huecuana. “Zacarías tahui su nime jia da ai bataitia. Da putsu, cuaja mimi taji mahue ebatiani”, japibatitana huecuana.

<sup>23</sup> Beju mesa mudumudu taji tsine cuana pupeana su, Zacarías mesa ete su jasiapatibana. <sup>24</sup> Quejucua tsine

jaitianana su, beju Elisabet dheji puana. Pishica badi mesa ete jenetia mue cuinana puana. <sup>25</sup> Uja tueda japibatiana: “Diusu ja ema ibunebatana. Beju u jenetia su aimue cristiano cuana ema neje eid'ebatita mahue, ema bacuaji putsu.”

*Angel da Jesús bataji epu quisa puana*

<sup>26</sup> Elisabet sucuta badi dheji yani su, Diusu ja ángel Gabriel beitutana María peje su. María sa ete Nazaret ejude su anina. Tueda ejude Galilea yahua su anina. <sup>27</sup> Beju María deja shanapa bue mahue puina. José neje yahueti jamitsuti mesa anina. Tueda José da echua puji David chenu sa familia jenetia puina. <sup>28</sup> Beju ángel María naja su janariatiana putsu, uja atana:

—María, yama mi equisainia, Diusu ja mi pia epuna cuana ebia su eibunebatani. Beju tueda mi neje yani.

<sup>29</sup> Da su María nimetiuchana, ángel sa mimi id'aba putsu. Uja ángel quisabatana:

—¿Jucuaja su mi ema daja emitsuinia?

<sup>30</sup> Angel María jeutsutana:

—María, be iyuame puji. Diusu ja mi dharetana. <sup>31</sup> Jiahue mida dheji epu. Piada ebacua mida ebacuinati. Tueda ebacua miada Jesús ebani eicha. <sup>32</sup> Tueda da ebia su aida epu, Diusu Aida sa Ebacua putsu. Diusu ja tueda huaraji aida eichata. Echua puji David chenu puidha nime, daja Diusu ja tueda Echua Puji eichata. <sup>33</sup> Israelita cuana sa Echua Puji tueda epu ecuatsasiaenita huecuana puji. Tu ecuatsasiati aimue epupe mahue beju.

<sup>34</sup> Da su María ja ángel quisabatana:

—¿Cuaja ni da pu cua ye ai cuana, aimue ema deja shanapa bue mahue putsu?

<sup>35</sup> Da su ángel ja María jeutsutana:

—Espíritu Santo da mi peje su epue. Diusu Aida ja mi judu padha nime neje ehabuta. Da su beju tueda yanana bataji epu Diusu sa puji ichaderajiji epu. Diusu sa Ebacua epu. <sup>36</sup> Mique edue puji Elisabet di bacuaji epu, punatia biame. Cristiano cuana, “Elisabet jabacuati bue mahue”, mimitaina biame, beju bacuaji epu. Sucuta badi tueda dheji beju. <sup>37</sup> Diusu sa puji mu mue ai biame atadhada mahue.

<sup>38</sup> Da su María ángel uja atana:

—Ema da Diusu sa emebajaji. Daja Diusu ja ema paata, cuaja miada ema equisainia batame.

Mimipe putsu, ángel putibana.

*María Elisabet peje su pereperetiana*

<sup>39</sup> Beju quejucua tsine jaitianana su, María tipeida putiana Zacarías, Elisabet detse sa ejude su. Tueda ejude da Judea

yahua emata chidi cuana duju su anina. <sup>40</sup> Dapia cuinati putsu, Zacarías sa ete su nubiana. Elisabet mitsutana. <sup>41</sup> Elisabet ja María sa jamitsuti id'aba putsu, mesa edhe su yanana ruburubuana. <sup>42</sup> Da su Espíritu Santo ja Elisabet uja jubida quisametana:

—Diusu ja mi pamapa pia epuna cuana ebia su ibunebatana. Mique ebacua di daja huecha ibunebatana. <sup>43</sup> ¿Ai eni ema bata miada ema eperejeu puji, mida da quema Echua Puji sa cuara putsu? <sup>44</sup> Miada ema mitsuana su, quema yanana edhe su ruburubuana, tueda beidaji pu putsu. <sup>45</sup> Beidaji mida, Diusu sa jaquisati su mi jei puana putsu. Pamapa Diusu ja mi quisatana cuana epupe.

<sup>46</sup> Da su María uja puana:

Yama Diusu emitsutsuainia.

<sup>47</sup> Tuahueda ema beidaji ametana.

Tueda da ema D'ejí su Aji.

<sup>48</sup> Ema ai eni mahue papu biame, ema ibunebatana.

Jiahue jenetia pamapa cristiano cuana quema puji saida emimita,

<sup>49</sup> Diusu tucheda ja ai saida nimetiuda cuana ema peje su atana putsu.

Tueda da saida, butsepi.

<sup>50</sup> Pamapa tu eiyubatani cuana eibunebatani.

<sup>51</sup> Ai aida cuana atana.

Ebia su aida jabatiji cuana pishitiametana.

<sup>52</sup> Huaraji aida, tucheda eni cuana dajajametana.

Beju nimemitsida cuana aida atana.

<sup>53</sup> Diusu shanapaja cuana tusa ai cuana shanapameenitana.

Diusu shanapaeni bahue epudhaatani cuana mu aiji mahue jusiaderatana.

<sup>54</sup> Cuaja ecuana sa tata chenu cuana Diusu ja mesa jamitsuti ataidha batame, daja jiahue israelita cuana ibunebatana.

<sup>55</sup> Abraham chenu mesa jamitsuti tiataidha uja:

“Yama mida eibuneba.

Pamapa mique bataji epusiu familia cuana di yama eibunebaeniti.”

Da nime tu mebajaji israelita cuana tsahuatana, cuaja mesa jamitsuti tiataidha huecuana batame.

<sup>56</sup> Da su María quimisha badi aniana Elisabet sa ete su. Da su beju jasiapatibana mesa ete su.

*Juan Bautista bataji puana*

<sup>57</sup> Beju Elisabet sa neda pu taji tsine cuinana su, deja janana bataji puana. <sup>58</sup> Pamapa Elisabet sa familia, tu naja su aniji cuana tu peje su putitana epereti puji. Diusu ja Elisabet ibunebatana bahue putana huecuana. <sup>59</sup> Beju ocho tsine



su yanana dusutana ehuitsanasiqui puji. Pamapa tuneda Zacarías ebani ichaja putana. <sup>60</sup> Beju Elisabet sa tsada mahue puana. Uja atana huecuana:

—Mahue, Juan da banime epu quema yanana.

<sup>61</sup> Da su cristiano cuana ja Elisabet uja atana:

—¿Jucuaja su ni? Aimue piada biame mique familia cuana duju su Juan banime ani cua mahue. Beju bahue mida ecuana sa puiti. Etse sa familia quitaita sa ebani cuana jenetia dhare taji ebani eicha puji.

<sup>62</sup> Da su beju tuneda seña neje Zacarías quisabatana uja:

—¿Ai ebani mique tsada ebacua sa epu?

<sup>63</sup> Da su Zacarías ja quirica su uja deretana: “Mesa ebani da Juan epu.” Da su pamapa su nimetiunetitana. <sup>64</sup> Da hora su beju neicha Zacarías mimipiruibana. Diusu sa puji saida mimipiruana. <sup>65</sup> Tu naja su netiji cuana jubida nimetiunetitana. Tueda yahua je aniji cuana jaquisatitana cuaja puana ai cuana. <sup>66</sup> Ebia su japibatitana huecuana ye ai cuana jepuiti. Huamahuama uja jaquisabatitana huecuana:

—¿Ai deja jia ye yanana epu?

Diusu sa tucheda Juan neje yani batana huecuana putsu, daja jaquisatitana huecuana.

### *Zacarías Juan jepuiti satsuana*

<sup>67</sup> Espiritu Santo Zacarías peje su pue putsu, uja mimi-ametana:

<sup>68</sup> Beju pamitsutsuatija israelita cuana sa Diusu, ecuana peje su pueitia beju ecuana d'eji su ya puji.

<sup>69</sup> Ecuana Salvador tucheda tiatana.

Tueda da David chenu sa familia jenetia.

<sup>70</sup> Biahua tiempo Diusu ja mesa profeta chenu cuana uja quisaquisa ametaidha:

<sup>71</sup> “Yama Salvador ebeitu israelita cuana peje su tuna sa majai cuana peje jenetia d'eji su epu puji, tuna duininibaji cuana peje jenetia di d'eji su epu puji.

<sup>72</sup> Aimue da yama eseta mahue quema tuna neje jamitsuti cuana.

Beju yama eichenuba huecuana.”

Daja Diusu sa profeta chenu cuana quisaquisa ametaidha.

<sup>73</sup> Uja Diusu ja Abraham chenu mesa jamitsuti tiataidha:

<sup>74</sup> “Yama israelita cuana tuna sa majai cuana peje jenetia d'eji su yayu ema saida iyume mahue neje pamebajata huecuana puji.

<sup>75</sup> Tuneda ema saida, butsepi neje pamebajata, eid'e yani tupu.”

Daja Diusu ja Abraham chenu ataidha.

<sup>76</sup> Beju quema ebacua chidi, mida Diusu aida sa quisaquisa puji epu.

Echua Puji hui su mi epuniuneti cristiano cuana ebaseta puji,  
tueda saida pabatsuta huecuana puji.

<sup>77</sup> Echua Puji ja mesa cristiano cuana d'oji su yatayu.

Tuna sa jucha cuana eperdonatayu.

<sup>78</sup> Beju Diosu ja daja ecuana yameta, tuahueda ecuana ebia  
su eibunebatani putsu.

Tusa quisa saida cuana hueda nime cielo jenetia ecuana peje  
su.

<sup>79</sup> Jucha su epuniuneti cuana Diosu ja mesa quisa saida cuana  
eshanapametayu.

Emanu puji iyuame eputani cuana di eshanapametayu.

Tuneseda puji tueda quisa saida cuana da hueda nime.

Tuahueda ecuana enimepijajametayu.

Quema ebacua chidi, pamapa ye ai saida cuana miada cris-  
tiano cuana eshanapame.

Daja Zacarías satsuana mesa ebacua jepuiti.

<sup>80</sup> Beju yanana Juan saida, nimetucheda, jubida sehuana.  
Beju deja puana su, d'anita yahua su netina. Dapia tu mehua  
netina israelita cuana peje su quisaquisa epupiru teje.

## 2

### *Jesús bataji puana*

*(Mateo 1.18-25)*

<sup>1</sup> Da tiempo su romano echua puji huaraji aida anina.  
Tueda Augusto banime puina. Tuahueda cuatsasiatana  
pamapa ejude cuana je censo paata puji. <sup>2</sup> Da tiempo su Siria  
yahua sa echua puji Cirenio banime puina. <sup>3</sup> Da su pamapa  
cristiano cuana tuna sa ejude cuana su jasiapatitana ebani  
quirica su eichameti puji. <sup>4</sup> Da putsu, José Galilea yahua su  
Nazaret ejude jenetia cuinanana María neje Judea yahua su  
eputi puji. Tuatseda Judea yahua su putiana Belén ejude su.  
Tueda ejude su David chenu bataji puidha. <sup>5</sup> José da David  
chenu sa familia jenetia putsu, dapia putiana tse quirica su  
ebani eichameti puji. María neje ehuaneti jamitsuti mesa  
anina. Beju dheji puana María. <sup>6</sup> Belén su yani su, nedaji  
pu taji tsine mesa cuinana. <sup>7</sup> Dapia equene yanana mesa  
bataji puana. Beju edunuji neje babutana. Animalo cuana sa  
ete dume su yanana huanatana, tuatse cuinatiana ejude su  
quepia nubi taji mahue jabatiana tse putsu.

### *Angel ja huisha quinaji cuana Jesús bataji puana quisatana*

<sup>8</sup> Belén ejude chu bene huisha quinaji cuana anitaina  
yahua nutsaji d'oji su. Dhidha su huisha cuana inatsihu-  
atana huecuana. <sup>9</sup> Beju Diosu sa ángel tuna peje su bataji  
puana. Hueda jubida ja jurabatana huecuana putsu, ebia su  
rubutanatana huecuana. <sup>10</sup> Angel ja uja quisatana huecuana:

—Be iyuame mepuji. Yama micuana ai saida cuana equisa. Pamapa cristiano cuana da beidaji epu, ye quema quisa saida id'aba putsu. <sup>11</sup> Beju jiahue David chenu sa ejude Belén su micuana D'oji su Ahi bataji puitia. Tueda da Echua Puji Cristo. <sup>12</sup> Butsepi yama micuana equisainia. Meputique eba puji. Micuaneda eteje yanana dunujiji esa animalo cuana sa ete su.

<sup>13</sup> Da su ángel ja quisapetana huecuana su, dueji ángel cuana di cielo jenetia bataji puana. Jubida Diusu mitsutsuatana huecuana uja:

<sup>14</sup> Aida Tata Diusu papueni cielo su.

Pamapa yahua su tu beidaji yametani cuana panimepija-jameta.

<sup>15</sup> Da su beju ángel cuana cielo su jasiapatitaibana su, huisha quinaji cuana uja huamahuama jaquisatitana:

—Meputija Belén ejude su ángel ja jiahue quita ecuana quisataitia ai cuana ebati puji.

<sup>16</sup> Da su tipeida putitana huecuana ejude su. Dapia animalo ete su cuinati putsu, María, José, yanana chidi esa beju batana huecuana. <sup>17</sup> Ye ai cuana ba putsu, ángel ja yanana jepuiti tuna quisatana ai cuana cristiano cuana quisapirutana huecuana. <sup>18</sup> Pamapa id'abatana cuana beju nimetiunetitana.

<sup>19</sup> María mue ai mimi biame pu. Cuatsa mahue japibatiana, huisha quinaji cuana daja mimitana id'aba putsu. <sup>20</sup> Da su beju huisha quinaji cuana jasiapatitaibana. Diusu mitsutsuanataibana huecuana. Ebia su diusulupai Diusu atana huecuana, tueda ai nimetiuda cuana ba putsu. Cuaja ángel ja quisame atana huecuana batame, beju daja puana.

*Tata, cuara detse ja templo su Jesús Diusu menajatiatana*

<sup>21</sup> Beju ocho tsine su yanana dusutana tse ehuitsanasiqui puji. Jesús ebani ichatana yanana. María d'oji puji mahue su, ángel ja Jesús ebani paichata atana.

<sup>22</sup> Da tiempo su epuna cuana nedaji pu putsu, templo su ecuana sa puti taji erucuati puji, daja Moisés sa acuatsasiati cuana puina putsu. Da su beju yanana Jesús Jerusalén ejude su dusutana tse Diusu emenajatia puji. <sup>23</sup> Daja atana tse, cuaja Diusu sa quirica su derejiji yani batame. Beju uja derejiji yani: “Equene bataji epu ebacua da iusu sa puji ichaderajiji papu.” <sup>24</sup> Da su beju María sa jarucuati tiempo jaitianana su, Diusu peje su irutsuatitana, cuaja Diusu sa jacuatsasiati cuana puina batame. Huaitucu butseji ahua bid'id'i butseji tuatseseda irutsua taji puina.

<sup>25</sup> Da tiempo su piada deja Simeón banime Jerusalén ejude su anina. Tueda deja saida puina. Diusu ebia su iyubatana. Diusu peje su janimeid'uatina Diusu ja israelita cristiano cuana d'oji su paata puji. Espíritu Santo da Simeón neje

anina. <sup>26</sup> Tuahueda equene Simeón shanapametana Diusu sa Jabeituti Deja baji mahue aimue emanu mahue. <sup>27</sup> Da su Espíritu Santo ja Simeón templo su nubiametana. Da hora su Jesús sa tata, cuara detse ja tu templo su dusutana Diusu sa jacuatsasiati yape puji. <sup>28</sup> Simeón ja yanana Jesús ba putsu, jemitsuatana. Diusu uja mitsutsuatana:

<sup>29</sup> Tata Diusu, beju ema pamanu, mique Jabeituti Deja baitia putsu.

<sup>30</sup> Beidaji ema, Salvador baitia putsu.

<sup>31</sup> Miada cristiano cuana bameana.

<sup>32</sup> Mi jepuiti judío mahue cuana ebuetsuata.

Israelita cuana da beidaji eputa, tueda tuna sa Echua Puji aida epu putsu.

<sup>33</sup> Beju José, María detse nimetiwana, Simeón sa mimi cuana Jesús jepuiti id'aba putsu. <sup>34</sup> Da su Simeón ja, “Diusu ja meibunebataque”, atana huecuana. Tuahueda María uja quisatana:

—María, id'abaque ema. Ye yanana jepuiti ebia su israelita cuana castigo su epuenitita. Daja huecha pia cuana ebia su d'ejí su eputa. Tueda da Diusu sa Jabeituti Deja putsu, jucuada tueda tsada mahue ebata. <sup>35</sup> Jucuada cristiano cuana sa etsia piba cuana ebametita. Pamapa tueda ai cuana ja mique muesumu enebameta.

<sup>36</sup> Beju dapia templo su piada epuna punatia Diusu sa quisaquisa puji anina. Tueda Ana banime puina. Mesa tata Fanuel banime. Tueda da Aser sa familia jenetia puina. Epuneje quitaita su hue, jahuetiana. Siete mara hue jaquina-tiana tse. Da su manuana mesa yahue. Mue neicha jahuetiyu puana. <sup>37</sup> Ocho tunca pushi ejaitiana maraji puina. Cuinana bue mahue templo jenetia. Dapia Diusu mebajataina dhidha, tsine. Ayuna pu putsu, Diusu mitsu bahue puina. <sup>38</sup> Da su Simeón emimineti cama, Ana ja nariatana huecuana. Naria putsu, beidaji neje Diusu diusulupai apirutana. Diusulupai apetana su, yanana Jesús jepuiti beju cristiano cuana quis-apirutana. Tueda cristiano cuana ja di Diusu sa Jabeituti Deja id'uataina israelita cristiano cuana d'ejí su ya puji.

### *Nazaret ejude su jasiapatitaibana huecuana*

<sup>39</sup> Da su beju jacuatsasiati cuana ape putsu, José, mesa familia chidi neje Galilea yahua su mesa ejude quitaita Nazaret su jasiapatibana. <sup>40</sup> Beju yanana Jesús saida, tucheda, bahue eni sehuana. Diusu ja tueda ebia su ibunebatana.

### *Yanana Jesús templo su yani tejetana tse*

<sup>41</sup> Pamapa mara José, María neje Jerusalén ejude su puti bahue puina pascua tsine ebati puji. <sup>42</sup> Beju Jesús piada tunca beta ejaitiana maraji su, mesa tata detse ja Jerusalén ejude su

dusutana pascua tsine ebati puji. <sup>43</sup> Tsine pupeana su, José, María Jerusalén ejude jenetia cuinanana Nazaret ejude su esiapati puji. Beju Jesús mu Jerusalén ejude su anitiana. Mesa tata detse bue mahue puina. <sup>44</sup> Tuatseda japibatiana Jesús cristiano cuana neje epubeyu pepe puana tse. Piada tsine jaitianana su, tuatseda Jesús chacupirutana tse eshanapa cuana duju su. <sup>45</sup> Mue teje atana tse putsu, jasiapatibana tse Jerusalén ejude su Jesús echacu puji.

<sup>46</sup> Quimisha tsine jenetia Jesús templo su tejetana tse. Dapia tueda netina Moisés sa jacuatsasiati ebuetsuaji cuana duju su. Quisakuisa punetina tuna neje. Daja huecha quisabatanetina huecuana. <sup>47</sup> Tuna sa jaquisabati cuana saida jeutsutaina. Pamapa eid'abaji cuana nimetiunetitana, Jesús ja Diosu sa mimi shanapaenitana putsu, tueda bahue eni ba putsu. <sup>48</sup> Beju mesa tata detse tu ba putsu, nimetiuana tse. Da su María ja Jesús uja quisabatana:

—Quema ebacua chidi, ¿jucujaja su mida etseju daja aitia? Etseju mi ebia su chacudhaana. Chacudhaa putsu, ebia su pibapibana.

<sup>49</sup> Da su Jesús ja jeutsutana tse:

—¿Ai puji ni da metseda ema echacuinia? ¿Bue mahue jia maida metseda quema tata sa ai cuana quema a taji?

<sup>50</sup> Beju Jesús sa mimi cuana tuatseda mue shanapa atana tse.

<sup>51</sup> Da su tuatse neje Jesús jasiapatibana Nazaret ejude su, tuatse sa eme su hue tsuhu yani putsu. María ja mu pamapa tueda ai cuana enime su ichasetatana. <sup>52</sup> Daja tucheda, bahue eni sehuanetiame puana Jesús. Diosu ja tueda tsabatana. Pamapa cristiano cuana ja di Jesús tsabatana.

### 3

*Juan Bautista d'anita yahua su quisakuisa puana  
(Mateo 3.1-12; Marcos 1.1-8; Juan 1.19-28)*

<sup>1</sup> Da tiempo su Roma ejude su piada echua puji huaraji aida puina. Tueda da Tiberio banime puina. Piada tunca pishica ejaitiana mara jacuatsasaitiana beju. Da tiempo su Pilato Judea yahua sa romano huaraji aida puina. Herodes Antipas Galilea yahua sa echua puji puina. Mesa edue Felipe Iturea, Traconite yahua detse sa echua puji puina. Lisancias Abilinia yahua sa echua puji puina. <sup>2</sup> Anás, Caifás detse da pamapa sacerdote cuana sa echua puji aida puina. Da tiempo su Diosu Juan neje jamitsutina d'anita yahua su. <sup>3</sup> Juan da ejude meamea ena Jordán maje detse su puniunetina quisakuisa epu puji. Cristiano cuana peje su quisakuisa puana tuna sa piba cuana Diosu peje su papibaturucatita huecuana puji,

Diusu peje su yahui neje paichaderatita huecuana puji. Daja tuneseda pu taji puina Diusu ja tuna sa jucha cuana paperdonata puji. <sup>4</sup> Biahua tiempo da Diusu sa quisaquisa puji Isaías chenu ja Juan jepuiti uja deretaidha:

Piada etsui jubida d'anita yahua su uja epuani:

“Mebasetatique Echua Puji epue su puji.”

<sup>5</sup> Pamapa ebutsepiati da saida beju.

Pamapa cuadhata emata cuana da epaipeti.

<sup>6</sup> Pamapa turituri da ebutsepiati.

Pamapa rudurudu da emedimediapeti.

Diusu ja cristiano cuana d'eji su yata pamapa ja eshanapata.

<sup>7</sup> Da su cristiano cuana Juan peje su putitana tuahueda. Diusu peje su yahui neje paichaderata huecuana puji. Beju Juan ja uja ataina huecuana:

—Micuaneda da bacua d'aida cuana nime. Micuaneda ema peje su epusiu yahui neje Diusu sa puji eichaderameti puji Diusu sa castigo jubida jenetia ejududu puji. Beju micuaneda mu Diusu peje su japibaturucatija mahue. <sup>8</sup> Equene mepibaturucatique Diusu peje su. Saida, butsepi mepuniunetique, yahui neje jaichaderametiji mahue su. Be ebia su aida mebatiji, micuaneda da Abraham chenu sa familia jenetia putsu. Tueda mu mue ai biame beju. Yama micuana butsepi equisainia, Diusu ja ye tumu cuana jenetia di Abraham chenu sa ebacua cuana ata cua, ahua tuseda tsada su. <sup>9</sup> Beju hacha basetajiji eneti aqui cuana eque puji. Pamapa aqui cuana ejaja saida pu bue mahue equepeta. Cuati su ed'ed'apeta pamapa. Daja Diusu ja yatayu tu peje su japibaturucatija mahue cuana.

<sup>10</sup> Da su cristiano cuana ja Juan quisabatana:

—¿Ai ni da ecuanaju da su a cua beju?

<sup>11</sup> Juan ja jeutsutana huecuana:

—Quebata sa beta ejud'uji yani, pia jud'uji mahue piada tia taji. Quebata sa ai dia taji cuana tupu yani, pia ai dia taji mahue sajatia taji.

<sup>12</sup> Beju impuesto chujebajaji cuana di puetana yahui neje Diusu sa puji eichaderameti puji. Tuneda Juan quisabatana uja:

—Ebuetsuaji, ¿ai ni da ecuanaju a cua?

<sup>13</sup> Da su Juan ja jeutsutana huecuana:

—Be mechujebajaji ebia su. Tupuajiji hue mechujebajaque, cuaja jacuatsasiati epuani batame.

<sup>14</sup> Beju soldado cuana di puetana yahui neje Diusu sa puji eichaderameti puji. Daja huecha quisabatana huecuana:

—¿Ai ni da ecuanaju a cua?

Da su Juan ja jeutsutana huecuana:

—Be memejemiji ai biame cristiano cuana. Be cristiano cuana icheja meaji chipilu emejemi puji. Be bid'umimi neje tuaquisaji cristiano cuana chipilu emejemi puji. Beidaji mepuque micuana sa echuje neje.

<sup>15</sup> Beju Diosu sa Jabeituti Deja cristiano cuana ja ebia su id'uataina. Da putsu, “¿Juan jia da Diosu sa Jabeituti Deja?” japibatitana huecuana. <sup>16</sup> Juan ja beju uja quisatana pamapa huecuana:

—Aimue ema mu Diosu sa Jabeituti Cristo mahue. Tueda mu ema tije epusiu. Enei hue yama micuana Diosu sa puji eichaderainia yahui neje. Beju tuahueda mu micuana Diosu sa puji eichaderata Espiritu Santo sa tucheda neje. Tueda da ema ebia su huaraji tucheda. Aimue ema tupu mahue tu emebaja puji. <sup>17</sup> Tueda epusiu cristiano cuana arusu pu cua nime etsabihue puji. Ejaja chujemame eichaderata etsabi jenetia. Ejaja beju eichasetata tusa ichaseta jude ete su. Etsabi mu da cuati su ed'ed'ata. Beju pamapa tu peje su jei eputani cuana da ejaja nime. Diosu neje cielo su yanienititayu huecuana. Pamapa tu jei aja mahue yatani cristiano cuana da etsabi nime. Cuati castigo su epuenititayu huecuana. Dapia cuati da tiju bue mahue.

<sup>18</sup> Daja Juan ja cristiano cuana quisatana Diosu sa quisa saida cuana. <sup>19</sup> Echua puji Herodes Antipas d'ayatana, tusa edue Felipe sa ehuané Herodías neje jahuanetiana putsu, Felipe eid'e hue biame. Pia ai madhada cuana ataina bia su di Juan ja Herodes Antipas d'ayatana. <sup>20</sup> Beju Herodes Antipas ja Juan jei aja mahue atana. Pia ai madhada cuana daja hue aniamé atana. Juan teriichametana.

*Jesús yahui neje Diosu sa puji jaichaderametitana*  
(Mateo 3.13-17; Marcos 1.9-11)

<sup>21</sup> Beju Juan terijiji mahue su, cristiano cuana Diosu sa puji ichaderatana yahui neje. Jesús di Juan peje su putiana Diosu sa puji yahui neje eichaderameti puji. Da su Juan ja Jesús ichaderatana Diosu sa puji. Jaichaderameti putsu, Jesús Diosu neje jamitsutiana. Jamitsutiana cama, cielo jadhatiana. <sup>22</sup> Espiritu Santo huaitucu nime bute putsu, Jesús bia su netiuteana. Da sa beju Diosu cielo jenetia uja puana:

—Mida da quema ibunedá ebacua. Mi neje ema beidaji.

*Jesús sa familia chenu cuana*  
(Mateo 1.1-17)

<sup>23</sup> Beju José ja Jesús sehuametana. Jesús da quimisha tunca maraji su, beju quisaquisa pupiruana. Buetsuapirutana cristiano cuana. Ye cuana da Jesús sa familia chenu cuana sa ebani: José da Elí sa ebacua puina. <sup>24</sup> Elí da Matat sa ebacua puidha. Matat da Leví sa ebacua puidha. Leví da Melqui

sa ebacua puidha. Melqui da Jana sa ebacua puidha. Jana da José sa ebacua puidha. <sup>25</sup> José da Matatías sa ebacua puidha. Matatías da Amós sa ebacua puidha. Amós da Nahum sa ebacua puidha. Nahum da Esli sa ebacua puidha. Esli da Nagai sa ebacua puidha. <sup>26</sup> Nagai da Maat sa ebacua puidha. Maat da Matatías sa ebacua puidha. Matatías da Semei sa ebacua puidha. Semei da José sa ebacua puidha. José da Judá sa ebacua puidha. <sup>27</sup> Judá da Joana sa ebacua puidha. Joana da Resa sa ebacua puidha. Resa da Zorobabel sa ebacua puidha. Zorobabel da Salatiel sa ebacua puidha. Salatiel da Neri sa ebacua puidha. <sup>28</sup> Neri da Melqui sa ebacua puidha. Melqui da Adi sa ebacua puidha. Adi da Cosam sa ebacua puidha. Cosam da Elmodam sa ebacua puidha. Elmodam da Er sa ebacua puidha. <sup>29</sup> Er da Josué sa ebacua puidha. Josué da Eliezer sa ebacua puidha. Eliezer da Jorim sa ebacua puidha. Jorim da Matat sa ebacua puidha. <sup>30</sup> Matat da Leví sa ebacua puidha. Leví da Simeón sa ebacua puidha. Simeón da Judá sa ebacua puidha. Judá da José sa ebacua puidha. José da Jonán sa ebacua puidha. Jonán da Eliaquem sa ebacua puidha. <sup>31</sup> Eliaquem da Melea sa ebacua puidha. Melea da Mainán sa ebacua puidha. Mainan da Matata sa ebacua puidha. Matata da Natán sa ebacua puidha. <sup>32</sup> Natán da David sa ebacua puidha. David da Isaí sa ebacua puidha. Isaí da Obed sa ebacua puidha. Obed da Booz sa ebacua puidha. Booz da Salmón sa ebacua puidha. Salmón da Naasón sa ebacua puidha. <sup>33</sup> Naasón da Aminadab sa ebacua puidha. Aminadab da Aram sa ebacua puidha. Aram da Esrom sa ebacua puidha. Esrom da Fares sa ebacua puidha. Fares da Judá sa ebacua puidha. <sup>34</sup> Judá da Jacob sa ebacua puidha. Jacob da Isaac sa ebacua puidha. Isaac da Abraham sa ebacua puidha. Abraham da Taré sa ebacua puidha. Taré da Nacor sa ebacua puidha. <sup>35</sup> Nacor da Serug sa ebacua puidha. Serug da Ragau sa ebacua puidha. Ragau da Peleg sa ebacua puidha. Peleg da Heber sa ebacua puidha. Heber da Sala sa ebacua puidha. <sup>36</sup> Sala da Cainán sa ebacua puidha. Cainán da Arfaxad sa ebacua puidha. Arfaxad da Sem sa ebacua puidha. Sem da Noé sa ebacua puidha. Noé da Lamec sa ebacua puidha. <sup>37</sup> Lamec da Matusalén sa ebacua puidha. Matusalén da Enoc sa ebacua puidha. Enoc da Jared sa ebacua puidha. Jared da Majalaleel sa ebacua puidha. Majalaleel da Cainán sa ebacua puidha. <sup>38</sup> Cainán da Enós sa ebacua puidha. Enós da Set sa ebacua puidha. Set da Adán sa ebacua puidha. Adán da Diusu sa ebacua puidha beju.



*Ishahua ja Jesús pirubatana*  
(Mateo 4.1-11; Marcos 1.12-13)

<sup>1</sup> Da su Jesús Jordán ena jenetia jasiapatibana. Espíritu Santo ja tueda d'anita yahua su dusutana. <sup>2</sup> Dapia d'anita yahua su Jesús pushi tunca tsine aniana. Beju dhemanuana, pushi tunca tsine diadiaji mahue putsu. <sup>3</sup> Da su Ishahua pueana tu epiruba puji. Tuahueda Jesús uja atana:

—Ahua mida Diosu sa ene quita ebacua su, cuatsasiaque ye tumu cuana ai dia taji cuana patsapiati.

<sup>4</sup> Da su Jesús ja jeutsutana Ishahua:

—Mahue. Aimue daja yama ya mahue. Uja derejiji yani: “Aimue cristiano cuana ai dia taji cuana bahui neje eid'e yanita mahue. Pamapa Diosu sa mimi neje di eid'e yanita huecuana.”

<sup>5</sup> Da su Ishahua ja Jesús dusutana emata bauda matina su. Da jenetia pamapa ye mundo su ejude aida cuana Jesús bametana. <sup>6</sup> Uja Ishahua ja Jesús atana:

—Pamapa ye ejude aida cuana da quema. Ye cuana yama inatsuidha. Aidhe biame detse yama tia cua ye ejude aida cuana. <sup>7</sup> Da su ahua mida ema butse su tururu putsu, ema emitsutsua su, yama mi etia pamapa ye ejude aida cuana miada ecuatsasia puji.

<sup>8</sup> Da su Jesús ja Ishahua jeutsutana:

—Netideraque ema naja jenetia, Ishahua. Diosu sa quirica su uja derejiji yani: “Mique Diosu bahui mitsutsua taji. Tueda bahui mique mebaja taji.”

<sup>9</sup> Da su Ishahua ja Jesús dusutana Jerusalén ejude su. Templo matina su tsuatiana tse. Dapia tuahueda Jesús uja atana:

—Ahua mida Diosu sa ene quita ebacua su, tenaque yahua su u jenetia, uja derejiji yani putsu:

<sup>10</sup> Diosu ja ángel cuana ecuatsasiata mi painatsihuata huecuana puji.

<sup>11</sup> Tuna sa eme neje mi einatsuta huecuana mique ehuatsi tumu su edhapujuti mahue puji.

<sup>12</sup> Da su Jesús ja Ishahua uja jeutsutana:

—Aimue ema daja epu mahue. Daja huecha uja derejiji yani: “Be abaji mique Diosu.”

<sup>13</sup> Da su beju Ishahua quejucua tiempo puji hue netiderana Jesús peje jenetia, mue cuaja piruba taji mahue ba putsu.

*Jesús Galilea yahua su buetsuapirutana*  
(Mateo 4.12-17; Marcos 1.14-15)

<sup>14</sup> Jesús Galilea yahua su jasiapatiana. Espíritu Santo sa tucheda mesa anina. Pamapa tueda yahua su aniji cristiano cuana ebia su mimiana Jesús jepuiti. <sup>15</sup> Jesús ja cristiano

cuana buetsuataina pamapa judío cuana sa jadhitati jude ete cuana su. Pamapa su tuseda puji saida mimitana.

*Jesús Nazaret ejude su buetsuatana*

*(Mateo 13.53-58; Marcos 6.1-6)*

<sup>16</sup> Da su Jesús Nazaret ejude su putibana. Tueda ejude su sehuana. Beju janahua tsine cuinana su, jahitati jude ete su nubiana, cuaja tusa puiti batame. Nubi putsu, beju netianana Tata Diosu sa quirica jubida emimiamé puji, pia cuana ja paid'abata puji. <sup>17</sup> Diosu sa profeta Isaías chenu ja deretaidha quirica beju menajatiatana huecuana. Da su uja mimiamépirutana:

<sup>18</sup> Espíritu Santo sa tucheda quema yani.

Diosu ja ema huaratiatana mesa quisa saida cuana quisaquisa epu puji cristiano puri cuana peje su.

Ema beitutana ebía su epibapibatani cuana beidaji yameyu puji, jucha sa eme su yanita cuana d'ejí su ya puji, padha cuana tuasaida yameyu puji, pamapa nedaneda ajiji cuana d'ejí su ya puji.

<sup>19</sup> Tuahueda ema cristiano cuana peje su beitutana Diosu ja jiahue tuneda d'ejí su yataniyu equisa puji.

<sup>20</sup> Daja mimipe putsu, quirica teritana. Jadhitati jude ete sa tsahuaji quirica tia putsu, beju aniuteana. Pamapa jadhitati-jiji yanita cuana ja daja hue chamainiame Jesús atana. <sup>21</sup> Da su neicha Jesús mimipiruana. Uja quisatana huecuana:

—Ye yama mimiaméitia Diosu sa mimi cuana micuana butse su jiahue quita beju equitanainiayu.

<sup>22</sup> Da su beju pamapa su saida mimitana Jesús sa puji. Nimetiunetitana huecuana, tusa mimi cuana da saida putsu. Tuneda cama uja jaquisabatitana huecuana:

—¿Aimue jía maida ye José sa ebacua mahue?

<sup>23</sup> Jesús ja atana huecuana:

—Micuaneda da ema quisaja uja: “Jaidueneti bahue su, mi mehua hue jaiduenetique. Cuaja mi Capernaum ejude su nimetiuda aida cuana ana nime, upia mi que ejude su macha daja aque.” Daja micuaneda epibatiani.

<sup>24</sup> Jesús ja daja hue quisainiame atana huecuana uja:

—Enei hue yama micuana equisainia, Diosu sa profeta aimue saida ebatsutani huecuana mahue tusa ejude quitaita su. Biahua tiempo Diosu sa profeta cuana aimue israelita cuana ja saida batsutaidha huecuana. <sup>25</sup> Madhada ahue manujiji cuana anitaidha, Diosu sa profeta Elías chenu eid'e su. Da tiempo su quimisha mara edusete aimue nai puidha mahue putsu, pamapa yahua je mid'e puidha. <sup>26</sup> Diosu ja aimue Elías chenu beitu israelita ahue manujiji peje su tuseda Elías patsahuata puji, israelita cuana ja aimue tueda saida

batsutaidha mahue putsu. Beju Diosu ja Elías beitudaidha pia yahua jenetia epuna ahue manujiji peje su tuahueda Elías patsahuata puji. Tueda epuna israelita mahue puidha. Sarepta ejude su anidha Sidón ejude naja su. <sup>27</sup> Da tiempo su di madhada nedaji cuana Israel yahua su anitaidha. Dueji lepraji cuana anitaidha, Diosu sa profeta Eliseo chenu anidha su. Beju aimue tuneda mu piada biame saisiamentaidha mahue, israelita cuana ja aimue Eliseo saida batsutaidha mahue putsu. Beju Eliseo ja piada israelita mahue deja bahui saisiamentaidha. Tueda deja Naamán banime Siria yahua jenetia.

<sup>28</sup> Da su pamapa jadhitiijiji cuana beju ebia su duininitana, Jesús sa quisa id'aba putsu. <sup>29</sup> Netiana putsu, Jesús dusutana huecuana ejude tsahua su. Tueda ejude da emata bia su anina. Da su Jesús emata queque su dusutana huecuana. Da jenetia nunujusiauteja adhaatana huecuana. <sup>30</sup> Jesús mu beju tuna duje jaitiana putsu, putibana.

*Deja einid'u madhadaji*  
(Marcos 1.21-28)

<sup>31</sup> Da su Jesús Capernaum ejude su putibana. Tueda ejude da Galilea yahua su anina. Dapia tuahueda cristiano cuana buetsuapirutana pamapa janahua tsine cuana su. <sup>32</sup> Beju cristiano cuana ebia su nimetiunetitana, Jesús ja huaraji aida mimi neje buetsuatana huecuana putsu.

<sup>33</sup> Dapia jadhitati jude ete su deja einid'u madhadaji anina. Tueda uja tsiatsiana:

<sup>34</sup> —Jesús, cuinanaque ecuanaju peje jenetia. ¿Ai ni da miqueda ecuanaju neje a taji? ¿A mida pueitia ecuanaju ecastiga puji? Yama mi eshanapainia. Mida da Diosu sa Ebaqua.

<sup>35</sup> Da su Jesús ja einid'u madhada jubida cuatsasiatana uja: —¡Mitanaque! ¡Cuinanaque ye deja peje jenetia!

Da hora su einid'u madhada ja deja jusiautetana yahua su cristiano cuana butse su. Daja a putsu, deja peje jenetia beju cuinanana. Mue cuaja biame a deja. <sup>36</sup> Da su pamapa su rubutanatana huecuana. Tuneda cama uja jaquisabatitana:

—¿Ai jabuetsuati cuana da ye? Ye Jesús ja einid'u madhada cuana huaru jubida cuatsasia bahue. Beju tuneda jei yatani.

<sup>37</sup> Da putsu, pamapa tueda yahua je aniji cuana Jesús jepuiti bahue putana.

*Jesús ja Simón Pedro sa ehuae sa cuara saisiamentana*  
(Mateo 8.14-15; Marcos 1.29-31)

<sup>38</sup> Da su beju Jesús jadhitati jude ete jenetia cuinanana. Simón sa ete su putiana. Ete su nubi putsu, Simón sa ehuae sa cuara ebia su nedaji saina batana. Dapia aniji cuana ja

Jesús jubida bajatana epuna pasaisiameta puji. <sup>39</sup> Da su Jesús epuna naja su janariati putsu, neda jubida d'ayatana. Beju epuna saisiana. Da su netiana putsu, epuna saida bapirutana huecuana.

*Jesús ja madhada nedaji cuana saisiametana*  
(Mateo 8.16-17; Marcos 1.32-34)

<sup>40</sup> Beju id'eti enubihu su, tsapiapiati nedaji cuana dusupirutana huecuana Jesús peje su. Tuahueda mesa eme tuna bia su ichatana putsu, saisiametana huecuana pamapa. <sup>41</sup> Einid'u madhada cuana da jucuada nedaji cuana peje jenetia jusi-acuinatana. Tueda einid'u madhada cuana uja tsiatsiatana:

—Mida da Diosu sa Ebacua.

Da su Jesús ja einid'u madhada cuana jubida d'ayatana pamitanata huecuana puji. Daja einid'u madhada cuana ja Jesús atana, tueda da Diosu sa Jabeituti Deja bahue putana huecuana putsu.

*Jesús da Galilea yahua je quisaquisa puniunetiana*  
(Marcos 1.35-39)

<sup>42</sup> Beju pia tsine apudaya Jesús ejude jenetia cuinanana tu mehua chujemame yaniti puji. Cristiano cuana ja tueda chacutaina. Tu peje su putitana huecuana su, Jesús nahueja adhaatana huecuana tuna peje jenetia eputi mahue puji.

<sup>43</sup> Da su beju Jesús ja uja atana huecuana:

—Diosu ecuatsasiati jepuiti da quema quisati taji yani pia ejude cuana su. Da puji ema Diosu ja beitutana.

<sup>44</sup> Da su Jesús pamapa Galilea yahua je puniunetina. Diosu sa quisa saida cuana judío cuana sa jadhitati jude ete cuana je quisaquisa puana.

## 5

*Ebia su se cuana jemitana huecuana*  
(Mateo 4.18-22; Marcos 1.16-20)

<sup>1</sup> Beju pia tsine Jesús da Galilea bai maje su netina. Jucuada cristiano cuana tu eneti su cuinatana. Ebia su janariatitana putsu, janunununuatitana huecuana, Diosu sa quisa saida cuana id'abaja putsu. <sup>2</sup> Beju canoa aida beta saina bai maje su memahue. Canoa emetse cuana ja tarrafa cuana bai maje su rucuatasa. <sup>3</sup> Piada canoa Simón sa puina. Tueda canoa aida su Jesús nubiana. Da su Jesús ja Simón cuatsasiatana uja:

—Nunuque canoa edume su pad'i yama da jenetia cristiano cuana equisa puji, d'ejí mahue putsu.

Beju da jenetia Jesús ja cristiano cuana buetsuapirutana. <sup>4</sup> Quisape putsu, Jesús ja Simón atana:

—Canoa dusuque dueda su. Tarrafa siaque esia puji.

<sup>5</sup> Da su Simón ja Jesús uja atana:

—Ebuetsuaji, yanacane ecuanaju esia pudhidhaja. Mue ecuanaju ai biame jemitsua. Beju miada ema ecuatsasiainia putsu, yama tarrafa pasiaiti.

<sup>6</sup> Beju eriretsuainia je, jad'iupirutiana tarrafa, se ebia su nubinetiana putsu. <sup>7</sup> Da su pia esia puji cuana pia canoa su ihuatana huecuana tuna patsahuata puji. Beju puetana huecuana. Jucuada se cuana jemitsuatana huecuana. Beta canoa aida sejeatana huecuana. Canoa detse que chidi hue aninubicueana, ebia su sejeajiji putsu. <sup>8</sup> Beju Simón Pedro ja tueda ba putsu, Jesús butse su tururuana. Tuahueda uja Jesús atana:

—Mida da ebia su saida. Ema mu juchaji putsu, saida mahue ema mi naja su eneti puji.

<sup>9</sup> Daja mimiana Simón, ebia su rubutana putsu, nimetiuda aida batana putsu. Pamapa tu neje esia puji cuana di rubutanatana. <sup>10</sup> Simón sa ebuqueji Jacobo, Juan detse di rubutanana. Tuatse sa tata da Zebedeo banime puina. Da su beju Jesús ja Simón uja atana:

—Be iyuame puji. Beju jiahue jenetia miada cristiano cuana eduse ema peje su.

<sup>11</sup> Da su canoa aida detse murida su riretsua putsu, Jesús tije apirutana huecuana.

*Jesús ja deja lepraji saisiametana*

*(Mateo 8.1-4; Marcos 1.40-45)*

<sup>12</sup> Jesús pia ejude su netina su, piada deja lepraji pueana tu eba puji. Jesús peje su cuina putsu, tu butse su d'epesatiana. Uja atana Jesús:

—Echua Puji, ahua mique tsada su, miada ema saisiametana.

<sup>13</sup> Da su Jesús ja deja d'apaba putsu, uja atana deja:

—Tsada quema mida esaisi.

Beju Jesús daja epuani cama, deja lepraji saisiana. <sup>14</sup> Jesús ja tueda cuatsasiatana uja:

—Be aidhe biame quisaji yama mi saisiametana. Jiahue quita hue putique sacerdote peje su tuahueda mi saisijiji bataque puji. Da su beju Diosu irutsuaque, cuaja Moisés chenu sa jacuatsasiati epuani batame, pamapa cristiano cuana ja mida saisijiji pashanapata puji.

<sup>15</sup> Beju cristiano cuana Jesús ja ai atana cuana bahue puppetana. Pamapa su tu peje su putija pudhaatana tusa mimi eid'aba puji. Nedaji cuana tu peje su dusuja adhaatana huecuana tuahueda pasaisiameta puji. <sup>16</sup> Beju Jesús mu quepia cristiano cuana mue ani su putiana Diosu neje emitsuti puji.

*Jesús ja deja ase bue mahue saisiametana*

*(Mateo 9.1-8; Marcos 2.1-12)*

<sup>17</sup> Pia tsine Jesús ja cristiano cuana buetsuatanina. Piada piada fariseo, jacuatsasiati ebuetsuaji cuana di dapia anitaina. Tuneda pamapa Galilea, Judea yahua jenetia puetana. Jerusalén ejude jenetia di beju puetana huecuana. Pamapa dapia aniji cuana ja Diosu sa tucheda batana, Jesús ja nedaji cuana saisiemetana putsu. <sup>18</sup> Jesús ja ete dume su cristiano cuana buetsuatanetina cama, pia deja cuana macha cuinatana. Deja ase bue mahue mapabetana huecuana. Ete dume su Jesús eneti su nubiamēja adhaatana huecuana ase bue mahue Jesús butse su ehuaña puji. <sup>19</sup> Cuaja nubi taji mahue jabatitana huecuana, d'eji mahue putsu. Da su beju ete epa pachata bia su ase bue mahue dusutsuatitana huecuana. Piada piada teja cuana dhiratana huecuana. Beju rara atana huecuana ete bia su. Tueda rara je chahui su deja ase bue mahue butemetana huecuana cristiano cuana duju su Cristo butse su. <sup>20</sup> Jesús beju nimetiuaña, tueda deja cuana tu peje su ebia su enimetucheatiani ba putsu. Da su ase bue mahue uja atana:

—Deja, mique jucha cuana yama perdonaitia beju.

<sup>21</sup> Da su jacuatsasiati ebuetsuaji, fariseo cuana tuneda cama uja jaquisabatitana: “¿Ai deja jia ye? Tuahueda Diosu eduininiemetani tusa mimi neje. Aimue aiya biame cristiano cuana sa jucha cuana perdonata cua mahue. Diosu ja bahui jucha cuana perdonata cua.”

<sup>22</sup> Beju Jesús ja tuna sa piba cuana shanapatana putsu, uja quisatana huecuana:

—¿Ai puji micuaneda daja madhada epibatiani? <sup>23</sup> Ahua yama deja, “Mique jucha cuana yama eperdonainia”, ya su, ahua yama, “Netianaque, aseque”, ya su, beju quema puji mu tupupai hue. <sup>24</sup> Daja yama deja yainia micuana ebame puji, ye mundo su ema tucheda eni cristiano cuana sa jucha cuana eperdona puji.

Da su Jesús ja uja deja nedaji cuatsasiatana:

—Netianaque. Mique chahui jemitsuaque. Putiyuque mique ete su.

<sup>25</sup> Daja yatani cama, beju ase bue mahue tuna butse su netianana. Tusa chahui jemitsuatana. Tusa ete su putibana. Diosu ebia su mitsutsuanataibana. <sup>26</sup> Pamapa dapia aniji cristiano cuana ebia su nimetiunetitana. Diosu mitsutsuatana huecuana. Iyuame neje tuneda cama uja putana:

—Beju jiahue ecuaneda ai nimetiuda saida cuana baitia.

*Leví ja Jesús buquepirutana  
(Mateo 9.9-13; Marcos 2.13-17)*

<sup>27</sup> Jesús da ete jenetia cuinana putsu, deja impuesto chujebajaji batana etesque su yani. Tueda da impuesto chujebaja

jude su aniana. Tueda Leví banime puina. Da su Jesús ja uja tueda cuatsasiatana:

—Tije ema aque.

<sup>28</sup> Da su Leví netianana. Pamapa mesa ai cuana ichajusi-atana Jesús neje epuniuneti puji.

<sup>29</sup> Beju Leví ja Jesús sa puji tsine aida atana mesa ete su. Dapia tsine su jucuada deja impuesto chujebajaji cuana anitaina. Pia deja cuana di tuna neje anitaina. <sup>30</sup> Beju fariseo, jacuatsasiati ebuetsuaji cuana ja Jesús sa discípulo cuana jubida tuaquisapirutana, discípulo cuana deja juchaji cuana neje ediadiatani ba putsu. Uja tuaquisapirutana huecuana:

—¿Jucuaja su ni micuaneda impuesto chujebajaji, juchaji deja cuana neje ediadiani?

<sup>31</sup> Da su Jesús ja daja id'aba putsu, uja fariseo cuana jeutsutana:

—Jaiduenetiji da aimue saida cuana sa puji mahue.

<sup>32</sup> Nedaji cuana sa puji bahui. Aimue ema pue cristiano butsepi cuana eihua puji mahue. Beju ema pueana juchaji cristiano cuana eihua puji Diosu peje su papibaturucatita huecuana puji.

*Cristiano cuana ja Jesús ayuno jepuiti quisabatana  
(Mateo 9.14-17; Marcos 2.18-22)*

<sup>33</sup> Da su beju fariseo cuana ja Jesús quisabatana:

—Juan Bautista sa discípulo, fariseo sa discípulo cuana ebia su ayuna eputani. Templo su ebia su Diosu emitsutani huecuana. Mique discípulo cuana ja mu aimue daja yatani mahue. Pamapa tsine beju ediadiatani huecuana. ¿Jucuaja su ni daja yatani huecuana:

<sup>34</sup> Jesús ja jeutsutana huecuana:

—¿Ai jahuaneti tsine su ihuajiji cuana ayuna puta cua bata, ehuanetisa deja tuna neje yani tupu? Ehuanetisa deja tuna neje yani tupu, ihuajiji cuana aimue ayuna eputa mahue.

<sup>35</sup> Tueda ihuajiji cuana duju jenetia ejemicuinata su chu, da hora su ihuajiji cuana ayuna eputa, aimue tueda tuna neje yani mahue putsu.

<sup>36</sup> Da su Jesús ja bahue quisa neje buetsuatana huecuana uja:

—Aimue detse etse ejud'uji eichacua eped'u jemita cua mahue ejud'uji edhi eremetia puji. Ahua daja yata su, ejud'uji eichacua aimue saida epu mahue. Daja huecha ejud'uji edhi di aimue saida epu mahue, eped'u eichacua ejud'uji edhi neje aimue saida epu mahue putsu. <sup>37</sup> Daja huecha aimue vino eichacua etse emeji edhi su ichasetta cua mahue. Ahua daja etse a cua su, vino eichacua ja emeji epujuta. Da su vino, emeji neje tupupai taitana cua beju. <sup>38</sup> Da putsu, vino

eichacua da emeji eichacua su ichaseta taji. <sup>39</sup> Daja a putsu, pamapa saida epu. Vino, emeji neje tupupai beju saida epu. Ahua quebata ja vino edhi eid'ita su, aimue vino eichacua tsada ebata mahue. "Edhi da ebia su saida", tueda epu.

Daja Jesús ja bahue quisa neje buetsuatana huecuana. Tusa jabuetsuati cuana da eped'u eichacua, vino eichacua nime. Fariseo cuana sa jabuetsuati cuana mu ejud'uji edhi, emeji edhi nime. Aimue huamahuama ehuaruti mahue. Jesús sa jabuetsuati eichacua cuana su etse jei epu su, aimue jabuetsuati edhi cuana tsada ebayu mahue.

## 6

*Discípulo cuana ja janahua tsine su d'ije raritana*  
(Mateo 12.1-8; Marcos 2.23-28)

<sup>1</sup> Pia janahua tsine su Jesús, mesa discípulo cuana neje d'ije duje ejaitianasa je, discípulo cuana ja eju cuana raridujudujuatana, dhemanu putsu. Ejaja iruruatana huecuana edia puji.

<sup>2</sup> Piada piada fariseo cuana ja daja ba putsu, discípulo cuana tuaquisatana huecuana uja:

—Daja a taji mahue janahua tsine su, jacuatsasiati cuana daja epuani putsu. ¿Jucuaja su ni micuaneda daja yainia?

<sup>3</sup> Da su Jesús ja uja jeutsutana huecuana quisaba neje:

—¿Aimue jia maida micuaneda mimiameana mahue cuaja David chenu ja ataidha mesa ebuqueji cuana neje, dhemanutaidha huecuana su? <sup>4</sup> Tueda nubidha Diosu sa templo su pan iyuda edia puji. Ebuqueji cuana pan iyuda tiataidha padiata huecuana puji. Beju tueda pan iyuda mu sacerdote cuana sa bahui dia taji puidha. David chenu da dhemanu putsu, iyuda pan diataidha, jacuatsasiati aimue daja anidha biame. <sup>5</sup> Daja huecha ema da janahua tsine emetse. Quema bahui janahua tsine su ai a taji cuana cuatsasia taji, ema Diosu sa Jabeituti Deja putsu.

*Jesús ja deja mechehui saisiametana*  
(Mateo 12.9-14; Marcos 3.1-6)

<sup>6</sup> Pia janahua tsine su Jesús jadhitati jude ete su nubiana cristiano cuana ebuetsua puji. Dapia piada deja mechehui anina. <sup>7</sup> Jacuatsasiati ebuetsuaji, fariseo cuana ja Jesús cuadhibitana ahua Jesús ja janahua tsine su deja mechehui esaisiameta, aimue aidhe sa biame janahua tsine su mudu-mudu taji mahue putsu, ahua Jesús ja daja yatani ba putsu, etuaquisa puji. <sup>8</sup> Beju Jesús mu bahue puana mecuana sa piba madhada cuana. Daja biame, deja mechehui uja atana:

—Netianaque. Eduju su netitique.

Beju deja daja netitiana. <sup>9</sup> Da su Jesús ja ebuetsuaji fariseo cuana uja atana:



—Yama micuana equisaba. ¿Ai ni da su saida ya puji janahua tsine su? ¿Ahua saida janahua tsine su ai saida cuana ya puji? ¿Ahua ai madhada cuana ya puji? ¿Ahua saida janahua tsine su quebata d'aji su ya puji? ¿Ahua pamanu ya puji?

<sup>10</sup> Da su Jesús ja bajusiapetana huecuana. Deja mechhui cuatsasiatana uja:

—Piraraque mique ebai.

Beju deja ja mesa ebai epiraratani cama, saisiaa mesa eme. <sup>11</sup> Daja ba putsu, dapia enetita cuana beju jubida duininitana. Tuneda cama jaquisabatitana: “¿Jucuaja ni da ecuaneda Jesús manuameme a cua?”

*Jesús ja piada tunca beta ejaitiana apóstol cuana dharetana (Mateo 10.1-4; Marcos 3.13-19)*

<sup>12</sup> Pia tsine su Jesús murucu aida su putiana Diosu emitsu puji. Pamapa dhidha Diosu neje jamitsutiana. <sup>13</sup> Beju hue nahua su ihuatana mesa discípulo cuana. Pamapa discípulo cuana duje jenetia piada tunca beta ejaitiana dharetana beju. Apóstol cuana banime atana. <sup>14-16</sup> Uja banime putana huecuana:

Simón. Jesús ja Pedro ebani mesa ichatana.

Andrés. Simón sa edue puana.

Jacobo.

Juan.

Felipe.

Bartolomé.

Mateo.

Tomás.

Jacobo. Alfeo sa ebacua puana.

Simón. Partido cananista banime su punetina. Tueda partido da soldado romano cuana neje jaicheti bahue putaina.

Judas. Jacobo sa edue puana.

Judas Iscariote. Jesús menajatiaji epu.

*Jesús ja jucuada cristiano cuana buetsuatana (Mateo 4.23-25)*

<sup>17</sup> Da su beju Jesús apóstol cuana neje murucu aida jenetia buteana. Yahua pamapa su cuinatana huecuana. Jucuada cristiano cuana cuinatana tuna peje su. Judea yahua, Tiro, Sidón, Jerusalén ejude cuana jenetia cuinatana huecuana. Tuneda puetana Jesús eid'aba puji pasaisiameta huecuana puji. <sup>18</sup> Einid'u madhadaji cuana di Jesús ja saisiemetana. <sup>19</sup> Pamapa su Jesús d'apabaja atana, tueda ebia su tucheda esaisiameji puana putsu.

*Cuaja etse beidaji pu cua Jesús ja buetsuatana*

*(Mateo 5.1-12)*

<sup>20</sup> Da su Jesús ja mesa discípulo cuana chama putsu, uja buetsuapirutana huecuana:

—Nimebeidaji da Diosu ebia su shanapaja cuana, Diosu ecuatsasiati su yanienititayu huecuana putsu.

<sup>21</sup> ‘Nimebeidaji da Diosu peje su nimebutsepi puja putana cuana, Diosu ja tu peje su nimebutsepi yametayu huecuana putsu.

‘Epatani cuana, beidaji mepuque. Da su chu da micuaneda eid'ebati.

<sup>22</sup> ‘Ahua cristiano cuana micuana eduininibata su, beidaji mepuque. Ahua etseque su micuana ejusiatani su, beidaji mepuque. Micuana emadhabatani su, beidaji mepuque. Ahua micuana mue ai eni mahue nime ebata huecuana su, beidaji mepuque. <sup>23</sup> Ahua micuana daja yatani huecuana ema jepuiti su, da su ebia su beidaji mepuque, Diosu ja micuana cielo su pamapa ai saida etiatayu putsu. Beju daja da biahua tiempo cristiano madhada cuana ja Diosu sa profeta chenu cuana madhabataidha.

<sup>24</sup> ‘Aba, chipiluji cuana, ye yahua su bahui beju beidaji eputani putsu.

<sup>25</sup> ‘Aba, pamapa ai tupuji cuana, beju edhemanuta putsu.

‘Aba, jiahue quita eid'ebatiani cuana. Beju epibapiba putsu, ebia su epata huecuana.

<sup>26</sup> ‘Aba, micuaneda, cristiano cuana micuaneseda puji saida emimitani biame. Daja biahua tiempo tata edhi chenu cuana profeta bid'umimi puji cuana sa puji putaidha.

*Duininibaji cuana ibuneda ba taji*

*(Mateo 5.38-48; 7.12)*

<sup>27</sup> ‘Beju ema eid'abatani cuana yama uja equisainia: Micuana duininibaji cuana ibuneda mebaque. Saida mebaque huecuana. <sup>28</sup> Micuana sa puji madhada hue emimitani cuana sa puji saida memimique. Micuana emadhabatani cuana sa puji Diosu mebajaque. <sup>29</sup> Ahua aiya micuana ebuichetani su, bupe ebu di metiaque. Ahua aiya micuana sa saco emejemitani su, micuana sa camisa di tia taji. <sup>30</sup> Ahua aiya micuana ai ebajatani su, metiaque hue. Ahua aiya micuana sa ai cuana emejemita su, be mechujebajaji. <sup>31</sup> Cuaja micuana sa tsada pia cuana ja micuana yata su, daja micuaneda di meaque huecuana.

<sup>32</sup> ‘Ahua micuaneda micuana ibuneda ebatani cuana bahui ibuneda ebainia su, ¿ai puji saida ni da tueda pu cua? Beju Diosu shanapaji mahue cuana ja daja a bahue. <sup>33</sup> Ahua micuaneda micuana ai saida yatani cuana bahui saida yainia su, ¿ai puji saida jia tueda pu cua? Beju Diosu tsada mahue

cuana ja daja yatani. <sup>34</sup> Ahua micuaneda pia cuana presta yainia micuana ai saida eturuca patiatu huecuana puji, ¿ai puji saida jia tueda pu cua? Beju Diosu tsada mahue cuana ja daja yatani tuneseda puji ai saida cuana paata huecuana puji. <sup>35</sup> Beju micuana duininibaji cuana micuaneseda ibuneda ba taji. Saida mebaque huecuana. Meprestaque huecuana. Be eturuca ai etiata huecuana meid'uaji. Diosu ja bahui micuana eturuca etiatayu beju. Daja a putsu, micuaneda Diosu ja yatani nime yayu, tueda da ebia su saida pamapa cristiano cuana neje putsu. Tusa ebacua cuana ebameti. Beju Diosu da ebia su saida cristiano saida, ate cuana neje. <sup>36</sup> Da putsu, micuana sa Tata Diosu nime micuaneseda saida pu taji. Pamapa cristiano cuana meichenubaque.

*Be pia tuaquisaji*  
(Mateo 7.1-5)

<sup>37</sup> 'Be pia cuana metuaquisaji. Ahua micuaneda pia cuana etuaquisu, Diosu ja micuaneda eturuca etuaquisatayu, cuaja micuaneda pia cuana etuaquisainia nime. Beju micuaneseda perdona taji. Ahua micuaneda cristiano cuana eperdona su, Diosu ja micuana daja huecha yatayu. <sup>38</sup> Metiaque pia cuana. Ahua daja micuaneda ya su, Diosu ja micuana daja huecha ebia su quita eturuca etiatayu. Cuaja micuaneda pia cuana yainia nime, daja huecha Diosu ja micuana yatayu.

<sup>39</sup> Daja Jesús ja buetsuatana huecuana. Pia bahue quisa neje uja buetsuatana huecuana:

—Aimue detse padha ja pia padha huidusuta cua mahue. Ahua daja huidusuja yata su, da su betana su rara su edajajati tse. <sup>40</sup> Beju ebuetsuatiani da aimue mesa ebuetsuaji ebia su aida pu cua mahue. Jabuetsuapeti putsu, chu mesa ebuetsuaji nime pu cua.

<sup>41</sup> '¿Jucuaja su ni da micuaneda pia edue sa etua su ai d'ape chidi echamainia? Beju micuana sa etua quitaita dume su aqui riji aida esa micuaneda aimue echamatiani mahue. <sup>42</sup> Ahua micuana sa etua su aqui riji aida esa su, ¿cuaja ni da micuana sa edue sa etua su ai d'ape chidi jemicuina cua? ¡Bubeta micuaneda! Equene tsuhu mejemique aqui riji aida micuana sa etua jenetia. Daja a putsu, saida eba ai d'ape chidi edue sa etua su esa ejemi puji. Beju micuaneda jucha aidaji putsu, pia jucha huai chidiji cuana aimue tuaquisu taji mahue. Equene tsuhu micuana sa jucha mebasetatique, pia cuana tuaquisaji mahue su.

*Equi ejaja cuana jepuiti quisa*  
(Mateo 7.17-20; 12.34-35)

<sup>43</sup> Beju pamapa equi saida cuana ejaja saida eputani. Daja huecha pamapa equi saida mahue cuana mu ejaja saida mahue eputani. <sup>44</sup> Pamapa equi cuana ejaja jepuiti etse eshanapainia. Aimue detse etse junu requerequeji jenetia ejaja saida huiru cua mahue. <sup>45</sup> Deja saida da ai saida cuana bahui emimiani, mesa piba cuana saida putsu. Deja ate mu ai madhada cuana bahui emimiani, mesa piba cuana madhada hue putsu. Beju etse emimiani cuana da etse sa piba cuana jenetia.

*Ete muduji deja detse*

*(Mateo 7.24-27)*

<sup>46</sup> Micuaneda ema, “Echua Puji”, yainia biame, aimue quema jabuetsuati yainia mahue. Yanacane hue ema micuaneda, “Echua Puji”, yainia. <sup>47-48</sup> Quebata ja quema jabuetsuati yatani, tueda da ete a bahue deja nime. Tuahueda ete mudupirutana yahua saida bia su. Equene ete eti jude saida basetatana. Dapia ete atana. Da su beju ena aida nubiana su, jubida dhapujutana ete. Dhapujutana biame, beju aimue dajajame atana, yahua saida bia su ajiji putsu. Daja nime da quema jabuetsuati aji cristiano cuana. <sup>49</sup> Quebata ja mu quema jabuetsuati aimue yatani mahue, tueda da ete a bue mahue deja nime. Tuahueda ete mudutana yahua jutujutuji bia su. Beju ena aida nubiana su, jubida dhapujutana ete. Jubida dhapujutana putsu, ete dajajametana. Taitanapetana pamapa beju. Daja nime da quema jabuetsuati aja mahue yatani cristiano cuana.

## 7

*Jesús ja capitán sa emebajaji saisiametana*

*(Mateo 8.5-13)*

<sup>1</sup> Jesús ja cristiano cuana buetsuape putsu, Capernaum ejude su putibana. <sup>2</sup> Dapia piada romano capitán anina. Tueda da soldado romano sa echua puji puina. Tuahueda mesa emebajaji ebia su ibuneda bataina. Tueda emebajaji da emanu piba saina. <sup>3</sup> Capitán ja cristiano cuana id'abatana Jesús jepuiti emimitani. Da su beju piada piada judío deja edhi cuana beitutana Jesús peje su tu pabajata huecuana puji, capitán sa ete su Jesús paputi puji, mesa emebajaji pasaisiametita puji. <sup>4</sup> Beju tuneda Jesús naria putsu, bajapirutana huecuana uja:

—Tueda capitán da deja saida. <sup>5</sup> Israelita cristiano cuana ebia su ibuneda ebatani. Tuahueda quitaita jadhitati jude ete ametana tuneseda puji. Da su saipie hue miada tueda etsahuati puji.

<sup>6</sup> Da su beju Jesús tuna neje putiana. Capitán sa ete naja su ecuinatahu su, capitán ja mesa eshanapa cuana beitutana Jesús pamitsuta huecuana puji. Uja Jesús quisatana huecuana:

—Echua Puji, ecuanaju sa capitán uja mi equisametani: “Ema mu aimue aidhe eni mahue quema ete su mida enubi puji. <sup>7</sup> Da putsu, mue ema puti mi peje su mi ebaja puji. Beju mi yani jenetia hue cuatsasiaque quema emebajaji pasaisi puji. <sup>8</sup> Ya di quema echua puji sa jacuatsasiati ema su yani. Beju quema yani soldado cuana quema jacuatsasiati ema su di. Pamapa quema jacuatsasiati cuana yatani huecuana. Quema emebajaji cuana ja di quema jacuatsasiati cuana yatani. Da su ema bahue ahua miada u jenetia hue ecuatsasia su, quema emebajaji saisi cua.

<sup>9</sup> Jesús ja tueda quisa id'aba putsu, nimetiunetiana. Mesa ebuqueji cuana uja atana:

—Ene putsu, yama micuana equisainia, pamapa Israel yahua je aimue yama aidhe biame ye deja nime ba. Aimue aidhe biame Diusu peje su tu enimetuheatiani nime yama ba.

<sup>10</sup> Beju capitán sa quisa puji cuana jasiapatitaibana su, emebajaji saida batana huecuana.

*Jesús ja ahue manujiji sa ebacua emanu id'emetaibana*

<sup>11</sup> Da su beju Jesús discípulo cuana neje Naín ejude su putiana. Jucuada cristiano cuana di tuna neje putitana. <sup>12</sup> Ejude naja su Jesús ja jucuada cristiano cuana ejude jenetia ecuinanatani batana. Piada manujiji epapa puji edusutahu huecuana batana. Tueda manujiji da epuna ahue manujiji sa piada quita ebacua puina. Jucuada ejude sa aniji cristiano cuana ja buquetana. <sup>13</sup> Beju Jesús ja epuna ba putsu, bataichenu batana. Uja epuna atana:

—Be paji.

<sup>14</sup> Da su Jesús cajón naja su janariatiana. Beju d'apabatana. Da su cristiano cuana netisenatana. Jesús ja manujiji mitsutana uja:

—Edeahue, ¡Netianaque!

<sup>15</sup> Da su beju manujiji anitsua putsu, mimipiruana. Jesús ja edeahue tusa cuara menajatiatana. <sup>16</sup> Pamapa dapia netitana cuana ebia su iyuame putana. Diusu sa puji saida mimipirutana huecuana uja:

—Beju piada Diusu sa profeta aida, tucheda bataji puitia ecuanaju duju su. Diusu beju buteitia mesa cristiano cuana etsahua puji.

<sup>17</sup> Da su beju pamapa Judea yahua je bahue putana cristiano cuana tueda ai nimetiuda Jesús ja atana.

*Juan Bautista sa jabeituti detse Jesús peje su cuinana  
(Mateo 11.2-19)*

<sup>18</sup> Beju Juan Bautista terijiji yani biame, pamapa Jesús ja atana cuana bahue puana, mesa discípulo cuana ja tueda pamapa saida quisatana putsu. <sup>19</sup> Da su Juan ja beta mesa discípulo detse Jesús peje su beitutana tu paquisabatita tse puji uja: “¿A da mida ecuanaju eid'uainia Diosu sa Jabeituti Deja, cuaja Juan Bautista quisa puana nime, ahua ecuanaju pia eid'ua?” <sup>20</sup> Da su Juan sa jabeituti detse Jesús peje su putiana. Jesús peje su cuinati putsu, uja quisabatana tse:

—Juan Bautista ja etseju beitutaitia mi equisaba puji. ¿A pa da mida Diosu sa Jabeituti Deja, ahua mahue? ¿A da ecuanaju pia id'ua?

<sup>21</sup> Beju Jesús ja nedaji cuana esaisiametasa hora cuinatiana tse. Pamapa nedaji, einid'u madhadaji, padha cuana esaisiametasa batana tse. <sup>22</sup> Da su Jesús ja jeutsutana tse uja:

—Mequisatique Juan pamapa ai metse ebainia, eid'abainia cuana. Mequisatique yama padha cuana beju tuaji yainia. Turu cuana yasemeinia. Lepraji cuana esaisiameinia. Jaid'abati bue mahue cuana eid'abameinia. Manujiji cuana eid'e yameiniayu. Puri cuana peje su Diosu sa quisa saida cuana ema quisaquisa epuani d'eji su paputa huecuana puji. <sup>23</sup> Mequisatique Juan be ema peje su panimetuheaderarijiti. Quebata ema peje su daja hue enimetuheaderati su, tueda da beidaji epu.

<sup>24</sup> Da su Juan sa jabeituti detse jasiapatibana su, Jesús ja dapia netina cristiano cuana quisapirutana Juan jepuiti. Uja atana huecuana:

—¿Ai eje ni da micuaneda putiana d'anita yahua su Juan peje su? ¿Ai eba puji micuaneda putiana? ¿Ahua bue enana beni ja ehuidhutaneti nime eba puji micuaneda putiana? <sup>25</sup> ¿Ahua deja ejud'uji chujeneda neje jud'ujiji eba puji micuaneda putiana? Beju deja ejud'uji chujeneda neje jud'ujiji cuana da echua puji sa ete aida su bahui yanita. Aimue d'anita yahua su yanita huecuana mahue. <sup>26</sup> Beju, ¿ai eba puji micuaneda d'anita yahua su putiana? ¿A da Diosu sa profeta micuaneda batiana? Enei hue, Juan Bautista da pamapa Diosu sa equene profeta chenu cuana ebia su aida.

<sup>27</sup> Juan jepuiti Diosu sa quirica su uja derejiji yani:

Quema quisaquisa puji yama ebeitu mi hui su cristiano cuana pabasetatita mi epue su puji. <sup>28</sup> Yama micuana ene putsu yainia, Juan Bautista da pamapa cristiano cuana ebia su aida. Beju daja biame, quebata huai chidi biame da Diosu ecuatsasiati su, tueda da Juan ebia su aida.

<sup>29</sup> Da su beju dapia aniji cristiano, echujebajaji cuana ja id'aba putsu, tuneda cama, “Diusu da butsepi quita”, jaquisatitana. Equene Juan ja Diusu peje su ichaderatana huecuana yahui neje. <sup>30</sup> Beju dapia fariseo, jacuatsasiati ebuetsuaji cuana anitaina. Tuneda di Jesús sa quisa cuana id'abatana. Diusu sa ai cuana tsada mahue putsu, aimue Juan peje su jaichaderametitana huecuana mahue Diusu sa puji yahui neje. Juan da Diusu sa puji quisaquisa puana biame, aimue tsada mahue batana huecuana. <sup>31</sup> Da su beju Jesús ja cristiano cuana uja atana:

—¿Cuaja ni da jiahue tiempo cristiano cuana? <sup>32</sup> Tuneda da yanana chidi cuana etesque je esitutitani nime. Uja tsiatsia neje yatani huecuana mecuana sa eshanapa cuana: “Ecuanaju mui turuana micuaneda beidaji etiritiri puji. Beju micuaneseda tsada mahue puana, paja puana putsu. ¡Jade! Da su beju ecuanaju beidaji mahue satsu cuana satsua micuaneda epa puji. Daja biame, micuaneda paja mahue puana, beidaji puja puana putsu. Beju ecuanaju micuana cuaja beidaji ame taji mahue ebainia.” Beju tueda jasituti yanana cuana nime jiahue tiempo cristiano cuana mu. Cuaja beidaji ame taji mahue huecuana. <sup>33</sup> Juan Bautista ja pia cristiano cuana neje aimue diadiaina mahue. Vino di aimue id'itaina mahue. Da putsu, micuaneda, “Juan einid'u madhadaji”, epuani. <sup>34</sup> Yama mu ai papu ediainia cristiano cuana neje. Vino di eid'inia. Da putsu, micuaneda, “Jesús da diadia aida, jaid'iti aida”, epuani. Micuaneda ema pa juchaji, echujebajaji cuana sa eshanapa epuani, ema tuna neje diadia bahue putsu. Beju micuana sa japitsati piba cuana da saida micuaneseda puji bahui. <sup>35</sup> Micuaneda etseju daja emadhabainia biame, etseju da Diusu sa piba saida cuana yainia, ebameinia.

### *Jesús fariseo Simón sa ete su putiana*

<sup>36</sup> Beju piada fariseo ja Jesús ihuatana mesa ete su ediadia puji. Jesús da tusa ete su nubi putsu, aniuteana. <sup>37</sup> Beju tueda ejude su piada epuna chuamadhada anina. Tueda epuna Jesús fariseo sa ete su yani id'aba putsu, dapia putiana tu eba puji. Emeji chidi dusutana. Emeji chidi su chujeneda saida puida badeina. <sup>38</sup> Da su Jesús peje su cuinati putsu, tusa ehuaitsi bia su epuna turusatiana. Beju papiruana. Mesa tuana neje Jesús sa ehuaitsi rucuapirutana. Mesa echuaina neje ehuaitsi muriatana. Da su epuna ja Jesús sa ehuaitsi budhi putsu, puida ehuaitsi bia su d'uichatana. <sup>39</sup> Da su Jesús ihuaji fariseo uja japibatiana: “¿Ai puji ni Jesús ja ye epuna chuamadhada panariati yatani? Tueda da aimue Diusu sa ene quita profeta mahue. Ahua tueda da Diusu sa ene quita

profeta pu cua su, da su aimue detse ye epuna nariameta cua mahue, tueda epuna chuamadhada putsu.” <sup>40</sup> Da su beju Jesús ja fariseo uja atana:

—Simón, yama mi ai chidi quisaja.

Simón ja Jesús jeutsutana:

—Ebuetsuaji, quisaque hue ema.

<sup>41</sup> Da su Jesús ja Simón uja atana:

—Beta deja ja chipilu prestaji metse sa manu puina. Pida pishica nuati cien manume puina. <sup>42</sup> Pia pishica tunca manume puina. Beju betana su cuaja chujetia taji mahue batana tse. Da su tueda chipilu prestaji ja perdonatana tse, tuatseda cuaja chujetia taji mahue batana putsu. Beju jeutsuque ema, ¿quebata tuatseda chipilu prestaji ibuneda ebia su quita ebata?

<sup>43</sup> Simón ja Jesús jeutsutana:

—Manu dueji puina ja ebia su quita ibuneda ebata, ema epibatiani.

Jesús ja tueda atana:

—Enei hue daja. Saida mi ema ejeitsuinia.

<sup>44</sup> Da su Jesús ja epuna mehuitu putsu, Simón uja atana:

—Chamaque ye epuna. Ema mique ete su nubiana su, aimue mi ema huatsirucuame. Ye epuna ja quema ehua tsi rucuataitia mesa tuana neje. <sup>45</sup> Mesa echuaina neje muriataitia. Beju aimue miada ema budhitia mahue. Ye epuna ja mu quema ehua tsi daja hue budhiniame atana ema nubitia jenetia. <sup>46</sup> Aimue miada quema echua bia su aceite d'uichana mahue. Ye epuna ja mu puida quema ehua tsi bia su d'uichataitia. <sup>47</sup> Da su yama mi equisainia, ye epuna ja mesa ibuneda ema bametaitia, mesa jucha ebia su cuana yama perdonaitia putsu. Enei hue, quebata mesa jucha huai chidi perdonajiji, daja huecha huai chidi hue tuahueda ibuneda ebata.

<sup>48</sup> Da su Jesús ja epuna atana:

—Pamapa mique jucha cuana yama eperdonainia.

<sup>49</sup> Beju pia ihuajiji yanita cuana uja tuneda cama jaquis-abapirutitana:

—¿Ai ni da tueda pia sa jucha cuana eperdona puji? <sup>50</sup> Da su Jesús ja epuna daja hue quisainiame atana:

—Beju mi d'ejí su puitia, ema peje su jei puitia putsu. Puchiditiyuque.

## 8

### *Jesús tsahuaji epuna cuana*

<sup>1</sup> Da su beju Jesús puniunetiana pia ejude cuana je. Diusu ecuatsasiati jepuiti quisaquisa puniunetiana. Piada tunca



beta ejaitiana apóstol cuana ja buquetana. <sup>2</sup> Piada piada epuna cuana ja di buquetana. Tueda epuna cuana beju equene nedaji, einid'u madhadaji putaina. Jesús ja saisi-ametana huecuana putsu, buquetana huecuana. Piada tuneda María Magdalena banime. Jesús ja tu peje jenetia siete einid'u madhada cuana jusiacuinatana. <sup>3</sup> Pia epuna di Juana banime puina. Tusa yahue Chuza banime puina. Tuahueda echua puji Herodes Antipas sa ai cuana quinatana. Pia epuna di Susana banime puina. Jucuada pia cuana di anitana. Jesús, discípulo cuana tsahuatana huecuana ai dia taji cuana su tuna sa chipilu quitaita neje.

*Deja ejaja cuana huararaji jepuiti quisa  
(Mateo 13.1-9; Marcos 4.1-9)*

<sup>4</sup> Pamapa ejude cuana jenetia jucuada cristiano cuana cuinanatana Jesús eba puji. Pia tsine jadhitatitana huecuana Jesús peje su. Bahue quisa neje Jesús ja buetsuapirutana huecuana uja:

<sup>5</sup> —Beju piada deja putiana ejaja cuana ehuararati puji. Ehuararatani cama, piada piada ejaja cuana edid'i je dajajatana. Da su beju tidhitidhiatana cristiano cuana ja. D'ia janana cuana pue putsu, beju edid'i je dajajatana ejaja cuana diapetana. <sup>6</sup> Pia ejaja cuana dajajatana tumu med'i pamuda mahue su. Beju tipeida huid'atatana. Med'i pamuda tsabida mahue putsu, beju sarapetana, huid'atatana cuana id'eti sinada puana putsu. <sup>7</sup> Pia ejaja cuana junu quid'aji cuana duju su dajajatana. Beju murutana cuana junu quid'aji cuana ja manuametana, babubabuatana putsu. <sup>8</sup> Pia ejaja cuana mu med'i saida su dajajatana. Saida murutana. Dueji ejaja putana. Pamapa ejaja cuana cien ejaja teje putana.

Jesús ja daja cristiano cuana quisape putsu, uja mimi jubida neje atana huecuana:

—Ahua micuaneda id'ajalaraji su, meid'abaque.

*Jesús ja buetsuatana bahue quisa cuana neje  
(Mateo 13.10-17; Marcos 4.10-12)*

<sup>9</sup> Da su mesa discípulo cuana ja Jesús quisabatana:

—¿Jucuaja ni da mique bahue quisa epuani?

<sup>10</sup> Jesús ja jeutsutana huecuana:

—Diusu ja micuaneda bahui tu ecuatsasiati etsia ai quisa cuana eshanapametani. Pia cristiano cuana yama bahue quisa neje bahui ebuetsuainia. Tuneda echamatani biame, aimue ebatani huecuana mahue. Eid'abatani huecuana biame, aimue eshanapatani huecuana mahue.

*Jesús ja deja ejaja cuana huararaji jepuiti quisa discípulo cuana quisatana*

*(Mateo 13.18-23; Marcos 4.13-20)*

<sup>11</sup> 'Beju yama micuana equisa cuaja ejaja cuana huararaji jepuiti quisa epuani. Ejaja cuana da Diosu sa quisa saida nime. <sup>12</sup> Edid'i je dajajatana ejaja cuana da Diosu sa quisa eid'abatani cuana nime. Ishahua pue putsu, tueda Diosu sa quisa cuana mecuana sa miesumu su yani emejemitani, Diosu peje su jei pu putsu, d'eji su paputa huecuana mahue puji. <sup>13</sup> Tumu med'i pamuda mahue su dajajatana ejaja cuana da Diosu sa quisa eid'abatani cuana nime. Queju-cua hora puji hue beidaji neje jei eputani. Pia cuana tuna neje eduininitani su, Diosu peje jenetia enetideratani. Tuna putaina nime, neicha hue eputaniyu. <sup>14</sup> Junu quid'aji cuana duju su dajajatana ejaja cuana da Diosu sa quisa eid'abatani cuana nime. Daja biame, tuna puina nime su hue eputaniuneti. Ye mundo sa ai cuana bahui ebia su epibatani huecuana. Chipilu bahui mecuana sa nimeneda. Tuna sa ai utsatada madhada cuana bahui mecuana sa tsada. Pamapa tueda ai madhada cuana ja Diosu peje su janimetucheati cuana etaitanametani. Diosu sa quisa saida cuaja jucua taji mahue miesumu su. <sup>15</sup> Med'i saida su dajajatana ejaja cuana da Diosu sa quisa saida jei yatani cuana nime. Id'aba putsu, jei yatani huecuana. Diosu sa mimi tuna sa miesumu su eju-cuapirutiani. Diosu peje su daja hue enimetuheaderatitani huecuana.

*Hueda jepuiti quisa*

*(Marcos 4.21-25)*

<sup>16</sup> 'Aimue detse etse hueda huitsu putsu, biateri cua mahue. Daja huecha tahui jude huaracha ema su netia cua mahue. Beju d'eji su netia taji ete pajurabata puji. <sup>17</sup> Pamapa ai rubuajiji cuana beju batasaida epu. Pamapa ai rubuajiji etsia piba cuana Diosu ja cristiano cuana eshanapameta.

<sup>18</sup> 'Meid'abaenique. Quebata ja Diosu sa piba shanapaja su, Diosu ja mesa piba cuana ebia su eshanapameenitayu. Quebata ja aimue shanapaja mahue su, Diosu ja tueda aimue ai biame eshanapameta mahue.

*Jesús sa cuara, edue cuana tu yani su cuinatana*

*(Mateo 12.46-50; Marcos 3.31-35)*

<sup>19</sup> Da su beju Jesús sa cuara, edue cuana tu eneti ete su cuinatana. Cuaja naria taji mahue batana huecuana Jesús, cristiano cuana ebia su dueji netitaina putsu. <sup>20</sup> Da su piada ja Jesús uja atana:

—Mique cuara, edue cuana etseque su enetita. Mi neje jamitsutija huecuana.

21 Da su Jesús ja dapia tu id'abaji cuana uja atana:

—Diusu sa jabuetsuati eid'abatani, aja yatani cuana da quema cuara, edue cuana pu cua nime.

*Jesús ja beni, bai mitanametana*

*(Mateo 8.23-27; Marcos 4.35-41)*

22 Pia tsine Jesús, mesa discípulo cuana neje canoa aida su nubiana. Tuahueda atana huecuana uja:

—Meanipetutija chu maje.

23 Da su beju putitana huecuana. Yanipetutahu cama, Jesús tahuisatiana. Beni jubida pupiruana putsu, canoa dume su ena nubiametana. Beju sejepiruana putsu, nubicueana. 24 Da su Jesús id'edeatana huecuana. Uja atana huecuana:

—¡Echua Puji! ¡Echua Puji! ¡Beju canoa yaninubiani!

Jesús id'ecuina putsu, bai, beni d'ayatana. Da su mitana-saisiana pamapa. 25 Tuahueda discípulo cuana atana:

—¿Jucuaja su micuaneda Diusu peje su aimue enimetucheatiani mahue?

Beju rubutana putsu, tuneda cama jaquisabatitana uja:

—¿Ai deja jia ye? Beni ja biame tueda eid'abatani. Bai ja di tusa jacuatsasiati eiyubatani.

*Gadara yahua su deja einid'u madhadaji*

*(Mateo 8.28-34; Marcos 5.1-20)*

26 Beju chu maje Gadara banime yahua su satsuatiana huecuana. Tueda yahua Galilea yahua butse su anina.

27 Cuinatitana huecuana putsu, Jesús canoa jenetia cuinanana. Piada deja ja dapia ejude jenetia Jesús nariatana. Tueda einid'u madhadaji puina quejucua mara biame. Jud'uji mahue puniunetiana. Aimue ete su anija puina mahue. Panteo cuana duju su bahui ani bahue puina.

28-29 Quejucua nuati biame einid'u madhada ja tueda inatana. Dapia aniji cristiano cuana ja tueda cadena neje risirisia bahue putaina mesa eme, ehuaitsi su. Beju tuahueda cadena tibitibiataina. Einid'u madhada ja tueda d'anita yahua su jududuametaina. Deja Jesús ba putsu, tu butse su d'epesatiana. Da su Jesús ja einid'u madhada uja cuatsasiatana:

—¡Cuinanaque ye deja peje jenetia!

Jesús ja daja cuatsasiatana su, deja einid'u madhadaji ja Jesús tsiatsia neje quisabatana uja:

—Jesús, Diusu Aida sa Ebacua, ¿ai mique ema neje yani? Yama mi jubida ebajainia, be ema castigo su beituji.

30 Da su Jesús ja tueda quisabatana:

—¿Ai ni mi banime?

Tuahueda jeutsutana:

—Ema Legion banime.

Daja jajeutsutiana, dueji eni einid'u madhada cuana deja sa equita dume su anitaina putsu. Tueda ebani da Dueji Eni epuani. <sup>31</sup> Da su beju einid'u madhada cuana ja Jesús uja bajatana:

—Be beituji ecuanaju castigo aida, apuda eni pupe bue mahue su.

<sup>32</sup> Beju chuadera murucu su jucuada cuchi cuana diadian-iunetitaina. Da su Jesús uja bajatana huecuana:

—D'ejí tiaque ecuanaju cuchi cuana sa equita su enubi puji.

Da su beju Jesús ja d'ejí tiatana. <sup>33</sup> Einid'u madhada cuana deja peje jenetia cuinana putsu, cuchi cuana sa equita cuana su nubitana. Nubitana cama, cuchi cuana jududutana bai su. Bai equehuehueji butsepi je dajajautetana. Beju pamapa huidipetana.

<sup>34</sup> Cuchi quinaji cuana ja daja ba putsu, rubutanatana. Ejude su, te cuana je beju jududutana huecuana cristiano cuana equisati puji. <sup>35</sup> Da su cristiano cuana Jesús peje su putitana cuaja ai puana cuana eba puji Jesús yani su. Cuinati putsu, deja einid'u madhadaji puina saida, Jesús sa ehuaitsi su jajud'uti yani batana huecuana. Da su beju iyuame pupirutana huecuana. <sup>36</sup> Dapia cuaja Jesús ja ataitia batana cuana ja pamapa butsepi quisatana huecuana. <sup>37</sup> Da putsu, cristiano cuana ja Jesús bajapirutana papuenitiyu tuna sa yahua jenetia, ebia su iyuame putana huecuana putsu. Da su Jesús canoa aida su nubiana eputiyu puji. <sup>38</sup> Deja saisijiji ja Jesús uja bajatana:

—Dusuque ema. Mi neje putija ema.

Beju Jesús ja tueda uja atana:

<sup>39</sup> —Mahue. Putiyuque mique edue cuana peje su. Cuaja Diusu ja mi saisiametana quisatique huecuana.

Da su deja mesa ete su putibana. Pamapa ejude je quisa pupiruana Jesús ja cuaja ataitia cuana.

*Jairo sa ebaquepuna Jesús ja id'emetaibana. Epuna ja Jesús sa ejud'uji tihue d'apabatana*

*(Mateo 9.18-26; Marcos 5.21-43)*

<sup>40</sup> Beju Jesús anipetutibana chu maje. Dapia cristiano cuana ja beidaji neje tsutana, ebia su id'uatana huecuana putsu. <sup>41</sup> Beju piada deja Jesús butse su d'epesatiana. Tueda Jairo banime puina. <sup>42</sup> Mesa piada ebaquepuna anina. Piada tunca beta ejaitiana maraji puina. Nedaji pu taji mahue saina. Da su deja ja Jesús bajatana mesa ete su paputi puji, ebaquepuna pasaisiameta puji. Da su beju Jesús putiana. Dueji cristiano cuana tu neje putitana d'ejí mahue. Beju janunununuati putana huecuana.

<sup>43</sup> Tuna duju su piada epuna nedaji putiana. Piada tunca beta ejaitiana mara mue mesa ami riji puja mahue puana. Jucuada jaiduenetiji cuana ja cuaja iduene taji mahue batana. Epuna ja pamapa mesa chipilu apetana. <sup>44</sup> Tueda epuna ja Jesús etibeini bene nariatana. Jesús sa ejud'uji tihue d'apabatana. Da hora su beju mesa ami riji puana. Beju saisiana.

<sup>45</sup> Da su Jesús ja uja quisabatana huecuana:

—¿Aiya da ema d'apabataitia?

Pamapa ja Jesús jeutsutana:

—Mue mi aiya biame d'apaba.

Beju Pedro ja Jesús uja atana:

—Echua Puji, ebia su cristiano cuana ja mi yenunuyenunu yatani. ¿Jucuaja su miada daja equisabainia? ¿Aimue jia maida ye cristiano cuana ja mi ed'apabatani mahue?

<sup>46</sup> Beju neicha Jesús ja atana huecuana:

—¿Aiya da ema d'apabataitia? Jajinebataitia da ema aidhe saisitia quema tucheda neje, ema d'apaba putsu.

<sup>47</sup> Da su beju epuna Jesús butse su tururuana. Riariapiruna, Jesús ja cuaja tu atana shanapatana putsu. Pamapa cristiano cuana butse su epuna ja cuaja d'apabame atana Jesús quisapetana. Tu saisiana di quisatana. <sup>48</sup> Da su Jesús ja epuna atana:

—Epuna chidi, ema peje su mi jei puitia putsu, beju mida saisitia. Puchiditiyuque beidaji.

<sup>49</sup> Beju Jesús emimiani cama, piada deja cuinana Jairo sa ete jenetia. Tuahueda Jairo uja atana:

—Mique ebaquepuna beju manuitia. ¿Ai puji detse yanacane puti cua Echua Puji?

<sup>50</sup> Beju Jesús ja id'aba putsu, Jairo uja atana:

—Be iyuame puji. Ema peje su bahui enimetucheati su, mique ebaquepuna beju esaisi.

<sup>51</sup> Da su ete su cuinati putsu, Jesús sa tsada mahue puana cristiano cuana panubi. Pedro, Jacobo, Juan cuana, yanana sa tata, cuara detse bahui ete su panubi atana. <sup>52</sup> Ete dume su pamapa su japadarititanina batana. Da su Jesús ja atana huecuana uja:

—Be mepadaritiji. Epuneje mu aimue emanu mahue. Tueda mu etahuisa hue.

<sup>53</sup> Beju jaid'ebatitana huecuana tu neje, yanana manuitia batana huecuana putsu. <sup>54</sup> Da su beju Jesús ja yanana sa eme ina putsu, jubida cuatsasiatana:

—Yanana chidi, netianaque.

<sup>55</sup> Beju yanana id'eibana. Id'e putsu, netianana. Da su Jesús ja cuatsasiatana mesa tata detse uja:

—Memihuaque yanana.

<sup>56</sup> Yanana sa tata detse da ebia su nimetiunetiana putsu, Jesús ja cuatsasiatana tse uja:

—Be aidhe biame mequisaji ai cuaja puitia cuana.

## 9

*Jesús ja mesa piada tunca beta ejaitiana discípulo cuana beitutana*

(Mateo 10.5-15; Marcos 6.7-13)

<sup>1</sup> Jesús ja mesa piada tunca beta ejaitiana discípulo cuana dhitametana. Huaratiatana huecuana pamapa ai einid'u madhada cuana cristiano cuana peje jenetia ejusiacuina puji, tsapiapiati nedaji cuana esaisiame puji. <sup>2</sup> Beitutana huecuana Diosu ecuatsasiati jepuiti quisa paputita puji, cristiano cuana esaisiame puji. <sup>3</sup> Uja Jesús ja cuatsasiatana huecuana:

—Be eituneji, shitara, ai dia taji, chipilu cuana medusutiji. Beju equita su cama bahui ejud'uji medusutique. <sup>4</sup> Quebata ejude su cuinati putsu, piada ete su hue meanitique. Tueda ete su hue meanique ejude jenetia ecuinana teje. <sup>5</sup> Quepia micuana batsuja mahue yatani huecuana su, mecuinanaque tueda ejude jenetia. Cuinana putsu, metaraque tueda ejude sa med'i micuana sa pulucu jenetia Diosu tuna neje eduiniani pashanapata huecuana puji.

<sup>6</sup> Da su beju cuinanatana huecuana. Pamapa ejude su putitana huecuana. Diosu sa quisa saida quisaquisa putana huecuana. Nedaji cuana saisiametana huecuana.

*Juan Bautista manuumetana*

(Mateo 14.1-12; Marcos 6.14-29)

<sup>7</sup> Echua puji Herodes Antipas bahue puana pamapa ai Jesús ja atana cuana. Tueda japitsapitsatiana, cristiano cuana ja Jesús jepuiti tsapiapiati quisatana huecuana putsu. Piada piada cuana, “Tueda da Juan Bautista id'eyujiji”, putana.

<sup>8</sup> Pia cuana, “Diosu sa quisaquisa puji Elías chenu beju bataji puitia”, putana. Pia cuana, “Pia Diosu sa profeta chenu beju id'eitiba”, putana. Da putsu, Herodes Antipas ebia su japitsapitsatiana. Cuaja shanapa taji mahue batana. <sup>9</sup> Da su tueda puana:

—Yama quitaita Juan chuarijiameana. ¿Aidhe jia da ye deja pamapa ai nimetiuda cuana yatani?

Beju Herodes ja Jesús baja atana.

*Jesús ja pishica mil deja cuana mihuatana*

(Mateo 14.13-21; Marcos 6.30-44; Juan 6.1-14)

<sup>10</sup> Apóstol cuana Jesús peje su jasiapatibana su, tuna pamapa ai atana cuana Jesús quisatana huecuana. Da su Jesús ja dusutana huecuana Betsaida ejude etsahua su cristiano cuana mue ani su, tuna neje bahui ubu hora chidi yani

puji. <sup>11</sup> Beju ejude aniji cristiano cuana bahue pu putsu, Jesús peje su putitana huecuana. Da su Jesús ja batsutana huecuana. Diusu ecuatsasiati jepuiti quisapirutana huecuana. Nedaji cuana di saisiametana.

<sup>12</sup> Beju tsinecua edhememehu su apóstol cuana ja Jesús uja atana:

—Beituque ye cristiano cuana ejude cuana naja je tuna sa ai dia taji cuana pachacutita huecuana puji, beju upia mu mue ai biame ani putsu.

<sup>13</sup> Jesús ja uja atana huecuana:

—Micuaneda hue memihuaque huecuana.

Da su Jesús jeutsutana huecuana uja:

—Beju pishica pan chidi cuana, beta se chidi detse bahui ecuanaju sa yani. ¿Ahua mique tsada ecuanaju jana ebajati ye cristiano dueji cuana sa puji?

<sup>14</sup> Beju pishica mil pucue deja cuana anitaina. Jesús ja discípulo cuana cuatsasiatana:

—Cristiano cuana meaniutemeque dujiduji pishica tunca cama.

<sup>15</sup> Beju daja atana huecuana. <sup>16</sup> Pamapa cristiano cuana aniutetana su, Jesús ja pan cuana, se detse di inatana. Buepa huabata jachamati putsu, diusulupai Tata Diusu atana. Pan cuana, se detse ped'uped'ua putsu, discípulo cuana menajiatana cristiano cuana paberereatiata huecuana puji. Discípulo cuana ja cristiano cuana eberereatiatani cama, pan, se ped'u cuana jajucuatitana. <sup>17</sup> Beju pamapa cristiano cuana diadiatana tupu. Pan cuana, se detse beju puchu puana. Eped'u cuana chudutana huecuana. Piada tunca beta ejaitiana d'iti cuana sejeatana huecuana puchu cuana neje.

*Cristo da Diusu sa Jabeituti Deja*

*(Mateo 16.13-19; Marcos 8.27-29)*

<sup>18</sup> Pia tsine Jesús discípulo cuana neje bahui aniana. Pia cristiano cuana beju aimue ani putana. Jesús da discípulo cuana chuadera tu mehua Diusu neje jamitsutiana. Jamitsupeti putsu, discípulo cuana peje su janariatiana. Uja quisabatana huecuana:

—¿Cuaja ni da cristiano cuana ema jepuiti eputani?

<sup>19</sup> Da su jeutsutana huecuana uja:

—Piada piada mida pa Juan Bautista chenu id'eyujiji eputani. Pia cuana mida pa Elías chenu id'eyujiji eputani. Pia cuana di mida pa pia Diusu sa profeta eputani.

<sup>20</sup> Da su Jesús ja quisabatana huecuana:

—¿Aidhe ni da ema micuaneda epibatiani?

Beju Pedro ja jeutsutana:

—Mida da Cristo, Diusu sa Jabeituti Deja.

*Jesús ja discípulo cuana quisatana cuaja tu manume epu*  
(Mateo 16.20-28; Marcos 8.30-9.1)

<sup>21</sup> Da su beju Jesús ja discípulo cuana jubida cuatsasiatana:

—Be aidhe biame mequisaji aidhe ema. <sup>22</sup> Ema da Diosu sa Jabeituti Deja biame, ebia su sufri pu taji. Beju judío cuana sa ehuidusuji, sacerdote, huaraji aida, jacuatsasiati ebuetsuaji cuana ja ema jusiadera putsu, emanuameta huecuana. Quimisha tsine ejaitiana su, ema eid'eyu manujiji cuana duju jenetia.

<sup>23</sup> Da su Jesús ja mesa discípulo cuana uja atana:

—Quebata ja ema tije aja su, pamapa muesumu neje ema tije paata. Ema pamapa mesa ai cuana quitaita ebia su tsada pabata. <sup>24</sup> Tusa manu teje ema tije paata, manuameja paata huecuana biame. <sup>25</sup> ¿Ai puji saida ni da etse sa pamapa mundo sa chipilu cuana paani pu cua, cuati castigo su etse eputi biame? <sup>26</sup> Quebata da cristiano cuana butse su ema jepuiti, quema quisa cuana jepuiti di ebidhu su, ya di tu jepuiti ebidhu, ema esiapati su. Da su ema Echua Puji Huaraji Aida epu. Quema Tata Diosu sa gloria neje, pamapa tusa ángel cuana neje ema esiapati. <sup>27</sup> Ene putsu, yama micuana equisainia, hue enetita piada piada cuana aimue emanuta tsuhu mahue Diosu ecuatsasiati ebuye teje.

*Jesús japiatiana*

(Mateo 17.1-8; Marcos 9.2-8)

<sup>28</sup> Ocho tsine beju jaitianana su, Jesús murucu aida bia su tsuatiana Diosu neje emitsuti puji. Pedro, Jacobo, Juan cuana ja buquetana. <sup>29</sup> Dapia Jesús Diosu neje emitsutiani cama, tuna butse su jabupiatiana. Mesa ejud'uji cuarecuare pasapasa puana. <sup>30</sup> Da su Elías, Moisés chenu detse bataji puana eid'e batana huecuana. Jesús neje quisaquisa epuani batana huecuana. <sup>31</sup> Cuaja Jesús sufri pu putsu, emanu Jerusalén ejude su Jesús neje jaquisatiana tse. Hueda cuarecuare ja biababutana huecuana. <sup>32</sup> Beju Pedro, Jacobo, Juan cuana ebia su tahuija putana biame, id'etaniana huecuana, tueda quimisha deja sa hueda ba putsu. <sup>33</sup> Moisés, Elías detse beju eputiyupiba epuani su, Pedro ja Jesús atana:

—Echua Puji, saida ecuaneda upia pamapa su meanija. Quimisha epahuaneti cuana ecuanaju paaiti, ahua mique tsada su. Piada miqueda puji, piada Moisés sa puji, piada Elías sa puji ecuanaju paaiti.

Pedro beju mue jashanapati cuaja emimiani, ebia su iyuame pu putsu. <sup>34</sup> Daja Pedro emimiani cama, judu ja beju dunutana huecuana. Da su beju Pedro, Jacobo, Juan cuana ebia su iyuame putana. <sup>35</sup> Judu duju jenetia Tata Diosu ja atana huecuana uja:



—Ye da quema ibuneda Ebacua. Tueda bahui meid'abaenique.

<sup>36</sup> Tata Diusu mimipeana su, beju Jesús tu mehua batana huecuana. Moisés, Elías detse aimue beju batana huecuana. Da su cuatsa mahue anitana huecuana. Mue aidhe biame quisatana huecuana mahue tuna batana ai cuana.

*Edeahue einid'u madhadaji Jesús ja saisiametana*  
(Mateo 17.14-21; Marcos 9.14-29)

<sup>37</sup> Pia huenati murucu aida jenetia butetana huecuana. Ebutesa su, jucuada cristiano cuana ja Jesús tsutitana.

<sup>38</sup> Piada deja ja cristiano cuana duju su Jesús jubida uja atana:

—Echua Puji, chamaque quema piada quita ebacua.

<sup>39</sup> Einid'u madhada ja tueda ina putsu, etsiatsiametani jubida. Tseitsi nime edajajametani. Equedi bahui purapura mesa ecuatsa su epuani. Tueda einid'u madhada ja quema ebacua emadhatani. Mesiaja mahue yatani. <sup>40</sup> Beju yama mique discípulo cuana bajaitia einid'u madhada pajemicuinata huecuana puji. Cuaja jemicuina taji mahue bataitia huecuana.

<sup>41</sup> Da su Jesús ja anititana discípulo cuana d'ayapirutana uja:

—¡Ai! ¿Jucuaja su jia micuaneda jei puja mahue? ¿Que tupu teje jia quema micuana neje ani taji? ¿Que tupu teje jia quema micuana etuchea taji? Meduseque edeahue mimi bue mahue.

<sup>42</sup> Edeahue janariatiana su, einid'u madhada ja dajajametana. Jubida edeahue riariametana. Da su Jesús ja einid'u madhada d'ayatana su, beju saisibana edeahue. Jesús ja deja tusa ebacua saida menajatiataibana. <sup>43</sup> Beju pamapa batana cristiano cuana ebia su nimetiunetitana, Diusu ebia su tucheda, aida batana huecuana putsu.

*Neicha hue Jesús cuaja manume epu quisa puana*  
(Mateo 17.22-23; Marcos 9.30-32)

<sup>44</sup> Beju cristiano cuana enimetiutani cama, Jesús ja mesa discípulo cuana quisapirutana:

—Meid'abaenique ema. Be mesetaji. Ema da Diusu sa Jabeituti Deja. Ema emenajatiata huecuana deja madhada cuana peje su pamanuameta huecuana puji.

<sup>45</sup> Beju discípulo cuana ja Jesús sa quisa aimue shanapatana mahue, tuseda tsada mahue putsu. Iyume putana huecuana tu equisaba puji cuaja mesa quisa epuani.

*¿Quebata jia ebia su aida?*  
(Mateo 18.1-5; Marcos 9.33-37)

<sup>46</sup> Da su beju discípulo cuana jacuicuinapirutitana. ¿Quebata jia tuna duju su ebia su aida? jacuicuinatitana huecuana.

<sup>47</sup> Beju Jesús jashanapatiana daja yacuicuinatitani huecuana.

Da su yanana chidi inachidi putsu, tu naja su ichatana.  
<sup>48</sup> Discípulo cuana uja atana:

—Ye yanana da ema peje su jei eputani nimemitsida cuana nime. Quebata ja saida ebatsuta huecuana su, tuahueda ema ebatsutani pu cua nime. Daja huecha quebata ja ema ebatsuta su, tuahueda quema Tata Diosu ebatsutani pu cua nime, Diosu ja ema beitutana putsu. Quebata micuana duju su nimemitsida epuani su, tueda da ebia su aida micuana duju su epu.

*Jesús sa eshanapa cuana*  
*(Marcos 9.38-40)*

<sup>49</sup> Da su beju Juan ja Jesús uja atana:

—Echua Puji, pia deja ja einid'u madhada cuana cristiano cuana peje jenetia ejusiacuinatani ecuanaju bana. Beju ecuanaju tueda, “Be daja aji”, ana, aimue tueda ecuanaju neje epuniunetiani mahue putsu.

<sup>50</sup> Da su beju Jesús ja Juan uja atana:

—Be tueda deja memenahueji. Quebata deja ecuananeje madhada hue epuani mahue, tueda da ecuananeje sa eshanapa beju.

*Jesús ja Jacobo, Juan jubida d'ayatana*

<sup>51</sup> Jesús cielo su eputi tiempo beju enariatiani putsu, janimetucheatiana Jerusalén ejude su eputi puji. <sup>52</sup> Equene tu hui su pia discípulo cuana beitutana. Piada ejude su Samaria yahua su cuinatitana huecuana tahui jude ete ebasetati puji.

<sup>53</sup> Beju samaritano cristiano cuana ja dapia ejude su aimue Jesús batsuja atana mahue, tueda Jerusalén ejude su epuhu shanapatana huecuana putsu. <sup>54</sup> Da su Jesús sa discípulo Jacobo, Juan detse ja daja id'aba putsu, Jesús uja atana tse:

—Echua Puji biahua tiempo Diosu sa profeta Elías chenu ja cristiano madhada cuana cuati neje taitanamepetaidha. Beju jiahue, ¿a mique tsada ecuanaju Diosu ebaja cuati pabeituta puji, tueda samaritano cristiano cuana etaitanamepe puji?

<sup>55</sup> Beju Jesús sa tsada mahua putsu, discípulo detse jubida d'ayatana, daja quisabatana tse su. <sup>56</sup> Da su pia ejude su putitana huecuana etahui puji.

*Jesús sa ebuqueji cuana*  
*(Mateo 8.19-22)*

<sup>57</sup> Beju edid'i su tuna eputahu cama, piada deja ja Jesús nariatana. Uja tuahueda atana:

—Echua Puji, mi yama tije aja quepia mi epuhu su.

<sup>58</sup> Da su Jesús ja atana deja:

—Cuacuacuacua cuana sa rara yanita. D'ia cuana sa esaji yanita. Beju quema mu ai mahue quepia echua epahuati puji.

<sup>59</sup> Da su beju neicha Jesús ja pia deja atana uja:

—Tije ema aque.

Tuahueda Jesús atana uja:

—Echua Puji, quema tata papa putsu chu, mi yama tije ya.

<sup>60</sup> Da su Jesús ja atana:

—Diusu shanapaji mahue cuana ja hue tuna sa manujiji cuana papapata. Miada mu puti putsu, Diusu ecuatsasiati epusiu ai quisa cuana cristiano cuana quisatique.

<sup>61</sup> Beju pia deja ja macha Jesús uja atana:

—Echua Puji, yama mi tije aja. Equene tsuhu d'eji tiaque ema quema ete su eputi puji, quema familia cuana neje emitsutitiyu puji.

<sup>62</sup> Da su Jesús ja tueda uja atana:

—Ahua quebata ema tije yapirutani biame, jasiapatija epu su, tueda saida mahue Diusu emebaja puji.

## 10

### *Jesús ja siete tunca quisa puji cuana beitutana*

<sup>1</sup> Da su beju Jesús ja siete tunca deja cuana dharetana. Beta beta beitutana huecuana tu hui su tu eputi ejude cuana je.

<sup>2</sup> Uja cuatsasiatana huecuana:

—Enei hue, dueji yani ehuru puji biame, ehuriji cuana beju pishihue. Cristiano cuana da ejaja esuru ehuru puji quitaita nime. Diusu da huiruhuru emetse nime. Mebajaque tueda mesa quisaquisa puji cuana cristiano cuana peje su pabeituta puji, mesa quisa saida cuana tuna peje su quisaquisa epu puji. <sup>3</sup> Beju meputique. Yama micuana cristiano madhada cuana peje su ebeituinia. Micuaneda da duqueji cuana iba cuana duju su nime epu. <sup>4</sup> Be shitara, chipilu medusuji. Piada pulucu butseji bahui medusutique. Pime hue meputique. Be aidhe biame memitsuji edid'i su.

<sup>5</sup> Quebata ete su nubi putsu, uja ete emetse cuana memitsu-tique: “Diusu ja menimepijajametaque.” <sup>6</sup> Ahua tueda ete su cristiano saida cuana yanita su, da su micuana sa jamitsuti da tuneseda puji paaniti beju. Ahua dapia cristiano saida mahue cuana yanita su, da su micuana sa jamitsuti mejemiyuque.

<sup>7</sup> Quebata ejude cuinati putsu, piada ete su hue mecuina-tique. Tueda ete su hue meanique ejude jenetia ecuinana teje. Mediaque, meid'ique tuna sa ai dia taji, id'i taji cuana, tuneseda mihua taji, micuaneda da Diusu sa mudu puji cuana putsu. Be ete ete measeji. <sup>8</sup> Ejude su cuinati putsu, ahua micuana cristiano cuana ja saida ebatsutani su, tuna etiatani ai dia taji cuana mediaque. <sup>9</sup> Dapia nedaji yanita cuana mesaisiameque. Uja mequisatique: “Beju Diusu ecuatsasiati enariatiani.” <sup>10</sup> Ahua quebata ejude su aniji cuana ja aimue

micuana saida ebatsuta mahue su, mecuinanaque ejude duje. Uja jubida cristiano cuana mequisaque: <sup>11</sup> “Micuana sa ejude sa med'i chidi ecuanaju sa pulucu cuana jenetia ecuanaju etarasaisaisia. Uja ecuanaju yainia, micuaneda ecuanaju sa quisa jusiaderana putsu. Meshanapaenique, Diusu ecuatsasiati enariatiani.” Daja micuaneseda pu taji. <sup>12</sup> Enei hue, yama micuana yainia, Diusu sa castigo tsine ecuina su, Diusu ja tueda ejude su aniji cristiano cuana Sodoma ejude su anitaidha cristiano cuana ebia su ecastigatayu.

*Ejude su jei pu bue mahue cuana*

*(Mateo 11.20-24)*

<sup>13</sup> ¡Aba quitaita Corazín, Betsaida ejude detse su aniji cristiano cuana. Tueda ejude detse su dajucua ai nimetiuda cuana yama ana biame, aimue Diusu peje su japibaturucatija putana huecuana mahue. Ahua Diusu ja biahua tiempo Tiro, Sidón ejude detse su tueda nimetiuda aida cuana ataidha su mu detse, dapia anitaidha cristiano cuana Diusu peje su japibaturucataidha detse. Tuna sa jucha cuana jepuiti ebia su janimepibapibametitaidha detse. <sup>14</sup> Diusu sa castigo tsine ecuina su, Diusu ja Corazín, Betsaida ejude detse su aniji cuana Tiro, Sidón ejude detse su anitaidha cuana ebia su ecastigatayu. <sup>15</sup> Daja huecha Diusu ja Capernaum ejude su aniji cuana yatayu. “Diusu ja ecuana cielo su edusutsuatita”, eputani huecuana biame, beju Diusu ja cuati castigo su ebeituta huecuana.

<sup>16</sup> Da su beju Jesús ja discípulo cuana atana:

—Quebata ja micuana jei yata su, tuahueda ema jei yatani pu cua nime. Daja huecha quebata ja micuana ejusiaderatani su, tuahueda ema ejusiaderatani pu cua nime, yama micuana beituana putsu. Daja huecha quebata ja ema ejusiaderatani su, tuahueda Diusu ejusiaderatani pu cua nime, Diusu ja ema beitutana putsu.

*Siete tunca quisa puji cuana jasiapatitana*

<sup>17</sup> Jesús ja siete tunca beitutana deja cuana beju jasiapatitana tu peje su. Jasiapati putsu, uja Jesús atana huecuana:

—Echua Puji, einid'u madhada cuana ja ecuanaju iyubatana, mique ebani su ecuanaju cuatsasiana putsu.

<sup>18</sup> Da su Jesús ja atana huecuana:

—Beju yama Ishahua bana cielo jenetia edajajani dharara nime. <sup>19</sup> Yama micuana tucheda tiana bacua, asi ja aimue micuana cuaja biame yata mahue puji, einid'u madhada cuana ja aimue micuana cuaja biame yata mahue puji. <sup>20</sup> Be beidaji mepuji, ahua einid'u madhada cuana micuana eiyyubatani su. Ebia su beidaji mepuque, micuaneda da Diusu sa dharejiji cuana putsu.

*Jesús da Diusu sa Ebacua*  
(Mateo 11.25-27; 13.16-17)

<sup>21</sup> Da hora su beju Espiritu Santo ja Jesús beidaji ebia su ametana. Jesús ja mesa Tata Diusu uja mitsutana:

—Quema Tata, yama mi emitsutsuainia. Mida da aida eni. Mida da cielo, mundo emetse. Nimemitsida cuana bahui mida shanapameana mique piba cuana. Bahue eni ebatitani cuana mu aimue shanapameana mahue mique piba cuana. Daja mique tsada.

<sup>22</sup> ‘Quema Tata Diusu ja ema pamapa ai cuana menajati-atana. Aimue ema aiya biame saida eshanapaenitani mahue. Quema Tata Diusu ja bahui ema saida eshanapaenitani. Daja huecha aimue quema Tata Diusu aiya biame eshanapaenitani mahue. Yama bahui tueda saida eshanapaeninia, ema tusa ebacua putsu. Quebata quema tsada cuana bahui quema Tata Diusu yama eshanapameinia.

<sup>23</sup> Da su Jesús ja discípulo cuana chama putsu, uja atana huecuana:

—Quebata cuana ja ema ebatani, beidaji eputani. <sup>24</sup> Biahua tiempo Diusu sa profeta, echua puji chenu cuana ja jiahue micuaneda ebainia cuana baja adhaataidha. Jiahue quema micuaneda eid'abainia quisa cuana di id'abaja adhaataidha huecuana. Beju cuaja a taji mahue bataidha huecuana, biahua tiempo jenetia anitaidha putsu.

*Samaritano saida jepuiti quisa*

<sup>25</sup> Pia tsine beju piada Moisés chenu sa jacuatsasiati ebuetsuaji Jesús peje su putiana mimi neje tu yaba puji cristiano cuana butse su. Tuahueda Jesús quisabatana uja:

—Echua Puji, ¿ai ni da quema a taji cielo su eid'e yanieniti puji?

<sup>26</sup> Jesús ja deja jeutsutana uja:

—Quisaque ema, ¿cuaja ni da derejiji yani Moisés chenu sa jacuatsasiati cuana su?

<sup>27</sup> Da su jacuatsasiati ebuetsuaji ja Jesús jeutsutana:

—“Ibuneda baque Diusu pamapa mique muesumu neje. Cuaja mida quitaita ibuneda ebatiani nime, daja mique pia cuana ibuneda ba taji.” Daja derejiji yani.

<sup>28</sup> Da su Jesús ja tueda uja atana:

—Saida mida jajeutsutaitia. Ahua miada ye jacuatsasiati ya su, da su cielo su mida eid'e yanienitiyu beju.

<sup>29</sup> Ebuetsuaji ja Jesús quisabatana neicha:

—¿Quebata jia quema edue?

<sup>30</sup> Da su Jesús ja bahue quisa neje jeutsutana deja uja:

—Piada deja Jerusalén ejude jenetia cuinanana Jerico ejude su eputi puji. Edid'i je tu epuhu cama, tsi puji cuana ja

tueda inatana. Pamapa mesa ai cuana mejemipetana huecuana. Madhada iche putsu, beju cuataibana huecuana. Deja manamecue putsu, jahuijati jusiahuanatana huecuana. <sup>31</sup> Beju piada sacerdote edid'i je jaitianana. Deja ichenu esa batana biame, sacerdote butsepi hue pejaitianatana. <sup>32</sup> Tije beju piada deja jaitianana. Tueda da templo sa etsahuaji puina. Deja ichenu esa batana biame, tueda di butsepi hue pejaitianatana. <sup>33</sup> Da su beju piada samaritano deja edid'i je jaitianasaina. Tuahueda deja ichenu esa ba putsu, bataichenubatana. <sup>34</sup> Beju nariatana deja. Etsi cuana babutana. Mesa animalo quitaita bia su ichatsuatana. Tu ecuinati ete su dusutana. Dapia quinatana deja. <sup>35</sup> Pia huenati samaritano eputiyu puji ete emetse chipilu tiatana. Chipilu ete emetse tia putsu, uja atana: "Quinaque ye deja ichenu. Ahua manu yanidera su, ema esiapati su, yama mi echujetia."

<sup>36</sup> Da su Jesús bahue quisa neje quisape putsu, uja jacuat-sasiati ebuetsuaji quisabatana:

—¿Quebata tueda quimisha deja cuana edue nime jadasutiana deja ichenu neje?

<sup>37</sup> Beju jacuatsasiati ebuetsuaji ja Jesús jeutsutana:

—Tueda samaritano ja deja ichenu quina putsu, edue nime batana.

Da su Jesús ja ebuetsuaji uja atana:

—Jade, miada daja huecha atique.

### *Jesús ja María, Marta detse peretitana*

<sup>38</sup> Jesús da discípulo cuana neje pia ejude su cuinana. Dapia beta epuna edue tatse Marta, María banime anina. Tuatseda Jesús batsutana tse. <sup>39</sup> Beju María Jesús sa ehuaitsi su aniuteana tusa quisa eid'aba puji. <sup>40</sup> Marta mu daja hue mudumudusana, ebia su mesa ai a taji cuana anina putsu. Da su Marta ja Jesús nariatana tu uja equisa puji:

—Echua Puji, quema edue María ja aimue ema etsahuatani mahue. Cuatsasiaque beju tueda ema patsahuata puji.

<sup>41</sup> Da su Jesús ja Marta jeutsutana:

—Marta, Marta, mique ai a taji cuana ja mi ebia su epibapibametani. <sup>42</sup> María ja ebia su saida quita dharetaitia, quema mimi cuana id'abaja ataitia putsu. Aimue yama tueda emejemiyu mahue.

## 11

*Jesús ja discípulo cuana cuaja Diusu mitsume a taji buetsuatana*

(Mateo 6.9-15; 7.7-11)

<sup>1</sup> Pia tsine Jesús Diusu neje jamitsutianina. Beju jamitsupetiana su, mesa discípulo cuana ja tueda bajatana uja:

—Echua Puji, Juan Bautista ja mesa discípulo cuana bahuet-suatana cuaja Diosu neje jamitsutime. Beju ecuanaju di daja buetsuaque.

<sup>2</sup> Da su Jesús ja buetsuapirutana huecuana:

—Uja micuaneda Diosu mitsume ya:

Ecuanaju sa Tata Diosu, cielo su yani, mique ebani cristiano cuana ja paiyubata.

Cuatsasiapiruenique ye mundo su.

Mique ai tsada cuana bahui cristiano cuana ja ye mundo su paata, cuaja cielo su aniji cuana ja yatani nime.

<sup>3</sup> Pamapa tsine ecuanaju tiaque ai dia taji cuana.

<sup>4</sup> Perdonaque ecuanaju sa jucha cuana, cuaja ecuanaju madhada aji cuana eperdonainia nime.

Be ecuanaju Ishahua peje su pirubameji.

Tusa eme jenetia d'ejí su ecuanaju aque.

Daja papu.

<sup>5</sup> Uja Jesús ja daja hue buetsuainiame atana huecuana bahue quisa neje:

—Piada deja putiana dhidha dusete mesa eshanapa sa ete su pan ebajati puji. Uja bajatana: <sup>6</sup> “Eshanapa, tiaque ema quimisha pan cuana, pia quema eshanapa beju quema ete su cuinaitia putsu. Mue ai biame quema ani tu etia puji.” <sup>7</sup> Da su eshanapa ja ete dume jenetia uja jeutsutana: “Cuaja tia taji mahue mi yama ebainia, beju terisaisiajiji putsu. Quema ebacua cuana neje ema etahuisa. Cuaja netiana taji mahue tsuhu ema mi etia puji.”

<sup>8</sup> Jesús ja bahue quisa quisape putsu, daja hue quisainiame atana huecuana uja:

—Yama micuana butsepi equisainia, tueda deja ja daja hue mesa eshanapa bajanetiame atana mesa eshanapa ja pan tiatana teje. Beju tueda eshanapa ja pan etiata pacuayu puji. Aimue eshanapa su mahue. <sup>9-10</sup> Da putsu, yama micuana butsepi equisainia, Diosu micuaneda ebaja su, tuahueda micuana etiatayu. Da su memebajaque Diosu. Beju mechacuderaque. Chacu putsu, micuaneda etejeyu. Meturubaderaque. Turuba putsu, etsequed'iatiyu.

<sup>11</sup> ‘Ahua micuana sa ebacua cuana ja pan ebajatani su, ¿ai da micuaneda tumu etia bata? Ahua micuana sa ebacua cuana ja se ebajatani su, ¿ai da micuaneda bacua etia bata?’

<sup>12</sup> Ahua micuana sa ebacua cuana eja ebajatani su, ¿ai micuaneda asi etia bata? <sup>13</sup> Micuaneda deja juchaji cuana biame, micuana sa ebacua cuana ai saida cuana tia bahue. Beju Diosu mu da ebia su saida putsu, tu bajaji cuana ebia su ai saida cuana tia bahue.

*Pia cuana ja Jesús ja Ishahua sa tucheda neje ai nimetiuda cuana yatani tuaquisatana*

*(Mateo 12.22-30; Marcos 3.19-27)*

<sup>14</sup> Pia tsine Jesús ja deja mimi bue mahue peje jenetia einid'u madhada jusiacuinatana. Jusiacuinatana su, beju deja mimiana. <sup>15</sup> Piada piada deja madhada cuana ba putsu, tuneda cama uja jaquisatitana:

—Ye Jesús da aimue Diusu peje jenetia mahue. Beju einid'u madhada cuana cristiano cuana peje jenetia ejusiacuinatani Ishahua sa tucheda neje.

<sup>16</sup> Pia cuana ja Jesús bajatana nimetiuda aida Diusu peje jenetia paata puji. Daja Jesús bajatana huecuana tu yaba puji. <sup>17</sup> Jesús ja tuna sa piba madhada cuana shanapa putsu, uja atana huecuana:

—Ahua quebata huaraji aida sa cristiano cuana esajasa-jata su, ahua tuneda cama eichetita su, beju tueda huaraji aida sa tucheda etaitanapeyu. Daja huecha quebata familia edue cama eichetita su, tueda familia da etaitanape. <sup>18</sup> Daja huecha ahua Ishahua ja quitaita mesa einid'u madhada cuana jusiata cua su, mesa tucheda etaitanape. Aimue mesa einid'u madhada quitaita ejusiata mahue. Ahua daja yata su, tueda quitaita emajaitiani pu cua nime. Beju micuaneda, cristiano cuana peje jenetia yama einid'u madhada cuana ejusiacuinaia Ishahua sa tucheda neje, epuani. <sup>19</sup> Ahua daja su, ¿aidhe sa tucheda neje micuana sa ebuqueji cuana ja einid'u madhada cuana ejusiacuinatani? Jiahue yama micuana equisaba. ¿Aimue jia maida Diusu sa tucheda neje einid'u cuana ejusiacuinatani huecuana mahue? Da su, ¿jucuaja su micuaneda, yama einid'u madhada cuana Ishahua sa tucheda neje ejusiacuinaia, epuani? Micuana sa ebuqueji cuana ja ebametani micuaneda da japitsatijiji. Aimue yama Ishahua sa tucheda neje einid'u madhada cuana cristiano cuana peje jenetia ejusiacuinaia mahue. <sup>20</sup> Yama einid'u madhada cuana ejusiacuinaia Diusu sa Espíritu Santo sa tucheda neje bahui. Diusu ja mu tueda ai nimetiuda cuana yatani micuana duju su. Aimue Ishahua ja tueda ai nimetiuda cuana ema yametani mahue.

<sup>21</sup> 'Deja tucheda metseji sa ai cuana beju aimue aiya biame tsita cua mahue, mesa ete saida ebianetiatani putsu. <sup>22</sup> Ahua pia deja ebia su tucheda quita pue cua su, tuahueda upia yani deja pishitiameta cua. Tusa metse, pamapa tusa ai cuana pishitiame putsu, mejemita cua. Daja huecha ema Ishahua ebia su tucheda tu epishitiame puji, tusa einid'u madhada cuana ejusiacuina puji.



<sup>23</sup> ‘Quebata ja aimue ema saida ebatani mahue, tueda da ema neje emajaitiani. Daja huecha quebata ema neje echuduchuduani mahue, tuahueda eberebreatani.

*Einid'u madhada jasiapatiana quisa*  
(Mateo 12.43-45)

<sup>24</sup> ‘Einid'u madhada deja peje jenetia ecuinanani su, d'anita yahua je yaseni janahua jude echacu puji. Aimue teje yatani su, epibapirutiani uja: “Ema pasiapati ema cuinanaitia ete su.” <sup>25</sup> Da su beju deja peje su esiapatiani su, tueda deja da ete saida, memahue, basetajiji nime ebatani. <sup>26</sup> Da su neicha ecuinana pia siete tu ebia su madhada einid'u cuana eduse puji. Beju pamapa su deja sa equita dume su enubitani dapia yaniti puji. Da su tueda deja equene puina ebia su madhada epuani.

*Cuaja etse beidaji pu cua quisa*

<sup>27</sup> Jesús daja emimiani cama, piada epuna uja tsiatsiana:  
—¡Diusu ja mique cuara paibunebata, tuahueda mi sehuametana putsu!

<sup>28</sup> Da su Jesús ja epuna atana:

—Beju ebia su saida Diusu ja mesa mimi id'aba putsu jei yatani cuana paibunebata.

*Cristiano madhada cuana ja Jesús bajatana nimetiuda aida cuana paata puji*

(Mateo 12.38-42; Marcos 8.12)

<sup>29</sup> Beju cristiano madhada cuana ebia su jadhitisana Jesús peje su. Tuahueda daja hue quisainiame atana huecuana uja:

—Beju micuaneda da deja madhada, bubeta cuana. Micuaneda ema ebajainia yama nimetiuda aida ya puji. Aimue yama ya mahue. Cuaja Diusu sa profeta Jonás chenu puidha, tueda da micuaneseda puji nimetiuda aida papu.

<sup>30</sup> Da tiempo Jonás chenu quitaita nimetiuda ai cuana ataidha Níneve ejude su anitaidha cristiano cuana sa puji. Daja huecha jahue ema quitaita da nimetiuda aida nime epuani ye tiempo cristiano cuana sa puji. <sup>31</sup> Biahua tiempo echua puji aida epuna uqueda yahua jenetia pueidha echua puji Salomón chenu peje su mesa bahue eni quisa cuana eid'aba puji.

Beju jahue upia ema Salomón chenu ebia su bahue eni biame, aimue micuaneda quema quisa id'abaja yainia mahue. Da putsu, Diusu ja micuana ematsetayu castigo tsine su, micuaneda quema bahue eni quisa cuana id'abaja mahue ana putsu, cuaja tueda echua puji aida epuna ja Salomón chenu sa bahue eni quisa cuana id'abataidha nime.

<sup>32</sup> Nínive ejude su anitaidha cristiano cuana ja di ye tiempo cristiano cuana etuaquisata Diusu sa castigo tsine ecuina su.

Da tiempo su Nínive ejude su anitaidha cristiano cuana peje su Jonás Diosu sa quisa cuana quisaquisa puidha su, pamapa tuneda Diosu peje su japibaturucatitaidha. Jiahue quita beju upia ema yani Jonás chenu ebia su aida epuani biame, ye cristiano cuana ja aimue ema id'abaja yatani mahue. Da putsu, Diosu ja ebia su ecastigata huecuana.

*Hueda jepuiti quisa*  
(Mateo 5.15; 6.22-23)

<sup>33</sup> 'Aimue detse aiya biame hueda huitsu putsu, biaterita cua mahue. Beju d'ejí su hueda eichata ete dume pajurabata puji. <sup>34</sup> Micuana sa etua da lámpara nime micuana sa equita sa puji. Ahua micuana sa etua saida su, saida echamati. Ahua micuana sa etua saida mahue su, aimue saida echamati mahue. Daja huecha ahua micuaneda ai madhada cuana su bahui epibatiani su, apuda saida su micuaneda epuniuneti. <sup>35</sup> Merejatique be micuana sa hueda padhamuti. <sup>36</sup> Ahua micuana sa equita saida, hueda, apuda mahue su, da su beju pamapa saida ebati lámpara sa hueda ja micuana ejurabatani nime.

*Jesús ja fariseo, jacuatsasiati ebuetsuaji cuana tuaquisatana*  
(Mateo 23.1-36; Marcos 12.38-40; Lucas 20.45-47)

<sup>37</sup> Beju Jesús ja buetsuapetana huecuana su, piada fariseo ja Jesús mesa ete su dusutana ediadia puji. Ete su cuinati putsu, Jesús nubiana. Misha su aniuteana jamerucuatiji mahue. <sup>38</sup> Da su fariseo nimetiunetiana, Jesús jamerucuatiji mahue ediadiani ba putsu. Fariseo daja nimetiunetiana, judío cuana sa puiti diadiaji mahue su emerucuatitani putsu.

<sup>39</sup> Da su Jesús ja tueda jubida d'ayatana uja:

—Micuaneda da emeji dume adhida pu cua nime, ebia je bahui saida, rucuaajiji. Micuaneda di ebia je bahui saida nime. Edume su mu ai piapiati madhadaji micuana sa yani. <sup>40</sup> Aimue micuaneda epibatiani mahue Diosu ja equita neje tupupai enid'u di atana. Micuaneda equita bahui rucua bahue. <sup>41</sup> Enime dume su di mebasetatique. Da chu beju pamapa rucuapejiji epu.

<sup>42</sup> '¡Aba, fariseo cuana, micuaneda bubeta putsu! Pamapa micuana sa enubiani ai cuana sa piada décimo chidi hue eichaderainia Diosu sa puji biame, butsepi punuineti ai cuana esetainia. Ibuneda mahue micuaneda. Aimue micuaneda pia ebia su saida jabuetsuati cuana ebuetsuainia mahue. Aimue cristiano cuana Diosu butse su butsepi paputa puji ebuetsuainia mahue. Aimue ebuetsuainia huecuana mahue huamahuama paibunebatita huecuana puji. Aimue ebuetsuainia huecuana mahue Diosu peje su

panimetuheatita huecuana puji. Tueda ai saida cuana di micuaneseda buetsua taji yainia pia Moisés sa jacuatsasiati cuana neje tupupai. Beju aimue micuaneda mu daja yainia mahue.

<sup>43</sup> ‘¡Aba micuaneda fariseo cuana! Micuaneseda tsada jadhitati jude ete cuana su aniude ebia su saida cuana su anija bahui. Ejude duje micuaneseda tsada cristiano cuana ja micuana iyuda neje emitsuta.

<sup>44</sup> ‘¡Aba micuaneda fariseo, jacuatsasiati ebuetsuaji cuana! ¡Micuaneda da bubeta cuana! Micuaneda da sepulcro bataji mahue edume su ebadeta ai adhida cuana nime. Cristiano cuana da bia je yasetani su, enid'umadhatitani huecuana. Daja huecha cristiano cuana enimemadhatitani, micuana sa ai puiti madhada cuana tije a putsu.

<sup>45</sup> Da su piada jacuatsasiati ebuetsuaji ja Jesús atana uja:  
—Echua Puji, miada ecuanaju di emadhabainia tueda mimi neje.

<sup>46</sup> Jesús ja tueda uja atana:

—¡Aba micuaneda jacuatsasiati ebuetsuaji cuana di! Micuaneda cristiano cuana Diusu sa ebaní su jubida neje ebia su ai cuana yameinia. Micuana sa jacuatsasiati cuana da tadada cristiano cuana ja yata puji. Daja pia cuana jubida neje yameinia biame, micuaneda mu aimue daja dhucuana yainia mahue.

<sup>47</sup> ‘¡Aba micuaneda! Micuana sa tata chenu cuana ja Diusu sa profeta cuana manuametaidha. Beju jiahue micuaneda tuna sa sepulcro cuana saida yainia. <sup>48</sup> Da neje saipie hue daja manuametaidha huecuana ebametiani. Micuaneda da tata edhi chenu cuana neje tupupai. Tuneda profeta cuana manuametaidha. Beju micuaneda sepulcro cuana yainia.

<sup>49</sup> ‘Da putsu, Diusu bahue eni uja puidha: “Yama quema profeta, apóstol cuana ebeitu micuana peje su. Beju micuaneda ebia su eduinini tuna neje. Piada piada micuaneda emanuame. Pia cuana tijetije ya.”

<sup>50</sup> Micuana peje su cama Diusu sa enime epu, profeta cuana manuametaidha huecuana jepuiti. <sup>51</sup> Manuamejiji putaidha profeta cuana da Abel jenetia Zacarías teje micuaneda peje su cama Diusu sa enime epu. Zacarías da tije enieni manuametaidha huecuana altar iyuda eti jude detse dhede je su. Yama micuana butsepi equisainia, Diusu ja micuana echujebajata tuna sa manu jepuiti.

<sup>52</sup> ‘¡Aba micuaneda jacuatsasiati ebuetsuaji cuana! Micuaneda Diusu sa mimi buetsuaja yainia biame, aimue micuaneda tueda mimi eshanapainia mahue. Pia cuana di micuaneda aimue butsepi eshanapameinia mahue.

<sup>53</sup> Da su beju Jesús daja mimipeana su, fariseo, jacuatsasiati ebuetsuaji cuana tu neje ebia su duininipirutana. Jesús ebia su quisabapirutana huecuana madhada piba neje. <sup>54</sup> Uja japibatitana huecuana: “Cuapuitime madhada hue Jesús jeutsuti su, beju ecuaneda tuaquisa cua.”

## 12

*Jesús ja cristiano cuana buetsuatana deja bubeta cuana jepuiti*

<sup>1</sup> Beju ebia su dueji cristiano cuana Jesús yani su jad-hitatitana. Dueji huecuana putsu, janunununuati putana huecuana. Da su Jesús ja mesa discípulo cuana quisapirutana uja:

—Merejatique fariseo cuana neje, tuneda da bubeta putsu. Madhada ai cuana yatani huecuana rubuajiji. <sup>2</sup> Tuna sa ai madhada cuana da levadura harina bebajiji su nime. Levadura ja bebajiji etutsuametani nime, daja da tuna sa ai piba madhada cuana batasaida ebametita. <sup>3</sup> Pamapa tuna sa etsia piba madhada cuana ebametita. Pamapa ai etsia piba neje ajiji ai cuana Diosu ja ebameta. Pamapa etsia quisa cuana Diosu ja cristiano cuana eshanapameta.

*Diosu bahui iyuda mebaque*  
(Mateo 10.28-31)

<sup>4</sup> Quema eshanapa cuana, be ate cristiano cuana butse su iyuame mepuji. Micuana manumeta cua huecuana biame, aimue micuana sa enid'u mu cuaja madhada ata cua mahue. <sup>5</sup> Diosu bahui meiyubaque. Tuahueda equita manumeta putsu, cuati castigo su etse beituenita cua.

<sup>6</sup> Beju pishica d'ia janana beta chipilu chidi chuje. Chujeneda mahue biame, aimue Diosu ja esetatani mahue. <sup>7</sup> Micuaneda beju d'ia janana cuana ebia su chuje eni Diosu butse su. Aimue tuahueda micuana esetatayu mahue. Pamapa micuana sa echuaina cuana idadajiji. Piada piada cama Diosu ja eshanapatani. Da su be iyuame mepuji, micuaneda da Diosu peje su d'ia janana cuana ebia su chujeji putsu.

*Cristo quisanetiakuina taji cristiano cuana butse su*  
(Mateo 10.32-33; 12.32; 10.19-20)

<sup>8</sup> Ahua quebata quema puji cristiano cuana butse su saida equisanetiakuinati su, yama di ángel cuana, Diosu butse su tuseda puji saida equisanetiakuina. <sup>9</sup> Ahua quebata cristiano cuana butse su ema tsada mahue ebata su, yama di ángel cuana, Diosu butse su tueda tsada mahue eba.

<sup>10</sup> ‘Pamapa ema madhabaji cuana Diosu ja perdonata cua, Espíritu Santo madhabaji cuana mu aimue Diosu ja perdonata cua mahue.

<sup>11</sup> ‘Beju deja madhada cuana ja duinini putsu, micuana jadhitati jude ete cuana su, huaraji aida cuana butse su ema jepuiti edusuta su, be ebia su mepibapibaji cuaja micuaneda jeutsume ya. <sup>12</sup> Da hora su Espíritu Santo ja cuaja micuaneda ejeutsuti puji mimi cuana etiata.

*Parejatita chipiluji saida cuana*

<sup>13</sup> ‘Da su beju pia deja ja cristiano cuana duju su Jesús uja atana:

—Echua Puji, cuatsasiaque quema edue etseju sa tata chenu sa ai cuana quema tupu pasajatiata.

<sup>14</sup> Da su Jesús ja tueda atana uja:

—¿Aiya ni da ema mique ai cuana ebaji ichatana?

<sup>15</sup> Jesús ja daja hue quisainiame atana huecuana:

—Merejatique. Ye mundo sa ai cuana be ebia su tsada mebaji. Aimue ai cuatajuse tsada mahue saida etse yani puji.

<sup>16</sup> Da su Jesús ja bahue quisa neje buetsuatana huecuana:

—Beju deja chipiluji saida anina. Jucuada mesa te cuana anina. Puiti eni mesa te cuana puana. <sup>17</sup> Da su japibapirutiana uja: “Beju quema ete chidi cuana da tupu mahue pamapa quema ejaja cuana eichasetati puji. <sup>18</sup> Da su quema ete chidi cuana eberebera pia eichacua aida ya puji. Dapia pamapa quema ejaja cuana yama eichasetata. <sup>19</sup> Da su quema pamapa ai cuana tupu epu quejucua mara puji putsu, beidaji ema epu. Ejanahua da ema. Eid'iti, ediadia da ema.” <sup>20</sup> Beju Diosu ja tueda deja atana: “Deja, aimue mida saida epibatiani mahue. Ye dhidha quitaita su mida emanu. Da su beju pamapa mique ebia su ichasetajiji ai cuana, ¿aidhe sa puji ni da epu?” <sup>21</sup> Daja da quebata ja tuseda puji bahui ebia su ai cuana edhitatani. Chipiluji biame, Diosu sa ai cuana su mu pia puri.

*Tata Diosu ja mesa ebacua cuana einatsihuatani*  
(Mateo 6.25-34)

<sup>22-23</sup> ‘Be ebia su mepibapibaji ai dia taji, ejud'uji cuana jepuiti. ¿Ai puji saida ye ai cuana jepuiti ebia su epibapiba puji? <sup>24</sup> Mechamaque d'ia janana cuana. Banabana, huirujiji ejaja cuana ichasetata bue mahue ta biame, Tata Diosu ja emihuatani huecuana. Micuaneda mu d'ia janana cuana ebia su chujeme Diosu peje su. <sup>25</sup> Aimue detse etse ebia su bauta bauna cua mahue, pibapiba putsu. <sup>26</sup> Daja huecha aimue detse etse sa ai dia taji cuana ani cua mahue, ebia su pibapiba putsu.

<sup>27</sup> ¿Ai puji ni da micuaneda ejud'uji jepuiti ebia su epibapibani? Mechamaque shasha cuana. Ania chidi emurutani mudu bue mahue, badu bue mahue ta biame. Beju yama micuana ene putsu equisainia, aimue echua puji Salomón chenu jajud'utidha ania shasha cuana nime mahue, tueda da ebia su chipiluji puidha biame. <sup>28</sup> Shasha neje Diusu ja nutsa ania chidi yatani. Beju jiahue quita nutsa shasha neje ania chidi. Mueta beju sarajiji cuati puji bahui saida epuani. Mepibatique nutsa cuana su. Ahua Diusu ja nutsa cuana ania chidi shasha neje yatani su, ¿aimue jia maida micuana Diusu ja ejud'utayu mahue? ¿Jucuaja su ni da micuaneda Diusu peje su aimue enimetucheatiani mahue? <sup>29</sup> Da su be ebia su mepibapibaji ai dia taji, ejud'uji cuana jepuiti. <sup>30</sup> Daja Diusu peje su jei eputani mahue cuana pu bahue. Beju micuaneda mu da aimue daja epu mahue, micuana sa aimue ai cuana Tata Diusu bahue putsu. <sup>31</sup> Equene Diusu bahui tsada mebaque. Tu butse su nimebutsepi bahui tsada mebaque. Ahua micuaneda daja ya su, Tata Diusu ja micuana pamapa ai saida cuana etiatayu. Be ebia su mepibapibaji micuaneda cuaja mueta epu cuana su. Tsine meamea Diusu ja micuana etsahuatayu.

*Cielo su yani ai cuana*

*(Mateo 6.19-21)*

<sup>32</sup> 'Quema ibuneda cuana, be iyuame mepuji. Micuaneda da quejucua chidi biame, Diusu ja micuana ecuatsasiameta tu neje tu ecuatsasiati su. <sup>33</sup> Meiruque micuana sa ai cuana. Aiji mahue cuana metiaque. Daja a putsu, Diusu ja micuana pamapa ai saida cuana etiata cielo su. Dapia da aimue micuana sa ai biame ehueiti mahue, aiya biame etsita mahue, musu ja emadhatiata mahue. <sup>34</sup> Quepia micuana sa ai saida cuana eradaneti su, dapia da micuaneda anija epu.

*Diusu enimeid'uatani cuana janimepitijiji paanita*

<sup>35</sup> 'Meid'abaenique ema. <sup>36</sup> Emebajaji ja mesa echua puji eid'uatani nime, mepuque. Echua puji jahuaneti tsine jenetia esiapati su, mesa ete su ecuinatiyu su, emebajaji sa id'eni taji tu etsequed'ia puji. <sup>37</sup> Echua puji beju esiapati su, emebajaji beidaji epu, echua puji ja tu eid'eni ehuaquinata putsu. Daja huecha echua puji di beidaji epu. Echua puji quitaita ja emebajaji yaniutemeta misha su. Tuahueda emebajaji jana emederuta. <sup>38</sup> Echua puji dhidha dusete ahua huenahua pacuina biame, ahua tuahueda emebajaji eid'eni ebasenata su, beju beidaji emebajaji epu. <sup>39</sup> Ye di meshanapaque. Ahua ete emetse ai hora tsi puji ecuina bahue pu cua su, tueda detse id'eni cua. Aimue detse tsiameta cua mahue mesa ai cuana. <sup>40</sup> Daja nime micuaneseda janimepitijiji ani taji.

Micuaneda aimue ema eid'uainia mahue hora su, da hora su ema esiapati.

*Emebajaji saida, saida mahue detse jepuiti quisa*

*(Mateo 24.45-51)*

<sup>41</sup> Da su Pedro ja Jesús quisabatana:

—¿A da mique jabuetsuati ecuanaju sa puji bahui ahua pamapa cristiano cuana sa puji di?

<sup>42</sup> Jesús ja Pedro jeutsutana:

—Quema jabuetsuati cuana quebata papu cuana sa puji. Ete emetse ecuinanani su, pamapa mesa emebajaji cuana pi-ada emebajaji emenajatiajusianatani saida pabata huecuana puji. <sup>43</sup> Ahua tueda emebajaji ja pamapa saida ebata su, ete emetse ja tueda saida echujetiata, jasiapati putsu. <sup>44</sup> Tueda emebajaji saida ebia su aida ai cuana emenajatiajusianata. <sup>45</sup> Ahua tueda emebajaji ja saida pamapa ai cuana ebata mahue su, ete emetse ja tueda ecastigata, jasiapati putsu. Tueda emebajaji uja madhada hue japibati cua: “Quema echua puji mu aimue beju tipeida esiapati mahue.” Ahua tuahueda pia emebajaji cuana icheta cua su, ahua ebia su diadia cua, jaid'iti cua, tsetse cua su, da su ete emetse ja tueda jubida castigata cua, jasiapati putsu. <sup>46</sup> Tueda echua puji ete emetse da esiapati emebajaji madhada ja tu eid'uatani mahue hora su. Da su emebajaji madhada ete emetse ja ejusiacuinata. Castigo jude su ebeituta.

<sup>47</sup> Ahua emebajaji mesa echua puji sa ai tsada cuana bahue biame, da su ebia su echua puji ja tueda castigata cua, emebajaji bahue biame, mue a putsu. <sup>48</sup> Ahua emebajaji mesa echua puji sa ai tsada cuana bahue mahue putsu, aimue yata mahue su, tupuajiji hue echua puji ja ecastigata. Quebata Diosu ja ebia su etiatani, tueda Diosu ja ebia su ebajata.

*Jesús jepuiti cristiano cuana jasajasajatitana*

*(Mateo 10.34-36)*

<sup>49</sup> Ye mundo su ema pueana putsu, cristiano cuana esajasajatita. <sup>50</sup> Beju quema ebia su sufri pu taji. Da putsu, ema ebia su epibapibani ema sufri epupe teje. Tsada quema ye sufrimiento cuana tipeida papupe. <sup>51</sup> Beju ye mundo su ema pueana cristiano cuana pasajasajatita puji. Ema pueana putsu, aimue cristiano cuana tuneda cama huamahuama saida edusutita mahue. <sup>52-53</sup> Ema jepuiti ebacua mesa tata neje eduininibati. Ebaquepuna mesa cuara neje ecuininibati. Ebacuasane mesa yahue sa cuara neje eduininibati. Beju familia quitaita da eduininibatita ema jepuiti.

<sup>54</sup> Jesús ja daja hue quisainiame atana huecuana uja:

—Micuaneda mu bubeta. Judu cuana enetianani ba putsu, nai epu micuaneda eshanapainia. <sup>55</sup> Que jenetia beni epuani

shanapa putsu, bahue micuaneda ahua huinahuina epu, ahua ed'iatu. <sup>56</sup> Beju micuaneda da bubeta cuana. Micuaneda bahue epuani ahua mueta saida ehuenta, ahua mahue, buepa chama putsu. Daja biame, Diosu ja micuana duju su cuaja ai yatani cuana eshanapainia mahue.

<sup>57</sup> '¿Jucuaja su ni micuaneda butsepi japibatija mahue? <sup>58-59</sup> Yama micuana bahue quisa neje equisa. Ahua quebata mique manu ja mi echujebajatani su, tuahueda mi huaraji peje su dusuji mahue su, saida mebasetatique mi huaraji peje su emenajatiata mahue puji. Ahua mahue su, huaraji ja mi policia peje su emenajatiata. Mi eteriichata huecuana. Enei hue yama mi equisainia, dapia mida yaniti pamapa mique manu echujetiape teje.

## 13

### *Diosu peje su japibaturucati taji*

<sup>1</sup> Da hora su pia cuana ja cuaja romano huaraji aida Pilato ja piada piada Galilea yahua deja cuana manuameme atana Jesús quisatana. Tuna animalo cuana Diosu peje su eirut-suatasas cama, Pilato ja manuamemetana huecuana. <sup>2</sup> Da su Jesús ja atana huecuana uja:

—¿Ai pamapa pia deja cuana ebia su juchaji huecuana putsu, manuametana huecuana bata? <sup>3</sup> Aimue daja mahue. Micuaneda di daja yata, ahua micuaneda Diosu peje su aimue epibaturucati mahue su. <sup>4</sup> Mepibatique piada tunca ocho ejaitiana cristiano cuana manutana Siloé sa torre Jerusalén ejude su, tuna bia su dajajana su. ¿Ai pamapa pia Jerusalén ejude su aniji cristiano cuana ebia su juchaji huecuana putsu, daja manume putana huecuana bata? <sup>5</sup> Aimue daja mahue. Micuaneda di daja tipeida manume epu, ahua Diosu peje su aimue epibaturucati mahue su.

### *Equi higuera ejaja jepuiti quisa*

<sup>6</sup> Jesús ja bahue quisa neje quisatana huecuana uja:

—Piada deja sa higuera equi netina. Da su tueda putiana ahua jajaji equi eba puji. Beju jaja mahue batana. <sup>7</sup> Da su mesa emebajaji uja atana: “Quimisha mara ema beju epueni ye higo equi ahua jajaji eba puji. Pamapa epue jaja mahue yama ebainia. Da putsu, quejusiauteque tueda eti jude su pia equi saida ebana puji. <sup>8</sup> Da su emebajaji ja equi emetse uja atana: “Echua puji, ye mara paneti hue tsuhu. Yama med'i peda putsu, saida etsajahuama. <sup>9</sup> Ahua pia mara jajaji epu su, paneti. Ahua mahue su, quejusiaute taji.”

*Jesús ja epuna tud'i saisiametana janahua tsine su*



<sup>10</sup> Beju pia janahua tsine su Jesús ja jadhitati jude ete su cristiano cuana buetsuatanina. <sup>11</sup> Dapia piada epuna tud'i anina. Tueda piada tunca ocho ejaitiana mara daja puina. Einid'u madhada ja tueda tud'i ametana. Cuaja jabutsepiati taji mahue jabatina. <sup>12</sup> Jesús ja epuna ihua putsu, uja atana:

—Epuna, beju mida saida.

<sup>13</sup> Da hora su tusa eme epuna bia su huanatana su, epuna jabutsepiatiana. Epuna Diosu sa puji saida mimipiruana. <sup>14</sup> Da su beju jadhitati jude ete sa ehuidusuji ebia su duinini-ana, Jesús ja janahua tsine su saisiametana putsu. Dapia enetita cristiano cuana uja quisatana:

—Beju pishica tsine yani emudumudu puji. Tueda tsine cuana su mepueque esaisiameti puji. Be mepueji janahua tsine su.

<sup>15</sup> Da su Jesús ja tueda jeutsutana:

—Mida da bubeta. ¿Aimue jia maida janahua tsine su mique juye, asunu epidhuinia mahue eid'imeti puji? <sup>16</sup> Beju ye epuna ichenu Ishahua ja piada tunca ocho ejaitiana mara tueda neda neje risijiji quinatana. ¿Aimue jia maida yama ye epuna tusa neda jenetia d'ejí su a cua mahue, janahua tsine biame? Tueda da mi nime Abraham chenu sa familia jenetia.

<sup>17</sup> Beju dapia Jesús sa majai enetita cuana bidhunetiana, daja Jesús mimiana putsu. Pamapa pia cristiano cuana mu beidaji putana, Jesús ja nimetiuda aida cuana atana ba putsu.

### *Mostaza ejaja jepuiti quisa*

*(Mateo 13.31-32; Marcos 4.30-32)*

<sup>18</sup> Jesús ja cristiano cuana daja hue buetsuainiame atana:

—¿Ai nime jia da Diosu ecuatsasiati? <sup>19</sup> Beju mostaza ejaja huai chidi nime da. Tueda ejaja huai chidi etse ebanainia su, aida esehuani. D'ia janana cuana echa su esaji yatitani.

### *Levadura jepuiti quisa*

*(Mateo 13.33)*

<sup>20</sup> Neicha Jesús quisabatana huecuana uja:

—¿Ai nime jia da Diosu ecuatsasiati? <sup>21</sup> Beju levadura harina bebajiji dume su nime da. Epuna ja levadura harina neje ehuarutani. Tueda levadura ja pamapa harina bebajiji etutsuametani. Daja nime da Diosu ecuatsasiati. Equene quejucua chidi cristiano cuana tu peje su jei eputani biame, da su beju pamapa ejude su aniji cuana jei eputayu.

### *Upahai chidi eteriji jepuiti quisa*

*(Mateo 7.13-14, 21-23)*

<sup>22</sup> Beju Jesús Jerusalén ejude su epuhu cama, ejude meamea puniunetina cristiano cuana ebuetsua puji. <sup>23</sup> Da su piada ja Jesús uja quisabatana:

—Echua Puji, ¿ahua ucua chidi hue d'eji su eputa?

Da su Jesús ja jeutsutana uja:

<sup>24</sup> —Quema jabuetsuati cuana da eteriji upa ai chidi nime. Quebata tueda jabuetsuati cuana yata su, tueda cielo su enubi. Dueji cristiano cuana cielo su nubija eputa biame, aimue enubita mahue, quema jabuetsuati cuana aja mahue ta huecuana putsu. <sup>25</sup> Ete emetse ja ete eterita su, aimue detse etseque su enetita cuana nubita cua mahue. Eteriji jubida turuba putsu, uja etsiatsiata huecuana: “Echua Puji, tsequed'iaque ecuanaju enubi puji.” Da su ete emetse ja, “Mue yama micuana shanapa que jenetia micuaneda.” <sup>26</sup> Da su ete emetse uja yapiruta huecuana: “Ecuana mi neje diadiana, jaid'itiana. Miada ecuanaju sa ejude su buetsuana.” <sup>27</sup> Beju ete emetse ja uja ejeutsuta huecuana: “Jubida yama micuana yainia, menetideraque ema naja jenetia, madhada aji cuana micuaneda putsu.”

Jesús ja daja hue quisainiame atana huecuana:

—Daja huecha micuaneda cielo su enubi puji Diosu jubida ebaja biame, aimue tuahueda menubique yata mahue. Aimue micuana shanapaja yata mahue. Tu naja jenetia uqueda cuati castigo su micuana ebeituenitayu. <sup>28</sup> Dapia micuaneda ebia su epa, etsedhaiti Abraham, Isaac, Jacobo, profeta chenu cuana Diosu neje yanienita ba putsu. Daja micuaneda epa, etsedhaiti, tuna neje cuaja ani taji mahue ebati putsu, micuaneda etseque su castigo su yanieniti putsu. <sup>29</sup> Pamapa yahua jenetia cristiano cuana cielo su enubita. Dapia yaniuteta huecuana ediadia puji. <sup>30</sup> Da su piada piada jiahue ai eni mahue cristiano cuana da equene aida eputa cielo su. Daja huecha piada piada jiahue equene aida puji cuana da dapia tije puji eputayu.

*Jesús pana Jerusalén ejude jepuiti*  
(Mateo 23.37-39)

<sup>31</sup> Tueda tsine su huecha piada piada fariseo cuana cuinatana Jesús peje su. Uja Jesús atana huecuana:

—Puenitique u jenetia, Herodes Antipas ja mi manuameja yatani putsu.

<sup>32</sup> Da su Jesús ja atana huecuana uja:

—Meputique Herodes Antipas peje su. Uja jida a taji mahue. Mequisatique: “Jiahue, mueta yama einid'u madhadaji, nedaji cuana esaisiame. Chumueta beju yape.” <sup>33</sup> Ema da jiahue, mueta, chumueta beju ejaitiana Jerusalén ejude su ecuinati teje. Aimue detse ema aiya jiahue manuameta cua mahue, Diosu sa profeta cuana Jerusalén ejude su bahui manuame bahueta huecuana putsu.

<sup>34</sup> Da su Jesús Jerusalén ejude su aniji cristiano cuana jepuiti uja puana:

—Jerusalén ejude su aniji cuana, micuaneda Diosu sa profeta cuana manuname bahue. Micuana peje su Diosu ja ebeitutani profeta cuana tumu neje maraca bahue. Quejucua nuati biame yama micuana dhitaja adhaana huaripa ja mesa yanana cuana edhititani enabai ema su nime. Beju aimue micuaneseda tsada puana mahue. <sup>35</sup> Da su meid'abaenique ema. Beju yama micuana ichajusia. Aimue micuaneda ema eba mahue ema esiapati teje. Da su ema esiapati su, micuaneda, “Diosu ja tueda paibunebata, Diosu sa ebani su epusiu putsu”, ema jepuiti epu.

## 14

### *Jesús ja deja etsu saisiametana*

<sup>1</sup> Pia janahua tsine su Jesús piada fariseo sa echua puji sa ete su putiana ediadia puji. Pia fariseo cuana ja Jesús einatsihuatani. <sup>2</sup> Dapia tu butse su deja etsu anina. <sup>3</sup> Da su Jesús ja fariseo cuana quisabatana:

—¿Ahua saida deja nedaji janahua tsine su esaisiame puji, ahua mahue?

<sup>4</sup> Beju mitananetitana huecuana. Da su Jesús ja deja nedaji inatana. Saisiame putsu, beitutana deja. <sup>5</sup> Neicha Jesús ja fariseo cuana atana:

—Ahua micuana sa juye, asunu rara su dajaja cua su, ¿aimue jia maida micuaneda da jenetia ejemicuina mahue, janahua tsine biame?

<sup>6</sup> Da su beju cuaja jajeutsuti taji mahue jabatitana huecuana.

### *Jahuaneti tsine sa ihuajiji cuana*

<sup>7</sup> Jesús ja ihuajiji cuana ja aniude eni cuana misha naja je echacutani batana. Da su uja quisatana huecuana:

<sup>8</sup> —Ahua mi tsine su eihuatani huecuana su, be aniude eni chacuji. Cuapuitime pia ihuajiji mi ebia su aida pue cua su, tsine emetse ja mi netianameta cua mi ebia su aida ihuajiji yaniuteme puji. <sup>9</sup> Tuahueda mi, “Tiaque tueda aniude eni ye deja”, ata cua. Da su beju bidhu putsu, pia aniude eni mahue su miqueda aniute taji. <sup>10</sup> Mi tsine su eihuatani huecuana su, aniuteque aniude eni mahue su. Da su mi tsine emetse ja, “Aniuteque dapia aniude eni su”, yata su, pamapa dapia ihuajiji yanita cuana ja mi ebia su aida ebata. <sup>11</sup> Quebata da tueda quita ebia su aida puja ebati su, Diosu ja tueda mue ai eni mahue nime yatayu. Daja huecha quebata da ai eni mahue ebati su, tueda Diosu ja ebia su aida yatayu.

<sup>12</sup> Jesús ja tu ihuaji puana deja quisatana uja:

—Mi tsine epuani su, be mique eshanapa, familia cuana, chipiluji deja cuana ihuaji. Ahua miada eihua huecuana su, tuneda mi daja huecha eihuata, mique jasetati eturuca. <sup>13</sup> Beju mi tsine epuani su, puri, ase bue mahue, tida, padha cuana mique ihua taji. <sup>14</sup> Daja a putsu, beidaji mida epu, mida cuaja chujetia taji mahue ebata huecuana putsu. Beju Diosu ja nimebutsepi cristiano cuana eid'emetayu su, cielo su mida ebia su echujetiata.

*Tsine aida jepuiti quisa*

<sup>15</sup> Beju misha naja su yani deja ja Jesús uja atana:

—Quebata Diosu ecuatsasiati su ediadia su, tueda beidaji epu.

<sup>16</sup> Da su Jesús ja deja jeutsutana uja:

—Piada deja tsine aida puana. Dueji cristiano cuana ihuatana. <sup>17</sup> Tsine hora beju cuinana su, tsine emetse ja mesa emebajaji cuana ihuajiji cuana ihuametana. Uja quisametana huecuana: “Mepueque beju, pamapa ai cuana basetajiji putsu.” <sup>18</sup> Beju pamapa ihuajiji cuana jaibuneba bajatitana. Piada uja puana: “Jiahue quita yama yahua eped'u bajaitia. Beju tueda quema bati taji.” <sup>19</sup> Pia uja puana: “Beju pishica juye butseji cama yama jiahue quita bajaitia. Tueda tsuhu quema jabati taji.” <sup>20</sup> Pia uja puana: “Jiahue quita ema ehuanepetiani. Da putsu, aimue da ema eputi mahue.” <sup>21</sup> Da su beju emebajaji jasiapati putsu, tsine emetse pamapa quisatana. Beju tsine emetse jubida duininiana. Tuahueda emebajaji uja cuatsasiatana: “Putique ejude duju je. Jetique pamapa puri, ase bue mahue, tida, padha cuana.” <sup>22</sup> Da su beju emebajaji putiana. Neicha jasiapati putsu, tsine emetse uja atana: “Echua puji, pamapa mique jacuatsasiati beju yama aitia. Daja biame, yani hue d'ejí pia cuana sa puji.” <sup>23</sup> Da su tsine emetse ja emebajaji uja cuatsasiaderatana: “Neicha ejude duju je putique. Pia cuana ihuatique papueta huecuana quema ete paseje puji. <sup>24</sup> Pamapa equene yama ihuana cuana aimue piada biame quema tsine su ediadia mahue.”

Atadhada Cristo tije ya puji

<sup>25</sup> Beju jucuada cristiano cuana Jesús tije ataina. Da su Jesús ja uja atana huecuana:

<sup>26</sup> —Ahua quebata ja ema tije aja su, tuahueda ema tusa tata, cuara detse ebia su ibuneda pabata. Daja huecha ema tusa ehuanne, ebacua cuana, edue cuana ebia su ibuneda pabata. <sup>27</sup> Quebata quema ebuqueji puja su, tuseda ema tije a taji emanu teje. <sup>28</sup> Ahua quebata ja ete baqui bauda aja su, equene tsuhu quejucua chujeme epu piba taji. Ahua mesa tupu yani yape puji piba taji. <sup>29</sup> Beju apiru putsu,

cuaja ape taji mahue tuahueda ebata su, cristiano cuana tu neje eid'ebatita. <sup>30</sup> Uja eputa huecuana: "Tueda deja ja apiru putsu, cuaja ape taji mahue batana." <sup>31</sup> Ahua quebata huaraji aida pia huaraji aida neje jaichetija pu cua su, equene tsuhu uja saida mesa japibati taji: "Quema soldado cuana da piada tunca mil yani. Quema majai sa soldado cuana da beta tunca mil yani. ¿Cuaja jia da ahua yama pishitiame cua, ahua mahue? <sup>32</sup> Tueda huaraji mesa soldado cuana pishihue ba putsu, su da emebajaji cuana pia huaraji aida peje su uqueda hue su ebeituta tuatse sa ai enime cuana pabasetatita puji. <sup>33</sup> Da su beju quebata ja ema tije aja su, equene pamapa mesa ai cuana ichajusiape taji.

### *Banu jepuiti quisa*

(Mateo 5.13; Marcos 9.50)

<sup>34</sup> 'Beju banu da saida. Ahua banu sa bueda etaitana su, ¿cuaja ni da banu neicha bueda puyu cua? <sup>35</sup> Mue ai puji saida beju banu. Aimue ehuamaji biame saida mahue. Jusia taji hue beju. Pamapa id'ajarraraji su, meid'abaenique ema.

## 15

### *Huisha taitanajiji jepuiti quisa*

(Mateo 18.10-14)

<sup>1</sup> Jesús ebuetsua epuani cama, jucuada echujebajaji, juchaji cuana tu peje su puetana tu eid'aba puji. <sup>2</sup> Daja ba putsu, fariseo, jacuatsasiati ebuetsuaji cuana ja Jesús uja madhabatana:

—Ye Jesús ja juchaji cuana saida ebatsutani. Tuna neje ediadiani.

<sup>3</sup> Da su Jesús ja bahue quisa neje quisatana huecuana:

<sup>4</sup> —Ahua quebata micuana sa cien huisha cuana yani su, ahua piada ejeitid'u su, tueda nueve tunca nueve ejaitiana huisha cuana eichajusia piada jeitid'ujiji echacuti puji. <sup>5</sup> Teje putsu, beidaji neje miada emapabeyu. <sup>6</sup> Ete su acuina putsu, pamapa mique edue, eshanapa cuana eihua. Uja mida epu: "Beidaji ema neje mepuque. Ye piada quema huisha jeitid'ujiji beju yama tejeitiba." <sup>7</sup> Yama micuana butsepi equisainia, daja huecha cielo su aniji cuana beidaji eputani, piada juchaji Diosu peje su epibaturucatiani su. Nueve tunca nueve ejaitiana d'ejí su cuana ebia su beidaji eputani huecuana piada japibaturucatiana jepuiti.

### *Chipilu taitanajiji jepuiti quisa*

<sup>8</sup> 'Epuna sa piada tunca chipilu yani su, da jenetia piada chipilu etaitana su, da su hueda eutsuata ete etahua puji. Etahuata chipilu taitanajiji eteje teje. <sup>9</sup> Teje putsu, mesa eshanapa cuana eihuatita. Uja epuna ja yata huecuana:

“Beidaji ema neje mepuque. Ye piada quema chipilu taitanajiji beju yama tejeitiba.”<sup>10</sup> Yama micuana equisainia, daja huecha Diosu sa cielo su aniji ángel cuana beidaji eputa, piada juchaji Diosu peje su epiaturucati su.

*Ebacua tata peje jenetia netiderana jepuiti quisa*

<sup>11</sup> Jesús ja daja hue buetsuainiame atana cristiano cuana:

—Piada deja sa beta ebacua anina.<sup>12</sup> Da su ebacua tije puji mesa tata uja atana: “Tata, mi manuji mahue su hue, quema tupu mique chipilu ema tiaque.” Da su tata ja betana ebacua detse sajatiatana pamapa mesa chipilu.<sup>13</sup> Beju quejucua tsine sa ebacua tije puji pamapa mesa ai cuana jadhitatiana. Pia yahua uqueda su putiana. Dapia pamapa mesa chipilu cuana apetana, pamapa mesa ai utsatada madhada cuana yainia je.<sup>14</sup> Chipilu mesa pupeana su, dhe-manupiruana, mid'e cuinana tueda yahua su putsu.<sup>15</sup> Da su mudumudupiruana. Cuchi quinaji puana.<sup>16</sup> Ebia su edhemanuani putsu, cuchi cuana sa jana diaja atana. Aimue aiya biame tueda mihuaja atana mahue.<sup>17</sup> Da su beju tueda uja pibapibana: “Quema tata sa emebajaji cuana sa jana tupu yani. Beju ema tusa ebacua biame, upia ema diadiaja emanu.<sup>18</sup> Pasiapati hue ema quema tata peje su. Tueda yama uja ya: ‘Tata, ema Diosu butse su juchaji puitia. Daja huecha mi butse su.<sup>19</sup> Be ema baji mique ebacua nime. Mique mudu puji nime hue ema baque.’”<sup>20</sup> Da su beju putibana mesa tata peje su. Uqueda su hue tueda ecuinahu mesa tata ja batana. Tata ja ba putsu, ebia su ibunebatana mesa ebacua. Da su tipeida jududutiana ebacua etsunetia puji. Tsunetia putsu cama hue, id'ami putsu, budhitana ebacua.<sup>21</sup> Da su ebacua ja mesa tata uja atana: “Quema tata, ema Diosu butse su juchaji puitia. Daja huecha mi butse su. Da putsu, be ema baji mique ebacua nime.”<sup>22</sup> Da su beju tata ja mesa emebajaji cuana cuatsasiatana uja: “Meduseque ejud'uji eni. Duse putsu, mejud'uque. Metara emeyatsa su meichaque. Pulucu di meichaque ehuatsi su.<sup>23</sup> Huaca emud'u tseida memanumeque. Tsine mepuja.<sup>24</sup> Ye quema ebacua manujiji nime puana. Beju eid'e jasiapataitiba. Tueda tsunuda taitanajiji biame, jiahue ecuaneda tejeitiba.” Da su beju tsine pupirutana huecuana.

<sup>25</sup> ‘Daja tuna eputasa cama, ebacua edhi te jenetia cuinaibana. Ete su ecuinasayu je, beidaji eturuturutani huecuana id'abatana.<sup>26</sup> Da su piada emebajaji quisabatana: “¿Ai da micuaneda epuani?”<sup>27</sup> Emebajaji ja ebacua edhi jeutsutana uja: “Beju mique d'au cuinaitiba saida.”<sup>28</sup> Da su ebacua edhi ebia su duininiana, daja id'aba putsu. Tsine su nubija mahue puana. Da su mesa tata tu enubiame puji

cuinanana. <sup>29</sup> Ebacua edhi ja mesa tata uja atana: “Ema dajucua mara mi neje saida mudumuduana biame, aimue mi quema puji mu tsine a. Aimue huisha janana dhucuaana quema puji mu manuame ema quema eshapanapa cuana neje tsine su ediadia puji. <sup>30</sup> Beju jiahue cuinaitiba mique ebacua a taji mahue. Tuahueda mique chipilu epuna chuamadhada neje apejiji. Daja biame, miada huaca emud'u tseida manuameitia tuseda puji tsine ya puji.” <sup>31</sup> Da su tata ja ebacua edhi uja jeutsutana: “Ibuneda ebacua, mida mu ema neje hue yani. Pamapa quema ai cuana miqueda cama beju. <sup>32</sup> Jiahue da saida tsine epu puji, mique d'au cuinaitiba putsu. Tueda manujiji nime puana. Beju eid'e jasiapatitaba. Tueda tsunuda taitanajiji biame, jiahue ecuanaju tejeitiba.

## 16

### *Mudu puji sa dusuji ate jepuiti quisa*

<sup>1</sup> Jesús ja discípulo cuana daja hue quisainiame atana:

—Deja chipiluji beju anina. Mesa piada mudu puji sa edusuji anina. Da su beju edusuji ja tusa ai cuana aimue saida bataina mahue pia cuana ja deja chipiluji quisatana.

<sup>2</sup> Da su deja chipiluji ja edusuji ihuatana. Ihua putsu, uja atana: “Ema equisatani huecuana miada quema ai cuana aimue saida ebainia mahue. Da su pamapa manu quirica cuana ema menajatiaque, aimue mida quema edusuji beju epu mahue putsu.” <sup>3</sup> Da su edusuji jubida japibapirutiana uja:

“¿Cuaja ni da ema epu, quema emetse ema ejusiacuinatani putsu? Aimue quema tucheda te su emudumudu puji. Ebidhuani ema limosna ebaja puji. <sup>4</sup> Beju bahue ema cuaja yama aitime ya. Saida yama ya quema emetse sa manu cuana, saida ema mecuana sa ete cuana su pabatsuta huecuana puji, quema mudu beju aimue su.” <sup>5</sup> Da su tueda edusuji ja emetse sa manu cuana piada piada ihuatana. Equene manuji uja quisabatana: “¿Quejucua mi manume quema emetse peje su?”

<sup>6</sup> Tueda deja ja jeutsutana: “Cien emeji aida cuana aceite neje sejeajiji da quema manu.” Da su edusuji ja tueda uja atana:

“¡Jade! Jiahue quita hue chujetiaque dusetete pai bahui. Daja chujetia putsu, beju mi manu mahue epu.” <sup>7</sup> Pia manuji macha pueana. Edusuji ja tueda quisabatana: “¿Quejucua mique manu quema emetse peje su?” Da su manuji deja ja uja jeutsutana: “Cien d'iti cuana trigo neje sejeajiji da quema manu.” Da su edusuji ja tueda uja atana: “¡Jade! Jiahue quita hue chujetiaque ocho tunca bahui. Daja chujetia putsu beju, mi manu mahue epu.” Daja edusuji ja atana manuji cuana ja tu saida ebatsuta puji tuseda beju aimue mudu su.

<sup>8</sup> Jesús ja daja hue quisainiame atana huecuana:

—Tueda edusuji ate da nimeji eni. Enei hue, ye mundo su cristiano cuana da tuneda cama daja nimeji eni eputani. Diusu sa cristiano cuana mu aimue daja mahue.

<sup>9</sup>Yama micuana equisainia, micuaneseda aimue daja a taji mahue. Be chipilu neje eshanapa cuana mechacuji. ¿Ai da neje cielo su enubi bata?

<sup>10</sup>‘Quebata ja ucuu chidi saida ebatani su, daja huecha dueji ai cuana di saida ebata. Quebata ja ucuu chidi saida mahue ebatani su, daja huecha dueji ai cuana su di saida mahue ebata. <sup>11</sup>Ahua micuaneda ye mundo sa ai cuana aimue saida ebainia mahue su, aimue Diusu ja mesa ai cuana cielo su emenajatiata mahue. <sup>12</sup>Ahua micuaneda pia cuana sa ai cuana aimue saida ebainia mahue su, aimue Diusu ja micuaneseda quitaita ai cuana etiata mahue.

<sup>13</sup>‘Beju aiya biame beta echua puji tupupai mebijata cua mahue. Piada echua puji bahui hue mebijata taji. Pia cuana mu aimue tsada ba taji mahue. Daja huecha ahua etse Diusu mebijata su, aimue detse etse Diusu mebijata cua mahue chipilu ebia su tsada ebainia neje tupupai.

<sup>14</sup>Beju dapia netitana fariseo cuana ja daja Jesús epuani id'aba putsu, jaid'ebatitana huecuana, tuneseda ebia su chipilu tsada puina putsu. <sup>15</sup>Da su Jesús ja uja atana huecuana:

—Cristiano cuana ja micuana saida nime ebatani biame, Diusu ja mu micuana sa muesumu madhada eshanapaenitani. Cristiano cuana ja saida ebatani cuana da Diusu ja tsada mahue ebatani.

### *Diusu ecuatsasiatiani*

<sup>16</sup>‘Beju Juan da Diusu ecuatsasiati epusiu quisaquisa pupiruana jenetia dueji cristiano cuana tueda quisa saida cuana su jubida neje jei eputani. Juan quisaquisa pamapa pupiruji mahue su, Diusu sa equene profeta chenu cuana quisaquisa putaidha Diusu ecuatsasiati epusiu jepuiti. Moisés chenu ja di Diusu ecuatsasiati jepuiti deretaidha.

<sup>17</sup>‘Beju Diusu sa jacuatsasiati cuana da butsepi. Buepa, yahua pamapa epupe biame, aimue tueda jacuatsasiati cuana mu epupe mahue.

### *Jesús ja jamesiati jepuiti buetsuatana*

*(Mateo 19.1-12; Marcos 10.1-12)*

<sup>18</sup>‘Ahua quebata deja ja mesa ehuané jucha mue biame emesiata su, ahua pia neje ehuaneti su, tuahueda jucha aida yatani. Daja huecha epuna di. Ahua quebata deja mesiajiji epuna neje ehuaneti su, tueda deja ja di jucha aida yatani. Daja huecha epuna di.

*Deja puri Lázaro banime jepuiti quisa*



<sup>19</sup> Jesús ja cristiano cuana daja hue quisainiame atana uja: —Beju piada deja chipiluji anina. Mesa ejud'uji da ebia su saida chujeneda eni puina. Pamapa tsine tsine aida a bahue puina. <sup>20</sup> Daja huecha piada deja puri anina. Tueda Lázaro banime. Chadi cama mesa equita puina. Deja chipiluji sa ete tsequeini su yahua su anina. <sup>21</sup> Tueda Lázaro ichenu ja deja chipiluji sa jana puchu neje sejeja pudhaana. Uchi cuana ja tusa chadi cuana tseutaina. <sup>22</sup> Da su beju Lázaro manuana. Angel cuana ja tueda dusutana Abraham peje su dapia tu neje saida paanieniti puji. Da su beju deja chipiluji di manuana su, papatana huecuana. <sup>23</sup> Cuati castigo su puenitiana. Da jenetia uqueda Lázaro saida, beidaji Abraham neje yani batana. <sup>24</sup> Da su deja chipiluji ja Abraham uja tsiatsia neje bajatana: “Tata Abraham, ibunebaque ema. Beituque Lázaro ema peje su. Tusa emehuituji yahui su paped'ata quema yana etsabiata puji, ye cuati castigo su ebia su ema sufri epuani putsu.” <sup>25</sup> Da su Abraham ja tueda uja jeutsutana: “Edué, japi-batique mida mundo su eid'e anina hora su mi saida anina. Lázaro mu mundo su aimue saida anina mahue. Jiahue beju tueda upia pamapa aiji saida yanieni. Miqueda mu jiahue sufri dapia pueni taji. <sup>26</sup> Ed'eji su, cuaja jaitiana taji mahue equehuehueji dueda, etse dhede je su yani putsu.” <sup>27</sup> Beju deja ja Abraham jeutsutana uja: “Da su, Tata Abraham, yama mi jubida ebajainia, beituque Lázaro quema tata sa ete su mundo su. <sup>28</sup> Dapia quema pishica edue cuana yani. Lázaro ja pamapa butsepi paquisatita huecuana ye cuati castigo su aimue tuneda di ema nime papueta mahue puji.” <sup>29</sup> Da su Abraham ja tueda uja atana: “Tuneseda Moisés chenu sa jacuatsasiati cuana yani. Diosu sa profeta chenu cuana ja deretaidha quirica cuana di beju mecuana sa yani. Tueda quirica derejiji cuana jei paata huecuana. Ahua daja yata huecuana su, aimue mi yani su epueta huecuana mahue.” <sup>30</sup> Da su deja ja uja jeutsutana: “Mahue, Tata Abraham, ebia su saida ahua piada manujiji u jenetia tuna peje su paputi tuna equisati puji. Da su beju Diosu peje su epibaturucatitayu huecuana.” <sup>31</sup> Abraham ja tueda uja atana: “Ahua Moisés chenu sa jacuatsasiati cuana jei aja mahue yata huecuana su, ahua Diosu sa profeta chenu cuana sa quirica cuana jei aja mahue yata huecuana su, da su piada manujiji u jenetia eid'eyu tuna equisati puji biame, aimue epibaturucatita huecuana mahue.”

## 17

*Rejada pia jucha yame puji  
(Mateo 18.6-7, 21-22; Marcos 9.42)*

1-2 Da su Jesús ja discípulo cuana uja atana:

—Quebata ja piada eichacua ema peje su jei epuani cristiano tusa Diosu peje su janimetucheati etaitanameta su, tuseda puji ebia su saida pamanu bai dueda su, tueda eichacua jei epuani cristiano sa janimetucheati taitanameji mahue su hue. Beju ye mundo su jucuada ai cuana yani cristiano cuana sa Diosu peje su janimetucheati cuana etaitaname puji. Quebata ja daja etaitanameta huecuana su, Diosu ja tueda ematsetayu. ¡Aba tueda, ahua pia cuana daja etaitanameta su!

<sup>3</sup> Ahua mique edue ja mi ai jucha yata su, butseatique tu jucha yatani jepuiti. Ahua tusa jucha shanapa putsu, epibaturucati su, da su perdonaque. <sup>4</sup> Quejucua nuati jia miqueda puji tuahueda mi ai jucha yata su, ahua tueda, “Perdonaque ema”, epu su, beju perdona taji.

### *Diosu peje su jubida janimetucheati taji*

<sup>5</sup> Apóstol cuana ja Jesús uja atana:

—Echua Puji, tsahuaque ecuanaju Diosu peje su jubida enimetucheati puji.

<sup>6</sup> Da su Jesús ja jeutsutana huecuana uja:

—Ahua micuaneda Diosu peje su mostaza ejaja chidi nime aihua dhucuana enimetucheati su, da su micuaneda ye aquí uja cuatsasia cua: “U jenetia mar su puderaque.” Ahua daja micuaneda ecuatsasia su, beju aquí epudera.

### *Emebajaji sa mebaja taji*

<sup>7</sup> ‘Mique emebajaji te jenetia jubida mudumudupe putsu, jasiapatiba su, ¿ai miada, “Aniuteque, diadiaque”, ya bata?

<sup>8</sup> Miada tueda, “Jana quema basetatique. Equene ema ediadiani tsuhu baque. Tije chu mida ediadia”, ya. <sup>9</sup> ¿Ai miada emebajaji emudumuduani putsu, “Diusulupai”, ya bata? <sup>10</sup> Daja huecha da Diosu neje. Tusa jacuatsasiati a putsu, uja puque: “Emebajaji saida mahue da ema, quema a taji ai cuana bahui yainia putsu.”

### *Piada tunca lepraji deja cuana Jesús ja saisiametana*

<sup>11</sup> Jesús Jerusalén ejude su epuhu cama, Samaria, Galilea yahua detse dhede je jaitianana. <sup>12</sup> Piada ejude chidi su ecuinahu cama, piada tunca lepraji deja cuana tsutana ejude esacuinaji su. Beju aimue Jesús nariatana huecuana mahue, lepraji ta huecuana putsu. <sup>13</sup> Uqueda jenetia tsiatsiatana huecuana uja:

—¡Echua Puji Jesús, ibunebaque ecuanaju!

<sup>14</sup> Da su Jesús ja atana huecuana:

—Meputique sacerdote cuana peje su.

Beju tuna eputahu cama, saisitana huecuana. <sup>15</sup> Piada tuneda saida beju jabati putsu, jasiapatibana Jesús diusulupai ya puji. Diusu jubida mitsutsuatana. <sup>16</sup> Jesús butse su turusati putsu, Diusulupai atana. Tueda da samaritano deja puina. <sup>17</sup> Da su beju Jesús ja enetita cuana atana:

—¿Aimue jia maida piada tunca yama saisiameitia mahue? ¿Juque ni da pia cuana? <sup>18</sup> Ye judío mahue deja samaritano bahui jasiapataitia beidaji neje Diusu emitsutsua puji.

<sup>19</sup> Da su Jesús ja deja atana:

—Netianaque. Putiyuque. Mida ema peje su jei puitia putsu, beju saisitia.

*Cuaja Diusu ecuatsasiati ecuina*  
(Mateo 24.23-28, 36-41)

<sup>20</sup> Pia tsine fariseo cuana ja Jesús uja quisabatana:

—¿Quetsunu jia da Diusu ecuatsasiati ecuina?

<sup>21</sup> Jesús ja jeutsutana huecuana:

—Aimue micuaneda Diusu ecuatsasiati ba cua mahue, micuana duju su bataji mahue yani putsu.

<sup>22</sup> Da su Jesús ja discípulo cuana uja atana:

—Beju ema eputi tiempo ecuina. Aimue micuana neje ema yani mahue. Da tiempo su micuaneda ema ecuatsasiatiani baja ya biame, aimue ema eba mahue. <sup>23</sup> Beju piada piada cuana uja eputa: “Jesús beju jasiapataitiba. Dapia tueda yani.” Be jei meaji huecuana. Be ema mechacutiji. <sup>24</sup> Ema esiapati su, pamapa cristiano cuana ja ema jasiapatiana saida eshanapata. Tserutseru pamapa ja ebatani nime daja ema ebata huecuana, ema esiapati su. <sup>25</sup> Equene quema ebia su sufri pu taji. Cristiano cuana ja ema tsada mahue ebata. <sup>26</sup> Noé chenu sa tiempo su puidha nime, daja da epu, ema esiapati su. Diusu tsada mahue bataidha huecuana. <sup>27</sup> Da tiempo su Diusu ja cristiano cuana manuamepeji mahue su, diadiataidha, jaid'ititaidha, jabutsenetitaidha huecuana Noé chenu arca su nubidha teje. Aimue jei putaidha mahue huecuana Diusu sa jamatseti jubida epusiu. Tueda nai, ena jamatseti pupiruidha su chu, Diusu peje su japibatitaidha huecuana. Ena ja beju manuamepetaidha huecuana pamapa. Daja huecha cristiano cuana jei puja mahue eputa, ema jasiapatiji mahue su. <sup>28</sup> Daja huecha biahua tiempo cristiano cuana puidha Lot chenu anidha tiempo su. Da tiempo su beju diadiataidha, jaid'ititaidha, bajabajataidha, iruirutaidha, banabanataidha, ete cuana ataidha huecuana. Beju pamapa ataidha huecuana. <sup>29</sup> Lot chenu ejude Sodoma jenetia cuinanaidha su, beju cuati dajajaidha ejude Sodoma bia su. Pamapa tueda ejude su aniji cuana manupetaidha.

<sup>30</sup> Daja da epu cristiano cuana neje, ema ye mundo su esiapati su.

<sup>31</sup> ‘Da tiempo su ahua quebata mesa ete epa pachata bia su yani su, bute putsu, tipeida pajududu. Be ete su panubi mesa ai cuana ejemicuinati puji. Ahua quebata te su yani su, tipeida pajududu. Be ejude su pasiapati. <sup>32</sup> Mepibaque Lot chenu sa ehuan cuaja puidha. <sup>33</sup> Quebata ja ye mundo sa ai cuana ebia su tsada ebatani su, tueda quita etaitanamepeti. Quebata ja ye mundo sa ai cuana tsada mahue ebatani su, tueda da eid'e epueni. <sup>34</sup> Da tiempo su ema esiapati su, beta tahui jude su etahui sa epu. Beju piada Diosu ja edusuta. Pia mu eichajusiata. <sup>35</sup> Beta epuna edudududusa epu. Beju piada edusuta. Pia mu eichajusiata. <sup>36</sup> Beta deja te su emudumudusa epu. Daja huecha piada edusuta. Pia mu eichajusiata.

<sup>37</sup> Da su beju Jesús quisabatana huecuana uja:

—¿Echua Puji, ¿quepia jia da tueda ai cuana epu?

Jesús jeutsutana:

—Ai ihui esa su, samani cuana tipeida edhitatitani nime, daja huecha ema tipeida esiapati ye mundo su aniji cristiano cuana ecastiga puji, beju ebia su madhada hue eputa huecuana su.

## 18

### *Ahue manujiji jepuiti quisa*

<sup>1</sup> Jesús ja discípulo cuana bahue quisa neje daja hue buetsuainiame atana. Pamapa hora su mecuana sa jamitsuti taji yani Diosu neje buetsuatana huecuana. <sup>2</sup> Uja quisatana huecuana:

—Piada ejude su huaraji anina. Tueda da Diosu jei aja mahue atana. Aimue cristiano cuana saida ibuneda batana mahue. <sup>3</sup> Dapia ejude su epuna ahue manujiji anina. Tueda epuna huaraji peje su siapati puana mesa jatsahuati ebaja puji. <sup>4</sup> Huaraji ja epuna tsahuaja mahue atana equene su. <sup>5</sup> Da su chu beju tueda uja japibatiana: “Aimue yama Diosu jei yainia mahue, cristiano cuana saida ibuneda ebainia mahue biame, tueda epuna yama etsahua, tuahueda ema jubida ebajatani putsu. Beju siapati epuneti baja mahue ema.” <sup>6</sup> Daja tueda huaraji madhada japibatiana. <sup>7</sup> Daja huecha Diosu ja mesa jadhareti cristiano cuana etsahuata, tsine, dhidha tu ebajatani huecuana putsu. <sup>8</sup> Enei hue, tuahueda tipeida etsahuata huecuana. ¿Cuaja jia da ema ye mundo su esiapati su, ahua Diosu peje su enimetuheatiani cuana yama eba, ahua mahue?

*Impuesto chujebajaji, fariseo detse jepuiti quisa*  
(Mateo 24.23-28, 36-41)

<sup>9</sup> Beju dapia piada piada enetita cuana ebia su aida japi-batitana. Pia cristiano cuana ai eni mahue nime bataina huecuana. Da su Jesús ja bahue quisa neje quisatana huecuana uja:

<sup>10</sup> —Beta deja templo su putiana Diusu emitsuti puji. Tu-atseda piada fariseo puina. Tueda ebia su aida jabatina. Diusu butse su nimebutsepi jabadhaatina. Beju pia deja impuesto chujebajaji puina. <sup>11</sup> Da su fariseo ja uja Diusu mitsutana: “Diusulupai, Tata Diusu, aimue ema juchaji pia cristiano cuana nime mahue. Aimue ema juchaji ye impuesto chujebajaji deja nime mahue. Aimue pia cuana yama baseana mahue. Aimue ema pia epuna neje jaquinatiana mahue. <sup>12</sup> Piada semana su beta nuati ema ayuna epuani. Quema pamapa ai cuana jenetia piada décimo yama mi eti-ainia.” Daja fariseo ja Diusu mitsutana. <sup>13</sup> Beju impuesto chujebajaji nimemitsida chuadera netina. Yahua huabata bahui netina. Jatseduturutiana, jubida juchaji jabati putsu. Uja Diusu mitsutana: “Tata Diusu, ibunebaque ema, ema juchaji putsu.” Daja impuesto chujebajaji deja ja Diusu mitsutana. <sup>14</sup> Yama micuana butsepi equisainia, tueda deja Diusu ja perdonatana. Fariseo mu aimue Diusu ja perdonatana mahue, ebia su aida jabatiana putsu. Beju ebia su aida ebatiani cuana Diusu ja ai eni mahue yatayu. Ai eni mahue ebatiani cuana Diusu ja aida yatayu.

*Jesús ja yanana cuana ibunebatana*  
(Mateo 19.13-15; Marcos 10.13-16)

<sup>15</sup> Da su beju piada piada yanana chidi cuana Jesús peje su dusetana huecuana Jesús ja mesa eme tuna bia su huana putsu, tuneseda puji Diusu ebajata puji. Beju discípulo cuana sa tsada mahue puana. Yanana chidi duseji cristiano cuana d'ayapirutana huecuana. <sup>16</sup> Da su Jesús ja discípulo cuana uja atana:

—Yanana chidi cuana d'eji metiaque ema peje su papueta, Diusu ecuatsasiati da tuna nime cuana sa putsu. <sup>17</sup> Ene putsu, yama micuana equisainia, etseseda nimemitsida pu taji ye yanana cuana nime Diusu ecuatsasiati su enubi puji.

*Deja chipiluji Jesús neje jamitsutiana*  
(Mateo 19.16-30; Marcos 10.17-31)

<sup>18</sup> Piada judío cuana sa edusuji ja Jesús uja quisabatana:

—Echua Puji, mida da saida. ¿Ai ni quema a taji Diusu neje cielo su eid'e yanieniti puji?

<sup>19-20</sup> Da su Jesús ja tueda jeutsutana:

—¿Jucuaja su miada ema saida yainia? Diusu bahui da saida. Ahua mida cielo su eid'e anienija su, aque Moisés chenu sa jacuatsasiati cuana.

Da sa deja ja neicha Jesús quisabatana:

—¿Quebata jacuatsasiati cuana quema a taji?

Jesús ja deja jeutsutana:

—Be jamanuametiji puji. Be pia sa ebutse quinaji. Be tsi puji. Be bid'umimi puji. Mique tata, cuara detse iyubaque. Mida quitaita ibuneda ebatiani nime, daja pia cuana ibuneda baque.

<sup>21</sup> Da su deja ja Jesús atana:

—Beju pamapa tueda jacuatsasiati cuana yama butsepi yainia ema yanana jenetia jiahue teje. ¿Ai pia ni da quema a taji yani?

<sup>22</sup> Beju Jesús ja tueda uja atana:

—Ahua mida nimebutsepi puja su, irutique pamapa mique ai cuana. Pamapa mique chipilu cuana puri cristiano cuana tiaque. Tiape putsu, tije ema aque. Ahua daja ya su, cielo su pamapa ai eichacua cuana mique yani.

<sup>23</sup> Beju deja daja id'aba putsu, ebia su jatacuamadhapirutiana, tueda ebia su chipiluji putsu. <sup>24</sup> Da su deja putibana su, Jesús ja mesa discípulo cuana uja atana:

—Ene putsu, yama micuana equisainia, atadhada chipiluji cuana Diosu ecuatsasiati su enubi puji. <sup>25</sup> Ebia su atasaida caballo acusha id'aja je ejaitiana puji.

<sup>26</sup> Da su discípulo cuana ja Jesús daja epuani id'aba putsu, ebia su nimetiunetitana huecuana. Uja jaquisabatitana huecuana:

—¿Aidhe jia da d'ejí su pu cua?

<sup>27</sup> Beju Jesús ja tuna chama putsu, uja atana huecuana:

—Cristiano cuana aimue tuna mehua quitaita hue d'ejí su jaatita cua mahue. Diosu sa puji mu mue ai biame atadhada mahue. Beju Diosu ja aidhe papu biame d'ejí su ata cua.

<sup>28</sup> Da su Pedro ja Jesús uja atana:

—Echua Puji, ecuanaju beju pamapa ecuanaju sa ai cuana ichajusiana mi tije ya puji.

<sup>29-30</sup> Da su Jesús ja Pedro jeutsutana:

—Enei hue, quebata ja mesa tata, ehuané, edue, ebacua cuana ema jepuiti eichajusiata su, Diosu ja tueda ai ichajusijiji cuana ebia su dueji eturuca etiatayu ye mundo su. Dapia cielo su tueda eid'e yameenititayu.

*Neicha hue Jesús cuaja mesa manu epu jepuiti quisa puana (Mateo 20.17-19; Marcos 10.32-34)*

<sup>31</sup> Jesús ja mesa discípulo cuana uja atana:

—Jerusalén ejude su ecuanaju epuhu. Dapia ema emanuameta huecuana, cuaja Diosu sa profeta chenu cuana ja biahua tiempo deretaidha batame. <sup>32</sup> Judío mahue, Diosu shanapa bue mahue deja cuana peje su ema emenajatiata

huecuana. Tueda deja madhada cuana ema neje eshishatita. Ema emadhabata huecuana. <sup>33</sup> Tuneda ema eicheta. Equedi neje ema equid'uata. Daja a putsu, ema emanuameta huecuana. Quimisha tsine ejaitiana su, ema enetianayu manujiji cuana duju jenetia.

<sup>34</sup> Beju discípulo cuana ja aimue shanapatana mahue Jesús ja equisatani cuana.

*Jesús ja padha saisiametana*

*(Mateo 20.29-34; Marcos 10.46-52)*

<sup>35</sup> Jericó ejude su esacuinaji su deja padha edid'i su anina chipilu ebaja puji. <sup>36</sup> Tueda deja padha jucuada cristiano cuana ejaitianatasa id'abatana. Da su beju quisabatana:

—¿Aidhe da ejaitianasa?

<sup>37</sup> Beju jeutsutana huecuana:

—Jesús da ejaitianasa.

<sup>38</sup> Da su deja padha jubida tsiatsiapiruana uja:

—¡Jesús, David chenu sa familia jenetia, ibunebaque ema!

<sup>39</sup> Beju ehui su eputahu cuana ja d'ayatana deja padha aimue patsiatsia mahue puji. Beju d'ayatana huecuana biame, deja padha cha ebia su hue tsiatsiana uja:

—¡Jesús, David chenu sa familia jenetia, ibunebaque ema!

<sup>40</sup> Da su beju Jesús netisenana. Tuahueda cuatsasiatana huecuana deja padha tu peje su paduseta puji. Beju deja padha tu butse su dusetana su, Jesús ja quisabatana:

<sup>41</sup> —¿Ai mique tsada yama ya puji?

Da su padha ja jeutsutana:

—Echua Puji, jabatija ema.

<sup>42</sup> Da su Jesús ja tueda atana:

—Daja papu. Ebati mida, ema peje su jei puitia putsu.

<sup>43</sup> Da hora su hue deja padha beju jabatiana. Jesús tije yahu je. Diusu mitsutsuapirutana. Pamapa dapia cristiano cuana di Diusu mitsutsuapirutana.

## 19

*Zaqueo*

<sup>1-3</sup> Jesús da Jericó ejude je epuniuneti su, piada deja ja tueda baja adhaatana. Tueda da Zaqueo banime puina. Tueda da impuesto chujebajaji cuana sa edusuji puana. Pamapa tueda impuesto chujebajaji cuana da ebia su chipiluji eni putana, cristiano cuana basea bahue huecuana putsu. Beju ye Zaqueo ja cuaja ba taji mahue batana Jesús, ebia su dueji cristiano cuana putsu, Zaqueo da deja ubu chidi hue putsu. <sup>4</sup> Da su beju Jesús ehui su jududutiana. Jesús ejaitiana edid'i buahua su aqui su tsuana Jesús eba puji.

<sup>5</sup> Beju Jesús dapia cuinati putsu, Zaqueo aqui su ebade batana. Da su Jesús ja Zaqueo ja uja mitsutana:

—Zaqueo, tipeida buteque. Jiahue da ema mique ete su yaniti.

<sup>6</sup> Da su Zaqueo tipeida buteana. Beidaji neje tuahueda Jesús dusutana tusa ete su.

<sup>7</sup> Beju pia cristiano cuana sa tsada mahue putana. Tuneda cama uja jaquisatitana: “Jesús da impuesto chujebajaji deja juchaji sa ete su putia.”

<sup>8</sup> Da su beju Zaqueo ja Jesús uja atana:

—Echua Puji, quema chipilu edusetete da puri cristiano cuana yama etia. Pamapa yama baseana cuana beju yama pushi nuati eturucayu huecuana.

<sup>9</sup> Jesús ja Zaqueo jeutsutana:

—Mida da Tata Abraham chenu sa familia jenetia biame, juchaji puina. Jiahue beju mida da d'ejí su. <sup>10</sup> Ema da Diosu peje jenetia pueana mi nime juchaji cuana d'ejí su ya puji.

*Piada tunca chipilu jepuiti quisa*

<sup>11</sup> Beju neicha hue Jerusalén edid'i je putitana huecuana. Jesús neje puniunetiji cuana Jesús ja ecuatsasiapiruta Jerusalén ejude su cuinati putsu, pepe putana huecuana. Tuneda jiahue quita beju Diosu ecuatsasiapiruti pepe putana huecuana. Beju aimue daja tuna pibatana nime puana mahue. <sup>12</sup> Da putsu, Jesús ja bahue quisa neje buetsuatana huecuana uja:

—Piada deja aida pia yahua uqueda su putiana huaraji aida enubiameti puji tusa yahua su neicha hue esiapatiyu puji. <sup>13</sup> Beju eputi puji tueda deja ja piada tunca mesa emebajaji cuana ihuatana. Pamapa su dajucua cama chipilu tiatana. Uja cuatsasiatana huecuana: “Ye chipilu neje memudumuduque chipilu eyapaca puji ema esiapati teje.”

<sup>14</sup> Beju dapia aniji cristiano cuana sa tsada mahue puana tueda deja tuna sa huaraji papu puji. Da su beju tu tije quisa puji beitutana huecuana. “Be panubiameta ye deja ecuanaju sa huaraji puji”, ametana huecuana. <sup>15</sup> Beju daja putana biame tueda deja da huaraji aida nubiametana. Da su beju jasiapatibana tusa ejude su huaraji aida ebani neje cuinayu putsu, tusa piada tunca emebajaji cuana ihuatana, quejucua chidi chipilu yapacajijita huecuana eshanapa puji. <sup>16</sup> Da su beju equene puji emebajaji cuinana tu peje su. Tuahueda deja huaraji aida uja atana: “Echua Puji, mique chipilu miada ema tiana jayapacatijiji piada tunca nuati.” <sup>17</sup> Da su huaraji aida ja emebajaji atana: “¡Saipie! Mida da emebajaji saida. Miada saida ana quejucua chidi chipilu neje putsu, yama mi piada tunca ejude cuana sa huaraji enubiame.” <sup>18</sup> Pia



emebajaji macha cuinana. Tuahueda uja atana: “Echua Puji, mique chipilu miada ema tiana jayapacatijiji pishica nuati.”<sup>19</sup> Huaraji aida ja jeutsutana: “¿Saipie hue! Yama mi pishica ejude cuana sa huaraji enubiame.”<sup>20</sup> Da su beju pia emebajaji macha cuinana tu peje su. Tuahueda atana: “Echua Puji, u hue mique chipilu miada ema tiana. Ichasetana yama dhiri ped'u su.”<sup>21</sup> Iyubana mi yama mida da deja jubida jacuatsasiati bahue. Miada mejemi bahue pia sa ai cuana. Pia sa ai ejaja cuana huiru bahue.”<sup>22</sup> Da su huaraji aida ja emebajaji uja atana: “Mida emebajaji madhada hue. Bahue mi puana ema deja piba tucheda epuani. Beju bahue mi puana yama mejemi bahue pia sa ai cuana. Yama pia sa ai ejaja cuana huiru bahue.”<sup>23</sup> Tueda pamapa mida bahue puana biame, ¿Jucuaja su ni aimue quema chipilu banco su dhucuana ichana mahue dapia chipilu eyapacati puji ema esiapati teje?”<sup>24</sup> Beju huaraji aida ja dapia enetita cuana uja cuatsasiatana: “Memejemique yama tiana chipilu. Metiaque tueda chipilu equene cuinana emebajaji saida, tuahueda quema chipilu yapacametana piada tunca nuati putsu.”<sup>25</sup> Da su tuneda huaraji jeutsutana: “Echua puji, tueda mu yani.”<sup>26</sup> Huaraji aida ja jeutsutana huecuana: “Beju yama butsepi equisainia, quebata sa yani tueda da yama etia ebia su quita. Quebata sa aimue yani mahue, tueda da yama emejemi quejucua mesa ai chidi yani cuana.”<sup>27</sup> Beju meduseque tueda ema duininida ebatani cuana. Tuneda aimue ema tsada batana mahue tuna sa huaraji epu puji. Beju meduseque huecuana ema peje su. Memanunameque ema butse su.”

### *Jesús da Jerusalén ejude su nubiana*

*(Mateo 21.1-11; Marcos 1.1-11; Juan 12.12-19)*

<sup>28</sup> Jesús buetsuape putsu, neicha putiana Jerusalén ejude edid'i je. <sup>29</sup> Beta ejude chidi esacuinaji su cuinana. Tueda ejude chidi detse Betfagé, Betania banime puina. Tueda ejude chidi detse murucu aida Olivo banime naja su anina. Da su Jesús ja beta discípulo detse cuatsasiatana uja:

<sup>30</sup> —Tueda ejude chidi butse su meputique. Ejude enubiji su piada asunu risijiji eneti metseda eba. Tueda asunu chidi aiya biame tsuhu aimue bianiji mahue. Pidhu putsu, meduseque. <sup>31</sup> Ahua aiya metse, “¿Jucuaja su metse daja yainia?” equisabata su, mequisaque tueda uja: “Echua Puji ja etsatani.”

<sup>32</sup> Da su tuatseda putiana. Pamapa batana tse, cuaja Jesús ja quisatana tse batame. <sup>33</sup> Tuatseda asunu epidhutani cama, emetse cuana ja quisabatana tse:

—¿Ai puji metse asunu epidhuinia?

<sup>34</sup> Tuatseda jeutsutana:

—Echua puji ja etsatani.

<sup>35</sup> Da su asunu dusutana tse Jesús peje su. Discípulo cuana ja asunu bia su ebia jud'uji ichatsua putsu, Jesús da bia su ichatsuatana huecuana. <sup>36</sup> Daja putitana Jerusalén ejude su. Cristiano cuana ja tuna sa ebia jud'uji cuana Jesús hui su huanatana. <sup>37</sup> Olivo murucu tsaja su cuinatitana su, pamapa Jesús sa ebuqueji cuana beidaji neje Diosu jubida mitsutsuatana. <sup>38</sup> Uja tsiatsiatana huecuana:

—¡Gloria, Tata Diosu sa Jabeituti Deja epusiu! ¡Tueda de echua puji David chenu sa familia jenetia! ¡Diosu sa ebani su tueda epusiu! ¡Diosu ja tueda paibunebata! ¡Gloria Tata Diosu!

Daja tsiatsiatana huecuana.

<sup>39</sup> Da su piada piada fariseo cuana ja Jesús uja atana:

—Echua Puji, d'ayaque mique ebuqueji cuana be daja pat-siatsiata huecuana.

<sup>40</sup> Jesús ja jeutsutana huecuana:

—Yama micuana butsepi equisainia, aimue yama d'aya mahue. Ahua tuneda emitanata su, tumu cuana da etsiatsiata.

<sup>41</sup> Da su beju Jesús Jerusalén ejude naja su janariati putsu, papiruana tueda ejude jepuiti. <sup>42</sup> Uja Jesús puana:

—Jerusalén ejude su aniji cuana, ema da pueitia micuana saida epijajame puji. Beju micuaneda tsada mahue bana putsu, jiahue quita mu beju cuaja a taji mahue. <sup>43</sup> Micuana sa majai cuana ja mida ebareta. <sup>44</sup> Micuana emanuamepeta huecuana. Micuana sa ete cuana edajajamepeta huecuana. Aimue piada tumu biame pia bia su yaniti mahue. Pamapa su epaimeta huecuana. Ye pamapa uja epu, Diosu micuana peje su pueana su, aimue micuaneda shanapaja mahue ana putsu.

*Jesús iruiruji cuana neje templo su duininiana  
(Mateo 21.12-17; Marcos 11.15-19; Juan 2.13-22)*

<sup>45</sup> Da su beju Jesús templo su nubiana. Iruiruji, bajabajaji cuana etseque su cuadejusiacuinatana. <sup>46</sup> Uja atana huecuana:

—Beju uja derejiji Diosu sa quirica su: “Quema ete da pamapa cristiano cuana sa ema mitsu jude ete epu.” Beju micuaneda mu tsi puji sa ete ana.

<sup>47</sup> Pamapa tsine Jesús ja cristiano cuana buetsuatana templo su. Da su beju sacerdote cuana sa echua puji, jacuatsasiati ebuetsuaji, Jerusalén ejude sa ehuidusuji cuana jaquisabatitana uja: “¿Cuaja ni da ecuaneda Jesús iname a cua emanuame puji?” <sup>48</sup> Beju cuaja ina taji mahue batana huecuana, cristiano cuana Jesús naja su jaid'abatitanina putsu.

## 20

*Jesús da huaraji aida**(Mateo 21.23-27; Marcos 11.27-33)*

<sup>1</sup> Pia tsine Jesús templo su netina. Cristiano cuana Diusu sa quisa saida cuana buetsuatanetina. Ebuetsuataneti cama, beju sacerdote cuana sa echua puji, jacuatsasiati ebuetsuaji, tata edhi ehuidusuji cuana Jesús peje su puetana. <sup>2</sup> Uja quisabatana huecuana:

—Quisaque ecuanaju, ¿aiya mida huaratiatana ye ai cuana ya puji?

<sup>3</sup> Da su Jesús ja jeutsutana huecuana uja:

—Yama di micuana equisaba. Mejeitsuque ema. <sup>4</sup> ¿Aiya Juan Bautista beitutana quisaquisa epu puji? ¿Diusu, ahua deja ja? Mejeitsuque ema.

<sup>5</sup> Da su beju tuneda cama jaquisatitana uja:

—¿Cuaja ni da ecuaneda jeutsume a cua? Ahua ecuaneda, “Diusu ja Juan beitutana”, ejeitsu su, Jesús ja ecuaneda uja equisabata: “Da su, ¿jucujaja su ni aimue micuaneda Juan jei ana mahue?” <sup>6</sup> Daja huecha ahua ecuaneda, “Deja ja Juan beitutana”, ejeitsu su, cristiano cuana ja ecuaneda tumu neje emaracata, Diusu ja Juan beitutana epibatitani huecuana putsu.

<sup>7</sup> Da su Jesús jeutsutana huecuana uja:

—Bue mahue ecuanaju aiya Juan beitutana. Cuaja jeitsu taji mahue mi ecuanaju ebainia.

<sup>8</sup> Da su Jesús ja atana huecuana:

—Daja huecha aiya ema huaratiatana aimue yama micuana equisa mahue.

*Mudu puji ate cuana jepuiti quisa**(Mateo 21.33-44; Marcos 12.1-11)*

<sup>9</sup> Beju Jesús ja cristiano cuana daja hue buetsuainiame atana uja bahue quisa neje:

—Piada deja ja uva jude bana putsu, pia deja cuana menajiatana echuje su. Da su pia yahua su putiana quejucua mara puji. <sup>10</sup> Beju huiruhuiru badi cuinana su, deja ja mesa emebajaji beitutana uva jude echuje ebajati puji. Uva jude quinaji deja cuana ja emebajaji ina putsu, ichetana huecuana. Emetse peje su emebajaji beitutaibana huecuana echujetiaji mahue. <sup>11</sup> Da su beju emetse ja pia emebajaji beitutana tuna peje su neicha echujebajati puji. Daja huecha atana huecuana emebajaji. <sup>12</sup> Neicha hue emetse ja pia emebajaji beitutana. Uva jude quinaji cuana ja nedaneda a putsu, emebajaji beitutaibana emetse peje su.

<sup>13</sup> Da putsu, emetse japibatiana uja: “Quema piada quita ibuneda ebacua yama ebeitu uva jude quinaji cuana peje

su. Quema ebacua putsu, eiyubata huecuana.” <sup>14</sup> Beju uva jude quinaji cuana ja emetse sa ebacua ba putsu, tuneda cama jaquisatitana uja: “Tueda da emetse sa ebacua. Ahua ecuaneda tu manuame su, pamapa emetse sa ai cuana ecuaneseda puji pu cua. Da su ecuaneda ye yahua emetse pu cua.” <sup>15</sup> Da su beju emetse sa ebacua etsahua su rirena putsu, manuametana huecuana.

<sup>16</sup> Da su Jesús ja tu id'abaji cuana uja quisabatana:

—¿Cuaja jia da emetse ja tueda uva jude quinaji ate cuana yata? Beju jasiapati putsu, tueda mudu puji ate cuana emanuamepeta. Uva jude pia mudu puji cuana emenajatiata.

Daja cristiano cuana ja id'aba putsu, uja Jesús atana huecuana:

—Be Diusu ja daja papu paata.

<sup>17</sup> Da su beju Jesús ja tuna chama putsu, uja atana huecuana:

—Micuaneda mue ema jei a. Da su, ¿cuaja ni da Diusu sa quirica su derejiji epuani? Beju uja epuani:

Ete muduji cuana ja yapiruji tumu jusiaderatana biame, tueda tumu macha beju Diusu ja dharetana.

Tueda pia tumu cuana ebia su saida ametana. <sup>18</sup> Quebata Diusu sa jadhareti tumu bia su edajaja su, beju tueda eped'uped'uati. Ahua tumu etse bia su edajaja su, etse emedimediata.

### *Echujebajaji jepuiti quisa*

*(Mateo 21.45-46; 22.15-22; Marcos 12.12-17)*

<sup>19</sup> Sacerdote cuana sa echua puji, jacuatsasiati ebuetsuaji cuana ja da hora su quitaita Jesús inaja adhaatana, Jesús tuna jepuiti mimiana jashanapatitana huecuana putsu. Beju aimue Jesús inatana huecuana mahue, cristiano cuana iyubatana huecuana putsu. <sup>20</sup> Da su piada piada deja cuana beitutana huecuana Jesús ecuadhita huecuana puji. Deja saida cuana nime jabametitana huecuana. Jesús quisabape neje madhada hue ejeutsume putsu, huaraji peje su etu aquisa puji adhaatana huecuana. <sup>21</sup> Da putsu, Jesús uja atana huecuana:

—Ebuetsuaji, bahue ecuanaju mida butsepi emimiani. Miada Diusu sa ene quita jabuetsuati cuana ebuetsuainia. Pamapa cristiano cuana miada tupupai ebainia. Aida puji, puri cuana miada tupupai ebainia. <sup>22</sup> Da putsu, quisaque ecuanaju, ¿ahua saida ecuaneda romano echua puji aida impuesto echujetia puji, ahua mahue?

<sup>23</sup> Beju Jesús jashanapatiana tuna madhada piba neje daja quisabatana. Ahua Jesús, “Saida echujetia puji”, epu su, da su judío cuana tu neje eduininita. Ahua, “Saida mahue echujetia

puji”, epu su, da su romano soldado cuana ja einata. Da putsu, Jesús ja uja jeutsutana huecuana:

—Beju micuaneda da bubeta cuana. ¿Jucuaja su micuaneda ema mimi neje pitsameja yainia? <sup>24</sup> Piada chipilu metiaque ema.

Da su beju piada chipilu tiatana huecuana. Chipilu inatsu putsu, Jesús ja quisabatana huecuana uja:

—¿Aidhe sa ebu eimea, ebani da ye chipilu bia su derejiji yani?

Da su jeutsutana huecuana:

—Tueda ebu eimea, ebani da romano echua puji aida sa.

<sup>25</sup> Da su Jesús ja atana huecuana uja:

—Da su metiaque echua puji aida sa epuani ai cuana. Diusu di metiaque tuseda epuani ai cuana.

<sup>26</sup> Jesús da saida jajeutsutiana putsu, aimue cuaja tuaquisa taji mahue batana huecuana cristiano cuana butse su. Ebia su nimetiunetitana huecuana, Jesús ja daja saida jeutsutana putsu. Beju mitanatana huecuana. Mue Jesús quisabaicha atana huecuana.

*Manujiji cuana neicha eid'etayu jepuiti quisa*  
(Mateo 22.23-33; Marcos 12.18-27)

<sup>27</sup> Tueda tsine su huecha hue piada piada saduceo cuana Jesús peje su putitana. Tueda saduceo cuana da manujiji cuana neicha eid'etayu aimue jei putana mahue. Da su uja Jesús atana huecuana:

<sup>28</sup> —Ebuetsuaji, Moisés chenu ja buetsuataidha uja: “Ahua quebata deja bacua mahue emanu su, manujiji sa edue ahue manujiji neje jahuaneti taji ebacua cuana edue manujiji sa bataji epu puji. <sup>29</sup> Beju siete edue cuana anitaina. Edue equene puji jahuanetiana. Beju bacua mahue manuana.

<sup>30</sup> Da su tije puji edue da manujiji sa ahue manujiji neje jahuanetiana. Tueda macha beju manuana bacua mahue.

<sup>31</sup> Tu tije puji edue macha daja huecha puana. Beju pamapa tije puji edue cuana daja cama putana ahue manujiji neje. Beju manutana huecuana pamapa. <sup>32</sup> Da su beju epuna macha manuana. <sup>33</sup> Da su ahua ene mi epuani nime enetianatayu huecuana su, ¿quebata edue sa jia da tueda epuna ehuanepu?

<sup>34</sup> Jesús ja uja jeutsutana huecuana:

—Ye mundo su cristiano cuana ebutsenetitani. <sup>35</sup> Beju eid'etayu cuana mu aimue neicha ebutsenetitayu mahue.

<sup>36</sup> Aimue emanutaicha huecuana mahue, ángel cuana nime eputa huecuana putsu. Diusu sa ebacua cuana eputa huecuana, tu neje cielo su eid'e yanieniti putsu. <sup>37</sup> Beju Moisés chenu ja quitaita ecuana bahue yametani manujiji cuana

beju eid'etayu. Diusu ja tueda equi janana utsu pupe bue mahue jenetia mitsu putsu, uja ataidha: “Ema da Abraham, Isaac, Jacob cuana sa Diusu.” <sup>38</sup> Da su Diusu da eid'e cuana sa Diusu. Abraham, Isaac, Jacob cuana manutaidha biame, beju Diusu neje eid'e yanienita huecuana.

<sup>39</sup> Da su piada piada jacuatsasiati ebuetsuaji cuana ja Jesús uja atana:

—Echua Puji, saida miada jeutsuitia.

<sup>40</sup> Da putsu, saduceo cuana ja aimue Jesús neicha quisabaja atana mahue.

*¿Aidhe sa ebacua da Cristo?*

*(Mateo 22.41-46; Marcos 12.35-37)*

<sup>41</sup> Jesús ja uja atana huecuana:

—¿Cuaja micuaneda epibatiani Diusu sa Jabeituti Deja jepuiti? ¿A da tueda David chenu sa ebacua? <sup>42</sup> David ja quitaita uja deretaidha Salmos quirica su:

Tata Diusu ja quema Echua Puji uja ataidha:

<sup>43</sup> “Aniuteque quema bai eni bene ema neje tupupai ecuatasia epu puji, yama mi neje jamajaiti cuana pishitiame putsu, eme su eicha teje.” <sup>44</sup> ¿Jucuaja su detse Diusu sa Jabeituti Deja da David chenu sa ebacua pu cua, David chenu ja quitaita “Quema Echua Puji” tueda ataidha putsu.

*Jesús ja jacuatsasiati ebuetsuaji cuana tuaquisatana*

*(Mateo 23.1-36; Marcos 12.38-40; Lucas 11.37-54)*

<sup>45</sup> Beju pamapa cristiano cuana ja Jesús ja mesa discípulo cuana uja yatani id'abatana:

<sup>46</sup> —Merejatique jacuatsasiati ebuetsuaji cuana neje. Tuneseda ebia su tsada ejud'uji bauda neje ejude duje epuniuneti puji. Tsada mecuana sa cristiano cuana ja iyuda neje saida pamitsuta. Jadhitati jude ete, tsine ete cuana su aniude eni bahui echacutani huecuana. <sup>47</sup> Ahue manujiji cuana sa ete cuana mejemi bahueta huecuana. Cristiano cuana ja saida pabata huecuana puji risha tsabauda cuana pu bahueta. Da putsu, Diusu ja pia cuana ebia su castigo etiata huecuana.

## 21

*Ahue manujiji puri sa jairutsuati chipilu*

*(Marcos 12.41-44)*

<sup>1</sup> Pia tsine Jesús templo su netina. Chipiluji deja cuana ja chipilu dueji erubiutasa emeji su Jesús ja batana. <sup>2</sup> Ahue manujiji puri di mesa beta chipilu chidi ichapetana Jesús ja batana.

<sup>3</sup> Da su Jesús ja cristiano cuana uja atana:

—Enei hue, yama micuana yainia, ye ahue manujiji puri ja pamapa pia chipiluji cuana ebia su ichataitia. <sup>4</sup> Tueda chipiluji cuana ja mecuana sa puchu epuani chipilu cuana ichataitia. Aimue mecuana sa chipilu ichape huecuana. Jucuada chipilu mecuana sa anideraitia. Beju ye epuna puri ichenu ja mu pamapa mesa yani chipilu ichapetaitia. Mesa ediaji chidi ebajati puji biame ichapetaitia.

*Templo epupe jepuiti quisa*  
(Mateo 24.1-2; Marcos 13.1-2)

<sup>5</sup> Beju piada piada discípulo cuana templo jepuiti mimitanina. Tueda templo da tumu ania cuana neje ajiji. Cristiano cuana ja ai ania chidi cuana tiatana templo su eribaicha puji. Da su beju Jesús ja uja atana huecuana:

<sup>6</sup> —Ye templo edajajametayu tsine ecuina. Ye micuaneda tumu ania ebainia cuana pamapa edajajamepeta. Aimue piada tumu biame pia bia su yaniti mahue.

*Castigo tsine cuinaji mahue su, nimetiuda aida cuana epu*  
(Mateo 24.3-28; Marcos 13.3-23)

<sup>7</sup> Da su beju Jesús quisabatana huecuana uja:

—Echua Puji, ¿quetsunu da ye ai cuana daja epu? ¿Cuaja ni ecuanaju shanapame a cua ye ai cuana daja epu?

<sup>8</sup> Da su Jesús ja jeutsutana huecuana:

—Tueda ai cuana puji mahue su, jucuada quema ebani su epueta. “Ema da Cristo. Ema tije meaque”, eputa huecuana. Beju be tije meaji huecuana. Merejatique tuna neje. Be mebaseametiji. <sup>9</sup> Ejude cuana emajaitita quisa micuaneda eid'aba su, be merubutanaji. Ema jasiapatiji mahue su, beju ye ai cuana uja epupiru.

<sup>10</sup> Jesús ja daja hue quisainiame atana huecuana:

—Ejude cuana huamahuama emajaitita. <sup>11</sup> Yahua jubida erireta. Mid'e da epu. Tsapiapiati ai neda cuana ecuina pamapa yahua cuana je. Nimetiuda ai iyuda cuana cielo su cristiano cuana ja ebata.

<sup>12</sup> Beju tueda ai cuana daja puji mahue su, micuana tijetije a putsu, einata huecuana, micuaneda ema peje su jei epuani putsu. Jadhitati jude ete cuana su micuana edusuta huecuana ematse puji. Micuana eteriichata huecuana. Huaraji cuana butse su micuana edusuta huecuana. Pamapa tueda ai cuana micuana yata huecuana, micuaneda ema peje su jei epuani putsu. <sup>13</sup> Beju micuaneda tuna butse su ema jepuiti equisanetiacuinati. <sup>14</sup> Be mepibapibaji tuna butse su cuaja emimi puji. <sup>15</sup> Yama quitaita micuana da hora su mimi cuana etia tuna saida ejeutsu puji. Aimue micuana epishitiata huecuana mahue. <sup>16</sup> Beju micuana sa tata, edue, eshanapa cuana huaru micuana neje eduininita ema jepuiti. Micuana

emenajatiata huecuana huaraji cuana peje su. Piada piada micuana emanuameta huecuana. <sup>17</sup> Pamapa cristiano cuana ja micuana eduininibata ema jepuiti. <sup>18</sup> Beju micuana sa piada echuaina biame aimue etaitana mahue. <sup>19</sup> Daja biame, ahua micuaneda Diosu peje su enimetucheati su, cielo su tu neje eid'e yanienitiyu.

<sup>20</sup> 'Beju soldado cuana ja Jerusalén ejude ebareta su, bahue mepuque tipeida Jerusalén ejude etaitanape. <sup>21</sup> Da hora su Judea yahua su aniji cristiano cuana pajududuta emata cuana su. Daja huecha Jerusalén ejude su aniji cristiano cuana tueda ejude jenetia pacuinanata. Te su aniji cuana be ejude su pasiapatita. <sup>22</sup> De tsine su castigo jubida epu, cuaja Diosu sa quirica su derejiji yani batame. <sup>23</sup> ¡Aba epuna dheji, bacua edhereji cuana da tiempo su, yahua su ebia su neda epu putsu! Castigo jubida ecuina cristiano cuana peje su. <sup>24</sup> Piada piada cuana emanuta, jaicheti putsu. Pia cuana eteri puji edusuta huecuana pia yahua cuana su. Da jenetia su beju judío mahue cuana ja Jerusalén ejude yanitita Diosu ja d'iji etiata huecuana teje.

*Cristo esiapati jepuiti quisa*

*(Mateo 24.29-35, 42-44; Marcos 13.24-37)*

<sup>25</sup> 'Ema jasiapatiji mahue su, ai iyuda cuana id'eti, badi, atujai cuana su epu. Ye mundo su aniji cristiano cuana ebia su erubutanata, mar sa id'apadada cuana ebia su etsatineti id'aba putsu. <sup>26</sup> Jucuada cristiano cuana enimetaitanata, iyuame pu putsu. "¿Cuaja jia da ye mundo epu?" eputa huecuana. Pamapa cielo su aniji ai cuana jubida eriariapeta. <sup>27</sup> Da su beju ema cielo jenetia ebutesa cristiano cuana ja ebata. Judu duje tucheda, hueda neje ema epusiu ebata huecuana. <sup>28</sup> Beju tueda ai iyuda cuana epupiruta su, beidaji neje enimetucheatique, tipeida micuaneda d'iji su epu putsu.

<sup>29</sup> Jesús ja bahue quisa neje daja hue quisainiame atana huecuana:

—Mepibatique aqui cuana. <sup>30</sup> Beju eina eichacua chidi eturucatatani su, da su jad'iati badi cuana enariatiani micuaneda eshanapainia. <sup>31</sup> Daja huecha tueda ai nimetiuda cuana ba putsu, meshanapaque Diosu ecuatsasiati beju huedhue.

<sup>32-33</sup> Ene putsu, yama micuana equisainia, pamapa tueda ai nimetiuda ebapirutani cuana aimue emanuta mahue tsuhu ema epueicha teje. Beju cielo, mundo epupe biame, quema mimi mu aimue epupe mahue.

<sup>34</sup> 'Merejati que. Ema esiapati su, be yama micuana tueda ai madhada cuana yainia mebiateje. <sup>35</sup> Daja da epu ye mundo su aniji cuana neje. Ema esiapati tsine da tuneseda puji jupacha nime epu. Tipeida ema esiapati tuna ecastiga puji. <sup>36</sup> Da su



janimepitijiji meanique. Diusu daja hue memitsuderaque. Ahua daja micuaneda ya su, pamapa tueda ai iyuda cuana epusiu jenetia d'eji su epu ema butse su saida ebameti puji.

<sup>37</sup> Tsine, Jesús ja cristiano cuana buetsuataina templo su. Dhidha su Olivo murucu aida su putiana dapia ehuenta teje yaniti puji. <sup>38</sup> Cristiano cuana pamapa apudaya templo su putitana Jesús eid'aba puji.

## 22

*Cuaja Jesús iname ya jaquisatitana deja madhada cuana (Mateo 26.1-5, 14-16; Marcos 14.1-2, 10-11; Juan 11.45-53)*

<sup>1</sup> Beju pascua tsine hue quita hue su. Tueda tsine su cristiano cuana ja pan levadura mahue dia bahue putaina.

<sup>2</sup> Sacerdote sa echua puji, jacuatsasiati ebuetsuaji cuana uja jaquisabatitana: “¿Cuaja ni da ecuaneda cristiano cuana duininameji, mahue manuame a cua Jesús?” Beju daja jaquisabatitana huecuana, cristiano cuana iyuba putsu.

<sup>3</sup> Da su Ishahua ja Judas Iscariote pibametana Jesús pame-najatiata puji. Tueda Judas da Jesús sa apóstol puina. <sup>4</sup> Da su beju Judas templo su putiana sacerdote sa echua puji, templo quinaji cuana neje equisati puji. Cuaja Jesús menajatiame ya quisatana huecuana. <sup>5</sup> Da su beidaji putana huecuana. Tipeida Judas chipilu etia jamitsuti tiatana huecuana. <sup>6</sup> Judas ja jei atana huecuana. Da hora jenetia pibapirutana huecuana cuaja Jesús menajatiame ya puji cristiano cuana mahue su.

*Discípulo cuana Jesús neje pascua tsine su diadiatana (Mateo 26.17-29; Marcos 14.12-25; Juan 13.21-30; 1 Corintios 11.23-26)*

<sup>7</sup> Pascua tsine beju cuinana. Tueda tsine su cristiano cuana ja pan levadura mahue dia bahue putaina. Huisha janana Diusu peje su irutsua bahue putaina huecuana. <sup>8</sup> Da su Jesús ja Pedro, Juan detse uja cuatsasiatana:

—Mebasetatique ecuaneda pascua tsine jana edia puji.

<sup>9</sup> Tuatseda Jesús quisabatana:

—¿Quepia ni da etseju baseta cua?

<sup>10</sup> Jesús ja jeutsutana tse:

—Ejude enubiji su piada deja yahui matu jadusuti metseda etsu. Tije meatique tueda. Tueda enubiti ete su metse ete emetse echacu. <sup>11</sup> Ete emetse uja meaque: “Echua Puji ja mi uja equisabametani: ‘¿Quepia d'eji yani yama quema discípulo cuana neje pascua tsine jana edia puji?’ ” <sup>12</sup> Da su ete emetse ja diadia jude aida, basetajiji ete ebaque su ebameta. Dapia mebasetaque jana.

13 Da su putiana tse. Cuaja Jesús ja tuatseda quisatana batame tejetana tse. Dapia d'ejí su pascua tsine jana base-tatana tse.

14 Tsine beju cuinana su, Jesús, mesa apóstol cuana neje tueda ete su cuinana. Beju aniutetana huecuana tsine jana edia puji. 15 Da su Jesús ja uja atana huecuana:

—Ema manuji mahue su, ye pascua tsine yama saida baja yainia micuana neje. 16 Yama micuana butsepi equisainia, aimue yama ye tsine ebaicha mahue Diusu ecuatsasiati ecuina teje.

17 Da su Jesús ja vinoji emeji jemitsuatana. Diusulupai Tata Diusu a putsu, apóstol cuana uja atana:

—Ye vino micuaneda cama meberereatiatique. Meid'ipeque. 18 Yama micuana equisainia, aimue yama ye vino eid'iicha mahue Diusu ecuatsasiati ecuina teje.

19 Da su beju pan jemitsuatana. Diusulupai Tata Diusu a putsu, pan ped'uped'uatana. Apóstol cuana pan ped'u cuana berereatiatana. Uja atana huecuana:

—Ye pan ped'ujiji da quema equita pu cua nime. Ye quema equita da Diusu peje su eirutsuati micuaneseda puji. Media-peque, ema piba putsu.

20 Daja huecha vinoji emeji atana, diadiape putsu. Uja Jesús ja atana huecuana:

—Ye vino da quema ami d'uichajiji pu cua nime. Quema ami d'uichajiji putsu, Diusu ja cristiano cuana mesa jamit-suti eichacua etiata. Quema ami ed'uichati putsu, Diusu ja micuana eperdonata.

21 'Jiahue quita ema menajatiaji epu deja upia ema neje ediadiani. 22 Beju ema sufri yameta huecuana, cuaja Diusu sa quirica su derejiji yani batame. ¡Aba, ema menajatiaji epu deja!

23 Da su beju tuneda cama uja jaquisabatitana: “¿Aidhe jia?”

*¿Aidhe da pia cuana ebia su aida?*

24 Da su beju, quebata tuneda ebia su aida, jacuicuinatitana huecuana. 25 Da putsu Jesús ja atana huecuana uja:

—Ye mundo sa huaraji cuana ja cristiano cuana jubida neje ecuatsasiatani. Tueda huaraji cuana da emetse nime cristiano cuana ja ebatani. 26 Micuaneda mu be daja mepuji. Quebata micuaneda ebia su aida puja su, tueda da micuana sa emebajaji pu taji. 27 ¿Aidhe jia ebia su aida, ahua deja misha su ediadiani, ahua mesa emebajaji? Deja misha su yani da emebajaji ebia su aida. Beju ema da micuana sa emebajaji pu cua nime.

28 'Micuaneda ema neje aniana, ema sufri epuani tupu.

29 Da putsu beju, yama micuana huaraji aida eicha. Quema

Tata Diosu ja ema huaraji aida ichatana nime, daja nime yama micuana yayu. <sup>30</sup> Micuaneda ema neje ediadiati quepia yama ecuatsasia su. Micuaneda huaraji aida sa aniude su yaniute pamapa israelita cristiano cuana ecuatsasia puji.

*Pedro da, "Mue yama Jesús shanapa," puana  
(Mateo 26.31-35; Marcos 14.27-31; Juan 13.36-38)*

<sup>31</sup> Jesús ja Pedro atana:

—Simón, Ishahua ja Diosu bajatana micuana jubida yaba puji. <sup>32</sup> Beju yama Diosu jubida bajana tu peje su mique janimetucheati cuana ehueiti mahue puji. Da su beju mida ema peje su enimetucheatiicha su, nimetucheameque mique edue cuana.

<sup>33</sup> Da su Simón ja Jesús uja atana:

—Echua Puji, ema da mi tije epu emanu teje.

<sup>34</sup> Jesús ja Pedro jeutsutana:

—Pedro, yama mi butsepi equisainia, jiahue dhidha huar-  
ipa deja queiji mahue su, "Aimue yama Jesús shanapa",  
quimisha nuati mida epu.

<sup>35</sup> Da su beju Jesús ja quisabatana huecuana uja:

—Mepibatique. Yama micuana shitara, chipilu, pulucu mahue beituana su, ¿a da micuana sa ai cuana hueitiana?

Da su jeutsutana huecuana uja:

—Mahue. Aimue ecuanaju sa hueiti puana.

<sup>36</sup> Da su Jesús ja atana huecuana uja:

—Beju jiahue mu jadosuti taji. Quebata shitaraji, chip-  
iluji beju padusuta. Quebata espadaji mahue su, mesa saco  
pairuta espada ebaja puji. <sup>37</sup> Enei hue yama micuana equi-  
sainia, ema jepuiti Diosu sa quirica su derejiji yani cuana  
daja pu taji. Uja derejiji yani ema jepuiti: "Cristiano cuana ja  
Diosu sa Jabeituti Deja matsetana deja madhada cua nime."  
Pamapa ema jepuiti derejiji yani mimi cuana daja epu.

<sup>38</sup> Da su Jesús atana huecuana uja:

—Echua Puji, hue upia beta espada yani.

Da su Jesús ja jeutsutana huecuana:

—Beju tupu.

*Jesús ja Tata Diosu jubida bajatana Getsemaní eti jude su  
(Mateo 26.36-46; Marcos 14.32-42)*

<sup>39</sup> Da su beju Jesús, discípulo cuana neje ete jenetia  
cuinanana putsu, Olivo murucu aida su putiana. <sup>40</sup> Dapia  
cuinatu putsu, discípulo cuana uja atana:

—Daja hue Diosu memitsuderaque Ishahua ja aimue  
micuana jucha yameta mahue puji.

<sup>41</sup> Da su Jesús, discípulo cuana peje jenetia chuadera pad'i  
putiana. Dapia tururuana Diosu neje emitsu puji. <sup>42</sup> Uja  
Diosu atana:

—Tata, d'oji su ema aque curusu su sufrimiento epusiu jenetia. Daja biame, miqne tsada bahui papu. Be quema tsada mu papu.

<sup>43-44</sup> Tueda jubida sufri epuani putsu, ebia su Diosu neje jamitsutiana. Mesa hueu da ami ed'ud'uani nime puana, tueda ebia su jubida sufri epuani putsu. Ángel tu peje su bataji puana cielo jenetia tu enimetucheame puji.

<sup>45</sup> Da su beju Jesús netiana putsu, discípulo cuana peje su putiana. Ebia su epibapibatani huecuana putsu, pamapa su tahuitana huecuana Jesús ja batana.

<sup>46</sup> Da su Jesús ja uja atana huecuana:

—¿Jucuaja su micuaneda etahuisa? Menetianaque. Diosu memitsuniaque Ishahua ja micuana epirubata mahue puji.

*Jesús risijiji dusutana huecuana*

*(Mateo 26.47-56; Marcos 14.43-50; Juan 18.2-11)*

<sup>47</sup> Jesús ja discípulo cuana daja equisatani cama, jucuada deja cuana beju cuinatana. Judas ja huidusucuinatana huecuana. Tueda da Jesús sa discípulo puina. Beju Jesús nariatana budhi neje tu emitsu puji. <sup>48</sup> Judas ja Jesús budhitana su, Jesús ja uja atana:

—Judas, ¿ebudhinia je miada Diosu sa Jabeituti Deja emenajatiainia?

<sup>49</sup> Beju discípulo cuana ja ba putsu, uja quisabatana huecuana:

—Echua Puji, ¿ahua ecuanaju espada neje jabiahuanati cua?

<sup>50</sup> Da hora su hue piada discípulo ja sacerdote cuana sa echua puji sa emebajaji sa bai eni bene eid'aja siquijusiatana.

<sup>51</sup> Da su beju Jesús ja cuatsasiatana huecuana:

—Da teje hue. Be daja meaji.

Jesús daja emimiani je, emebajaji sa eid'aja d'apabatana. Beju saisiametana eid'aja. <sup>52</sup> Da su beju Jesús ja tu edusu puji puetana deja cuana chamatana. Uja atana huecuana:

—Micuaneda pueitia espada, aquiriji cuana neje ema eina puji, ema tsi puji pu cua nime. <sup>53</sup> Ema templo su pamapa tsine micuana neje yani su, ¿jucuaja su ni da aimue micuaneda ema inana mahue? Beju ye da micuana sa hora, ema epishitiame puji, Ishahua ja micuana daja ema ai madhada ya puji yametani putsu.

*Pedro, “Mue yama Jesús shanapa”, puana*

*(Mateo 26.57-58, 69-75; Marcos 14.53-54, 66-72; Juan 18.12-18, 25-27)*

<sup>54</sup> Da su Jesús inatana huecuana. Sacerdote cuana sa echua puji aida sa ete su dusutana huecuana. Beju Pedro tuna tije putiana uqueda uqueda. <sup>55</sup> Ete su cuinati putsu, pia cuana ja

cuati turutana etsequeini su. Cuati naja su aniutetana huecuana. Da su Pedro di cuati naja su tuna duju su aniuteana.  
<sup>56</sup> Piada emebajaji epuna ja Pedro cuati naja su yani batana. Epuna ja Pedro chamasaisiatana. Tueda uja puana:

—Ye deja da Jesús neje puniunetina.

<sup>57</sup> Beju Pedro ja epuna atana:

—Epuna, aimue yama tueda eshanapainia mahue.

<sup>58</sup> Su pad'i su piada deja ja Pedro ba putsu, uja atana:

—Mida da Jesús sa piada ebuqueji.

Beju Pedro ja tueda deja atana:

—Deja, aimue ema mahue.

<sup>59</sup> Beju piada hora tupu su neicha pia deja uja puana:

—Enei hue, ye deja Jesús neje puniunetina, tueda Galilea yahua jenetia huecha putsu.

<sup>60</sup> Da su beju Pedro ja tueda deja uja atana:

—Deja, yama mue shanapa ai jia mida emimiani.

Da hora su beju Pedro emimiani su, huaripa deja queiana.

<sup>61</sup> Da su Jesús jababarereati putsu, Pedro chamatana. Pedro cuaja Jesús ja tu quisatana su, japibatiana uja: “Jiahue dhidha huaripa deja queiji mahue su, ‘Aimue yama Jesús shanapa’, mida epu quimisha nuati.” <sup>62</sup> Da su beju Pedro etseque su cuinana putsu, ebia su pana.

*Jesús neje jashishatitana huecuana*

*(Mateo 26.67-68; Marcos 14.65)*

<sup>63</sup> Jesús inatsihuaji deja cuana tu neje jashishatitana.

<sup>64</sup> Jesús tuarisi putsu, ebu su ichepirutana huecuana. Uja Jesús atana huecuana:

—Quisaque ecuanaju aiya mida ichetaitia.

<sup>65</sup> Pia mimi madhada cuana neje Jesús madhabatana huecuana.

*Jesús da judío cuana sa huaraji aida cuana butse su*

*(Mateo 26.59-66; Marcos 14.55-64; Juan 18.19-24)*

<sup>66</sup> Beju huenana su, judío cuana sa huaraji aida cuana jadhitatitana. Tata edhi ehuidusuji, sacerdote huaraji aida, jacuatsasiati ebuetsuaji cuana jadhitatitana. Tuna butse su Jesús dusutana huecuana. Da su Jesús quisabatana huecuana uja:

<sup>67</sup> —¿A da mida Diosu sa Jabeituti Deja? Quisaque ecuanaju.

Da su Jesús ja jeutsutana huecuana:

—Ahua yama micuana, “Ema da Diosu sa Jabeituti Deja”, ya su, aimue micuaneda ema jei ya mahue. <sup>68</sup> Ahua yama micuana equisaba su, aimue micuaneda ema ejeutsu mahue. Daja huecha aimue micuaneda ema emesia mahue. <sup>69</sup> Beju jiahue jenetia ema Diosu aida, tucheda eni sa bai eni bene su yani micuaneda eba.

<sup>70</sup> Da su quisabatana huecuana uja:

—¿A da mida Diosu sa Ebacua?

Jesús ja jeutsutana huecuana:

—Ehe. Ema da. Micuaneda quitaita daja epuani.

<sup>71</sup> Da su beju jaquisatitana huecuana:

—¿Ai puji ni da ecuaneda pia jatuaquisatiji cuana tsa cua?

Beju da ecuaneda quitaita id'abaitia tusa mimi madhada cuana.

## 23

*Jesús romano huaraji aida Pilato butse su*

(Mateo 27.1-2, 11-14; Marcos 15.1-5; Juan 18.28-38)

<sup>1</sup> Da su pamapa su netiana putsu, Jesús dusutana huecuana romano huaraji aida Pilato peje su. <sup>2</sup> Tu butse su Jesús uja tuaquisapirutana huecuana:

—Ye deja ja cristiano cuana enimetipeimetani. Tuahueda cristiano cuana romano echua puji aida impuesto pachujetiata mahue ebuetsuatani. Ed'eji su tueda pa judío cuana sa echua puji epuani.

<sup>3</sup> Da su beju Pilato ja Jesús quisabatana:

—¿A da mida judío cuana sa echua puji?

Jesús ja jeutsutana:

—Ehe. Ema da, cuaja mida epuani batame.

<sup>4</sup> Da su Pilato ja sacerdote huaraji aida, pia dapia aniji cristiano cuana uja atana:

—Mue yama ye deja sa ai jucha biame ba.

<sup>5</sup> Da su beju cha ebia su hue Jesús tuaquisatana huecuana uja Pilato butse su:

—Ye deja ja cristiano cuana ebia su enimetipeimetani. Galilea yahua su pupiruana. Jiahue upia Jerusalén ejude su di daja yatani.

*Jesús echua puji Herodes Antipas butse su*

<sup>6</sup> Daja id'aba putsu, Pilato ja quisabatana huecuana:

—¿Da su jia da ye deja Galilea yahua jenetia?

<sup>7</sup> Pilato jeutsutana huecuana uja:

—Ehe. Da jenetia tueda.

Da su beju Pilato ja Jesús beitutana echua puji Herodes Antipas peje su tueda ai enime cuana pabata puji, Herodes Antipas da Galilea yahua sa echua puji puina putsu. Da tsine su huecha tueda Jerusalén ejude su anina. <sup>8</sup> Beidaji puana, Jesús ba putsu, tu yatani nimetiuda ai cuana jepuiti bahue puana putsu. Da su beju ebia su Jesús bajapirutana pia nimetiuda aida paata puji. <sup>9</sup> Jesús ebia su piapiati ai cuana quisabatana biame, mue jeutsu atana. <sup>10</sup> Dapia da sacerdote huaraji aida, jacuatsasiati ebuetsuaji cuana ja Jesús

jubida tuaquisatana Herodes Antipas butse su. <sup>11</sup> Da su beju Herodes Antipas ja mesa soldado cuana neje Jesús ai eni mahue nime batana. Jesús jud'utana huecuana huaraji sa ejud'uji chujeneda neje, tu neje eshishatiani je. Daja ape putsu, Herodes Antipas ja Jesús neicha Pilato peje su beitungana. <sup>12</sup> Da tsine su Pilato, Herodes Antipas neje eshanapa jaatiana tse. Equene mu duininida jabatina tse.

*Pilato ja Jesús pamanuameta huecuana cuatsasiatana*  
(Mateo 27.15-26; Marcos 15.6-15; Juan 18.39-19.16)

<sup>13</sup> Da su beju Pilato ja sacerdote huaraji aida, ejude sa huaraji, pamapa cristiano cuana ihuatana. <sup>14</sup> Uja atana huecuana:

—Micuaneda ye deja ema peje su duseitia, tuahueda cristiano cuana enimetipeimetani pu putsu. Beju yama tueda saida quisabaenitia micuana butse su. Mue yama mesa ai jucha biame ba, cuaja micuaneda tu etuaquisainia nime. <sup>15</sup> Herodes Antipas ja di aimue mesa ai jucha biame batana mahue, Jesús neicha ema peje su beitungana putsu. Beju ye deja ja aimue ai madhada biame a yama tu emanuame puji. <sup>16</sup> Da su yama tueda huacabiti neje iche putsu, emesiayu.

<sup>17</sup> Beju pamapa pascua tsine su Pilato ja piada terijiji mesia bahue puina cristiano cuana beidaji yame puji. Da su tueda pascua tsine su Jesús mesiaja adhaatana. <sup>18</sup> Da su cristiano cuana bahue pu putsu, uja tsiatsiatana huecuana:

—Barrabás da mesiaque. Jesús mu be mesiaji.

<sup>19</sup> Tueda Barrabás da deja manuameji puina. Romano soldado cuana neje jamajaitiana. Da putsu, tueda teriichanubiametana huecuana. <sup>20</sup> Pilato ja cristiano cuana neicha quisatana, Jesús mesiaja putsu. <sup>21</sup> Beju cristiano cuana id'aba putsu, cha ebia su jubida tsiatsiatana huecuana uja:

—¡Curusu su tataque! ¡Curusu su tataque!

<sup>22</sup> Beju neicha quimisha nuati puji Pilato ja cristiano cuana atana:

—¿Ai puji ni? ¿Ai jucha ni da tuahueda atana? Mue yama ye deja sa ai jucha biame ba. Da su yama huacabiti neje iche putsu, emesia.

<sup>23</sup> Beju cha ebia su hue cristiano cuana uja tsiatsiatana jubida:

—¡Curusu su tataque!

<sup>24</sup> Da su ebia su daja tsiatsiatana huecuana putsu, Pilato ja tuna sa tsada atana beju. <sup>25</sup> Deja manuameji Barrabás mesiatana. Jesús tuna sa tsada epuani paata huecuana puji menajiatana huecuana.

*Jesús curusu su tatatana huecuana*  
(Mateo 27.32-44; Marcos 15.21-32; Juan 19.17-27)

<sup>26</sup> Da su beju Jesús dusutana huecuana tu curusu su etata puji. Edusutahu huecuana su, piada deja Simón banime soldado cuana inatana. Tueda deja da Cirene yahua jenetia puina. Tueda cuatsasiatana soldado cuana ja curusu pamapata puji. Da su tuahueda Jesús tije curusu mapatana.

<sup>27</sup> Jucuada cristiano cuana tije putitana. Daja huecha jucuada epuna cuana di Jesús tije panatana. <sup>28</sup> Jesús ja tu tije ebia su epatahu ba putsu, uja atana huecuana:

—Jerusalén ejude jenetia epuna cuana, be mepaji ema jepuiti. Beju micuaneseda puji, daja huecha micuana sa ebacua cuana sa puji bahui mapaque. <sup>29</sup> Beju tsine iyuda cuana ecuina. Da tsine su bacua mahue cuana beidaji ep-uta. <sup>30</sup> Da tsine su cristiano cuana ja emata cuana ebajata uja: “Ecuana ju bia su medajajaque ecuanaju erubuti puji.” <sup>31</sup> Jiahue ema daja yatani huecuana biame, ebia su ai madhada cuana micuana yata huecuana.

<sup>32</sup> Beju beta deja tsi puji detse Jesús neje dusutana huecuana etata puji. <sup>33</sup> Da su Calavera banime eti jude su cuinatitana huecuana su, dapia Jesús curusu su tatatana huecuana. Beta tsi puji deja detse di curusu detse su tatatana huecuana. Piada Jesús sa bai eni bene, pia d'ani bai bene tatatana huecuana. <sup>34</sup> Jesús etatatani huecuana cama, uja tuahueda Diusu atana:

—Tata, perdonaque ye cuana, bue mahue ta huecuana putsu.

Da su beju soldado cuana ja suerte atana Jesús sa ejud'uji tuneda cama eberereatiati puji. <sup>35</sup> Pamapa cristiano cuana dapia chamachamanetitaina. Tata edhi ehuidusuji cuana Jesús neje jashishatitana. Uja putana huecuana:

—Tuahueda pia cuana d'oji su atana. Ahua tueda ene quita Diusu sa Jabeituti Deja su, da su tu mehua d'oji su paati.

<sup>36</sup> Soldado cuana ja di Jesús neje jashishatitana. Vino najaitianajiji tiaja adhaatana huecuana tu eid'ita puji. <sup>37</sup> Tuneda di Jesús uja atana:

—Ahua ene quita mida judío cuana sa Echua Puji su, mi mehua d'oji su jaatique.

<sup>38</sup> Beju curusu su mesa echua bia su mimi cuana deretana huecuana. Quimisha yana cuana su deretana huecuana. Griego, latín, hebreo banime yana cuana su deretana huecuana uja: “Ye da judío cuana sa echua puji.”

<sup>39</sup> Piada tu naja su badejiji tsi puji ja Cristo uja madhabatana:

—Ahua ene mida Cristo su, mi mehua d'oji su jaati putsu, etseju di d'oji su aque.

<sup>40</sup> Pia tsi puji ja mu daja epuani id'aba putsu, d'ayatana uja:



—Miqueda mu aimue Diusu iyuda mahue, mida di emanu biame. <sup>41</sup> Etseda sufri epuani beju emanu teje, ai madhada cuana ana putsu. Ye deja ja mu mue ai madhada biame a.

<sup>42</sup> Da su beju tuahueda Jesús uja bajatana:

—Jesús, pibaque ema, mi ecuatsasiati su ecuinati su.

<sup>43</sup> Da su Jesús ja tueda jeutsutana:

—Enei hue yama mi butsepi equisainia, jiahue tsine mida ema neje cielo su yaniti.

### *Jesús manuana*

*(Mateo 27.45-56; Marcos 15.33-41; Juan 19.28-30)*

<sup>44</sup> Beju buepatia biame, apuda puana buepatia badeute uqueda teje, id'eti apunana putsu. <sup>45</sup> Da hora quitaita su templo dume su telón aida, bauda, pamuda badeji ebia jenetia ema su cuata jabud'iutiana. <sup>46</sup> Da hora su Jesús uja tsiatsiana:

—Tata, yama quema enid'u mi emenajatiainia.

Daja emimiani je, manuana beju.

<sup>47</sup> Soldado cuana sa capitán tueda ai cuana chama putsu, Diusu saida mitsutsuatana. Uja puana:

—Enei hue, ye deja mu da jucha mahue epu mane.

<sup>48</sup> Pamapa chamatana cristiano cuana ebia su epibapibani je, jachuainati putsu, putitaibana. <sup>49</sup> Jesús sa eshanapa cuana bahui anititana. Jesús tije aji Galilea yahua jenetia epuna cuana di anititana. Uqueda jenetia pamapa tueda ai cuana chamatana huecuana.

### *Jesús papatana huecuana*

*(Mateo 27.57-61; Marcos 15.42-47; Juan 19.38-42)*

<sup>50</sup> Beju piada deja anina José banime. Tueda Arimatea ejude Judea yahua jenetia puina. Deja saida, butsepi, judío cuana sa piada ehuidusuji puina. <sup>51</sup> Diusu ecuatsasiati id'uataina. Da putsu, tuseda mu tsada mahue puana pia ehuidusuji cuana ja Jesús atana cuana. <sup>52</sup> Da su beju Pilato peje su putiana Jesús sa equita ebaja puji. <sup>53</sup> Curusu jenetia equita jemiute putsu, eba buji saida neje babutana. Sepulcro su huananubiatana. Tueda sepulcro tumu epa su ye chu ajiji puina. Aidhe biame tsuhu huananubiajiji mahue puina. <sup>54</sup> Beju viernes tsine puina. Tueda tsine su cristiano cuana jabasetati bahue puina janahua tsine su puji.

<sup>55</sup> Da su Jesús tije aji Galilea yahua jenetia epuna cuana putitana Jesús sa equita quepia, cuaja huananubiajiji esa eba puji. <sup>56</sup> Da su ete su jasiapati putsu, ai puida cuana basetatana huecuana Jesús sa equita bia su eicha puji. Janahua tsine beju cuinana su, pamapa su janahuatana deja jacuatsasiati putsu.

## 24

### *Jesús id'eibana*

*(Mateo 28.1-10; Marcos 16.1-8; Juan 20.1-10)*

<sup>1</sup> Domingo tsine su apudaya enieni su epuna cuana Jesús huananubiajiji esa su jasiapatitana. Ai puida cuana basetajiji beju dusutana huecuana. Pia epuna cuana ja di buquetana huecuana. <sup>2</sup> Dapia cuinati putsu, aimue tumu aida neje sepulcro terijiji mahue batana huecuana. <sup>3</sup> Beju sepulcro dume su nubi putsu, aimue Jesús sa equita esa batana huecuana mahue. <sup>4</sup> Daja ba putsu, tuna enimetiuni cama, beta deja tuna naja su bataji puana. Jud'uji pasane cuarecuareji puina tse. <sup>5</sup> Tuatse ba putsu, epuna cuana tud'isatiana yahua su cuata tuatse butse su, rubutanatana huecuana putsu. Da su deja detse ja uja epuna atana:

—¿Ai puji ni da micuaneda Cristo eid'e echacuinia manujiji jude su? <sup>6-7</sup> Aimue tueda upia esa mahue. Beju id'eitiba. Mepibatique tuahueda micuana Galilea yahua su anina su, uja atana: “Ema emenajatiata huecuana deja juchaji cuana peje su. Ema curusu su etatata huecuana biame, quimisha tsine jenetia ema eid'eyu.” Daja micuana equene Jesús ja quisatana.

<sup>8</sup> Da su beju Jesús sa mimi cuana su japibatitana. <sup>9</sup> Apóstol, pia jei eputani cuana peje su putitaibana huecuana. Cuaja Jesús id'eyume puana pamapa quisa pupeana huecuana. <sup>10</sup> Ye quisa duseji epuna cuana da banime María Magdalena, Juana, María Jacobo sa cuara. Pia epuna cuana di tuna neje anitaina. <sup>11</sup> Apóstol cuana ja epuna sa quisa cuana aimue jei atana mahue, tseitsi nime hue tuna sa quisa batana huecuana putsu.

<sup>12</sup> Beju Pedro ja mu tueda quisa id'aba putsu, tipeida jududutiana sepulcro su ebati puji. Cuinati putsu, sepulcro dume chamatana. Ebabuji bahui tanujajiji yani batana. Da su jasiapatiana mesa ete su. Ebia su Pedro nimetiwana, daja ai cuana ba putsu.

### *Emaús ejude edid'i su*

*(Marcos 16.12-13)*

<sup>13</sup> Tueda tsine su quitaita beta Jesús peje su jei epuani detse Emaús ejude su puhuina. Tueda ejude da Jerusalén ejude jenetia piada tunca piada ejaitiana kilómetro uquedame puina. <sup>14</sup> Tuatseda betana su pamapa ai cuaja puitia cuana quisaquisa puhuina. <sup>15</sup> Quisaquisa epuani cama, Jesús quitaita tuatse peje su janariati putsu, tuatse neje asepiruana. <sup>16</sup> Beju tuatseda Jesús batana biame, mue shanapa atana tse. <sup>17</sup> Da su beju Jesús ja quisabatana tse uja:

—¿Ai quisaquisa metse epuani, yaseneti cama? ¿Jucuaja su ni da metseda ebia su epipibani?

<sup>18</sup> Piada tuatseda Cleofas banime ja. Jesús jeutsutana uja:

—Beju pamapa Jerusalén ejude su aniji cuana bahue cuaja ai cuana puana. ¿Cuaja ni da mida bue mahue Jerusalén ejude jenetia biame?

<sup>19</sup> Da su Jesús ja uja quisabaderatana tse:

—¿Jucuaja da ai pujiji?

Da su Jesús uja quisapirutana tse:

—Jesús Nazaret ejude jenetia da profeta tucheda puina. Pamapa mesa ai jaati, mimi cuana da tucheda saida puina Diusu, cristiano cuana butse su. <sup>20</sup> Sacerdote huaraji aida, tata edhi ehuisdusuji cuana ja tueda menajatiatana, matse putsu, curusu su pamanuameta huecuana puji. <sup>21</sup> Tuahueda pamapa israelita cristiano cuana d'eji su yata ecuanaju japibadhaatiana. Beju jiahue neje quimisha tsine manumetana huecuana. <sup>22</sup> Piada piada epuna cuana ja ecuanaju rubutanametana. Tuneda apudaya enieni Jesús huananubiajiji esa su putitana. <sup>23</sup> Tusa equita aimue beju batana huecuana. Da su beju tipeida jasiapatitana ecuanaju peje su. Angel detse pa batana huecuana. Tueda ángel detse ja pa Jesús da eid'e ecuanaju atana huecuana. <sup>24</sup> Da su beju piada piada ecuanaju sepulcro su putitana eba puji. Beju tuneda batana, cuaja epuna cuana ja ecuanaju quisatana batame. Daja biame, Jesús mue ba atana huecuana.

<sup>25</sup> Da su beju Jesús uja atana tse:

—Metseda beju bue mahue eni. Atadhada metseda profeta chenu cuana sa mimi cuana derejiji yani su jei epu puji. <sup>26</sup> ¿Aimue jia maida equene Cristo sa sufri pu taji puina mahue, tusa gloria su nubiji mahue su?

<sup>27</sup> Da su Jesús ja buetsuapirutana tse pamapa Diusu sa Cristo jepuiti derejiji yani mimi cuana. Moisés chenu ja deretaidha quirica cuana jenetia, profeta chenu cuana ja deretaidha quirica cuana teje buetsuapirutana tse. Tueda quirica Cristo jepuiti quisa epuani cuana Jesús ja edid'i su epuhu je, pibametana tse.

<sup>28</sup> Da su beju ejude su cuinati putsu, Jesús daja hue jaitianaja pudhaana. <sup>29</sup> Beju aimue tuatseda pajaitiana atana mahue. Tuatseda Jesús uja atana tse:

—Upia hue etseju neje anitique, beju yapunani putsu.

Da su Jesús tuatse neje ete su nubiana. <sup>30</sup> Misha su aniuteana huecuana ediadia puji. Aniute putsu, Jesús ja pan inatana. Diusulupai Tata Diusu atana. Beju pan ped'u putsu, tiatana tse. <sup>31</sup> Da hora su shanapatana tse tueda da Jesús. Daja

tuatse epuani cama, Jesús tuatse butse su taitanana. Da su tuatseda jaquisatiana uja:

<sup>32</sup> —Enei hue, etseju sa muesumu beidaji puana, tuahueda etseju Diusu sa mimi derejiji yani edid'i su buetsuatana su.

<sup>33</sup> Da su beju tipeida jasiapatiana tse Jerusalén ejude su. Dapia piada tunca piada ejaitiana apóstol cuana pia jei ep-utani cuana neje tsutana tse. <sup>34</sup> Tuatseda uja atana huecuana:

—Enei hue, Echua Puji id'eibana Simón ja batana.

<sup>35</sup> Da su beju pamapa ai cuaja batana tse quisatana huecuana.

*Jesús discípulo cuana peje su bataji puana*

*(Mateo 28.16-20; Marcos 16.14-18; Juan 20.19-23)*

<sup>36</sup> Beju daja equisatitani cama, Jesús bataji puana tuna duju su. Bataji pu putsu, mitsutana huecuana uja:

—Menimepijajaque.

<sup>37</sup> Beju ebia su rubutanatana huecuana, enid'u ebainia pepe putana putsu. <sup>38</sup> Da su Jesús ja atana huecuana uja:

—¿Ai puji ni micuaneda erubutanani? ¿Jucuaja su ni micuaneda aimue jei epuani mahue? <sup>39</sup> Mechamaque quema eme, ehuatsi su etsi cuana. Beju ema hue da. Chamaeni putsu, med'apabaque ema. Aimue ema enid'u mahue. Ema quitaji beju. Enid'u mu quita mahue.

<sup>40</sup> Da su Jesús ja mesa eme, ehuatsi detse bametana huecuana. <sup>41</sup> Beju tuneda beidaji eputani biame, aimue jei puja quita putana huecuana mahue, ebia su nimetiunetitana huecuana putsu. Da su Jesús ja atana huecuana uja:

—¿Ahua micuana sa yani ai dia taji cuana?

<sup>42-43</sup> Da su Jesús se esina ped'u chidi, piada huasa ena matu chidi tiatana huecuana su, tune butse su diatana. <sup>44</sup> Diape putsu, uja Jesús ja atana huecuana:

—Ema micuana neje anina su hue, ema manunameji mahue su, yama micuana pamapa cuaja ema epu quisana. Beju jaitianana, cuaja yama micuana quisana batame. Pamapa ema jepuiti derejiji yani ai cuana beju puana. Tueda ai cuana derejiji yani Moisés chenu, profeta chenu cuana sa quirica cuana su. Daja huecha Salmos quirica su derejiji yani ai cuana beju daja puana.

<sup>45</sup> Da su beju Jesús ja Diusu sa quirica su tu jepuiti derejiji yani ai cuana shanapametana huecuana. <sup>46</sup> Uja atana huecuana:

—Uja da derejiji yani: “Cristo manu putsu, quimisha tsine jenetia eid'eyu. <sup>47</sup> Pamapa yahua je tusa ebani su tusa quisa saida cuana quisaquisa eputa. Equene Jerusalén ejude su quisaquisa epupiruta pamapa yahua je quisaquisa epupe teje. Cristo sa ebani su quisaquisa eputa cristiano cuana

Diusu peje su papibaturucatita puji. Daja eputa huecuana su, Diusu ja tuna sa jucha cuana eperdonatayu.” <sup>48</sup> Beju bahue micuaneda pamapa ye ai cuana. <sup>49</sup> Yama micuana peje su Espiritu Santo ebeitu, cuaja quema Tata Diusu ja micuana jamitsuti tiatana batame. Meanique upia Jerusalén ejude su Diusu sa Espiritu Santo tucheda micuana peje su cielo jenetia ecuina teje.

*Jesús cielo su tsuatibana*  
(Marcos 16.19-20)

<sup>50</sup> Da su beju Jesús ja Jerusalén ejude tsahua su Betania ejude chidi naja su dusutana huecuana. Dapia mesa eme detse jemitsua putsu, “Tata Diusu ja meibunebataque”, atana huecuana. <sup>51</sup> Daja a putsu, Jesús tuna peje jenetia cielo su tsuatibana. <sup>52</sup> Da su beju discípulo cuana beidaji jubida neje jasiapatitana Jerusalén ejude su. <sup>53</sup> Pamapa tsine templo su anitaina huecuana Diusu emitsutsua puji. Daja papu.

## EL SANTO EVANGELIO SEGÚN SAN JUAN

Ye quirica da Juan ja deretaidha. Tuahueda Jesús tije ataidha pamapa muesumu neje. Da su tueda Jesús ja ebia su tsada bataidha.

Juan ja mesa derejiji quirica su Jesús da ene quita Tata Diosu sa Ebacua, daja huecha ene quita Diosu quitaita ebametani. Daja huecha Jesús hueda nime ebametani. Tuahueda cristiano cuana eid'e eni ameta cua ebametani. Cristiano cuana sa Jesús peje su janimetucheati taji Juan ja deretaidha mecua sa jucha cuana dhipajiji papu puji. Jucha cuana dhipa putsu, eid'e yanienititayu beju.

Juan ja deretaidha quirica su Jesús siete nuati, "Ema da", puana:

Ema da eid'e jaametiji pan nime. (6.35)

Ema da hueda nime. (8.12)

Ema da taraca etsequeini nime. (10.9)

Ema da huisha quinaji saida nime. (10.11)

Ema da manujiji cuana eid'e amejí. (11.25)

Ema da Diosu peje su epuhu edid'i nime. (14.6)

Ema da equi nime. (15.5)

### *Cristo da Diosu bameji puina*

<sup>1</sup> Equene beju Jesucristo anidha. Ye mundo aniji mahue su, beju anidha. Tata Diosu bameji epuani. Ye mundo su pueana cristiano cuana peje su Tata Diosu ebameti puji. Tueda da Diosu putsu, equene jenetia Tata Diosu neje anidha. <sup>2</sup> Equene pamapa ai cuana ajiji mahue su, tueda mu Tata Diosu neje anidha beju. <sup>3</sup> Tu jepuiti Tata Diosu ja pamapa ai cuana ataidha. <sup>4</sup> Tu jepuiti pamapa su eid'e eputani. Cuaja id'eti ja cristiano cuana hueda etiatani nime, daja tuahueda Diosu sa quisa saida cuana cristiano cuana equisatani. <sup>5</sup> Apuda ja hueda cuaja dhamu taji mahue ebatani nime, daja da ai madhada cuana ja mesa jabuetsuati saida cuana aimue nahuebata cua mahue.

<sup>6</sup> Jesucristo ja buetsuapiruji mahue su, piada deja anina. Tueda Juan Bautista banime puina. <sup>7</sup> Diosu ja cristiano cuana peje su tueda beitutana Jesucristo jepuiti quisaquisa papu puji, Jesús peje su jei paputa huecuana puji. <sup>8</sup> Beju aimue Juan Tata Diosu bameji puina mahue. Tueda pueana Jesucristo jepuiti cristiano cuana peje su quisaquisa epu puji bahui. <sup>9</sup> Jesucristo ja mu butsepi neje Tata Diosu bametana cristiano cuana peje su. Tueda ye mundo su pueana cristiano cuana Diosu sa ene quita quisa saida cuana equisa puji.

10 Ye mundo su anina biame, Tata Diosu ja tu jepuiti pamapa ai cuana ataidha biame, cristiano cuana ja mue shanapa atana. 11 Mesa judío cristiano quitaita cuana peje su pueana biame, aimue batsutana huecuana mahue. 12 Pamapa tu batsu putsu, jei putana cuana mu Diosu sa ebacua cuana atana. 13 Cristiano cuana da bacuaji eputani mecuana sa utsatada jenetia hue. Diosu ja mu ecuana mesa ebacua yatani, cuaja mesa tsada epuani nime bahui.

14 Jesucristo da Diosu bameji epuani. Tueda da deja bataji puana. Ecuana duju su ibuneda neje ye mundo su puni-UNETINA. Butsepi mimiana. Tata Diosu sa piada quita Ebacua putsu, ebia su saida puina beju ecuanaju bana. 15 Juan Bautista da tu jepuiti uja quisa puana:

—Ye Jesucristo jepuiti ema quisaquisa puana. Ema tije epusiu biame, ema ebia su aida, ema bataji puji mahue su, tueda anidha putsu.

Daja Juan Bautista Jesucristo jepuiti cristiano cuana peje su quisa puana.

16 Jesucristo ja ecuana ebia su mesa jaibunebati tiatana, ecuana ebia su ibuneda ebatani putsu. 17 Moisés chenu ja ecuana jacuatsasiati jubida cuana bahui tiataidha. Beju Jesucristo ja mu ecuana ebia su ibunebatana. Mesa ene quita quisa saida cuana ecuana buetsuatana. 18 Beju aimue quetsunu su biame aiya Tata Diosu ba. Tusa piada quita Ebacua ja bahui tueda batana, tu naja su yani putsu. Tuahueda ecuana cuaja Diosu quisatana.

*Juan Bautista ja Jesucristo quisaneticuinatana*  
(Mateo 3.11-12; Marcos 1.7-8; Lucas 3.15-17)

19 Jerusalén ejude su aniji cuana ja sacerdote cuana, mecuana sa etsahuaji cuana neje beitutana Juan Bautista peje su. Putitana huecuana Juan peje su, aidhe tueda, equisaba puji. 20 Da su Juan ja uja jeutsutana huecuana:

—Aimue ema Diosu sa Jabeituti Deja mahue.

21 Beju neicha quisabatana huecuana Juan:

—¿Aidhe da mida? ¿A da mida Diosu sa profeta Elías chenu id'eyujiji?

Juan ja jeutsutana huecuana uja:

—Aimue ema Elías chenu mahue.

Da su neicha quisabatana huecuana:

—¿A da mida tueda Diosu sa profeta epusiu ecuanaju eid'uainia?

Juan ja jeutsutana huecuana:

—Mahue.

22 Neicha Juan quisabatana huecuana:

—Da su, ¿aidhe da mida? Beju quisaque ecuanaju, ecuanaju beituji cuana ecuanaju sa quisa taji putsu.

<sup>23</sup> Da su Juan ja uja jeutsutana huecuana:

—Ema da deja quisaquisa epuani d'anita yahua su. Cuaja Diosu sa profeta Isaías chenu quisa puidha batame, daja jubida yama cristiano cuana equisainia: “Mebasetatique Echua Puji ecuina su puji.”

<sup>24-25</sup> Da su fariseo sa jabeituti cuana ja neicha Juan quisabatana:

—Da su, ¿ai puji ni miada cristiano cuana eichaderainia Diosu sa puji yahui neje, mida Diosu sa Jabeituti Deja, Elías chenu, Diosu sa profeta mahue biame?

<sup>26</sup> Da su Juan ja jeutsutana huecuana:

—Yama cristiano cuana eichaderainia Diosu sa puji yahui neje. Beju piada deja mu micuana duju su yani. Mue micuaneda shanapa tsuhu tueda. <sup>27</sup> Tueda ema tije epusiu biame, ema ebia su aida epuani. Aimue ema tupu mahue tu emebaja puji.

<sup>28</sup> Beju daja Juan, fariseo cuana sa jabeituti cuana neje mimiana Betábara banime ejude naja su, Jordán ena chu maje. Tueda ena su Juan ja cristiano cuana Diosu sa puji ichaderatasaina yahui neje.

### *Jesús da Huisha Janana nime*

<sup>29</sup> Pia huenati Jesús Juan peje su putiana. Juan ja Jesús ba putsu, uja cristiano cuana atana:

—Mechamaque. Tueda deja da Diosu peje su eirutsua puji Huisha Janana nime. Tueda emanu cristiano cuana sa jucha cuana edhipa puji. <sup>30</sup> Uja yama equene micuana quisana tu jepuiti: “Ema tije piada deja epusiu. Ema tije epusiu biame, tueda da ema ebia su aida, ema bataji puji mahue su, tueda anidha putsu.” <sup>31</sup> Yama quitaita aimue tueda shanapaina mahue. Beju jahue yama Diosu sa puji eichaderainia israelita cuana yahui neje tueda da Diosu sa Jabeituti Deja tuna eshanapame puji.

<sup>32-33</sup> Juan ja daja hue cristiano cuana quisainiame atana:

—Aimue yama tueda shanapaina mahue. Su pad'i beju Espíritu Santo cielo jenetia ebuteni huaitucu nime yama bana. Jesús bia su netiuteana. Equene Diosu ja ema uja atana: “Quebata deja bia su Espíritu Santo, bute putsu, yaniti su, tueda da quema Jabeituti Deja. Tuahueda cristiano cuana quema puji eichaderata Espíritu Santo sa tucheda neje.”

<sup>34</sup> Beju tueda yama bana. Yama micuana butsepi equisainia, tueda deja da Diosu sa Ebacua.

### *Jesús ja mesa discípulo cuana dharepirutana*



<sup>35</sup> Pia huenati neicha Juan dapia aniana. Beta tu buqueji detse di tu neje aniana. <sup>36</sup> Juan ja Jesús ejaitianasa ba putsu, ebuqueji detse uja atana:

—Mechamaque tueda deja. Tueda da Tata Diosu peje su eirutsua puji Huisha Janana nime. Tueda emanu cristiano cuana sa jucha cuana edhipa puji.

<sup>37</sup> Juan sa ebuqueji detse ja daja id'aba putsu, Jesús tije apirutana tse. <sup>38</sup> Jesús jababarereati putsu, tuatseda tu tije epuhu batana. Da su uja atana tse:

—¿Ai metse echacuinia?

Da su jeutsutana tse uja:

—Ebuetsuaji, ¿quepia mique ete?

<sup>39</sup> Jesús ja jeutsutana tse:

—Mepueque eba puji.

Da su beju tu neje putiana tse quepia tu yani su. Beju tsinecua epuani putsu, Jesús buquetana tse yapuna teje.

<sup>40</sup> Tuatseda piada banime puina Andrés. Tueda da Simón Pedro sa edue puina. <sup>41</sup> Da su beju Andrés tipeida putiana mesa edue Pedro echacu puji. Tu tsu putsu, uja quisatana Pedro:

—Beju etseju Diosu sa Jabeituti Deja Cristo tejeitia.

<sup>42</sup> Da su Andrés ja Simón dusutana Jesús yani su. Jesús ja Simón ba putsu, uja atana:

—Mida Simón banime. Mida da Jonás sa ebacua. Jiahue jenetia beju mida Pedro banime epu.

### *Jesús ja Felipe, Natanael detse dharetana*

<sup>43</sup> Pia huenati Jesús putija puana Galilea yahua su. Da hora su Jesús ja Felipe tsutana. Tsu putsu, uja atana:

—Tije ema aque.

<sup>44</sup> Felipe da Andrés, Pedro detse sa ejude jenetia puina. Tueda ejude Betsaida banime puina. <sup>45</sup> Da su beju Felipe ja Natanael chacutitana. Tejeti putsu, uja quisatana Natanael:

—Baitia da ecuanaju piada deja Jesús banime. Tueda da José sa ebacua Nazaret ejude jenetia. Moisés chenu ja tu jepuiti deretaidha mesa jacuatsasiati quirica su. Diosu sa profeta chenu cuana ja di tu jepuiti deretaidha. Tueda da Diosu sa Jabeituti Deja.

<sup>46</sup> Da su Natanael ja atana:

—¿Ai saida cuana Nazaret ejude jenetia cuinana cua bata?

Felipe ja jeutsutana uja:

—Pueque eba puji.

Da su putiana tse Jesús eba puji.

<sup>47</sup> Beju Jesús ja Natanael enariatisiu ba putsu, uja atana:

—Hue upia epusiu deja israelita quitaita. Tueda da deja butsepi, jabaseati bue mahue.

48 Da su Natanael ja uja Jesús quisabatana:

—¿Cuaja ni miada ema eshanapainia?

Jesús ja tueda jeutsutana:

—Felipe ja mi ihuaji mahue su, yama mi baitia higuera equi ema su eneti mane, ema dapia mue neti biame.

49 Da su Natanael ja Jesús uja atana:

—Ebuetsuaji, ene putsu, mida da Diosu sa Ebacua. Mida da israelita cuana sa Echua Puji.

50 Da su Jesús ja tueda uja atana:

—Beju mida ema peje su jei epuani, “Yama mi higuera equi ema su eneti baitia”, yama mi aitia putsu. Beju yama ebia su aida nimetiuda ai cuana yayu miada eba.

51 ‘Ene putsu, yama pamapa micuana butsepi equisainia, cielo ed’ianeti jenetia Diosu sa ángel cuana butenuati, tsuanuati ema emebaja puji micuaneda eba.

## 2

### *Jahuaneti tsine Caná ejude su*

1 Quimisha tsine beju jaitianana su,

Caná ejude su jahuaneti tsine puana. Tueda Caná ejude da Galilea yahua su anina. Jesús sa cuara dapia tsine su anina.

2 Jesús di mesa discípulo cuana neje dapia anina. 3 Beju vino pupeana su, Jesús sa cuara ja tueda atana uja:

—Beju pupeitia vino.

4 Da su Jesús ja mesa cuara uja jeutsutana:

—Mama, be ema cuatsasiaji, quema hora cuinaji mahue putsu. Beju quema hora ecuina su, da su yama nimetiuda aida yayu.

5 Da su mesa cuara ja emebajaji cuana uja atana:

—Cuaja tuahueda micuana ecuatsasiatani, meaque.

6 Beju sucuta matu memahue cuana tumu jenetia ajiji netitaina. Tueda matu cuana dume su judío cuana yahui ichaseta bahue putaina mecuana sa jarucuati cuana puji, cuaja mecuana sa ai puiti cuana batame. Matu meamea ocho tunca ahua cien litro enubiani. 7 Da su beju Jesús ja emebajaji cuana uja cuatsasiatana:

—Mesejeaque pamapa ye matu cuana yahui neje.

Da su emebajaji cuana ja matu cuana sejeasaisiatana.

8 Beju sejeasaisiatana huecuana putsu, Jesús ja uja atana huecuana:

—Huai chidi metsehuaque. Medusuque tsine emetse peje su.

Da su beju daja atana huecuana. 9 Yahui vino puji japia-tiana. Tsine emetse ja id’ibatana vino. Bue mahue puina que jenetia tueda vino. Emebajaji cuana bahui bahue putaina,

matu cuana yahui neje sejeasaisiatana huecuana putsu. <sup>10</sup> Da su tsine emetse ja jahuanetaitia deja ihua putsu, uja atana:

—Pamapa cristiano cuana ja tsine cuana su vino saida equene eid'imetani. Ihuajiji cuana beju vino saida quita ebia su jaid'ititana su, tije vino saida mahue eid'imetani beju. Miada mu vino ebia su saida ichasetaitia tije su puji.

<sup>11</sup> Tueda nimetiuda aida Jesús ja atana Galilea yahua, Caná ejude su. Da neje Jesús ja mesa tucheda cristiano cuana equene bametana. Da hora jenetia mesa discípulo cuana tu peje su jei pupirutana.

<sup>12</sup> Da su beju Jesús putiana Capernaum ejude su. Mesa cuara, edue, discípulo cuana ja buquetana. Dapia Capernaum ejude su quejucua tsine puji anititana huecuana.

*Jesús ja iruiruji cuana templo jenetia jusiacuinatana*  
(Mateo 21.12-13; Marcos 11.15-18; Lucas 19.45-46)

<sup>13</sup> Da su beju Jesús Jerusalén ejude su putiana, judío cuana sa pascua tsine enariatiani putsu. <sup>14</sup> Dapia templo su juye, huisha, huaitucu cuana deja cuana ja eirutasa Jesús ja batana. Daja huecha cristiano cuana sa puji chipilu eturucalani batana. <sup>15</sup> Tueda ai cuana ba putsu, Jesús duininiana. Huacabiti a putsu, da neje templo jenetia jusiacuinatana huecuana pamapa. Iruiruji deja cuana, huisha, juye cuana, pamapa beju jusiacuinatana. Chipilu turucaji cuana sa chipilu yahua su huararajusiatana, mecuana sa misha cuana busiapa putsu. <sup>16</sup> Huaitucu iruji cuana Jesús ja uja atana:

—¡Mejemicuinaque pamapa ye ai cuana! ¡Quema Tata sa ete da aimue iruiru jude mahue!

<sup>17</sup> Mesa discípulo cuana ja ye ai cuana ba putsu, pibatana huecuana uja Diosu sa mimi epuani: “Diosu, mique ete yama ebia su erejainia.”

<sup>18</sup> Da su judío cuana ja Jesús quisabatana:

—¿Aiya mi huaratitana ye ai cuana daja ya puji?

<sup>19</sup> Jesús ja jeutsutana huecuana:

—Ahua micuaneda ye templo edajajame su, quimisha tsine jenetia yama neicha enetianameyu.

<sup>20</sup> Da su judío cuana ja uja atana:

—¿Ai miada ye templo quimisha tsine jenetia ape cua bata? Pushi tunca sucuta ejaitiana mara jenetia ecuanaju ye templo mudupeana.

<sup>21</sup> Beju Jesús daja mimiana mesa equita jepuiti. Aimue judío cuana sa templo jepuiti mimiana mahue. <sup>22</sup> Jesús id'eibana su, da su discípulo cuana japibatitana Jesús sa templo jepuiti mimi cuana su. Tueda mimi cuana su jei putana huecuana. Daja huecha Diosu sa derejiji mimi su jei putana huecuana.

<sup>23</sup> Beju Jesús Jerusalén ejude su tsine eba puji yani cama, jucuada ai nimetiuda cuana atana. Dueji cristiano cuana tu peje su jei putana, nimetiuda ai cuana batana huecuana putsu. <sup>24</sup> Daja biame, aimue Jesús sa cristiano cuana aini- etuche biame puana mahue, tuna sa muesumu madhada hue putsu. <sup>25</sup> Aimue detse aiya biame tueda quisata cua mahue cuaja cristiano cuana, tuahueda shanapasaisiasaisi- atana putsu.

### 3

#### *Jesús Nicodemo neje jatsutiana*

<sup>1</sup> Dapia piada fariseo anina. Tueda da

Nicodemo banime. Judío cuana sa ehuidusuji puina. <sup>2</sup> Jesús peje su dhidha su putiana. Cuinati putsu, uja atana Jesús:

—Ebuetsuaji, bahue ecuanaju mida Diusu peje jenetia pueana ecuanaju ebuetsua puji. Bahue ecuanaju Diusu mi neje yani, miada nimetiuda aida cuana yainia putsu.

<sup>3</sup> Da su Jesús ja tueda uja atana:

—Ene putsu, yama mi butsepi equisainia, ahua etse cielo su Diusu neje anienitija su, neicha eichacua bataji epuani nime etse sa pu taji.

<sup>4</sup> Da su Nicodemo ja Jesús quisabatana:

—¿Cuaja ni da deja neicha bataji pu cua? ¿Ai deja mesa cuara sa edhe su nubiti putsu, neicha bataji pu cua bata?

<sup>5</sup> Jesús ja Nicodemo jeutsutana:

—Ene putsu, yama mi butsepi equisainia, ahua etse cielo su Diusu neje anienitija su, equene nimeeichacua pu taji, quema quisa cuana su jei pu putsu. Espíritu Santo di mesa ani taji.

<sup>6</sup> Quebata tata, cuara peje jenetia bataji epuani su, tueda da tuatse sa ebacua. Quebata mu Espíritu Santo ja nimeeichacua yametani su, tueda da Diusu sa ebacua. Tu neje cielo su yanienitiyu. <sup>7</sup> Be nimetiui, daja mi yama equisainia putsu. Pamapa sa neicha eichacua bataji epuani nime pu taji, ahua cielo su nubija su. <sup>8</sup> Beni epuani que jenetia papu. Etse eid'abainia etsatiani bahui. Beju da aimue bataji mahue. Bue mahue etse que jenetia epueni, daja huecha quepia epuhu. Daja nime da Espíritu Santo. Aimue etse tueda ebainia mahue biame, Espíritu Santo ja cristiano cuana neicha nimeeichacua bataji yametani.

<sup>9</sup> Da su Nicodemo ja Jesús quisabatana:

—¿Cuaja ni da ye ai cuana pu cua?

<sup>10</sup> Jesús ja tueda jeutsutana:

—¿Cuaja ni mida ye ai cuana bue mahue, israelita cuana sa ebuetsuaji aida biame? <sup>11</sup> Ene putsu, ema bahue ai cuana, yama bana ai cuana di yama mi equisainia biame, aimue

mida quema quisa cuana su jei epuani mahue. <sup>12</sup> Yama mi ye mundo sa ai cuana equisainia biame, aimue mida ema peje su jei epuani mahue. Da su, ¿cuaja detse mi ema peje su jei pume pu cua, ahua cielo jenetia ai cuana yama mi equisa su?

<sup>13</sup> ‘Aimue aidhe biame cielo su tsuatiana mahue, jasiapati putsu, cuaja yani cristiano cuana equisa puji. Beju ema da Diosu sa Jabeituti Deja. Ema mu cielo jenetia pueana cristiano cuana cuaja yani equisa puji. <sup>14</sup> Biahua tiempo Moisés chenu ja bacua eimea jemitsuataidha d'anita yahua su, cristiano cuana ja bacua chama putsu, pasaisitayu huecuana puji, ahua bacua ja ediatani huecuana su. Bacua ja ediatani cuana saisitaidha, bacua eimea chama putsu. <sup>15</sup> Daja huecha ema ejemitsuatayu huecuana. Quebata ema peje su jei epu su, tueda cielo su eid'e epuenitiyu.

*Diosu ja pamapa cristiano cuana ibuneda ebatani*

<sup>16</sup> ‘Tata Diosu ja pamapa cristiano cuana ebia su ibuneda batana putsu, mesa piada quita ebacua ye mundo su beitungana mecuana sa jucha cuana jepuiti emanu puji. Quebata tu peje su jei epuani su, aimue matsejiji epu mahue. Tueda da d'eji su pu putsu, cielo su Diosu neje eid'e yanienitiyu. <sup>17</sup> Aimue Diosu ja mesa Ebacua beitu ye mundo su cristiano cuana ematse puji mahue. Tueda beitungana cristiano cuana d'eji su paputa puji, tu peje su jei pu putsu.

<sup>18</sup> ‘Quebata Diosu sa Ebacua peje su jei epu su, aimue tueda Diosu ja ematsetayu mahue. Quebata mu Diosu sa Ebacua peje su jei puja mahue su, tueda da beju matsejiji epu, aimue Diosu sa piada quita Ebacua peje su jei puana mahue putsu. <sup>19</sup> Diosu sa Ebacua da hueda nime mundo su pueana cielo jenetia. Pamapa tu peje su jei eputani mahue cuana da matsejiji epu, aimue ai saida cuana aja mahue atana huecuana putsu. Ai madhada cuana bahui mecuana sa tsada ya puji. Tuneda da apuda su yasetaniuneti cuana nime. <sup>20</sup> Pamapa ai madhada yatani cuana sa tsada mahue Diosu sa jabuetsuati cuana. Tuneseda tsada mahue pia ja, “Micuaneda mu jucha bahui yainia”, ataja mahue. Beju tuneda da apuda su ai madhada aji cuana nime. Tsada mahue mecuana sa cristiano cuana ja ebata tuna apuda su ai madhada yatani cuana. <sup>21</sup> Beju ai saida yatani cuana mu Diosu sa ai tsada cuana bahui yatani, cristiano cuana ja tuneda ai saida cuana yatani pabata huecuana puji. Tuneda da hueda su ai saida aji cuana nime.

*Juan Bautista neicha Jesús jepuiti mimiana*

<sup>22</sup> Da su beju Jesús Jerusalén ejude jenetia cuinanana. Mesa discípulo cuana neje putiana Judea yahua su. Dapia quejucua tsine anitiana huecuana. Cristiano cuana Diosu sa puji yahui

neje ichaderatana huecuana. <sup>23</sup> Juan Bautista ja di cristiano cuana yahui neje Diusu sa puji ichaderatana Enón banime eti jude su, dapia ena aida saina putsu. Tueda Enón eti jude da Salim banime ejude naja su anina. Da su cristiano cuana dapia putitana Juan ja yahui neje Diusu sa puji paichaderata huecuana puji. <sup>24</sup> Tueda ai cuana da daja puana, Juan Bautista teriichaji mahue su.

<sup>25</sup> Beju pia judío cuana Juan sa ebuqueji cuana neje jacuicuinapirutitana jarucuati ai cuana jepuiti. <sup>26</sup> Da su ebuqueji cuana ja uja quisatana Juan:

—Ebuetsuaji, tueda deja mi neje Jordan ena chu maje aniana ja jiahue cristiano cuana eichaderatani yahui neje. Pamapa ja tueda tije yatani beju.

<sup>27</sup> Da su Juan ja jeutsutana huecuana uja:

—Diusu ja pamapa saida yatani. Tuahueda bahui ecuana eichatani cuaja mesa tsada. <sup>28</sup> Mepibaque yama micuana quisana ai cuana. Aimue ema Cristo mahue. Tu hui su ema Diusu ja beitutana. <sup>29</sup> Jahuaneti tsine su yahueti epuna da yahue sa puji bahui. Aimue mesa eshanapa sa puji mahue. Yahue sa eshanapa dapia tu neje beidaji yani. Cuaja eshanapa yahue neje beidaji epuani nime, daja da ya di ebia su beidaji, cristiano cuana ja Cristo tije yatani putsu. <sup>30</sup> Tueda da ebia su aida papu beju. Ema mu mue ai eni mahue papu.

### *Jesucristo cielo jenetia pueana*

<sup>31</sup> Jesucristo da cielo jenetia pueana putsu, pamapa cristiano cuana ebia su aida. Cristiano cuana ja ye mundo sa ai cuana jepuiti bahui emimitani. <sup>32</sup> Beju tuahueda mu cielo su batana, id'abatana ai cuana cristiano cuana equisatani, tueda da jenetia putsu. Beju daja biame, mue aidhe biame tu peje su jei pu. <sup>33-34</sup> Tuahueda Diusu sa ene quita mimi cuana equisatani, Diusu ja tueda beitutana putsu. Da su quebata tusa mimi cuana su jei epuani su, tuahueda Diusu butsepi ebametani. Diusu sa Jabeituti Deja ja Diusu sa ene quita quisa cuana equisatani, Diusu ja mesa Espíritu Santo tucheda tueda tiatana putsu. <sup>35</sup> Tata Diusu ja mesa Ebacua ebia su ibuneda ebatani putsu, pamapa ai cuana tu ema su ichatana. <sup>36</sup> Quebata Diusu sa Ebacua peje su jei epu su, tueda cielo su eid'e epueniti Diusu neje. Quebata tu peje su jei puja mahue epu su, aimue cielo su eid'e epuenitiyu mahue. Diusu ja tueda cuati castigo jude su ebeitutayu, tu neje ebia su eduininiani putsu.

## 4

*Jesús ja mitsutana epuna Samaria yahua su*

<sup>1-2</sup> Fariseo cuana ja beju id'abatana

Jesús sa ebuqueji cuana da Juan Bautista sa ebia su dueji. Aimue Jesús quitaita ja cristiano cuana Diosu sa puji ichaderatana mahue. Mesa discípulo cuana ja bahui cristiano cuana Diosu sa puji ichaderatana yahui neje. <sup>3</sup> Da su Jesús ja fariseo cuana ja id'abatana shanapa putsu, Judea yahua jenetia cuinanana Galilea yahua su eputi puji.

<sup>4</sup> Samaria yahua je mesa jaitiana taji puina Galilea yahua su ecuinati puji. <sup>5</sup> Beju Sicar banime ejude su Samaria yahua su cuinatiana. Biahua tiempo Jacob chenu ja yahua ped'u mesa ebacua José chenu tiataidha Sicar ejude naja su. <sup>6</sup> Dapia yahua ped'u su yahui rara dueda anina. Tueda Jacob sa yahui rara banime puina. Jesús da jaduitijiji cuinana putsu, yahui rara queque su aniuteana. Beju buepatia yeuque puina. <sup>7-8</sup> Mesa discípulo cuana ejude su putitana ai dia taji cuana ebajati puji. Beju putitana su, piada epuna yahui rara su pueana yahui ejemitsua puji. Da su Jesús ja tueda uja atana:

—Tiaque ema yahui.

<sup>9</sup> Da su beju epuna ja Jesús quisabatana:

—Mida da judío biame, miada ema yahui ebajainia. ¿Cuaja ni da miada ema emitsuinia, ema da samaritana biame?

(Judío cuana sa mu aimue ai biame a taji samaritano cuana neje.) <sup>10</sup> Da su Jesús ja jeutsutana:

—Epuna, ahua mida Diosu sa ai saida yani miqueda puji bahue pu cua su, ahua miada aidhe neje mi emitsutiani shanapa cua su, da su miada ema baja cua. Miada ema baja cua su, yama mi eid'e jaametiji yahui etia.

<sup>11</sup> Da su epuna ja Jesús uja atana:

—Deja, aimue mique emeji. Ye yahui rara mu dueda. ¿Que jenetia detse miada ema tia cua yahui ema eid'e epu puji? <sup>12</sup> Beju ecuana sa tata Jacob chenu ja ye yahui rara ichajusiataidha ecuana sa puji. Ye yahui rara jenetia tueda id'itaidha. Tusa ebacua cuana ja di u jenetia id'itaidha. Tusa animalo cuana ja di id'itaidha. ¿Ai mida tu ebia su aida bata?

<sup>13</sup> Da su Jesús ja jeutsutana uja:

—Pamapa ja ye yahui eid'ita biame, neicha jaid'itija huecuana epu. <sup>14</sup> Quebata ja mu yama etia yahui eid'ita su, tueda da aimue jaid'itija epuicha mahue. Tueda yama etia yahui da tusa enime su ena putiputi nime epu. Tueda yama etia yahui da eid'e jaametiji.

<sup>15</sup> Da su beju epuna ja Jesús uja bajatana:

—Deja, tiaque ema tueda yahui ema jaid'itija epuicha mahue puji, aimue ye yahui rara su yahui ejemitsua puji epueicha mahue puji.

<sup>16</sup> Da su Jesús ja atana uja:

—Ihuatique mique yahue. Duseque upia.

17 Epuna ja jeutsutana:

—Ahue mahue ema.

Da su Jesús ja uja atana epuna:

—Enei hue mi emimiani. Aimue mique yahue yani mahue.

18 Beju pishica mique yahue cuana anina. Jiahue mi edusu deja mu aimue mique yahue mahue.

19 Epuna ja ye mimi id'aba putsu, Jesús uja atana:

—Da su mida jia da Diosu sa profeta. <sup>20</sup> Ecuanaaju sa tata samaritano chenu cuana ja upia ye emata su Diosu mitsutsuataidha. Beju judío cuana mu, “Jerusalén ejude su bahui cristiano cuana ja Diosu mitsutsua taji”, eputani. Da su, ¿quepia ni da ecuanaju sa mitsutsua taji Diosu?

<sup>21</sup> Da su Jesús ja jeutsutana:

—Epuna, jei puque quema mimi su. Tiempo beju ecuina micuaneda aimue ye emata su, Jerusalén ejude su biame eputi mahue Diosu emitsutsua puji. Quepia papu etse yani su Diosu mitsutsua taji. <sup>22</sup> Micuaneda samaritano cuana ja mue Diosu shanapa. Ecuanaaju judío cuana ja mu beju Diosu eshanapaeninia. Diosu ja piada judío deja dharetana cristiano cuana d'ejí su paata puji. <sup>23</sup> Beju jiahue jenetia da Diosu mitsutsuaji cuana ja mecuana sa muesumu su bahui Diosu emitsutsuata. Daja da Diosu sa tsada. <sup>24</sup> Diosu da Espíritu. Da su tu mitsutsuaja cuana ene quita mecuana sa muesumu su mitsutsua taji. Cuaja tusa mimi epuani batame, mitsutsua taji.

<sup>25</sup> Da su epuna ja Jesús atana:

—Beju bahue ema Diosu sa Jabeituti Deja epue cristiano cuana d'ejí su ya puji. Tueda da Cristo banime. Beju tu epue su, ecuanaju pamapa saida equisaenita.

<sup>26</sup> Da su Jesús ja epuna uja atana:

—Tueda da ema.

<sup>27</sup> Da hora su beju discípulo cuana cuinatana. Nimetiunetitanahuecuana, Jesús epuna neje quisaquisa epuneti ba putsu. Mue quebata biame tuneda quisa baja a, ai epuna sa tsada puana, ai jepuiti quisquisapunetina tse. <sup>28</sup> Da su epuna ja yahui matu jusianetia putsu, ejude su putibana. Dapia cristiano cuana quisapirutana uja:

<sup>29</sup> —Meputija piada deja eba puji. Tuahueda pamapa yama ana ai madhada cuana ema butsepi quisataitia. ¿Aimue jia maida tueda Diosu sa Jabeituti Deja mahue?

<sup>30</sup> Da su pamapa ejude su aniji cristiano cuana Jesús yani su putitana. <sup>31</sup> Cristiano cuana tu peje su cuinaji mahue su, discípulo cuana ja Jesús uja atana:

—Ebuetsuaji, diadiaque.

<sup>32</sup> Beju Jesús ja jeutsutana huecuana:



—Quema mu yani jana ebia su saida mue micuaneda shanapa.

<sup>33</sup> Da su discípulo cama jaquisabatitana uja:

—¿Aiya jia da beju mihuataitia?

<sup>34</sup> Jesús ja mecuana sa jaquisabati cuana shanapa putsu, uja atana huecuana:

—Diusu sa tsada mudu cuana yape bahui quema puji jana pu cua nime. <sup>35</sup> Micuaneda mimi bahue uja: “Pushi badi yani hue tsuhu ehuiruhuru puji.” Beju yama mu micuana yainia, jiahue da huiruhuru tiempo. Daja huecha micuaneda, “Aimue cristiano cuana Jesús peje su jei eputa mahue tsuhu”, epuani biame, yama mu micuana equisainia, jiahue quita ema peje su jei eputayu huecuana. <sup>36</sup> Quebata ehuiruhuruta cuana chujetiajiji eputa. Daja huecha banabanaji cuana chujetiajiji eputa. Beju beidaji eputa huecuana echuje neje. Daja huecha ema jepuiti quisaquisa eputani cuana, cristiano cuana ema peje su jei yametani cuana neje tupupai beidaji eputa, cristiano cuana d'ejí su eputa ebata huecuana su. <sup>37-38</sup> Micuana equene pia cuana da cristiano cuana ema jepuiti quisquisa pupirutana. Tuneda da banabanaji cuana nime. Jiahue yama micuana ebeitu cristiano cuana peje su ema peje su jei yame huecuana puji. Micuaneda da huiruhuruji cuana nime. Ene quita ecuana sa mimi nime uja epuani: “Piada piada cuana ja ebanatani. Pia cuana ja ehuirutani.”

<sup>39</sup> Da su beju dueji ejude su aniji cristiano cuana Jesús peje su jei putana, epuna ja daja quisatana huecuana su. <sup>40</sup> Cristiano cuana Jesús yani su cuinatana su, uja jubida bajatana huecuana:

—Upia ecuanaju neje anitique.

Da su Jesús beta tsine anitiana tuna neje. <sup>41</sup> Ebia su jucuada cristiano cuana tu peje su jei putana, tusa quisa cuana id'aba putsu. <sup>42</sup> Da su tuneda epuna uja atana:

—Beju jiahue ecuanaju Jesús peje su jei epuani, tusa quisa cuana quitaita id'aba putsu. Aimue mique quisa su bahui mahue ecuanaju jei epuani. Beju da ecuanaju bahue, ene quita da tueda Diusu sa Jabeituti Deja. Tueda da ye mundo su aniji cuana D'ejí su Aji.

### *Jesús ja huaraji sa ebacua saisiametana*

<sup>43-44</sup> Beta tsine jaitianana su, Jesús Samaria yahua jenetia cuinanana Galilea yahua su eputi puji, dapia bataji puana putsu. Beju Jesús uja puana, “Diusu sa profeta aimue saida ebatani huecuana mahue tusa ejude quitaita su.” <sup>45</sup> Jesús Galilea yahua su cuinati putsu, dapia cristiano cuana ja tueda saida batsutana, tuahueda Jerusalén ejude su pascua tsine

su nimetiuda aida cuana yatani batana huecuana putsu. Da putsu, Jesús saida batsutana huecuana.

<sup>46-47</sup> Da su beju Jesús Caná ejude su jasiapatiana. Tueda ejude da Galilea yahua su anina. Tueda ejude su Jesús ja yahui vino su tsapiatana. Piada deja huaraji aida Capernaum ejude jenetia Caná ejude su putiana, Jesús dapia yani shanapa putsu. Mesa ebacua nedaji emanu piba Capernaum ejude su saina. Tu peje su cuinati putsu, Jesús uja bajatana:

—Putique quema ete su quema ebacua emanu piba esa esaisiame puji.

<sup>48</sup> Da su Jesús ja uja atana:

—Yama nimetiuda aida cuana yainia jepuiti bahui micuaneda ema peje su jei epuani.

<sup>49</sup> Beju deja huaraji ja Jesús neicha jubida bajatana:

—Echua Puji, tipeique. Beju quema ebacua emanu.

<sup>50</sup> Da su Jesús ja atana:

—Jasiapatique mique ete su. Beju mique ebacua saida.

Da su beju deja jasiapatibana mesa ete su, Jesús peje su jei pu putsu. <sup>51</sup> Beju mesa ete su ecuinabuyu su, mesa emebajaji cuana ete jenetia cuinanatana tu emitsu puji. Uja deja quisatana huecuana:

—Beju mique ebacua mu saida.

<sup>52</sup> Da su deja ja quisabatana huecuana:

—¿Ai hora su ni da quema ebacua saisipiruja puicha?

Da su jeutsutana huecuana:

—Mueta buepatia badeute chidi saisipiruja puicha.

<sup>53</sup> Da su deja japibatiana uja: “Enei hue, da hora su Jesús ja, ‘Beju mique ebacua saida’, ema ata puicha.” Da su beju deja Jesús peje su jei puana pamapa mesa familia neje.

<sup>54</sup> Beju tueda da Jesús sa beta puji nimetiuda aida, Galilea yahua su cuinati putsu.

## 5

### *Jesús ja deja ase bue mahue saisiametana*

<sup>1</sup> Da su Jesús Jerusalén ejude su jasiapatiana judío cuana sa tsine eba puji. <sup>2</sup> Ejude tipe je pirica aida, baqui bauta tumu jenetia ajiji anina. Pirica sa eteriji cuana anitana. Piada banime Huisha Eteriji. Tueda eteriji naja su rara aida yahui eseje anina. Tueda yahui rara banime Betesda. Equeque je beju pishica ania chidi tambo cuana anitaina. <sup>3</sup> Dapia dueji nedaji cuana sataina yahui ecuamucamu eid'ua puji. Padha, tida, ase bue mahue cuana beju dapia sataina. <sup>4</sup> Uja mecuana sa piba puina: “Piada piada hora cuana su Diosu sa ángel bute putsu, yahui rara ehuarusiapa bahue. Da su yahui ehuarusiapatani su, nedaji cuana sa yahui su tipeida

nubi taji. Piada nedaji bahui equene yahui su enubiani su, tueda beju saisi cua.” Daja mecuana sa piba puina. <sup>5</sup> Beju dapia piada deja ase bue mahue saina. Quimisha tunca ocho ejaitiana maraji beju nedaji. <sup>6</sup> Jesús ja tueda deja esa batana putsu, shanapatana dajucua mara nedaji saina. Da su Jesús ja deja quisabatana uja:

—¿A da mida saisisja?

<sup>7</sup> Nedaji ja tueda jeutsutana:

—Ehe, tata. Beju mue da quema aidhe biame ema yahui su enubiameta puji, ángel ja yahui ehuarusiapatani su. Pamapa nuati ema nubija epudhaani. Beju pia nedaji ema equene enubiani.

<sup>8</sup> Da su Jesús ja uja cuatsasiatana deja:

—Netianaque. Jemitsuaque mique masha. Beju aseque.

<sup>9</sup> Da hora quitaita su hue beju saisiana. Masha jemitsua putsu, asepiruana. <sup>10</sup> Beju dapia judío cuana sa ehuidusuji cuana deja saisisiji neje duininitana, masha jemitsuatana janahua tsine su putsu. Uja deja atana huecuana:

—Jiahue mu janahua tsine putsu, aimue mique masha abu taji mahue. Aimue mique mudumudu taji mahue janahua tsine su, daja jacuatsasiati yani putsu.

<sup>11</sup> Da su deja ja jeutsutana huecuana:

—Beju ema saisiameji deja ja uja ema cuatsasiataitia: “Jemitsuaque mique masha. Beju aseque.”

<sup>12</sup> Da su quisabatana huecuana:

—¿Aiya mida daja cuatsasiataitia?

<sup>13</sup> Beju deja ja tu cuatsasiaji cuaja bame taji mahue batana, Jesús da hora su taitanana dueji cristiano cuana duju su putsu. <sup>14</sup> Pia tsine deja saisisiji Jesús ja tsutana templo su. Uja atana deja:

—Jiahue mi beju saida. Be neicha jucha puji. Daja mahue su, ebia su mida epu.

<sup>15</sup> Da su beju deja saisisiji judío cuana sa ehuidusuji cuana peje su putiana tuna equisati puji. Uja quisatana huecuana:

—Tueda ema saisiameji deja da Jesús banime.

<sup>16</sup> Da su beju da hora jenetia judío cuana sa ehuidusuji cuana Jesús manuameja apirutana, Jesús ja janahua tsine su cristiano cuana saisiametana putsu. <sup>17</sup> Da su Jesús ja judío cuana sa ehuidusuji cuana uja atana:

—Beju jiahue teje quema Tata Diosu ja tusa ai tsada cuana bahui yatani. Yama di daja huecha yainia, etseju tupupai yani putsu.

<sup>18</sup> Da putsu beju, judío cuana sa ehuidusuji cuana ja ebia su manuameja atana Jesús, tueda Tata Diosu neje tupupai puana putsu, Diosu da tusa tata quitaita puana putsu.

*Diusu ja mesa Ebacua huaratiatana*

<sup>19</sup> Da su Jesús ja judío cuana sa ehuidusuji cuana uja atana:

—Ema da Diusu sa Ebacua biame, aimue quema tsada cuana bahui yainia mahue. Quema Tata Diusu ja yatani ai cuana yama ebainia bahui yainia. <sup>20</sup> Quema Tata ja ema ebia su ibuneda ebatani putsu, pamapa tuahueda ai yatani cuana ema ebametani. Tuahueda ema ebia su aida ai nimetiuda cuana ebameta yama ya puji, micuaneda enimeti puji. <sup>21</sup> Cuaja quema Tata ja manujiji cuana eid'e yametani nime, daja huecha yama di quebata quema tsada cuana eid'e yame. <sup>22</sup> Quema Tata ja aimue cristiano cuana ejuzgata mahue. Ema mu huaratiatana cristiano cuana ejuzga puji. <sup>23</sup> Da putsu, cristiano cuana ja quema Tata eiyubatani nime, daja huecha ema eiyubata huecuana. Quebata ja aimue ema eiyubatani mahue, aimue quema Tata di eiyubatani mahue, tuahueda ema beitutana putsu.

<sup>24</sup> Ene putsu, yama micuana equisainia, quebata ja quema mimi cuana eid'abata, ema beituji peje su di jei epu su, tueda da d'ejí su epu. Cielo su eid'e yanienitiyu. Aimue Diusu ja tueda ematsetayu mahue. <sup>25</sup> Ene putsu, yama micuana equisainia, beju hora cuinaitia cristiano cuana ja quema quisa cuana paid'abata puji. Quebata quema quisa cuana su jei epu su, tueda eid'e epueni. <sup>26</sup> Quema Tata ja cristiano cuana eid'e ameenita cua. Yama di cristiano cuana eid'e ameeni cua, quema Tata Diusu da puji ema huaratiatana putsu. <sup>27</sup> Daja huecha ema huaratiatana cristiano cuana ejuzga puji, ema da Diusu sa Jabeituti Deja putsu. <sup>28</sup> Be menimetiuji, yama daja yainia su. Beju hora ecuina pamapa manujiji cuana ja quema etsui eid'abata puji. <sup>29</sup> Pamapa manujiji cuana sepulcro cuana jenetia enetianatayu. Pamapa ai saida atana cuana da Diusu neje cielo su eid'e epuenitayu. Pamapa ai madhada atana cuana mu Diusu ja ematsetayu.

*Jesús da huaraji aida Diusu peje jenetia*

<sup>30</sup> 'Aimue yama quema piba jenetia yainia mahue. Cuaja quema Tata ja ema equisatani, daja yama cristiano cuana equisainia. Yama yainia ai cuana da butsepi, Diusu sa tsada bahui yama yainia putsu. Da putsu, yama cristiano cuana butsepi ejuzgainia. Diusu ja ema ye mundo su beitutana. <sup>31</sup> Aimue yama quema puji bahui equisanetiacuainainia mahue. Ahua daja yama a cua su, aimue chujeji mahue. <sup>32</sup> Beju pia yani ema quisanetiacuainaji. Tueda jei a taji, ema jepuiti ene quita, butsepi emimiani putsu.

<sup>33</sup> Jesús ja daja hue quisainiame atana ehuidusuji cuana:

—Beju micuaneda Juan Bautista quisabameana. Tuahueda butsepi micuana jeutsutana. Quema puji saida quisaneti-acuinatana. <sup>34</sup> Juan sa quisa ema jepuiti beju butsepi biame, quema mu tsada mahue quebata deja ja ema equisaneti-acuinata puji. Daja biame, ahua micuaneda Juan sa ema jepuiti quisa su jei epu su, beju d'eji su epu. <sup>35</sup> Juan sa quisa cuana da hueda nime micuaneseda puji. Ahua etse sa hueda yani su, da su apuda su etse saida ase cua. Daja huecha Juan ja micuana cuaja Diosu peje su janariatime pu cua quisatana. Ubu hora hue micuaneda beidaji neje id'abana. <sup>36</sup> Beju jiahue ema upia yani Juan ebia su aida. Tata Diosu quitaita ja ema huaratiatana ye ai nimetiuda aida cuana ya puji. Micuaneda bahue Tata Diosu ja ema beitutana, yama ai nimetiuda aida cuana yainia ba putsu. <sup>37</sup> Tata Diosu quitaita ja ema equisaneti-acuinatani. Tuahueda quitaita ema beitutana. Micuaneda quetsunu su biame tueda id'aba bue mahue, quetsunu su biame tueda ba bue mahue. <sup>38</sup> Aimue micuaneda Diosu peje su jei epuani mahue, quema quisa cuana su jei puja mahue putsu. Beju tuahueda quitaita ema beitutana. <sup>39</sup> Micuaneda Diosu sa quirica yanacane jubida emimiamenia. Tueda quirica su micuaneda cuaja eid'e epueni echacuinia. <sup>40</sup> Beju tueda quirica ja ema equisaneti-acuinatani biame, aimue micuaneda ema peje su jei puja mahue epuani eid'e epueni puji.

<sup>41</sup> 'Quema mu tsada mahue cristiano cuana ja ema aida pabata. <sup>42</sup> Yama eshanapaenia aimue micuaneda Diosu ibuneda ebainia mahue. <sup>43</sup> Ema Tata Diosu ja beitutana biame, beju micuaneda aimue ema batsuja yainia mahue. Ahua pia micuana peje su epue, Diosu ja beituji mahue biame, micuaneda saida ebatsu. <sup>44</sup> Micuaneda cama bahui huamahuama saida jabatija. Ahua Diosu ja micuana saida ebata, ahua mahue, beju micuaneseda puji mu mue ai biame piba. ¿Cuaja detse micuaneda ema peje su jei pume pu cua, daja a putsu? <sup>45</sup> Beju aimue quema puji micuana tuaquisa taji mahue quema Tata Diosu butse su. Moisés chenu quitaita ja micuana etuaquisata Diosu butse su, micuaneda tusa jacuatsasiati cuana su enimeid'uadhaatiani putsu. <sup>46</sup> Ahua micuaneda Moisés sa jadereti cuana su jei puana su, ema peje su di micuaneda jei pu cua, tuahueda ema jepuiti deretaidha putsu. <sup>47</sup> Ahua aimue micuaneda Moisés chenu sa jadereti cuana su jei epuani mahue su, ¿cuaja ni da micuaneda yama equisainia ai cuana su jei pume pu cua?

Daja Jesús ja judío cuana sa ehuidusuji cuana quisatana.

*Jesús ja pishica mil deja cuana mihuatana*  
(Mateo 14.13-21; Marcos 6.30-44; Lucas 9.10-17)

<sup>1</sup> Da su beju pia tsine Jesús Galilea bai chu maje anipetutiana. Tueda huecha Tiberias banime puina. <sup>2</sup> Dueji cristiano cuana ja tije atana, Jesús ja piapiati nedaji cuana saisi ametana batana huecuana putsu. <sup>3</sup> Da su Jesús mesa discípulo cuana neje murucu aida su tsuatiana tuna neje yaninuati puji. <sup>4</sup> Judío cuana sa pascua tsine beju hue quita puina. <sup>5</sup> Jesús ja dueji cristiano cuana tu yani su eputasiu ba putsu, uja Felipe quisabatana:

—¿Quepia ni da ecuaneda jana ebaja pamapa ye cristiano cuana emihua puji?

<sup>6</sup> (Daja Jesús ja Felipe atana cuaja tu ejeutsuti eba puji. Jesús mu da bahue saisia puina cuaja cristiano cuana mihuame ya.)

<sup>7</sup> Da su Felipe ja uja jeutsutana Jesús:

—Beju beta cien mudu tsine echuje tupu mahue, pan baja putsu, ye cristiano cuana emihuape puji.

<sup>8</sup> Da su Simón Pedro sa edue Andrés ja Jesús atana:

<sup>9</sup> —Hue upia yanana chidi sa pishica pan chidi cuana, beta se chidi detse bahui yani. Beju, ¿ai detse ye chidi tupu pu cua dajucua cristiano cuana sa? <sup>10</sup> Da su Jesús ja discípulo cuana cuatsasiatana uja:

—Cristiano cuana meaniutemeque.

Dapia eti jude da nutsaji puina putsu, pamapa su beju aniutetana. Pishica mil deja cuana anitaina. <sup>11</sup> Da su Jesús ja pan pishica inatana. Diosulupai Tata Diosu a putsu, pan cuana discípulo cuana tiatana cristiano cuana paberereatiata huecuana puji. Daja huecha atana se detse. Pan, se eberereatiatani huecuana cama, jajucuatiana. Pamapa su diadiatana tupu. <sup>12</sup> Beju sejetana huecuana su, Jesús ja discípulo cuana cuatsasiatana:

—Mechuduque puchu cuana ai biame pasituti mahue puji.

<sup>13</sup> Da su jana puchu chudutana huecuana. Piada tunca beta ejaitiana d'iti cuana sejeatana huecuana. <sup>14</sup> Da su cristiano cuana ja Jesús ja atana ba putsu, uja putana huecuana:

—Enei hue, ye da Diosu sa profeta ecuaneda eid'uainia.

<sup>15</sup> Da su Jerusalén ejude su Jesús dusuja adhaatana huecuana mecuana sa echua puji ya puji. Jesús ja mu daja tuna sa piba shanapa putsu, tuna peje jenetia netiderana. Murucu aida cuana duju su putiana tu mehua yaniti puji.

*Jesús ena bia je aseana*  
(Mateo 14.22-27; Marcos 6.45-52)

<sup>16</sup> Tueda dhidha su discípulo cuana bai su butetana. <sup>17</sup> Jesús cuinaji mahue ba putsu, canoa aida dume su nubitana huecuana bai epetua puji, dhidha cuinaitia beju putsu. Capernaum ejude su cuinatija putana huecuana. Tueda ejude da bai chu maje anina. <sup>18</sup> Beju tuna yanipetutahu su, beni jubida pupiruana. Ena beju aida netianana. <sup>19</sup> Tuna pishica ahua sucuta kilómetro uquedame tupu su, ena bia je quita hue yasesiu Jesús batana huecuana. Beju jubida rubutanapirutana huecuana. <sup>20</sup> Da su Jesús ja atana huecuana uja:

—¡Ema hue! ¡Be merubutanaji!

<sup>21</sup> Da su beidaji neje Jesús batsutana huecuana canoa dume su. Da hora quitaita hue beju canoa satsuana tuna eputahu yahua su.

### *Cristiano cuana ja Jesús batana*

<sup>22</sup> Beju ehuenani su, Jesús ja mihuatana cristiano cuana da quepia Jesús ja mihuatana huecuana eti jude su putitana Jesús echacuti puji, Jesús mue anipetuti discípulo cuana neje batana huecuana putsu. <sup>23</sup> Beju tuna dapia quisaquisa epuneti cama, pia canoa aida cuana dapia satsuatana. Tueda canoa cuana da Tiberias ejude jenetia puetana. Tueda ejude da bai u maje chuadera anina. <sup>24</sup> Da su cristiano cuana Jesús, discípulo cuana di mue dapia ani bahue pu putsu, anipetutitana huecuana canoa aida cuana su Jesús echacuti puji. Capernaum ejude su putitana huecuana.

### *Jesús da cielo jenetia eid'e jaametiji pan nime*

<sup>25</sup> Cristiano cuana Jesús yani su cuinati putsu, uja tueda quisabatana huecuana:

—Ebuetsuaji, ¿quetsunu mi cuinana upia?

<sup>26</sup> Da su Jesús ja jeutsutana huecuana:

—Ene putsu, yama micuana equisainia, micuaneda ema echacuina, yama micuana saida mihuana putsu. Aimue micuaneda ema chacu, ema peje su jei puja putsu mahue. <sup>27</sup> Be mechacuji epupe jana. Mechacunque pupe fue mahue jana. Tueda jana ja micuana Diusu peje su eid'e yameenitayu. Tueda jana yama etiainia, ema Diusu sa Jabeituti Deja putsu. Da puji Tata Diusu ja ema ye mundo su beitutana.

<sup>28</sup> Da su tuneda Jesús quisabatana:

—¿Ai ni da ecuanaju a cua Diusu beidaji yame puji?

<sup>29</sup> Jesús ja jeutsutana huecuana:

—Diusu sa tsada micuaneda mesa Jabeituti Deja peje su jei epu puji.

<sup>30</sup> Da su Jesús uja quisabatana huecuana:

—Aque pia nimetiuda aida ecuanaju mi peje su jei epu puji.

<sup>31</sup> Ecuana sa tata chenu cuana ja cielo jenetia pan nime maná

banime diataidha pamapa tsine d'anita yahua su. Uja Diosu sa quirica derejiji yani: “Moisés chenu ja maná cielo jenetia tiataidha padiata huecuana puji.”

<sup>32</sup> Da su Jesús ja atana huecuana:

—Ene putsu, yama micuana equisainia, aimue Moisés chenu ja tata chenu cuana maná jana cielo jenetia tiataidha mahue. Quema Tata Diosu ja mu tiataidha huecuana. Jiahue beju quema Tata ja micuana eid'e jaametiji pan etiatani.

<sup>33</sup> Cuaja biahua tiempo su Diosu ja maná jana cielo jenetia tata chenu cuana tiataidha ediadia puji nime, daja da ema jiahue beitutana. Ema da maná jana cielo jenetia nime. Quebata quema quisa saida cuana su jei epu su, eid'e Diosu neje cielo su epueni.

<sup>34</sup> Da su Jesús atana huecuana uja:

—Echua Puji, tiaenique ecuanaju tueda jana pamapa tsine.

<sup>35</sup> Da su Jesús ja atana huecuana:

—Beju ema da eid'e jaametiji pan nime cielo jenetia buteana cristiano cuana eid'e yame puji. Cuaja jana ja equita eid'e yametani nime, daja da yama cristiano cuana eid'e yameeniyu, ahua ema peje su jei eputa huecuana su. Beidaji eputa huecuana sejejiji cuana nime. <sup>36</sup> Beju yama micuana quisaitia, micuaneda ema baitia biame, aimue ema peje su jei puja mahue. <sup>37</sup> Quema Tata ja bahui cristiano cuana ema peje su jei yametani. Quebata ema peje su jei epu su, aimue yama tueda ejusiacuina mahue. <sup>38</sup> Aimue ema ye mundo su pue quema ai tsada cuana ya puji. Quema Tata sa ai tsada cuana ya puji bahui ema pueana. <sup>39</sup> Quema Tata sa tsada aimue ema peje su jei putana cuana pataitana mahue puji. Beju tiempo epupe su, manujiji cuana enetianata su, yama enetianameyu huecuana ema neje cielo su paputita huecuana puji. <sup>40</sup> Ye mundo su ema epueicha su, yama enetianameyu huecuana. Tueda da Diosu sa tsada yama ya puji.

Beju daja Jesús quisatana huecuana.

<sup>41</sup> Da putsu, judío cuana sa ehuidusuji cuana ja Jesús tu-aquisapirutana, Jesús, “Ema da eid'e jaametiji pan cielo jenetia buteana”, puana putsu. <sup>42</sup> Uja jaquisatitana huecuana:

—¿Aimue jia maida ye Jesús José sa ebacua mahue? Beju tusa tata detse ecuaneda eshanapaeninia. Daja biame, ¿jucua su ni da tueda, “Ema da cielo jenetia buteana”, epuani?

<sup>43</sup> Da su Jesús ja uja atana huecuana:

—Memimirijique quema puji. <sup>44</sup> Tata Diosu ja ema beitutana. Aimue detse aidhe biame ema peje su jei pu cua mahue, Diosu ja tueda jei yametani mahue su. Pamapa ema peje su jei eputani cuana yama enetianameyu, ema epueicha su.

<sup>45</sup> Diosu sa profeta chenu cuana sa quirica su uja derejiji yani:



“Diusu ja pamapa su ebuetsuata.” Da su quebata quema Tata sa jabuetsuati cuana ebuetsuati su, ema peje su jei epuyu.

<sup>46</sup> ‘Mue aiya biame Tata Diusu ba. Yama bahui bana, tu peje jenetia ema pueana putsu. <sup>47</sup> Ene putsu, yama micuana butsepi equisainia, ahua quebata ema peje su jei epu su, tueda eid'e epueni. <sup>48</sup> Ema da eid'e jaametiji pan nime. <sup>49</sup> Micuana sa tata chenu cuana ja d'anita yahua su maná jana diataidha biame, beju manutaidha huecuana pamapa. <sup>50</sup> Ema mu da eid'e jaametiji jana nime cielo jenetia. Quebata ja tueda pan ediata su, aimue tueda emanueni mahue beju. <sup>51</sup> Ema da eid'e jaametiji pan nime cielo jenetia buteana. Quebata ja tueda eid'e jaametiji pan ediata su, tueda da eid'e epueni. Beju tueda pan da quema equita. Yama quema equita Diusu peje su curusu su eirutsuati cristiano cuana cielo su eid'e papuenita puji.

<sup>52</sup> Da su beju judío cuana sa ehuidusuji cuana tuneda cama jacuicuinatitana uja:

—¿Cuaja ni da ye deja ja mesa equita tiata cua ecuana edia puji?

<sup>53</sup> Da su Jesús ja atana huecuana:

—Ene putsu, yama micuana equisainia, ahua micuaneda aimue quema equita edia mahue su, ahua quema ami aimue eid'i mahue su, aimue micuaneda cielo su eputiyu mahue. <sup>54</sup> Quebata ja quema equita ediata su, quema ami di eid'ita su, tueda cielo su eputiyu. Yama tueda enetianameyu, tiempo epupe su. <sup>55</sup> Quema equita da jana eni quitaita. Daja huecha quema ami da eid'iji eni quitaita. <sup>56</sup> Quebata ja quema equita ediata su, quema ami eid'ita su, tueda ema neje dunejiji yani. <sup>57</sup> Ema beituji Tata da eid'e. Da putsu, ema tu jepuiti eid'e. Daja huecha quebata ja ema ediata su, beju tueda eid'e epueni. <sup>58</sup> Ema da jana cielo jenetia buteana. Yama micuana tueda jana jepuiti equisainia. Tueda jana mu da aimue maná jana nime mahue. Micuana sa tata chenu cuana ja d'anita yahua su maná jana diataidha biame, beju manutaidha huecuana pamapa. Quebata ja mu tueda jana ediata su, tueda aimue emanueni mahue.

<sup>59</sup> Daja Jesús ja cristiano cuana buetsuatana tuna sa jadhitati jude ete su Capernaum ejude su.

<sup>60</sup> Dueji Jesús sa ebuqueji cuana ja daja tusa mimi cuana id'aba putsu, uja jaquisatitana:

—Tueda tusa mimi cuana da atadhada. ¿Aiya detse tusa equita diata cua? Tsada mahue ecuanaju sa tueda ai quisa cuana.

<sup>61</sup> Da su Jesús ja tuneda cama daja equisatitani shanapa putsu, uja quisabatana huecuana:

—¿A da quema quisa cuana madhada hue micuaneseda puji? ¿A da micuaneda ema peje su jei purijija quema quisa cuana jepuiti? <sup>62</sup> Ahua aimue jiahue micuaneda ema peje su jei puja mahue su, ¿cuaja ni ema peje su jei pume pu cua, ema cielo su etsuahu ba putsu biame? <sup>63</sup> Equita da nid'uji su, beju eid'e. Daja huecha quebata quema quisa su jei epu su, tueda eid'e epueni. <sup>64</sup> Beju piada piada micuaneda aimue ema peje su jei epuani mahue tsuhu.

Daja Jesús ja atana huecuana, tu peje su jei puja mahue ep-utani cuana equene su hue shanapatana putsu. Daja huecha aiya tu emenajatiata. <sup>65</sup> Da su Jesús ja atana huecuana:

—Da putsu, yama micuana quisaitia uja: Aimue detse aidhe biame ema peje su jei pu cua mahue, Diusu ja tueda jei yametani mahue su.

<sup>66</sup> Da hora su beju jucuada Jesús sa ebuqueji cuana ja buquerijitana. <sup>67</sup> Da su beju Jesús ja mesa piada tunca beta ejaítiana discípulo cuana uja quisabatana:

—¿A da micuaneda di putiyuja?

<sup>68</sup> Da su Simón Pedro ja Jesús jeutsutana uja:

—Echua Puji, ¿aidhe peje su ni da ecuanaju puti cua, mique quisa cuana bahui eid'e jaemetiji. <sup>69</sup> Ecuanaju beju mi peje su jei puana, mida da nimebutsepi, Diusu peje jenetia putsu. Eid'e eni Diusu sa Ebacua da mida ecuanaju eshanapaeninia.

<sup>70</sup> Da su Jesús ja jeutsutana huecuana:

—Yama quitaita micuana dhareana biame, piada micuaneda beju Ishahua sa emebajaji.

<sup>71</sup> Daja Jesús mimiana, Judas Iscariote ja tueda emenajatiata bahue puina putsu. Judas da discípulo epuani biame, Jesús menajatiataji epu.

## 7

*Jesús sa edue cuana aimue tu peje su jei putana mahue*

<sup>1</sup> Da su beju Jesús Galilea yahua je aseana. Aimue Judea yahua su anija puana mahue, dapia judío cuana sa ehuidusuji cuana ja tueda manumeja atana putsu. <sup>2-3</sup> Beju judío cuana sa erere tsine banime enariatiani putsu, Jesús sa edue cuana ja tueda uja atana:

—Be upia anitiji. Putique Judea yahua su dapia tsine eba puji. Dapia mique ebuqueji cuana ja di miada ai nimetiuda yainia cuana pabata. <sup>4</sup> A mi cristiano cuana ja shanapataja su, tuna butse su ai nimetiuda aida mique a taji. Be rubuajiji ai nimetiuda cuana aji.

<sup>5</sup> Daja mimitana huecuana, tu peje su jei putana mahue putsu. <sup>6</sup> Da su Jesús ja atana huecuana:

—Quema puti hora cuinaji mahue tsuhu. <sup>7</sup> Micuaneda bahui meputique. Micuaneseda puji mu saida eputi puji, Diosu tsada mahue cuana da micuana neje aimue eduininitani mahue putsu. Ema neje bahui eduininitani huecuana, tuna ai jucha cuana yatani yama etuaquisainia putsu. <sup>8</sup> Meputique tsine eba puji. Aimue ema eputi mahue tsuhu.

<sup>9</sup> Da su Jesús anitiana.

*Jesús putiana tsine ebati puji*

<sup>10</sup> Beju mesa edue cuana tsine su putitana su, Jesús di tije putiana. Cuatsa mahue rubuajiji putiana. <sup>11</sup> Judío cuana sa ehuidusuji cuana ja Jesús chacudhaatana tsine su cristiano cuana duju su.

—¿Juque pa da tueda deja? —putana huecuana.

Uja cristiano cuana quisabatana huecuana:

—¿Ahua micuaneda mue ba tueda deja?

<sup>12-13</sup> Cristiano cuana ja ehuidusuji cuana ebia su iyubatana putsu, mue tuneda jajeutsuti putana. Tuneda cama cuatsa mahue etsia quisa jaatitana huecuana. Jesús jepuiti jaquisatitana huecuana. Piada piada, “Tueda da deja butsepi”, putana. Pia cuana, “Tueda da deja madhada, cristiano cuana baseaji putsu”, putana.

<sup>14</sup> Beju tsine edusete su Jesús templo su nubiana cristiano cuana ebuetsuapiru puji. <sup>15</sup> Da su judío cuana sa ehuidusuji cuana nimetiunetitana. Uja Jesús quisabatana huecuana:

—Aimue mida jabuetsuatiji mahue biame, ¿cuaja ni da mida bahue eni pamapa ai cuana pu cua?

<sup>16</sup> Jesús ja jeutsutana huecuana:

—Yama ebuetsuainia ai cuana da aimue quema jabuetsuati quitaita mahue. Tueda da Tata Diosu sa jabuetsuati cuana. Tuahueda ema beitutana mesa jabuetsuati cuana cristiano cuana ebuetsua puji. <sup>17</sup> Quebata ja Diosu sa ai tsada cuana yatani su, tueda bahue epu quema jabuetsuati cuana da Diosu peje jenetia. Aimue quema piba hue ebuetsuainia mahue tueda bahue epu. <sup>18</sup> Quebata tuseda puji saida emimiani su, tueda quita aida cristiano cuana ja pabata mesa tsada. Quebata mu tu beituji sa puji saida emimiani su, tueda da deja saida, butsepi, cristiano cuana ja tu beituji aida pabata mesa tsada putsu.

<sup>19</sup> ‘Ene mu da Moisés chenu ja micuana jacuatsasiati cuana tiataidha. Micuaneda ema manuameja yainia, tueda jacuatsasiati yama yainia mahue epuani putsu. ¿Ai puji ni da micuaneda ema manuameja yainia, micuaneda quitaita tueda jacuatsasiati yainia mahue biame?

<sup>20</sup> Da su Jesús atana huecuana uja:

—Mida da tseitsi. ¿Aiya mida manuameja yatani?

21-23 Jesús ja uja jeutsutana huecuana:

—Yama deja janahua tsine su saisiameana putsu, micuaneda ema manuameja yainia. Beju micuaneda quitaita mudumudu bahue janahua tsine su. Moisés chenu ja cuatsasiataidha deja yanana chidi cuana huitsanasiqui taji ocho tsineji su. Ecuana sa tata chenu cuana Moisés chenu ja equene daja ataidha. Da su beju janahua tsine biame, micuaneda deja yanana chidi ehuitsanasiquinia, tusa ocho tsine etsutiani su. Beju, ¿ai puji ni da su micuaneda ema manuameja yainia, deja nedaji saisiameana putsu? <sup>24</sup> Ahua micuaneda juzgaja su, butsepi neje mejuzgaque.

*¿Que jenetia Jesús?*

<sup>25</sup> Da su pia Jerusalén su aniji cuana tuneda cama uja jaquisabatitana:

—¿Aimue jia maida ye deja ecuana sa ehuidusuji cuana ja manuameja yatani mahue? <sup>26</sup> Hue upia cristiano cuana buet-sua epuneti. ¿Jucujaja su aimue einatani huecuana mahue? ¿Da su mu jia tuneda di tu peje su beju jei eputani? ¿Da su mu jia tuneda di tueda da Diosu sa Jabeituti Deja jei eputani?

<sup>27</sup> Da su pia cuana ja atana huecuana uja:

—¡Mahue! Aimue tueda Diosu sa Jabeituti Deja mahue. Ecuana mu bahue saisia quepia Jesús bataji puana. Diosu sa Jabeituti Deja beju ecuina su, aimue aidhe biame bahue epu mahue que jenetia pueitia.

Daja jaquisatitana huecuana Cristo jepuiti, japitsati putsu. <sup>28</sup> Jesús ja id'aba putsu, jubida jeutsutana huecuana:

—¿Ai micuaneda ema eshanapainia bata? ¿Ai micuaneda que jenetia ema epusiu bahue bata? Ema da ene quita Diosu peje jenetia pueana. Tuahueda quitaita ema huaratitana. Micuaneda aimue shanapa tueda. <sup>29</sup> Yama mu tueda eshanapaeninia, tu neje ema anina putsu. Tuahueda ema micuana peje su beitutana.

<sup>30</sup> Da su judío cuana sa ehuidusuji cuana ja Jesús inaja adhaatana, risi putsu, edusu puji. Beju aimue aiya biame ina atana, aimue mesa ina hora putsu. <sup>31</sup> Dueji cristiano cuana tu peje su jei putana. Uja tuneda jaquisatitana:

—Ye da Diosu sa Jabeituti Deja. ¿Ai puji ni da ecuaneda pia id'ua cua? ¿Aiya detse da tueda nimetiuda aida cuana ata cua, ye deja ja yatani nime?

*Fariseo cuana ja soldado cuana beitutana Jesús eina puji*

<sup>32</sup> Fariseo, sacerdote huaraji aida cuana ja cristiano cuana daja eputani shanapa putsu, templo sa soldado cuana beitutana huecuana Jesús eina puji dhahua. <sup>33</sup> Da su Jesús ja cristiano cuana uja atana:

—Quejucua tsine puji hue beju ema micuana neje yaniti. Da su beju ema esiapatiyu ema beituji peje su. <sup>34</sup> Micuaneda ema echacudhaa. Aimue micuaneda ema eteje mahue, dapia ema yaniti putsu.

<sup>35</sup> Da su ehuidusuji cuana uja jaquisabatitana tuneda cama:

—¿Quepia jia da eputi tueda ecuaneda aimue eteje mahue? Cuapuitime pia yahua su eputi pia cristiano cuana ebuetsuati puji. <sup>36</sup> ¿Ai ni da tueda quisa epuani?

*Jesús da eid'e jaametiji yahui nime*

<sup>37</sup> Tije tsine beju epupeni su, Jesús netianana. Cristiano cuana jubida neje uja atana:

—Quebata cuana jaid'itija eputani su, mepueque ema peje su eid'iti puji. <sup>38</sup> Uja Diosu sa quirica su derejiji yani: “Quebata ema peje su jei epuani su, mesa enime su eid'e jaametiji yahui putiputi nime.”

<sup>39</sup> Beju Jesús sa mimi cuana da uja epuani: Tu peje su jei eputani cuana ja Espíritu Santo ebatsuta tuna sa muesumu su. Beju aimue tsuhu tueda Espíritu Santo pueji mahue, Jesús cielo su mesa Tata Diosu peje su putiji mahue tsuhu putsu.

*Cristiano cuana jacuicuinatitana Jesús jepuiti*

<sup>40</sup> Cristiano cuana ja Jesús sa mimi id'aba putsu, tuneda cama jacuicuinapirutitana. Piada piada cuana uja putana:

—Enei hue, ye deja da Diosu sa profeta pue taji.

<sup>41</sup> Pia cuana ja uja jeutsutana huecuana:

—¡Mahue! Ye deja da Diosu sa Jabeituti Deja quitaita.

Beju pia cuana di uja putana:

—¿Quepia detse ye Jesús da Diosu sa Jabeituti Deja pu cua, tueda Galilea yahua jenetia putsu? Diosu sa Jabeituti Deja aimue detse Galilea yahua jenetia pue cua mahue. <sup>42</sup> Diosu sa quirica su Diosu sa Jabeituti Deja Judea yahua, Belén ejude jenetia mesa pue taji epuani. Echua puji David chenu sa familia jenetia mesa pue taji epuani. Tueda Belén ejude da echua puji David chenu sa ejude.

<sup>43</sup> Daja da cristiano cuana mimitana. Ai jia Jesús puina cuaja jaduneti taji mahue jabatitana huecuana. Jasajasajatitana huecuana. <sup>44</sup> Pia cuana ja mu Jesús risi putsu, dusuja adhaatana.

*Judío cuana sa huaraji cuana Jesús peje su jei puja mahue putana*

<sup>45</sup> Da su beju templo sa soldado cuana jasiapatitana fariseo, sacerdote huaraji aida cuana peje su. Soldado cuana cuinatana su, fariseo cuana ja uja quisabatana huecuana:

—¿Jucujaja su ni micuaneda mue Jesús duse?

<sup>46</sup> Da su uja jeutsutana huecuana:

—Aimue aidhe biame mimi tueda deja nime.

<sup>47</sup> Da su fariseo cuana ja jubida d'ayatana huecuana uja:

—¡Ai! Micuaneda di jia beju baseataitia. <sup>48</sup> ¿Ai fariseo, sacerdote huaraji aida cuana ja tueda deja jei a atana bata?  
<sup>49</sup> Cristiano jacuatsasiati shanapa bue mahue cuana bahui tu peje su jei eputani. Da su Diosu ja pamatseta huecuana.

<sup>50</sup> Beju fariseo Nicodemo di dapia anina. (Tueda da equene putiana Jesús peje su dhidha su.) Tuahueda uja atana huecuana:

<sup>51</sup> —Aidhe biame ecuaneda cuaja matse taji mahue ebainia id'abaji mahue. Daja ecuaneseda jacuatsasiati cuana epuani beju.

<sup>52</sup> Da su jubida jeutsutana huecuana uja:

—¿Ai puji mida daja emimiani? ¿Ai mida di tu nime Galilea yahua jenetia bata? Mimiameenique Diosu sa quirica su. Aimue Diosu sa profeta piada biame Galilea yahua jenetia ecuina mahue. Daja da quirica su epuani. Da su, ¿cuaja jia da Jesús Diosu sa profeta pu cua, tueda Galilea yahua jenetia putsu?

<sup>53</sup> Da su beju tuneda mimipetana su, putitaibana huecuana.

## 8

### *Epuna chuamadhada*

<sup>1</sup> Da su beju Jesús da murucu aida Olivo banime su putiana. Dapia anidhidhana. <sup>2</sup> Beju pia huenati su templo su jasiapatiana. Pamapa cristiano cuana tu peje su janariatiana. Jesús aniute putsu, buetsuapirutana huecuana. <sup>3</sup> Da su beju Moisés chenu sa jacuatsasiati buetsuaji, fariseo cuana Jesús yani su putitana. Epuna chuamadhada Jesús peje su dusetana huecuana. Tueda epuna pia deja neje biatejetana huecuana. <sup>4</sup> Beju dapia cristiano cuana duju su epuna netia putsu, Jesús uja atana huecuana:

—Ebuetsuaji, ye epuna da ecuanaju biatejeitia pia deja neje.

<sup>5</sup> Tueda ecuanaju tumu neje chuatarata taji yainia, daja Moisés chenu sa jacuatsasiati epuani putsu. Beju, ¿cuaja ni mida epibatiani?

<sup>6</sup> Daja Jesús quisabatana huecuana, ahua madhada hue ejeutsuti Moisés chenu sa jacuatsasiati jepuiti eba puji. Da su Jesús tud'isana. Tusa emehuituji neje yahua su derepirutana. <sup>7</sup> Beju tuneda daja hue quisabainiame atana putsu, Jesús netianana. Uja atana huecuana:

—Quebata micuaneda jucha mahue, tuahueda epuna tumu neje pachuatarapiruta.

<sup>8</sup> Daja mimipe putsu, neicha tud'isana. Yahua su daja hue dereiniame atana. <sup>9</sup> Da su bezu piada putiyu putana

huecuana. Edhi cuana equene piada putiyu putana. Da su pamapa pia cuana tije pupetitaibana. Jesús da epuna neje bahui anitiana. <sup>10</sup> Da su Jesús netiana putsu, epuna eneti tu mehua batana. Tuahueda epuna quisabatana uja:

—Epuna, ¿juque da mi tuaquisaji cuana? ¿A mida aiya biame mue matse?

<sup>11</sup> Epuna ja jeutsutana uja:

—Ehe, Echua Puji, ai mahue.

Da su Jesús ja epuna atana:

—Da su aimue yama biame mi ematse mahue. Puchidi-tiyuque. Be jucha puichaji beju.

### *Jesús da hueda nime*

<sup>12</sup> Daja hue neicha Jesús ja cristiano cuana quisainiame atana uja:

—Ema da hueda nime. Yama micuana Diosu sa jabuetsuati cuana ebuetsuainia saida, butsepi micuana edusuti puji. Quebata quema jabuetsuati cuana su epuniuneti su, tueda da hueda su epuniuneti cristiano nime. Aimue apuda su epuniuneti cristiano nime mahue. Tueda da beju nimeeichacua.

<sup>13</sup> Da su fariseo cuana ja Jesús uja atana:

—Mida mi mehua equisanetiacuinatiani. Da putsu, mique mimi aimue chujeji mahue.

<sup>14</sup> Jesús ja jeutsutana huecuana:

—Ema quema puji saida equisanetiacuinatiani biame, quema mimi cuana beju chujeji, ema bahue que jenetia ema pueana, quepia ema epuhu putsu. Micuaneda mu bue mahue que jenetia ema pueana, quepia ema eputi. <sup>15</sup> Micuaneda ema juzgaja yainia, butsepi shanapaji mahue biame. Yama mu beju aimue jiahue micuana ejuzgainia mahue. <sup>16</sup> Ahua jiahue yama juzga a cua su mu, beju butsepi yama micuana ejuzga, quema Tata ema beituji ja di ema neje micuana ejuzgata putsu. <sup>17</sup> Ahua beta jatuaquisatiji detse tupupai equisanetiacuinati su, jei a taji. Daja derejiji Moisés chenu sa jacuatsasiati quirica su. <sup>18</sup> Jade. Ema quema puji saida equisanetiacuinatiani. Quema Tata ema beituji ja di quema puji saida equisanetiacuinatiani. Da su etseju tupupai equisanetiacuinatiani.

<sup>19</sup> Da su Jesús quisabatana huecuana uja:

—¿Quepia mique tata?

Jesús ja jeutsutana huecuana:

—Micuaneda aimue ema shanapa. Daja huecha quema Tata di aimue shanapa. Ahua micuaneda ema shanapa cua su, quema Tata di detse micuaneda shanapa cua.

<sup>20</sup> Daja mimiana Jesús, templo su ebuetsua epuneti je. Beju tueda netina chipilu irutsuaji emeji cuana naja su. Mue aiya

biame tueda ina atana, tusa ina hora beju cuinaji mahue putsu.

<sup>21</sup> Neicha Jesús ja ehuidusuji, fariseo cuana uja quisatana:

—Beju ema eputiyu. Quepia ema eputi aimue micuaneda puti cua mahue, micuaneda micuana sa jucha cuana neje emanueni putsu. Micuaneda ema echacu biame, aimue ema eteje mahue.

<sup>22</sup> Da su tuneda cama jaquisabatitana huecuana:

—¿Jucujaja su jia da ecuaneda aimue puti cua mahue quepia tu eputi su? ¿Cuajaja jia, a da emanuameti?

<sup>23</sup> Jesús ja atana huecuana:

—Micuaneda ye yahua sa puji. Ema mu cielo sa puji. <sup>24</sup> Da putsu, yama micuana butsepi equisainia, micuana sa jucha cuana neje beju emanueni, ahua aimue micuaneda ema peje su jei epu mahue su.

<sup>25</sup> Da su Jesús quisabatana huecuana:

—¿Aidhe da mida?

Jesús ja jeutsutana huecuana:

—Beju yama micuana, aidhe da ema, butsepi quisana, ema mimipiruana jenetia. <sup>26</sup> Dueji micuaneseda ai madhada yani yama micuana ematse puji. Beju aimue jahue daja ya mahue. Quema Tata ja ema quisatana bahui yama jahue micuana equisainia. Tusa quisa cuana da ene quita butsepi.

<sup>27</sup> Beju mue shanapa atana huecuana Jesús da Tata Diosu jepuiti mimiana. <sup>28</sup> Da putsu, Jesús ja daja hue uja quisainiame atana huecuana:

—Micuaneda ema curusu su ejemitsua su, da hora su micuaneda eshanapa ema da Diosu sa Jabeituti Deja. Tu peje jenetia pueana. Tusa jabuetsuati cuana bahui yama micuana quisana. Aimue quema piba cuana bahui mahue. <sup>29</sup> Ema beituji quema Tata da ema neje yani pamapa hora su. Aimue ema mehua ema emesiatani mahue, tusa ai tsada cuana bahui yama yainia putsu.

<sup>30</sup> Jesús beju daja mimiana su, dueji cristiano cuana jei putana tu peje su.

*¿Aidhe cuana da Diosu sa ebacua cuana?*

<sup>31</sup> Da su Jesús ja atana huecuana uja:

—Ahua micuaneda quema jabuetsuati cuana jubida jei yaeni su, quema ene quita ebuqueji cuana epu. <sup>32</sup> Diosu sa ene quita mimi eshanapayu. Tueda mimi shanapa putsu, micuana d'eji su epueniyu.

<sup>33</sup> Da su fariseo cuana ja Jesús quisatana uja:

—Tseitsi nime mida emimiani. ¿Ai jepuiti ni da ecuananju d'eji su pu cua? ¿Ai ecuanaju esclavo cuana bata? Quetsunu



su biame ecuanaju esclavo pu bue mahue, ecuanaju da Abraham chenu sa ebacua cuana putsu.

<sup>34</sup> Da su Jesús ja atana huecuana:

—Ene putsu, micuana yama yainia, cuaja esclavo emetse sa eme su yani nime, daja da micuaneda jucha sa eme su yani.

<sup>35</sup> Esclavo da aimue familia quitaita mahue. Ebacua bahui da familia quitaita epuani. <sup>36</sup> Ahua Diusu sa Ebacua ja micuana d'eji su yameta su, da su micuaneda d'eji su epuenipeyu. Aimue jucha sa eme su yaniti mahue. <sup>37</sup> Micuaneda da Abraham chenu sa familia jenetia biame, ema manuameja yainia, quema quisa micuaneseda tsada mahue putsu. <sup>38</sup> Quema Tata ja ema quisatana cuana bahui yama micuana equisainia. Micuaneda mu beju micuana sa tata sa tsada bahui yainia.

<sup>39</sup> Da su Jesús jeutsutana huecuana uja:

—Beju ecuanaju sa tata da Abraham chenu.

Jesús ja atana huecuana:

—Ahua ene quita micuaneda Abraham chenu sa ebacua cuana epuani su, tu ataidha nime micuaneda di a cua.

<sup>40</sup> Micuaneda ema manuameja ana, “Diusu ja ema butsepi buetsuatana”, ema pueana putsu. Beju Abraham chenu ja mu aimue ye ai madhada cuana a bue mahue puidha, cuaja micuaneda yainia nime. <sup>41</sup> Micuaneda da yainia, cuaja micuana sa tata chenu cuana ja ataidha nime.

Da su Jesús jeutsutana huecuana:

—Aimue ecuanaju cha teje ajiji ebacua cuana mahue. Diusu quitaita da ecuanaju sa tata.

<sup>42</sup> Da su Jesús ja atana huecuana uja:

—Ahua Diusu da micuaneseda tata pu cua su, micuaneda detse ema ibuneda ba cua, ema tu peje jenetia pueana putsu.

Aimue ema quema ebani su pue. Tata Diusu ja quitaita ema beitutana. Tusa ebani su ema pueana. <sup>43</sup> Micuaneseda quema jabuetsuati tsada mahue putsu, aimue quema quisa cuana eshanapainia mahue. <sup>44</sup> Micuana sa tata da Ishahua.

Micuaneda tusa tsada cuana bahui yainia, micuaneda tuseda puji putsu. Ishahua da equene jenetia manuame bahue puidha. Tueda butsepi mimi bue mahue. Bid'umimi bahui emimiani. Daja hue tueda mu epuani. Tueda equene jenetia bid'umimi puidha. <sup>45</sup> Beju yama micuana butsepi emimiani biame, aimue micuaneda ema peje su jei epuani mahue.

<sup>46</sup> Aimue aiya biame ema jucha jepuiti tuaquisata cua mahue. ¿Jucujaja su ni micuaneda ema jei aja mahue, ema butsepi emimiani biame? <sup>47</sup> Quebata Diusu sa dharejiji epuani su, tuahueda Diusu sa quisa cuana id'abaja yatani. Micuaneda

mu Diusu sa mimi id'abaja mahue yainia, aimue tuseda puji mahue putsu.

*Abraham chenu bataji puji mahue su, beju Jesús anidha*

<sup>48</sup> Da su beju fariseo cuana ja Jesús uja atana:

—Enei hue, mida da mue ai puji saida samaritano nime. Mida da einid'u madhadaji.

<sup>49</sup> Jesús ja jeutsutana huecuana uja:

—Aimue ema einid'u madhadaji mahue. Yama quema Tata Diusu bahui eiyubainia. Aimue micuaneda ema eiyubainia mahue. <sup>50</sup> Tsada mahue quema cristiano cuana ja ema aida pabata puji. Quema Tata sa tsada bahui ema aida papu. Pamapa ema aida baja mahue yatani cuana tuahueda emat-setayu. <sup>51</sup> Ene putsu, yama micuana equisainia, quebata ja quema mimi cuana jei yata su, aimue tueda emanueni mahue.

<sup>52</sup> Da su neicha Jesús jeutsutana huecuana:

—Ene putsu, mida einid'u madhadaji. ¿Cuaja su mi daja emimiani? Abraham chenu manuidha. Diusu sa profeta cuana di manutaidha. <sup>53</sup> ¿Ai mida tuna ebia su aida bata? ¿Aidhe pepe jia mida epuani?

<sup>54</sup> Da su Jesús ja jeutsutana huecuana:

—Ahua ema quema puji quitaita equisanetiacuinatiani su, aimue chujeji mahue. Aimue ema saida equisanetiacuinatiani mahue quema puji. Quema Tata Diusu mu da quema puji saida equisanetiacuinatiani. Tueda quema Tata micuaneda, “Ecuanaaju sa Diusu”, epuani biame, beju aimue daja mahue. <sup>55</sup> Mue micuaneda shanapa tueda. Yama bahui tueda eshanapainia. Ahua ema, “Aimue yama shanapa tueda”, pu cua su, ema micuaneda nime bid'umimi puji pu cua. Yama mu yainia tu ema yametani ai cuana, yama tueda eshanapainia putsu. <sup>56</sup> Micuana sa tata Abraham chenu da beidaji puidha, ema yahua su epusiu bahue pu putsu.

<sup>57</sup> Da su Jesús atana huecuana uja:

—Beju aimue mique pishica tunca mara yani mahue biame, mida, Abraham chenu bana, epuani.

<sup>58</sup> Beju Jesús ja uja jeutsutana huecuana:

—Ene putsu, yama micuana butsepi equisainia, Abraham chenu bataji puji mahue su, beju ema anidha.

<sup>59</sup> Da su tuneda daja id'aba putsu, tumu cuana inatana huecuana Jesús emaracadhaa puji. Da su beju Jesús templo jenetia cuinanana, judío cuana sa ehuidusuji cuana ja tumu echudutasa cama. Cristiano cuana duje jaitianana bataji mahue.

## 9

*Jesús ja deja padha saisiametana*

<sup>1</sup> Da su beju Jesús pia eti jude su epuhu je, piada deja padha batana. Tueda deja padha bataji puana. <sup>2</sup> Discípulo cuana ja Jesús uja quisabatana:

—Ebusuaji, ¿jucaja su da tueda deja daja padha bataji puana? ¿Ahua tusa tata detse sa jucha jepuiti, ahua tusa jucha quitaita jepuiti?

<sup>3</sup> Jesús ja jeutsutana huecuana:

—Aimue ai sa jucha jepuiti tueda padha bataji puana mahue. Daja bataji puana yama cristiano cuana Diosu tucheda ebameti puji. <sup>4</sup> Beju ema ye mundo su yani tupu, Diosu sa ai tsada cuana quema a taji yani. Tiempo epusiu da aimue ema yani mahue puji. <sup>5</sup> Ema da hueda nime, ye mundo su ema yani tupu.

<sup>6</sup> Jesús daja mimipe putsu, yahua su quituatana. Equedi neje rutu chidi susiatana. Tueda rutu ichatana padha sa etua bia su. <sup>7</sup> Da su uja cuatsasiatana deja padha:

—Jarucuatitique Siloé banime yahui rara su.

(Tueda ebani Siloé, “Beitujiji”, epuani.) Da su beju deja padha putiana. Erucuatiani cama beju, jabatiana. Tusa ete su saida jasiapatibana. <sup>8</sup> Pamapa tu shanapaji cristiano cuana ja ba putsu, uja jaquisabatitana huecuana:

—¿Aimue jia maida ye deja padha chipilu bajatana mahue?

<sup>9</sup> Da su piada piada cuana ja jeutsutana uja:

—Ehe, tueda quitaita da.

Beju pia cuana ja mu jeutsutana uja:

—Aimue tueda mahue. Beju daja quitaita mu da.

Da su deja saisijiji ja jeutsutana huecuana:

—Enei hue, ema da tueda quitaita.

<sup>10</sup> Da su beju quisabatana deja huecuana uja:

—¿Cuaja ni mida jiahue ebatiani?

<sup>11</sup> Deja ja jeutsutana huecuana:

—Tueda deja Jesús banime ja rutu chidi a putsu, quema etua bia su ichatana. Daja a putsu, ema, “Jarucuatitique Siloé banime yahui rara su”, cuatsasiatana. Da su ema putiana erucuatit puji. Dapia erucuatiani cama, beju ema jabatiana.

<sup>12</sup> Da su beju quisabatana huecuana neicha:

—¿Juque da tueda deja?

Da su deja ja uja jeutsutana huecuana:

—Bue mahue ema. ¿Juque jia?

*Fariseo cuana ja deja saisijiji quisabatana*

<sup>13</sup> Da su beju deja saisijiji dusutana huecuana fariseo cuana peje su. <sup>14</sup> Jesús ja janahua tsine su deja saisiametana

putsu, fariseo cuana ja deja jubida quisabaja atana tuahueda pamapa butsepi paquisata huecuana puji. <sup>15</sup> Da su fariseo cuana ja quisabape putsu, deja ja uja jeutsutana huecuana:

—Tuahueda rutu chidi ichatana quema etua bia su. Da su ema jarucuatiana. Beju jiahue ema saida ebatiani.

<sup>16</sup> Piada piada fariseo cuana uja putana:

—Ye aji deja mu aimue Diosu peje jenetia mahue, tuahueda janahua tsine aimue eiyubatani mahue putsu.

Pia fariseo cuana di uja putana:

—Aimue Jesús deja juchaji mahue, ai nimetiuda saida cuana bahui yatani putsu.

Beju daja hue tuneda cama jacuicuinatitana. <sup>17</sup> Da su neicha deja quisabatana huecuana:

—¿Cuaja ni mida epuani tueda deja Jesús jepuiti?

Da su deja ja jeutsutana huecuana uja:

—Tueda mu da Diosu sa profeta yama epibainia.

<sup>18</sup> Beju fariseo cuana aimue jei putana mahue tueda deja padha puina. Da putsu, deja sa tata detse jetitana huecuana.

<sup>19</sup> Cuinati putsu, fariseo cuana ja quisabatana tse.

—¿A da ye deja metse sa ebacua? ¿A da ene quita tueda padha bataji puana? ¿Cuaja ni da, da su jiahue beju tueda ebatiani?

<sup>20</sup> Beju deja sa tata detse ja jeutsutana huecuana:

—Ye deja da etseju sa ebacua padha bataji puana beju etseju eshanapainia. <sup>21</sup> Bue mahue etseju cuaja jabatime pujiji. Bue mahue etseju aiya tueda saisiametana. Mequisabaque tueda. Tuahueda micuana quisata cua, beju deja putsu. Tueda quitaita beju bahue cuaja saisime pujiji.

<sup>22</sup> Tata detse ja daja jeutsutana fariseo cuana, ebia su iyubatana tse putsu. Quebata da, “Jesús da Diosu sa Jabeituti Deja”, epu su, fariseo cuana ja jadhitati jude ete su aimue panubi yata mahue. <sup>23</sup> Da putsu, daja jeutsutana tse, ebia su iyubatana tse putsu.

<sup>24</sup> Da su fariseo cuana ja neicha deja saisijiji ihua putsu, uja atana huecuana:

—Diosu butse su neicha pamapa butsepi quisaque ecuanaju. Bahue ecuanaju Diosu ja mi saisiametana. Tueda bahui mique diusulupai a taji. Aimue tueda deja Jesús ja mi saisiameta cua mahue, juchaji putsu.

<sup>25</sup> Da su deja ja jeutsutana huecuana:

—Ema bue mahue ahua tueda juchaji, ahua mahue. Ema padha puina biame, jiahue beju ema ebatiani. Tueda quitaita bahui beju ema bahue.

<sup>26</sup> Da su neicha quisabatana huecuana uja:

—¿Cuaja ni mida atana mi ebatu puji?

27 Da su deja ja jeutsutana huecuana:

—Beju yama micuana quisaitia beju. Mue micuaneda ema jei a. ¿Ai puji ni da ema neicha quisa pu cua? ¿Da su mu jia micuaneda di Jesús buqueja?

28 Beju deja ja daja jeutsu putsu, fariseo cuana ja uja madhabapirutana:

—Miada tueda deja Jesús ebuqueinia. Ecuanaaju mu Moisés chenu sa jacuatsasiati cuana bahui yainia. 29 Ecuanaaju bahue eni Diosu ja Moisés chenu mitsutaidha. Tueda deja Jesús mue ecuanaju shanapa que jenetia jia. ¿Aiya jia da tueda huaratiatana? Mue ecuanaju shanapa.

30 Da su deja ja jeutsutana huecuana:

—¿Cuaja ni da pu cua? Tuahueda ema tuaji atana biame, micuaneda bue mahue aiya jia tueda huaratiatana. 31 Bahue eni ecuaneda aimue Diosu ja juchaji cuana eid'abatani mahue. Tusa ai tsada aji cuana bahui da eid'abatani. Pamapa tu eiyubatani cuana eid'abatani. 32 Quetsunu su biame ecuaneda id'aba bue mahue aiya deja padha bataji pujiji tuaji yametani. 33 Ahua ye deja Jesús da Diosu peje jenetia mahue su, ¿cuaja ni da tuahueda tueda nimetiuda aida cuana ata cua?

34 Da su deja ja jeutsutana huecuana:

—Mida jucha neje bataji puana putsu, aimue miqueda puji ecuanaju buetsua taji mahue.

Da su fariseo cuana ja cuatsasiatana judío cuana sa jadhitati jude ete su deja panubi mahue.

35 Beju Jesús ja fariseo cuana ja deja padha saisijiji daja atana shanapatana. Da su deja neje neicha jatsuti putsu, uja quisabatana:

—¿A mi jei epuani Diosu sa Jabeituti Deja peje su?

36 Da su deja ja jeutsutana uja:

—Ebuetsuaji, aimue yama tueda shanapa. Quisaque ema aidhe ni da tueda ema tu peje su jei epu puji.

37 Jesús ja deja jeutsutana:

—Beju da tueda miada ebainia. Tu neje mida quisaque epuani. Ema da beju.

38 Da su deja Jesús butse su tururu putsu, uja atana:

—Echua Puji, jei ema mi peje su epuani.

39 Da su beju Jesús puana:

—Ema ye mundo su pueana Diosu sa ai tsada cuana ya puji, Diosu eshanapatani mahue cuana Diosu eshanapame puji, daja huecha Diosu eshanapainia epudhaatani cuana Diosu eshanapata mahue huecuana puji.

40 Da su beju dapia netitaina fariseo cuana tusa mimi id'aba putsu, uja quisabatana Jesús:

—¿Ai ecuanaju Diosu sa puji padha bata?

<sup>41</sup> Jesús ja jeutsutana huecuana:

—Ahua micuaneda Diosu mue shanapa a cua su, aimue micuaneda juchaji pu cua mahue. Beju micuaneda mu da juchaji, micuaneda, “Ecuanaju Diosu eshanapainia”, epuani putsu.

## 10

### *Huisha taraca jepuiti quisa*

<sup>1</sup> Daja hue Jesús ja quisainiame atana huecuana:

—Ene putsu, yama micuana equisainia, quebata da huisha taraca etsequeini je aimue enubiani mahue, tueda da tsi puji. Quebata da taraca je, tsua putsu, enubiani, tueda da tsi puji.

<sup>2</sup> Quebata da huisha taraca etsequeini je enubiani, tueda da huisha quinaji. <sup>3</sup> Etsequeini quinaji ja huisha quinaji eshanapatani. Beju enubiametani. Huisha cuana ja di huisha quinaji eshanapatani. Tueda huisha quinaji ja pamapa su piada piada mesa huisha cuana eshanapaenitani. Pamapa su ebanishanapatani. Huisha cuana taraca jenetia etseque su ehuidusutani. <sup>4</sup> Tuna ehui su epuhu. Huisha cuana tu tije eputitani, tu eshanapatani putsu. <sup>5</sup> Pia deja shanapaji mahue aimue detse tu tije putita cua mahue. Tu peje jenetia ejududutani hue, tueda mue shanapa putsu.

<sup>6</sup> Daja Jesús ja quisatana huecuana huisha taraca jepuiti. Beju mue shanapa atana huecuana. Da su beju Jesús ja neicha uja quisatana huecuana uja:

<sup>7</sup> —Ene putsu, yama micuana equisainia, huisha cuana taraca sa eteriji je nubi putsu, beju saida edume su yanita. Daja huecha ema peje su jei eputani cuana yama saida equinainia. <sup>8</sup> Dueji bid'umimi ebuetsuaji cuana ja ema peje su jei eputani cuana bid'umimi buetsuaja eputani huecuana biame, aimue jei yata huecuana mahue. Tueda bid'umimi ebuetsuaji cuana da taraca jenetia huisha tsiji cuana nime. Huisha cuana ja pia sa etsui id'abaja mahue yatani nime, daja da ema peje su jei eputani cuana bid'umimi ebuetsuaji cuana peje su jei puja mahue eputani.

<sup>9</sup> ‘Ema da taraca etsequeini nime. Cuaja huisha taraca etsequeini je enubiani d'oji su taraca dume su epu puji nime, daja da quebata ema peje su jei epuani cuati castigo jenetia d'oji su epu. Cuaja huisha ediadia puji cuinanuanuati epuani nime, daja da yama pamapa ema peje su jei eputani cuana pamapa ai saida cuana etiayu.

<sup>10</sup> ‘Tsi puji epueni huisha etsi puji, emanuame puji bahui. Ema mu pueana cristiano cuana nimeeichacua, beidaji eni ya puji. <sup>11</sup> Ema da huisha quinaji saida nime. Huisha quinaji saida ja mesa huisha cuana equinatani emanu teje.

Daja huecha da ema emanu ema peje su jei eputani cuana sa puji. <sup>12</sup> Mudu puji ja iba epusiu ba putsu, ejududuani. Huisha cuana ejusianetiatani, tuseda mahue putsu. Beju iba ja huisha cuana einatani putsu, eberebereametani. <sup>13</sup> Mudu puji ejududuani, bianetiaja mahue putsu. Echuje bahui mesa tsada.

<sup>14-15</sup> 'Beju ema da huisha quinaji saida nime. Cuaja huisha cuana ja huisha quinaji eshanapatani nime, daja da ema peje su jei eputani cuana ema eshanapatani. Yama di eshanapainia huecuana. Daja huecha yama quema Tata Diusu eshanapainia. Tuahueda di ema eshanapatani. Cuaja huisha quinaji manu cua huisha cuana ebianetiainia je nime, daja da ema emanu ema peje su jei eputani cuana sa puji. <sup>16</sup> Cuaja huisha quinaji sa pia huisha cuana yani pia taraca cuana je nime, daja da quema yani pia ema peje su jei eputani cuana pia yahua cuana su. Tuneda di pamapa quema jabuetsuati cuana yatayu. Ema neje dunejiji yanitiyu huecuana pamapa pia ema peje su jei eputani cuana neje. Ema da mecuana sa Echua Puji epu.

<sup>17</sup> 'Tata Diusu ja ema ebia su ibuneda ebatani, ema quema dharejiji cuana sa puji emanu putsu. Ema emanu biame, neicha ema eid'eyu. <sup>18</sup> Aiya biame detse ema manuameta cua. Beju ema da emanu, daja quema tsada putsu. Daja huecha ema quitaita eid'emetiyu, quema Tata ja ema daja epu puji huaratiatana putsu.

<sup>19</sup> Beju fariseo cuana ja Jesús sa quisa cuana id'abatana su, neicha tuneda cama jacuicuinatitana huecuana. <sup>20</sup> Uja piada piada cuana putana:

—¿Ai puji ni da ecuaneda ye deja tseitsi eid'abainia, tueda einid'u madhadaji putsu?

<sup>21</sup> Da su pia cuana ja uja jeutsutana:

—Ahua tueda einid'u madhadaji su, aimue detse daja mimi cua mahue. ¿Ai einid'u madhada ja padha cuana tuaji ata cua bata?

Daja da jacuicuinatitana huecuana.

*Judío cuana sa ehuidusuji cuana ja Jesús tsada mue batana*

<sup>22</sup> Beju huinahuina badi cuana puina. Cristiano cuana ja templo sa tsine batanina Jerusalén ejude su. Jesús di dapia anina. <sup>23</sup> Salomón sa Corredor je templo su aseniunetiana. <sup>24</sup> Tueda dapia yaseniu neti cama, beju judío cuana sa ehuidusuji cuana ja baretana. Duinini neje uja quisabatana huecuana:

—¿Cuaja su mi ecuanaju mue quisa butsepi? ¿A da mida Diusu sa Jabeituti Deja? Beju jahue quita butsepi quisaque ecuanaju.

<sup>25</sup> Da su Jesús ja jeutsutana huecuana uja:

—Beju yama micuana quisana biame, mue micuaneda ema jei a. Nimetiuda ai cuana yama yainia quema Tata sa tucheda neje. Micuaneda daja ba putsu, bahue pu taji aidhe da ema. <sup>26</sup> Beju micuaneda mu aimue ema peje su jei puja epuani mahue, quema dharejiji cuana mahue putsu. <sup>27</sup> Quema dharejiji cuana ja bahui ema eshanapatani. Yama di eshanapainia huecuana. Tuneda ema tije yatani. <sup>28</sup> Yama eid'e yameeninia huecuana. Aimue matsejiji eputa huecuana mahue. <sup>29-30</sup> Aiya biame quema eme jenetia mejemita cua mahue. Quema Tata ja ema peje su jei ametana huecuana. Daja huecha aiya biame tusa eme jenetia di mejemita cua huecuana mahue, tueda pamapa pia cuana ebia su aida putsu.

<sup>31</sup> Daja id'aba putsu, ehuidusuji cuana ja tumu jemitsu-atana Jesús emaracadhaa puji. <sup>32</sup> Da su Jesús ja atana huecuana:

—Yama micuana butse su jucuada ai nimetiuda cuana ana quema Tata sa tucheda neje. ¿Quebata nimetiuda jepuiti micuaneda ema maracaja yainia?

<sup>33</sup> Da su jeutsutana huecuana uja:

—Aimue ai nimetiuda cuana mi ana jepuiti ecuanaju mi maracaja yainia mahue. Beju ecuanaju mi emaracati, miada Diusu emadhabainia putsu. Mida da deja hue biame, Diusu neje tupupai puja epuani.

<sup>34</sup> Da su Jesús ja jeutsutana huecuana:

—Uja jacuatsasiati su derejiji yani Diusu ja ataidha: “Micuaneda da diusu cuana.” <sup>35</sup> Tueda derejiji cuana mu a taji epuani. Pamapa Diusu sa mimi jei yatani cuana Diusu ja diusu cuana yatani. <sup>36</sup> Micuaneda yama Diusu emadhabainia epuani, “Ema Diusu sa Ebacua”, ema puana putsu. Beju Diusu ja quitaita ema ichaderatana. Ye mundo su ema beitutana. Da putsu, ema, “Ema da Diusu sa Ebacua”, epuani. Aimue yama Diusu emadhabainia quema quisa cuana neje. <sup>37</sup> Ahua quema Tata sa ai yatani cuana aimue yama a su, be ema jei meaji. <sup>38</sup> Micuaneda quema quisa su jei puja epuani mahue biame, jei mepuque ema peje su, yama ai nimetiuda cuana yainia putsu. Bahue mepuenique quema Tata Diusu neje etseju piada hue epuani.

<sup>39</sup> Da su neicha Jesús inaja adhaatana huecuana risijiji edusu puji. Daja biame, tuna peje jenetia putiana Jordán ena su.

<sup>40</sup> Jordán ena su cuinati putsu, anipetutiana chu maje. Dapia Juan Bautista ja yahui neje cristiano cuana ichaderapirutana eti jude su putiana. <sup>41</sup> Dueji cristiano cuana putitana tu peje su. Uja jaquisatitana huecuana:



—Enei hue, Juan ja aimue ai nimetiuda cuana a biame, tu quisa puana Jesús jepuiti beju butsepi.

<sup>42</sup> Da su dueji dapia eti jude su aniji cuana Jesús peje su jei putana.

## 11

### *Lázaro manuana*

<sup>1</sup> Beju piada deja nedaji anina Lázaro banime. Betania ejude su anina. María, Marta detse sa edue puina. <sup>2</sup> Tueda María ja equene puida Jesús sa ehuaitsi bia su d'uichatana. Mesa echuaina neje ehuaitsi muriatana. <sup>3</sup> Da su betana edue epuna detse ja Jesús peje su deja cuana beitutana tu equisa puji. Uja Jesús quisametana tse:

—Echua Puji, mique ibuneda eshanapa beju nedaji esa.

<sup>4</sup> Jesús ja id'aba putsu, uja puana:

—Aimue tueda emanu mahue. Tueda da nedaji puana Diusu da aida, tucheda cristiano cuana ebame puji. Tueda neda jepuiti ya di tucheda ebameti.

<sup>5-6</sup> Beju nedaji jepuiti equisatani huecuana biame, Jesús da beta tsine anibana. Lázaro, tusa beta edue epuna neje, ebia su ibuneda batana biame, beta tsine anibana. Mue da hora su puti Lázaro peje su. <sup>7</sup> Beta tsine jaitianana su, Jesús ja mesa discípulo cuana, “Meputija neicha Judea yahua su Lázaro esa su”, atana.

<sup>8</sup> Da su discípulo cuana ja tueda atana uja:

—Ebuetsuaji, quetsunu hue mi judío cuana ja dapia yahua su manuameja adhaatana tumu neje. Daja biame, mi neicha putija dapia epuani.

<sup>9</sup> Da su Jesús ja atana huecuana:

—Beju piada tunca beta ejaitiana hora tsine sa yani. Ahua etse tsine su yaseni su, aimue etse ehuaitsitud'itiani mahue, hueda yani putsu. <sup>10</sup> Ahua etse dhidha su yaseni su, beju etse jahuatsitud'iti cua, hueda aimue putsu. Da su, be ai piba biame mepuji. Aimue ema cuaja biame yata huecuana mahue, quema manu hora cuinaji mahue putsu.

<sup>11</sup> Neicha Jesús ja atana huecuana:

—Ecuana sa eshanapa Lázaro mu etahuisa. Yama da eid'edeatiyu.

<sup>12</sup> Da su discípulo cuana ja Jesús uja atana:

—Echua Puji, ahua ene etahuisa su da, esaisiyu.

<sup>13</sup> Daja Jesús ja discípulo cuana quisatana, Lázaro manuana shanapatana biame. Da su Lázaro etahuisa pepe hue putana huecuana. <sup>14</sup> Da putsu, Jesús ja neicha butsepi quisatana huecuana:

—Lázaro beju manuana. <sup>15</sup> Saida hue micuaneseda puji ema dapia mue ani puana, beju micuaneda ema peje su ebia su jei epu putsu. Meputija Lázaro eba puji.

<sup>16</sup> Da su beju pere Tomás ja pia discípulo cuana uja atana:

—Beju ecuaneda di tu neje meputija tu neje tupupai memaracata huecuana puji.

### *Jesús ja Lázaro netianametaibana*

<sup>17</sup> Jesús Betania ejude su cuinati putsu, Lázaro pushi tsine sepulcro su huananubiajiji beju puina. <sup>18</sup> Betania ejude beta kilómetro edusete uquedame Jerusalén ejude naja su anina.

<sup>19</sup> Da putsu, puetana jucuada judío cuana Jerusalén ejude jenetia María, Marta detse epacenciabaja puji. <sup>20</sup> Marta ja Jesús ecuinahu shanapa putsu, cuinanana tu emitsu puji. María mu ete su aniana. <sup>21</sup> Marta ja Jesús mitsu putsu, uja atana:

—Echua Puji, mi upia ani su mu, aimue detse quema edue manu cua puina mahue. <sup>22</sup> Beju daja puana biame, bahue ema Diosu ja pamapa mi ebaja cuana etiata.

<sup>23</sup> Jesús ja Marta uja atana:

—Mique edue neicha eid'eyu beju.

<sup>24</sup> Da su Marta ja Jesús uja atana:

—Ehe, beju pamapa epupe su, manujiji cuana enetianata su, da tsine su quema edue di enetianayu beju ema bahue.

<sup>25</sup> Da su Jesús ja Marta uja atana:

—Ema da manujiji cuana eid'e ameji. Quebata ema peje su jei epuani su, emanu biame, beju neicha eid'eyu. <sup>26</sup> Pamapa eid'e ema peje su jei eputani cuana di, manu putsu, aimue emanuenita huecuana mahue. ¿A mi ye quema mimi su jei epuani?

<sup>27</sup> Da su Marta ja jeutsutana:

—Ehe, Echua Puji, mida da Diosu sa Ebacua. Mida da Diosu sa Jabeituti Deja ecuanaju beju id'uitia, ema jei epuani.

<sup>28</sup> Marta daja mimipe putsu, María ihuatitana. Etsia quisa neje, “Ebuetsuaji beju cuinaitia. Eihuametani mi”, Marta ja María quisatana.

<sup>29</sup> María ja id'aba putsu, beju cuinanana Jesús ebati puji.

<sup>30</sup> Jesús da ejude tsahua su hue tsuhu netiana, Marta ja netia-jusiatana su hue. <sup>31</sup> Beju judío cuana mu ete su anitana María, Marta detse epacenciabaja puji. María tipeida cuinanana batana huecuana. Tueda sepulcro su epadariti puji epuhu pepe putana huecuana putsu, tije atitana huecuana tu neje epadariti puji.

<sup>32</sup> Da su María beju Jesús eneti su cuinatiana su, tu butse su tururuana.

Uja atana Jesús:

—Echua Puji, mi upia ani su mu, aimue detse quema edue manu cua puina mahue.

<sup>33</sup> Jesús ja María, judío cuana neje pamapa su epatani ba putsu, echucuata jatacuamadhatiana.

<sup>34</sup> Da su Jesús ja quisabatana huecuana:

—¿Quepia Lázaro huananubiajiji esa?

Uja jeutsutana huecuana:

—Echua Puji, pueque eba puji.

<sup>35</sup> Da su beju Jesús pana. <sup>36</sup> Judío cuana ja Jesús epani ba putsu, uja jaquisatitana huecuana:

—Mechamaque cuaja ebia su ibuneda bataina Lázaro.

<sup>37</sup> Pia cuana ja mu uja atana:

—Tuahueda padha cuana tuaji aji putsu, ¿jucuaja su ni da mue ai biame a atana mahue Lázaro emanu mahue puji?

### *Lázaro id'eibana*

<sup>38</sup> Jesús da neicha jatacuamadhatiana, sepulcro su enariatiani je. Tueda sepulcro murucu epa su anina. Tumu aida neje terijiji puina. <sup>39</sup> Jesús ja uja atana huecuana:

—Mejemique tumu.

Da su Marta ja atana:

—Echua Puji, beju jia madhada hue huanime, pushi tsine manujiji putsu.

<sup>40</sup> Jesús ja Marta uja jeutsutana:

—Beju yama mi quisaitia Diosu da ebia su tucheda miada eba, ahua mida ema peje su jei epu su.

<sup>41</sup> Da su tumu aida jemideratana huecuana su, Jesús buepa huabata pu putsu, uja Diosu atana:

—Tata, yama mi diusulupai yainia, miada ema eid'abainia putsu. <sup>42</sup> Pamapa quema jabajati cuana miada ema etiainia bahue ema. Beju ye upia cristiano cuana butse su jiahue quita yama mi ebajainia miada ema beituana pashanapata huecuana puji.

<sup>43</sup> Daja Diosu mitsupe putsu, Jesús jubida tsiatsiana uja:

—¡Lázaro, cuinanaque!

<sup>44</sup> Da hora su beju manujiji cuinanana sepulcro jenetia. Tusa eme, ehuatsi detse dhiri ped'u bauta neje babujiji puina. Tusa echua di babujiji puina. Pamapa tusa equita da babujiji puina beju. Da su Jesús ja cuatsasiatana huecuana:

—Mepidhuque tu eputiyu puji.

<sup>45</sup> Daja ba putsu, dueji María neje putitana judío cuana da Jesús peje su jei putana. <sup>46</sup> Tuna duju su piada piada mu Jerusalén ejude su putitana Jesús ja daja atana fariseo cuana equisati puji. <sup>47</sup> Da su beju fariseo, sacerdote huaraji aida cuana jadhitatitana. Uja jaquisatitana huecuana:

—¿Cuaja jia ecuaneda epu? Ye deja ja jucuada ai nimetiuda aida cuana yatani. <sup>48</sup> Ahua tueda daja hue epu su, pamapa cristiano cuana ja da tueda tije yatayu. Tueda echua puji ametayu cua huecuana. Aimue romano huaraji cuana ja tsada ebata mahue. Tuna sa soldado cuana ja ecuana sa templo etaitanamepeta. Ecuana di emanamepetayu huecuana.

<sup>49</sup> Beju piada sacerdote Caifás banime dapia anina. Tueda da pamapa sacerdote sa echua puji puina tueda mara puji. Tuahueda uja atana huecuana:

—Micuaneda mu ai biame bue mahue. <sup>50</sup> Ebia su saida tueda deja Jesús pamanu ecuaneda emanu mahue puji.

<sup>51</sup> Beju Diosu ja Caifás daja mimiametana, Jesús da judío cristiano cuana jepuiti emanu putsu. <sup>52</sup> Aimue judío cuana jepuiti bahui tueda emanu mahue. Pamapa pia Diosu sa dharejiji cuana sa puji di pamapa yahua je manu taji puina tu neje edunemeta huecuana puji. Daja Diosu ja Caifás mimi-ametana, tueda da sacerdote ebia su aida puina putsu. <sup>53</sup> Da su da tsine jenetia judío cuana sa huaraji aida cuana jaquisatitana cuaja Jesús manuameme ya puji. <sup>54</sup> Da putsu beju, Jesús aimue cristiano cuana duju je puniunetiana mahue. Beju Judea yahua jenetia cuinanana. Efraín ejude banime su putiana. Tueda ejude da d'anita yahua naja su anina. Dapia beju quejucua tsine puji anitiana mesa discípulo cuana neje.

<sup>55</sup> Judío cuana sa pascua tsine beju enariatiani su, dueji cristiano cuana pamapa pia yahua cuana jenetia Jerusalén ejude su putitana. Tsine cuinatiji mahue su hue, Jerusalén su putitana huecuana erucuati puji, Diosu butse su saida epu puji, daja tuna sa jacuatsasiati putsu. <sup>56</sup> Pamapa ejude je Jesús quisabaniunetiatana huecuana. Templo su cuinati putsu, uja jaquisatitana huecuana:

—¿Cuaja jia ahua Jesús tsine puji epue, ahua mahue?

<sup>57</sup> Fariseo, sacerdote huaraji aida cuana ja cuatsasiatana cristiano cuana, ahua Jesús quepia ebainia je quisa paputa huecuana puji. Daja atana huecuana, tu inaja putsu.

## 12

*María ja puida Jesús sa ehuaitsi bia su d'uichatana*  
(Mateo 26.6-13; Marcos 14.3-9)

<sup>1</sup> Beju sucuta tsine yani hue pascua tsine puji Jesús da Lázaro sa ete su Betania ejude su putiana. Tueda Lázaro da Jesús ja equene id'emetaibana. <sup>2</sup> Dapia jana atana huecuana Jesús sa puji. Lázaro di tu neje diadiana. Marta ja jana derutana. <sup>3</sup> Da su beju mesa edue María ja litro edusetete chujeneda saida puida dusetana. Tueda puida nardo banime puina. Duse putsu, Jesús sa ehuaitsi bia su d'uichatana. Da

su muriatana mesa echuaina neje. Ehuani neje ete sejeatana. <sup>4</sup> Beju Judas Iscariote di dapia anina. Jesús sa piada discípulo puina. Tueda quitaita ja Jesús emenajatiata puina. Tuahueda María ja daja yatani ba putsu, uja puana:

<sup>5</sup> —Tueda puida da piada mara pucue mudu chuje tupu. ¿Jucuaja su ni da aimue ecuaneda iruitia mahue puri cuana etsahua puji?

<sup>6</sup> Beju Judas ja aimue puri cuana ibunebatana mahue. Tsi puji bahui da tueda puina. Discípulo cuana sa chipilu quinaji puina putsu, chipilu shitara su tsi bahue puina. Da putsu, Judas daja puana. <sup>7</sup> Da su beju Jesús ja Judas atana:

—Be daja puji. María ja quema manu tsine cuinaji mahue su, ema puida neje papitana. <sup>8</sup> Puri cuana da micuana neje pamapa hora su yanita. Ai hora papu micuaneseda tsada su, tsahua cua huecuana. Ema mu aimue micuana neje daja yani mahue. Quejucua tiempo chidi hue ema micuana neje yaniti.

*Lázaro di manuameja adhaatana judío cuana sa ehuidusuji cuana ja*

<sup>9</sup> Beju dueji judío cuana ja Jesús Betania ejude su yani shanapapirutana. Da su tueda ejude su beju putitana huecuana Jesús ebati puji. Lázaro di ebati puji putitana huecuana, tueda id'eibana putsu.

<sup>10</sup> Sacerdote huaraji aida cuana ja Lázaro di manuameja adhaatana, tu id'eibana jepuiti, dueji cristiano cuana Jesús peje su jei putana putsu. <sup>11</sup> Cristiano cuana sacerdote cuana peje jenetia netideratasaina Jesús tije ya puji. Da putsu, sacerdote cuana ja Lázaro di manuameja atana.

*Jesús da Jerusalén ejude su nubiana*

*(Mateo 21.1-11; Marcos 11.1-11; Lucas 19.28-40)*

<sup>12</sup> Dueji cristiano cuana Jerusalén su putitana pascua tsine ebati puji. Pia huenati su bahue putana huecuana Jesús Jerusalén ejude su enubi. <sup>13</sup> Da su beju tumi ina nime eina cuana dheutana huecuana. Da neje ejude tsahua su putitana huecuana Jesús etsu puji. Jesús ba putsu, tsiatsiapirutana huecuana uja:

—¡Gloria, Tata Diosu sa Jabeituti Deja epusiu! ¡Diosu sa ebani su tueda epusiu! ¡Diosu ja tueda paibunebata! ¡Tueda da israelita cuana sa Echua Puji! ¡Gloria Tata Diosu!

<sup>14</sup> Da su beju Jesús ja asunu chidi bianitana, cuaja Diosu sa quirica su derejiji yani batame. Uja derejiji yani: <sup>15</sup> “Be iyuame mepuji Jerusalén ejude su aniji cristiano cuana. Mechamaque micuana sa Echua Puji epusiu asunu bia je.” <sup>16</sup> Beju discípulo cuana ja tueda mimi mue shanapa cuaja

epuani. Jesús cielo su putibana su, da su chu beju shanapaenitana huecuana cuaja epuani tueda derejiji mimi cuana. Daja Jesús sa pu taji puina Jerusalén ejude su, Diusu sa quirica su daja derejiji putsu, shanapatana huecuana.

<sup>17</sup> Equene Lázaro id'eibana batana cuana ja pia cristiano cuana ejude su butsepi pamapa quisatana. <sup>18</sup> Da putsu, pamapa su ejude jenetia cuinanatana Jesús etsu puji. <sup>19</sup> Da su fariseo cuana tuneda cama jaquisatitana uja:

—Mebaque hue, pamapa cristiano cuana tu tije epuhu. ¿Cuaja ni ecuaneda a cua?

### *Griego cristiano cuana ja Jesús chacutana*

<sup>20</sup> Beju dapia Jerusalén ejude su piada piada extranjero cuana Grecia yahua jenetia anitaina pascua tsine eba puji. <sup>21</sup> Ye cuana ja da Felipe nariatana. Uja atana huecuana:

—Tata, Jesús baja ecuanaju.

<sup>22</sup> Da su Felipe ja Andrés quisatitana. Tuatseda Jesús quisatitana cuaja extranjero cuana putana. <sup>23</sup> Da su Jesús ja id'aba putsu, uja atana:

—Beju quema manu hora enariatiani. Manu putsu, ema neicha eid'eyu. Cristiano cuana ema ba putsu, ema pamapa pia cuana ebia su tucheda eni eshanapata huecuana. <sup>24</sup> Yama micuana butsepi equisainia, quema manu da piada trigo ejaja yahua su papaicha cua nime. Ahua ejaja yahua su mue dajaja su, ahua med'i neje mue biapapa su, da su piada hue yaniti. Beju ahua yahua su papajiji su, jucuada ejaja cuana ehuruti. <sup>25</sup> Quebata ja Diusu jei aja mahue yata su, aimue tueda Diusu neje cielo su eid'e epueniti mahue. Quebata ja mu emanu teje Diusu jei yata su, tueda saida Diusu neje cielo su eid'e epueniti. <sup>26</sup> Quebata ja ema meabajaja yata su, ema tije paata. Beju quepia ema yani su dapia da ema neje quema emebajaji cuana paanitita. Quebata ja ema emebajatani, quema Tata Diusu ja tueda saida echuje etiatayu.

<sup>27</sup> 'Beju jiahue mu ema ebia su etacuamadhatiani. ¿Ai yama, "Tata Diusu, d'ejí su ema aque ye sufrimiento epusiu jenetia", ebaja bata? Aimue daja yama quema Tata ebaja mahue, ema emanu puji pueana putsu. <sup>28</sup> Da su Jesús ja mesa Tata Diusu uja atana:

—Tata, cristiano cuana bameque mida da ebia su aida, tucheda eni.

Jesús beju daja mimipeana su, Tata Diusu ja cielo jenetia uja atana:

—Beju yama quema tucheda bameana. Neicha yama daja yayu.

<sup>29</sup> Dapia eneti cristiano cuana ja Diosu sa etsui id'aba putsu, piada piada, “Etiriani beju”, putana. Pia cuana mu, “Angel ja tueda quisatana”, putana.

<sup>30</sup> Da su Jesús ja atana huecuana:

—Tueda etsui da mimiana micuana sa saida equisa puji. Aimue quema puji mahue. <sup>31</sup> Tiempo cuinaitia beju Diosu ja ye mundo su aniji cuana ejuzga puji. Cristiano madhada cuana sa echua puji Ishahua ejusiata beju. <sup>32</sup> Yama dueji cristiano cuana ema peje su jei yameyu, judío cuana ja curusu su ema ejemitsuata su.

<sup>33</sup> Tueda mimi neje Jesús ja cristiano cuana cuaja tueda emanu shanapametana. <sup>34</sup> Da su cristiano cuana ja Jesús uja atana:

—Beju ecuana sa jacuatsasiati quirica cuana su, “Diosu sa Jabeituti Deja da eid'e epueni. Aimue emanu mahue”, derejiji yani. Da su, ¿jucuaja su mida, “Diosu sa Jabeituti Deja curusu su ejemitsuatayu”, epuani? ¿Aidhe da ye Diosu sa Jabeituti Deja?

<sup>35</sup> Da su Jesús ja jeutsutana huecuana:

—Ema da hueda nime. Quejucua tsine hue micuana neje ema yaniti micuana Diosu sa jabuetsuati cuana ebuetsua puji. Jei mepuque ema peje su, micuana neje ema yani tupu, micuaneda matsejiji epu mahue puji. Be apuda su puniunetiji cuana nime mepuji. Tuneda da castigo su eputita. <sup>36</sup> Ema da hueda nime. Jei ema meaque, ema micuana neje yani tupu. Jei ema peje su pu putsu, micuaneda hueda su epuniunetiani cristiano cuana nime epu, Diosu sa ebacua cuana micuaneda epu.

Beju mimipe putsu, Jesús da cristiano cuana peje jenetia putiana tu mehua yaniti puji.

### *Judío cuana Jesús peje su jei puja mahue putana*

<sup>37</sup> Jesús da jucuada ai nimetiuda aida cuana atana biame, judío cuana tu peje su jei puja mahue putana. <sup>38</sup> Tuna jepuiti Diosu sa profeta Isaías chenu ja quirica su uja deretaidha:

Diosu, aimue aiya biame ecuanaju sa mi jepuiti quisa su jei putana mahue.

Miada mique tucheda bameana biame, aimue jei puja putana mahue.

<sup>39</sup> Beju cuaja jei a taji mahue batana huecuana. Uja Isaías chenu ja deretaidha neicha:

<sup>40</sup> Diosu ja padha nime, nimetadada ametana huecuana jei paputa mahue huecuana puji.

Daja Diosu ja atana huecuana aimue pabatita, pashanapatita mahue puji, daja huecha be pasiapatita Diosu peje su tuahueda pasaisiameta huecuana puji.

<sup>41</sup> Jesús ye mundo su pueji mahue su, Isaías ja tueda tucheda eni shanapataidha. Da putsu, daja Isaías chenu ja Jesús jepuiti deretaidha.

<sup>42</sup> Beju daja biame, jucuada judío cuana Jesús peje su jei putana. Piada piada ehuidusuji cuana di tu peje su jei putana. Cuatsa mahue jei putana huecuana, fariseo cuana ebia su iyuda putsu. Quisa puja mahue putana huecuana, Jesús peje su jei putana jepuiti, cuapuitime fariseo cuana ja jadhitati ete su mue nubiamé ata cua huecuana putsu. <sup>43</sup> Diusu ebia su fariseo cuana iyubatana huecuana.

<sup>44</sup> Da su beju Jesús ja uja jubida quisatana cristiano cuana:

—Aidhe de ema peje su jei epuani, tueda da ema beituji peje su di jei epuani. <sup>45</sup> Aiya da ema ebatani, daja huecha ema beituji di ebatani. <sup>46</sup> Ema da hueda nime. Quebata ema peje su jei epu, aimue apuda su epuniunetitani cuana nime epu mahue. <sup>47-48</sup> Mue ema ye mundo su pue cristiano cuana ematse puji mahue. Beju yama pueana cristiano cuana d'ei su ya puji. Ahua aiya quema quisa cuana mue aja mahue yata su, Diusu ja tueda ematsetayu. <sup>49</sup> Aimue ema quema piba cuana emimiani mahue. Tata Diusu ja ema cuatsasiatana ai cuana bahui yama equisainia. <sup>50</sup> Bahue ema ahua cristiano cuana quema Tata sa jabuetsuati cuana jei yata su, cielo su eid'e epuenitayu huecuana. Da putsu, quema Tata ja ema equisatani cuana bahui yama ebuetsuainia.

## 13

### *Jesús ja mesa discípulo cuana sa ehuaitsi rucuatana*

<sup>1</sup> Beju piada tsine hue anina pascua tsine puji. Jesús bahue puana mesa manu hora beju janariatiana mesa Tata peje su eputi puji. Mesa dharejiji cuana ye mundo su yani ebia su ibuneda batana mesa manu teje.

<sup>2</sup> Jesús mesa discípulo cuana neje ediadiani cama, Ishahua ja Judas Iscariote ja Jesús pamenajatiata puji pibametana.

<sup>3</sup> Jesús quitaita bahue puana tueda Diusu peje jenetia pueana. Daja huecha Diusu peje su esiapatiyu. Diusu ja tueda pamapa pia huaraji cuana ebia su aida, tucheda atana, Jesús bahue puana. <sup>4</sup> Da su misha jenetia netianana. Mesa ebia jud'uji huijatana. Paño neje jatimairisitiana. <sup>5</sup> Emeji su yahui icha putsu, discípulo cuana sa ehuaitsi rucua barereatana. Daja a putsu, paño neje ehuaitsi muriatana.

<sup>6</sup> Jesús ja Simón Pedro sa ehuaitsi rucua ja atana su, Pedro ja uja atana:

—Echua Puji, ¿a da miada quema ehuaitsi erucua?

<sup>7</sup> Jesús ja Pedro jeutsutana:



—Beju jiahue aimue miada eshanapainia mahue cuaja yama yainia. Pia tsine chu da miada eshanapa.

<sup>8</sup> Beju Pedro ja Jesús atana:

—Aimue miada quema ehua tsi erucua mahue, mida da quema Echua Puji putsu.

Da su Jesús ja Pedro atana:

—Ahua mique ehua tsi yama erucua mahue su, aimue miqueda ema neje ai biame a taji mahue beju.

<sup>9</sup> Da su Pedro ja Jesús uja atana:

—Echua Puji, ahua daja su, quema eme, echua di rucuaque.

<sup>10</sup> Jesús ja tueda atana:

—Quebata nahuijiji sa mu ehua tsi bahui neicha rucua taji, equita pamapa saida rucujiji putsu. Diusu ja jucha dhipajiji cuana da rucujiji cuana nime. Micuaneda mu saida, rucujiji nime beju. Daja biame, aimue micuaneda pamapa su saida, rucujiji nime mahue.

<sup>11</sup> Daja Jesús puana, Judas ja tueda emenajatiata bahue puana putsu.

<sup>12</sup> Tuna sa ehua tsi Jesús ja rucua pe putsu, mesa ebia jud'uji jajud'utibana. Beju neicha misha su anitutiyu putsu, uja discípulo cuana atana:

—¿Ahua eshanapainia micuaneda cuaja yama micuana aitia? <sup>13</sup> Beju micuaneda ema, Ebuetsuaji, Echua Puji, yainia. Enei hue, daja da ema. <sup>14</sup> Beju ema da micuana sa Ebuetsuaji, Echua Puji biame, micuana sa ehua tsi yama rucua itia emebajaji pu cua nime. Da su micuaneda cama di huamahuama micuana sa jamebajati taji. <sup>15</sup> Daja yama micuana aitia micuaneda cama di memebajatique puji. <sup>16</sup> Ene putsu, yama micuana equisainia, emebajaji da aimue mesa emetse ebia su aida pu cua mahue. Daja huecha beituji da aimue tu beituji ebia su aida pu cua mahue. <sup>17</sup> Ahua micuaneda ye quema quisa cuana ya su, beju micuaneda beidaji epu.

<sup>18</sup> Quema jadhareti cuana yama eshanapainia. Beju piada ja micuaneda ema emenajatiata, cuaja uja Diusu sa quirica su derejiji yani batame: “Ema neje diadia bahue epu, tueda ema neje madhada hue netianana.” <sup>19</sup> Jiahue yama micuana ye ai cuana equisainia, daja puji mahue su. Beju daja epu su, micuaneda ye yama equisainia epiba. Piba putsu, micuaneda ema peje su jei epu. <sup>20</sup> Ahua quebata ja quema jabeituti saida ebatsuta su, tuahueda ema saida ebatsutani pu cua nime. Daja huecha ahua quebata ja ema saida ebatsuta su, tuahueda ema beituji di saida ebatsutani pu cua nime.

*Jesús ja discípulo cuana quisatana Judas ja tueda emenajatiata*

*(Mateo 26.20-25; Marcos 14.17-21; Lucas 22.21-23)*

<sup>21</sup> Jesús daja mimipe putsu, echucuata jatacuamadhapirutiana. Uja atana huecuana:

—Ene putsu, yama micuana equisainia, piada ja micuaneda ema emenajatia deja madhada cuana peje su.

<sup>22</sup> Da su discípulo cuana tuneda cama jachamapirutitana. Quebata jia da pu cua tuna duju su shanapaja atana huecuana. <sup>23</sup> Beju Jesús ja ibuneda bataina discípulo da Jesús naja su anina. <sup>24</sup> Tueda discípulo da Simón Pedro ja seña neje shanapametana Jesús paquisabata puji uja: “¿Aiya mi emenajatiata?” <sup>25</sup> Da su Jesús peje su janariaderati putsu, uja quisabatana:

—Echua Puji, ¿aidhe da?

<sup>26</sup> Jesús ja jeutsutana:

—Pan ped'u beju yama etsabia. Quebata yama etia, tueda da.

Da su Jesús ja pan ped'u tsabiatana. Tsabia putsu, Judas Iscariote tiatana. <sup>27</sup> Judas ja pan ped'u einatsutani cama, Ishahua ja tueda madhada pibametana. Da su Jesús ja Judas atana:

—Mi aja yainia, tipeida atique beju.

<sup>28</sup> Mue quebata pia discípulo cuana ja biame shanapa atana cuaja Jesús ja Judas daja cuatsasiatana. <sup>29</sup> Judas chipilu quinaji puana putsu, discípulo cuana ja Jesús ja Judas ebeitutani ba putsu, tsine puji ai chidi ebajati puji pepe putana huecuana, ahua chipilu puri cuana etiati puji pepe putana huecuana. <sup>30</sup> Da su Judas ja pan ped'u inatsu putsu, cuinanana. Beju apuda puina.

### *Jacuatsasiati eichacua*

<sup>31</sup> Judas cuinanana su, Jesús ja pia discípulo cuana uja atana:

—Beju jiahue da cristiano cuana ja ema ebia su tucheda ebata, Tata Diusu sa tucheda quema yani putsu. <sup>32</sup> Diusu ja ema mesa tucheda tia putsu, pamapa ja ebata. <sup>33</sup> Edue cuana, quejucua hora puji hue ema micuana neje yani. Micuaneseda puji mu cuaja puti taji mahue ema eputi su. Cuaja yama judío cuana sa ehuidusuji cuana quisana nime, daja yama micuana jiahue quita equisainia. Micuaneda da ema echacu biame, ema yani su micuaneda cuaja puti taji mahue ehati. <sup>34</sup> Beju jiahue yama micuana pia jacuatsasiati eichacua etiainia: Ibuneda mebatique micuaneda cama huamahuama. Cuaja yama micuana ibuneda ebainia nime, daja huecha micuaneda cama huamahuama ibuneda mebatique. <sup>35</sup> Ahua micuaneda daja huamahuama ibuneda ehati su, pamapa cristiano cuana ja micuaneda da quema ebuqueji cuana eshanapata.

*Pedro da, “Yama Jesús mue shanapa”, epu Jesús ja quisatana (Mateo 26.31-35; Marcos 14.27-31; Lucas 22.31-34)*

<sup>36</sup> Simón Pedro ja Jesús uja quisabatana:

—Echua Puji, ¿quepia mi epuhu?

Jesús ja jeutsutana:

—Quepia ema epuhu su aimue mida jiahue ema ebuque mahue. Pia tsine chu mida ema ebuque.

<sup>37</sup> Da su Pedro ja Jesús atana:

—Echua Puji, ¿jucuaja su ni mi yama aimue buque cua mahue? Jiahue quita ema manu cua mi jepuiti.

<sup>38</sup> Da su Jesús ja Pedro jeutsutana uja:

—¿A da ene mida manu cua ema jepuiti? Yama mi butsepi equisainia, huaripa deja queiji mahue su, mida, “Aimue yama Jesús shanapa”, quimisha nuati epu.

## 14

*Jesús da Diosu peje su epuhu edid'i nime*

<sup>1</sup> ‘Be ebia su mepibajucuatiji. Cuaja micuaneda Diosu peje su enimetuheatiani nime, daja huecha ema peje su di menimetuheatique. <sup>2</sup> Beju cielo su quema Tata Diosu sa jucuada ani jude cuana yani. Yama micuana butsepi equisainia. Aimue ema bid'umimi epuani mahue. Ema da eputi ani jude micuaneseda ebasetati puji. <sup>3</sup> Beju ani jude basetati putsu, ema esiapati micuana edusu puji, dapia micuaneda ema neje yanieniti puji. <sup>4</sup> Beju micuaneda eshanapainia quepia ema eputi; daja huecha cuaja ema eputi.

<sup>5</sup> Da su Tomás ja Jesús atana:

—Echua Puji, mue ecuanaju shanapa quepia mi eputi. Bue mahue ecuanaju cuaja mi eputi.

<sup>6</sup> Jesús ja jeutsutana:

—Ema da Diosu peje su epuhu edid'i nime. Ema ene quita, butsepi emimiani. Ema jepuiti cristiano cuana eid'e epuenitayu. Ema peje su jei pu putsu bahui, cristiano cuana Tata Diosu peje su cuinatita cua. <sup>7</sup> Ahua ene quita micuaneda aidhe ema eshanapainia su, quema Tata di micuaneda shanapa cua. Beju micuaneda Tata Diosu eshanapaeninia, ema bana putsu.

<sup>8</sup> Da su Felipe ja Jesús atana:

—Echua Puji, bameque ecuanaju Tata Diosu. Tueda beju ecuanaju sa tupu.

<sup>9</sup> Jesús ja Felipe jeutsutana:

—Felipe, dajucua tiempo micuana neje ema yani biame, ¿mue miada ema shanapa tsuhu? Quebata ja ema batana, tuahueda Tata Diosu di batana. Da su, ¿ai puji ni miada ema ebajainia yama micuana Tata Diosu ebame puji? <sup>10</sup> ¿Aimue

mida jei epuani mahue ema Diusu neje piada hue epuani? Beju yama micuana quisana cuana da aimue quema piba jenetia mahue. Tueda mu Tata Diusu sa piba jenetia bahui. Tata Diusu ema neje yani putsu, mesa ai tsada cuana yatani ema jepuiti. <sup>11</sup> Jei ema meaque, ema Diusu neje beju piada hue epuani. Ahua aimue micuaneda quema mimi cuana su jei puja mahue su, da su yama yainia nimetiuda ai cuana jepuiti dhucuana ema peje su jei mepuque. <sup>12</sup> Ene putsu, yama micuana equisainia, quebata ema peje su jei epuani, tuahueda di yama ai cuana ana nime yatayu. Beju ebia su aida ai nimetiuda cuana yatayu, ema Tata Diusu peje su eputi putsu. <sup>13</sup> Ahua micuaneda quema tsada epuani cuana ebaja su, beju yama etiyu cristiano cuana ema aida pabata puji. <sup>14</sup> Yama micuana sa jabajati cuana yayu, ahua micuaneda quema ai tsada cuana ya su.

*Jesús ja Espíritu Santo ebeitu jamitsuti tiatana*

<sup>15</sup> Ahua micuaneda ema ibuneda ebainia su, quema jacuatsasiati cuana meaque. <sup>16</sup> Yama quema Tata Diusu ebajati pia Etsahuaji micuana peje su pabeituta puji, micuana neje paanieniti puji. <sup>17</sup> Tueda da Espíritu Santo banime. Tuahueda Diusu sa ene quita jabuetsuati cuana micuana ebuetsuata. Diusu tsada mahue cristiano cuana ja aimue tueda batsuta cua mahue, aimue tueda eshanapatani mahue huecuana putsu. Beju micuaneda mu tueda eshanapainia, micuana neje yani putsu. Micuana neje tueda yanienitiyu. <sup>18</sup> Aimue yama micuana emesia mahue, micuana peje su ema esiapatiyu putsu. <sup>19</sup> Quejucua hora jenetia beju Diusu tsada mahue cristiano cuana ja aimue ema ebata mahue. Micuaneda mu ema eba. Ema da eid'e epueni putsu, micuaneda di eid'e epueniyu. <sup>20</sup> Espíritu Santo micuana peje su ecuina su, da hora su micuaneda bahue epueniyu ema Tata Diusu neje beju piada hue epuani. Daja huecha micuaneda di ema neje piada hue epuani micuaneda bahue epueni. <sup>21</sup> Quebata ja ema ibuneda ebatani, tuahueda quema jacuatsasiati cuana yapetayu. Ema ibuneda baji cuana quema Tata ja ibuneda ebata. Yama di ibuneda eba huecuana. Ema eshanapameeni huecuana.

<sup>22</sup> Da su beju pia discípulo Judas banime Iscariote mahue ja Jesús quisabatana uja:

—Echua Puji, ¿jucua ja su mida ecuanaju peje su bahui eshanapameeniti, pia cuana peje su mu mahue?

<sup>23</sup> Da su Jesús ja jeutsutana:

—Quebata ja ema ibuneda ebatani, tuahueda quema jacuatsasiati cuana yapetayu. Beju quema Tata ja tueda ibuneda ebata. Ema, quema Tata tu neje yanienitiyu. <sup>24</sup> Quebata ja

ema mue ibuneda ebatani mahue, tuahueda quema jacuat-sasiati cuana aimue aja yata mahue. Beju ye yama equisainia cuana da ema beituji Tata sa quisa cuana.

<sup>25</sup> Jiahue micuana neje ema yani tupu, yama tueda ai cuana micuana equisainia. <sup>26</sup> Ema micuana neje aimue beju su, Tata Diosu neje etseju Espíritu Santo ebeitu tuahueda beidaji meametaque, metsahuataque puji. Tuahueda pamapa ema jepuiti ai cuana micuana ebuetsuata. Daja huecha pamapa yama micuana quisana cuana epibameta.

<sup>27</sup> Beju micuana yama nimepijajajiji eichajusiayu. Yama micuana enimepijajameinia. Diosu peje su jei puja mahue cristiano cuana aimue nimepijajata cua mahue. Yama bahui detse ene quita nimepijajame cua. Be metacuamadhatiji. Be iyuame mepuji. <sup>28</sup> Beju micuaneda ema eputiyu id'abaitia. Ema esiapatiyu micuana neje neicha yani puji id'abaitia. Ahua micuaneda ene ema ibuneda ebainia su, beidaji micuaneda epu, ema Tata Diosu peje su eputi putsu, tueda ema ebia su aida putsu. <sup>29</sup> Jiahue ema putiji mahue su, yama micuana ye ai cuana equisainia. Beju ema eputi su, micuaneda ye yama equisainia ai cuana epiba. Piba putsu, micuaneda ema peje su jei epu.

<sup>30</sup> Beju ema Ishahua ja enariatasiu. Tueda da Diosu tsada mahue cuana sa echua puji. Da putsu, aimue quema tiempo yani mahue micuana neje equisati puji. Beju daja biame, aimue Ishahua ema ebia su tucheda mahue. <sup>31</sup> Pamapa quema Tata ja ema cuatsasiatana cuana daja yama yainia Diosu tsada mahue cristiano cuana ja yama Diosu ibuneda ebainia pashanapata puji. Tusa ai cuana bahui yama yainia pashanapata huecuana puji. Beju menetianaque. Meputija.

## 15

### *Uva equi jepuiti quisa*

<sup>1</sup> Jesús ja cristiano cuana daja hue quisainiame atana:

—Ema da uva equi nime. Quema Tata Diosu da uva equi quinaji nime. Ema peje su jei eputani cuana da echa chidi cuana nime. <sup>2</sup> Uva quinaji ja echa cuana ejaja pu bue mahue echadheutani jajaji paputa puji. Daja huecha quema Tata Diosu ja ema peje su jei eputani cuana ebuetsuatani tu butse su saida, nimebutsepi papuniuneti huecuana puji. <sup>3</sup> Beju micuaneda da nimebutsepi, quema jabuetsuati cuana jei ana putsu. <sup>4</sup> Cuaja micuaneda ema neje dunejiji yani nime, daja hue ema neje dunejiji anime mepuque. Piada echa bahui aimue detse jajaji pu cua mahue. Echa da equi mahue su, aimue detse jajaji pu cua mahue. Daja huecha micuaneda

cuaja nimbebutsepi pu taji mahue, ahua ema neje dunejiji mahue su.

<sup>5</sup> 'Ema da equi nime. Micuaneda da echa cuana nime. Quebata da ema neje daja hue dunejiji anime epuani, tuahueda jucuada ai saida cuana Diusu sa puji yata. Ahua aimue micuaneda daja hue ema neje dunejiji mahue su, aimue ai saida cuana Diusu sa puji a cua mahue, micuana mehua putsu. <sup>6</sup> Quebata da aimue ema neje dunejiji yani mahue, tueda da echa sarajiji nime. Beju jusiaderajiji epu. Cuati su ed'ed'a puji bahui saida.

<sup>7</sup> 'Ahua micuaneda ema neje daja hue dunejiji anime epu su, ahua quema jabuetsuati cuana daja hue aniname ya su, da su Diusu ja micuana sa jabajati ai cuana etiatayu. <sup>8</sup> Beju Diusu sa tsada micuaneda ai saida cuana ya. Ahua micuaneda daja ya su, quema ene quita ebuqueji cuana epu. Quema Tata Diusu sa tucheda cristiano cuana ebame. <sup>9</sup> Yama micuana ibuneda ebainia, cuaja quema Tata ja ema ibuneda ebatani nime. <sup>10</sup> Tueda ibuneda neje meanique. Ahua micuaneda quema jacuatsasiati cuana yainia su, daja micuaneda tueda ibuneda neje yaniti. Daja quema Tata sa ibuneda neje ema yani, yama tusa jacuatsasiati cuana yapeinia putsu.

<sup>11</sup> 'Daja yama micuana quisana micuaneda ema neje ebia su beidaji epu puji. <sup>12</sup> Yama micuana ecuatsasiainia uja: Ibuneda mebatique huamahuama, cuaja yama micuana ibuneda ebainia nime. <sup>13</sup> Ahua etse mesa eshanapa cuana ebia su ibuneda ebainia su, tuna sa eturuca etse manu cua. <sup>14</sup> Ahua micuaneda quema jacuatsasiati cuana yape su, beju quema eshanapa cuana epu. <sup>15</sup> Aimue micuana yama emebajaji cuana nime ebainia mahue. Emetse ja mesa emebajaji cuana aimue pamapa mesa piba cuana equisatani mahue. Yama mu pamapa quema Tata ja ema ai quisatana cuana micuana quisapeana, micuaneda da quema eshanapa cuana putsu. <sup>16</sup> Aimue micuaneda ema dhareana mahue. Beju yama mu micuana dhareana. Yama micuana huaratiana micuaneda ai saida eni cuana ya puji. Da su Tata Diusu ja pamapa micuana sa jabajati cuana micuana etiatayu, ahua micuaneda quema tsada epuani cuana ebaja su. <sup>17</sup> Neicha yama micuana ecuatsasiainia: Huamahuama ibuneda mebatique.

*Diusu tsada mahue cristiano cuana ja Jesús, mesa dharejiji cuana neje duininibatana*

<sup>18</sup> 'Ahua Diusu tsada mahue cristiano cuana ja micuana eduininibata su, mepibatique ema equene duininibatana huecuana. <sup>19</sup> Ahua micuaneda da Diusu tsada mahue cuana pu cua su, da su micuana ibuneda bata cua huecuana, tuna

nime micuaneda tupupai pu cua su. Beju yama micuana dhareana Diosu tsada mahue cristiano cuana duju jenetia. Da putsu, micuana eduininibatani huecuana, aimue micuaneda tuna nime mahue putsu. <sup>20</sup> Mepibaenique quema jaquisati cuana: “Emebajaji da aimue mesa emetse ebia su aida pu cua mahue.” Quebata cuana ja quema jabuetsuati cuana jei yatani, daja huecha micuana sa jabuetsuati cuana di jei yata huecuana. Ema nedaneda ameji cuana ja daja huecha micuaneda di nedaneda yametayu. <sup>21</sup> Daja madhada hue micuana yata huecuana, micuaneda da quema dharejiji putsu, aimue ema beituji Tata eshanapatani mahue huecuana putsu.

<sup>22</sup> ‘Ahua ema tuna equisa puji mue pue pu cua puana su, aimue detse tuneda juchaji puta cua puina mahue. Beju tuneda mu juchaji, yama equisainia huecuana putsu. <sup>23</sup> Quebata ema eduininibatani, tuahueda quema Tata di eduininibatani. <sup>24</sup> Ahua yama tuna duju su ai nimetiuda aida cuana ana mahue pu cua su, aimue tuneda juchaji puta cua puina mahue. Mue aiya biame daja nimetiuda aida cuana yama yainia nime atana mahue. Quema ai nimetiuda aida cuana batana huecuana biame, ema eduininibatani huecuana. Quema Tata neje di eduininibatani huecuana. <sup>25</sup> Tuna sa jacuatsasiati quitaita su uja derejiji yani: “Tuneda ema duininibatana, ema jucha mahue biame.”

<sup>26</sup> ‘Beju yama Espíritu Santo Etsahuaji micuana peje su ebeitu. Tuahueda micuana Diosu sa ene quita, butsepi jabuetsuati cuana eshanapametayu. Micuana etsahuata, enimetucheameta. Tueda Diosu peje jenetia micuana peje su ecuinati. Tueda ema jepuiti saida quisa enetiacuinatayu. <sup>27</sup> Micuaneda di ema jepuiti saida quisa enetiacuinayu, ema neje equene jenetia aniana putsu.

## 16

<sup>1</sup> ‘Daja yama micuana quisana micuana enimetucheame puji, ema peje su jei epuriji mahue puji. <sup>2</sup> Micuana duinibaji cuana ja jadhitati jude ete su menubique mahue yata. Diosu sa tsada yatani pepe eputani huecuana, micuana manuame putsu. <sup>3</sup> Daja yatayu huecuana, Tata Diosu, ema mue shanapa putsu. <sup>4</sup> Jiahue yama micuana tueda ai cuana equisainia. Beju tueda tiempo madhada ecuina su, micuaneda epiba yama tueda ai cuana butsepi quisana.

### *Espíritu Santo jepuiti quisa*

‘Ye chu beju yama micuana tueda ai cuana equisainia. Ema micuana neje yani putsu, aimue equene yama tueda ai cuana quisana mahue. <sup>5</sup> Quema Tata peje su ema puti hora beju

enariatiani. Daja biame, mue quebata ja biame micuaneda ema uja quisaba: “¿Quepia mida eputi?” <sup>6</sup> Beju micuaneda ebia su epibapibani, yama micuana tueda ai cuana equisainia putsu. <sup>7</sup> Ene putsu, yama micuana butsepi yainia, ebia su saida micuaneseda puji ema eputi puji. Ahua ema eputi mahue su, aimue Espíritu Santo epue mahue micuana etsahua puji. Ahua ema eputi su, yama tueda ebeitu micuana peje su. <sup>8-11</sup> Tueda epue su, cristiano cuana da juchaji eshanapameta, ema peje su aimue jei eputani huecuana mahue putsu. Beju aimue micuaneda ema eba mahue. Ema Tata Diosu peje su eputi putsu, cristiano cuana tu peje su butsepi pu cua, ahua ema peje su jei eputa huecuana su. Daja Espíritu Santo ja cristiano cuana eshanapametayu. Tueda epue su, ye mundo emetse Ishahua matsejiji cristiano cuana eshanapameta. Da putsu, Diosu ja pamapa ema peje su jei puja mahue cuana di ematsetayu.

<sup>12</sup> ‘Beju pia ai quisa cuana yama micuana quisaja yainia. Aimue micuana equisa mahue, jiahue micuaneda cuaja shanapa taji mahue ebainia putsu. <sup>13</sup> Espíritu Santo epue su, micuana pamapa Diosu sa ene quita jabuetsuati cuana butsepi eshanapametayu. Cuaja epu ai cuana micuana eshanapametayu. Tata Diosu sa jabuetsuati cuana bahui ebuet-suatayu. <sup>14</sup> Tueda quema puji saida emimi. Quema piba cuana micuana eshanapameenitayu. <sup>15</sup> Quema Tata Diosu da ema neje beju piada hue epuani. Pamapa tusa ai cuana da quea di epuani. Tuahueda micuana tueda ai cuana pamapa saida eshanapameenitayu.

### *Discípulo cuana da beidaji eputa*

<sup>16</sup> ‘Quetsunu quita hue beju ema eputiyu. Aimue micuaneda ema eba mahue beju, Tata Diosu peje su ema eputi putsu. Quejucua tsine beju ejaitiana su, micuaneda ema neicha ebayu.

<sup>17</sup> Jesús daja mimipeana su, discípulo cuana huamahuama jaquisabatitana uja:

—¿Jucujaja su da tueda, “Quetsunu quita hue ema eputiyu. Aimue micuaneda ema eba mahue. Quejucua tsine beju ejaitiana su da, micuaneda neicha ema ebayu, Tata Diosu peje su ema eputi putsu”, epuani? <sup>18</sup> ¿Cuaja ni da epuani, “Quetsunu quita hue beju ema eputiyu”? Mue shanapa ecuaneda.

<sup>19</sup> Jesús jashanapatiana discípulo cuana ja tu quisabaja atana. Da su uja atana huecuana:

—Micuaneda bahue puja quetsunu ema eputi. Daja huecha ema esiapati. Beju micuaneda mue shanapa. Da putsu, micuaneda daja huamahuama jaquisabatiana. <sup>20</sup> Ene putsu,



yama micuana equisainia, micuaneda ebia su pibapiba putsu, jubida epa, ema emanuameta huecuana su. Ema peje su jei puja mahue cristiano cuana mu beidaji eputa. Beju micuaneda ebia su epibapiba biame, beidaji epu, ema neicha hue bayu putsu. <sup>21</sup> Tueda da epuna nedaji puja epuani su, enebatiani nime. Ebia su epibapibani, mesa cuina hora beju ecuinani putsu, ebia su mesa neda epuani putsu. Beju yanana chidi bataji epuani su, aimue epuna ja neda cuana epibatani mahue, yanana chidi jepuiti beju ebia su beidaji epuani putsu. <sup>22</sup> Daja huecha da micuaneda. Jiahue micuaneda ebia su epibapibani. Beju ema micuana peje su esiapatiyu su, beidaji ebia su micuaneda epu. Aiya biame detse micuana neicha ebia su pibapibametayu cua beju.

<sup>23</sup> 'Da tsine su aimue ema micuaneda ai cuana ebajayu mahue, Tata Diosu ja pamapa micuana sa jabajati cuana etiatayu putsu, ahua micuaneda quema tsada epuani cuana ebaja su. <sup>24</sup> Jiahue teje aimue micuaneda quema ai tsada cuana Diosu bajaji mahue. Diosu mebajaque hue. Baja putsu, tuahueda etiatayu beidaji micuaneda epu puji.

*Jesús ja Ishahua, cristiano madhada cuana pishitiametana*

<sup>25</sup> 'Aimue tsuhu yama micuana mimi id'abata saida neje quisana Tata Diosu jepuiti. Bahue quisa cuana neje bahui yama micuana equene buetsuana. Hora beju ecuína su, yama micuana butsepi equisa Tata Diosu jepuiti. <sup>26</sup> Da hora su micuaneda quema ai tsada cuana Diosu ebaja. <sup>27</sup> Aimue quema Diosu baja taji micuaneseda puji mahue, tuahueda micuana ebia su ibuneda ebatani putsu. Daja micuana ibuneda ebatani, micuaneda ema ibuneda ebainia putsu, daja huecha ema tu peje jenetia pueana jei puana putsu. <sup>28</sup> Beju ema Tata Diosu peje jenetia cuinanana ye mundo su epue puji. Jiahue yama ye mundo eichajusia quema Tata peje su esiapati puji.

<sup>29</sup> Da su discípulo cuana ja Jesús atana:

—Beju jiahue miada ecuanaju saida butsepi equisainia. Aimue ecuaneseda quisaba taji mahue beju. <sup>30</sup> Miada pamapa ai cuana eshanapaeninia beju ecuanaju ebainia. Da putsu, jei ecuanaju mida Diosu peje jenetia pueana.

<sup>31</sup> Da su Jesús ja jeutsutana huecuana:

—¿A da enei hue micuaneda ema jei yainia? <sup>32</sup> Beju hora cuinaitia piada piada micuaneda ejududu ema jepuiti. Ema mehua micuaneda ema eichajusia. Daja biame, aimue ema mehua ema yaniti mahue, quema Tata Diosu ema neje yani putsu. <sup>33</sup> Tueda ai cuana yama micuana butsepi equisainia nimepijajajiji mepuque puji. Ye mundo su micuaneda yani tupu, beju sufri epu. Daja biame, nimetucheda mepuque,

ema ebia su tucheda micuana etsahua puji, yama Ishahua, cristiano madhada cuana pishitiameana putsu.

## 17

*Jesús ja Tata Diosu bajatana mesa discípulo cuana sa puji*

<sup>1</sup> Jesús beju daja quisa pupe putsu, buepa huabata pu putsu, Diosu mitsupirutana uja:

—Tata, quema manu hora beju cuinaitia. Cuaja yama mida tucheda eni cristiano cuana bameana nime, daja huecha bameque huecuana ema tucheda eni. <sup>2</sup> Miada ema huaratiana cristiano cuana sa puji. Ema huaratiana putsu, ema peje su jei epuani cristiano cuana yama eid'e yameeniyu. <sup>3</sup> Mida da piada quita eid'e eni Diosu. Miada ema ye mundo su beituana. Quebata ja etseda eshanapatani, tueda da cielo su eid'e epueni.

<sup>4</sup> Beju yama cristiano cuana mique tucheda bameana. Miada ema cuatsasiana ai cuana beju yama apeitia. <sup>5</sup> Equene ye mundo aniji mahue su, ema mi neje cielo su ebia su tucheda anidha. Tata, jiahue bameque neicha tueda quema tucheda cristiano cuana ja pabata puji.

<sup>6</sup> Miada mique dharejiji cuana eme peje su jei ameana. Beju yama mi jepuiti buetsuana huecuana. Mique jacuatsasiati cuana beju jei atana huecuana. <sup>7</sup> Jiahue eshanapaenitani huecuana pamapa miada ema tiana jabuetsuati cuana. <sup>8</sup> Ema mi peje jenetia pueana beju eshanapaenitani huecuana. Miada ema tiana jabuetsuati cuana beju yama buetsuapeana huecuana. Tueda jabuetsuati cuana su jei putana huecuana. Ema mi peje jenetia pueana jei putana huecuana. Miada ema beituana jei putana huecuana.

<sup>9</sup> Tuneseda puji bahui mi yama ebajainia, mique dharejiji cuana putsu, miada ema peje su jei ameana huecuana putsu. Aimue yama mi ebajainia mahue ema peje su jei puja mahue cristiano cuana sa puji. <sup>10</sup> Pamapa ema peje su jei eputani cuana da mique dharejiji cuana eputani. Saida, butsepi epuniunetiani huecuana putsu, cristiano cuana ja ema jepuiti saida emimitayu.

<sup>11</sup> Aimue ema ye mundo su yaniti mahue. Beju tuneda mu yanitita. Mi yani su ema eputi. Tata, quinaenique ye miada ema peje su jei ameana cuana. Tuneda cama dunejiji paanita, etseda dunejiji yani nime. <sup>12</sup> Beju miada ema peje su jei ameana huecuana. Ema tucheda tiana neje yama quinana huecuana ema tuna neje yani tupu, ema peje su jei papurijita mahue puji. Aimue mecuana sa ema peje su janimetucheati cuana taitanametana huecuana mahue. Piada ja bahui taitanametana, cuaja derejiji yani batame.

Beju Jesús ja mesa Tata daja hue mitsutsuainiame atana uja:

13 —Tata, jiahue ema mi peje su eputi. Ema upia yani tupu, yama mida bajana tuneseda puji, ema nime beidaji paputa huecuana puji. 14 Yama mique jabuetsuati cuana buetsuana huecuana. Ema nime aimue tuneda ye mundo sa puji mahue putsu, mi tsada mahue baji cuana eduininibatani huecuana. 15 Aimue mi yama ebajainia mahue ye mundo jenetia ejemicuina huecuana puji. Beju yama mi ebajainia miada Ishahua peje jenetia ebianetia huecuana puji. 16 Beju aimue ema ye mundo sa puji mahue. Daja huecha tuneda di ema nime aimue ye mundo sa puji mahue. 17 Ichaderaque huecuana miqueda puji bahui. Butsepameque huecuana mique ene quita jabuetsuati cuana neje. 18 Miada cristiano cuana peje su ema beituana nime, daja huecha yama tuneda di ebeitu cristiano cuana peje su. 19 Da puji ema miqueda puji eichaderatiani. Daja huecha yama eichaderainia huecuana. Mique jabuetsuati bahui yama ebuetsuainia huecuana mique ai saida cuana bahui paata huecuana puji.

20 ‘Aimue tuneseda puji bahui mi yama ebajainia mahue. Tuna tije ema peje su jei eputani cuana sa puji di yama mi ebajainia tuneda cama saida, dunejiji huamahuama paanita puji. 21 Tata, cuaja etseda dunejiji yani nime, daja tuneda di huamahuama dunejiji paanita cristiano cuana miada ema beituana jei paputa puji. 22 Mique tucheda miada ema tiana beju yama tuneda di tiana tuneda cama etseda nime dunejiji paanita puji. 23 Ema tuna neje dunejiji yani. Mida ema neje dunejiji yani. Da su tuneda di huamahuama dunejiji paanita cristiano cuana ja miada ema beituana pashanapata puji. Cuaja miada ema ibuneda ebainia nime, daja miada ibuneda ebainia huecuana cristiano cuana ja pashanapata.

24 ‘Tata, miada ema peje su jei ameania huecuana. Quema tsada quepia ema yani su ema neje paanitita huecuana. Daja huecha quema tsada quema mi neje cielo su anina su, tucheda pabata huecuana. Ye mundo ai mahue su, miada ema ibuneda baidha. Da tiempo su miada mique tucheda ema tiaidha. 25 Tata, mida da nimebutsepi. Ema peje su jei puja mahue cristiano cuana ja aimue mi eshanapatani mahue. Beju yama mu mi eshanapaeninia. Ye quema discípulo miada ema peje su beituana cuana ja di miada ema beituana eshanapatani. 26 Beju yama mida shanapameana huecuana. Cuaja miada ibuneda ebainia huecuana, yama shanapameana huecuana. Daja yama ana huecuana tuneda huamahuama ibuneda pabatita puji, ya di tuna neje paanieniti puji.

## 18

*Jesús risijiji dusutana huecuana*

*(Mateo 26.47-56; Marcos 14.43-50; Lucas 22.47-53)*

<sup>1</sup> Jesús daja mimipe putsu, mesa discípulo cuana neje Cedrón ena muri banime chu maje putiana. Dapia chujemame olivo equi eti jude anina. Jesús tueda eti jude su nubiana discípulo cuana neje. <sup>2</sup> Beju Judas ja di tueda eti jude shanapataina, dapia Jesús discípulo cuana neje jadhitatina putsu. <sup>3</sup> Da su beju Judas di dapia cuinatiana jucuada templo sa soldado cuana neje. Fariseo, sacerdote huaraji aida cuana ja beitutana huecuana Jesús eina puji. Tueda soldado cuana beju metseji, huedaji cama putana. <sup>4</sup> Jesús mu pamapa cuaja epu ai cuana bahue puina. Da su tuahueda quisabatana huecuana uja:

—¿Aidhe da micuaneda echacuinia?

<sup>5</sup> Tuneda jeutsutana:

—Jesús Nazaret ejude jenetia ecuanaju echacuinia.

Da su Jesús ja jeutsutana huecuana:

—Beju ema da.

Judas di soldado cuana neje netiana. <sup>6</sup> Jesús, “Beju ema da”, puana su, yahua su bishi je dajaja putana huecuana. <sup>7</sup> Da su Jesús ja neicha quisabatana huecuana:

—¿Aidhe da micuaneda echacuinia?

Beju neicha jeutsutana huecuana:

—Jesús Nazaret ejude jenetia ecuanaju echacuinia.

<sup>8</sup> Da su Jesús ja uja atana huecuana:

—Beju yama micuana, “Ema da”, aitia. Ye quema ebuqueji cuana beju paputitayu, ema bahui micuaneda echacuinia putsu.

<sup>9</sup> (Daja puana, cuaja equene Jesús ja Tata Diosu atana batame: “Mue quebata biame taitana miada ema peje su jei eputani tiana cuana jenetia.”) Da su aimue soldado cuana ja discípulo cuana inatana mahue.

<sup>10</sup> Beju Simón Pedro ja mesa espada jemicuinatana. Piada deja sa eid'aja bai eni bene siquijusiatana. Tueda deja Malco banime puina. Tueda da sacerdote cuana sa echua puji sa emebajaji puina. <sup>11</sup> Da su Jesús ja Pedro uja d'ayatana:

—Biuyuque mique espada, Tata Diosu sa tsada ema padusuta huecuana puji putsu.

*Jesús da sacerdote sa echua puji butse su netianana*

*(Mateo 26.57-58; Marcos 14.53-54; Lucas 22.54)*

<sup>12</sup> Da su beju soldado cuana ja Jesús ina putsu, risitana huecuana. <sup>13</sup> Anás sa ete su dusutana huecuana. Anás da Caifás sa ehua sa tata puina. Caifás da sacerdote cuana sa echua puji puina tueda mara puji. <sup>14</sup> Equene Caifás ja judío

cuana uja atana: “Ebia su saida tueda deja Jesús pamanu ecuaneda emanu mahue puji.”

*Pedro, “Yama mue Jesús shanapa”, puana  
(Mateo 26.69-70; Marcos 14.66-68; Lucas 22.55-57)*

<sup>15</sup> Beju Simón Pedro, pia discípulo neje Jesús tije putiana Anás sa ete teje. Tueda pia discípulo ete etseque su taraca dume su nubiana. Da dume su Jesús quinataina huecuana. Tueda discípulo ja sacerdote sa echua puji shanapatana putsu, taraca etsequeini quinaji epuneje ja d'ejí tiatana tu panubi puji. <sup>16</sup> Pedro ja mu mue sacerdote sa echua puji shanapa atana putsu, taraca etsequeini quinaji epuneje ja aimue d'ejí tiatana mahue tu panubi puji. Da su beju Pedro taraca etseque su netitana. Da su tueda pia discípulo ja taraca etsequeini quinaji epuneje bajatana Pedro panubi puji. Da su Pedro nubiametana. <sup>17</sup> Pedro enubiani cama, etsequeini quinaji epuneje ja tueda quisabatana uja:

—¿Aimue jia maida mida tueda deja sa piada ebuqueji mahue?

Da su Pedro ja jeutsutana:

—Aimue ema mahue.

<sup>18</sup> Beju huinada putsu, soldado, emebajaji cuana ja cuati turutana. Pamapa su cuati naja su jayutitanetina. Pedro di dapia cuati naja su tuna neje jayutinetina.

*Anás ja Jesús quisabatana  
(Mateo 26.59-66; Marcos 14.55-64; Lucas 22.66-71)*

<sup>19</sup> Beju Pedro cuati naja su eyutineti cama, Anás ja Jesús quisabapirutana tusa discípulo cuana, jabuetsuati cuana jepuiti. <sup>20</sup> Da su Jesús ja uja jeutsutana Anás:

—Beju yama pamapa cristiano cuana butse su bata saida buetsuana jadhitati ete jude cuana, templo su. Mue yama rubuajiji aidhe biame buetsua. <sup>21</sup> ¿Ai puji miada ema equisabainia? Quisabatique ema id'abaji cuana. Tuneda quisa-taque cuaja yama buetsuame ana cuana. Beju tuneda bahue.

<sup>22</sup> Jesús beju daja mimiana su, pia templo sa soldado dapia eneti ja buahuapatsitana. Tuahueda Jesús uja atana:

—Be daja jeutsuji sacerdote cuana sa echua puji aida.

<sup>23</sup> Da su Jesús ja jeutsutana:

—Ahua ema madhada hue mimitia su, da su quisaque ema ai madhada ema puitia. Ahua ema madhada mahue mimitia su, ¿ai puji ni da miada ema buahuapatsitia?

<sup>24</sup> Da su Anás ja Jesús risijiji dusuametana sacerdote cuana sa echua puji aida Caifás peje su.

*Neicha Pedro, “Yama mue Jesús shanapa”, puana  
(Mateo 26.71-75; Marcos 14.69-72; Lucas 22.58-62)*

<sup>25</sup> Daja Jesús equisabatani huecuana cama, Pedro cuati naja su jayutinetina. Beju tu naja su netiji cuana ja quisabatana:

—¿Aimue jia maida mida tueda deja sa ebuqueji mahue?

Da su Pedro ja jeutsutana uja:

—¡Mahue! Aimue ema mahue.

<sup>26</sup> Beju pia sacerdote cuana sa echua puji sa emebajaji dapia netina. Mesa edue puji puina Pedro ja id'aja siquiju-siatana. Tuahueda Pedro quisabatana:

—¿Aimue jia maida yama mida Jesús neje bana olivo equi eti jude su mahue?

<sup>27</sup> Da su Pedro ja neicha jeutsutana:

—¡Mahue!

Da hora su quitaita beju huaripa deja queiana.

*Jesús huaraji aida Pilato butse su netiana*

*(Mateo 27.1-2, 11-14; Marcos 15.1-5; Lucas 23.1-5)*

<sup>28</sup> Da su beju Caifás sa ete jenetia cuinati putsu, Jesús dusutana huecuana huaraji aida Pilato sa ete aida su. Beju ehuenani puina. Tueda judío cuana da extranjero judío mahue romano sa ete su mue nubi putana. Ahua judío mahue cuana sa ai cuana ed'apabata huecuana su, aimue pascua tsine bata cua huecuana mahue. Da putsu, mue nubi putana huecuana romano huaraji aida Pilato sa ete su. <sup>29</sup> Pilato hue tuna peje su cuinanana tuna equisa puji. Tuahueda uja quisabatana huecuana:

—¿Ai jepuiti ni micuaneda ye deja etuaquisainia?

<sup>30</sup> Da su jeutsutana huecuana:

—Ye deja ja aimue ecuanaju sa tata chenu cuana sa jacuat-sasiati cuana yatani mahue. Da putsu, ecuanaju mi peje su duseitia.

<sup>31</sup> Pilato ja atana huecuana:

—Medusaque hue tueda. Mematsetique tueda, cuaja micuana sa jacuatsasiati epuani batame.

Da su judío cuana sa ehuidusuji cuana ja jeutsutana Pilato:

—Ecuanaaju sa mu aidhe biame cuaja manuame taji mahue, miqueda bahui tueda jacuatsasiati cuana a taji putsu.

<sup>32</sup> (Daja equene Jesús puana extranjero judío mahue cuana ja tueda emanuameta jepuiti.)

<sup>33</sup> Da su Pilato mesa ete aida su neicha nubitiyu putsu, Jesús ihuatana. Beju uja quisabatana:

—¿A da mida judío cuana sa echua puji?

<sup>34</sup> Jesús ja uja jeutsutana:

—¿A da ene mida bahue puja? ¿Ahua miada ema daja equisabainia, pia cuana ja mi ema jepuiti quisataitia putsu?

<sup>35</sup> Pilato ja Jesús jeutsutana:

—¿Ai ema judío deja bata? Sacerdote huaraji aida cuana ja quitaita mi ema peje su dusetaitia. Beju, ¿ai madhada miada ana? Quisaque ema.

<sup>36</sup> Da su Jesús ja Pilato jeutsutana uja:

—Aimue ema ye mundo su ecuatsasiatiani mahue. Ahua ye mundo su ema jacuatsasiati cua su, quema ebuqueji cuana tuna neje jaichetita cua aimue ema painata huecuana mahue puji. Beju aimue daja puana mahue, ema ye mundo su aimue ecuatsasiatiani mahue putsu.

<sup>37</sup> Da su Pilato ja Jesús quisabatana:

—¿Da su jia mida echua puji?

Jesús ja tueda jeutsutana:

—Ehe, ema da cuaja mi epuani nime. Da puji ema bataji puana. Ema ye mundo su pueana mimi ene quita, butsepi cristiano cuana equisa puji. Beju pamapa mimi ene quita, butsepi id'abaji cuana bahui ema tije yata.

<sup>38</sup> Da su Pilato ja uja Jesús quisabatana:

—¿Ai ene quita, butsepi mimi yani bata?

*Jesús matsetana huecuana emanu puji*

*(Mateo 27.15-31; Marcos 15.6-20; Lucas 23.13-25)*

Pilato daja quisabape putsu, cuinanatiana etseque su judío ehuidusuji cuana neje emitsuti puji. Uja atana huecuana:

—Ye deja da jucha mahue yama ebainia. <sup>39</sup> Pamapa pascua tsine su piada terijiji mesia bahue ecuanaju. Da su yama ye judío cuana sa echua puji Jesús emesia. ¿Jucuaja ni da micuaneseda piba?

<sup>40</sup> Da su jubida neje Pilato uja biatsiatatana huecuana:

—¡Be tueda deja mesiaji! ¡Barrabás bahui mesiaque!

Tueda Barrabás da tsi puji puina.

## 19

<sup>1</sup> Da su beju Pilato ete su neicha nubiana. Tuahueda soldado cuana cuatsasiatana Jesús huacabiti neje paicheta huecuana puji. <sup>2</sup> Da su junu aquid'aji bauda jenetia corona a putsu, Jesús sa echua su ichatana huecuana tu neje eshishati puji. Daja a putsu beju, Jesús jud'utana huecuana ebiad'amaji idhiria neje. <sup>3</sup> Mimi neje Jesús bid'ida a putsu, madhabapirutana huecuana uja:

—¡Viva judío cuana sa echua puji!

Daja epuani je, buahuapatsitana huecuana.

<sup>4</sup> Da su Pilato neicha cuinanana judío ehuidusuji cuana peje su. Uja atana huecuana:

—Mechamaque. Yama tueda ejemicuinainia micuaneda bahue epu puji tueda jucha mahue yama ebainia.

<sup>5</sup> Pilato emimiani cama, Jesús jemicuinatana huecuana. Corona aquid'aji bauda jenetia ajiji tusa echua su anina. Ebiad'amaji idhiria neje jud'ujiji. Da su Pilato ja atana huecuana:

—¡U hue da ye deja! ¡Mechamaque!

<sup>6</sup> Sacerdote huaraji aida, templo sa soldado cuana ja Jesús ba putsu, jubida neje biatsiatsiapirutana huecuana uja:

—¡Metataque curusu su! ¡Metataque curusu su!

Da su Pilato ja atana huecuana:

—Beju micuaneda hue metatatique, ye deja jucha mahue yama ebainia putsu.

<sup>7</sup> Beju judío ehuidusuji cuana ja Pilato jubida neje jeutsutana:

—Tueda da Diosu sa Ebacua jabametiana. Da putsu, tuseda manu taji, cuaja ecuanaju sa jacuatsasiati epuani batame.

<sup>8</sup> Pilato ja tueda mimi cuana id'aba putsu, ebia su iyuame pupiruana. <sup>9</sup> Neicha dusutana Jesús ete dume su. Dapia tueda quisabatana uja:

—¿Que jenetia da mida?

Jesús ja mue jeutsu.

<sup>10</sup> Da su Pilato ja neicha quisabatana:

—¿Ema mi jeutsuja mahue yainia? Bahue puque, quema tucheda yani mi curusu su etata puji, ahua mi d'eji su ya puji.

<sup>11</sup> Da su Jesús ja jeutsutana:

—Miqueda mu mue ai biame ema neje a taji, ahua Diosu sa tsada mahue su. Da su ema mi peje su menajatiatana cuana da mi ebia su jucha aida eputani.

<sup>12</sup> Da hora jenetia Pilato ja cuaja Jesús mesiamé ya puji chacutana. Beju judío ehuidusuji cuana ja mu mue d'eji tia atana. Ebia su jubida biatsiatsiatana huecuana uja:

—Ahua miada tueda deja d'eji etia su, aimue mida mique echua puji aida sa eshanapa epu mahue. Tueda Jesús echua puji puja putsu, romano echua puji aida neje emajaitiani.

<sup>13</sup> Pilato ja tueda mimi cuana id'aba putsu, Jesús pajemicuinata huecuana cuatsasiatana. Huaraji sa aniude su aniuteana. <sup>14</sup> Beju piada tsine pascua tsine yani hue su. Buepatia puina. Da su Pilato ja judío cuana sa ehuidusuji cuana uja atana:

—¡Hue upia micuana sa echua puji!

<sup>15</sup> Beju ebia su jubida biatsiatsiatana huecuana:

—¡Pamanu! ¡Pamanu! ¡Metataque hue curusu su!

Da su Pilato ja quisabatana huecuana:

—¿Ai yama micuana sa echua puji curusu su etata bata?

Beju sacerdote huaraji aida cuana ja Pilato uja jeutsutana:

—Aimue tueda da ecuanaju sa echua puji mahue. Ecuaneda da Roma ejude su echua puji sa emebajaji cuana.



<sup>16</sup> Da su mimipetana huecuana su, Pilato ja Jesús menajati-atana soldado cuana peje su tu curusu su patatata huecuana puji. Beju dusutana huecuana.

*Jesús curusu su tatatana huecuana*

*(Mateo 27.32-44; Marcos 15.21-32; Lucas 23.26-43)*

<sup>17</sup> Da su beju cuinanatana huecuana curusu eti jude Calavera banime murucu su. <sup>18</sup> Dapia cuinati putsu, Jesús curusu su tatatana huecuana.

Beta deja detse di tatatana huecuana pia beta curusu detse su. Piada Jesús sa bai eni bene netiatsuatana huecuana. Pia d'ani bai bene netiatsuatana huecuana. <sup>19</sup> Pilato ja soldado cuana cuatsasiatana curusu su Jesús sa echua bia su padereta puji. Da su uja deretana huecuana: “Ye da Jesús Nazaret ejude jenetia. Tueda da judío cuana sa Echua Puji.” <sup>20</sup> Jucuada judío cuana ja tueda mimi cuana mimiametana, tueda eti jude Jerusalén ejude naja su anina putsu. Tueda mimi cuana quimisha yana su deretana huecuana. Hebreo, griego, latín yana cuana su deretana huecuana. <sup>21</sup> Da putsu beju, sacerdote huaraji aida cuana Pilato peje su putitana tu uja equisa puji:

—Be dereji uja: “Judío cuana sa Echua Puji.” Dereque uja: “Tueda pa da judío cuana sa Echua Puji.”

<sup>22</sup> Da su Pilato ja atana huecuana:

—Cuaja yama dereitia beju, daja hue paaniti.

<sup>23</sup> Jesús sa ejud'uji cuana pushi soldado cuana ja tuneda cama jasajasajatiatitana. Jesús sa ebia jud'uji ebia su saida, chujeneda puina. Rusujiji mahue tad'ijiji. <sup>24</sup> Da su soldado cuana uja jaquisatitana:

—Be pad'utija pushi eped'u su ye ejud'uji. Ebia su saida suerte paatija quebata sa puji epu.

Beju uja derejiji yani Diosu sa quirica su: “Quema ejud'uji jasajasajatiatitana huecuana. Tueda ejud'uji puji suerte atana huecuana.” Beju daja soldado cuana ja atana, cuaja Diosu sa quirica su biahua tiempo deretaidha batame.

<sup>25</sup> Beju curusu naja su Jesús sa cuara anina. Mesa cuara sa d'ana María di anina. Tueda da Cleofas sa ehuané puina. María Magdalena di tuatse neje beju anina. <sup>26</sup> Da su Jesús ja mesa cuara bautetana. Mesa discípulo ibunedá di bautetana. Jesús ja tuatse baute putsu, uja mesa cuara atana:

—Mama, hue upia mique ebacua puji eneti. Tuahueda mi ebata mique ebacua quitaita pu cua nime.

<sup>27</sup> Da su beju mesa discípulo uja atana:

—Hue upia mique cuara puji eneti. Baque tueda mique cuara quitaita pu cua nime.

Beju da tsine jenetia María anipiruana tueda discípulo sa ete su.

*Jesús manuana*

(Mateo 27.45-56; Marcos 15.33-41; Lucas 23.44-49)

<sup>28</sup> Da su beju Jesús bahue puana pamapa beju apejiji. Pamapa Tata Diosu ja tueda tiatana ai cuana apetana. Da su uja puana:

—Jaid'itija ema.

Daja Jesús puana, cuaja Diosu sa quirica su derejiji yani batame. <sup>29</sup> Beju dapia da emeji vino patseda neje sejeajiji anina. Huapese nime tsabiatana huecuana vino tsetseda su. Da su hisopo equi echa huitsana su huapese nime icha putsu, Jesús sa ecuatsa su atsuatana huecuana tu edhibita puji. <sup>30</sup> Jesús ja vino tsetseda tsaba putsu, uja puana:

—Pamapa apejiji beju.

Daja mimipe putsu, beju mesa echua jahueririati putsu, manuana.

*Piada soldado ja Jesús sa atsupa su lanza neje d'acuatana*

<sup>31</sup> Beju piada tsine pascua tsine yani hue su. Judío ehuidusuji cuana sa tsada mahue puana equita cuana curusu cuana su pabadeta puji, janahua tsine hue quita putsu. Tueda da tsine iyuda epuani putsu, equita cuana curusu cuana su pabadeta mecuana sa tsada mahue puana. Da putsu, Pilato bajatana huecuana curusu cuana su tatajiji cuana sa etidada cuana pajarijariameta tuna pamanupudata puji. Daja huecha bajatana huecuana equita cuana pajemiuteta curusu cuana jenetia, janahua tsine cuinaji mahue su. <sup>32</sup> Da su beju soldado cuana putitana curusu cuana eneti su. Equene Jesús neje tatajiji detse sa etidada cuana jarijariatana huecuana. <sup>33</sup> Jesús peje su macha janariatitana huecuana su, tueda manujiji batana huecuana. Da putsu, aimue tusa etidada jarijariatana huecuana mahue. <sup>34</sup> Piada soldado ja Jesús sa atsupa su lanza neje d'acuatana. Beju ami, yahui cuinanana. <sup>35</sup> Tueda ai cuana da yama quitaita bana. Ema butsepi quisa epuani micuaneda jei epu puji. <sup>36</sup> Tueda ai cuana daja puana, cuaja uja Diosu sa quirica su derejiji yani batame: “Aimue tusa etsau jarijariatana huecuana mahue.” <sup>37</sup> Pia su derejiji yani uja: “Ed'acuaji cuana ja tueda echamata.”

*Jesús sepulcro su huananubiatana huecuana*

(Mateo 27.57-61; Marcos 15.42-47; Lucas 23.50-56)

<sup>38</sup> Beju daja pupeana su, José Arimatea ejude jenetia Pilato peje su putiana Jesús sa equita ebajati puji. José da Jesús sa rubuajiji ebuqueji puina, judío ehuidusuji cuana iyubatana putsu. José ja Jesús sa equita dusutana, Pilato ja tueda d'ejitiatana putsu. <sup>39</sup> Nicodemo ja di José tsahuatana. Tueda

Nicodemo da equene dhidha su putiana Jesús peje su tu neje quisaquisa epu puji. Quimisha tunca kilo especias dusetana Jesús sa equita epapi puji. Tueda especias da banime mirra, áloes neje huarujiji. <sup>40</sup> Da su beju José, Nicodemo detse ja Jesús sa equita dusutana. Equita babutana tse ebabuji bauda neje. Tueda ebabuji da puida huanime puina, especias su tsabiajiji putsu. Daja judío cuana a bahue puina manujiji cuana sepulcro su ehuananubia puji. <sup>41</sup> Dapia Jesús curusu su tatatana huecuana naja su beju eti jude ania chidi anina. Dapia rara aida, eichacua anina tumu epa su aidhe biame tsuhu huananubiaji mahue puina. Tueda rara aida sepulcro puji puina. <sup>42</sup> Da dume su Jesús sa equita huananubiatana tse. Tuatseda beju tipei neje daja atana, janahua tsine hue quita putsu.

## 20

### *Jesús da id'eibana*

(*Mateo 28.1-10; Marcos 16.1-8; Lucas 24.1-12*)

<sup>1</sup> Janahua tsine jaitiana su, beju domingo tsine huenatiana. Dhemedheme su hue María Magdalena sepulcro su putiana. Beju rara terijiji mahue batana. Beju sepulcro eteriji tumu aida beju ichaderajiji puina. <sup>2</sup> Da su María jududutiana Simón Pedro peje su. Jesús ja ibuneda bataina discípulo di Pedro neje anina. María ja uja quisatana tse:

—Beju Echua Puji chenu sa equita dusutana huecuana. Mue ecuanaju shanapa quepia jia ichatana huecuana.

<sup>3</sup> Da su Pedro tueda pia discípulo neje putiana sepulcro su. <sup>4</sup> Betana su jududutiana. Tueda pia discípulo Pedro ebia su tipeida jududutiana. Equene sepulcro su cuinatiana. <sup>5</sup> Sauteana sepulcro dume echama puji. Ebabuji bauda bahui esa batana. Beju mue nubiti puana sepulcro su. <sup>6</sup> Tije beju Pedro cuinatiana. Tueda mu sepulcro dume su nubiana. Tuahueda di ebabuji bauda esa batana. <sup>7</sup> Ed'eji su, Jesús sa echua babuji tanujajiji chujemame yani batana. <sup>8</sup> Da su equene cuinana discípulo di sepulcro su nubiana. Pamapa daja ai cuana ba putsu, jei puana. <sup>9</sup> Daja ai puana cuana teje mue shanapa atana tse quirica su derejiji mimi cuana Jesús jepuiti. Tueda mimi cuana Jesús eid'eyu manujiji cuana duju jenetia puana ye chu, da hora su shanapatana tse. <sup>10</sup> Da su tueda discípulo detse jasiapatibana tuatse sa ete su.

### *Jesús da María Magdalena naja su bataji puana*

(*Marcos 16.9-11*)

<sup>11</sup> Beju María Magdalena anitiana sepulcro tsequeini su epa puji. Epani cama, sauteana sepulcro dume echama puji. <sup>12</sup> Beju beta ángel detse ejud'uji pasaneji Jesús sa equita saina

eti jude su yani batana. Piada ángel echua bene anina. Pia ehuatsi bene anina. <sup>13</sup> Tuatseda María uja quisabatana:

—Epuna, ¿jucuaja su ni mi epani?

María ja jeutsutana:

—Ema epani, quema Echua Puji chenu dusutana huecuana putsu. Bue mahue ema quepia huanatana huecuana.

<sup>14</sup> Daja emimipeni cama, María jababarereatiana. Beju Jesús eneti batana. Ebainia biame, mue shanapa atana. <sup>15</sup> Da su Jesús ja María quisabatana uja:

—¿Jucuaja su ni mi epani? ¿Aidhe miada echacuinia?

Beju María japibatiana tueda eti jude quinaji pepe puana. Da su uja jeutsutana:

—Tata, ahua miada equita dusuana su, quisaque ema quepia miada huanana yama tueda edusu puji.

<sup>16</sup> Da su Jesús ja:

—¡María! —atana.

María ja id'aba putsu, uja atana:

—¡Ebuetsuaji!

<sup>17</sup> Da su Jesús ja cuatsasiatana uja:

—Be ema nahueji, ina putsu. Mesiaque ema, quema Tata peje su puti taji putsu. Putique quema edue cuana peje su. Quisatique huecuana ema ecuana sa Tata Diosu yani su etsuatiyu.

<sup>18</sup> Da su beju María ja pia discípulo cuana peje su putiana Echua Puji eid'e batana equisati puji. Jesús ja tueda quisatana cuana di quisatana huecuana.

*Jesús ebuqueji cuana duju su bataji puana*

*(Mateo 28.16-20; Marcos 16.14-18; Lucas 24.36-49)*

<sup>19</sup> Tueda domingo tsine su huecha hue, dhidha su beju dueji Jesús sa ebuqueji cuana jadhitatijiji anitana ete su. Jateriti dhitajiji anitaina huecuana, judío ehuidusuji cuana iyuba putsu. Beju ete terijiji biame, Jesús tuna duju su bataji puana. Mitsutana huecuana uja:

—Menimepijajaque.

<sup>20</sup> Daja epuani je, Jesús ja mesa eme, atsupa bametana huecuana. Beju beidaji putana huecuana, tu ba putsu. <sup>21</sup> Neicha Jesús ja atana huecuana:

—Menimepijajaque. Cuaja quema Tata Diosu ja ema beitu-tana nime, daja yama micuana ebeituinia quema quisa saida cuana cristiano cuana quisaquisa meatique puji.

<sup>22</sup> Da su Jesús ja tuna bia je juju putsu, uja atana huecuana:

—Mebatsuque Espíritu Santo. <sup>23</sup> Ahua micuaneda quebata cuana sa jucha cuana eperdona su, beju perdonajiji tuna sa jucha cuana epu. Ahua aimue micuaneda quebata cuana

sa jucha cuana eperdona mahue su, beju aimue perdonajiji mahue tuna sa jucha cuana epu.

*Tomás ja Jesús sa etsi cuana batana*

<sup>24</sup> Beju piada discípulo da Tomás banime puina. Mesa esitu ebani Pere puina. Aimue tueda anina mahue, Jesús tuna duju su jabametiana su. <sup>25</sup> Jesús aimue su, Tomás pueana. Pia discípulo cuana ja tueda quisatana uja:

—Ecuanaju da baitia Echua Puji beju eid'e.

Da su Tomás ja uja atana huecuana:

—Aimue ema jei epuani mahue. Ahua quema eme huitsana tusa etsi cuana su biuji mahue su, aimue ema jei epu mahue.

<sup>26</sup> Beju ocho tsine jaitianana su, neicha Jesús sa discípulo cuana jadhitatitana ete su. Tomás di tuna neje anina. Beju ete terijiji biame, Jesús tuna duju su bataji puana. Uja mitsutana huecuana:

—Menimepijajaque.

<sup>27</sup> Da su Jesús ja Tomás uja atana:

—Mique ema huitsana biuque quema eme, atsupa etsi cuana su. Be jei puja mahue puji. Jiahue beju jei puque.

<sup>28</sup> Da su Tomás ja Jesús atana:

—¡Mida da quema Echua Puji, Diosu!

<sup>29</sup> Jesús ja tueda atana:

—Tomás, jiahue mi ema peje su jei puitia, ema baitia putsu. Beidaji quebata cuana ema baji mahue biame, jei eputa su.

<sup>30</sup> Beju Jesús ja jucuada pia nimetiuda aida cuana atana mesa discípulo cuana butse su. Tueda nimetiuda aida cuana aimue ye quirica su derejiji yani mahue. <sup>31</sup> Quejucua hue ye quirica su dereana micuaneda Jesucristo da Diosu sa Ebacua shanapa putsu, tu peje su jei epu puji. Beju tu peje su jei pu putsu, micuaneda cielo su tu neje eid'e epuenitiyu.

## 21

*Jesús da mesa siete discípulo cuana peje su jabametiana*

<sup>1</sup> Pia tsine Jesús neicha jabametiana mesa discípulo cuana peje su Tiberias bai maje su. <sup>2</sup> Dapia anitaina:

Simón Pedro.

Tomás. Tusa esitu ebani da Pere.

Natanael. Tueda da Caná yahua jenetia Galilea yahua su.

Zebedeo sa ebacua detse.

Pia Jesús sa discípulo detse di.

Tueda siete discípulo cuana dapia bai maje su anitaina. <sup>3</sup> Da su beju Pedro ja atana huecuana uja:

—Ema da esia epu.

Da su uja atana huecuana:

—Ecuanaju di mi neje eputi.

Beju canoa aida su nubitana huecuana esia epu puji. Tueda dhidha su mu mue ai se biame jemi atana huecuana. <sup>4</sup> Beju ehuenani su, Jesús bai maje su bataji puana. Discípulo cuana ja tueda mue shanapa atana. <sup>5</sup> Da su Jesús ja tsiatsia neje uja atana huecuana:

—Tata cuana, ¿a da mue micuaneda se jemi aja?

Beju jeutsutana huecuana:

—Ai mahue.

<sup>6</sup> Da su Jesús ja atana huecuana:

—Mesiaque tarrafa canoa bai eni bene su. Dapia micuaneda ejemi.

Beju daja atana huecuana. Daja a putsu, tarrafa cuaja riretsua taji mahue batana huecuana, dueji se cuana nubiana putsu. <sup>7</sup> Da su Jesús ja ibuneda batana discípulo ja Pedro uja atana:

—¡Tueda da Echua Puji!

Beju Pedro mudumudusaina ebia jud'uji mahue. Tueda mimi id'aba putsu, tipeida jajud'utiana. Ena su beju tenatiana Jesús peje su betsa neje ecuinati puji. Canoa da cien metro uquedame bai maje jenetia saina. <sup>8</sup> Pia discípulo cuana mu emaje su cuinatana canoa neje. Tarrafa se neje sejeajiji riretana huecuana. <sup>9</sup> Emaje su cuinati putsu, cuati tid'e batana huecuana. Etid'e bia su se esa batana huecuana. Pan di anina. <sup>10</sup> Da su Jesús ja atana huecuana:

—Jiahue quita jemitia se cuana quejucua meduseque.

<sup>11</sup> Da su Simón Pedro canoa aida su nubitana. Tarrafa se aida cuana neje sejeajiji murida su riretsuatana. Beju cien pishica tunca quimisha ejaitiana se cuana tarrafa su badeina. Dajucua se cuana biame, mue jad'iuti tarrafa. <sup>12</sup> Da su Jesús ja atana huecuana:

—Mepueque ediadia puji.

Beju aimue tuneda quebata ja biame, “¿Aidhe da mida?” Jesús quisabatana mahue, tueda da Echua Puji shanapaenitana huecuana putsu. <sup>13</sup> Da su Jesús ja pan, se ina putsu, berereatiatana huecuana.

<sup>14</sup> Da neje su beju quimisha nuati Jesús bataji puana discípulo cuana peje su.

### *Jesús da Simón Pedro neje jamitsutiana*

<sup>15</sup> Diadiapie putsu, Jesús ja Simón Pedro uja quisabatana:

—Simón, Jonás sa ebacua, ¿a da miada ema ye cuana ebia su ibuneda ebainia?

Pedro ja tueda jeutsutana:

—Ehe, Echua Puji, mida bahue yama mi ibuneda ebainia.

Jesús ja tueda cuatsasiatana:

—Da su quema jabuetsuati cuana ema peje su jei eputani eichacua cuana buetsuaque. Quinachidique huecuana, cuaja huisha quinaji ja mesa huisha cuana equinatani nime.

<sup>16</sup> Neicha beta nuati puji Jesús ja Pedro quisabatana uja:

—Simón, Jonás sa ebacua, ¿a da miada ema ibuneda ebainia?

Pedro ja tueda jeutsutana:

—Ehe, Echua Puji, mida bahue yama mi ibuneda ebainia.

Jesús ja tueda cuatsasiatana:

—Da su quema jabuetsuati cuana ema peje su jei eputani cuana buetsuaque.

<sup>17</sup> Neicha quimisha nuati puji beju Jesús ja Pedro quisabatana uja:

—Simón, Jonás sa ebacua, ¿a da miada ema ibuneda ebainia?

Beju Pedro nimepupad'iana, Jesús ja tueda daja quimisha nuati quisabatana putsu. Da su uja jeutsutana Jesús:

—Echua Puji, mida pamapa bahue. Yama mi ibuneda ebainia mida bahue.

Jesús ja tueda cuatsasiatana:

—Da su quema jabuetsuati cuana ema peje su jei eputani cuana buetsuaque. <sup>18</sup>Ene putsu, yama mi butsepi equisainia, mida edeahue quita su, mi mehua quepia mi putija su putina. Beju mida edhi epu su, mique ebai epirarata pia cuana ja mi erisi puji. Edusuta huecuana mi quepia mi putija mahue su.

<sup>19</sup> Da mimi neje Jesús ja Pedro quisatana cuaja tu jepuiti manume epu. Manu putsu, Pedro ja Diosu tucheda cristiano cuana ebameta. Da su beju Jesús ja Pedro atana uja:

—Tije ema aque.

### *Cuaja Pedro manume epu Jesús ja quisatana*

<sup>20</sup> Da su beju Pedro Jesús neje yasenineti tupu, tueda jababarereatiana. Jesús ja ibuneda bataina discípulo batana tuatse tije epusiu. (Tueda discípulo Jesús sa etsedu su japahuatiana, pascua tsine jana diatana huecuana su. Tuahueda uja Jesús quisabatana pascua tsine su: “Echua Puji, ¿quebata ecuanaju mi emenajatia?”) <sup>21</sup> Beju Pedro ja tueda discípulo ba putsu, uja Jesús quisabatana:

—Echua Puji, ¿cuaja ni da tueda manume epu?

<sup>22</sup> Da su Jesús ja Pedro jeutsutana:

—Ahua quema tsada su, tueda eid'e papu ema esiapati teje, mue miqueda mu ai biame a taji. Tije hue ema aque.

<sup>23</sup> Da hora jenetia edue cama jaquisatitana tueda discípulo aimue emanu mahue. Daja pibatana huecuana biame, Jesús ja aimue daja Pedro atana mahue pia discípulo jepuiti.

<sup>24</sup> Beju ema da tueda discípulo. Ema da Juan. Butsepi yama tueda ai cuana yama edereinia.

<sup>25</sup> Pia dueji ai cuana Jesús ja atana. Ahua tueda ai cuana derepe cua su, ye mundo tupu mahue pu cua ebia su quirica cuana eichaseta puji. Daja papu.



## LOS HECHOS DE LOS APOSTOLES

Hechos quirica Lucas sa jadereti. Tuahueda huecha Lucas banime quirica deretaidha. Hechos quirica ja ecuana cuaja Jesús cielo su tsuatiyume puana ebuetsuatani. Daja huecha cuaja pueichame epu ebuetsuatani.

Jesús ja mesa discípulo cuana beitutaidha ye mundo su Diosu sa quisa saida cristiano cuana peje su quisaquisa paputa puji, Jerusalén jenetia apiru judío cuana peje su, pamapa pia cristiano cuana peje su di. Hechos quirica ja ebametani cuaja mesa discípulo atasaida cuana putaidha Cristo sa jacuatsasiati cuana ya puji.

Ye quirica cuaja Espíritu Santo ye mundo su pueme puana quisa epuani. Cuaja tuahueda Jesús peje su jei eputani cuana tucheametaidha Diosu sa quisa saida cuana iyuame mahue neje pamapa ejude je quisaquisa paputa puji, ai nimetiuda cuana di paata huecuana puji quisa epuani. Daja huecha cuaja deja madhada cuana ja jei eputani cuana nedaneda ametaidha quisa epuani. Sufri pu putsu biame, jajucuati-taidha huecuana quisa epuani.

<sup>1</sup> Teofilo, neicha mi yama quirica etiamenia. Equene mi yama quirica tiameana su pamapa Jesús ja ai atana, buetsuatana cuana mi yama quisana. <sup>2</sup> Pamapa ai puana cuana yama mi butsepi quisana Jesús cielo su tsuatibana teje. Beju cielo su tsuatiyuji mahue su, mesa apóstol cuana tije jacuatsasiati cuana tiatana Espíritu Santo sa tucheda neje. <sup>3</sup> Jesús manujiji cuana duju jenetia id'eibana apóstol cuana ja beju batana. Aimue emanu mahue batana huecuana, tuna peje su eid'e jabametiana putsu. Pushi tunca tsine tu yani tupu, tuna peje su quejucua nuati biame jabametiana. Diosu ecuatsasiati jepuiti ai cuana buetsuatana huecuana.

*Jesús ja discípulo cuana quisatana Espíritu Santo jepuiti*

<sup>4</sup> Equene Jesús ja uja cuatsasiatana huecuana:

—Be mecuinanaji Jerusalén ejude jenetia. Meanitique ejude su. Tata Diosu ja Espíritu Santo micuana peje su ebeituta teje, meid'uaque. Biahua tiempo Tata Diosu puidha cuaja yatayu, daja mesa jamitsuti puidha putsu. Equene yama micuana quisana, Tata Diosu ja Espíritu Santo ebeitu. <sup>5</sup> Juan Bautista ja cristiano cuana yahui neje Diosu sa puji ichaderatana. Beju quejucua tsine jenetia Espíritu Santo epueyu. Tuahueda micuana Diosu sa puji eichaderata mesa tucheda neje.

Daja Jesús ja mesa apóstol cuana quisatana, cielo su tsu-  
atijuyi mahue su.

*Jesús cielo su tsuatibana*

<sup>6</sup> Pia tsine Jesús neje jadhitatitana huecuana su, uja Jesús quisabatana huecuana:

—Echua Puji, ¿a da jiahue quita extranjero soldado cuana miada ebeitu ecuana sa yahua jenetia? ¿A da jiahue miada ecuana sa yahua d'iji ya? ¿A da jiahue israelita cuana sa Echua Puji mida epu?

<sup>7</sup> Da su Jesús ja jeutsutana huecuana uja:

—Ye ai cuana epu tiempo Tata Diosu bahui bahue. Aimue micuaneda bahue papu puji mahue. <sup>8</sup> Beju micuaneseda cristiano cuana quisa taji bahui ema jepuiti. Espíritu Santo micuana peje su epue tucheda neje. Tuahueda micuana etucheata ema jepuiti quisaquisa epu puji. Jerusalén ejude su aniji cristiano cuana micuaneda equene equisa. Tuna butse su ema jepuiti mequisanetiacuinaque. Da su Judea, Samaria yahua detse su aniji cuana di mequisatique. Pamapa yahua je aniji cristiano cuana mequisatique ema jepuiti. Pamapa tuna butse su ema jepuiti mequisanetiacuinaque.

<sup>9</sup> Daja Jesús ja cuatsasiatana huecuana, Olivo Murucu bia su edhitatitani huecuana su. Da su beju Jesús daja mimipe putsu, Diosu ja tueda tuna duju jenetia jemitsuatana buepa su. Judu duju su taitanana. Mue bayu huecuana beju. <sup>10</sup> Tuneda buepa huabata echamatitaneti mane cama, tuna naja su beta deja bataji puana ejud'uji pasaneji. Tuatseda da ángel detse puina. <sup>11</sup> Uja quisabatana tse apóstol cuana:

—Galilea yahua jenetia deja cuana, ¿ai puji micuaneda buepa huabata echamachamaneti? Diosu ja mu Jesús buepa su jemitsuatana micuana duju jenetia. Tueda Jesús huecha hue neicha esiapatihu, cuaja micuaneda etsuabuyu baitia nime.

*Matías Judas Iscariote eturuca dharetana huecuana*

<sup>12</sup> Da su beju tuneda Jerusalén ejude su jasiapatitaibana Olivo Murucu jenetia. Aimue uqueda anina mahue. Aimue piada kilómetro puina mahue. <sup>13</sup> Beju ejude su cuinati putsu, ete su nubititana huecuana. Ebaque ete su nubitana huecuana. Dapia anitaina huecuana. Ye cuana da uja banime:

Pedro.  
Jacobó.  
Juan.  
Andrés.  
Felipe.  
Tomás.  
Bartolomé.

Mateo.

Jacobo. Tueda da Alfeo sa ebacua puina.

Simeón. Tueda da partido cananista banime su punetina.

Judas. Tueda da Jacobo sa edue puina. <sup>14</sup> Jesús sa edue cuana di dapia anitaina. Jesús sa cuara María, pia epuna cuana neje di anina. Ye cuana da dunejiji anitaina. Diusu neje jamitsuti bahue putana huecuana.

<sup>15</sup> Pia tsine neicha dapia dueji Diusu peje su jei eputani cuana jadhitatitana. Que chidi hue piada cien beta tunca putaina huecuana. Beju Pedro netianana uja tuna equisa puji:

<sup>16</sup> —Edué cuana, biahua tiempo Espiritu Santo ja ecuana sa echua puji David chenu deremetaidha Judas Iscariote jepuiti. Tueda Judas ja soldado cuana ehuidusuta Jesús yani su tu einame puji David chenu ja deretaidha. Cuaja David chenu ja deretaidha batame, beju daja puana. <sup>17</sup> Jesús ja Judas di dharetana ecuanaju neje tupupai mesa apóstol epu puji. <sup>18</sup> Beju deja madhada cuana ja Judas chipilu tiatana quepia Jesús yani ebameta puji. Tueda chipilu neje Judas ja yahua ped'u bajatana. Dapia yahua su dajaja putsu, jadhepujutiana. Mesa etsama cuana cuinanana. <sup>19</sup> Jerusalén ejude su aniji cristiano cuana beju bahue putana. Da su tueda yahua ped'u Ami Yahua ebani ichatana huecuana. <sup>20</sup> Ecuana sa echua puji David chenu ja pamapa tueda ai cuana quirica su deretaidha. Tueda quirica banime Diusu sa Satsu cuana (Salmos). Uja deretaidha:

Tusa ete mesiajiji paneti beju.

Be aidhe biame dapia paani.

Pia su daja huecha deretaidha:

Pia mu da tusa eturuca papu.

<sup>21-22</sup> Da su uja Pedro ja quisainiame atana huecuana:

—Beju jiahue mu pia deja ecuaneda edhare Judas sa eturuca ecuana neje tupupai cristiano cuana Cristo id'eibana equisa puji. Ecuaneseda dhare taji quebata jia ecuana neje tupupai puniunetipiruana Jesús neje. Aiya jia batana Juan Bautista ja Jesús Diusu sa puji yahui neje ichaderatana, aiya jia batana Jesús buepa su etsuabuyu, tueda icha taji Judas sa eturuca. Piada ecuaneseda dhare taji apóstol puji, Jesús id'eibana quisanetiacuinaji papu puji.

<sup>23</sup> Beju beta deja bahui anina Judas sa eturuca epu puji. Piada José Justo banime puina. Mesa pia ebani Barsabás puina. Pia Matías banime puina. <sup>24-25</sup> Da su uja Diusu mitsutana huecuana:

—Echua Puji, miada cristiano cuana sa piba cuana eshana-paeninia. Beju jiahue quita ecuanaju bameque quebata ye deja detse miada dhareja Judas sa eturuca mi emebaja

puji, beju Judas apóstol mahue putsu. Mesa castigo su beju putibana.

<sup>26</sup> Da su suerte atana huecuana putsu, Matías puana. Tueda dharetana huecuana apóstol epu puji Judas sa eturuca.

## 2

*Espíritu Santo pueana dharejiji edue cuana peje su*

<sup>1</sup> Siete semana jenetia Jesús id'eibana su, pamapa jei ep-utani edue cuana jadhitatitana piada ete su pentecostés tsine eba puji. <sup>2</sup> Dhita putsu, beni jubida saida ebutesiu nime buepa jenetia id'abatana huecuana. Ete dume su tuna yani su hue, daja id'abatana huecuana beni jubida nime. <sup>3</sup> Metse su hue cuati utsu yana nime tuna bia su ebade batana huecuana. <sup>4</sup> Da su beju Espíritu Santo tuna peje su pueana tucheda neje. Shanapametana huecuana tuna bue mahue yana su emimi puji. Pia mimi cuana su beju mimipirutana huecuana.

<sup>5</sup> Da tiempo su pamapa yahua jenetia puejiji judío cristiano cuana Jerusalén ejude su anitaina. Diusu emitsutsua puji puetana huecuana. <sup>6</sup> Tuneda di beni jubida epusiu nime id'abatana. Da su beju jadhitatitana putsu, apóstol cuana tsapiapiati yana su emimitani id'abatana huecuana. Id'aba putsu, nimetiunetitana huecuana beju. <sup>7</sup> Tuneda cama daja jaquisabatitana:

—¿Jucuaja su ecuaneda metse su hue eid'abainia ecuana sa yana cuana? Ye deja cuana ecuana sa mimi cuana emimitani. ¿Aimue jia maida Galilea yahua jenetia huecuana mahue? <sup>8</sup> ¿Cuaja ni da tuneda jabuetsuatime putaitia ecuana sa yana cuana? <sup>9-10</sup> Beju upia yanita pamapa yahua je aniji cristiano cuana. Judío cuana, Diusu iyubaji judío mahue cuana pia yahua cuana jenetia upia yanita. Hue yani beju Partia, Media, Elam, Mesopotamia, Judea, Capadocia, Ponto, Asia, Frigia, Panfilia, Egipto, Libia yahua cuana jenetia. Cirene, Roma ejude detse jenetia di cristiano cuana puetaitia. <sup>11</sup> Creta, Arabia yahua jenetia cristiano cuana di yanita. Beju pamapa ecuaneda ecuana sa yana cuana su ye deja cuana emimitani eid'abainia. Diusu ja ai nimetiuda saida atana cuana emimitani huecuana ecuaneda id'abainia metse su hue ecuana sa yana su. <sup>12</sup> ¿Ai jia da epuani ye nimetiuda ai cuana?

Daja hue tuneda cama jaquisabatitana, ebia su nimetiutana huecuana putsu. <sup>13-14</sup> Beju pia cuana ja mu piada tunca beta ejaitiana apóstol cuana emimitani eid'aba putsu, tuneda cama uja jaquisatitana:

—¡Aah! Tuneda tsetseji beju. Vino tsetseda ebia su id'itaitia huecuana. Da putsu, uja emimitani huecuana.

Da su Pedro ja jubida jeutsutana huecuana uja:

—Judío deja cuana, Jerusalén ejude su aniji cuana, meid'abaenique ema. <sup>15</sup> Ecuanaeda mu aimue tsetsejiji mahue, cuaja micuaneda epibainia nime, apudaya hue putsu. Bahue micuaneda judío cuana aimue apudaya jaid'iti bahueta mahue. <sup>16</sup> Cuaja biahua tiempo Diusu sa profeta Joel chenu deretaidha batame, jiahue micuaneda ebainia. Uja Joel chenu ja deretaidha:

<sup>17</sup> Uja Diusu puidha:

“Tiempo epupeni su, yama Espíritu Santo ebeitu pamapa cristiano cuana peje su.

Micuaana sa ebacua, ebaquepuna cuana cuaja epu ai cuana quisa eputa.

Edeahue, tata edhi cuana cuana yama equisa tahui su nime.

<sup>18</sup> Da tiempo su quema deja, epuna emebajaji cuana peje su yama Espíritu Santo ebeitu.

Tuahueda cuaja epu ai cuana equisameta.

<sup>19</sup> Buepa, yahua su yama ai nimetiuda cuana yayu.

Ami, cuati, judu epu.

<sup>20</sup> Id'eti da yapuna.

Badi da ami nime epiati.

Tueda ai nimetiuda cuana bataji epu, quema castigo tsine cuinaji mahue su.

<sup>21</sup> Tueda tiempo iyuda su quebata ema peje su jei epuani cuana yama d'ejí su ya.

Daja puidha Diusu, Joel chenu ja deretaidha.

<sup>22</sup> Pedro ja daja hue quisainiame atana huecuana uja:

—Israel deja cuana, meid'abaenique ema. Jesús Nazaret ejude jenetia da Diusu sa Jabeituti Deja. Tu jepuiti Diusu ja ai nimetiuda saida cuana atana micuaana duju su. Beju micuaneda quitaita bana. <sup>23</sup> Micuaneda Jesús menajatiana deja ate cuana peje su, curusu su patatata huecuana puji. Micuaneda Jesús manuamemeana. Beju daja pamapa puana, cuaja Diusu ja biahua tiempo pibataidha batame. <sup>24</sup> Beju Jesús manuaana biame, Diusu ja tueda id'emetaibana, aimue detse cua su biame manueni cua puina mahue. <sup>25</sup> Biahua tiempo echua puji David chenu ja Jesús jepuiti deretaidha uja: Quema Echua Puji, pamapa hora su mi yama echamainia. Mida da ema naja su quema bai eni bene yani ema ebianetia puji.

Da putsu, quema aimue iyuame.

<sup>26</sup> Nimebeidaji da ema.

Mimi beidaji cuana emimiani.

Ema emanu biame, bahue ema miada ema eid'e yameyu.

Da putsu, mi peje su ema enimetucheati, ema emanu biame.

<sup>27</sup> Ema da mique ibuneda emebajaji.

Aimue miada ema manu su, ejusiahuana mahue.

Aimue quema equita eihuiame mahue, miada ema eid'emeyu putsu.

<sup>28</sup> Miada ema eid'e yame jamitsuti tiana.

Ema beidaji yameyu, mida ema neje yaniti putsu.

<sup>29</sup> Da su beju Pedro ja daja hue quisainiame atana huecuana uja:

—Edué judío cuana, mepibaenique quema mimi cuana. Ecuana sa echua puji David chenu beju manuidha. Sepulcro su huananubiataidha huecuana. Jiahue cama bataji hue mesa sepulcro. <sup>30</sup> David chenu da Diosu sa profeta puidha. Diosu ja tueda jamitsuti tiataidha uja: “Piada mique epusiu utsecua cuana mi nime Echua Puji ya.” <sup>31</sup> Beju David chenu bahue puidha tueda utsecua epusiu Cristo epu. Da putsu, Diosu ja Cristo eid'emetayu, David chenu puidha. Cristo emanu biame, aimue Diosu ja tueda emanu su ejusiahuanata mahue. Tusa equita aimue eihuiameta mahue. Daja David chenu puidha. <sup>32</sup> Beju cuaja David chenu puidha batame, daja puana. Diosu ja Cristo id'emetaibana, ecuanaju bana. <sup>33</sup> Cielo su Tata Diosu sa bai eni bene putibana. Diosu ja tueda huaraji aida atana. Huaraji aida putsu, Cristo ja Espíritu Santo tucheda beitutana ecuana peje su. Cuaja biahua tiempo Diosu ja mesa jamitsuti tiataidha batame, daja ecuana yatani. Ye micuaneda ebainia, eid'abainia nimetiuda ai cuana beju da mu Espíritu Santo ja yatani. <sup>34</sup> Aimue David chenu quitaji cielo su tsuatidha mahue. Cristo jepuiti bahui mimidha. Uja deretaidha:

Tata Diosu ja quema Echua Puji uja mitsutana:

“Aniuteque quema bai eni bene ema neje

<sup>35</sup> tupupai ecuatsasia epu puji, yama mi neje jamajaiti cuana pishitiame putsu, mique eme su eicha teje.”

<sup>36</sup> ‘Da putsu, pamapa israelita cuana bahue papuenita micuaneda Jesús manameana biame, tueda huecha Diosu ja Echua Puji Salvador ichatana.

<sup>37</sup> Beju cristiano cuana ja Pedro sa quisa id'aba putsu, ebia su jatacuamadhatitana huecuana. Uja quisabatana huecuana apóstol cuana:

—¿Jucuaja ni ecuanaju pu cua?

<sup>38</sup> Da su Pedro ja jeutsutana huecuana uja:

—Mepibaturucatique Diosu peje su. Yahui neje meichaderamétique Diosu sa puji Jesús sa ebani su. Da su micuana sa jucha cuana Diosu ja edhipata. Espíritu Santo micuana peje su ebeituta, cuaja mesa jamitsuti puidha batame. <sup>39</sup> Tueda mesa jamitsuti cuana da micuaneseda puji. Micuana sa epusiu utsecua, pia yahua uqueda je aniji cuana sa di. Tueda

jamitsuti cuana da pamapa Diusu ihuatana cuana sa puji. Tuna peje su di Espíritu Santo ebeituta.

<sup>40</sup> Pedro ja jubida quisatana huecuana:

—Menetideraque cristiano madhada cuana jenetia. Jei mepuque Jesucristo peje su.

<sup>41</sup> Da tsine beju quimisha mil cristiano cuana jei putana Jesucristo peje su. Diusu sa puji yahui neje jaichaderametitana huecuana. <sup>42</sup> Da su apóstol sa jabuetsuati cuana su puniunetitana huecuana. Saida huamahuama jadasutitana huecuana. Daja hue jadhitatitana huecuana Diusu emitsu puji, Echua Puji sa cena di edia puji.

### *Equene jei putana cuana*

<sup>43</sup> Pamapa cristiano cuana nimetiunetitana, Diusu ja apóstol cuana ai nimetiuda saida cuana yametani ba putsu.

<sup>44</sup> Pamapa Cristo peje su jei eputani cuana daja hue saida huamahuama jadunetitana. Tuneda cama jatsahuatitana.

<sup>45</sup> Piada piada cuana mesa ai cuana jairutitana pia chipilu mahue cuana etia puji. <sup>46</sup> Pamapa tsine templo su putitana huecuana Diusu emitsutsua puji. Tuna sa ete cuana su jadhitatitana beidaji, nimemitsida neje ediadia puji. <sup>47</sup> Diusu mitsutsuatana huecuana. Cristiano cuana ja pamapa jei eputani cuana saida batana. Pamapa tsine Cristo ja pia cristiano cuana d'eji su atana. Da su tu peje su jei eputani cuana jajucuatitana beju.

## 3

### *Pedro ja piada deja tida saisiametana*

<sup>1</sup> Pia tsine buepatia badeute su, Pedro,

Juan detse templo su putiana. Da hora su judío cuana templo su jadhitati bahue putaina Diusu emitsu puji. <sup>2</sup> Templo sa enubiji da Ania Chidi banime puina. Dapia deja tida anina. Daja hue tida bataji puana. Templo su enubitani cuana chipilu baja bahue puina. Mesa eshanapa cuana ja pamapa tsine templo sa enubiji su dusutaina. <sup>3</sup> Beju Pedro, Juan detse templo su enubihu cama, deja tida ja chipilu bajatana tse.

<sup>4</sup> Da su Pedro, Juan detse ja deja chamatana. Chama putsu, Pedro ja uja deja cuatsasiatana:

—Chamaque etseju.

<sup>5</sup> Da su deja ja chamatana tse, ahua tuatseda chipilu etiata pepe. Pedro ja daja hue quisainiame atana deja uja:

<sup>6</sup> —Aimue quema chipilu yani mahue biame, jiahue yama mi etsahua. Jesucristo Nazaret ejude jenetia sa ebani su mi yama ecuatsasiainia, netianaque, asequé.

<sup>7</sup> Da su Pedro ja deja sa bai eni eme su ina putsu, rirenentianatana. Da hora su mesa ehuaitsi, madataji detse jatucheatiana. <sup>8</sup> Deja tenanetiana putsu, asepiruana. Da su Pedro, Juan detse neje templo su nubiana. Etenatsuani je, Diusu mitsutsuapirutana jubida. <sup>9</sup> Beju pamapa cristiano cuana ja deja saisisijiji batana. <sup>10</sup> Tueda templo sa enubiji su chipilu bajabajaina bahueta huecuana putsu, nimetiunetitana huecuana.

*Pedro Salomón sa Etetihue Ema su quisaquisa puana*

<sup>11</sup> Pamapa cristiano cuana templo sa etetihue ema su jududutitana eba puji. Tueda etetihue ema da Salomón sa Etetihue Ema banime. Dapia deja saisisijiji ja Pedro, Juan detse emesiatani batana huecuana. Da su nimetiunetitana huecuana. <sup>12</sup> Pedro ja cristiano cuana ba putsu, uja atana huecuana:

—Israelita deja cuana, ¿jucuaja su ni micuana enimetiuni? ¿Ai etseju ye deja asemeitia bata? ¡Mahue! Diusu ja ye deja asemetaitia. <sup>13-14</sup> Ecuana sa tata Abraham, Isaac, Jacob chenu cuana sa Diusu ja ye ai nimetiuda ataitia. Jesús da tusa Ebacua. Tata Diusu ja Jesús ebia su aida atana pamapa cristiano cuana butse su. Micuaneda Jesús huaraji aida Pilato peje su menajatiana. Jesús da nimebutsepi, jucha mahue putsu, Pilato ja mesiaja adhaatana. Beju micuaneda tsada mue bana. Micuaneseda tsada puana Pilato ja deja manuameji pamesiata. <sup>15</sup> Jesús ja ecuana eid'e yametani biame, micuaneda tueda manuameana. Beju Diusu ja tueda id'emetaibana. Ecuana ja tueda eid'e bana. <sup>16</sup> Tu peje su etseju enimetuheatiani putsu, ye deja tida saisiamejiji. Hue micuaneda beju echamainia. Jiahue micuana sa jachamati butse su beju deja saisiameitaitia Diusu ja.

<sup>17</sup> 'Edué judío cuana, bahue ema micuaneda micuana sa huaraji cuana neje Jesús manuameana shanapasetaji mahue Jesús da Diusu sa Jabeituti Deja. <sup>18</sup> Beju Diusu ja Jesús sufri ametana, cuaja mesa profeta chenu cuana mimiametaidha batame. <sup>19</sup> Da su jiahue meturucatique micuana sa japibati madhada cuana. Mesiapatique Tata Diusu peje su. Daja a putsu, Diusu ja micuana sa jucha cuana edhipata. <sup>20</sup> Ahua micuaneda daja ya su, Diusu ja micuana ebia su eibunebata, micuana peje su Jesucristo ebeituta. Diusu ja tueda micuana sa Salvador biahua tiempo jenetia ichataidha. <sup>21</sup> Tueda Jesús cielo su mesa ani taji, que tupu Diusu ja pamapa ebase-tapeta teje. Daja Diusu puidha, mesa profeta chenu cuana deretaidha. <sup>22</sup> Moisés ja ecuaneseda tata chenu cuana uja quisataidha: "Ecuana sa Tata Diusu ja ema ichatana micuana ehuidusu puji. Ema tije da Diusu ja pia profeta israelita cuana



duju jenetia edhareta micuana ehuidusu puji. Jei meaque pamapa tu cuaja emimiani cuana. <sup>23</sup> Quebata cuana ja tu id'abaja mahue Diusu ja ematsetayu. Mesa dharejiji israelita cristiano cuana peje jenetia jemicuina putsu, etaitanametayu huecuana.”

<sup>24</sup> ‘Biahua tiempo profeta Samuel chenu mimipiruidha tueda ai cuana jepuiti. Pamapa tu tije profeta chenu cuana di tueda ai cuana jepuiti mimitaidha. <sup>25</sup> Diusu ja mesa profeta chenu cuana tiataidha jamitsuti cuana da micuaneseda puji. Micuana sa saida puji Diusu ja ecuana sa tata chenu cuana mesa jamitsuti tiataidha. Uja Diusu ja ataidha tata Abraham chenu: “Yama pamapa yahua aniji cristiano cuana eibuneba mique epusiu tije familia cuana jepuiti.” <sup>26</sup> Diusu ja mesa Ebacua id'emetaibana su, equene micuana peje su beitutana micuana eibuneba puji, micuaneda micuana sa ai puiti madhada cuana eichadera puji.

Daja Pedro ja Jerusalén ejude su aniji cristiano cuana quisatana.

## 4

### *Pedro, Juan detse huaraji cuana butse su*

<sup>1</sup> Beju Pedro, Juan detse ja cristiano cuana daja equisatani cama, piada piada sacerdote, saduceo cuana cuinatana. Templo sa soldado cuana sa echua puji di tuna neje cuinatana.

<sup>2</sup> Ebia su duininitana huecuana Pedro, Juan detse neje, Diusu ja Jesús id'emetaibana cristiano cuana ebuetsuatani tse putsu. Daja huecha cristiano cuana di id'etayu cua, Cristo peje su jei pu putsu, ebuetsuatani tse. <sup>3</sup> Da su beju Pedro, Juan detse inatana huecuana. Beju apunana putsu, teriichatana huecuana pia tsine equisaba puji. <sup>4</sup> Cristiano cuana Pedro, Juan detse sa mimi cuana id'abata putsu, jucuada jei Cristo peje su putana. Jei putana deja cuana beju pishica mil pucue putana.

<sup>5</sup> Pia tsine huaraji, tata edhi ehuidusuji, Diusu sa jacuatsasiati ebuetsuaji cuana jadhitatitana Jerusalén ejude su.

<sup>6</sup> Tuna neje Anás anina. Tueda da pamapa sacerdote cuana sa echua puji aida puina. Mesa ebacua Juan, Alejandro detse di dapia anina. Mesa ebaquepuna sa yahue Caifás di anina. Anás sa pia familia cuana anitaina. <sup>7</sup> Da su cuatsasiatana Pedro, Juan detse tuna butse su paduseta huecuana puji. Duse putsu, tuna butse su netianametana tse. Uja quisabatana huecuana:

—¿Ai sa jacuatsasiati su metseda ye ai cuana yainia?

<sup>8-9</sup> Da su Espíritu Santo ja Pedro jeutsutsahuatana uja:

—Huaraji cuana, tata edhi ehuidusuji cuana, micuaneda etseju equisabainia cuaja tueda deja tida saisime puana.

<sup>10</sup> Da su etseju micuana equisainia pamapa israelita cristiano cuana di bahue paputa. Ye deja tida micuana butse su eneti beju Jesucristo Nazaret ejude jenetia ja saisiametana. Tueda Jesús quitaita micuaneda curusu su tatana biame, Diosu ja id'emetaibana. <sup>11-12</sup> Micuaneda da ete muduji yapiruji tumu madhabaji cuana nime. Daja nime micuaneda Cristo ana. Micuaneda madhabana biame, Diosu ja tueda dharetana cristiano cuana D'ejí su Aji papu puji. Aimue ye mundo su pia yani mahue cristiano cuana d'ejí su ya puji. Aimue Diosu ja pia ebani ichatana mahue.

<sup>13</sup> Beju tueda dhitajiji huaraji cuana nimetiutana Pedro, Juan detse ja huaraji mimi neje jeutsutana huecuana su. Tuatseda jabuetsuatiji mahue biame, daja saida jajeutsutiana tse batana huecuana. Da su beju shanapatana huecuana ye detse tuqueda Jesús sa ebuqueji puina. <sup>14</sup> Ed'ejí su deja saisijiji tuatse neje eneti ba putsu, cuaja mimi taji mahue jabatitana huecuana. <sup>15</sup> Da su soldado cuana cuatsasiatana huecuana tueda quimisha deja cuana ubu hora puji pajemicuinata huecuana puji, tuneda cama tueda ai cuana equisati puji. <sup>16</sup> Jaquisabatitana huecuana uja:

—¿Cuaja ni da ecuaneda ye deja detse a cua? Beju nimetiuda aida atana tse. Cuaja su biame bid'umimi pu taji mahue, pamapa Jerusalén ejude su aniji cristiano cuana ja batana putsu. <sup>17</sup> Pacuatsasiatija jubida neje ye deja detse aimue neicha Jesucristo jepuiti pamimi mahue puji. Da su cristiano cuana tueda nimetiuda aida setata cua beju.

<sup>18</sup> Da su ihuatana quimisha deja cuana padusetaicha huecuana puji. Duse putsu, huaraji cuana ja jubida cuatsasiatana huecuana:

—Jiahue jenetia beju be neicha aidhe peje su Jesucristo jepuiti mimiji.

<sup>19</sup> Da su Pedro, Juan detse ja jeutsutana huecuana:

—Mepibaenique, ¿quebata da ebia su saida Diosu butse su, ahua Tata Diosu etseju eid'aba, ahua micuaneda? <sup>20</sup> Cuaja ai etseju bana, id'abana cuana cuaja detse etseju quisa purijime pu cua.

<sup>21</sup> Da su neicha jubida huaraji cuana ja quisatana huecuana:

—Ahua micuaneda tueda ai cuana quisa epuriji mahue su, ecuanaju micuana ecastigayu.

Da su mesiatana huecuana. Aimue castigatana huecuana mahue, cristiano cuana ja Diosu jubida mitsutsuatana putsu, Pedro, Juan detse ja deja tida saisiametana putsu. <sup>22</sup> Beju deja saisijiji sa pushi tunca mara ejaitiana tupu anina putsu, tueda nimetiuda aida puitia bata.

*Jei eputani cuana ja Diosu bajatana*

<sup>23</sup> Da su Pedro, Juan detse d'eji su puana su, tuatse sa ebuqueji cuana peje su putiana. Cuaja sacerdote aida, tata edhi ehuidusuji cuana putana tuatseda quisatana huecuana. <sup>24</sup> Da su beju pamapa tueda ai cuana id'aba putsu, beidaji neje Diosu mitsutana huecuana uja:

—Ecuana sa Tata Diosu, miada buepa, yahua, mar aida ichaidha. Pamapa ai cuana miada ichaidha. <sup>25</sup> Biahua tiempo Espíritu Santo ja mique emebajaji David chenu deremetaidha mique ai puidha cuana. Uja deremetaidha:

¿Jucuaja su pamapa ejude aniji cuana enimetipeitani?

¿Jucuaja su yanacane ai cuana epibatani huecuana?

<sup>26</sup> Ye mundo sa echua puji cuana, pamapa ejude cuana sa huaraji cuana jadhitatitana Tata Diosu, Cristo detse neje emajaiti puji.

<sup>27</sup> 'Upia Jerusalén ejude su echua puji Herodes, Poncio Pilato detse judío mahue extranjero, israelita cuana neje jadhitatitana mique Ebacua butsepi Jesús neje emajaiti puji. Miada huaraji aida puji Jesús ichana biame, tu neje duininitana huecuana. <sup>28</sup> Cuaja miada biahua tiempo su pibana batame, daja atana huecuana Jesús. Cuaja miada tsada baidha, beju daja puana. <sup>29</sup> Jiahue baque cuaja ecuanaju eduininibatani huecuana. Madhada aja yatani huecuana. Nimetucheaque ecuanaju mique quisa saida cuana cristiano cuana peje su quisaquisa epu puji iyuame mahue neje. <sup>30</sup> Cristiano cuana saisiamaque. Ai nimetiuda cuana aque mique Ebacua Jesús sa ebani su.

<sup>31</sup> Da su Diosu mitsupe putsu, tuna yanita ete riariapiruna. Espíritu Santo ja nimetucheametana huecuana. Da jenetia mue mecuana sa iyuame putana Diosu sa quisa saida cuana cristiano cuana peje su quisaquisa epu puji.

*Jeí eputani cuana tuna sa ai chidi cuana tuneda cama jatiatitaina*

<sup>32</sup> Beju pamapa Jesús peje su jeí eputani cuana da dunejiji anitaina. Tuna sa ai chidi cuana tuneda cama jatiatitaina. <sup>33</sup> Apóstol cuana da Diosu sa tucheda neje daja hue quisaquisa puderatana. Jesús id'eibana quisa cuana beju quisaquisa putana huecuana cristiano cuana peje su. Diosu ja ebia su ibunebatana pamapa jeí eputani cuana. <sup>34</sup> Jeí eputani edue cuana sa mue ai biame pishihue pu. Piada piada cuana ja mecuana sa yahua, ete cuana irutana. <sup>35</sup> Iru putsu, chipilu apóstol cuana tiatana edue puri cuana etsahua puji. Da su apóstol cuana ja tueda chipilu berereatiatana edue cuana peje su cuaja mecuana sa ai ehueitiani batame ai chidi cuana pishihue papu mahue puji. <sup>36</sup> Beju anina piada deja José banime. Tueda da Leví sa familia jenetia. Chipre edhapupu

su bataji puana. Apóstol cuana ja tusa pia ebani Bernabé ichatana. Tueda ebani da, Nimebeida Jaametiji, epuani.  
<sup>37</sup> Tuahueda mesa piada yahua irutana. Iru putsu, chipilu tiatana apóstol cuana.

## 5

*Ananías, Safira detse bid'umimi puana*

<sup>1</sup> Beju piada deja anina Ananías banime.

Mesa ehuané Safira banime puina. Tuatseda yahua irutana. <sup>2</sup> Iru putsu, quejucua chipilu ichasetatana tse. Dajucua chipilu apóstol cuana tiatana tse pamapa pu cua nime. Da su uja Ananías apóstol cuana quisatana:

—Yama micuana etiainia pamapa chipilu beju.

<sup>3</sup> Da su Pedro ja tueda atana:

—Ananías, Ishahua ja piba madhada mi ametana. Miada Espíritu Santo bid'umimi aitia, quejucua chipilu ichaseta putsu. <sup>4</sup> Tueda miada iruana yahua miqueda puana. ¿Da chuje chipilu inatsuana aimue jia maida miqueda puana mahue? ¿Ai puji mida, “Pamapa chipilu micuana yama etiainia”, bid'umimi puitia? Bid'umimi miada aitia Diosu, aimue deja mahue.

<sup>5</sup> Tueda mimi cuana id'aba putsu, Ananías emanu dajajana. Pamapa bahue putana cuana rubutanatana. <sup>6</sup> Edeahue cuana Ananías sa equita babubabuatana. Babu putsu, dusutana huecuana epapati puji.

<sup>7</sup> Da su quimisha hora jaitianana su, Safira cuinana. Bue mahue puina Ananías manuitia. <sup>8</sup> Da su Pedro ja quisabatana tueda:

—Quisaque ema, ¿a da metse ene quita dajucua su iruitia yahua?

Safira jeutsutana:

—Ehe. Dajucua su etseju iruana beju.

<sup>9</sup> Da su Pedro quisabatana:

—¿Ai puji metseda betana su Espíritu Santo bid'umimi aitia? Beju jahue quita ecuinatasa mique yahue dusuji cuana mida macha edusu puji.

<sup>10</sup> Da hora su beju emanu dajajana Safira. Edeahue cuana cuina putsu, epuna emanu esa batana huecuana. Da su dusutana huecuana mesa yahue naja su epapati puji. <sup>11</sup> Beju pamapa jei eputani, id'abaji cuana ebia su rubutanatana.

*Apóstol cuana ja jucuada ai nimetiuda cuana atana*

<sup>12</sup> Apóstol cuana ja jucuada ai nimetiuda cuana daja hue aniunetiatana cristano cuana duju su. Jei eputani cuana Salomón sa Etetihue Ema su jadhitati bahue putaina. <sup>13</sup> Pia cristiano cuana aimue tuna nariaja atana mahue, tuna saida

ebatani biame. <sup>14</sup> Jucuada deja, epuna cristiano cuana Echua Puji Jesucristo peje su jei putana. <sup>15</sup> Cristiano cuana nedaji cuana ichacuinatana d'eji su siju bia su tsaunuji huanacuinatana. Cuapuitime Pedro ejaitianani su, mesa tanana tuna bia je dajaja cua, pasaisita huecuana puji. <sup>16</sup> Pia Jerusalén ejude naja je ejude cuana jenetia cristiano cuana cuinatana Jerusalén ejude su. Tuna sa nedaji cuana dusetana huecuana. Einid'u madhadaji cuana di dusetana huecuana. Beju pamapa saisitana huecuana.

*Apóstol cuana inatana huecuana*

<sup>17</sup> Da su beju sacerdote sa echua puji aida, saduceo cuana duininitana, cristiano cuana ja apóstol cuana tije yatani putsu. <sup>18</sup> Da su apóstol cuana ina putsu, teriichanubiatana huecuana. <sup>19</sup> Dhidha su Diosu sa ángel ja tuna teriichajiji yani ete tseque'diatana. Apóstol cuana huidusutana etseque su. Angel ja uja atana huecuana:

<sup>20</sup> —Meputique templo su. Daja hue quisaquisa puderaque Diosu sa quisa eichacua cuana cristiano cuana peje su.

<sup>21</sup> Da su apudaya enieni putitana huecuana templo su. Dapia buetsuapirutana cristiano cuana.

Beju sacerdote cuana sa echua puji aida, tu buqueji, tata edhi ehuidusuji cuana jadhitatitana. Soldado cuana beitungana huecuana apóstol cuana tuna butse su eduse puji. <sup>22</sup> Beju soldado cuana apóstol cuana teriichajiji yani su cuinati putsu, apóstol cuana mue ani batana huecuana. <sup>23</sup> Da su jasiapati-taibana huecuana tuna equisa puji uja:

—Ete etsequeini cuana saida terijiji ecuanaju bana. Einatsihuaji soldado cuana etsequeini su netitana biame, ete dume su mue aidhe biame beju ecuanaju bana.

<sup>24</sup> Da su sacerdote sa echua puji aida, templo sa soldado cuana sa echua puji, sacerdote aida cuana daja id'aba putsu, cuaja shanapa taji mahue batana huecuana. <sup>25</sup> Da hora su piada deja tuna peje su cuinana. Cuina putsu, uja quisatana huecuana:

—Micuana teriichanubiana deja cuana da templo su yanita. Cristiano cuana ebuetsuatani huecuana.

<sup>26</sup> Da su soldado sa echua puji, mesa soldado neje apóstol cuana peje su putiana tuna einatiicha puji. Cuatsa mahue dusutana huecuana, cristiano cuana iyuba huecuana putsu. Cuapuitime cristiano cuana ja tuna tumu neje maracata cua, japibatitana huecuana. <sup>27</sup> Neicha apóstol cuana dusutana huecuana huaraji cuana peje su. <sup>28</sup> Da su apóstol cuana jubida d'ayapirutana huecuana uja:

—Ecuanteda micuana be neicha Jesús jepuiti cristiano cuana buetsuaji cuatsasiana. Beju aimue micuanteda ecuana

jei ana mahue. Jiahue beju pamapa Jerusalén ejude aniji cristiano cuana micuana sa jabuetsuati cuana id'abatana. Micuaneda ecuanaju etuaquisainia cristiano cuana butse su. Daja pa micuaneda epuani, ecuanaju pa da tueda deja Jesús manuameana.

<sup>29</sup> Da su Pedro ja pia apóstol cuana neje jeutsutana huecuana uja:

—Ecuana sa mu Diosu id'aba taji, aimue deja cuana mahue, daja ecuanaju sa jacuatsasiati putsu. <sup>30</sup> Micuaneda Jesús manuameana, curusu su tata putsu. Beju ecuanaju sa tata chenu sa Diosu ja mu tueda id'emetaibana. <sup>31</sup> Cielo su tu naja su dusutaibana. Israel sa Echua Puji D'eji su Aji tueda ichatana. Jiahue micuana sa jucha cuana dhipata cua, ahua micuana sa piba madhada cuana jenetia eturucati su. <sup>32</sup> Ecuana da tueda ai cuana quisanetiacuina. Daja huecha Espíritu Santo. Tueda Espíritu Santo Diosu ja pamapa tu jei yatani cuana peje su beitutana.

<sup>33</sup> Da su beju huaraji aida cuana ja daja id'aba putsu, ebia su duininitana huecuana apóstol cuana neje. Piada piada tuneda manuameja atana huecuana. <sup>34</sup> Daja biame, piada fariseo Gamaliel banime tuna duju su anina. Tuseda tsada mahue puana pamanuameta huecuana puji. Moisés sa jacuatsasiati ebuetsuaji puina. Pamapa cristiano cuana ja tueda ibunedata batana. Netiana putsu, cuatsasiatana apóstol cuana etseque su pajemicuinata huecuana ubu hora chidi. <sup>35</sup> Beju apóstol cuana etseque su yanita su, tuahueda judío cuana sa huaraji cuana uja apiritana:

—Deja israelita cuana, meid'abaque ema. <sup>36</sup> Mepibaenitique. Merejatique cuaja micuaneda ye deja cuana ya. ¿Aimue jia maida micuaneda piba deja Teudas banime mahue? Tueda deja aida puja puana. Pushi cien deja cuana ja tu buquetaina. Beju soldado cuana ja manuametana su, tusa ebuqueji cuana jaberebreatitana. Tusa jabuetsuati cuana setatana huecuana. <sup>37</sup> Tueda ai cuana jaitianatana su, censo anina. Da tiempo pia deja Judas banime batata puana Galilea yahua jenetia. Tueda di deja aida puja puana. Da su neicha jucuada deja cuana tije ataina. Soldado huaraji cuana neje jamajaititana huecuana. Daja huecha soldado cuana ja manuametana su, tusa ebuqueji cuana beju jaberebreatitana huecuana. <sup>38-39</sup> Beju jiahue quita yama micuana equisainia, be madhada meaji ye deja cuana. Ahua tuneda Tata Diosu sa deja cuana su, da su, ¿ai puji detse micuaneda madha cua huecuana? Aimue detse micuaneda pishitia cua huecuana mahue. Cuapuitime Tata Diosu neje hue micuaneda jamajaiti cua. Ahua aimue tuneda Diosu sa deja cuana mahue su, ahua deja aida puja bahui eputani

huecuana su, da su cuaja Teudas, Judas detse puana nime etaitanata huecuana.

<sup>40</sup> Daja Gamaliel ja quisapetana huecuana su, jei putana huecuana. Aimue apóstol cuana manuametana huecuana mahue. Da su apóstol cuana padusetaicha cuatsasiatana huecuana. Dusutana huecuana su, huacabiti neje ichemetana huecuana. Mesiaji mahue su, jubida cuatsasiatana huecuana uja:

—Jiahue jenetia su be neicha aidhe peje su Jesucristo jepuiti mimiji.

<sup>41</sup> Da su beju apóstol cuana cuinanana. Ebia su beidaji puana, Jesús sa puji sufri ametana huecuana putsu. <sup>42</sup> Da su pamapa tsine templo su putitana huecuana cristiano cuana Jesús jepuiti ebuetsua puji. Pamapa ete je di putitana huecuana Diusu sa quisa saida cuana ebuetsua puji. Diusu ja, cuaja tu puidha batame, Jesús beitutana cristiano cuana D'ei su Aji papu puji buetsuatana huecuana.

## 6

### *Siete ilisha sa emebajaji cuana dharetana huecuana*

<sup>1</sup> Da tiempo su Cristo peje su jei eputani edue cuana dueji anitaina. Ebia su jajucuatitana huecuana. Beju judío jei eputani cuana duju su pia Grecia yahua jenetia edue cuana di anitaina. Griego yana su mimitaina huecuana. Aimue beidaji puana huecuana mahue, judío edue cuana ja aimue saida batana huecuana mahue putsu. Uja atana huecuana:

—Aimue micuaneda griego ahue manujiji epuna edue cuana saida equinainia mahue. Tuna sa ediaji cuana aimue tupu etiainia mahue.

<sup>2</sup> Da su piada tunca beta ejaitiana apóstol cuana ja dhita-metana huecuana pamapa. Uja quisatana huecuana:

—Edué cuana, ecuanaju sa Diusu sa quisa saida cuana buetsua taji. Aimue detse ecuanaju buetsuariji cua mahue edue cuana sa ai dia taji cuana eba puji. <sup>3</sup> Da su micuaneseda siete deja butsepi, bahue eni cuana icha taji edue cuana sa ai dia taji cuana pabata huecuana puji. Espíritu Santo sa tucheda mecuana sa paanita. Edué cuana ja saida pabata huecuana. <sup>4</sup> Da su ecuanaju sa Diusu neje bahui jamitsuti taji. Tusa quisa cuana ecuanaju sa cristiano cuana quisaquisa pu taji bahui.

<sup>5</sup> Beju pamapa edue cuana daja cama japibatitana. Siete deja cuana dharetana huecuana. Uja mecuana sa ebani cuana:

Esteban. Tuahueda Diusu peje su ebia su enimetucheatiani. Espíritu Santo sa tucheda ebia su mesa anina.

Felipe.

Prócoro.  
Nicanor.  
Timón.

Parmenas.

Nicolás. Antioquía ejude jenetia puina. Judío mahue puina.  
Equene Antioquía ejude su judío cuana sa Diosu peje su  
jei puana.

<sup>6</sup> Da su beju apóstol cuana butse su netiatana huecuana.  
Apóstol cuana ja mecuana sa eme siete deja cuana sa echua  
bia su icha putsu, Diosu bajatana tuahueda paibunebata  
huecuana puji.

<sup>7</sup> Beju dueji cristiano cuana Diosu sa quisa saida cuana  
id'abatana. Jerusalén ejude su Cristo peje su jei eputani cuana  
ebia su jajucuatitana. Jucuada sacerdote cuana di Jesús peje  
su jei putana.

### *Esteban inatana huecuana*

<sup>8</sup> Diosu ja Esteban tucheametana ebia su ai nimetiuda  
cuana ya puji cristiano cuana duju su. <sup>9</sup> Da su beju pi-  
ada piada deja cuana Esteban neje mimicuicuinapirutana.  
Judío cuana sa jadhitati jude ete jenetia puetana huecuana.  
Tueda jadhitati jude ete Esclavo D'ejí Pujiji Cuana sa banime.  
Cirene, Alejandría ejude detse, Cilicia, Asia yahua detse jeni-  
tia puetana huecuana. <sup>10</sup> Beju jubida mimicuicuinatana hue-  
cuana biame, Esteban tuna ebia su saida mimiana Espíritu  
Santo ja tueda saida, butsepi jeutsumetana huecuana putsu.  
Cuaja tuchea taji mahue batana huecuana. <sup>11</sup> Da su pia deja  
cuana chipilu tiatana huecuana. Cuatsa mahue uja quisatana  
huecuana:

—Cristiano cuana uja mequisatique: Ecuanaju Esteban  
id'abaitia Diosu, Moisés chenu sa puji madhada puitia.

<sup>12</sup> Da su tata edhi ehuidusuji, Moisés chenu sa jacuat-  
sasiati ebuetsuaji cuana Esteban neje duinini putsu, inatana  
huecuana dhitajiji huaraji aida cuana peje su edusu puji.  
<sup>13</sup> Deja bid'umimi puji cuana di dusutana huecuana Esteban  
bid'umimi neje patuaquisata huecuana puji. Uja putana  
huecuana:

—Ye deja Diosu sa templo sa puji, Moisés chenu sa jacuat-  
sasiati cuana sa puji madhada hue puitia. <sup>14</sup> Ecuanaju tueda  
id'abaitia uja puitia: “Ye templo iyuda pa da Jesús Nazaret  
ejude jenetia ja ejusiauteta. Tueda pa da Moisés chenu ja  
ecuana tiataidha ai puiti cuana Jesús ja eturucata.”

<sup>15</sup> Da su pamapa dapia yanita cuana ja Esteban jubida  
chamatana. Mesa ebu da ángel sa ebu nime cuarecuare  
batana huecuana.



## 7

*Esteban ja huaraji aida cuana jeutsutana*

<sup>1</sup> Da su sacerdote sa echua puji aida ja

Esteban quisabatana uja:

—¿A da ene mi etuaquisatani huecuana?

<sup>2</sup> Da su Esteban ja uja jeutsutana huecuana:

—Judío deja, tata edhi cuana, meid'abaenique ema. Biahua tiempo ecuana sa tata Abraham chenu Mesopotamia yahua su anidha. Dapia anitaidha cristiano cuana caldeo banime puidha. Dapia tu peje su ecuana sa Tata Diusu Aida bataji puidha. <sup>3</sup> Uja Abraham chenu cuatsasiataidha: “Anideraque ye yahua jenetia. Mique edue cuana ichajusiaque. Putiyuque yama mi ebameti yahua su.” <sup>4</sup> Da su Abraham chenu caldeo cuana sa yahua jenetia aniderataidha. Haran yahua su putiana dapia yaniti puji. Dapia tusa tata manuidha su, upia ye ecuana sa yahua su Diusu ja tueda beitudaidha. <sup>5</sup> Da tiempo su aimue Diusu ja Abraham chenu yahua tiataidha mahue. Aimue etidhiti puji biame tiataidha mahue yahua. Beju Tata Diusu ja uja mitsutaidha Abraham chenu: “Mida, mique tije epusiu familia cuana ye yahua yama etia.” Daja Diusu puidha, Abraham chenu sa ebacua cuana anidha mahue su. <sup>6</sup> Diusu ja Abraham chenu daja hue quisainiame ataidha uja: “Pia cuana sa yahua su yama mique tije epusiu familia cuana ebeitu tuna sa esclavo cuana epu puji. Dapia aniji cuana ja nedaneda yatayu huecuana. Pushi cien mara cuana puji beju esclavo eputa huecuana. <sup>7</sup> Da putsu, tueda yahua su aniji cuana yama ecastigayu, mique tije epusiu familia cuana nedaneda ametana putsu. Da su mique tije epusiu familia cuana tueda yahua emesia putsu, upia yahua su epueta huecuana ema emitsutsua puji.” Daja Diusu ja Abraham chenu ataidha. <sup>8</sup> Da su beju Diusu ja Abraham chenu cuatsasiataidha: “Pamapa bataji epuani deja cuana huitsanasiqui taji. Daja a putsu, quema puji eputa huecuana. Da su beju Abraham chenu sa ebacua Isaac bataji puidha su, huitsanasiquitaidha ocho tsineji beju su. Isaac ja daja huecha mesa ebacua Jacob ataidha, bataji puidha su. Jacob ja di mesa piada tunca beta ejaitiana ebacua cuana daja huecha ataidha. Tueda ebacua cuana pamapa ecuana sa tata cuana putaidha.

<sup>9</sup> Jacob ja José pia ebacua cuana ebia su ibunebataidha putsu, José neje duininitaidha huecuana. Da su beju José inataidha huecuana Egipto deja cuana peje su eiru puji. Deja cuana ja baja putsu, José Egipto yahua su dusutaidha esclavo epu puji. <sup>10</sup> Daja biame, Diusu ja José inatsihua putsu, d'ejí su ataidha. Diusu ja Egipto yahua sa echua puji José saida

bametaidha. José tiataidha tu pamapa ai bahue epu puji. Da su echua puji ja José Egipto huaraji aida ichataidha. Daja huecha mesa ete su puji huaraji aida ataidha.

<sup>11</sup> 'Da tiempo su beju Egipto, Canaán yahua detse su mid'e puidha putsu, cristiano cuana ebia su sufri putaidha. Ecuana sa tata chenu cuana sa ai dia taji mahue putaidha. <sup>12</sup> Da su Jacob Egipto su ai dia taji cuana yani bahue puidha su, mesa ebacua cuana dapia equene puji beitutaidha. José da deja beju puina putsu, mue shanapa mesa edue cuana ja. <sup>13</sup> Neicha beta nuati puji hue Egipto yahua su putitaidha huecuana su, José ja quisataidha huecuana uja: "Ema da micuana sa edue José." José ja mesa edue cuana echua puji aida shanapametaidha. <sup>14</sup> Da su José ja jemiametaidha mesa tata, pamapa edue cuana Canaán yahua jenetia Egipto yahua su. Beju siete tunca pishica ejaitiana cristiano cuana puidha. <sup>15</sup> Da su beju Jacob Egipto yahua su cuinaidha. <sup>16</sup> Dapia manuidha, mesa piada tunca beta ejaitiana ebacua cuana neje. Canaan yahua Siquem ejude su dusutaidha huecuana tumu epa su sepulcro cuana ajiji ehuananubia huecuana puji. Equene Abraham chenu ja tueda sepulcro eti jude Hamor chenu sa ebacua cuana bajataidha Siquem ejude naja su.

<sup>17</sup> 'Beju tiempo cuinaidha Tata Diusu ja ecuana sa tata chenu cuana Egipto yahua jenetia ehuidusuta, cuaja Diusu ja Abraham chenu jamitsuti tiataidha batame. Dueji jajucuatitaidha huecuana Egipto yahua su. <sup>18</sup> Da tsunu pia Egipto yahua sa echua puji anidha. Tuahueda mu mue José shanapa ataidha. <sup>19</sup> Nedaneda ataidha ecuana sa tata chenu cuana. Cuatsasiataidha ecuana sa tata chenu cuana mecuana sa yanana cuana pajusiata pamanupeta huecuana puji. <sup>20</sup> Da tiempo su Moisés chenu bataji puidha. Diusu ja tueda saida bataidha. Quimisha badi mesa tata detse quinataidha. <sup>21</sup> Beju d'iti su yanana icha putsu, ena bia su ichataidha tse. Echua puji sa ebaquepuna ja yanana d'iti dume su ebade ba putsu, mesa ete su dusutaidha mesa ebacua quitaita nime esehuame puji. <sup>22</sup> Pamapa Egipto yahua su aniji cuana sa ai puiti cuana, sehua putsu, jabuetsuatidha. Deja aida puidha. Mimi neje cristiano cuana jei ame bahue puina.

<sup>23</sup> 'Beju pushi tunca maraji su, putidha mesa edue cristiano israelita cuana ecuadhibati puji. <sup>24</sup> Tuna peje su cuinati putsu, piada egipcio deja ja israelita deja eichetani bataidha. Da su beju israelita deja bianetiataidha, egipcio deja manuametaidha putsu. <sup>25</sup> Moisés chenu tuna jei yata pepe puidha tuna sa ehuidusuji epu puji. Tueda tuna jei yata pepe puidha Diusu ja tueda beitutaidha tuna d'oji su ya puji. Beju aimue daja mecuana sa piba puidha mahue.

<sup>26</sup> Pia tsine neicha putiana. Beta israelita detse eichetisa bataidha. Uja quisataidha tse: “Be meichetiji, metseda edue tatse hue putsu. ¿Jucuaja metse eichetiani?” <sup>27</sup> Da su edue icheji deja ja Moisés chenu nunu putsu, uja ataidha: “¿Aiya mida ecuanaju sa ehuidusuji ichatana?” <sup>28</sup> ¿A da miada ema emanuame, cuaja miada egipcio deja manuameja puicha nime?” <sup>29</sup> Da su Moisés chenu jududuidha, tueda mimi id'aba putsu. Madián yahua su putidha extranjero nime yaniti puji. Dapia jahuaneti putsu, beta bacuame puidha.

<sup>30</sup> ‘Beju pushi tunca mara Moisés chenu d'anita yahua su anidha. Tueda d'anita yahua Emata Sinai banime naja su anidha. Dapia Diosu ja Moisés chenu mitsutaidha. Moisés chenu equi eutsuneti bataidha. Eutsuneti biame, mue jajuditi equi. <sup>31</sup> Da su Moisés chenu nimetiuidha. Nariataidha equi eba puji. Da su Diosu sa etsui id'abataidha equi jenetia. Uja Diosu ja ataidha: <sup>32</sup> “Ema da mique tata chenu cuana sa Diosu. Ema da Abraham, Isaac, Jacob chenu cuana sa Diosu.” Da su Moisés chenu riariapiruidha, iyuame putsu. Echama puji di iyubataidha. <sup>33</sup> Diosu ja tueda cuatsasiataidha: “Jahuijatique mique pulucu, yahua iyuda mi etidinetia putsu. <sup>34</sup> Yama bana cuaja egipcio deja cuana ja quema israelita cristiano cuana nedaneda yatani. Daja huecha yama id'abana tuna sa tsiatsia cuana. Beju u hue ema yani tuna d'ejí su ya puji. Mi yama Egipto yahua su ebeitu.”

<sup>35</sup> ‘Equene su israelita cuana tsada mahue bataidha Moisés chenu tuna sa ehuidusuji epu puji. “¿Aiya mida ecuanaju sa echua puji ichataitia?” ataidha huecuana biame, Diosu ja tueda huecha ichataidha mecuana sa ehuidusuji epu puji, tuna d'ejí su paata puji. Daja Diosu ja Moisés chenu huariatame ataidha equi eutsuneti jenetia, mitsu putsu. <sup>36</sup> Da su Moisés chenu ja ecuana sa tata chenu cuana Egipto yahua jenetia jemicuinataidha. Jucuada nimetiuda ai cuana Egipto yahua, Mar Dherena su ataidha. Pushi tunca mara d'anita yahua su eputaniuneti cama, ai nimetiuda cuana ataidha. <sup>37</sup> Tueda Moisés chenu quitaita ja equene israelita chenu cuana quisataidha uja: “Cuaja Diosu ja ema micuana sa ehuidusuji ichatana nime, daja huecha pia profeta micuana sa edue cuana jenetia edhareta micuana sa ehuidusuji epu puji. Jei meaque pamapa tu cuaja emimiani cuana.” <sup>38</sup> D'anita yahua su Moisés chenu ecuana sa tata chenu cuana neje anidha. Angel ja Moisés chenu quisataidha Sinai Emata su. Tueda ángel ja Diosu sa jacuatsasiati quitaita cuana Moisés chenu tiataidha ecuana sa tata chenu cuana etiadera puji.

<sup>39</sup> ‘Beju ecuana sa tata chenu cuana ja jei aja mahue

ataidha. Tsada mahue bataidha huecuana Moisés chenu. Neicha hue Egipto yahua sa ai puiti madhada cuana tsada bataidha huecuana. <sup>40</sup> Da su tuneda Aarón ataidha uja: “Moisés chenu Sinai Emata su putiana. Ecuana Egipto yahua jenetia jemicuinatana biame, bue mahue ecuanaju cuaja jia da puitia. Da su aque ecuanaju sa puji pia diusu cuana ecuana pahuidusta puji.” <sup>41</sup> Da su huaca janana eimea ataidha huecuana. Animalo cuana manuametaidha huecuana, huaca janana diusu eimea peje su eirutsua puji. Da su beidaji putaidha huecuana, daja ai cuana yainia je. <sup>42</sup> Id'eti, badi, atujai cuana mitsutsuataidha huecuana. Da putsu, Diusu ja jusiataidha huecuana. Uja derejiji yani profeta sa quirica su: Israelita cristiano cuana, micuaneda pushi tunca mara d'anita yahua su epuniuneti cama, pia diusu eimea cuana peje su bahui animalo cuana irutsuana.

<sup>43</sup> Diusu eimea Moloc sa iyuda ete micuana sa anina.

Daja huecha diusu eimea Renfán sa atujai eimea micuana mitsutsuana.

Tueda eimea cuana micuaneda quitaita ana emitsutsua puji. Da putsu, yama micuana sa yahua jenetia jemicuina yu Babilonia yahua su ebeitu puji, esclavo epu puji.

<sup>44</sup> Da su Esteban ja quisainiame atana huecuana uja:

—Beju d'anita yahua su ecuana sa tata chenu cuana ja Diusu sa iyuda ete dusutaidha. Da dume su tusa jacuat-sasiati cuana ichasetataidha. Cuaja Diusu ja Moisés chenu bametaidha batame, daja ete ataidha huecuana. <sup>45</sup> Josué chenu ja ecuana sa tata chenu cuana huidusutaidha pia yahua su aniji cristiano cuana neje emajaiti puji su, Diusu sa iyuda ete di dusutaidha huecuana. Da tiempo su Diusu ja ecuana sa tata chenu cuana tueda yahua su aniji cristiano cuana jemicuina metaidha tueda yahua ecuana sa tata chenu cuana sa papu puji. Ecuana sa tata chenu cuana ja iyuda ete quinatina echua puji David chenu sa tiempo teje.

<sup>46</sup> Beju Diusu ja David chenu ebia su saida bataidha. Da su David chenu ja Diusu sa templo aida aja adhaataidha.

<sup>47</sup> David chenu sa ebacua Salomón chenu ja templo ataidha.

<sup>48</sup> Aimue Diusu Aida deja sa jaati ete dume su yani mahue. Tueda jepuiti biahua tiempo Diusu quisa puidha mesa profeta chenu ja quirica su deretaidha uja:

<sup>49</sup> Cielo da quema ani jude.

Da jenetia yahua su aniji cristiano cuana yama ecuatsasiana. Aimue detse micuaneda quema janahua jude a cua mahue, ema micuana ebia su aida putsu.

<sup>50</sup> ¿Aimue jia maida yama pamapa ai cuana aidha mahue?

<sup>51</sup> Da su Esteban daja hue quisainiame atana huecuana uja:

—Beju micuaneda da chuatadada Diusu peje su jei puja mahue cuana nime. Jadininibatiji da micuaneda Diusu id'abaja mahue cuana nime. Espíritu Santo jei aja mahue. Cuaja micuana sa tata chenu cuana ja ataidha nime, daja huecha micuaneda yainia. <sup>52</sup> Micuana sa tata chenu cuana pamapa Diusu sa profeta cuana madhabataidha. Tueda profeta cuana ja, “Diusu sa Jabeituti Deja butsepi epue”, quisataidha biame, tata chenu cuana ja manuametaidha huecuana. Beju jiahue Diusu sa Jabeituti Deja Jesús pueana. Micuaneda tueda madhaba putsu, manuameana. <sup>53</sup> Angel cuana ja ecuana sa tata chenu cuana Diusu sa jacuatsasiati cuana tiataidha biame, aimue micuaneda aja yainia mahue.

Daja Esteban ja sacerdote aida cuana atana.

### *Esteban manuametana huecuana*

<sup>54</sup> Da su beju Esteban sa quisa id'aba putsu, ebia su duininitana huecuana. Jatsedhaititana huecuana, ebia su duinini putsu. <sup>55</sup> Daja biame, Espíritu Santo ja Esteban nime-tucheametana. Esteban buepa huabata jachamati putsu, Tata Diusu aida, tucheda cielo su yani batana. Jesús di batana Diusu sa bai eni bene su eneti. <sup>56</sup> Da su Esteban ja quisatana huecuana uja:

—Mechamaque. Yama buepa ed'ianeti ebainia. Diusu sa Jabeituti Deja Jesús yama ebainia Diusu sa bai eni bene su eneti.

<sup>57</sup> Da mimi cuana id'aba putsu, mecuana sa eid'aja cuana jadunutitana huecuana. Jubida tsiatsiapirutana huecuana. Paije hue Esteban inatana huecuana. <sup>58</sup> Ejude tipe su dusutana huecuana. Dapia cuinati putsu, ebia jud'uji jajemititana huecuana. Da su Esteban maracapirutana huecuana. Tumu siaji cuana ja mecuana sa ebia jud'uji piada deja Saulo banime menajatiatana tuahueda paquinata puji. <sup>59</sup> Da su beju emaracataneti huecuan cama, Esteban ja Diusu mitsutana uja:

—Echua Puji Jesús, batsuque quema enid'u.

<sup>60</sup> Da su tururuneti putsu, tsiatsia neje jubida Diusu batatana uja:

—Echua Puji, be cuaja biame aji ye ema manuameji cuana. Daja pu putsu, emanu dajajana.

## 8

### *Saulo ja Diusu sa dharejiji cuana tijetije ataina*

<sup>1</sup> Beju Saulo Esteban manuameji cuana neje tupupai japaitiana. Da tsine jenetia Jesús peje su jei eputani cristiano cuana jubida chacupirutana huecuana. Da su pamapa jei eputani cuana jududupetana Judea, Samaria yahua detse su.

Apóstol cuana mu Jerusalén ejude su anitaina. <sup>2</sup> Piada piada Diusu eiyubatani deja cuana ja Esteban papatana. Ebia su japadarititana huecuana. <sup>3</sup> Da su beju Saulo ja Jesús peje su jei eputani cuana apeja atana. Ete meamea puniunetiana Cristo peje su jei eputani deja, epuna cuana ina putsu, eteriichame puji.

*Samaria yahua su Diusu sa quisa saida cuana quisaquisa putana huecuana*

<sup>4</sup> Beju jududutana cuana jaberebereatitana pia ejude cuana je. Quepia tuna putiana Diusu sa quisa saida cuana quisatana huecuana. <sup>5</sup> Felipe piada ejude Samaria yahua su putiana. Dapia cristiano cuana Cristo jepuiti quisaquisa apirutana. <sup>6</sup> Ai nimetiuda cuana di atana. Da su cristiano cuana ja tusa Cristo jepuiti quisa cuana id'abatana. <sup>7</sup> Felipe ja einid'u madhadaji cuana saisiametana. Einid'u madhada cuana tsiatsia neje cristiano cuana peje jenetia cuinanatana. Ase bue mahue, tida cuana saisimetana. <sup>8</sup> Da su tueda ejude su aniji cristiano cuana beidaji putana.

<sup>9-11</sup> Beju tueda ejude su piada deja anina Simón banime. Equene mau puina. Tuahueda cristiano cuana baseatana, nimetiuda ai cuana a putsu. Tueda deja aida jabametina pamapa Samaria yahua su aniji cristiano cuana peje su. Quejucua mara puji cristiano cuana ja tueda aida batana. Tusa quisa cuana su jei putaina huecuana. Da su pamapa cristiano cuana, chipiluji cuana ja biame tueda id'abaenitana. Uja putaina huecuana:

—Diusu ja Simón etucheametani ai nimetiuda aida cuana ya puji.

<sup>12</sup> Da su beju Felipe Diusu ecuatsasiati, Jesucristo jepuiti quisaquisa puana su, jucuada deja, epuna cuana tusa quisa cuana su jei putana. Yahui neje Diusu sa puji jaichaderatitana huecuana. <sup>13</sup> Beju Simón di jei puana. Yahui neje Diusu sa puji jaichaderati putsu, Felipe buquepirutana. Tueda nimetiudana, Felipe ja ai nimetiuda aida cuana atana putsu.

<sup>14</sup> Jerusalén ejude su aniji apóstol cuana ja Samaria yahua su aniji cristiano cuana Diusu sa quisa saida cuana su jei putana id'abatana su, Pedro, Juan detse beitutana huecuana Samaria yahua su pabatita tse puji. <sup>15</sup> Cuinati putsu, Diusu bajatana tse tuahueda tuna peje su Espiritu Santo pabeituta puji. <sup>16</sup> Yahui neje Diusu sa puji Echua Puji Jesús sa ebani su jaichaderametitana huecuana biame, Espiritu Santo mue cuina tsuhu puana tuna peje su. <sup>17</sup> Da su Pedro, Juan detse ja jei eputani cuana sa echua bia su tuatse sa eme huanatana su, Espiritu Santo tuna peje su cuinana.

<sup>18</sup> Beju Simón ja batana su, apóstol detse chipilu tiaja atana.  
<sup>19</sup> Uja bajatana tse:

—Cuaja ame ye nimetiuda aida buetsuaque ema yama di daja ya puji, quebata cristiano bia su quema eme huana putsu, Espíritu Santo tu peje su pacuina puji.

<sup>20</sup> Da su Pedro ja Simón atana:

—Pataitana mique chipilu mi neje tupupai, miada Diosu ja etiatani ai cuana chipilu neje bajaja aitia putsu. <sup>21</sup> Aimue mique ai biame a taji ecuanaju yainia ai cuana neje, mique muesumu Diosu butse su butsepi mahue putsu. <sup>22</sup> Beju japi-baturucatique mique piba madhada cuana. Bajaque Diosu cuapuitime tuahueda mi perdonata cua, mida piba madhada cuana pibaitia biame. <sup>23</sup> Mida envidia jubida epuani. Jucha sa eme su mi yani yama ebainia.

<sup>24</sup> Da su Simón ja Pedro bajatana uja:

—Mebajaque Diosu quema puji, be ema cuaja biame metse puitia nime paata mahue puji.

<sup>25</sup> Da su jucuada Samaria yahua su ejude meamea Diosu sa quisa saida cuana quisaquisa puana tse. Quisaquisa pupe putsu, Jerusalén ejude su jasiapatibana tse.

### *Felipe ja Etiopía yahua jenetia deja tsutana*

<sup>26</sup> Dapia edid'i Jerusalén ejude jenetia Gaza ejude teje saina. Tueda edid'i d'anita yahua je saina. Diosu sa ángel ja Felipe uja cuatsasiatana:

—Beni bene putique, Jerusalén ejude jenetia Gaza ejude su ecuinahu edid'i je.

<sup>27</sup> Da su Felipe putiana. Tueda edid'i su piada deja Jerusalén ejude jenetia Etiopía yahua su epuhu tejetaibana. Tueda da eunoco puina. Etiopía yahua su aniji cristiano cuana sa echua puji epuna Candace banime sa huaraji aida puina. Echua puji Candace sa chipilu quinaji puina. Dapia Jerusalén ejude su Diosu mitsutsuape putsu, beju epubuy je. <sup>28</sup> Mesa carroza neje esiapatibuy je, Diosu sa quirica Isaías chenu ja deretaidha mimiametana. <sup>29</sup> Da su Espíritu Santo ja Felipe cuatsasiatana:

—Janariatitique jichu carroza su. Tu neje tupupai jududutique.

<sup>30</sup> Da su Felipe carroza su cuinatiana su, deja ja Isaías chenu ja deretaidha quirica emimiametani id'abatana. Felipe ja tueda quisabatana uja:

—¿A mi eshanapainia cuaja mi emimiameinia?

<sup>31</sup> Beju deja ja Felipe jeutsutana:

—Cuaja shanapa taji mahue ebainia. Aimue aidhe biame ema eshanapame puji.

Da su deja ja Felipe ihuatana tu naja su carroza su paaniute puji.

<sup>32</sup> Beju uja derejiji yani tu emimiametani quirica su: Huisha emanuame puji nime tueda dusutana huecuana. Cuaja huisha janana cuatsa mahue epuani einuadedetasa huecuana su nime, daja tueda cuatsa mahue jatiatiana.

<sup>33</sup> Aimue aiya biame biahuanaja atana mahue. Manuametana huecuana putsu, bacua mahue puana.

<sup>34</sup> Da su mimiamet putsu, deja ja Felipe quisabatana: —¿Isaías chenu ja ai sa puji emimiani?

<sup>35</sup> Da su Felipe ja tu mimiametana ai cuana buetsuapirutana. Pamapa buetsuapirutana Jesús jepuiti. <sup>36</sup> Tuatse epuhu cama, ena edid'i naja su batana. Da su deja ja atana uja:

—Hue upia ena esa. Ichaderaque ema Diosu sa puji yahui neje.

<sup>37</sup> Da su Felipe ja deja atana:

—Ahua pamapa muesumu neje mi jei epuani su, da su mi yama Diosu sa puji yahui neje eichadera.

Deja ja uja jeutsutana:

—Jesucristo da Diosu sa Ebacua ema jei epuani.

<sup>38</sup> Da su deja ja carroza netisename putsu, ena su buteana tse. Beju Felipe ja deja Diosu sa puji yahui neje ichaderatana. <sup>39</sup> Da su ena jenetia cuinanana tse su, deja beidaji neje jaitianana. Mue beju jabatiyu tse. <sup>40</sup> Espíritu Santo ja Felipe Azoto ejude su dusutana. Dapia Felipe Diosu sa quisa saida cuana quisaquisa puana. Pia ejude cuana je di quisaquisa puniunetiana Cesarea ejude teje putiana beju.

## 9

### *Saulo Cristo peje su jei puana*

<sup>1</sup> Da tiempo su beju Saulo ja

Jesús peje su jei eputani cuana jubida tijetije ataina etaitanamepe huecuana puji. <sup>2</sup> Da putsu, sacerdote aida peje su putiana quirica neje tu pahuaratiata puji, Cristo peje su deja ahua epuna jei eputani cuana Damasco ejude su jadhitati jude ete cuana su einati puji. Ina putsu, Jerusalén ejude su ebeitu puji. <sup>3</sup> Da su quirica inatsu putsu, Saulo putiana. Beju edid'i su Damasco ejude naja su hueda jubida batana buepa jenetia ebuteni. <sup>4</sup> Daja ba putsu, yahua su dajajana. Etsui id'abatana uja:

—Saulo, Saulo, ¿jucujaja puji miada ema tijetije yainia?

<sup>5</sup> Da su Saulo ja quisabatana uja:

—¿Aidhe da mida, tata?

Beju jeutsutana:



—Ema da Jesús. Tijetije miada yainia da ema. Mida quitaita neda yatiani, ema tijetije a putsu.

<sup>6</sup> Da su Saulo riariana, iyuame pu putsu. Uja atana:

—Echua Puji, ¿ai mique tsada yama ya?

Da su Echua Puji ja Saulo uja atana:

—Netianaque. Putiyuque Damasco ejude su. Dapia pia ja mi equisata ai miada ya.

<sup>7</sup> Beju Saulo sa ebuqueji cuana rubutanenetitana. Cuaja mimi taji mahue jabatitana huecuana. Etsui id'abatana huecuana biame, mue aidhe biame ba huecuana. <sup>8</sup> Beju Saulo netianana su, cuaja jabati taji mahue jabatiana. Tu buqueji cuana ja meina putsu, riretana huecuana Damasco ejude su. <sup>9</sup> Dapia ejude su quimisha tsine cuaja jabati taji mahue jabatiana. Mue diadia, jaid'iti puana quimisha tsine teje.

<sup>10</sup> Beju tueda ejude su piada deja anina Ananías banime. Beju Echua Puji Jesús tu peje su bataji puana tahui su nime. Uja Ananías mitsutana:

—¡Ananías!

Ananías ja jeutsutana:

—Ehe, Echua Puji, hue ema upia.

<sup>11</sup> Da su Echua Puji ja Ananías cuatsasiatana uja:

—Netianaque. Putiyuque Judas sa ete su. Tueda ete calle Butsepi banime su yani. Chacuque Tarso ejude jenetia deja Saulo banime. Tueda Diosu neje emitsutiani miada eba.

<sup>12</sup> Mique eme tu bia su huanaque tu esaisiame puji. Tahui su nime yama tueda quisana mida tu peje su eputi.

<sup>13</sup> Da su Ananías ja jeutsutana uja:

—Echua Puji, tueda Saulo ja mique dharejiji cuana Jerusalén ejude su chacutaina tuna ai madhada cuana ya puji. Daja ema quisatana huecuana. <sup>14</sup> Beju jiahue upia pueitia mi peje su jei eputani cuana ina putsu, eteriicha puji. Sacerdote aida cuana ja tueda huaratitana daja paata huecuana puji.

<sup>15</sup> Da su Echua Puji Jesús ja Ananías atana uja:

—Putiyuque. Yama Saulo dhareana ema emebajata puji. Quema quisa saida cuana tueda quisaquisa epu. Judío mahue, mecuana sa huaraji aida, judío cuana peje su quisaquisa epu. <sup>16</sup> Tueda ebia su sufri epu ema jepuiti.

<sup>17</sup> Da su Ananías Saulo yani su putiana. Tu peje su cuinati putsu, mesa eme tu bia su huanatana. Uja Saulo atana:

—Edue Saulo, mi edid'i su bana Jesús ja ema mi peje su beitutaitia mi esaisiame puji. Espíritu Santo sa tucheda mique paaniti puji ema pueitia.

<sup>18</sup> Da hora su epeji nime mesa etua jenetia dajajatana. Beju jabati puana neicha tu puina nime. Da su Saulo Diosu sa

puji yahui neje jaichaderametiana. <sup>19</sup> Diadia putsu, neicha tucheda puibana. Jei eputani cuana neje quejucua tsine aniana Damasco ejude su.

*Saulo Damasco ejude su quisaquisa puana*

<sup>20</sup> Saulo judío cuana sa jadhitati jude ete cuana su, Jesús da Diosu sa Ebacua, quisaquisa pupiruana. <sup>21</sup> Pamapa tu id'abaji cuana nimetiutana. Tuneda cama uja jaquisabatitana:

—¿Aimue jia maida ye deja Jerusalén ejude su jei eputani cuana inaji puina mahue? ¿Aimue jia maida upia di pueana jei eputani cuana eina puji mahue?

<sup>22</sup> Beju Saulo ebia su janimetuheatiana. Jubida quisaquisa puana. Jesús da Diosu sa Jabeituti Deja Damasco ejude su aniji judío cuana bametana. Cuaja jeitsu taji mahue batana huecuana.

*Saulo judío cuana peje jenetia jududuana*

<sup>23-24</sup> Da putsu, judío cuana tu neje ebia su duininitana. Saulo bahue puana tu manuameja putana huecuana. Dhidha, tsine ejude sa esacuinaji su id'uataina huecuana Saulo emanuame puji. <sup>25</sup> Beju tueda ejude sa tumu pirica pahaida, baqui bauda anina. Da su dhidha su jei eputani cuana ja Saulo d'iti aida dume su pirica jenetia butemetana tu d'iji su ya puji.

*Saulo Jerusalén ejude su cuinatibana*

<sup>26</sup> Da su beju Saulo Jerusalén ejude su putibana. Dapia jei eputani cuana neje jadhitatija pudhaana. Iyubatana huecuana putsu, mue jadhitati putana huecuana, Saulo jaturucatiaiana aimue jei aja mahue atana huecuana putsu. <sup>27</sup> Daja biame, Bernabé ja Saulo apóstol cuana peje su dusutana. Tuahueda pamapa butsepi quisatana huecuana. Cuaja Saulo ja Jesús edid'i su ba putsu, daja huecha cuaja Jesús ja tueda mitsutana quisatana huecuana. Daja huecha cuaja Saulo ja Damasco ejude su aniji cuana Cristo jepuiti quisaquisa puana quisatana huecuana. <sup>28</sup> Da su beju Saulo tuna neje asepiruana. Jesús sa quisa saida cuana Jerusalén ejude su jubida quisaquisa pupiruana. <sup>29</sup> Beju tueda ejude su griego yana su mimi bahue judío cuana anitaina. Saulo janimetuheatitana putsu, tuna neje Jesús jepuiti jacuicuinatiana. Da putsu, Saulo manuameja adhaatana huecuana. <sup>30</sup> Da su piada piada jei eputani cuana bahue pu putsu, Saulo dusutana huecuana Cesarea ejude su. Da jenetia Tarso ejude su beitutana huecuana.

<sup>31</sup> Da su Judea, Galilea, Samaria yahua cuana su aniji jei eputani cuana saida, janimetuheatitana, Saulo ja aimue tijetije a huecuana putsu, tueda beju Cristo peje su jei puana

putsu. Diusu ebia su iyubatana huecuana. Espíritu Santo ja ebia su tsahuatana huecuana putsu, dueji cristiano cuana jei putana.

*Pedro ja Eneas saisiametana*

<sup>32</sup> Da su Pedro jei eputani cuana peje su ejude meamea puniunetiana tuna eba puji. Lida ejude su aniji edue cuana teje putiana. <sup>33</sup> Dapia piada deja nedaji Eneas banime tsutana. Ocho mara quitana saina, ase bue mahue putsu. <sup>34</sup> Da su Pedro ja tueda atana:

—Eneas, netianaque, Jesucristo ja mi esaisiametani putsu. Mique siju mapaque.

<sup>35</sup> Da hora su quitaita beju Eneas netianana. Da putsu, pamapa Lida, Sarón ejude detse su aniji cuana Jesús peje su jei putana. Mecuana sa equene ai puiti cuana ichaderatana huecuana Echua Puji Jesucristo tije ya puji.

*Tabita Pedro ja netianametaibana*

<sup>36</sup> Da tiempo su Jope ejude su Jesús peje su jei epuani epuna anina. Tueda banime Tabita. Griego yana su Dorcas banime. Tueda ai saida cuana a bahue puina. Puri cuana tsahua bahue puina. <sup>37</sup> Da su beju neda pu putsu, manuana. Es hanapa cuana ja padu putsu, ebaque ete su equita huanatana huecuana. <sup>38</sup> Beju Jope ejude da Lida ejude naja su anina. Da su Jope ejude su aniji jei eputani cuana Pedro Lida ejude su yani bahue pu putsu, beta edue detse beitutana huecuana Lida ejude su Pedro equisati puji. Cuinati putsu, Pedro atana tse uja:

—Jiahue quita hue tipeida meputija Jope ejude su.

<sup>39</sup> Da su Pedro tuatse neje putiana. Cuinati putsu, Pedro ete ebaque su equita esa su huidusutana huecuana. Dapia ahue manujiji cuana jadhitatitana. Beju japadarititasaina huecuana. Ahue manujiji epuna cuana ja Pedro ba putsu, Tabita ja tuneseda puji ejud'uji rusutana cuana bametana huecuana. <sup>40</sup> Da su Pedro ja epuna cuana edume jenetia cuinanametana. Tururu putsu, Diusu bajatana Tabita sa puji. Daja a putsu, Tabita emanu esa chamatana. Uja atana:

—¡Tabita, netianaque!

Da yatani cama, Tabita jabatiana. Pedro ba putsu, anitsuana. <sup>41</sup> Pedro ja mesa eme inatana tu enetianame puji. Da su jei eputani, ahue manujiji epuna cuana ihuatana. Tabita eid'e beju menajatiatana huecuana. <sup>42</sup> Jope ejude su aniji cristiano cuana beju bahue pu putsu, ebia su Jesús peje su jei putana huecuana. <sup>43</sup> Da su Pedro Jope ejude su quejucua tsine aniana ebity d'imiaji Simón sa ete su.

## 10

*Pedro, Cornelio neje*

<sup>1</sup> Cesarea ejude su piada deja aniana Cornelio banime. Tueda da soldado cuana sa capitán puina. Mesa batallón Italiano banime. <sup>2</sup> Tuahueda, pamapa mesa familia neje Diusu iyubataina. Ebia su Diusu mitsutsuataina. Puri cuana ebia su chipilu tia bahue puina. <sup>3</sup> Beju pia tsine buepatia badeute uqueda Diusu sa ángel ja tahui su nime tueda mitsutana uja:

—¡Cornelio!

<sup>4</sup> Daja Cornelio id'aba putsu, iyuame puana. Uja jeutsutana ángel:

—¿Ai eje mi, tata?

Da su beju ángel ja jeutsutana:

—Diusu ja mique jabajati cuana id'abatana. Daja huecha miada puri cristiano cuana chipilu tiana batana. <sup>5</sup> Da su jiahue quita deja cuana beituque Jope ejude su Simón Pedro upia paduseta huecuana puji. <sup>6</sup> Dapia ebite d'imiaji Simón sa ete su yani. Tueda ete da mar maje su yani. Tuahueda miada cuaja ya equisata.

<sup>7</sup> Ángel mimipe putsu, putibana su, Cornelio ja beta mesa emebajati ihuatana. Piada soldado di ihuatana. Tueda soldado da mesa eshanapa puina. Tueda di Diusu iyuba bahue puina. <sup>8</sup> Pamapa cuaja ángel ja atana butsepi quisape putsu, Jope ejude su beitutana huecuana.

<sup>9</sup> Pia tsine buepatia su Jope ejude su beju enariatitasa huecuana cama, Pedro ete pachata bia su anitsuana Diusu emitsu puji. <sup>10</sup> Beju diadiaja puana. Jana eid'uainia cama, tahui su nime batana. <sup>11</sup> Buepa etsequed'iatiani batana tahui su nime. Sábana aida nime buepa jenetia yahua su pushi ebatsu dhi-tarisijiji ebutesiu batana. <sup>12</sup> Pamapa animalo cuana sábana aida nime dume su ebade batana. Pamapa pushi tame etsedu neje aseji animalo cuana, pamapa d'ia cuana batana. <sup>13</sup> Da su Diusu ja Pedro uja cuatsasiatana:

—¡Netianaque, Pedro! ¡Manuameque! ¡Diadiaque!

<sup>14</sup> Da su Pedro ja jeutsutana:

—¡Mahue, Echua Puji! Ye aicha rejada edia puji, cuaja ecuana sa ai puiti cuana batame. Dia fue mahue ema.

<sup>15</sup> Da su neicha Diusu ja Pedro atana:

—¡Be daja mimiji! Quebata ai yama saida ebainia cuana, be rejada baji.

<sup>16</sup> Daja Pedro ja quimisha nuati tahui su nime batana. Da su sábana aida nime buepa su tsuatibana. <sup>17</sup> Pedro id'ecuina putsu, ebia su pibapibana uja: “¿Ai pa da yama tahui su nime baitia?” Da su Pedro daja epibapibani cama, Cornelio sa

jabeituti deja cuana eteriji su cuata cuinatana. <sup>18</sup> Simón sa ete quisababetana huecuana uja:

—¿A da ye ete su Pedro yani?

<sup>19</sup> Pedro mu daja hue pibapibaderana. Da su Espíritu Santo ja tueda atana uja:

—Quimisha deja cuana beju cuinataitia mi eba puji.

<sup>20</sup> Jiahue quita buteque. Putiyuque tuna neje ai pibapiba mahue neje, yama beituítia huecuana putsu. Saida batsuque huecuana, judío mahue huecuana biame.

<sup>21</sup> Da su Pedro buteana deja cuana peje su. Uja atana huecuana:

—Ema da Pedro micuana echacuinia.

¿Ai puji ni da micuana ema echacuinia?

<sup>22</sup> Da su jeutsutana huecuana uja:

—Capitán Cornelio ja ecuanaju mi peje su beitutana. Tueda da deja butsepi, Diosu iyuba bahue putsu. Pamapa judío cristiano cuana ja tueda saida ebatani. Diosu sa ángel ja uja cuatsasiatana capitán Cornelio: “Dusemeque Pedro upia mique ete su. Id'abaenique cuaja tuahueda mi equisatayu.”

<sup>23</sup> Da su Pedro ja deja quimisha cuana ete dume su nubi-ametana. Beju saida batsutana huecuana. Pia tsine Pedro, deja quimisha cuana neje Jope ejude jenetia cuinanana. Tuna neje pia jei eputani cuana di putitana.

<sup>24</sup> Pia tsine Cesarea ejude su, Cornelio sa ete su cuinatitana huecuana. Dapia Cornelio ja id'uatana huecuana pamapa mesa edue, eshanapa ihuajiji cuana neje. <sup>25</sup> Pedro ete eteriji su cuata cuinana su, Cornelio ja cuinana putsu, tsutana. Tururuana Pedro butse su tu emitsutsua puji. <sup>26</sup> Da su Pedro ja Cornelio atana:

—¡Netianaque! Be tururuji ema butse su, ema mu mi nime deja hue putsu.

<sup>27</sup> Da su Pedro Cornelio neje emimiani cama, ete dume su nubiana tse. <sup>28</sup> Dueji cristiano cuana anitaina Pedro ja batana. Da su Pedro ja uja atana huecuana:

—Micuaneda bahue rejada judío cuana, judío mahue cuana neje yani puji. Daja huecha rejada tuna sa ete cuana su enubi puji. Daja biame, tu butse su pamapa cristiano cuana tupupai cama Diosu ja ema buetsuatana. <sup>29</sup> Da putsu, ema pueitia micuana peje su, micuaneda ema ihuameitia su. Da su beju mequisaque ema, ¿ai puji micuaneda ema ihuameitia?

<sup>30</sup> Da su Cornelio ja jeutsutana Pedro:

—Pushi tsine ye hora tupu su ema quema ete su ayuna puanina. Diosu neje emitsutiani cama, deja ejud'uji pasane cuarecuareji ema butse su bataji puana. <sup>31</sup> Uja ema mitsutana: “Cornelio, Diosu ja mique jabajati cuana id'abatana.

Daja huecha miada puri cristiano cuana chipilu tiana bana. <sup>32</sup> Da su jiahue quita deja cuana beituque Jope ejude su Simón Pedro upia paduseta huecuana puji. Dapia ebiti d'imiaji Simón sa ete su yani. Tueda ete da mar maje su yani. Tueda epue su, mida equisata.” <sup>33</sup> Daja ángel ja ema atana. Beju da hora su hue mi yama ihuameana. Saipie mida pueitia beju. Hue ecuanaju pamapa Diusu butse su yani. Da su quisaque ecuanaju pamapa Diusu ja mi tiatana quisa saida cuana.

*Pedro Cornelio sa ete su quisaquisa puana*

<sup>34</sup> Da su Pedro uja quisaquisa pupiruana:

—Jiahue yama eshanapaeninia Diusu ja pamapa cristiano cuana tupupai ebatani. <sup>35</sup> Aidhe papu cristiano cuana Diusu iyuba putsu, saida eputaniuneti su, Diusu ja saida ebat-suta huecuana. <sup>36</sup> Diusu ja mesa Cristo jepuiti quisa saida cuana israelita cuana peje su equene quisametana neicha tu neje saida paputa huecuana puji. Beju tueda Jesucristo da pamapa cristiano cuana sa Echua Puji. <sup>37-38</sup> Micuaneda bahue cuaja ye ai cuana puana judío cuana sa yahua su. Equene Juan Bautista quisaquisa puana. Da su Diusu ja Espíritu Santo beitutana Jesús peje su mesa tucheda etia puji. Tueda Jesús ja Galilea yahua su ai saida cuana apirutana. Pamapa ejude meamea puniunetiana ai saida cuana ya puji. Ishahua sa tucheda ema su aniji cristiano cuana d'ejí su atana. Daja atana, Diusu sa tucheda mesa anina putsu. <sup>39</sup> Jesús ja Judea yahua, Jerusalén ejude su atana ai cuana ecuanaju bana. Ecuanaju tueda ai cuana cristiano cuana equisainia. <sup>40</sup> Da su beju cristiano cuana ja Jesús curusu su badeanatana biame, Diusu ja tueda netianametaibana quimisha tsine jenetia. Tueda ecuanaju eid'e bana, ecuanaju peje su bahui eid'e jabametiana putsu. <sup>41</sup> Aimue jabametiana mahue pamapa cristiano cuana peje su. Diusu ja ecuanaju biahua tiempo dharetana ye ai cuana cristiano cuana equisa puji. Ecuanaju Jesús neje diadiana, tu id'eibana su. <sup>42</sup> Tuahueda ecuanaju cuatsasiatana cristiano cuana peje su quisaquisa epu puji, Diusu ja Jesús pamapa manujiji, eid'e cuana sa ejuzgaji huaraji aida ichatana. <sup>43</sup> Biahua tiempo jenetia profeta chenu cuana ye ai cuana jepuiti quisa putaidha. Aidhe papu Jesucristo peje su jei epu su, mesa jucha cuana Diusu ja edhipata, putaidha huecuana.

*Espíritu Santo judío mahue cuana peje su cuinana*

<sup>44</sup> Beju Pedro daja emimiani cama, Espíritu Santo tu eid'abatani cuana bia su buteana. <sup>45</sup> Pedro neje puetana judío edue cuana nimetiunetitana, Diosu ja Espíritu Santo judío mahue cuana tiatana putsu. Da su judío mahue cuana Diosu mitsutsuapirutana. <sup>46</sup> Eshanapa mahue yana su beju mimipirutana huecuana. <sup>47</sup> Da su Pedro ja judío edue yanita cuana uja atana:

—Ye cristiano cuana judío mahue papu biame, Diosu ja Espíritu Santo tiatana huecuana ecuanaju nime. ¿Aimue jia maida ye cuana di Diosu sa puji yahui neje ichadera taji mahue?

<sup>48</sup> Da su Pedro ja cuatsasiatana paichaderata huecuana puji Jesucristo sa ebani su. Da su beju Cornelio ja Pedro, pia judío edue cuana neje bajatana tuna neje quejucua tsine puji paaniti huecuana puji.

## 11

*Pedro ja Jerusalén ejude su aniji dharejiji cuana quisatana*

<sup>1</sup> Jerusalén ejude su aniji apóstol, edue cuana id'abatana judío mahue cuana Diosu sa quisa saida su jei putana. <sup>2-3</sup> Da su Pedro Jerusalén ejude su jasiapatiana su, pia edue ja tueda tuaquisatana uja:

—¿Jucuaja su mida judío mahue cuana neje diadiana?

<sup>4</sup> Da su Pedro ja pamapa butsepi quisatana huecuana uja:

<sup>5</sup> —Jope ejude su ema Diosu emitsutsuainia cama, tahui su nime yama bana. Tahui su nime yama sávana aida nime buepa jenetia ema peje su ebutesiu bana. <sup>6</sup> Pushi ebatsu dhitarisijiji ebutesiu bana. Da dume su pamapa pushi tame, etsedu neje aseji animalo cuana, pamapa d'ia cuana bade-taina. <sup>7</sup> Da su Diosu ja ema cuatsasiatana: “Netianaque, Pedro. Manuameque. Diadiaque.” <sup>8</sup> Da su yama jeitsuana: “Mahue, Echua Puji. Dia bue mahue ema rejada aicha.” <sup>9</sup> Da su neicha Diosu ja ema atana: “Be daja mimiji. Quebata ai yama saida ebainia cuana, be rejada baji.” <sup>10</sup> Daja yama quimisha nuati bana. Da su sávana aida nime buepa su tsu-atibana. <sup>11</sup> Da hora su quitaita quimisha deja cuana Cesarea ejude jenetia ema peje su cuinatana. <sup>12</sup> Espíritu Santo ja ema uja cuatsasiatana: “Putiyuque ye deja cuana neje ai pibapiba mahue neje.” Da su tuna neje ema putiana Cornelio sa ete su. Ye edue cuana di ema neje putitana. <sup>13</sup> Dapia Cornelio ja ecuanaju quisatana mesa ete su ángel tu peje su jabame-tiana. Uja ángel ja cuatsasiatana: “Deja cuana beituque Jope ejude su Pedro padusetá huecuana puji. <sup>14</sup> Cuaja mida, mique familia cuana neje d'ejí su pu cua equisata.” <sup>15</sup> Da su beju Cornelio sa ete dume su ema quisaquisá epuani cama,

Espíritu Santo tueda judío mahue cuana bia su buteana, cuaja ecuana peje su equene buteana nime. <sup>16</sup> Da hora su yama pibana Jesús ja equene ecuana uja atana: “Enei hue Juan ja cristiano cuana Diosu sa puji yahui neje ichaderatana. Micuana Espíritu Santo sa tucheda neje Diosu sa puji yama eichadera.” <sup>17</sup> Beju Diosu ja Espíritu Santo tiatana huecuana, Echua Puji Jesucristo peje su jei putana su, cuaja ecuana equene tiatana nime yama bana. Diosu ja tueda judío mahue cristiano cuana saida batsutana putsu, da su, ¿ai ni da ema Diosu, “Mahue”, ya puji?

<sup>18</sup> Da su beju Jerusalén ejude su aniji edue cuana Pedro sa quisa daja id'abatana su, mitanenetitana huecuana. Diosu mitsutsuapirutana huecuana uja:

—Diosu ja judío mahue cuana di d'ejí etiatani tu peje su panimeturucatita huecuana puji, d'ejí su paputa huecuana puji.

*Antioquía ejude su aniji edue cuana tijetije apirutana huecuana*

<sup>19</sup> Beju Esteban manuametana huecuana su, pia edue cuana di tijetije apirutana huecuana. Piada piada edue cuana Chipre edhapupu su, Fenicia yahua su, Antioquía ejude su jududutana. Dapia Diosu sa quisa saida cuana judío cuana peje su bahui quisaquisa putana huecuana. <sup>20</sup> Piada piada tuneda Chipre edhapupu jenetia, Cirene ejude jenetia putaina. Antioquía ejude su cuinatana huecuana. Judío mahue cuana peje su Jesucristo sa quisa saida cuana quisaquisa putana huecuana. Cuaja Jesús peje su jei pu putsu, d'ejí su pume puta cua quisaquisa putana huecuana. <sup>21</sup> Echua Puji Jesucristo sa tucheda mecuana sa anina. Dueji cristiano cuana Jesucristo peje su jei putana.

<sup>22</sup> Jerusalén ejude su aniji jei eputani edue cuana ja tueda ai cuana id'aba putsu, Bernabé beitutana Antioquía ejude su. <sup>23</sup> Tueda ejude su cuinatana su, beidaji puana, Diosu ja atana ai cuana ba putsu. Saida neje quisatana huecuana Echua Puji peje su panimetuheaderatita puji.

<sup>24</sup> Bernabé da deja saida puina. Espíritu Santo sa tucheda mesa anina. Echua Puji Jesucristo peje su ebia su janime-tuheatina. Dueji cristiano cuana Jesucristo peje su huidusutana.

<sup>25</sup> Da su beju Bernabé Tarso ejude su putiana Saulo echacuti puji. <sup>26</sup> Dapia ejude su teje putsu, jasiapatibana Saulo neje Antioquía ejude su. Dapia ejude su piada mara anitiana tse jei eputani edue cuana neje. Dueji cristiano cuana buetsuatana tse. Dapia Antioquía ejude su aniji jei eputani mahue cuana ja Cristo peje su jei eputani cuana cristiano ebani ichatana.



<sup>27</sup> Da tiempo su pia Diusu sa quisa puji cuana Jerusalén ejude jenetia cuinatana Antioquía ejude su. <sup>28</sup> Tuneda piada banime Agabo. Da su edue cuana jadhitatitana su, Agabo tuna duju su netianana. Espíritu Santo ja tueda cuaja ai cuana epu quisaquisa ametana. Pamapa yahua je mid'e epu quisaquisa puana. (Beju daja puana romano echua puji aida Claudio banime anina tiempo su.) <sup>29</sup> Mid'e putsu, pamapa Antioquía ejude su aniji jei eputani edue cuana ja Judea yahua su aniji edue cuana tsahuaja atana. Tuna sa tupu teje chipilu ichatana huecuana. <sup>30</sup> Saulo, Bernabé detse huaratiatana huecuana tueda chipilu edue cuana sa ehuidusuji cuana peje su Judea yahua su padusuta tse puji.

## 12

*Jacobo manuametana huecuana. Pedro teriichatana huecuana*

<sup>1</sup> Da tiempo su echua puji Herodes Agripa ja piada piada jei eputani cuana tijetije apirutana. <sup>2</sup> Juan sa edue Jacobo espada neje manuametana. <sup>3</sup> Jacobo manuame putsu, judío jei eputani mahue cuana beidaji ametana. Da su Herodes Agripa ja daja beidaji eputani huecuana ba putsu, Pedro di inametana eteriichame puji. Daja Herodes Agripa ja atana levadura mahue pan pascua tsine epuneti tupu. <sup>4</sup> Herodes Agripa ja Pedro cristiano cuana butse su tuaquisaja adhaatana, pascua tsine ejaitiana su tu emanuame puji. Da putsu, Herodes Agripa ja cuatsasiatana soldado cuana saida painatsihuata huecuana puji. Da su beju piada tunca sucuta ejaitiana soldado cuana ja Pedro inatsihuatana. Pushi pushi jaturucatitana huecuana tu einatsihua puji. <sup>5</sup> Pedro terisaisiajiji yani tupu, jei eputani cuana ja jubida Diusu bajatana tuseda puji.

*Pedro terijiji yani biame, Diusu ja d'ejí su atana*

<sup>6</sup> Da su beju dhidha su Herodes Agripa ja Pedro risiametana beta cadena neje apudaya tueda emanuameme puji. Pedro tahuisaina tu inatsihuaji soldado detse dhede je su. Pia soldado detse eteriji su netina einatsihua puji. <sup>7</sup> Da hora su Diusu sa ángel Pedro peje su bataji puana. Pedro terijiji yani su hueda jubida puana. Da su ángel ja Pedro pehued'apabatana tu eid'edia puji. Uja Pedro cuatsasiatana:

—Tipeida netianaque.

Da hora su quitaita cadena detse dajajana tusa emebaja jenetia. <sup>8</sup> Angel ja neicha cuatsasiatana Pedro:

—Jajud'utique. Mique pulucu, ebiad'amaji jaichati putsu, ema tije pueque.

<sup>9</sup> Da su beju Pedro ja ángel tije atana. Tueda mu tahui epuani pepe hue puana. <sup>10</sup> Pedro naja su aniji soldado detse jusiaichatana tse. Pia beta soldado detse eteriji su eneti dhede je jaitianana tse. Piama jenetia taraca etsequeini su cuinati putsu, etsequeini beju tusa piba hue jatsequed'iatiana. Da su d'eji su cuinana tse. Chuadera pad'i aseti putsu, ángel ja Pedro jusianetiatana. <sup>11</sup> Beju Pedro tu mehua netitiana. Uja japibatiana: “Aimue tuque ema tahui epuani mahue. Diusu ja mesa ángel beitutana ema Herodes Agripa sa eme jenetia ejemicuinata puji. Daja huecha judío cristiano cuana sa eme jenetia di ema jemicuinataitia, ema ai madhada aja adhaatana huecuana biame.”

<sup>12</sup> Beju daja epibatiani je, María sa ete su putiana. Tueda da Juan Marcos sa cuara puina. Tueda ete su dueji edue cuana dhitajiji anitaina. Diusu bajatanina huecuana. <sup>13</sup> Da su Pedro ja eteriji turubatana su, emebajaji epuneje Rode banime netianana ehati puji. <sup>14</sup> Pedro sa etsui id'aba putsu, beju shanapatana Pedro etsequeini su eneti. Ebia su beidaji pu putsu, tsequed'iaji mahue jududusiapana ete dume su pia cuana equisa puji. Uja atana huecuana:

—Beju Pedro etsequeini su eneti.

<sup>15</sup> Da su epuneje uja atana huecuana:

—¡Tseitsi nime mida!

Da su Rode neicha jubida atana huecuana uja:

—¡Enei hue, butsepi yama micuana equisainia!

Da su jaquisabatitana huecuana:

—Aimue tueda mahue. Tu inatsihuaji ángel hue. Da su mu jia beju manujiji.

<sup>16</sup> Daja tuna equisatitani cama, Pedro ja daja hue eteriji turubanetiatana. Beju tsequed'iatana huecuana su, Pedro eneti batana huecuana. Eneti ba putsu, nimetiunetitana huecuana. <sup>17</sup> Da su Pedro ja mesa eme jemitsuatana pamitanata huecuana puji. Pamapa ai cuaja puana cuana quisapirutana huecuana. Cuaja Echua Puji Jesús ja tueda jemicuiname atana quisatana huecuana. Uja cuatsasiatana huecuana:

—Mequisatique Jacobo, pia edue cuana di.

Da su Pedro putiana.

<sup>18</sup> Apudaya su beju soldado cuana janimetipeititana, Pedro ai mahue ba putsu. Uja jaquisabatitana huecuana:

—¿Juque jia Pedro?

<sup>19</sup> Da su Herodes Agripa ja chacuametana. Mue teje atana huecuana putsu, einatsihuaji soldado cuana d'ayatana. Beju manuametana huecuana. Da su beju Herodes Agripa Judea yahua jenetia cuinanana, Cesarea ejude su eputi puji.

*Herodes Agripa manuana*

<sup>20</sup> Da su beju Herodes Agripa Tiro, Sidón ejude detse su aniji cristiano cuana neje duininiana. Da su japaititana huecuana Herodes neje ebutsepiati puji. Tu peje su putitana huecuana tueda paduininiriji puji. Daja atana huecuana, Herodes Agripa ja mecuana sa ai dia taji cuana tiatana putsu. Herodes Agripa sa huaraji aida Blasto banime ja tsahuatana huecuana Herodes Agripa neje ebutsepiati puji. <sup>21</sup> Da su beju pia tsine Herodes Agripa jajud'uderatiana ania tuna emitsu puji. Mesa huaraji ani jude su cuinati putsu, aniuteana. Da jenetia saida quisaquisa atana huecuana. <sup>22</sup> Da su id'abatana huecuana su, uja putana huecuana:

—¡Ye mu Diosu! ¡Aimue deja mahue!

<sup>23</sup> Da hora su Diosu sa ángel ja jubida neda ametana Herodes Agripa, tueda Diosu nime jabametiana putsu. Huerehuere sutsu ja diajiji manuana.

<sup>24</sup> Da su beju jei eputani cuana Diosu sa quisa saida cuana daja hue quisaquisa puniunetideratana pamapa ejude cuana je. Dueji cristiano cuana Jesús peje su jei putana.

<sup>25</sup> Bernabé, Saulo detse ja Jerusalén ejude su aniji cuana dhitajiji chipilu menajatiatana su, Antioquía ejude su jasiap-atibana tse. Tuatse neje Juan Marcos putiana.

## 13

*Bernabé, Saulo detse pia ejude cuana su putiana*

<sup>1</sup> Beju Antioquía ejude su aniji jei eputani cuana duju su profeta, ebuetsuaji cuana anitaina. Tuneda da uja banime:

Bernabé.

Simón. Mesa esitu ebani da Negro puina.

Lucio. Tueda Cirene ejude jenetia puina.

Manaén. Tueda Echua Puji Herodes Felipe neje sehuana.

Saulo. <sup>2</sup> Da su jadhitatitani huecuana su, ayuna epuani je, Echua Puji Jesucristo mitsutsuatana huecuana. Daja eputani cama, Espíritu Santo ja uja atana huecuana:

—Bernabé, Saulo detse medhareque quema mudu paata tse puji.

<sup>3</sup> Da su ayuna pu putsu, Diosu mitsupe putsu, edue cuana ja mecuana sa eme Bernabé, Saulo detse sa echua su huanatana. Da neje saida beitutana huecuana.

*Saulo, Bernabé detse Chipre edhapupu su aniji cristiano cuana peje su quisaquisa puana*

<sup>4</sup> Beju Espíritu Santo ja beitutana Saulo, Bernabé Seleucia ebuteji su. Tueda ebuteji su barco su aniuteana tse Chipre banime edhapupu su eputi puji. <sup>5</sup> Juan Marcos di tuatse neje puniunetina tuatse etsahua puji. Beju edhapupu su

cuinati putsu, Salamina ejude sa ebuteji su satsuatiana huecuana. Dapia judío cuana sa jadhitati jude ete cuana su Diusu sa quisa saida cuana quisaquisa pupirutana huecuana. <sup>6</sup> Pamapa edhapupu je aniji ejude cuana peje su puniunetiana huecuana. Pafos ebuteji teje cuinatitana huecuana. Dapia piada judío deja Barjesús banime tsutana huecuana. Mesa pia ebani da Elimas puina. Tueda da mau, bid'umimi aida puji puina. “Ema da Diusu sa quisaquisa puji”, pu bahue puina. <sup>7</sup> Tueda edhapupu sa huaraji aida Sergio Paulo sa eshanapa puina. Tueda da huaraji aida, bahue eni puina. Da su tuahueda Bernabé, Saulo detse ihuametana, Diusu sa quisa saida cuana id'abaja atana putsu. <sup>8</sup> Da su beju mau Elimas ja shanapa putsu, Bernabé, Saulo detse neje nimepuana. Tsada mahue batana, huaraji Sergio Paulo ja Diusu sa quisa saida cuana paid'abata puji, cuapuitime jei pu cua putsu. <sup>9-10</sup> Da su Saulo ja mau jubida chama putsu, Espíritu Santo ja nimetuchteatana mau uja ya puji:

—Mida da deja ate, jabaseatiji, bid'umimi aida puji, Ishahua sa ebacua, pamapa ai saida cuana duininibaji. Beju nahuebarijique Diusu ja yatani ai saida cuana. <sup>11</sup> Jiahue quita mida Diusu ja ecastigata. Quejucua tsine puji mida padha epu.

Da hora su beju tueda cuaja jabati taji mahue jabatiana. Pia chacutana tu parireta puji. <sup>12</sup> Da su huaraji aida Sergio Paulo ja tueda ai cuana batana su, jei Cristo peje su puana. Nimetiua, Cristo jepuiti jabuetsuati cuana id'aba putsu.

*Pablo, Bernabé detse Pisidia yahua pia Antioquía ejude su putiana*

<sup>13</sup> Da su beju Pablo, mesa ebuqueji detse neje putiana. Barco su anitutana huecuana Pafos ejude sa ebuteji jenetia. Panfilia yahua Perge ebuteji su cuinatitana huecuana. Dapia Juan Marcos ichajusiatana huecuana. Da jenetia Jerusalén ejude su jasiapatibana. <sup>14</sup> Pia detse jaitianana Pisidia yahua pia Antioquía ejude su. Beju janahua tsine cuinana su, judío cuana sa jadhitati jude ete su putiana tse. Dapia edume su aniuteana tse. <sup>15</sup> Beju judío cuana sa edusuji cuana ja Tata Diusu sa quirica mimiamepetana su, Pablo, Bernabé uja atana huecuana:

—Edué judío detse, ahua metseda ai saida jaquisati cuana ecuanaju neje puja su, memimique.

<sup>16</sup> Da su Pablo netianana. Uja quisaquisa pupiruana:

—Deja israelita cuana, meid'abaque ema. Upia yani judío mahue Diusu iyubaji cuana di, meid'abaque ema. <sup>17</sup> Israelita cuana sa Diusu ja ecua sa tata chenu cuana dharetana. Tuneda yahua emetse mahue cuana nime Egipto yahua su anitaina tupu, ebia su jajucuatitaidha huecuana, Diusu ja

ibunebataina huecuana putsu. Da su Diusu ja mesa tucheda neje jemicuinataidha huecuana tueda yahua jenetia. Pushi tunca mara tuna sa ai madhada cuana tucheataidha d'anita yahua su. <sup>18</sup> Diusu butse su saida mahue putaina huecuana biame, Diusu ja pushi tunca mara puji saida quinataidha huecuana tueda d'anita yahua su. <sup>19</sup> Beju siete tsiapiapiati ejude cuana dajajamepetaidha Canaán yahua su. Tueda yahua tiataidha ecuana sa tata chenu cuana tuna dapia paanitita puji. <sup>20</sup> Da su beju Diusu ja pushi tunca cien pishica tunca ejaitiana mara puji cuatsasiataidha huecuana tsapiapiati huaraji ebaji cuana neje. Daja cuatsasiataidha huecuana profeta Samuel chenu bataji puidha teje. <sup>21</sup> Da su beju Samuel chenu bajataidha huecuana tu echua puji paichata puji, tuna ecuatsasia puji. Da su Diusu ja Saúl chenu ichataidha echua puji papu puji. Saúl chenu sa tata banime Cis. Tueda da Benjamín chenu sa familia jenetia. Saúl ja pushi tunca mara puji cuatsasiataidha huecuana. <sup>22</sup> Da su Diusu ja Saúl chenu jemicuinataidha. David chenu ichataidha Saúl chenu eturuca. Beju David chenu ja Diusu beidaji ametaidha. Uja Diusu mimidha David chenu sa puji: “David, Isaí chenu sa ebacua ja ema ebia su beidaji yametani. Tuahueda pamapa quema jacuatsasiati cuana, quema tsada ai cuana yatani.” <sup>23</sup> Cuaja Diusu ja jamitsuti tiataidha batame, D'oji su Jaatiji Deja beitutana Israel peje su. Tueda David chenu sa familia jenetia pueana. Tueda da Jesús banime. <sup>24</sup> Beju Jesús cuinaji mahue su, Juan Bautista chenu quisaquisa puana israelita cuana peje su. Tuahueda uja atana huecuana: “Mepibaturucatique micuana sa japibati madhada cuana jepuiti. Mesiapatique Tata Diusu peje su. Yahui neje meichaderatique tuseda puji. <sup>25</sup> Juan chenu ja manuji mahue su, uja atana huecuana: “Aimue ema Diusu sa Jabeituti Cristo, cuaja micuaneda epibatiani nime mahue. Tueda mu ema tije epue. Tueda da ema ebia su huaraji aida. Ema mu ai eni mahue tu emebaja puji.”

<sup>26</sup> Beju Pablo daja hue quisainiame atana huecuana:

—Judío edue cuana, yama micuana equisainia, micuaneda da Abraham chenu sa ebacua cuana putsu. Diusu iyubaji judío mahue cuana di, yama micuana equisainia, Diusu sa quisa saida cuana da pamapa micuaneseda puji, micuaneda jei pu putsu, d'oji su mepuque puji. <sup>27</sup> Jerusalén ejude su aniji cristiano, huaraji cuana ja Cristo da Diusu sa Jabeituti Deja aimue shanapaja ataina mahue. Pamapa janahua tsine Diusu sa quirica mimiametaina huecuana biame, shanpaja mahue atana huecuana. Tueda quirica su daja epuani Cristo jepuiti. Diusu sa biahua tiempo profeta chenu cuana ja cuaja

Cristo manume epu jepuiti deretaidha. Beju Cristo manamemetana huecuana, cuaja Diusu sa quirica su derejiji yani batame. <sup>28</sup> Cristo ja ai madhada atana mahue biame, huaraji aida Pilato bajatana huecuana tu pamanuameta puji. <sup>29</sup> Da su Cristo nedaneda a putsu, manuametana huecuana. Daja atana huecuana, cuaja Diusu sa quirica su derejiji yani batame. Pia cuana ja curusu jenetia tueda jemiutetana. Sepulcro su huananubiatana huecuana. <sup>30</sup> Beju Tata Diusu ja mu tueda id'emetaibana manujiji duju jenetia. <sup>31</sup> Galilea yahua jenetia tu buqueji cuana peje su jabametiana Jerusalén ejude su. Quejucua nuati biame Jesús eid'e batana huecuana. Tueda ai quisa saida cuana cristiano cuana quisatana huecuana.

<sup>32</sup> 'Beju jiahue etseju micuana ye quisa saida cuana equisainia. Diusu ja ecuana sa tata chenu cuana D'ejí su Jaatiji Deja ebeitu jamitsuti tiataidha. <sup>33</sup> Jiahue beju ecuana peje su beitutana. Tueda Jesús banime. Manujiji cuana duju jenetia id'eibana, cuaja beta puji salmo su derejiji yani batame. Uja derejiji yani: "Mida da quema Ebacua. Jiahue beju yama mi eid'e ameitia." <sup>34</sup> Diusu ja jamitsuti tiataidha Jesús sa equita aimue eihui mahue puji. Uja Diusu ja deremetaidha, Salmos quirica su derejiji yani: "Yama David chenu tiana jamitsuti micuana yama etiayu. Manu bue mahue D'ejí Jaatiji Deja micuana yama etia." <sup>35</sup> Pia su uja derejiji yani: "Ema da mique ibuneda emebajaji. Aimue quema equita eihuiame mahue, miada ema eid'emeyu putsu." <sup>36</sup> Biahua tiempo beju David chenu ja cristiano cuana saida cuatsasiataidha, cuaja Diusu sa tsada batame. Da su David chenu manuidha su, sepulcro su huananubiataidha huecuana tusa tata chenu cuana neje. Tusa equita ihuidha beju. <sup>37</sup> Jesús sa equita mu mue ihui puana, Diusu ja tueda id'emetaibana putsu. <sup>38</sup> Judío edue cuana, bahue mepuque, Jesús ja micuana sa jucha cuana perdonata cua. <sup>39</sup> Quebata papu tu peje su jei epu su, Diusu ja tueda eperdonatayu. Moisés chenu sa jacuatsasiati cuana bahui a putsu, aimue Diusu ja etse eperdonata mahue. <sup>40</sup> Biahua tiempo Diusu ja mesa profeta chenu cuana uja deremetaidha:

<sup>41</sup> Mechamaque, jashishatiji cuana.

Menimetiunque.

Metaitanapeque.

Ema da Diusu.

Yama nimetiuda aida yainia micuana butse su mechamaque puji.

Aimue micuana jei epu mahue, pia cuana ja micuana equisatani biame.

<sup>42</sup> Edue cuana, merejatique.

Be tueda jashishatiji cuana nime mepuji.

Ahua micuaneda tuna nime daja epu su, Diosu ja micuana tuna nime ematsetayu.

Da su beju Pablo quisaquisa pepeana. Bernabé neje ete je ecuinanani cama, judío mahue deja cuana ja uja atana tse:

—Pia janahua tsine su mesiapatiichaque ye quisa cuana ecuanaju equisaicha puji.

<sup>43</sup> Piada piada judío, judío mahue cuana ja Pablo, Bernabé detse chuadera pad'i tije atana. Da su Pablo, Bernabé detse ja uja atana huecuana:

—Diosu sa jaibunebati su daja hue mepuniunetideraque.

<sup>44</sup> Da su beju pia janahua tsine su que chidi hue ejude quitana cristiano cuana jadhitatitana Diosu sa quisa saida cuana eid'aba puji. <sup>45</sup> Piada piada judío cuana ja dueji cristiano cuana Pablo, Bernabé detse eid'aba puji dhitajiji yanita ba putsu, ebia su envidia putana huecuana. Pablo, Bernabé detse neje nimepu putsu, eturucamimitana huecuana. <sup>46</sup> Da su Pablo, Bernabé detse ja mimi jubida cuana neje jeutsutana huecuana uja:

—Equene etseju sa judío peje su Diosu sa quisa saida cuana quisaquisa pu taji puana. Beju micuaneda tsada mahue bana putsu, judío mahue cuana peje su etseju quisaquisa eputi d'eji su paputa huecuana puji. <sup>47</sup> Uja Tata Diosu ja deremetaidha: Yama mi pamapa yahua su aniji cristiano cuana peje su ebeituinia quema quisa saida cuana tuna peje su edusu puji, tuneda di d'eji su paputa puji.

<sup>48</sup> Da su judío mahue cuana ja Pablo sa quisa cuana id'abatana su, beidaji putana huecuana. “Diosu sa quisa cuana da saida”, pupirutana huecuana. Da hora su Diosu ja dharetana cuana tu peje su jei putana. <sup>49</sup> Da su beju pamapa tueda yahua su aniji cristiano cuana ja Diosu sa quisa saida cuana id'abatana. <sup>50</sup> Daja biame, judío cuana ja piada piada epuna tueda eni, tata edhi ehuidusuji cuana Pablo, Bernabé detse neje duininitana. Cristiano cuana dhitametana huecuana Pablo, Bernabé detse ecuademe puji. <sup>51-52</sup> Da su Pablo, Bernabé detse ja ejude tsahua su pulucu cuana tarasaisiatana Diosu tuna neje eduininiani pashanapata huecuana puji. Cristo peje su jei eputani eichacua cuana mu daja hue beidaji puniunetideratana, Espíritu Santo ja enimetucheametani huecuana putsu. Da su beju Pablo, Bernabé detse Iconio ejude su putiana.

## 14

*Pablo, Bernabé detse Iconio ejude su anina*

<sup>1</sup> Beju Pablo, Bernabé detse Iconio ejude su daja huecha puana. Judío sa jadhitati jude ete su nubiana tse. Tuatse sa quisaquisa jepuiti jucuada judío, judío mahue cuana Cristo peje su jei putana. <sup>2</sup> Pia judío jei puja mahue cuana ja eichacua jei eputani cristiano cuana duininibametana. <sup>3</sup> Da putsu, tsunuda dapia quisaquisa epu puji anitiana tse. Echua Puji Jesucristo ja nimetucheametana tse tu jepuiti ai quisa cuana quisaquisa epu puji. Beju Diusu ja tuatse sa quisaquisa cuana tsabatana. Tucheda tiatana nimetiuda aida cuana paata tse puji. <sup>4</sup> Beju ejude cristiano cuana jasajasajatitana. Quejucua cuana ja apóstol detse tsada batana. Pia cuana ja mu judío cuana id'aba putsu, duininibatana tse. <sup>5</sup> Da su beju tuneda huaraji cuana japaiti putsu, Pablo, Bernabé detse madhaba putsu, tumu neje maracaja adhaatana huecuana. <sup>6</sup> Beju bahue pu putsu, jududuana tse pia yahua Licaonia banime su. Tueda yahua su beta ejude anina. Listra, Derbe detse banime puina. <sup>7</sup> Dapia Pablo, Bernabé detse Diusu sa quisa saida cuana quisaquisa puana.

*Pablo ja deja ase bue mahue saisiametana*

<sup>8</sup> Dapia Listra ejude su deja ase bue mahue anina. Daja hue tueda bataji puana. <sup>9</sup> Tuahueda Pablo id'aba putsu, japibatiana uja: “Tuahueda beju ema saisiameta cua.” Pablo ja deja chama putsu, deja sa piba cuana bahue puana. <sup>10</sup> Da su jubida cuatsasiatana deja:

—Netianaque.

Da hora su deja tenanetiana putsu, asepiruana. <sup>11</sup> Cristiano cuana daja ba putsu, tuna sa yana su jubida tsiatsiatana huecuana uja:

—Beta diusu detse deja nime ecuana peje su buteitia.

<sup>12</sup> Bernabé da bid'umimi diusu Júpiter banime pepe putana huecuana. Daja huecha Pablo da bid'umimi diusu Mercurio banime pepe putana huecuana, tueda quisaquisa puana putsu. <sup>13</sup> Beju bid'umimi diusu Júpiter sa templo ejude enubiji su anina. Júpiter sa sacerdote cuana ja huaca deja cuana, shasha cuana ejude enubiji su dusetana. Huaca deja dusu putsu, irutsuaja adhaatana huecuana Pablo, Bernabé detse peje su, diusu pepe hue putana huecuana putsu. Shasha cuana neje di basetaja adhaatana huecuana. <sup>14</sup> Beju Pablo, Bernabé detse bahue pu putsu, metse sa ejud'uji d'iud'iujapirutana tse. Da su cristiano cuana duju su jududu putsu, biatsiatana tse uja:

<sup>15</sup> —Deja cuana, ¿jucuaja su micuana etseju daja yainia, etseju da micuana nime deja hue putsu. Meichaderaque ye ai puiti yanacane cuana. Diusu eid'e eni peje su bahui jei mepuque. Tuahueda pamapa ai cuana ataidha. Buepa,



yahua, mar ataidha. Pamapa buepa, yahua, mar su yanita ai cuana di ataidha. <sup>16</sup> Biahua tiempo Diosu ja pamapa cristiano cuana d'eji tiataidha tuna sa ai puiti cuana su papuniuneti puji. <sup>17</sup> Daja biame, Diosu tuna peje su saida jashanapametidha, ai saida cuana tia putsu. Beju tuahueda nai edajajametani ecuana bia su. Ai mudu cuana saida jajaji yametani. Ecuana sa ai dia taji cuana tupu etiatani beidaji ecuana yame puji.

*Tumu neje Pablo maracatana huecuana*

<sup>18</sup> Pablo, Bernabé detse ja daja cristiano cuana quisatana biame, tuatse sa atadhada neje nahuebatana huecuana tuatse peje su eirutsuata huecuana mahue puji.

<sup>19</sup> Beju pia Antioquía, Iconio ejude detse jenetia judío cuana ja Pablo, Bernabé detse yani su cuinatana. Mimi bid'umimi cuana neje cristiano cuana jei ametana huecuana Pablo tumu neje emaraca puji. "Manuitia beju", pu putsu, maracarijitana huecuana. Ejude tsahua su riretana huecuana. <sup>20</sup> Da su beju Cristo peje su jei eputani cuana Pablo esa su netiseutana su, Pablo netianana. Tuna neje neicha ejude su nubiana.

<sup>21</sup> Pia huenati Pablo, Bernabé detse putiana Derbe ejude su. Dapia Diosu sa quisa saida quisaquisa puana tse. Jucuada cristiano cuana Cristo peje su jei putana. Da su Pablo, Bernabé detse dapia quisaquisa pupe putsu, jasiapatibana tse Listro, Iconio, Antioquía ejude cuana su. <sup>22</sup> Dapia quimisha ejude cuana su aniji jei eputani cuana nimetucheametana. Uja quisatana tse:

—Menimetucheatique Diosu peje su. Tuseda puji ebia su sufri pu taji tu ecuatsasiati su enubi puji.

<sup>23</sup> Ehuidusuji cuana ichatana tse Diosu sa dharejiji cuana pahuidusuta huecuana puji. Da su Pablo, Bernabé detse ayuna pu putsu, Diosu mitsupe putsu, Echua Puji Jesucristo bajatana tse tu peje su jei eputani cuana painatsihuata puji. Daja a putsu, putibana tse.

*Pablo, Bernabé detse Antioquía ejude su jasiapatibana*

<sup>24</sup> Da su beju Pisidia yahua je jaitiana putsu, Panfilia yahua su cuinatana tse. <sup>25</sup> Dapia Perge ejude su Diosu sa quisa saida cuana quisaquisa puana. Quisaquisa pupe putsu, Atalia ejude su putiana tse. <sup>26</sup> Tueda ejude sa ebuteji jenetia barco su aniuteana tse Antioquía ejude su eputi puji. Tueda ejude jenetia equene cuinanana tse. Equene dapia jei eputani cuana ja Diosu bajatana tuahueda patsahuata tse puji, tuatse sa mudu saida papu puji. Beju tueda mudu apetana tse. <sup>27</sup> Da su Antioquía ejude su cuinati putsu, jei eputani cuana

jadhitatitana. Pamapa quisapetana tse cuaja ai aida cuana Diosu ja atana tuatse jepuiti. Uja quisa puana tse:

—Diosu ja judío mahue cuana di tu peje su jei yametani, d'ejí su paputa huecuana puji.

<sup>28</sup> Beju dapia ejude su jei eputani cuana neje tsunuda aniana tse.

## 15

### *Jerusalén ejude su edue cuana jadhitatitana*

<sup>1</sup> Da tiempo su pia deja cuana Judea yahua jenetia beju cuinatana Antioquía ejude su. Cristo peje su jei eputani cuana uja buetsuapirutana huecuana:

—D'ejí su epu puji Moisés chenu sa jacuatsasiati cuana etse sa a taji. Deja cuana sa jahuitsanasiquiti taji. Daja Moisés chenu ja cuatsasiataidha.

<sup>2</sup> Pablo, Bernabé detse tueda deja cuana neje jubida jacuicuinatitana. Da su chamacama jei eputani cuana ja Pablo, Bernabé detse, pia edue cuana neje Jerusalén ejude su beitutana apóstol, edue cuana sa ehuidusuji cuana equisati puji, tueda enime cuana pabasetatita huecuana puji.

<sup>3</sup> Beju Jerusalén ejude su tuna eputahu cama, Fenicia, Samaria yahua detse je jaitianatana huecuana. Dapia aniji edue cuana quisatana huecuana cuaja pia ejude su aniji judío mahue cuana Cristo peje su jei pu putsu, mecuana sa ai puiti madhada cuana ichaderatana. Da su pamapa edue cuana tueda ai cuana id'abatana su, beidaji putana huecuana.

<sup>4</sup> Da su beju Jerusalén ejude su cuinatitana huecuana su, dapia jei eputani cuana ja saida batsutana huecuana. Apóstol, ehuidusuji cuana ja di saida batsutana huecuana. Da su Pablo, Bernabé detse ja pamapa ai puana cuana quisatana huecuana. Cuaja Diosu ja tuatse neje ai cuana atana quisatana huecuana. <sup>5</sup> Beju piada piada Cristo peje su jei eputani fariseo cuana dapia anitaina. Uja quisatana huecuana:

—Judío mahue jei eputani cuana sa jahuitsanasiquiti taji. Moisés sa jacuatsasiati cuana di mecuana sa ape taji.

<sup>6</sup> Da su beju apóstol, ehuidusuji cuana jadhitatitana tueda ai cuana ebaseta puji. <sup>7</sup> Tsunuda jacuicuinati putsu, Simón Pedro netiana putsu, uja atana huecuana:

—Edué cuana, micuaneda bahue equene Diosu ja ema micuana peje jenetia dharetana mesa quisa saida cuana judío mahue cuana peje su quisaquisa eputi puji, tuneda di Cristo peje su jei paputa puji. <sup>8</sup> Diosu bahue ecuana sa piba cuana. Tuahueda judío mahue cuana di batsutana ecuaneda ebainia. Espíritu Santo peje su beitutana, ecuana peje su beitutana nime. <sup>9</sup> Beju Diosu ja ecuana tuna neje tupupai

ebatani. Ecuana atana nime, saitiatana huecuana, tu peje su jei putana su. <sup>10</sup> Da su beju, ¿jucuaja su jia micuaneda jei puja mahue Tata Diusu ja atana ai cuana su? ¿Jucuaja puji micuaneda tueda jei eputani eichacua cuana jubida neje cuatsasiaja yainia Moisés chenu sa jacuatsasiati cuana paata huecuana puji? Aimue ecuana sa tata chenu cuana ja tueda jacuatsasiati cuana apetana mahue. Daja huecha ecuaneda. Da su, ¿jucuaja puji micuaneda jubida neje cuatsasiaja yainia huecuana? <sup>11</sup> Bahue ecuaneda Jesucristo ja ecuana cha d'ei su ame atana, tuahueda ecuana ebia su ibuneda batana putsu. Diusu ja jei eputani judío mahue cuana di daja d'ei su ame yatani.

<sup>12</sup> Da su beju pamapa Pedro id'abaji cuana mitanapetana. Su pad'i, Pablo, Bernabé detse ja cuaja Diusu ja ai nimetiuda cuana atana tuatse jepuiti quisatana huecuana, judío mahue cuana duju su anina tse su. <sup>13</sup> Tuatseda quisapupeana su, Jacobo ja macha quisatana huecuana uja:

—Edué cuana, meid'abaque ema. <sup>14</sup> Simón Pedro ja ecuana quisapetaitia cuaja Diusu ja equene judío mahue cuana di ibuneda neje ibunebapirutana. Cuaja tuna jepuiti tuseda puji piada piada dharetana ecuana quisataitia. <sup>15</sup> Jade. Tueda ai cuana jepuiti biahua tiempo profeta chenu cuana ja dere-  
taidha uja:

<sup>16</sup> Beju ema esiapatiyu David chenu sa dajajajiji ete enetianameti puji.

Dajajajiji biame, yama enetianameyu.

<sup>17</sup> Da su pamapa yama dhareana judío mahue cuana ja Echua Puji pachacutayu.

<sup>18</sup> Daja Diusu puana.

Tueda ai cuana ecuana shanapametaidha biahua tiempo jenetia.

<sup>19</sup> 'Edué cuana, uja da quema piba cuana: Aimue ecuaneseda judío mahue edue cuana jubida neje cuatsasia taji mahue ecuana sa ai puiti cuana paata huecuana puji.

<sup>20</sup> Uja bahui ecuaneda ebajati huecuana: Ejude sa bid'umimi diusu eimea cuana neje ai biame a taji mahue. Tuna peje su irutsuajiji aicha be padiata huecuana. Ebutse neje bahui paquinatita huecuana. Be padiata huecuana najaribiajiji, huidijiji animalo aicha. Daja huecha ami be padiata huecuana. <sup>21</sup> Biahua tiempo jenetia pamapa ejude cuana je judío cuana yanita. Moisés chenu sa jacuatsasiati cuana eiyubatani huecuana. Pamapa janahua tsine su mecuana sa jadhitati jude ete cuana su tueda jacuatsasiati cuana emimiametani huecuana. Da putsu, ecuaneda judío mahue edue cuana daja ebajainia ecuana sa jabajati cuana

paata huecuana puji, tuna sa ejude su aniji judío cuana eduiniameta mahue huecuana puji.

<sup>22</sup> Da su apóstol, ehuidusuji, pamapa dharejiji edue cuana ja beta edue detse dharetana Pablo, Bernabé detse Antioquía ejude su pabuqueta puji. Tuatseda Judas, Silas banime puina. Judas sa pia ebani da Barsabás. Tuatseda da edue cuana sa ehuidusuji detse puina. <sup>23</sup> Tuatse neje apóstol cuana ja quirica beitutana Antioquía ejude su aniji edue cuana peje su. Uja deretaidha huecuana: “Ecuanaju, Jerusalén ejude su aniji apóstol, ehuidusuji, pamapa edue cuana Antioquía ejude, Siria, Cilicia yahua detse su aniji judío mahue edue cuana emitsuameinia. <sup>24</sup> Beju bahue ecuanaju pia judío deja cuana Jerusalén ejude jenetia micuana peje su cuinatitana. Mimi neje micuana pitsametana huecuana. Micuaneseda jahuitsanasiquiti taji quisatana huecuana. Moisés sa jacuat-sasiati cuana di micuaneseda ape taji quisatana huecuana. Bahue mepuque, aimue ecuanaju beitu huecuana. <sup>25</sup> Da su ecuanaju paije hue pibana ecuanaju duju su beta deja edhare puji. Judas, Silas banime detse ecuanaju dhareana. Tuatseda ecuanaju micuana peje su ebeituinia edue ibuneda Bernabé, Pablo detse neje. <sup>26</sup> Beju Pablo, Bernabé detse manu su hue puniunetiana Echua Puji Jesucristo jepuiti. <sup>27</sup> Tuneda micuana ebutse su equisatayu pamapa ecuanaju sa ai piba cuana. <sup>28</sup> Aimue ecuanaju sa tsada, daja huecha Espíritu Santo sa tsada ecuanaju micuana jubida neje ecuatsasiati mahue judío cuana sa ai puiti cuana ya puji. Ye ai cuana bahui meaque: <sup>29</sup> Be bid'umimi diusu eimea cuana peje su irutsuajiji aicha mediaji. Be mediaji najaribiajiji animalo aicha. Daja huecha animalo sa ami. Ebutse neje bahui mequinatique. Ahua micuaneda tueda ai cuana ya su, da su micuaneda saida yaniti. U teje hue ecuanaju sa quisa. Saida mepuniunetique.”

<sup>30</sup> Da su putitana huecuana Antioquía ejude su. Dapia edue cuana neje dhita putsu, quirica tiatana huecuana. <sup>31</sup> Beju edue cuana ja quirica mimiametana su, beidaji putana huecuana, janimetuheatitana huecuana putsu. <sup>32</sup> Judas, Silas detse ja tuatse sa quisa neje tucheametana huecuana, Diusu sa quisaquisa puji detse putsu. <sup>33</sup> Tueda ejude su aniji edue cuana neje quejucua tsine puji aniana tse. Da su beju edue cuana ja saida neje beitutaibana huecuana Jerusalén ejude su. <sup>34-35</sup> Pablo, Bernabé, Silas cuana mu Antioquía ejude su anititana. Pia edue cuana neje Jesucristo jepuiti quisa saida cuana cristiano cuana peje su quisaquisa puderatana.

*Neicha Pablo ja pia yahua su aniji edue cuana peretitana*

<sup>36</sup> Quejucua badi jaitianana su, Pablo ja Bernabé uja atana:

—Neicha meputi Diusu sa quisa saida cuana etse quisaquisa puana ejude cuana je cuaja jei eputani cuana anime eba puji.

<sup>37</sup> Bernabé sa tsada puana Juan Marcos edusu puji. <sup>38</sup> Beju Pablo sa tsada mahue puana, equene Juan Marcos ja Pablo, Bernabé detse Panfilia yahua su jusianetiatana, buqueja mahue tse putsu. Da putsu, Pablo ja dusuja mahue atana. <sup>39</sup> Ebia su jacuicuinati putsu, jamesiatiana tse. Da su Bernabé ja Marcos dusutana. Barco su aniuteana tse Chipre edhapupu su eputi puji. <sup>40</sup> Da cama, Pablo ja Silas dharetana tu ebuqueta puji. Edue cuana ja Diusu ja saida pabata tse puji Diusu bajatana su, putiana tse. <sup>41</sup> Siria, Cilicia yahua detse su jaitianana tse. Dapia aniji Diusu sa dharejiji cuana nimetucheametana tse.

## 16

### *Timoteo ja Pablo, Silas detse buquetana*

<sup>1</sup> Pablo, Silas detse Derbe, Listra ejude detse su cuinati putsu, edue Timoteo tejetana tse. Tusa tata da judío mahue, griego puina. Tusa cuara da judío epuna puina. Cristo peje su jei puina. <sup>2</sup> Pamapa Iconia yahua Listra ejude su aniji edue cuana Timoteo sa puji saida mimitana. <sup>3</sup> Da su Pablo sa tsada puana Timoteo ja pabuqueta puji putsu, huitsanasiquiametana. Daja atana Pablo ja judío cuana eduininiame mahue puji, Timoteo sa tata judío mahue puina putsu. <sup>4</sup> Tuna jaitianatana ejude cuana sa aniji jei eputani cuana Jerusalén ejude su aniji apóstol, ehuidusuji cuana sa quirica mimiana putsu, buetsuatana huecuana. <sup>5</sup> Da su beju jei eputani cuana ebia su janimetucheatitana Diusu peje su. Pamapa tsine jajucuatitana huecuana eichacua Diusu peje su jei eputani cuana neje.

### *Macedonia yahua jenetia deja Pablo peje su bataji puana tahui su nime*

<sup>6</sup> Espíritu Santo ja aimue d'eji tia atana mahue huecuana Asia yahua su Diusu sa quisa saida cuana quisaquisa eputi puji. Da su Frigia, Galacia yahua detse je jaitianatana huecuana. <sup>7</sup> Misia yahua tsahua je epuniuneti je, Bitinia yahua su nubija pudhaatana huecuana. Espíritu Santo ja panubi mahue atana huecuana putsu, mue nubi putana. <sup>8</sup> Da su Misia yahua je jaitianatana huecuana Troas ejude sa ebuteji su ecuinati puji. <sup>9</sup> Dapia Pablo ja tahui su nime Macedonia yahua jenetia deja batana. Tuahueda uja Pablo atana: “Macedonia yahua su putique ecuanaju etsahua puji.” <sup>10</sup> Da su Pablo daja ba putsu cama, ecuanaju jabasetatiana Macedonia yahua su eputi puji. Bahue puana ecuanaju Diusu ja tueda

yahua su ecuanaju ebeitutani dapia mesa quisa saida cuana quisaquisa epu puji.

*Pablo, Silas detse Filipino ejude su putiana*

<sup>11</sup> Beju Troas ejude sa ebuteji jenetia barco su ecuanaju aniteana. Samotracia edhapupu su butsepi ecuanaju putiana. Pia huenati ecuanaju puderatiana. Neápolis ejude su cuinatiana. <sup>12</sup> Tueda ejude jenetia neicha ehuaitsi je ecuanaju puderatiana. Filipos ejude su ecuanaju cuinatiana. Tueda ejude da aida puina Macedonia yahua su. Dapia romano cristiano cuana anitaina. Da su dapia ecuanaju anitiana quejucua tsine puji. <sup>13</sup> Janahua tsine su ejude chuadera, ena maje su putiana ecuanaju. Dapia piada piada judío cuana Diosu emitsu puji jadhitati bahue putaina. Cuinatu putsu, piada piada epuna cuana yani ecuanaju bana. Da su Diosu sa quisa saida cuana tuna peje su quisaquisa ecuanaju pupiruana. <sup>14</sup> Piada epuna Lidia banime puina. Tueda da Tiatira ejude jenetia puina. Idhiria, chujeneda ejud'uji cuana iruji puina. Diosu ebia su mitsutsua bahue puina. Beju Pablo sa quisa id'aba putsu, tueda quisa su Diosu ja jei ametana. <sup>15</sup> Diosu sa puji yahui neje jaichaderametiana mesa familia cuana neje. Da su epuna ja ecuanaju bajatana uja:

—Ahua enei hue micuaneda ema Cristo peje su jei epuani ebainia su, quema ete su meanitique.

Da su beju ecuanaju anitiana.

<sup>16</sup> Neicha pia tsine ecuanaju putiana jadhitati jude su Diosu emitsu puji. Epuhu cama, piada epuneje ecuanaju tsuana. Einid'u madhadaji puina. Einid'u ja epuna cuaja ai cuana epu shanapametana. Epuneje metse cuana ja dueji chipilu inatsutana epuneje sa jashanapati cuana jepuiti. <sup>17</sup> Tueda epuneje ja ecuanaju tije apiru putsu, tsiatsia neje uja puana:

—Ye deja cuana da Diosu Aida sa emebajaji cuana. Cuaja micuaneda d'oji su epu equisatani huecuana.

<sup>18</sup> Daja epuneje quejucua tsine biame tsiatsianiunetiana putsu, Pablo nimepuana. Beju jababarereati putsu, epuneje sa equita dume su einid'u madhada uja atana:

—Jesucristo sa ebani su yama mi epuneje peje jenetia cuinanaque yainia.

Da hora su beju einid'u madhada ja epuneje mesiatana.

<sup>19</sup> Emetse cuana ja id'abatana su, Pablo, Silas detse neje duininitana huecuana. Cuaja chipilu inatsutayuji mahue jabatitana huecuana. Da putsu, Pablo, Silas inatana huecuana. Ina putsu, huaraji cuana peje su dusutana huecuana. <sup>20</sup> Huaraji peje su menajatia putsu, uja atana huecuana:

—Ye judío detse ja ecuaana sa ejude su aniji cristiano cuana eipeimetani. <sup>21</sup> Tuatse sa jabuetsuati cuana cristiano cuana

ebuetsuatani. Aimue detse ecuaneda judío cuana sa ai puiti cuana inatsu cua mahue, ecuaneda da romano deja huecha hue putsu.

<sup>22</sup> Da su beju cristiano cuana tuatse neje duininitana. Huaraji cuana ja cuatsasiatana metse sa ejud'uji pahuijata huecuana puji. Huija putsu, aqui huiri neje paicheta huecuana puji. <sup>23</sup> Madhada iche putsu, teriichatana huecuana. Piada inatsihuaji deja ichatana huecuana saida painatsihuata tse puji. <sup>24</sup> Da su einatsihuaji deja ja Pablo, Silas detse riji cuarto su ichanubiatana. Tuatse sa ehuaitsi sepo su biuichatana.

<sup>25</sup> Dhidha dusete su Pablo, Silas detse Diosu neje jamitsutiana. Satsu neje Diosu mitsutsuatana tse. Beju pamapa pia terijiji cuana ja id'abatana. <sup>26</sup> Da hora su beju yahua jubida rirebatana. Ete jubida riatana. Pamapa eteriji cuana jatesqued'iatitana. Pamapa terijiji cuana sa cadena cuana jatibipetitana. <sup>27</sup> Beju einatsihuaji deja id'ecuina putsu, pamapa eteriji cuana tsequed'iapejiji batana. Da su mesa espada jemitsuatana emanuameti puji, pamapa terijiji cuana jududupetana pepe hue puana putsu. <sup>28</sup> Da su Pablo tsiatsia jubida neje uja atana:

—Be jamanuametiji, hue ecuanaju pamapa su yani putsu.

<sup>29</sup> Da su einatsihuaji deja ja cuatsasiatana hueda paduseta puji. Tipeida hueda neje nubitiana Pablo, Silas detse yani su. Iyume neje tuatse butse su tururuana. <sup>30</sup> Da su beju jemicuiname putsu, quisabatana tse uja:

—Tata detse, ¿ai ni quema a taji d'ejí su epu puji?

<sup>31</sup> Da su jeutsutana tse:

—Jei puque Jesucristo peje su. Daja pu putsu, mida, mique familia cuana neje d'ejí su epu.

<sup>32-34</sup> Da su einatsihuaji deja ja mesa ete su dusutana tse. Tueda dhidha su quitaita tuatse sa etsi cuana rucuatana. Rucuape putsu, mihuatana tse. Da su Pablo, Silas detse ja einatsihuaji deja sa familia cuana Diosu sa quisa saida cuana quisatana su, Cristo peje su jei putana huecuana. Jei pu putsu, Diosu sa puji yahui neje jaichaderametitana huecuana. Beidaji putana huecuana, jei pu putsu.

<sup>35</sup> Da huenati su, huaraji cuana ja policía cuana beitutana einatsihuaji deja peje su Pablo, Silas detse pamesiata equisa puji. <sup>36</sup> Da su deja ja uja atana tse:

—Huaraji cuana ja ema cuatsasiatana yama metse ecuinaname puji. Da su mepuchiditiyuque, beju metseda d'ejí su putsu.

<sup>37</sup> Pablo sa tsada mahue puana. Uja policía cuana atana:

—Etseju da romano deja nime huecha epuani biame, micuaneda cristiano cuana butse su etseju icheme putsu, teriichameana matseji mahue. Jiahue quita micuaneda etseju rubuajiji mesiaja yainia. Beju tsada mahue etseju sa. Papueta huaraji quitaita cuana etseju emesia puji.

<sup>38</sup> Da su beju policia cuana putitaibana huaraji cuana equisati puji. Huaraji cuana daja id'aba putsu, iyuame pupirutana huecuana, Pablo, Silas detse da romano deja nime huecha putsu. <sup>39</sup> Da putsu, Pablo, Silas detse peje su putitana huecuana epacienciabajati puji. Da su jemicuina putsu, jubida bajatana huecuana mecuana sa ejude jenetia papuenitiyu tse puji. <sup>40</sup> Da su cuinana putsu, Lidia sa ete su putibana tse. Edue cuana nimetucheame putsu, jaitianana tse.

## 17

### *Tesalónica ejude su aniji cristiano cuana janimetipeititana*

<sup>1</sup> Pablo, Silas detse Anfipolis, Apolonia ejude detse je jaitiana putsu, Tesalónica ejude su cuinatiana tse. Dapia judío cuana sa jadhitati jude ete anina. <sup>2</sup> Da su nubiana tse, cuaja tuatse sa ai puiti cuana puina batame. Quimisha janahua tsine puji jadhitati jude ete su putiana tse judío cuana neje quisaquisa epu puji. <sup>3</sup> Mecuana sa derejiji quirica jenetia Pablo ja cuaja Cristo sa sufri pu taji bametana huecuana. Daja huecha cuaja manu putsu, id'eyume epu bametana huecuana. Uja quisatana huecuana:

—Tueda yama micuana equisainia Jesús quitaita da Diosu sa Jabeituti Deja.

<sup>4</sup> Da su piada piada judío cuana Jesús peje su jei putana. Pablo, Silas detse buquetana huecuana. Jucuada Diosu mit-sutsuaji judío mahue griego cuana di Jesús peje su jei putana. Daja huecha jucuada tueda eni epuna cuana jei putana. <sup>5</sup> Daja biame, piada piada jei puja mahue judío cuana envidia pu putsu, jaduiniati putana huecuana. Deja ate, mudu mahue cuana ejude duje cuana cristiano nimetipeimetana huecuana. Jasón sa ete su putitana huecuana Pablo, Silas detse echacu puji. Jemicuinaja adhaatana huecuana eduininitani cristiano cuana peje su emenajatia tse puji. <sup>6</sup> Beju mue teje atana huecuana putsu, Jasón, pia jei eputani cuana di etseque su jemicuinatana huecuana. Ejude huaraji aida cuana butse su dusutana huecuana su, uja tsiatsia neje atana huecuana:

—Pamapa ejude je tueda Pablo, Bernabé base detse ja cristiano cuana enimetipeimetani. Beju jiahue upia ecuana sa ejude su yani tse. <sup>7</sup> Ye Jasón ja mesa ete su batsutana tse. Beju romano echua puji aida sa jacuatsasiati cuana aimue



eyubatani huecuana mahue. Tuneda, “Pia echua puji Jesús banime yani”, eputani.

<sup>8</sup> Da su beju huaraji aida, pamapa cristiano cuana ja id'aba putsu, janimetipeititana huecuana. <sup>9</sup> Da su huaraji cuana ja Jasón, jei eputani cuana chipilu bajatana, cristiano cuana nimetipeimetana huecuana putsu. Ahua neicha daja cristiano cuana enimetipeimeta huecuana su, aimue eturuca chipilu etiatayu huecuana mahue. Ahua enimetipeimeta mahue huecuana su, da su chipilu eturuca etiatayu huecuana.

*Pablo, Silas detse Berea ejude su putiana*

<sup>10</sup> Tueda dhidha su Pablo, Silas detse jei eputani cuana ja Tesalónica ejude jenetia tipeida cuinanametana. Saida beitutana huecuana Berea ejude su. Dapia cuinatiana tse su, judío cuana sa jadhitati jude ete su nubiana tse. <sup>11</sup> Beju dapia ejude su aniji judío cuana da Tesalónica ejude su aniji judío cuana ebia su saida putaina. Cristo jepuiti quisa saida cuana id'abaja atana huecuana. Pamapa tsine Diusu sa quirica mimiametana huecuana ahua ene quita Pablo sa quisa daja epuani eba puji. <sup>12</sup> Da su beju jucuada tuneda Cristo peje su jei putana. Griego deja, tueda eni epuna cuana jei putana. <sup>13</sup> Beju Tesalónica ejude su aniji judío cuana bahue putana su, Berea ejude su putitana huecuana dapia aniji cristiano cuana enimetipeime puji. <sup>14</sup> Judío cuana ja cristiano cuana nimetipeimetana putsu, jei eputani cuana ja Pablo mar maje su beitutana. Silas, Timoteo detse mu dapia hue anitiana. <sup>15</sup> Pia edue cuana ja Pablo buquetana Atenas ejude teje. Da jenetia Berea ejude su jasiapatitana huecuana. Pablo ja tuna neje Silas, Timoteo detse quisametana tipeipad'i putsu, tuatseda tu yani su paputi puji.

*Pablo da Atenas ejude su anina*

<sup>16</sup> Pablo Atenas ejude su Silas, Timoteo detse eid'uainia cama, tueda ejude je puniunetiana. Jucuada bid'umimi diusu eimea cuana yani batana putsu, japibajucuatiana. <sup>17</sup> Da su judío, Diusu iyubaji judío mahue cuana neje jadhitati jude ete su jacuicuinatiana. Daja huecha plaza su di judío mahue cuana neje jaatiana. <sup>18</sup> Piada piada tuneda epicúreo cuana sa jabuetsuati cuana su jei putana. Pia cuana ja estoico cuana sa jabuetsuati cuana su jei putana. Da su Pablo neje jubida jacuicuinatitana huecuana. Uja jaquisabatitana huecuana:

—¿Ai pa da ye deja quisa epuani?

Pia cuana tuneda uja putana:

—Ye deja ja diusu eshanapa mahue cuana jepuiti ecuana quisaja yatani.

Daja putana huecuana, Pablo Jesús id'eibana quisaquisa puana putsu. <sup>19</sup> Da su Pablo Areópago eti jude su dusutana huecuana. Dapia jadhitati bahue putaina huecuana yacuicuinati puji. Pablo quisabatana huecuana uja:

—¿Ai ni ye jabuetsuati cuana eichacua cuana mida quisaquisa epuani? <sup>20</sup> Ye jabuetsuati ecuanaju bahue puja biame, atadhada eshanapa puji.

<sup>21</sup> Tueda ejude su aniji cristiano cuana da pamapa ai quisa eichacua cuana jepuiti quisa bahui putaina.

<sup>22</sup> Da su Pablo tuna duju su netiana putsu, uja quisaquisa puana:

—Atenas deja cuana, micuaneda eimea cuana mitsutsua bahue yama ebainia. <sup>23</sup> Ema micuana sa ejude je puniuntiana su, jucuada eimea cuana yama bana. Piada altar su yama uja derejiji bana: “Ye altar da diusu mue ecuaneda shanapa sa puji.” Micuaneda tueda diusu mue shanapa biame, mitsutsua bahue. Beju jiahue yama micuana saida equisa tueda Diusu jepuiti.

<sup>24</sup> “Tuahueda yahua, pamapa ai cuana yani ataidha. Tueda da buepa, yahua emetse. Aimue tueda deja sa jaati templo su yani mahue. <sup>25</sup> Aimue mesa aiya biame patsahuata, paquinata tsada mahue, tuahueda quitaita ecuana eid'e yametani putsu. Tuahueda janasiati, pamapa ai cuana ecuana etiatani.

<sup>26</sup> “Tuahueda piada familia jenetia tsapiapiati cristiano cuana bataji ametaidha pamapa yahua je paanitita huecuana puji. Biahua tiempo pamapa yahua, ejude cuana sa tiempo ichataidha. Mecuana sa ai jude cuana di yahua su ichataidha dapia paanitita huecuana puji. <sup>27</sup> Daja Diusu ja ataidha pamapa cristiano cuana ja tu pachacuta huecuana puji, cuapuitime tueda tejeta cua huecuana puji. Aimue tueda uqueda yani mahue. <sup>28</sup> Tueda mu ecuana naja su yani, tuahueda ecuana eid'e yametani putsu. Micuana sa satsu puji quitaita chenu cuana uja putaidha: “Ecuana da Diusu sa ebacua cuana.” <sup>29</sup> Ahua enei hue daja su, da su ecuaneda eshanapainia Diusu aimue deja sa mudujiji oro, plata, tumu jenetia mahue. <sup>30</sup> Equene Diusu paciencia aidaji cristiano cuana neje puidha, mue shanapa huecuana biame. Aimue jucha jepuiti matseja ataidha huecuana mahue, mue shanapa huecuana putsu. Beju jiahue mu Diusu ja pamapa cristiano cuana ecuatsasiatani tu peje su panimeturucatita huecuana puji. <sup>31</sup> Daja cristiano cuana sa pu taji, Diusu ja pamapa cristiano cuana butsepi neje ejuzga tsine ichatana putsu, mesa Jadhareti Deja jepuiti. Da putsu, Diusu ja tueda manujiji cuana duju jenetia id'emetaibana pamapa cristiano

cuana ja tueda da Diosu sa Jabeituti Deja pashanapaenita puji.

<sup>32</sup> Da su beju Pablo, Jesús id'eibana, epuani id'aba putsu, piada piada cuana jashishatitana. Pia cuana ja mu uja Pablo atana:

—Pia tsunu su chu memimija cuaja manujiji cuana id'eyume epu jepuiti.

<sup>33</sup> Da su Pablo ja ichajusiatana huecuana. <sup>34</sup> Piada piada tuneda jei pu putsu, Pablo buquetana huecuana. Tuna duju su piada Dionisio banime anina. Tueda da piada ejude sa ehuidusuji puina. Piada epuna di jei puana. Tueda banime Dámaris. Daja huecha pia cuana di jei putana.

## 18

### *Pablo Corinto ejude su putiana*

<sup>1</sup> Da su beju Pablo Atenas ejude jenetia cuinanana. Corinto ejude su putiana. <sup>2</sup> Dapia tsutana piada judío deja Aquila banime. Tueda Ponto yahua jenetia puina. Mesa ehua Priscila banime puina. Quetsunu hue Italia yahua, Roma ejude jenetia cuinana tse. Dapia romano echua puji aida Claudio banime ja cuatsasiatana pamapa judío cuana Roma ejude jenetia pacuinanata puji. Da su Aquila, Priscila detse Roma ejude jenetia cuinanana, judío tatse putsu. <sup>3</sup> Pablo da tuatse nime carpa muduji puina putsu, tuatse peje su putiana tuatse neje emudumudu puji. Da su beju tuatse neje anitiana. <sup>4</sup> Pamapa janahua tsine su judío cuana sa jadhitati jude ete su putiana, judío, judío mahue cuana quisaquisa a putsu, jei yame huecuana puji.

<sup>5</sup> Beju Silas, Timoteo, Macedonia yahua jenetia Pablo peje su cuinana su, Pablo ja pamapa pia ai cuana arijieni putsu, Diosu sa quisa saida cuana bahui quisaquisa puderana. Jesús da judío cuana ja id'uataina Tata Diosu sa Jabeituti Deja quisaquisa puana. <sup>6</sup> Beju judío cuana ja mu Pablo sa quisa cuana jei aja mahue putsu, tu neje nimeputana huecuana. Mimi madhada neje Pablo madhabatana huecuana. Da putsu, Pablo ja mesa ejud'uji taratana. Daja a putsu, uja atana huecuana:

—Micuaneda Diosu sa quisa saida cuana ichaderana putsu, cuati castigo su eputi. Aimue ema mu juchaji mahue, ahua micuaneda castigo su eputi su, yama Diosu sa quisa saida cuana micuana quisana putsu. Beju jiahue jenetia ema judío mahue cuana peje su Diosu sa quisa saida cuana quisaquisa eputi.

<sup>7</sup> Da su Pablo ja jadhitati jude ete jenetia cuinana putsu, jusiaichatana huecuana. Justo sa ete su putiana. Tueda da Diosu iyubaji puina. Mesa ete judío cuana sa jadhitati jude

ete naja su anina. Dapia Pablo ja cristiano cuana buetsu-  
atana. <sup>8</sup>Jucuada Corinto ejude su aniji cristiano cuana Pablo  
daja id'aba putsu, Jesús peje su jei putana. Diusu sa puji  
jaichaderametitana huecuana yahui neje. Piada judío deja  
Jesús peje su jei puana. Tueda Crispo banime puina. Tueda da  
judío cuana sa jadhitati jude ete sa ehuidusuji puina. Pamapa  
mesa familia cuana di Jesús peje su jei putana. <sup>9</sup>Beju pia  
dhidha su Echua Puji Jesucristo Pablo peje su tahui su nime  
jabametiana. Uja atana Pablo:

—Be cristiano cuana iyubaji. Daja hue quisaquisa puni-  
unetideraque. Be mitanaji. <sup>10</sup>Aimue mida aiya biame cuaja  
madhada yata mahue, ema mi neje yani putsu. Jucuada  
cristiano cuana ye ejude su yama dhareana d'ejí su paputa  
huecuana puji.

<sup>11</sup>Da su Pablo Corinto ejude su piada mara edusete puji ani-  
tiana. Dapia Diusu sa quisa saida cuana quisaquisa puana.

<sup>12</sup>Da tiempo su Galión da Acaya yahua su huaraji aida  
puina. Dapia Corinto ejude su judío cuana Pablo neje nimepu  
putsu, Galión peje su dusutana huecuana etuaquisa puji.

<sup>13</sup>Uja atana huecuana:

—Ye deja ja cristiano cuana Cristo peje su jei pu taji ebuet-  
suataniuneti. Tueda da aimue ecuaneseda puji saida mahue,  
ecuanaju sa jacuatsasiati cuana daja mahue putsu.

<sup>14</sup>Pablo beju ejeutsuti quitaita su, Galión ja atana huecuana  
uja:

—Ye Pablo ja aimue ai madhada biame a. Ahua ai madhada  
ataitia su, yama micuana sa jatuaquisati cuana id'aba cua.  
<sup>15</sup>Ebani, ai puiti cuana jepuiti bahui micuaneda yacuicuina-  
tiani. Tueda ai enime cuana mu micuaneseda putsu, aimue  
yama juzgaja mahue. Quema mu mue ai chidí biame a taji  
tueda ai cuana neje. Da putsu, mebasetatique hue.

<sup>16</sup>Beju daja yainia je, Galión ja judío cuana tu peje jenetia  
cuinanametana. <sup>17</sup>Da su griego cristiano cuana ja jadhitati  
jude ete sa ehuidusuji Sóstenes inatana. Galión butse su jubida  
ichepirutana huecuana. Beju Galión sa mue ai biame a taji  
puana.

### *Pablo Antioquía ejude su jasiapatibana*

<sup>18</sup>Da su piada mara edusete jaitianana su, Pablo edue  
cuana neje jamitsutibana. Tueda ejude jenetia cuinanana  
Priscila, Aquila detse neje. Barco su aniutetana huecuana  
Siria yahua su eputi puji. Cencrea ebuteji su barco su nubiji  
mahue su, Pablo echuaina jadedemepetiana. Daja jaatiana  
mesa Diusu neje jamitsuti epupe puji. <sup>19</sup>Da su Efeso ejude  
su cuinati putsu, Pablo ja Priscila, Aquila detse ichajusiatana.  
Tu mehua judío cuana sa jadhitati jude ete su putiana. Dapia

dhitajiji judío cuana neje jacuicuinatiana. <sup>20</sup> Da su Pablo bajatana huecuana dapia paaniti puji. Beju Pablo ja tsada mue batana. <sup>21</sup> Uja jamitsutibana tuna neje:

—Jiahue quita Jerusalén ejude su quema puti taji pascua tsine eba puji. Ahua Diosu sa tsada su, neicha ema esiapati micuana eba puji.

<sup>22</sup> Dapia Efeso ejude su Priscila, Aquila detse anitiana. Pablo barco su aniuteana Cesarea ebuteji su eputi puji. Da jenetia ehuaitsi je Jerusalén ejude su putiana jei eputani edue cuana emitsuti puji. Mitsupe putsu, jaitianana Antioquía ejude su. <sup>23</sup> Dapia dueji tsine puji anitiana. Da su ejude meamea putiana Galacia, Frigia yahua detse su. Tueda ejude cuana su aniji edue cuana Diosu peje su nimetucheametana.

### *Apolos Efeso ejude su quisaquisa puana*

<sup>24</sup> Beju da tiempo su piada judío deja Efeso ejude su cuinana. Tueda Apolos banime puina. Alejandría ejude jenetia puina. Ebia su saida tueda quisaquisa pu bahue puina. Pamapa Diosu sa derejiji mimi cuana shanapatana. <sup>25</sup> Jesús jepuiti shanapaenitana. Tu jepuiti cristiano cuana saida buetsuataina. Cuaja Juan Bautista ja cristiano cuana Diosu sa puji yahui neje ichaderataina shanapatana. Da teje hue shanapatana. <sup>26</sup> Nimetucheda neje jadhitati jude ete su quisaquisa puana. Da su Priscila, Aquila detse ja id'aba putsu, Apolos chujemame dusutana tse. Jesús jepuiti quisa saida cuana bahuetsuaenitana tse, tu jepuiti ai cuana shanapaeniji mahue putsu. <sup>27</sup> Efeso ejude su aniji jei eputani cuana ja Apolos Acaya yahua su anipetuja epuani shanapa putsu, quirica deretana huecuana Apolos ja Acaya yahua su aniji edue cuana sa padusuta puji. Tueda quirica su bajatana huecuana Apolos saida pabatsuta huecuana puji. Da su Apolos Acaya yahua su cuinatiana su, Diosu peje su jei eputani cuana ebia su nimetucheametana. <sup>28</sup> Judío cuana neje saida jacuicuinatiana. Diosu sa mimi derejiji neje Jesucristo da tuna eid'uatani Diosu sa Jabeituti Deja bametana. Da su judío cuana cuaja jajeutsuti taji mahue jabatitana.

## 19

### *Pablo Efeso ejude su putiana*

<sup>1</sup> Apolos Acaya yahua Corinto ejude su yani tupu, Pablo emata cuana je jaitianana Efeso ejude su ecuinati puji. Dapia piada piada jei eputani cuana tsutana. <sup>2</sup> Uja quisabatana huecuana:

—¿A da micuaneda Espíritu Santo batsuana, jei puana su?

Da su jeutsutana huecuana uja:

—Mahue. Mue ecuanaju Espíritu Santo jepuiti quisa id'aba.

<sup>3</sup> Pablo ja uja quisabatana huecuana:

—Da su, ¿cuaja ni da micuana Diusu sa puji jaichaderame-time puana?

Uja jeutsutana huecuana:

—Cuaja Juan Bautista sa jabuetsuati cuana batame, ecuanaju jaichaderametiana.

<sup>4</sup> Da su Pablo ja uja atana huecuana:

—Beju Juan cristiano cuana peje su uja quisaquisa puana: “Diusu peje su mepibaturucatique. Daja huecha ema tije epusiu Jesucristo peje su micuana sa jei pu taji.”

<sup>5</sup> Daja id'aba putsu, Jesucristo sa ebani su yahui neje jaichaderametitana huecuana. <sup>6</sup> Pablo ja mesa eme tuna bia su huanatana su, Espíritu Santo tuna peje su cuinana. Pia eshanapa mahue yana cuana su mimipirutana huecuana. Diusu ja tiatana quisa cuana quisaquisa pupirutana huecuana. <sup>7</sup> Tuneda da piada tunca beta ejaitiana deja cuana putaina.

<sup>8</sup> Quimisha badi puji Pablo judío cuana sa jadhitati jude ete su nubina. Janimetucheati neje dapia aniji cristiano cuana buetsuataina. Jei ametana huecuana Diusu ecuatsasiati ai cuana su. <sup>9</sup> Pia judío cuana mu jamuesumutadadatitana. Jei puja mahue putana huecuana. Pablo sa Cristo jepuiti jabuetsuati cuana jepuiti madhada hue mimitana huecuana cristiano cuana butse su. Da putsu, Pablo judío cuana sa jadhitati jude ete jenetia netiderana. Jei eputani cuana da jenetia jemicuinatana. Pia judío mahue cuana sa jabuetsuati jude ete su dusutana huecuana. Tueda jabuetsuati jude ete emetse da Tiranno banime puina. Dapia Pablo ja buetsuataina huecuana pamapa tsine. <sup>10</sup> Daja Pablo ja beta mara puji buetsuatana huecuana. Da su beju pamapa Asia yahua su aniji judío, judío mahue cuana ja Cristo jepuiti quisa saida cuana id'abatana. <sup>11</sup> Diusu ja Pablo ai nimetiuda aida cuana ametana. <sup>12</sup> Pablo sa camisa ahua pañuelo cuana nedaji cuana peje su dusutana huecuana tuna pad'apabata huecuana puji. D'apaba putsu, beju saisitana huecuana. Einid'u madhada cuana di cristiano cuana peje jenetia cuinanametana huecuana, ejud'uji d'apabame putsu.

<sup>13-14</sup> Beju tueda ejude su siete judío cuana cuinatana. Tuna sa tata Esceva banime puina. Tueda da judío sa sacerdote cuana sa echua puji puina. Tuneda ejude meamea puniuneti putsu, einid'u madhada cuana cristiano cuana peje jenetia jemicuina bahue putaina. Aimue Jesús peje su jei putaina huecuana mahue. Daja biame, Jesús sa ebani neje einid'u madhada cuana cristiano cuana peje jenetia jemicuinaja adhaatana huecuana. Uja atana huecuana einid'u madhada:

—Pablo quisaquisa epuani Jesús sa ebani su ecuanaju mi ecuatsasiainia, cuinanaque.

<sup>15</sup> Da su einid'u madhada ja jeutsutana huecuana uja:

—Jesús yama eshanapainia. Daja huecha bahue ema aidhe Pablo. ¿Aidhe da micuaneda? Mue yama micuana shanapa jei ya puji.

<sup>16</sup> Daja mimipe putsu, deja einid'u madhadaji ja huatenatana huecuana. Icheeni atana huecuana. Pishitiame putsu, tuahueda dhehuadhehua atana huecuana. Ete jenetia jahuijati jududutana huecuana. <sup>17</sup> Pamapa ejude su aniji cuana ja tueda ai cuana shanapatana. Da putsu, iyuame putana huecuana. “Jesús sa ebani da ebia su tucheda eni”, quisa pupirutana huecuana.

<sup>18</sup> Jucuada Diosu peje su jei eputani cuana jatuaquisatitana mecuana sa ai madhada cuana. <sup>19</sup> Cuaja jamauati mecuana sa mudu jatuaquisatitana huecuana. Mau quirica cuana duse putsu, pamapa cristiano cuana butse su tiuemetana huecuana. Tueda quirica cuana pishica tunca mil mudu chujeme putaina. <sup>20</sup> Da su dueji cristiano cuana Echua Puji Jesucristo sa quisa saida cuana da tucheda eni ba putsu, tu peje su jei putana huecuana.

<sup>21</sup> Da su beju Pablo putija pu putsu, uja puana:

—Macedonia, Acaya yahua detse su aniji edue cuana peretija ema. Daja huecha Jerusalén ejude su aniji edue cuana Jerusalén su puti putsu chu, Roma ejude su macha putija ema.

<sup>22</sup> Da su Pablo ja mesa ebuqueji Timoteo, Erasto detse Macedonia yahua su tu hui su beitu putsu, tueda mu quejucua tsine puji Efeso ejude su anitiana tsuhu.

### *Efeso ejude su aniji cristiano cuana nimetipeitana*

<sup>23-24</sup> Da tiempo su Efeso ejude su piada deja Demetrio banime ja cristiano cuana Pablo sa quisaquisa jepuiti nimetipeimejianatana. Ejude sa bid'umimi diusu Diana banime sa templo eimea plata jenetia a bahue puina. Dueji chipilu inatsu putsu, mesa mudu puji cuana saida chujetia bahue puina. <sup>25</sup> Da su beju dhitame putsu, uja atana huecuana:

—Deja cuana, micuaneda bahue ecuaneda dueji chipilu inatsu bahue, templo sa eimea cuana iru putsu. <sup>26</sup> Micuaneda bahue Pablo uja emimiani: “Deja sa jamuduti diusu cuana da aimue Diosu mahue.” Beju jucuada cristiano cuana ye ejude su, pamapa Asia yahua su di tusa mimi su jei eputani. <sup>27</sup> Da su aimue ecuaneda dueji chipilu einatsu mahue, cristiano cuana ja templo eimea cuana baja mahue yata putsu. Daja huecha aimue cristiano cuana ja ecuaneda sa diusu aida Diana

mitsutsuaja yata mahue. Jiahue pamapa Asia yahua, mundo su aniji cristiano cuana ja ecuana sa diusu Diana emitsutsu-atani. Ahua Pablo daja hue quisaquisa epudera su, aimue cristiano cuana ja Diana mitsutsuayuja yata mahue.

<sup>28</sup> Beju deja cuana ja Demetrio sa quisa id'aba putsu, jubida duininitana huecuana. Uja tsiatsiatana huecuana:

—¡Viva Efeso ejude su aniji cristiano cuana sa Diana!

<sup>29</sup> Da su pamapa ejude je ebia su nimetipeijianatana cristiano cuana. Pablo sa beta Macedonia yahua jenetia ebuqueji Gayo, Aristarco inatana huecuana. Rirenubiatana tse Efeso cristiano cuana sa jadhitati eti jude su. <sup>30</sup> Pablo nubitija pudhaana cristiano cuana neje emitsuti puji. Jei eputani edue cuana ja tsada mahue batana. <sup>31</sup> Daja huecha piada piada Pablo sa eshanapa huaraji cuana ja be Pablo papubadeti quisametana. <sup>32</sup> Dhitajiji tupu cristiano cuana tsapiatsapia tsiatsiatana, nimetipeimejijita putsu. Dueji, jucuaaja su jadhitatitana, bue mahue putaina. <sup>33</sup> Piada piada judío cuana dapia anitaina. Alejandro saida quisatana huecuana. Beju cristiano cuana d'iji mahue putsu, Alejandro nunutana huecuana cristiano cuana butse su pamimi puji. Da su eme jemit-sua putsu, mitanameja adhaatana huecuana. <sup>34</sup> Cristiano cuana ja Alejandro judío shanapa putsu, ebia su tsiatsiatana huecuana beta hora puji. Uja tsiatsiatana huecuana:

—¡Viva Efeso ejude su aniji cristiano cuana sa Diana!

<sup>35</sup> Da su ejude sa huaraji aida ja chamacama cristiano cuana mitanametana. Uja quisatana huecuana:

—Efeso ejude su aniji cuana, pamapa ye yahua je aniji cristiano cuana bahue ecuaneda da diusu Diana sa templo, daja huecha tusa buepa jenetia yahua su dajajana eimea equinaji. <sup>36</sup> Da putsu, memitanaque. Be ai pibaji mahue meaji. <sup>37</sup> Ye deja detse micuaneda duseitia aimue micuana sa diusu Diana sa puji madhada hue mimiana mahue. Aimue ai biame templo jenetia tsitana tse mahue. <sup>38</sup> Ahua Demetrio sa, mesa mudu puji cuana neje ai enime yani su, huaraji cuana butse su paputita huecuana huaraji cuana ja pabata puji. Daja ecuana sa jacuatsasiati yani quebata papu pabiahuanati puji. <sup>39</sup> Ahua ye ai enime cuana huaraji sa ai biame a taji mahue su, da su medhitatique saida ye ai enime cuana ebutsepia puji. <sup>40</sup> Beju huaraji romano cuana ja ecuana castigata cua, micuaneda janimetipeitiana putsu. Ahua ecuana, “¿Jucuaaja su micuaneda janimetipeitiana?” quisabata cua huecuana su, ¿cuaaja detse ecuaneda quisa pume pu cua?

<sup>41</sup> Beju daja mimipe putsu, cristiano cuana berereatana.



## 20

### *Pablo Macedonia, Grecia yahua detse su putiana*

<sup>1</sup> Beju pamapa mitanajiji su, Pablo ja jei eputani cuana ihuametana saida quisaquisa ya puji. Da su beju jamit-sutibana Macedonia yahua su eputi puji. <sup>2</sup> Pamapa tueda yahua je puniunetiana. Dapia jei eputani cuana nime-tucheametana. <sup>3</sup> Da su beju Grecia yahua su jaitianana. Dapia quimisha badi aniana. Da su Siria yahua su eputi puji barco su aniuteja pudhaana. Beju eputi quitaita su Pablo bahue puana judío cuana ja tu emanuame puji eid'uatani. Da putsu, ehuaitsi je hue putibana. Neicha Macedonia yahua je jaitianana. <sup>4</sup> Beju siete deja cuana tu neje putitana. Uja tuneda banime puina:

Sópater. Tueda Berea ejude jenetia puina.

Aristarco, Segundo. Tuatseda Tesalónica ejude jenetia puina.

Gayo. Tueda Derbe ejude jenetia puina.

Timoteo.

Tíquico, Trófimo. Tuatseda Asia yahua jenetia puina.

<sup>5</sup> Tueda edue cuana Troas ejude su Pablo hui su putitana dapia tu eid'ua puji. <sup>6</sup> Ecuanaaju Filipos ejude su aniana pan levadura mahue tsine eba puji. Beju tsine bape putsu, Filipos ejude sa ebuteji jenetia barco su aniuteana. Pishica tsine jenetia Troas ejude su cuinatiana. Dapia ecuanaju ehui su putitana siete ebuqueji cuana tejetyu putsu, siete tsine anihuananana.

### *Pablo Troas ejude su anina*

<sup>7</sup> Semana sa equene tsine su jei eputani edue cuana jadhitatitana Echua Puji Jesucristo sa cena edia puji. Beju Pablo ja buetsuatana huecuana. Quisaquisa puana dhidha dusete teje, pia huenati mesa cuinana taji putsu. <sup>8</sup> Dhitajiji anitaina huecuana quimisha puji ete ebaque su. Dapia ebia su lámpara cuana utsutanetina. <sup>9</sup> Piada edeahue ventana su anina. Tueda tahuieniichana, Pablo tsunuda quisaquisa punetiana putsu. Da putsu, edeahue ventana jenetia tahuidajajana yahua su cuata. Beju jemitsuatana huecuana emanu. <sup>10</sup> Da su Pablo buteana. Edeahue bia su saute putsu, id'amitana. Pia cuana uja atana:

—Be merubutanaji, edeahue mu eid'e putsu.

<sup>11</sup> Da su neicha tsuatitaibana huecuana. Pablo ja pan ped'utana cena padiata huecuana puji. Da su Pablo daja hue quisaquisa punetiana ehuenta teje. Huenana su, beju putiana. <sup>12</sup> Edue cuana ja edeahue eid'e dusutaibana putsu, beidaji putana huecuana.

### *Pablo Mileto ejude su putiana*

<sup>13</sup> Da su beju ecuanaju ehui su barco su putiana Asón ebuteji teje, dapia Pablo neje etsuti puji, tusa tsada ehuaitsi je hue putiana putsu. <sup>14</sup> Da su ecuanaju Pablo neje ejude su jatsuti putsu, barco su ecuanaju aniuteana Mitilene ebuteji su eputi puji. <sup>15</sup> Da jenetia ecuanaju jaitianana. Pia huenati Quío edhapupu butse su ecuanaju cuinatiana. Pia huenati ecuanaju Samos ebuteji su cuinatiana. Trojillo ejude su piada tsine janahua putsu, pia huenati ecuanaju Mileto ebuteji su cuinatiana. <sup>16</sup> Pablo Asia yahua su tsunutaja mahue puana putsu, Efeso ejude je nubija mahue puana. Da putsu, daja ecuanaju putime puana. Tipeida Jerusalén ejude su cuinatyuja puana pentecostés tsine eba puji.

*Pablo ja Efeso ejude su aniji edue cuana sa ehuidusuji cuana quisatana*

<sup>17</sup> Pablo ja Mileto jenetia Efeso ejude su aniji jei eputani cuana sa ehuidusuji cuana ihuametana. <sup>18</sup> Da su puetana huecuana su, Pablo ja uja quisatana huecuana:

—Edue cuana, micuaneda bahue cuaja ema equene tsine jenetia micuana duju su saida puniunetiana. <sup>19</sup> Echua Puji Jesucristo yama saida mebahana nimemitsida neje. Judío cuana ja ema ebia su tijetije atana ai madhada cuana ya puji. Ebia su ema sufri ametana huecuana. <sup>20</sup> Daja biame, yama micuana jabuetsuati saida cuana mue buetsuariji ana micuana sa saida puji. Jadhitati jude, cristiano cuana sa ete cuana su yama buetsuana huecuana. <sup>21</sup> Judío, judío mahue cuana jubida neje yama quisana tuna sa jucha cuana ariji putsu, Diosu peje su panimeturucatita huecuana puji. Daja huecha, Echua Puji Jesucristo peje su jei paputa huecuana puji. <sup>22</sup> Beju jiahue Espíritu Santo ja ema Jerusalén ejude su ebeitutani. Ai jia ema dapia eid'uatani bue mahue ema. <sup>23</sup> Quepia ejude su papu ema ecuinati su, Espíritu Santo ja ema eshanapametani Jerusalén ejude su ema teriame putsu, sufri yameta huecuana. Tueda bahui ema bahue. <sup>24</sup> Quema mu mue ai piba biame, ema manumeja yatani huecuana biame. Echua Puji Jesucristo ja ema cuatsasiatana ai cuana bahui yama apeja beidaji neje. Diosu ja cristiano cuana ebia su ibuneda ebatani quisa cuana bahui ema quisaquisa puja.

<sup>25</sup> 'Beju bahue ema micuaneda aimue ema neicha ebayu mahue. <sup>26-27</sup> Da putsu, yama micuana equisainia, piada piada micuaneda jei puja mahue biame, ema mu jucha mahue, pamapa Diosu sa quisa saida cuana micuana peje su butsepi quisaquisa pepeana putsu. Beju mue yama ai biame rubua. <sup>28</sup> Da su daja hue saida mepuderaniunetique Diosu butse su. Pamapa Cristo peje su jei eputani cuana di saida meduquinaque, tuneda da mesa dharejiji cuana putsu.

Echua Puji ja mesa ami neje d'eji su atana huecuana. Espíritu Santo ja micuana ichatana ehuidusu huecuana puji. <sup>29</sup> Bahue ema, ema aimue su, pia deja madhada cuana epueta jei eputani cuana ebasea puji. Tuneda da animalo d'aida nime. Cuaja iba d'aida ja huisha manuameja yatani nime, daja jei eputani cuana sa janimetucheati cuana madhada aja yatayu huecuana. <sup>30</sup> Micuana duju jenetia quitaita di bid'umimi ebuetsuaji bataji eputa. Bid'umimi ai cuana ebuetsuata huecuana jei eputani cuana tuna tije paputa puji. <sup>31</sup> Da su merejatique. Mepibaenitique, quimisha mara puji tsine, dhidha yama pamapa micuana tueda ai cuana jubida, ibuneda neje quisaderana.

<sup>32</sup> 'Edué cuana, jiahue Diosu yama ebajainia meinatsihuataque. Tusa quisa saida cuana su mepuderaniunetique. Tueda quisa saida cuana ja micuana nimetucheameta cua. Tueda quisa saida cuana su jei pu putsu, Diosu ja micuana mesa ai saida cuana cielo su etiatayu pamapa mesa dharejiji cuana neje tupupai. <sup>33</sup> Ema micuana neje anina su, aimue yama micuana chipilu bajana mahue. Daja huecha ejud'uji yama micuana mue baja. <sup>34</sup> Micuaneda bahue ema mudumuduana quema eme quitaita neje quema ai dia taji cuana ebajati puji. Quema ebuqueji cuana sa puji di ema mudumuduana. <sup>35</sup> Daja micuaneda ya puji yama micuana buetsuana. Jubida micuaneseda mudumudu taji edue tsahuataja cuana etsahua puji. Mepibatique Echua Puji Jesús sa quisa cuana su. Uja tueda puana: "Etiaji cuana da einatsuji cuana ebia su beidaji."

<sup>36</sup> Beju Pablo ja daja quisapetana huecuana su, tururutana huecuana Diosu neje emitsuti puji. <sup>37-38</sup> Pablo mitsupe putsu, eid'aminia neje tupupai jabudhititaibana huecuana. Ebia su patana huecuana, aimue Pablo neicha ebayu mahue shanapatana huecuana putsu. Da su beju barco su cuata Pablo buquetanana huecuana.

## 21

### *Pablo Jerusalén ejude su putiana*

<sup>1</sup> Daja su beju Pablo barco su aniuteana mesa ebuqueji cuana neje. Butsepi hue ecuanaju Cos ebuteji su cuinatiana. Pia huenati Rodas ebuteji su ecuanaju cuinatiana. Da jenetia ecuanaju Pátara ebuteji su jaitianana. <sup>2</sup> Dapia pia barco su ecuanaju aniuteana Fenicia yahua su yanipetu puji. <sup>3</sup> D'ani bai bene Chipre edhapupu icha putsu, ecuanaju jaitianana Siria yahua su ecuinati puji. Dapia yahua su Tiro ebuteji su satsuana dusutaina ai cuana eichahuanana puji. <sup>4</sup> Dapia jei

eputani cuana tsu putsu, siete tsine tuna neje ecuanaju anitiana. Tueda edue cuana Espíritu Santo ja Jerusalén ejude su aniji cuana ja Pablo einata shanapametana huecuana putsu, Pablo tueda ejude su paputi mahue puji jubida quisatana huecuana. <sup>5</sup> Da su siete tsine ani putsu, ecuanaju putiana. Pamapa jei eputani familia quitana cuana barco esa teje buquenatana huecuana. Dapia mar maje su pamapa ecuanaju tururuana Diosu emitsu puji. <sup>6</sup> Diosu mitsupe putsu, jaid'amiti neje ecuanaju jamitsutibana barco su yaniute puji. Pia edue cuana mu jasiapatitana tuna sa ete cuana su.

<sup>7</sup> Da su beju Tiro ebuteji jenetia cuinanana ecuanaju. Tolemaida ebuteji su ecuanaju cuinatiana. Tueda ejude su aniji jei eputani cuana tsu putsu, piada tsine ecuanaju anihuananana tuna neje. <sup>8</sup> Pia huenati cuinatiana ecuanaju Cesarea ejude su. Dapia Felipe sa ete su ecuanaju putiana. Quejucua tsine puji tu neje ecuanaju aniana. Beju Felipe da Diosu sa quisa puji puina. Tueda da Jerusalén ejude su ilisha sa siete emebajaji cuana jenetia piada puina. <sup>9</sup> Tuseda pushi ebaquepuna ahue mahue anina. Tueda pushi ebaquepuna cuana ja Diosu peje jenetia quisa cuana batsutaina. <sup>10</sup> Beju ecuanaju dapia quejucua tsine yani cama, Diosu sa profeta Agabo pueana Judea yahua jenetia. <sup>11</sup> Pablo peje su cuina putsu, Pablo sa eturisiji bauta huijatana. Da neje ehuatsi, eme jarisitiana. Jarisiti putsu, uja puana:

—Espíritu Santo ja ema quisatana uja: “Jerusalén ejude su aniji judío cuana ja ye eturisiji emetse uja risime yata. Judío mahue cuana peje su emenajatiata huecuana.”

<sup>12</sup> Daja id'aba putsu, ecuanaju, Cesarea ejude su aniji edue cuana neje Pablo jubida bajana Jerusalén ejude su paputi mahue puji. <sup>13</sup> Da su Pablo ja uja ecuanaju atana:

—Ema da ebia su epibapibani micuana sa janebati cuana jepuiti. ¿Ai puji ni micuaneda cuaja quema piba cuana turucaya yainia? Quema mu mue ai piba biame, ema parisita, pamanuameta huecuana papu biame. Ema mu mue ai iyuame Jerusalén ejude su Cristo jepuiti emanu puji.

<sup>14</sup> Pablo mue pibaturucame putsu, uja ecuanaju ana:

—Da su mu daja Diosu sa tsada papu.

<sup>15</sup> Da su beju ecuanaju, Pablo neje jabasetati putsu, cuinanana Jerusalén ejude su eputi puji. <sup>16</sup> Pia Cesarea ejude su aniji edue cuana di ecuanaju neje putitana. Tuna duju su piada Chipre edhapupu jenetia deja Mnasón banime anina. Tsunuda beju Jesús peje su jei pujiji puina. Jerusalén ejude su cuinati putsu, Mnasón sa ete su ecuanaju putiana etahui puji.

*Pablo ja Jacobo peretana*

17 Beju Jerusalén ejude su aniji edue cuana ja ecuanaju saida, beidaji neje batsutana. 18 Pia huenati Pablo, ecuanaju neje Jacobo peje su putiana. Jei eputani edue cuana sa ehuidusuji cuana dapia anitaina. 19 Beju Pablo ja mit-supe putsu, pamapa cuaja Diosu ja tu jepuiti judío mahue cuana duju su ai atana cuana quisaenipetana huecuana. 20 Daja id'aba putsu, beidaji neje Diosu mitsutsuapirutana huecuana. Da su Pablo uja atana huecuana:

—Jade, edue, saipie hue mique quisa cuana biame, upia dueji Jesús peje su jei eputani cuana Moisés chenu sa jacuatsasiati cuana a bahue. 21 Beju id'abatana huecuana miada pia yahua su aniji judío cuana Moisés chenu sa jacuatsasiati cuana aimue a taji mahue equisainia huecuana. Daja huecha miada aimue mecuana sa deja yanana cuana jahuitsanasiquiti taji mahue ebuetsuainia huecuana, id'abatana huecuana. Daja huecha miada aimue mecuana sa a taji mahue ecuanaju sa ai puiti cuana ebuetsuainia huecuana, id'abatana huecuana. 22 Beju mida upia Jerusalén ejude su bahue eputa su, tipeida edhitatita huecuana. 23 Da putsu, uja aqúe: Hue upia yani pushi deja cuana. 24 Tuneseda Diosu neje jamitsuti ape taji. Cuaja ecuanaju sa ai puiti cuana batame atique. Da su templo su putique ye pushi deja cuana neje. Cuaja ecuanaju sa ai puiti batame, jarucuatique Diosu butse su tuna neje. Chipilu tiaque huecuana huisha baja putsu, Diosu peje su pairutsuata huecuana puji. Daja a putsu, jachuainadedemetita cua huecuana. Da su beju pamapa ye ejude su aniji jei eputani cuana bahue eputa miada Moisés chenu sa jacuatsasiati cuana yainia. Da su mi jepuiti madhada ai id'abatana cuana bid'umimi hue epuani bahue eputa huecuana. 25 Beju pia yahua su aniji jei eputani judío mahue cuana ecuanaju quirica su quisameana. Aimue ecuanaju jubida neje ecuanaju sa ai puiti cuana paata huecuana yainia mahue. Daja biame, be bid'umimi diusu eimea cuana peje su irutsuajiji aicha padiata huecuana. Be ami padiata huecuana. Be animalo najaribiajiji aicha padiata huecuana. Ebutse neje bahui paquinatita huecuana.

### *Templo su Pablo inatana huecuana*

26 Da su beju pia huenati Pablo templo su pushi deja cuana neje putiana. Jarucuatitana huecuana templo su enubi puji, cuaja tuna sa ai puiti cuana batame. Da su siete tsine beju su Diosu eirutsua puji neicha esiapati sacerdote quisatana huecuana. Da neje mecuana sa Diosu neje jamitsuti yapeta huecuana.

27 Beju siete tsine puji su templo su Diosu peje su eirutsuatani huecuana cama, Asia yahua jenetia aniji judío cuana ja

Pablo templo su eneti ba putsu, cristiano cuana nimetipeimejianatana. Da su tipeida Pablo inatana huecuana. <sup>28</sup> Ina putsu, uja jubida tsiatsiatana huecuana:

—Israelita edue cuana, metsahuaque ecuanaju. Ye deja da pamapa yahua je cristiano cuana madhada ai cuana buetsua epuniuneti. Ecuana sa ai puiti, Moisés chenu sa jacuatsasiati cuana pa madhada hue. Daja huecha templo pa madhada hue. Ed'ejí su, jiahue quita judío mahue cuana templo su nubiamé putsu, beju templo adhida ametaitia. Tsada mahue ecuanaju sa judío mahue cuana upia paani puji.

<sup>29</sup> Equene Pablo ja Efeso ejude jenetia deja judío mahue Trófimo banime dusutana Jerusalén ejude su. Da su judío cuana ja Trófimo ejude su equene ba putsu, Pablo ja Trófimo templo su nubiametana pepe putana huecuana. Da putsu, daja tsiatsiatana huecuana.

<sup>30</sup> Da su beju pamapa ejude su aniji cristiano cuana Pablo yani su jududube putsu, jadhitatitana huecuana. Pablo ina putsu, rirecuinatana huecuana templo jenetia. Da hora su hue templo teritana huecuana. <sup>31-32</sup> Pablo emanuame piba yatasa huecuana cama, soldado cuana sa echua puji cristiano cuana enimetipeitani quisatana huecuana. Da su, pamapa mesa soldado cuana dhitametana. Cristiano cuana enimetipeitasa su, jududutana huecuana. Beju judío cuana ja soldado cuana eputasiu ba putsu, Pablo icherijitana huecuana. <sup>33</sup> Da su soldado cuana sa echua puji ja cuatsasiatana soldado cuana Pablo painata huecuana puji, beta cadena neje Pablo parisita huecuana puji. Daja a putsu, echua puji ja cristiano cuana:

—¿Aidhe da tueda? ¿Ai madhada ni da tuahueda ataitia? — bajatana huecuana.

<sup>34</sup> Da su tsapiatsapia tsiatsia neje jeutsutana huecuana putsu, tuahueda cuaja shanapa taji mahue batana. Da putsu, echua puji ja Pablo dusuametana cuartel su. <sup>35-36</sup> Beju judío cristiano cuana ja cuartel tsequeini teje tije atana. Dapia mud'id'iatana huecuana. Pablo panubi mahue puji nahuebatana huecuana. Da putsu, soldado cuana ja Pablo mapat-suatana tuna cuaja paata mahue puji. Da su cristiano cuana tsiatsia neje:

—¡Manuameque! —putanetina.

*Pablo cristiano cuana peje su mimiana*

<sup>37</sup> Beju cuartel dume su nubiji mahue su, Pablo ja soldado cuana sa echua puji griego yana su uja quisatana:

—¿A mi ema d'ejí tia cua mi neje emitsuti puji?

<sup>38</sup> Da su echua puji ja Pablo uja jeutsutana:

—Mida griego cuana sa yana su mimi bahue. Da su aimue mida ecuanaju sa pushi mil majai deja cuana sa echua puji mahue. Tueda da egipcio deja puina. Tuahueda ecuanaju pushi mil deja cuana neje majaimetana. Aimue griego cuana sa yana su mimi bue mahue puina.

<sup>39</sup> Da su Pablo ja echua puji atana:

—Aimue ema egipcio deja mahue. Ema mu judío deja Cilicia yahua, Tarso ejude aida jenetia. Beju jiahue d'ejí ema tiaque cristiano cuana neje emimi puji.

<sup>40</sup> Da su echua puji:

—Jade, mimique —atana Pablo.

Da su beju Pablo cuartel tsequeini butse su neti putsu, mesa eme detse jemitsuatana cristiano cuana pamitanata puji. Tuna mitanatana su, Pablo mimipiruana uja judío cuana sa yana su:

## 22

<sup>1</sup> —Edué, tata cuana, meid'abaque ema. Yama micuana butsepi equisa.

<sup>2</sup> Da su ebia su mitanatana huecuana, Pablo tuna sa yana su emimiani id'aba putsu. Pablo daja hue quisa punetiana:

<sup>3</sup> —Ema da judío deja. Cilicia yahua, Tarso ejude su ema bataji puana. Daja biame, upia Jerusalén ejude su ema sehuana. Ecuana sa tata chenu cuana sa jacuatsasiati cuana ema jabuetsuatiana. Gamaliel da quema ebuetsuaji puina. Yama di micuana nime jubida tsada baina Diosu emebaja puji. Da putsu, cuaja micuaneda jiahue quita ema yainia nime daja yama pia cuana aina Diosu emebajainia pepe hue. <sup>4</sup> Equene Jesucristo peje su jei eputani cuana yama tijetije aina. Deja, epuna chacuina. Risi putsu, teriichameina huecuana emanuame teje. <sup>5</sup> Beju sacerdote cuana sa echua puji aida, tata edhi ehuidusuji cuana bahue cuaja yama ana. Quirica neje ema huaratiantana huecuana Damsco ejude su aniji Jesús peje su jei eputani cuana ina putsu, Jerusalén ejude su duse putsu, ecastigame huecuana puji.

*Cuaja Pablo Cristo peje su jei puana cristiano cuana quisatana*

*(Hechos 9.1-19; 26.12-18)*

<sup>6</sup> 'Da su beju ema buepatia Damasco ejude su ecuinahu su, buepa jenetia hueda jubida ja ema jurubatana. <sup>7</sup> Yahua su beju ema dajajana su, etsui ja ema uja yatani id'abana: "Saulo, Saulo, ¿jucuaja puji miada ema tijetije yainia?" <sup>8</sup> Da su yama quisabana: "¿Aidhe da mida, tata?" Beju tuahueda ema jeutsutana: "Ema da Jesús Nazarét ejude jenetia. Tijetije miada yainia da ema." <sup>9</sup> Beju quema ebuqueji cuana ja hueda ba putsu, rubutanatana huecuana. Aimue etsui id'abatana

huecuana mahue. <sup>10</sup> Da su yama uja quisabana: “Echua Puji, ¿ai ni quema a taji?” Ema jeutsutana: “¡Netianaque! Putique Damasco ejude su. Dapia mida equisata huecuana cuaja mique ai a taji.” <sup>11</sup> Da su beju quema ebuqueji cuana ja riretana Damasco ejude teje, hueda ja ema padha atana putsu.

<sup>12</sup> ‘Beju dapia anina piada deja Ananías banime. Ecuana sa jacuatsasiati cuana a bahue puina. Pamapa tueda ejude su aniji judío cuana ja tueda saida batana. <sup>13</sup> Da su ema peje su pueana. Uja ema atana: “Edue Pablo, jabatiyuichaque.” Da hora su beju ema jabatiana. <sup>14</sup> Daja hue ema quisaderainiame atana uja: “Etse sa tata chenu cuana sa Diosu ja equene jenetia mi dharetana mesa ai tsada cuana mi eshanapa puji. Mi dharetana mesa Jabeituti Deja eba puji, daja huecha tusa etsui id'abaque puji. <sup>15</sup> Tu jepuiti miada pamapa cristiano cuana equisati. Cuaja mi baitia, id'abaitia ai cuana equisati. <sup>16</sup> Tipeida netianaque. Diosu sa puji jaichaderamétique yahui neje. Echua Puji Jesús peje su janimetuheatique mique jucha cuana tuahueda padhipata puji.”

*Pablo sa quisa pu taji judío mahue cuana peje su*

<sup>17</sup> ‘Da su Jerusalén ejude su ema jasiapatiana. Dapia templo su ema nubiana Diosu emitsu puji. Diosu emitsuinia cama, yama tahui su nime Jesús bana. <sup>18</sup> Uja ema cuatsasiatana: “Tipeida cuinanaque Jerusalén ejude jenetia, cristiano cuana ema jepuiti quisa cuana su jei puja mahue eputa putsu.” <sup>19</sup> Da su yama jeitsuana: “Echua Puji, quema mimi su jei puta cua huecuana, equene yama jadhitati jude ete cuana je mi peje su jei eputani cuana ina bahue puina bahueta huecuana putsu. Teriicha putsu, ichemeina huecuana. <sup>20</sup> Mique quisa puji emebajaji Esteban manuametana huecuana su, ema dapia retina. Daja huecha quea di piba puina putsu, emanuametani cuana sa ebia jud'uji cuana inatsihuaina.” Daja yama Echua Puji jeitsuana. <sup>21</sup> Da su Echua Puji ja ema uja atana: “Pia yahua uqueda cuana su aniji judío mahue cuana peje su mi yama ebeitu.”

<sup>22</sup> Beju Pablo id'abaji cuana Pablo judío mahue cuana peje su eputi id'aba putsu, ebia su duininitana huecuana. Jubida tsiatsiapirutana huecuana uja:

—¡Pamanuametija tueda deja! ¡Cuaja eid'e papu a taji mahue!

<sup>23</sup> Beju daja etsiatsiani je, mecuana sa ejud'uji cuana jusiatsuatana huecuana. Jutujutuji di jusiatsuatana huecuana. <sup>24</sup> Daja tuna yatani cama, soldado cuana sa echua puji ja soldado cuana cuatsasiatana Pablo cuartel su panubiameta huecuana puji. Pablo risi putsu, huacabiti neje paicheta cuatsasiadhaatana huecuana butsepi quisa papu puji, ai jepuiti



judío cuana tu neje ebia su eduininitani. <sup>25</sup> Da su Pablo ja tu naja su netina capitán uja atana:

—Ema da romano deja nime huecha. ¿A mida ema quisabaitaji mahue iche cua?

<sup>26</sup> Daja su beju capitán ja daja id'aba putsu, echua puji peje su tipeida putiana uja equisa puji:

—Echua puji, be paichetija tueda deja, tueda da romano deja nime huecha putsu.

<sup>27</sup> Da su beju echua puji Pablo peje su putiana. Cuinati putsu, uja quisabatana Pablo:

—¿Ahua ene, mida romano deja nime huecha?

Da su Pablo ja uja jeutsutana:

—¡Ehe!

<sup>28</sup> Da su echua puji ja Pablo atana:

—Quema puji chujeneda saida puana romano deja nime huecha epu puji.

Pablo ja echua puji atana:

—Quema puji mu chuje mahue puana, daja ema bataji puana jenetia putsu.

<sup>29</sup> Soldado cuana ja daja id'aba putsu, Pablo icheja mahue atana huecuana. Daja huecha echua puji di iyuame puana, Pablo risiame putsu.

*Pablo judío cuana sa huaraji aida cuana butse su*

<sup>30</sup> Pia huenati echua puji Pablo pidhuametana. Ihuametana pamapa sacerdote aida, ejude sa huaraji aida cuana. Daja atana, ai jepuiti Pablo neje jubida duininitana huecuana, bahue puja puana putsu. Da su pamapa huaraji aida cuana dhitajiji yanita butse su Pablo netianametana.

## 23

<sup>1</sup> Pablo ejude huaraji cuana chama putsu, uja apirutana huecuana:

—Edué cuana, jiahue teje ema Diosu butse su saida, butsepi epuniuneti.

<sup>2</sup> Da su sacerdote cuana sa echua puji aida Ananías ja Pablo naja su eneti deja cuana cuatsasiatana Pablo ecuatsa su paicheta huecuana puji. <sup>3</sup> Da su Pablo ja Ananías atana uja:

—¡Mida da bubeta! Cuaja miada ema ya, daja huecha mi Diosu ja yata. Miada ema cuaja ecuana sa jacuat-sasiati batame, quisabasaitaja yainia biame, ema ecuatsa su ichemeitia, matseji mahue su. Tueda mu aimue ecuana sa jacuatsasiati batame mahue.

<sup>4</sup> Da su Pablo naja su eneti deja cuana ja Pablo quisabatana uja:

—¿Ai puji ni miada sacerdote cuana sa echua puji aida daja aitia?

<sup>5</sup> Pablo jeutsutana huecuana:

—Edue cuana, tueda da sacerdote aida cuana sa echua puji ema bue mahue putsu, daja yama jeutsuana. Enei hue, Diosu sa mimi su uja derejiji yani: “Ai mimi madhada pu taji mahue migue huaraji sa puji.” Da su ahua ema aidhe tueda bahue puina su, aimue detse yama daja a cua puina mahue.

<sup>6</sup> Beju Pablo jashanapatiana piada piada tuneda saduceo cuana putaina. (Diosu ja manujiji cuana eid'emetayu aimue jei putaina huecuana mahue.) Dajucua cuana fariseo cuana putaina. (Diosu ja manujiji cuana eid'emetayu jei putaina huecuana.) Pamapa tuneda ejude duquinaji putaina. Da su Pablo ja uja atana huecuana:

—Edue judío cuana, ema da fariseo. Quema tata chenu cuana di fariseo cuana putaina. Ema Diosu ja manujiji cuana eid'emetayu enimeid'uatiani putsu, micuaneda ema equisabasaitainia.

<sup>7</sup> Beju Pablo daja mimipeana su, fariseo cuana, saduceo cuana neje jacuicuinapirutitana. Aimue mecuana sa daja cama piba putaina mahue. <sup>8</sup> Saduceo cuana uja epibatitani: “Aimue manujiji cuana neicha eid'etayu mahue, cristiano cuana nid'u mahue putsu. Daja huecha aimue ángel cuana yani mahue.” Fariseo cuana ja mu pamapa ye ai cuana su jei eputani. <sup>9</sup> Da putsu, tuneda cama tsiatsia jubida neje jacuicuinatitana. Beju piada piada fariseo cuana netianatana. Tuneda da jacuatsasiati ebuetsuaji cuana putaina. Uja saduceo cuana atana huecuana:

—Ye Pablo jucha mahue ecuanaju ebainia. Ahua cuapuitime Diosu sa ángel ja ahua enid'u ja tueda mitsutana su, da su, ¿ai puji ni ecuaneda Diosu neje eturuca mimi cua?

<sup>10</sup> Da su beju soldado cuana sa echua puji iyuame puana, enime cuana iyuda ba putsu. Cuapuitime Pablo nedaneda ata cua huecuana pepe puana. Da su soldado cuana ihuatana Pablo judío cuana duju jenetia jemicuina putsu, cuartel su padusutayu huecuana puji.

<sup>11</sup> Dhidha su Pablo peje su Echua Puji Jesús bataji puana. Uja Pablo atana:

—Janimetuheatmapique. Cuaja mida upia Jerusalén ejude su ema jepuiti jaquisanetiacuinatiana nime, daja huecha mida Roma ejude su epu.

*Judío cuana ja Pablo manuameja piba neje Diosu bahue putana*

<sup>12</sup> Pia huenati apudaya jucuada judío deja cuana jadhitatitana. Diosu bahue putana huecuana uja:

—Aimue ecuanaju ediadia, eid'iti mahue Pablo emanuame teje. Diusu ja ecuanaju pacastigata ahua ecuanaju ediadia, eid'iti su, Pablo manumeji mahue su.

<sup>13</sup> Tuneda pushi tunca ejaitiana deja cuana putaina. <sup>14</sup> Da su beju sacerdote aida cuana, tata edhi ehuidusuji cuana peje su putitana huecuana. Uja atana huecuana:

—Ecuanaaju Diusu bahue puana Pablo emanuame puji. <sup>15</sup> Da su soldado cuana sa echua puji mebajatique Pablo upia mueta neicha saida neje equisabasaita piba neje padusemeta. Micuana peje su cuinaji mahue su, ecuanaju tueda eid'ua emanuame puji.

<sup>16</sup> Beju Pablo sa dudu sa ebacua chidi bahue puana. Cuartel su tipeida Pablo equisa puji putiana. <sup>17</sup> Da su Pablo capitán ihua putsu, uja atana:

—Dusuque ye edeje chidi echua puji peje su tu ai cuana paquisatita puji.

<sup>18</sup> Da su capitán ja edeje chidi dusutana. Uja atana echua puji:

—Hue upia duseitia edeje chidi. Pablo ja ema bajataitia mi peje su paduse puji, mi ai cuana quisataque puji.

<sup>19</sup> Da su echua puji ja edeje chidi sa eme ina putsu, chuadera pad'i dusutana. Dusu putsu, uja atana:

—¿Ai ni miada ema quisaja?

<sup>20</sup> Edeje chidi ja uja jeutsutana:

—Pablo manumeja putsu, judío huaraji cuana ja mi eba-jameta Pablo tuna peje su mueta beituque puji, ai cuana neicha tu equisaba puji. <sup>21</sup> Be jei aji huecuana. Be Pablo tuna peje su beituji. Pushi tunca ejaitiana deja cuana ja edid'i su eid'uata Pablo emanuame puji. Diusu bahue putana huecuana Pablo emanuame puji. Pablo manumeji mahue tupu, aimue ediadia, eid'itita mahue huecuana. Ahua mue tuna daja a su, Diusu ja pacastigata huecuana. Daja Diusu bahue putana huecuana. Beju jiahue quita mique jajetsuti bahui eid'uatani huecuana.

<sup>22</sup> Da su beju echua puji ja edeje chidi beitungaibana. Uja cuatsasiatana:

—Be aidhe biame quisaji ema miada ye ai cuana quisaitia.

*Pablo huaraji aida Felix peje su dusutana huecuana*

<sup>23</sup> Beju echua puji ja mesa capitán detse ihua putsu, uja cuatsasiatana tse:

—Mebasetatique pushi cien soldado cuana. Beta cien espadaji, pia beta cien lanzaji, siete tunca caballo bia je soldado cuana di mebasetatique. <sup>24</sup> Ed'eji su, mebasetatique piada caballo Pablo ja pabianita puji. Jiahue dhidha su metseda Pablo Cesarea ejude su huaraji aida Felix peje su saida edusu.

<sup>25</sup> Da su echua puji ja capitán detse quirica tiatana huaraji Felix peje su padusuta tse puji. Uja quirica su deretana: <sup>26</sup>“Ema da Claudio Lisías. Huaraji aida Felix peje su ye quirica ebeituinia. Yama mi ye quirica neje emitsuameinia. <sup>27</sup> Beju ye deja Pablo banime judío cuana ja inatana yama mi peje su ebeituinia. Manuameja adhaatana huecuana biame, yama, soldado cuana neje d'ejí su ameana, tueda da romano deja nime huecha putsu. <sup>28</sup> Da su yama judío cuana sa dhitajiji huaraji aida cuana peje su tueda dusuana judío cuana ja tu etuaquisatani cuana eshanapa puji. <sup>29</sup> Da su ema bahue puana tueda tuaquisatana huecuana mecuana sa ai puiti cuana jepuiti. Daja biame, tueda da jucha mahue emanuame puji, daja huecha eteriame puji. <sup>30</sup> Beju ema bahue puana judío cuana ja tueda manuameja yatani. Da putsu, yama tueda tipeida ebeituinia mi peje su. Judío huaraji cuana yama ecuatsasiainia mi peje su paputita huecuana puji, Pablo etuaquisatani ai cuana quisapetaque huecuana puji. Da teje hue.”

<sup>31</sup> Da su tueda dhidha su soldado cuana ja Pablo Antípatris ejude teje dusutana huecuana. Dapia tahuitana huecuana. <sup>32</sup> Pia huenati ehuaitsi je putitana soldado cuana jasiapatitaibana cuartel su. Pia caballo bia je putitana soldado cuana ja Pablo dusujaitianatana Cesarea ejude su. <sup>33</sup> Dapia cuinati putsu, Pablo, quirica neje huaraji aida Felix menajatiatana huecuana. <sup>34</sup> Felix ja quirica mimiamé putsu, Pablo quisabatana uja:

—¿Quebata yahua jenetia mida?

Pablo jeutsutana:

—Ema da Cilicia yahua jenetia.

<sup>35</sup> Felix ja uja Pablo atana:

—Jade, mi tuaquisaji cuana ecuinata su, yama mi eid'aba.

Da su Felix ja cuatsasiatana soldado cuana Pablo paquinata huecuana puji Herodes sa ete aida su.

## 24

### *Pablo huaraji aida Felix butse su jabiahuanatiana*

<sup>1</sup> Pishica tsine beju jaitianana su, Ananías, piada piada tata edhi ehuidusuji cuana neje Cesarea ejude su cuinana. Tuna neje piada etuaquisaji deja Tértulo banime cuinana. Da su Felix peje su putitana huecuana Pablo etuaquisa puji. <sup>2</sup> Beju soldado cuana ja Pablo dusetana su, Tértulo ja Pablo tuaquisapirutana. Uja Felix atana:

—Huaraji aida Felix, miada saida cuatsasia bahue. Pamapa ejude cuana su aniji cristiano cuana mi jepuiti saida huamahuama yanita. Mida saida cuatsasia bahue putsu,

pamapa ai cuana saida beju. <sup>3</sup> Da putsu, ecuanaju diusulupai mi neje epuani. <sup>4</sup> Tsunutameja mahue mi ecuanaju. Huai chidi cama tsuhu ecuanaju id'abaque. <sup>5</sup> Ye deja Pablo ja pamapa yahua su aniji judío cuana esajasajametani ecuanaju ebainia. Tueda da partido nazareno sa ehuidusuji. <sup>6-7</sup> Tuahueda ecuanaju sa templo madhaja atana. Da putsu, ecuanaju ina putsu, tueda castigaja adhaana, cuaja ecuanaju sa jacuatsasiati cuana batame. Beju echua puji Lisias sa tsada mahue puana. Soldado cuana neje Pablo ecuanaju mejemitana. <sup>8</sup> Da su mi peje su ecuanaju beitutana miada quitaita ye ai enime cuana jepuiti equisabaeni puji.

<sup>9</sup> Daja Tértulo ja huaraji Felix atana. Pia enetita judío cuana di, “Tértulo butsepi emimiani”, putana. <sup>10</sup> Da su beju huaraji aida Felix ja Pablo d'ejí tiatana tu pamimi puji. Da su Pablo ja uja atana:

—Huaraji Felix, dajucua mara beju miada ye yahua saida cuatsasiana putsu, ema beidaji mi butse su ebianetiati puji. <sup>11</sup> Piada tunca beta ejaitiana tsine beju ema Jerusalén ejude su cuinana Diosu emitsutsua puji. Miada quitaita quisaba cua ema butsepi emimiani, ahua mahue. <sup>12</sup> Ye deja cuana ja mue ema ba aidhe neje yacuicuinatiani. Aimue yama ejude su, templo su, jadhitati jude ete cuana su cristiano cuana nimetipeime. <sup>13</sup> Ema daja etuaquisatani huecuana biame, mue quema jucha netiacuina huecuana. <sup>14</sup> Yama mi butsepi equisainia, yama quema tata edhi chenu cuana sa Diosu emebajainia, cuaja Cristo sa jabuetsuati cuana eichacua batame. Tueda jabuetsuati cuana da bid'umimi hue tuneda eputani. Pamapa Diosu sa quirica su derejiji yani ai cuana yama jei yainia. <sup>15</sup> Ye judío deja cuana nime ya di Diosu peje su enimeid'uatiani. Pamapa butsepi, ate manujiji cuana Diosu ja eid'emetayu ya di tuna nime jei epuani. <sup>16</sup> Da putsu, ema cua putsu Diosu butse su, cristiano cuana butse su pamapa tsine saida, butsepi puniunetija.

<sup>17</sup> Da su beju quejucua mara jenetia ema Jerusalén ejude su jasiapatiana dapia judío puri cuana sa puji chipilu edusu puji, daja huecha Diosu peje su eirutsua puji. <sup>18</sup> Yama Diosu templo su emitsutsuainia cama, Asia yahua jenetia judío deja cuana ja ema batana. Ema jabasetatiana Diosu mitsutsuaji mahue su, cuaja ecuanaju sa jacuatsasiati cuana batame. Aimue ema neje jucuada cristiano cuana anitaina mahue. Daja huecha cristiano cuana aimue yama nimetipeimeana mahue. <sup>19</sup> Tueda Asia yahua jenetia deja cuana sa upia pue taji ahua yama ai madhada ana etuaquisa puji. Tuneda da pamimita. <sup>20</sup> Ahua mahue su, ye upia enetita deja cuana pamimita ahua ema judío cuana sa huaraji aida cuana butse

su ai madhada mimiana. <sup>21</sup> Cuapuitime Diusu ja manujiji cuana eid'emetayu ema jei epuani jepuiti ema tuaquisaja yatani huecuana.

<sup>22</sup> Beju Felix Cristo peje su jei eputani cuana da saida, nimemitsida, nimetipeime bue mahue bahue puina putsu, uja judío cuana atana:

—Echua puji Lisias yama eid'ua tsuhu tuahueda ema paquisata puji.

<sup>23</sup> Da su Felix ja capitán cuatsasiatana soldado cuana ja Pablo painatsihuata huecuana puji. Daja puana biame, d'ei patiata huecuana Pablo sa eshanapa cuana ja tu pere putsu, patsahuata huecuana puji.

<sup>24</sup> Da su beju Felix pia ejude su putiana. Quejucua semana beju jaitianana su, Felix, mesa ehuan neje jasiapatibana. Cuinayu putsu, Pablo ihuametana tusa Cristo jepuiti quisa cuana eid'aba puji. Felix sa ehuan di dapia tu neje anina Pablo sa quisa cuana eid'aba puji. Tueda da judío epuna Drusila banime puina. <sup>25</sup> Da su beju Pablo ja Jesucristo jepuiti quisapirutana tse. Cuaja tu peje su etse sa jei, nimebutsepi, jatupuati taji quisatana tse. Diusu sa castigo epusiu jepuiti di quisatana tse. Beju daja Pablo sa quisa id'aba putsu, Felix ebia su rubutanana. Da putsu, uja Pablo atana:

—Da teje hue. Jasiapatiyuque mi yani mane su quetsunu mi yama eihuameicha teje, ahua quema tsada su.

<sup>26</sup> Felix Pablo ja tu chipilu etiata puji id'uataina tu d'ei su paata puji. Da putsu, Felix ja Pablo quejucua nuati biame ihuametaina tu neje emitsuti puji. Daja biame, Pablo ja mue tia atana chipilu. <sup>27</sup> Da su Felix ja Pablo daja hue terijiji ichajusiatana judío cuana neje saida ebameti puji. Beta mara Pablo daja aniana Felix pia huaraji aida neje jaturucatia teje. Tueda huaraji eichacua da Porcio Festo banime.

## 25

### *Pablo huaraji aida Festo butse su anina*

<sup>1</sup> Beju huaraji aida Festo pueana Felix eturuca puji. Quimisha tsine jenetia Cesarea ejude jenetia Jerusalén ejude su putiana. <sup>2</sup> Jerusalén ejude su cuinati putsu, sacerdote aida, ejude ehuidusuji cuana tu peje su putitana Pablo neicha etuaquisa puji. <sup>3</sup> Festo bajatana huecuana Pablo Jerusalén ejude su padusemeta puji. Daja bajatana huecuana, Pablo edid'i su manumeja putsu. <sup>4-5</sup> Festo ja dusemeja mahue atana. Uja atana huecuana:

—Pablo Cesarea ejude su hue paani ema dapia tueda ejude su eputi teje. Tsunuda pad'i da ema Cesarea ejude su eputi. Piada piada micuana sa huaraji cuana ema neje paputita

dapia tueda patuaquisata huecuana puji. Ahua tueda juchaji su, dapia pabameta huecuana.

<sup>6</sup> Beju Festo Jerusalén ejude su ocho ahua piada tunca tsine puji anitiana. Da su Cesarea ejude su putibana. Cuinati putsu, pia huenati beju jacuatsasiati jude ete su putiana Pablo jepuiti enime cuana eba puji. Soldado cuana cuatsasiatana tu butse su Pablo paduseta huecuana puji. <sup>7</sup> Beju Pablo dusetana huecuana su, judío cuana ja janariatitana. Pamapa ai enime aida cuana abaji mahue jubida tuaquisapirutana huecuana biame, cuaja jucha netiacuina taji mahue batana huecuana. <sup>8</sup> Da su Pablo ja mimi neje jabiahuanatiana uja:

—Aimue ema juchaji mahue. Ecuana sa jacuatsasiati cuana pamapa yama a bahue. Mue yama templo madha. Daja huecha romano echua puji aida sa puji mue ema ai madhada mimi.

<sup>9</sup> Da su Festo judío cuana neje saida jabametija putsu, uja Pablo quisabatana:

—¿A mida Jerusalén ejude su putija dapia yama ye enime cuana ebaseta puji?

<sup>10</sup> Da su Pablo ja uja Festo jeutsutana:

—Mahue. Putija mahue ema. Mida da romano huaraji aida putsu, miqueda puji upia ye enime cuana ba taji. Mida bahue eni ema jucha mahue judío cuana sa jacuatsasiati cuana butse su. <sup>11</sup> Ahua ema juchaji su, da su ema pamanuameta huecuana. Ahua ema jucha mahue su, aimue detse ema aiya biame menajatiata cua mahue judío cuana peje su. Ahua miada ye ai enime cuana basetaja mahue su, da su romano echua puji aida quitaita ja ema paabata.

<sup>12</sup> Da su Festo ebahuequisaji cuana neje jaquisabati putsu, uja Pablo atana:

—Beju mida romano echua puji aida butse su netija putsu, da su dapia mida yama ebeitu tuahueda abataque puji.

*Pablo judío cuana sa echua puji Agripa butse su anina*

<sup>13</sup> Da su quejucua semana jaitianana su, judío cuana sa echua puji Agripa, mesa ehuané Berenice neje Cesarea ejude su pueana Festo emitsu puji. <sup>14</sup> Quejucua tsine jaitianana su, Festo ja Agripa quisatana Pablo jepuiti. Uja atana Agripa:

—Ema equene huaraji Felix ja piada deja Pablo banime upia terijiji ichajusiatana. <sup>15</sup> Beju ema Jerusalén ejude su anina su, judío cuana sa sacerdote aida, tata edhi ehuidusuji cuana ja ema peje su Pablo tuaquisatana. Tuneseda tsada puana yama tueda ematse puji. <sup>16</sup> Da su beju yama jeitsuana huecuana uja: “Aimue detse romano huaraji cuana ja aidhe abaji mahue manuame ata cua mahue. Equene jatuaquisatiji cuana neje jabati taji mecuana sa jatuaquisati cuana ejeitsu

puji.” <sup>17</sup> Da su upia ema peje su puetana huecuana su, tipeida ema aniuteana tuna sa mimi eid'aba puji. Yama cuatsasiana soldado cuana ja Pablo ema butse su paduseta puji. <sup>18</sup> Da su cuinatitana huecuana su, Pablo etuaquisaji cuana ja tu-aquisapirutana. Beju tuahueda aimue ai madhada atana mahue, cuaja yama epibainia nime. <sup>19</sup> Mecuana sa ai puiti cuana jepuiti bahui tuaquisatana huecuana. Piada deja Jesús banime manujiji jepuiti jacuicuinatitana huecuana. Pablo da, “Jesús eid'e hue”, puana. Beju judío cuana ja jei puja mahue putana. <sup>20</sup> Da su aimue yama cuaja a taji mahue bana. Pablo yama uja quisabana: “¿A mi putija Jerusalén ejude su dapia mi yama yaba puji?” <sup>21</sup> Tueda mahue puana. Romano echua puji aida Augusto butse su putija puana tuahueda paabata puji. Da su tueda yama inatsihuameana que tupu yama Augusto echua puji peje su ebeitu teje.

<sup>22</sup> Da su Agripa ja Festo uja atana:

—Yama di Pablo id'abaja.

Festo jeutsutana uja:

—Mueta mida eid'aba.

<sup>23</sup> Da su beju pia huenati Agripa, Berenice detse jacuat-sasiati jude ete su pueana. Chujeneda ejud'uji neje jajud'uti pueana tse. Soldado cuana sa echua puji aida, ejude sa deja aida cuana neje pueana tse. Beju pamapa dapia dhitajiji yanita su, Festo ja Pablo dusemetana. <sup>24</sup> Soldado cuana ja Pablo dusetana su, Festo ja atana huecuana uja:

—Echua puji Agripa, dhitajiji cuana, mechamaque ye deja. Jerusalén, Cesarea ejude detse su judío cuana ja tueda ebia su tuaquisatana. “Pamanu tueda”, putana huecuana. <sup>25</sup> Daja biame, mue ai madhada biame atana mahue tu emanuame puji yama ebainia. Tuahueda bajatana romano echua puji Augusto ja paabata puji. Da su yama tu peje su ebeitu. <sup>26</sup> Mue ai biame tuaquisa taji mahue ba putsu, ¿cuaja ni da yama quisame a cua romano echua puji aida? Da putsu, Agripa, yama Pablo duseitia micuana butse su micuaneda tu eid'aba puji. Cuapuitime micuaneda ema quisa cua cuaja yama quirica su romano echua puji aida quisame a cua. <sup>27</sup> Beju terijiji yama ebeituinia je, quema puji pamapa tusa jucha cuana quisa taji quirica su.

## 26

*Pablo echua puji Agripa peje su quisa puana*

<sup>1</sup> Da su beju echua puji Agripa ja Pablo uja quisabatana:

—¿A da mi jepuiti quitaita mimi cua?

Da su Pablo ja mesa eme piraratana. Mimi neje jabiahua-napirutiana uja:



<sup>2</sup> —Echua puji Agripa, ema beidaji epuani mi butse su ye enime jepuiti emimi puji. Pamapa judío cuana sa jatuaquisati cuana yama mi butsepi equisa. <sup>3</sup> Beju pamapa judío cuana sa ai puiti, jacuicuinati cuana miada eshanapaeninia. Da putsu, paciencia neje id'abaque ema.

<sup>4</sup> Yanana jenetia Jerusalén ejude su ema butsepi puniunetiana. <sup>5</sup> Pamapa judío cuana quitaita bahue ema edeahue jenetia fariseo puina. Tuneda bahue putsu, quisata cua cuaja ema yanana jenetia Diusu iyubana. Beju mida bahue fariseo cuana ja pia cuana ebia su Diusu eiyubatani. <sup>6</sup> Jiahue huaraji judío cuana ja ema manumeja yatani, Diusu ja manujiji cuana eid'emetayu ema jei epuani putsu. Diusu ja ecuana sa tata edhi chenu cuana manujiji cuana eid'emetayu jamitsuti tiataidha biame, jei puja mahue huecuana. <sup>7</sup> Pamapa judío cristiano cuana ja tsine, dhidha Diusu mebaja putsu, emitsutsuatani huecuana manujiji cuana eid'emetayu tsine eid'uatani huecuana putsu. Tueda janimeid'uatati su ema jei epuani jepuiti quitaita huaraji judío cuana ja ema matseja yatani. <sup>8</sup> ¿Manujiji cuana sa Diusu sa puji ai atadhada bata eid'emeyu puji?

*Pablo ja equene Cristo peje su jei eputani cuana tijetije ataina*

<sup>9</sup> Equene Jesús peje su jei eputani cuana yama tijetije aina. Quema piba su saida yainia pepe hue daja yama aina. <sup>10</sup> Jerusalén ejude su daja yama aina. Sacerdote aida cuana ja ema huaratiatana jei eputani cuana ina putsu, eteriichame puji. Piada piada Cristo peje su jei eputani cuana emanuamentiani huecuana su, daja paata huecuana quea di piba puina. <sup>11</sup> Judío cuana sa jadhitati jude ete cuana su yama ichemeina huecuana Cristo esetame huecuana puji. Ema tuna neje ebia su duinini putsu, jubida yama tijetije aina huecuana pia ejude cuana teje.

*Cuaja Pablo Cristo peje su jei pupirume puana Pablo ja Agripa quisatana*

*(Hechos 9.1-19; 22.6-16)*

<sup>12</sup> Beju pia tsine Jerusalén ejude jenetia ema cuinanana Damasco ejude su eputi puji. Sacerdote aida cuana ja ema beitutana jei eputani cuana einati puji. <sup>13</sup> Ema edid'i je epuhu su, buepatia su beju id'eti sa hueda ebia su tucheda yama bana. Tueda hueda ja ema, quema ebuqueji cuana jubida pehuejurabatana. <sup>14</sup> Pamapa ecuanaju dajajana yahua su. Dajaja putsu, etsui yama hebreo yana su uja epuani id'abana: “Saulo, Saulo, ¿jucuaja puji miada ema tijetije yainia? Mida quitaita neda yatiani, ema tijetije a putsu.” <sup>15</sup> Da su yama

quisabana: “¿Aidhe da mida, tata?” Tuahueda ema jeutsutana: “Ema da Jesús. Tijetije miada yainia da ema. <sup>16</sup> Beju netianaque. Mi peje su ema bataji puitia mida quema emebajaji epu puji, ye ai cuana jepuiti quisa puque puji. Daja huecha yama mi equisa ai cuana miada cristiano cuana equisati. <sup>17-18</sup> Judío, judío mahue cuana peje su mi yama ebianetia. Jiahue tuna peje su mi yama ebeituinia miada quema quisa saida cuana tuna peje su quisaquisa epu puji, tuneda di ema shanapa putsu, d'eji su paputa huecuana puji. Da su ema peje su jei pu putsu, mecuana sa jucha cuana dhipajiji papu. Ishahua sa eme jenetia d'eji su paputa huecuana puji. Diosu sa dharejiji cuana paputa huecuana cielo su tu neje papuenitita huecuana puji.”

<sup>19</sup> ‘Da su, echua puji Agripa, tueda cielo jenetia etsui id'aba putsu, tusa jacuatsasiati yama jei apiruana. <sup>20</sup> Equene Damasco ejude su aniji cristiano cuana yama quisana. Da su Jerusalén ejude su aniji cristiano cuana di yama quisana. Pamapa Judea yahua je aniji judío cuana, daja huecha pia yahua cuana su aniji judío mahue cuana yama quisana. Diosu peje su papibaturucatita huecuana puji ema tuna peje su quisaquisa puana. Tu peje su jei pu putsu, ai saida cuana paata huecuana puji quisaquisa puana. <sup>21</sup> Tueda cuana jepuiti judío cuana ja ema templo su inatana emanuame puji. <sup>22</sup> Beju Diosu ja ema ebianetiatani putsu, ema jiahue teje daja hue Diosu sa quisa saida cuana quisaquisa epuderani pamapa cristiano cuana peje su. Moisés chenu, profeta chenu cuana ja di tueda ai saida cuana jepuiti deretaidha. Da su ema pamapa cristiano cuana peje su quisaquisa epuani, cuaja deretaidha huecuana bahui. <sup>23</sup> Uja biahua tiempo deretaidha huecuana Cristo jepuiti. Sufri pu putsu, tuseda manu taji. Da su beju manujiji cuana duju jenetia tueda equene enetianayu. Tusa quisa saida cuana judío, judío mahue cuana peje su quisaquisa yametau.

*Pablo ja Agripa Cristo peje su jei ameja adhaatana*

<sup>24</sup> Beju Pablo daja mimiana su, huaraji Festo uja tsiatsiana: —¡Pablo, mida da tseitsi, ebia su ebahuetsuatiani putsu!

<sup>25</sup> Da su Pablo ja Festo jeutsutana:

—Mahue, huaraji aida Festo. Aimue ema tseitsi mahue. Ema mu ene, butsepi emimiani. <sup>26</sup> Hue upia yani judío cuana sa echua puji Agripa. Tueda bahue saida tueda ai cuana. Da putsu, yama janimetucheti neje pamapa tueda ai cuana equisainia. Bahue ema tuahueda pamapa tueda ai cuana eshanapatani. Aimue tueda ai cuana etsia quisa neje ajiji mahue.

<sup>27</sup> Da su Pablo ja echua puji Agripa uja atana:

—Echua puji Agripa, ¿a mida Diosu sa biahua tiempo profeta chenu cuana sa quisa su jei epuani? Bahue ema mida jei epuani.

<sup>28</sup> Da su Agripa ja jeutsutana Pablo:

—Pablo, hua chidi mahue mi ema jei yame puji.

<sup>29</sup> Da su Pablo ja Agripa uja atana:

—Ahua huai chidi mahue su, dueji mimi cuana metiaiti mi jei epu puji. Beju Diosu sa tsada papu mida, pamapa upia ema id'abaji cuana neje ema nime Cristo sa dharejiji mepuque puji aimue cadenaji mahue.

<sup>30</sup> Da su beju Pablo daja puana su, echua puji Agripa, huaraji aida Festo, Berenice, pia eid'abaji cuana netianatana.

<sup>31</sup> Cuinana putsu, uja tuneda cama jaquisatitana:

—Pablo ja aimue ai madhada atana mahue. Mue ai biame tuseda mu jucha emanuame puji, daja huecha tu eteriicha puji.

<sup>32</sup> Da su Agripa ja Festo uja atana:

—Ahua Pablo ja romano echua puji aida ja tueda enime cuana paabata puji bajatana mahue su mu detse, jiahue quita mesiajiji pu cua.

## 27

### *Pablo Roma ejude su beitutana huecuana*

<sup>1</sup> Beju Roma ejude su eputi tiempo cuinana su, Pablo, pia risijiji cuana neje soldado cuana sa capitán peje su menajiatana huecuana tuahueda Roma ejude su padusuta huecuana puji. Tueda capitán Julio banime puina. Tueda da Augusto sa batallón jenetia puina. <sup>2</sup> Da su beju Adramitio ebuteji jenetia cuinana barco su aniuteana. Tueda barco ecuinana quitaita puina Asia yahua su eputi puji. Edue Aristarco di ecuanaju neje putiana. Tueda da Macedonia yahua Tesalónica ejude jenetia puina. <sup>3</sup> Pia huenati Sidón ebuteji su ecuanaju cuinatiana. Dapia soldado cuana sa capitán Julio ja Pablo d'ejí tiatana tusa eshanapa cuana paretita puji, tu paquinata huecuana puji. <sup>4</sup> Da su beju Sidón ebuteji jenetia ecuanaju cuinanana. Chipre edhapupu d'ani bai bene icha putsu, ecuanaju jatianana. Beni jubida epuneti putsu, Chipre edhapupu beni mahue naja je ecuanaju jaitianana. <sup>5</sup> Cilicia, Panfilia yahua detse bume mar aida ecuanaju japetutiana. Licia yahua, Mira ebuteji su ecuanaju cuinatiana.

<sup>6</sup> Dapia capitán Julio ja barco satsujiji esa batana. Tueda barco Alejandría ejude jenetia puina. Italia yahua su epuhu putsu, tueda barco su ecuanaju aniuteana. <sup>7</sup> Quejucua tsine ecuanaju nimesaida putiana, beni ecuanaju eturuca jubida

punetina putsu. Da putsu, ecuanaju sa putadhada neje Gnido ebuteji butse je jaitianana. Beni ja barco paase mahue atana, jubida hue tsuhu punetina putsu. Da putsu, Salmón edube banime bume Crete edhapupu su beni mahue naja je ecuanaju jaitianana. <sup>8</sup> Edhapupu queque je ebia su nimesaida ecuanaju putiana. Beju chamacama ecuanaju cuinatiana Saida Ebuteji banime su. Tueda ebuteji da Lasea ejude naja su anina.

<sup>9</sup> Beju ecuanaju ebia su tsunutana, beni jubida puana putsu. Rejada beju barco neje epuderati puji, beni badi beju putsu. <sup>10</sup> Da su Pablo ja uja quisatana huecuana:

—Deja cuana, jiahue beju rejada epuderati puji. Beju barco, pamapa quipi cuana neje etaitanape bata yama ebainia. Cuapuitime ecuaneda di manu cua.

<sup>11</sup> Pablo daja puana biame, barco sa edusuji, ehuidusuji detse ja Pablo id'abaja mahue atana. Soldado cuana sa capitán jei ametana tse epuderati puji. <sup>12</sup> Ed'eji su, tueda ebuteji aimue saida puina mahue beni badi cuana ejaitiana eid'ua puji. Da putsu, que chidi daja cama japibatitana huecuana ejaitiana puji, Fenice ebuteji su cuinatija putsu. Tueda ebuteji da Crete edhapupu beni mahue su anina. Tueda ebuteji da saida beni badi cuana ejaitiana eid'ua puji.

### *Mar su beni, nai jubida puana*

<sup>13</sup> Da su beni nimesaida nai bene jenetia cuinapiruana putsu, saida epuderati pepe hue putana huecuana. Crete edhapupu naja je ecuanaju japetuatiana. <sup>14</sup> Da su beju cuapuitime hue beni jubida netianana. <sup>15</sup> Barco dhapujutana. Cuaja butsepia taji mahue ecuanaju barco bana, beni jubida nai bene jenetia putsu. Beju beni ja barco dusutana. <sup>16</sup> Clauda edhapupu beni mahue naja je ejaitianasa je, canoa chidi barco su riretsuatana huecuana. Barco dume su canoa chidi risisaisiatana huecuana. <sup>17</sup> Da su ereji mahaida neje barco biahapupitadadatana huecuana. Beni ja Africa yahua su panunuta mahue ecuanaju sa piba puana, dapia rejada cama, d'aba hue putsu. Da putsu, sábana cuana jemiutetana huecuana beni ja dapia edusuta mahue puji. Daja beni ja ecuanaju dusuniunetiatana. <sup>18</sup> Pia huenati beni cha ebia su puana putsu, ena ebia su netianana. Da su ecuanaju quipi cuana jusiapiruana mar su. <sup>19</sup> Pia huenati barco sa ai cuana macha ecuanaju jusiana. <sup>20</sup> Quejucua tsine puji beni ja jubida barco dhapujutana. Ba taji mahue puana id'eti, atujai cuana. Ecuana sa janimid'uati cuana biame jaitaitanametiana.

<sup>21</sup> Quejucua tsine ecuanaju diadiaji mahue putsu, Pablo ja uja atana huecuana:

—Tata cuana, Crete edhapupu su, be u jenetia mecuinanaja, yama micuana ana biame, aimue micuaneda ema jei ana mahue. Ebia su saida epu mane yaniti puji ye ai cuana etaitaname mahue puji. <sup>22</sup> Daja biame, be menimetuchedataitanametiji. Aimue da ecuana piada biame emanu mahue, barco etaitanape biame. <sup>23</sup> Beju dhidha su yama emebajainia Tata Diosu sa ángel ema peje su bataji puana. <sup>24</sup> Uja ema atana: “Pablo, be iyuame puji. Romano echua puji aida butse su Roma ejude su miqueda neti taji. Mi jepuiti Diosu ja pamapa mi neje epuniuneti cuana d'eji su yata mar jenetia.” <sup>25</sup> Da su beju menimetuheatique. Cuaja ángel ja ema quisatana batame, daja Diosu ja yatayu, ema tu peje su enimeid'uatiani putsu. <sup>26</sup> Daja biame, edhapupu su mar ja ecuana ejusiatsuata.

<sup>27</sup> Da su beta semana ecuanaju barco su aniana beni ja dusu. Mar Adria banime su aniana ecuanaju. Beju dhidha dusetete su marinero cuana ja emaje su ecuinahu jashanapatitana huecuana. <sup>28</sup> Da su duebapirutana huecuana. Beju quimisha tunca sucuta ejaitiana huara duedame puina. Chuadera pad'i neicha hue duebatana huecuana. Beta tunca siete ejaitiana huara hue beju duedame puina. <sup>29</sup> Iyuame putana huecuana, beni ja barco tumu aida cuana su jubida dhapujuta cua putsu. Da putsu, pushi ancla cuana butemetana huecuana barco tiani bene. Daja a putsu, ehuenta id'uatana huecuana. <sup>30</sup> Ehuenta eid'uatani huecuana cama, marinero cuana canoa neje jududuja pudhaatana. Bid'umimi neje uja putana huecuana:

—Ecuanaju ehui bene macha ancla cuana ebuteme.

Da su canoa butemeja adhaatana huecuana. <sup>31</sup> Pablo ja daja ba putsu, soldado cuana, mecuana sa capitán di uja atana:

—Ahua marinero cuana barco su yanitita mahue su, aimue micuana Diosu ja d'eji su yata mahue.

<sup>32</sup> Da su soldado cuana ja canoa risiji cuana rijitana canoa mar ja pajianata puji.

<sup>33</sup> Da su huenahua Pablo ja uja atana huecuana:

—Micuaneda beta semana diadiaji, tahuiji mahue putsu, mediadiaque tucheda epu puji. <sup>34</sup> Daja micuana sa a taji tucheda epu puji. Beju aimue ecuana piada biame etaitana mahue.

<sup>35</sup> Pablo daja mimipe putsu, pan inatana. Tuna butse su Diosu diuslupai a putsu, pan ped'utana. Daja a putsu, diadiapiruana. <sup>36</sup> Da su pia cuana janimetuheatu putsu, diadiapirutana huecuana. <sup>37</sup> Beju beta cien siete tunca sucuta ejaitiana deja cuana barco su anitaina. <sup>38</sup> Pamapa diadiape

putsu, trigo quipi cuana mar su jusianubiatana huecuana barco epejutana puji.

*Barco mar su jaberebereatiana*

<sup>39</sup> Beju huenahua yahua batana huecuana. Bue mahue putaina huecuana yahua sa ebani. Barco emaje su sat-suameja adhaatana huecuana. <sup>40</sup> Da su ancla risiji cuana riji putsu, jusiahuanatana huecuana. Barco tiani su etaruji aida detse turatana huecuana. Tueda etaruji detse da barco huidusuji leme pu cua nime puina. Barco ehui bene sábana jemitsuatana huecuana beni ja panunuta huecuana puji. Emaje su barco butsepiapirutana huecuana. <sup>41</sup> Beju emaje su cuinatiji mahue su hue, barco huitsana d'aba su jutujutuji su japapanetitiana. Tueda eti jude rejada puina, ebia su dapia ena najubida puina putsu. Da putsu, barco tiani mar ja ped'uped'uapirutana. <sup>42</sup> Da su soldado cuana ja risijiji deja cuana manuameja adhaatana aimue mar su betsa putsu, ejududuta mahue huecuana puji. <sup>43</sup> Beju soldado cuana sa capitán ja tsada mahue batana, Pablo eid'e amēja putsu. Da su uja cuatsasiatana huecuana:

—Betsa bahue cuana medajajaque ena su. Emaje su mesatsuatique. <sup>44</sup> Pia betsa bue mahue cuana tije paputita barco ped'uped'u cuana bia je.

Da su beju pamapa tuneda emaje su saida cuinatitana.

## 28

*Pablo Malta edhapupu su anina*

<sup>1</sup> Pamapa ecuanaju d'eji su edhapupu aida su aniana. Tueda edhapupu aida Malta banime ecuanaju shanapana. <sup>2</sup> Dapia aniji cristiano cuana ja saida ecuanaju batsutana. Cuati jucuada turunetia putsu, ihuatana ecuanaju eiyuti puji, ebia su huinahuina, nai neje punetina putsu. <sup>3</sup> Da su Pablo ja cuati murida dhitatana. Cuati utsu su eichatani cama, bacua cuati jenetia cuinanana, ebia su sinada jinebatana putsu. Pablo sa eme su jatsuibadeanatiana. <sup>4</sup> Dapia aniji cristiano cuana ja bacua Pablo sa eme su ebade ba putsu, uja jaquisatitana huecuana:

—Ye deja mu jia deja manuameji. Mar jenetia d'eji su puitia biame, Diusu ja bacua neje ematsetani.

<sup>5</sup> Da su Pablo ja bacua cuati su taratana, bacua ja mue cuaja biame a putsu. <sup>6</sup> Beju id'uatana huecuana que tupu mesa eme eseje su, emanu edajaja. Tsunuda id'uatana huecuana. Mue cuaja biame epuani Pablo ba putsu, japibaturucatitana huecuana uja:

—Ye deja mu jia diusu.

<sup>7</sup> Beju Malta edhapupu sa huaraji aida Publio banime puina. Tusa ete nari hue anina putsu, tuahueda saida ecuanaju batsutana. Quimisha tsine mesa ete su ecuanaju aniana. <sup>8</sup> Tusa tata jubida amidhene neda saina. Da su Pablo ja tu peje su putiana. Mesa eme detse tu bia su huana putsu, Diusu bajatana tuseda puji. Da su beju saisiana. <sup>9</sup> Da putsu, pamapa edhapupu su aniji nedaji cuana Pablo peje su puetana. Beju Pablo ja saisiametana huecuana. Da su pamapa ai su saida ecuanaju batsutana huecuana.

*Pablo Roma ejude su cuinatiana*

<sup>10-11</sup> Beju quimisha badi edhapupu su ecuanaju aniana. Dapia piada barco netina beni badi cuana ejaitiana teje. Tueda barco Alejandría ebuteji jenetia puina. Barco hui su beta bid'umimi diusu eimea badeina. Tueda eimea detse Cástor, Pólux banime puina. Beju beni badi cuana jaitianana su, tueda barco su putija ecuanaju puana. Dapia aniji cristiano cuana ja jucuada ai dia taji cuana ecuanaju tiataibana. <sup>12</sup> Da su beju Siracusa ebuteji su ecuanaju cuinatiana. Dapia aniana ecuanaju quimisha tsine. <sup>13</sup> Da jenetia ecuanaju jaitianana Regio ebuteji su. Pia huenati ecuanaju cuinanana, beni bene jenetia beni jubida puana putsu. Pia huenati ecuanaju cuinatiana Puteolo ebuteji su. <sup>14</sup> Dapia Cristo peje su jei eputani edue cuana ja ecuanaju tsutana. Tuna neje piada semana aniana. Da su beju ecuanaju ehuatsi je hue jaitianana Roma ejude su. <sup>15</sup> Dapia jei eputani edue cuana ja ejude uqueda edid'i su ecuanaju tsutana, Pablo epusiu bahue putana huecuana putsu. Piada piada edue cuana ja romano sa jadhitati jude ete Foro banime su ecuanaju tsutana. Tueda Foro da Apio banime edid'i su anina. Piada tunca piada ejaitiana legua Roma ejude jenetia uquedame puina. Pia edue cuana mu Quimisha Tabernas banime eti jude teje putitana Pablo etsu puji. Nueve legua cuana Roma ejude jenetia uquedame puina. Da su Pablo edue cuana ba putsu, ebia su janimetuheatiana. Diusu ebia su diusulupai atana. <sup>16</sup> Beju Roma ejude su cuinati putsu, capitán ja terijiji cuana pia einatsihuaji soldado cuana sa capitán peje su menajatiatana. Pablo mu mue menajatia atana. D'ejí tiatana pia ete su chujemame tu mehua paani puji. Piada soldado tu painatsihuata puji ichatana.

*Pablo Roma ejude su quisaquisa puana*

<sup>17</sup> Beju quimisha tsine jaitianana su, Pablo ja Roma ejude su aniji judío cuana sa ehuidusuji cuana ihuametana. Uja atana huecuana:

—Judío edue cuana, aimue yama judío cristiano cuana cuaja madhada biame a. Daja huecha mue yama madhaba

ecuana sa tata chenu cuana sa ai puiti cuana. Beju daja biame, Jerusalén ejude su aniji judío cuana ja ema menajatiatana huaraji romano cuana peje su. <sup>18</sup> Tueda huaraji cuana ja ema abatana. Mue yama ai madhada biame a batana huecuana putsu, d'ejí tiaja ema adhaatana huecuana. Quema ai madhada mue teje huecuana putsu, mue manuame huecuana ema. <sup>19</sup> Beju judío cuana ja mu ema d'ejí su epu tsada mahue batana. Da su yama bajana echua puji aida ja Roma ejude su ema paabata puji. Daja biame, quema puji mu judío cuana cuaja tuaquisa a taji mahue. <sup>20</sup> Da putsu, yama micuana ihuameitia micuana pamapa ai cuana butsepi equisa puji. Cristo id'eibana quisa saida cuana da judío cuana sa puji di. Tueda quisa saida cuana ema quisaquisa puana jepuiti, ema upia risijiji yani.

<sup>21</sup> Da su uja Pablo atana huecuana:

—Mue ai quirica biame Judea yahua su aniji cuana jenetia mi jepuiti ecuanaju peje su cuina. Daja huecha Jerusalén ejude jenetia cuinatana deja cuana mue ai madhada biame mi jepuiti mimi. <sup>22</sup> Beju ecuanaju eshanapainia pamapa cristiano cuana jei Cristo peje su eputani cuana sa puji madhada hue emimitani. Da putsu, quisaenique ecuanaju ye ai cuana jepuiti. Da su pia tsine ecuanaju esiapati mi eid'aba puji.

<sup>23</sup> Beju neicha esiapati tsine cuinana su, dueji cristiano cuana Pablo yani su puetana. Da su apudaya jenetia tsinecua teje Pablo ja Diosu sa quisa saida cuana quisatana huecuana. Moisés chenu sa jacuatsasiati derejiji cuana neje, daja huecha profeta chenu cuana sa derejiji cuana neje Jesús peje su jei ameja atana huecuana. Jesús da Diosu sa Jabeituti Deja jei ameja atana huecuana. <sup>24</sup> Beju piada piada Pablo sa quisa su jei putana. Pia cuana mu jei puja mahue putana. <sup>25</sup> Aimue mecuana sa daja cama piba mahue putsu, beju cuinanapirutaibana huecuana. Da su Pablo ja uja atana huecuana:

—Espíritu Santo ja profeta Isaías chenu ecuana sa tata chenu cuana uja quisametaidha:

<sup>26</sup> Quisatique jichu cristiano cuana uja:

Micuaneda eid'aba biame, aimue eshanapa mahue.

Daja huecha echama biame, aimue eba mahue.

<sup>27</sup> Beju ye cristiano cuana da muesumu tadada. Aimue saida eid'abatani huecuana mahue.

Mecuana sa etua cuana terijiji pabata huecuana mahue puji. Daja huecha mecuana sa eid'aja terijiji paid'abata huecuana mahue puji.

Mue shanapa huecuana.

Ema peje su jasiapatija mahue huecuana yama esaisiame huecuana puji.



<sup>28</sup> Pablo ja daja hue quisainiame atana huecuana:

—Meshanapaenique, micuaneda da muesumu tadada cuana Isaías chenu ja quisataidha cristiano cuana nime. Da putsu, Diosu ja judío mahue cuana peje su mesa quisa saida cuana quisaquisa yametayu. Id'aba putsu, beju jei yata huecuana.

<sup>29</sup> Pablo daja mimipeana su, judío cuana epubuyu je, tuneda cama jacuicuinatitaibana.

<sup>30</sup> Beta mara quitana Pablo Roma ejude su piada ete su aniana. Pamapa tu pereji cuana saida batsutaina. <sup>31</sup> Iyame mahue neje Diosu ecuatsasiati jepuiti quisataina huecuana. Echua Puji Jesucristo jepuiti buetsuataina huecuana. Beju aimue tueda aiya biame cuaja atana mahue. Daja papu.

## LA CARTA DEL APOSTOL SAN PABLO A LOS ROMANOS

Pablo ja piada tunca quimisha ejaitiana quirica cuana deretaidha tsapiapiati Diusu sa dharejiji cuana sa puji. Ye quirica Roma ejude su aniji edue dharejiji cuana sa puji deretaidha. Ye quirica su Pablo quisa epuani Diusu peje su jei pu putsu bahui, ecuaneda d'oji su pu cua. Aimue jacuatsasiati cuana jepuiti mahue.

Daja huecha ecuana ebametani Diusu sa ebia su jai-bunebati cuana pamapa cristiano juchaji cuana sa puji. Cuaja tuahueda mesa Ebacua Jesucristo jepuiti ecuana d'oji su yatani ecuana ebuetsuatani. Daja huecha cuaja ecuaneseda tu butse su saida, butsepi puniuneti taji ebuetsuatani.

Ye versículo cuana da ebia su saida quita ebuetsuati puji:

1.16

3.23

5.8-12

6.8,11,23

8.1,14,18,28,35-39

12.1,21

15.3

*Pablo ja Roma ejude su aniji dharejiji edue cuana quirica tiametana*

<sup>1</sup> Ema da Pablo. Jesucristo sa emebajaji da ema. Diusu ja ema huaratiatana Jesús sa apóstol epu puji. Ema dharetana tusa quisa saida cuana quisaquisa epu puji. <sup>2</sup> Biahua tiempo da Diusu ja mesa profeta cuana mesa quisa saida cuana quisamepirutaidha. Deremetaidha huecuana tusa quirica su cuaja tuahueda mesa Ebacua cristiano cuana peje su beitume ya. <sup>3</sup> Tusa Ebacua Jesucristo jepuiti quisa saida cuana deremetaidha huecuana. Tueda deja bataji puana ye mundo su echua puji David chenu sa familia jenetia. <sup>4</sup> Tueda da Diusu sa Ebacua tucheda epuani. Cristiano cuana ja tueda manuametana biame, Espíritu Santo tucheda ja tueda manujiji cuana duju jenetia netianametaibana. Da neje Jesús da Diusu sa Ebacua bametana. Tueda quitaita da ecuana sa Echua Puji beju. <sup>5</sup> Tuahueda ema ebia su ibuneda ebatani putsu, ema huaratiatana tusa apóstol epu puji, tusa quisa saida cuana quisaquisa eputi puji, pamapa yahua cuana je pamapa cristiano cuana tu peje su jei paputa puji. <sup>6</sup> Beju micuaneda di Jesucristo peje su jei puana putsu, Diusu ja micuana dharetana Cristo sa epu puji.

<sup>7</sup> Edue cuana, micuaneda Roma ejude su aniji cuana, yama ye quirica ebeituinia. Diusu ja micuana dharetana mesa cristiano butsepi cuana epu puji, micuana ebia su ibuneda ebatani putsu. Diusu, Echua Puji Jesucristo detse ja ebia su meibunebataque. Tuatseda menimepijajametaque.

*Pablo Roma ejude su aniji dharejiji edue cuana peretija puana*

<sup>8</sup> Beju yama Jesucristo jepuiti Diusu diusulupai yainia, micuaneda tu peje su jubida enimetuheatiani putsu. Pamapa yahua cuana je pamapa edue cuana bahue epupirutani, cuaja micuaneda Diusu peje su ebia su enimetuheatiani nime. <sup>9</sup> Yama Diusu pamapa muesumu neje emebajainia tusa Cristo jepuiti quisa saida cuana quisaquisa epu puji. Beju tueda bahue ema ene quita emimiani. Yama pamapa hora su tueda ebajainia micuaneseda puji. <sup>10</sup> Cua biame ema micuana baja putsu, yama Diusu jubida ebajainia ema d'ejí patiata micuana ebati puji. <sup>11-12</sup> Yama micuana jabuetsuati neje tsahuaja micuaneda Diusu peje su jubida enimetuheatí puji. Yama micuana batija ecuaneda huamahuama Diusu peje su enimetuheatí puji. Quema puji di saida micuana sa Cristo jepuiti quisa saida cuana eid'aba puji. <sup>13</sup> Edue cuana, bahue mepuque, quejucua nuati biame ema micuana peje su putija pudhaana. Yama micuana Diusu sa mimi cuana ebia su buetsuaja yainia micuana sa saida puji. Cuaja yama pia edue cuana pia yahua cuana je buetsuana batame, daja huecha micuana yama buetsuaja yainia. <sup>14</sup> Beju pamapa cristiano cuana peje su Diusu sa quisa saida cuana quema quisaquisa pu taji epuani. Bahue eni cuana peje su ahua bue mahue cuana peje su quema quisaquisa pu taji epuani. Pamapa ye mundo sa cristiano cuana peje su Diusu sa quisa saida cuana quema quisaquisa pu taji epuani. <sup>15</sup> Pamapa micuaneda Roma ejude su aniji cuana peje su di ema quisaquisa putija epuani.

*Diusu sa quisa saida cuana da tucheda eni*

<sup>16</sup> Aimue quema bidhu Cristo jepuiti Diusu sa quisa saida cuana quisaquisa epu puji. Tueda quisa saida cuana da tucheda eni cristiano cuana d'ejí su ya puji. Ahua quebata Diusu sa quisa saida cuana su jei epu su, tueda Diusu ja d'ejí su yatayu. Tueda Cristo jepuiti quisa saida cuana Diusu ja equene judío cuana quisamepirutana d'ejí su paputa huecuana puji. Beju jahue mu pamapa pia yahua cuana su aniji cristiano cuana peje su di tueda quisa saida cuana quisaquisa yametani tuneda di d'ejí su paputa puji. <sup>17</sup> Pamapa Cristo peje su enimetuheatiani cuana Diusu ja enimebutsepiata. Daja

hue Diusu peje su enimetuheaderatita huecuana. Beju uja derejiji yani Diusu sa quirica su: “Ahua quebata Diusu peje su enimetuheatiani su, tueda Diusu ja enimebutsepiatayu. Tu neje eid'e yanienitiyu.”

*Pamapa cristiano cuana da juchaji*

<sup>18</sup> Beju Diusu sa castigo cielo jenetia tipeida ecuina deja madhada cuana peje su, Diusu sa quisa saida cuana eichaderatani huecuana putsu. Jucha bahui ebia su mecuana sa tsada putsu, aimue Diusu sa quisa saida cuana id'abaja mahue yatani huecuana. Da putsu, Diusu ja jubida ecastigata huecuana. <sup>19</sup> Diusu da tu jepuiti ai cuana tuna peje su jabamesaisiatiana biame, aimue eiyubatani huecuana mahue. <sup>20</sup> Diusu ja tucheda eni jabamesaisiatiana, pamapa ai cuana ataidha putsu. Pamapa cristiano cuana ja beju Diusu eid'e eni, tucheda ebatani, tuahueda ye mundo pamapa ataidha putsu. Da putsu, pamapa tu peje su jei puja mahue cristiano cuana tu butse su juchaji eputa, aimue tu peje su jei puja mahue putana huecuana putsu. <sup>21</sup> Diusu yani bahue eputani huecuana biame, aimue tueda eiyubatani huecuana mahue. Daja huecha aimue Diusu diusulupai yatani huecuana mahue. Beju epitsapitsatitani huecuana Diusu jepuiti. Aimue Diusu eshanapatani huecuana mahue. <sup>22</sup> Bahue eni ebatitani biame, aimue bahueta mahue. <sup>23</sup> Diusu eid'e eni deja eimea su turucatana huecuana emitsutsua puji. Daja huecha animalo eimea cuana su. D'ia cuana, pushi tame cuana, etsedu neje aseji cuana eimea cuana yatani huecuana emitsutsua puji, aimue tueda ai cuana ja etsahuatani mahue huecuana biame.

<sup>24</sup> Da putsu, Diusu ja nahuerijitana huecuana pamapa tuna sa ai utsatada madhada cuana paata huecuana puji. Tuneda cama equita cama neje pamapa ai madhada adhida cuana yatani. <sup>25</sup> Aimue Diusu jepuiti jabuetsuati eni cuana jei puja eputani huecuana mahue. Bid'umimi jabuetsuati cuana bahui jei eputani huecuana. Aimue Diusu quitaita iyuda neje mitsutsuaja yatani huecuana mahue. Tusa ai jaichati cuana bahui emitsutsuatani huecuana. Aimue Diusu sa ai jaichati cuana mitsutsua taji mahue biame, daja yatani huecuana. Diusu quitaita mecuana sa mitsutsuaeni taji yatani huecuana, tuahueda pamapa ai cuana ataidha putsu. Beju gloria Tata Diusu, tuahueda pamapa ai cuana ataidha putsu. Daja papu.

<sup>26</sup> Da putsu, Diusu ja nahuerijitana huecuana, aimue tueda mitsutsuaja yatani huecuana mahue putsu. Daja atana huecuana beju pamapa mecuana sa ai utsatada madhada cuana paata huecuana puji. Epuna cuana, pia epuna neje pamapa

ai utsatada madhada adhida cuana yatani equita cuana neje. <sup>27</sup> Daja huecha deja cuana di pia deja cuana neje pamapa ai utsatada madhada adhida cuana yatani equita cuana neje. Tuneda cama ai bidhutada cuana yatani. Aimue epuna tsada mahue ta huecuana. Da putsu, tuna mehua emadhatitani, tueda jucha madhada cuana a putsu.

<sup>28</sup> Diusu shanapaja mahue yatani huecuana putsu, Diusu ja nahuerijitana huecuana pamapa tuna sa ai madhada piba cuana paata huecuana puji. Da su beju tuneda pamapa ai piba madhada cuana neje daja hue edusuderatitani. <sup>29</sup> Pamapa ai madhada, ai utsatada madhada adhida cuana yatani huecuana. Pia sa ai cuana eutsatabatani huecuana. Envidia cama neje edusutitani. Deja manumeji, ate, iche-iche aida ta huecuana. Cristiano cuana baseaji, pia cuana banirireji, nimemadhada ta huecuana. <sup>30</sup> Pia cristiano cuana sa mimi madhada puji, Diusu duininibaji, jaiyubati bue mahue, ai madhada pibaji bahui ta huecuana. Tuneda cama ebia su aida ebatitani. Aimue tuna sa tata, cuara jei aja mahue yatani huecuana. <sup>31</sup> Bue mahue, jamitsuti ape bue mahue, edue quitaita ibuneda mahue, japerdonati bue mahue, jabataichenubati bue mahue ta huecuana. <sup>32</sup> Beju bahue ta huecuana tueda ai madhada cuana a bahue cristiano cuana Diusu ja cuati castigo su ebeitutayu ecastigata huecuana puji. Bahue ta huecuana biame, tueda ai madhada cuana daja hue ebia su yatani huecuana. Beidaji eputani huecuana, pia cuana tuna nime daja huecha ai madhada cuana yatani ba putsu.

## 2

### *Diusu ja cristiano cuana butsepi ejuzgata*

<sup>1</sup> Be pia cristiano cuana mejuzgaji.

Micuaneda da tuna nime juchaji putsu, aimue micuaneseda juzga taji huecuana mahue. Micuaneda da tuna nime daja hue ai madhada cuana yainia putsu, micuaneda quitaita ejuzgatiani pu cua nime. <sup>2</sup> Beju bahue ecuaneda Diusu ja tueda ai madhada aji cristiano cuana ematsetayu, tueda da butsepi putsu. <sup>3</sup> Tueda ai cuana da madhada hue micuaneda eshanapainia biame, ahua micuaneda di tueda ai madhada cuana ya su, ¿aimue jia maida micuana Diusu ja ematseta mahue? <sup>4</sup> Beju Diusu ja paciencia neje juchaji cuana ebia su ibuneda ebatani putsu, aimue tipeida ematsetani huecuana mahue tu peje su papibaturucatita huecuana puji. Da putsu, mipibaturucatique Diusu peje su. Be uja mepibatiji: “Diusu ja ema ebia su ibuneda ebatani putsu, aimue ema ematseta

mahue.” <sup>5</sup> Ahua micuaneda Diusu peje su japibaturucatiya mahue su, Diusu ja micuana ematsetayu, mesa castigo tsine ecuina su. Da tsine su Diusu ja pamapa cristiano cuana butsepi neje ejuzgata. Tu peje su muesumu tadada cuana jubida ematsetayu, tu epueicha su. <sup>6</sup> Diusu ja pamapa cristiano cuana ejuzgata cuaja ai atana huecuana. Diusu ja ejuzgata huecuana, cuaja ai saida ahua ai madhada atana huecuana batame. <sup>7</sup> Pamapa cristiano cuana Diusu ja eturuca etiatayu, cuaja ye mundo su anime putana batame. Ahua quebata cuana sa Diusu tuna jepuiti saida pamimi tsada su, ahua tu neje cielo su anienitija huecuana su, da su Diusu ja eid'e yameenitayu huecuana. <sup>8</sup> Tusa jabuetsuati aja atana mahue cuana mu jubida neje ematsetayu tu epue hora su. Tuna neje ebia su eduinini, madhada neje cama epuniunetitani huecuana putsu. <sup>9</sup> Pamapa ai madhada yatani cristiano cuana Diusu ja sufri yametayu castigo su. <sup>10</sup> Daja huecha Diusu ja pamapa ai saida yatani cuana ebia su eibunebatayu. Enimepijajameta huecuana. Tuna jepuiti saida emimi.

<sup>11</sup> Beju Diusu ja pamapa cristiano cuana tupupai butsepi neje ejuzgata, cuaja ye mundo su yani tupu jadasutitana huecuana batame. <sup>12</sup> Tuahueda pamapa juchaji cuana ematsetayu. Judío mahue juchaji cuana Diusu sa jacuatsasiati derejiji mecuana sa yani mahue biame, Diusu ja ematseta huecuana. Daja huecha judío juchaji cuana di ematsetayu, mesa jacuatsasiati derejiji mecuana sa yani biame. <sup>13</sup> Ahua etse Diusu sa jacuatsasiati cuana id'aba putsu, yainia su, da su Diusu ja tueda nimebutsepi yatayu. Ahua id'aba putsu biame, etse aimue yainia mahue su, aimue Diusu ja tueda nimebutsepi yatayu mahue. <sup>14</sup> Ahua judío mahue cuana ja ai saida cuana yatani jacuatsasiati derejiji cuana mecuana sa yani mahue biame, da su tueda jacuatsasiati cuana yatani pu cua nime hue ta huecuana. <sup>15</sup> Diusu sa jacuatsasiati derejiji cuana mecuana sa yani mahue biame, bahueta huecuana saida ahua madhada hue yatani huecuana, Diusu ja mecuana sa muesumu su eshanapametani huecuana putsu. <sup>16</sup> Da putsu, Jesucristo ja pamapa cristiano cuana tupupai ejuzgatayu, cuaja tuna sa ai ajiji cuana batame, saida ahua mahue. Daja yatayu, mesa castigo tsine ecuina su. Da tsine su pamapa mecuana sa ai etsia piba cuana ejuzgatayu. Daja yama cristiano cuana equisainia.

*Judío cuana ja Moisés sa jacuatsasiati aja yatani d'oji su epu puji*

<sup>17</sup> Beju jiahue yama micuana quisaja. Micuaneda judío putsu, ebia su aida ebatiani, Diusu ja mesa jacuatsasiati

cuana micuana tiatana putsu. Micuaneda uja epuani: “Ecuaju bahui da Diusu sa dharejiji cristiano cuana.” <sup>18</sup> Bahue eni micuaneda pamapa Diusu sa jacuatsasiati cuana yanana jenetia. Da putsu, dhare bahue micuaneda ai saida cuana ya puji. Cuaja Diusu sa tsada micuaneseda a taji micuaneda a bahue. <sup>19-20</sup> Micuaneda Diusu sa jabuetsuati cuana ebuet-suaji cuana ebatiani. Pamapa Diusu sa ene quita jacuatsasiati derejiji cuana eshanapaenitani. Da putsu, micuaneda Diusu shanapaji mahue cuana Diusu jepuiti buetsuaja yadhaainia. Bue mahue cuana Diusu sa jacuatsasiati cuana buetsuaja yadhaainia. Yanana chidi cuana di buetsuaja adhaainia. <sup>21</sup> Diusu sa jacuatsasiati cuana pia cristiano cuana ebuet-suainia biame, aimue micuaneda huecha tueda jacuatsasiati cuana yainia mahue. Pia cuana, be tsi puji mepuji, ebuet-suainia biame, micuaneda quitaita hue tsi epuani. <sup>22</sup> Be pia deja sa ehuanee mequinaji pia cuana ebuet-suainia biame, micuaneda quitaita hue daja yainia. Be eimea cuana memitsutsuaji ebuet-suainia biame, micuaneda quitaita hue chipilu Tata Diusu ebia su tsada ebainia. <sup>23</sup> Diusu sa jacuatsasiati derejiji cuana micuana sa yani biame, aimue tueda jacuatsasiati quitaita cuana yainia mahue. Micuaneda daja ba putsu, cristiano cuana ja Diusu tsada mahue ebatani. <sup>24</sup> Beju Diusu sa quirica su uja derejiji yani micuana jepuiti: “Micuana jepuiti Diusu shanapaji mahue cuana ja Diusu emadhabatani.”

<sup>25</sup> Judío mu mepu. Tueda mu saipie hue, ahua Diusu sa jacuatsasiati derejiji cuana yainia su. Quebata judío ja mesa jacuatsasiati derejiji yani biame, ahua aimue yatani mahue su, da su tueda Diusu shanapaji mahue pu cua nime. <sup>26</sup> Quebata judío mahue ja mu mesa jacuatsasiati derejiji yani mahue biame, ahua tueda jacuatsasiati cuana yatani su, tueda da judío pu cua nime Diusu sa dharejiji epu. <sup>27</sup> Beju tueda da Diusu butse su saida, nimebutsepi epu judío mahue epuani biame, jacuatsasiati cuana yatani putsu. Daja huecha micuaneda judío cuana mu Diusu butse su aimue nimebutsepi epu mahue judío quitaita biame, jacuatsasiati cuana mue a putsu. Micuaneseda jacuatsasiati derejiji cuana yani biame, aimue Diusu butse su nimebutsepi epu mahue, tueda jacuatsasiati cuana mue ape putsu. <sup>28</sup> Aimue tupu mahue, judío bahui pu putsu, nimebutsepi epu puji. <sup>29</sup> Pamapa Diusu sa ene quita cristiano cuana ebametitani tuna sa piba eichacua jepuiti, aimue ai puiti cuana a putsu mahue. Tuna sa tsada Diusu beidaji yame puji bahui. Diusu sa mahue cuana ja mu jacuatsasiati cuana yatani cristiano cuana bahui beidaji yame puji.

## 3

<sup>1</sup> Da su, ¿a da saida judío epu puji?

<sup>2</sup> Ehe, saida da, tueda saida eni putsu. Equene Diusu ja judío cuana mesa jacuatsasiati cuana menajatiataidha.

<sup>3</sup> Piada piada tuneda Diusu tije aja ataidha mahue biame, Diusu ja mesa jamitsuti cuana tuna neje apetaidha. <sup>4</sup> Arijija mahue ataidha mesa jamitsuti tuna neje, tuneda daja biame. Pamapa cristiano cuana da bid'umimi puji biame, tueda mu butsepi. Uja derejiji yani Diusu sa quirica su:

Diusu, mique mimi cuana da butsepi.

Aimue detse mida bid'umimi puji aiya biame tuaquisata cua mahue.

<sup>5</sup> Beju cuapuitime piada piada cuana uja pu cua: “Saipie hue ecuanaju jucha ya puji. Aimue butsepi mahue Diusu ja ecuana ecastigata puji. Ecuana sa jucha jepuiti Diusu butsepi ebametiani. Ahua ecuaneda jucha ya mahue su, ¿cuaja ni da ecuaneda Diusu da butsepi bahue pume pu cua? Da su saipie hue ecuaneda jucha ya puji Diusu da butsepi pabameti puji.” <sup>6</sup> Be daja mepibaji. Diusu ja pamapa jucha yatani cuana ejuzgatayu, tueda da butsepi putsu.

<sup>7-8</sup> Ahua ecuaneda jucha ya su, aimue tueda Diusu sa puji saida mahue. Cuapuitime etse uja pu cua: “Saipie hue ema bid'umimi epu puji. Yama bid'umimi a putsu, cristiano cuana ja Diusu da ene quita ebata. Da putsu, ema Diusu sa cuaja castiga taji mahue.” Beju aimue saida mahue daja epibati puji. Piada piada cuana yama pa ai madhada cuana a taji ebuetsuainia Diusu butsepi ebame puji. Aimue daja yama cristiano cuana ebuetsuainia mahue, daja yama ebuetsuainia eputani huecuana biame. Beju Diusu ja jubida ematseta huecuana, daja eputani huecuana putsu.

*Pamapa su juchaji ta huecuana*

<sup>9</sup> ¿Ai judío cuana da pia cristiano cuana ebia su saida bata? Pamapa judío cuana, pamapa judío mahue cuana neje tupupai juchaji eputani Diusu butse su. <sup>10</sup> Beju uja derejiji yani Diusu sa quirica su:

Aimue aidhe biame nimebutsepi mahue.

<sup>11</sup> Aimue aiya biame Diusu eshanapatani mahue.

Aimue aiya biame Diusu tsada ebatani mahue.

<sup>12</sup> Pamapa su jeitid'ujiji eputaniuneti castigo su eputi teje.

Aimue aiya biame ai saida cuana yatani mahue.

<sup>13</sup> Tuna sa mimi cuana da adhida.

Jabaseati aida ta huecuana.

Tuna sa jabaseati mimi cuana da bacua sa jaati nime.

<sup>14</sup> Duinini mimi madhada cama emimitani huecuana.

<sup>15</sup> Jamanuameti aida cuana eputani huecuana.



<sup>16</sup> Quepia tuna eputitani su pia cuana sufri yametani huecuana.

<sup>17</sup> Nimepijaja bue mahue ta huecuana.

<sup>18</sup> Aimue Diusu eiyubatani huecuana mahue.

<sup>19</sup> Beju judío cuana bahue eputani Diusu ja ematsetayu huecuana, jacuatsasiati cuana ema su yanita putsu. Tueda jacuatsasiati ja uja ebuetsuatani: Diusu ja pamapa cristiano cuana emitanameta, tu butse su juchaji eputani huecuana putsu. <sup>20</sup> Aimue cristiano cuana Diusu butse su nimebutsepi puta cua mahue, tueda jacuatsasiati cuana a putsu. Tueda jacuatsasiati quitaita ja pamapa cristiano cuana da juchaji ebuetsuatani.

*Janimetucheati jepuiti bahui Diusu ja ecuana nimebutsepi yatani*

<sup>21</sup> Beju jiahue Diusu ja ecuana ebuetsuatani cuaja ecuaneda d'eji su pu cua. Aimue jacuatsasiati cuana jepuiti ecuana nimebutsepi yatani mahue. Jesucristo jepuiti mu ecuana nimebutsepi yatani. Biahua tiempo Moisés chenu, Diusu sa profeta chenu cuana tueda ai cuana jepuiti quisa putaidha. <sup>22</sup> Beju quebata judío ahua judío mahue cristiano cuana ahua Jesucristo peje su jei eputa su, Diusu ja d'eji su yata huecuana. <sup>23</sup> Pamapa cristiano cuana da Diusu butse su tupupai juchaji eputani. Tu butse su tsabajai mahue eputani mahue. <sup>24</sup> Daja biame, Diusu ja cha nimebutsepi ame hue yatani huecuana, Jesucristo jepuiti d'eji su yatani huecuana putsu. <sup>25</sup> Cristo jucha jepuiti curusu su manuana putsu, Diusu ja nimebutsepi yatani huecuana, ahua Cristo peje su jei eputa huecuana su. Daja Diusu ja yatani tueda da butsepi pashanapata huecuana puji. Biahua tiempo aimue Diusu ja pamapa juchaji cuana matsepetaidha mahue, tuna sa jucha cuana jepuiti Cristo curusu su emanu puji ebeituta shanapa putsu. <sup>26</sup> Biahua tiempo Diusu pacienciaji aidaji puidha juchaji cuana neje. Jiahue mu Cristo peje su jei eputani cuana Diusu ja nimebutsepi yatani. Daja a putsu, Diusu butsepi ebametiani.

<sup>27</sup> Aimue ecuaneda jacuatsasiati cuana a putsu, enimebutsepiatiani mahue. Diusu ja mu ecuana enimebutsepiatani, ecuaneda Cristo peje su jei epuani su. Da putsu, ecuaneseda cuaja aida jabati taji mahue, aimue ecuaneda janimebutsepiati cua mahue putsu. <sup>28</sup> Bahue ecuaneda quebata papu Cristo peje su jei epu su, Diusu ja tueda enimebutsepiata. Aimue tu mehua quitaita janimebutsepiatita cua mahue, jacuatsasiati cuana a putsu.

<sup>29</sup> Judío cuana Diusu tuneseda puji bahui pepe hue eputani. Beju aimue daja mahue. Tueda mu pamapa cristiano cuana

sa Diusu. <sup>30</sup> Tuahueda pamapa cristiano cuana tupupai ebatani. Quebata papu nimebutsepi ata cua, ahua tu peje su jei epu su. <sup>31</sup> Cuapuitime piada piada micuaneda uja pu cua: “Diusu ja ema nimebutsepi atana, Cristo peje su jei puana putsu. Da su aimue quema jacuatsasiati cuana a taji mahue.” ¡Mahue! Be daja mepibatiji. Ebia su ecuaneseda jacuatsasiati cuana a taji, Diusu sa dharejiji cuana putsu.

## 4

### *Diusu ja Abraham nimebutsepi ataidha*

<sup>1</sup> Mepibaenitique cuaja ecuana sa tata

Abraham chenu Diusu neje anidha. <sup>2</sup> Aimue ai saida cuana ataidha putsu, Diusu ja tueda nimebutsepi ataidha mahue. Diusu ja Abraham chenu nimebutsepi ataidha, tueda tu peje su janimetuheatidha putsu. Da putsu, Abraham chenu aimue aida jabatidha mahue Diusu butse su. <sup>3</sup> Uja derejiji yani Abraham chenu jepuiti: “Diusu ja Abraham chenu nimebutsepi ataidha, tueda Diusu peje su janimetuheatidha putsu.” <sup>4</sup> Beju bahue quisa yama micuana equisa. Ahua etse emudumuduani su, mudu emetse sa etse chujetia taji, mudu puji mesa manu putsu. Daja huecha ahua aiya etse ai chidi cha tia hue yatani su, tueda da chuje mahue. Tusa jaibunebati jepuiti hue etse etiatani, manu mahue putsu. <sup>5</sup> Daja da Diusu. Aimue ecuaneda tuseda manu mahue. Tuahueda quebata juchaji papu saida ebatsuta, ahua tu peje su tueda jei epu su. Aimue ai saida cuana a putsu, Diusu ja tueda ebatsuta mahue. <sup>6</sup> Daja huecha echua puji David chenu mimidha tueda ai cuana jepuiti. Beidaji quebata Diusu ja ebatsuta tusa ai jaati cuana piba putsu mahue. <sup>7</sup> Uja echua puji David chenu puidha ye ai cuana jepuiti:

Ebia su beidaji eputani Diusu ja jucha perdonajiji cuana.

<sup>8</sup> Ebia su beidaji eputani Diusu ja nimebutsepi ebatani cuana.

<sup>9</sup> Diusu ja quebata papu eperdonatayu. Judío cuana ahua judío mahue cuana tupupai enimebutsepiatayu, ahua Diusu peje su jei eputa huecuana su, cuaja Abraham chenu tu peje su jei puidha nime. <sup>10</sup> Mepibaenitique Abraham chenu su. Diusu ja tueda nimebutsepi ataidha, tu peje su janimetuheatidha putsu. Tueda huitsanasiquiji mahue tsuhu puina su, Diusu ja tueda nimebutsepi ataidha, tu peje su janimetuheatidha putsu. <sup>11-12</sup> Da su Diusu ja nimebutsepi ataidha su chu, Abraham chenu jahuitsanasiquiti putsu, marcajiji puidha. Tueda marca ja Abraham chenu nimebutsepi bametaidha. Da jepuiti Abraham chenu pamapa huitsanasiquijiji mahue biame nimebutsepi cuana sa tata pu cua nime. Tuneda Abraham chenu neje tupupai nimebutsepi

eputani Diusu peje su janimetucheati jepuiti. Da putsu, Abraham chenu da pamapa Diusu peje su enimetuheatitani cuana sa tata pu cua nime, huitsanasiquijiji ahua mahue paputa huecuana biame.

*Janimetucheati jepuiti bahui Diusu ja mesa jamitsuti tiataidha*

<sup>13</sup> Diusu ja tu peje su enimetuheatitani cuana Abraham chenu neje tupupai ye mundo etia jamitsuti tiataidha. Aimue jacuatsasiati cuana apetaidha huecuana putsu, Diusu ja tueda jamitsuti tiataidha mahue. Daja jamitsuti tiataidha huecuana, tu peje su janimetuheatitaidha huecuana putsu.

<sup>14</sup> Diusu ja tu peje su enimetuheatitani cuana bahui ye mundo etiata. Ahua jacuatsasiati aji cuana ye mundo etiata su, da su mesa jamitsuti cuana chuje mahue epu. Cristiano cuana sa Diusu peje su janimetucheati cuana daja huecha chuje mahue epu. <sup>15</sup> Ene putsu, jacuatsasiati cuana ja ecuana ematsetani. Jacuatsasiati cuana mahue pu cua su, daja huecha aimue Diusu ja matseta cua mahue, jucha mahue putsu.

<sup>16</sup> Da su Diusu ja ecuana mesa jamitsuti cuana cha tia hue yatani, ahua ecuaneda tu peje su enimetucheati su. Mesa jamitsuti cuana ecuana etiatayu mesa jaibunebati jepuiti, cuaja Abraham chenu tiataidha nime, ahua ecuaneda di Abraham chenu nime enimetucheati su, judío ahua judío mahue papu biame. Abraham chenu da pamapa Diusu peje su enimetuheatiani cuana sa tata pu cua nime Diusu ja ichataidha. <sup>17</sup> Uja Diusu ja ataidha Abraham chenu mesa quirica su derejiji yani: “Yama mida dueji sa tata pu cua nime ichana.” Beju tueda jamitsuti da ene quita, Diusu quitaita daja puidha putsu. Tuada da manujiji cuana eid'emeyuji Diusu. Daja huecha ai cuaja epu cuana tuahueda jaitianajiji nime ebatani.

<sup>18-19</sup> Beju Sara chenu da jabacuati bue mahue puina biame, Abraham chenu Diusu peje su janimeid'uatidha. Abraham chenu da cien maraji beju puina su, Diusu ja tueda uja ataidha: “Mique ehuané Sara bacuaji epu, jabacuati bue mahue biame.” Tuatseda aimue jabacuati bue mahue puina biame, Abraham chenu Diusu peje su ebia su janimetuheatidha, Diusu ja tueda, dueji sa tata pu cua nime, ataidha su. Edhi, tucheda mahue tatse biame, Abraham chenu Diusu peje su jubida janimetuheatidha, Diusu ja mesa tu neje jamitsuti yapetayu. <sup>20</sup> Beju edhi quitaita biame, Abraham chenu daja hue ebia su Diusu peje su janimetuheaderatidha. Diusu diusulupai a putsu, mitsutsuataidha. <sup>21</sup> Daja Diusu ja tueda ebacua tiata cua Abraham chenu jei puidha. <sup>22</sup> Da putsu, Diusu ja Abraham chenu nimebutsepi bataidha.

<sup>23</sup> Diusu ja aimue Abraham chenu jepuiti bahui daja saida ataidha mahue. <sup>24</sup> Tueda ai cuana derejiji yani ecuana sa saida puji. Diusu ja ecuaneda di nimebutsepi yata, ahua tu peje su ecuaneda Abraham chenu janimetuheatidha nime, enimetucheati su. Diusu quitaita ja ecuana sa Echua Puji Jesucristo manujiji cuana duju jenetia id'emetaibana. <sup>25</sup> Jesucristo manuana ecuana sa jucha cuana jepuiti. Daja huecha Diusu ja tueda id'emetaibana ecuana nimebutsepi ya puji.

## 5

*Ecuana sa Diusu peje su janimetucheati cuana jepuiti ecuaneda Diusu peje su nimebutsepi epu*

<sup>1</sup> Ecuanaeda Cristo peje su janimetucheati putsu, Diusu ja ecuana nimebutsepi yatani. Da putsu, ecuaneda Diusu neje saida yani. <sup>2</sup> Ecuanaeda Cristo peje su janimetuheatiana putsu, Diusu ja ecuana ebia su ibunebatana. Jiahue ecuaneda mesa jaibunebati jepuiti saida epuniunetiani. Cristo neje ecuana dunemetana putsu, beidaji ecuaneda epuani, Diusu neje ecuaneda cielo su yanienitiyu putsu. Dapia ecuana pamapa mesa ai saida cuana etiata. <sup>3-4</sup> Beju jiahue ye mundo su ecuaneda Cristo jepuiti sufri epuani biame, beidaji ecuaneda, sufrimiento cuana ja ecuana paciencia aidaji yatani putsu. Paciencia neje pamapa ai cuana tuchea cua. Da su etuheatiani je, Diusu peje su ecuaneda jubida enimeid'uatiani. <sup>5</sup> Ecuanaeda tu peje su enimeid'uatiani putsu, aimue tuahueda ecuana ebaseata mahue. Espiritu Santo ecuana tiatana. Tueda Espiritu Santo ja Diusu ja ecuana ebia su ibuneda ebatani ecuana eshanapametani.

<sup>6</sup> Cuaja cristiano cuana d'ejí su pu taji mahue eputani ba putsu, Diusu sa tsada hora su Cristo pueana juchaji cuana sa eturuca emanu puji. <sup>7</sup> Aimue etse pia eturuca manuja pu cua mahue. Daja biame, cuapuitime pia saida eturuca etse manuja pu cua. <sup>8</sup> Beju Cristo mu ecuaneda eturuca manuana, ecuaneda juchaji biame. Da neje Diusu ja ecuana ibuneda ebatani jabametiana. <sup>9</sup> Jesús ja mesa ami jad'uichatiana putsu, ecuana Diusu peje su nimebutsepi atana. Beju aimue tueda bahui mahue. Tuahueda ecuana Diusu sa epue castigo tsine jenetia d'ejí su yatayu. <sup>10</sup> Ecuanaeda Diusu neje equene jamajaitiana biame, Diusu ja ecuana tu neje saida atana, mesa Ebacua Jesús manuana jepuiti. Beju aimue tueda bahui mahue. Ecuanaeda tu neje saida pu putsu, tuahueda ecuana d'ejí su yaenitayu, Cristo da eid'e yanieni putsu. <sup>11</sup> Da putsu, jiahue ecuaneda ebia su beidaji, Diusu neje saida yani putsu, ecuana sa Echua Puji Jesucristo jepuiti.

*Adán chenu jepuiti ecuaneseda manu taji. Cristo jepuiti mu ecuana eid'e ameenita cua*

<sup>12</sup> Beju Adán chenu jepuiti jucha pupiruidha ye mundo su. Tueda jucha jepuiti pamapa cristiano cuana sa manu taji, juchaji huecuana putsu. <sup>13</sup> Moisés chenu sa jacuatsasiati derejiji cuana ai mahue tsuhu puina su, jucha ye mundo su anidha. Jacuatsasiati cuana anidha mahue putsu, aimue Diusu ja cristiano cuana matsetaidha mahue, jucha ataidha huecuana su. <sup>14</sup> Daja biame, Adán chenu jenetia Moisés chenu ja jacuatsasiati cuana tiataidha teje cristiano cuana manutaidha. Equene Adán chenu ja jucha ataidha nime, aimue ataidha huecuana mahue biame, manutaidha huecuana. Pamapa cristiano cuana sa manu taji Adán chenu ja Tata Diusu jei ataidha mahue jepuiti. Daja biame, cristiano cuana eid'e puenita cua, Cristo ja Tata Diusu jei ataidha jepuiti. <sup>15</sup> Beju Adán chenu da equene deja juchaji puidha. Tu jepuiti cristiano cuana jucha pupiruidha. Da putsu, Adán chenu nime pamapa cristiano cuana sa manu taji jucha jepuiti. Jesucristo mu equene deja nimebutsepi, jucha mahue puina. Tu jepuiti jucuada cristiano cuana Diusu ja eperdonatayu, mesa jaibunebati da Adán chenu sa jucha madhaji quitaita ebia su aida, tucheda saida putsu. <sup>16</sup> Adán chenu piada sa jucha jepuiti cristiano cuana sa matsejiji putsu, manu taji. Cristo jepuiti mu Diusu ja dueji juchaji cuana cha d'ejí su ame hue yatayu. Nimebutsepi yatayu huecuana. <sup>17</sup> Adán chenu quitaita sa jucha jepuiti pamapa cristiano cuana sa manu taji biame, Diusu ja cristiano cuana cha eid'e ameeni yata Jesucristo jepuiti. Diusu ja nimebutsepi yatani huecuana, Cristo peje su jei eputa huecuana su.

<sup>18</sup> Adán chenu ja jucha ataidha putsu, pamapa cristiano cuana sa matsejiji pu taji. Daja biame, Cristo curusu su manuana jepuiti, eid'e puenita cua huecuana, Diusu ja nimebutsepi yatani huecuana putsu. <sup>19</sup> Daja huecha Adán chenu ja Diusu jei ataidha mahue putsu, pamapa cristiano cuana da juchaji eputani. Daja biame, Cristo ja Tata Diusu jei atana putsu, dueji cristiano cuana nimebutsepi puta cua. <sup>20</sup> Beju Moisés chenu sa jacuatsasiati cuana ja cristiano cuana da juchaji ebametani. Da su cristiano cuana ebia su juchaji eputani biame, tuna neje Diusu sa jaibunebati cuana ebia su yani jucha cuana edhipa puji. <sup>21</sup> Equene jucha ja cristiano cuana manuametaína biame, jahue Diusu sa jaibunebati cuana jepuiti cristiano cuana eid'e puenita cua. Beju Diusu ja nimebutsepi yatani huecuana, ahua Echua Puji Jesucristo peje su jei eputa huecuana su.

## 6

*Ecuaneda eid'e, nimeeichacua Cristo neje dunejiji yani putsu, jucha mahue puniuneti taji*

<sup>1</sup> Beju juchaji cuana Diosu ja ebia su eibunebatani. ¿Ai daja putsu, ai ecuaneda jucha adera cua bata? <sup>2</sup> Aimue ecuaneseda jucha a taji mahue. Ecuaneda Cristo neje tupupai manuana pu cua nime putsu, aimue ecuaneseda jucha adera taji mahue. Da su, ¿ai ecuaneda jucha a cua bata, ecuaneda Cristo neje tupupai manujiji pu cua nime putsu? <sup>3</sup> ¿Bue mahue jia maida micuaneda pamapa ecuaneda Cristo neje dunejiji yani putsu, ecuaneda tu neje tupupai manuana pu cua nime? <sup>4</sup> Tu neje tupupai ecuaneda sepulcro su huananubiajiji pu cua nime, tu neje dunejiji putsu. Da su beju cuaja Diosu ja mesa tucheda neje Cristo id'emetaibana nime, daja ecuaneda di tu neje tupupai id'emetaibana pu cua nime. Da putsu, ecuaneseda jucha mahue puniuneti taji, Diosu ja ecua nimeeichacua atana putsu.

<sup>5</sup> Diosu ja ecua Cristo neje dunemetana. Tu neje tupupai curusu su ecua manuametana pu cua nime. Beju curusu su ecuaneda manuana pu cua nime putsu, cuaja tueda id'eibana nime, daja ecuaneda di neicha eid'eyu. <sup>6</sup> Bahue ecuaneda Tata Diosu ja ecua Cristo neje tupupai curusu su tatatana pu cua nime. Daja Diosu ja atana ecua sa ai utsatada madhada cuana etaitanamepe puji. Da putsu, aimue ecuaneda jucha sa eme su yani mahue. <sup>7</sup> Beju ecuaneda d'eji su jucha sa eme jenetia, curusu su Cristo neje tupupai manuana pu cua nime putsu. <sup>8</sup> Ahua ecuaneda daja tu neje tupupai curusu su manuana pu cua nime su, da su ecuaneda tu neje cielo su yanienitiyu. <sup>9</sup> Daja huecha Cristo id'eibana putsu, aimue detse beju neicha manu cua mahue, manuja aimue tueda pishitiata cua mahue beju putsu. <sup>10</sup> Tueda mu piada nuati hue manuana ecua sa jucha cuana jepuiti. Id'eyu putsu, Diosu sa puji beju eid'e epuani. <sup>11</sup> Da su micuaneda ecua sa Echua Puji Jesucristo neje dunejiji yani putsu, aimue micuaneseda jucha a taji mahue. Diosu sa puji bahui eid'e pu taji.

<sup>12</sup> Be mepishitiametiji jucha cuana neje. Be ai utsatada madhada cuana meaji. <sup>13</sup> Be equita neje jucha meaji, ai madhada cuana a putsu. Memenajatiatique Diosu peje su tusa ai saida cuana bahui ya puji, tuahueda micuana nimeeichacua, eid'e ametana putsu. <sup>14</sup> Beju aimue jucha ja micuana epishitiametani mahue, Diosu ja micuana d'eji su atana mesa jaibunebati cuana jepuiti. Da putsu, aimue jacuatsasiati cuana ja micuana matseta cua mahue.

*Cristo peje su jei eputani cuana da jucha sa eme jenetia d'eji su eputani*

<sup>15</sup> Edue cuana, bahue ecuaneda Diusu sa jacuatsasiati cuana ja jucha yatani cuana ematsetani. Daja biame, Diusu ja ecuana jacuatsasiati sa eme jenetia d'eji su atana mesa jaibunebati cuana jepuiti. ¿Ai daja putsu, ecuaneda jucha adera cua bata? <sup>16</sup> Bahue mepuque quebata ja emetse emebajata su, tueda da emetse sa eme su yani. Daja huecha ahua micuaneda jucha yadera su, jucha sa eme su micuaneda yaniti. Ahua daja micuaneda ya su, micuaneda emanueni. Daja biame, ahua micuaneda Diusu jei ya su, micuaneda tu peje su nimebutsepi epu. <sup>17</sup> Beju yama diusulupai Tata Diusu yainia micuaneda equene jucha sa eme su anina jucha bahui ya puji biame, jiahue mu aimue daja mahue, micuaneda Diusu ja micuana tiatana jabuetsuati cuana jei ana putsu. <sup>18</sup> Beju Diusu ja micuana jucha sa eme jenetia d'eji su atana. Mesa eme su micuana ichatana ai saida, butsepi cuana bahui ya puji. <sup>19</sup> (Beju shanapata saida mimi cuana neje yama micuana equisainia, aimue micuaneda tueda ai cuana eshanapaeninia mahue putsu.) Edue cuana, cuaja equene micuaneda jucha sa eme su jamenajatiatiana nime ai madhada cuana bahui ya puji, daja jiahue Diusu peje su memenajatiatique mesa ai saida, butsepi cuana bahui ya puji. Daja a putsu, micuaneda da Diusu sa emebajaji saida cuana epu.

<sup>20</sup> Beju micuaneda jucha sa eme su puniunetina su, aimue ai butsepi cuana aja aina mahue. <sup>21</sup> ¿Ai puji saida ni da micuaneda tueda bidhutada ai madhada cuana aina? Tueda ai madhada cuana ja etse manu su bahui edusutani. <sup>22</sup> Beju jiahue Diusu ja micuana jucha sa eme jenetia d'eji su atana. Mesa eme su quitaita micuana ichatana micuaneda Diusu sa emebajaji saida epu puji. Daja a putsu, cielo su micuaneda eid'e yanienitiyu. <sup>23</sup> Jucha jepuiti pamapa cristiano cuana sa manu taji. Daja biame, Diusu ja cha eid'e ameeniyu yata huecuana, ahua ecuana sa Echua Puji Jesucristo peje su jei eputa su.

## 7

*Cristo peje su jei eputani cuana da jacuatsasiati cuana sa eme jenetia d'eji su eputani*

<sup>1</sup> Edue cuana, micuaneda Moisés chenu sa jacuatsasiati cuana eshanapainia. Tueda jacuatsasiati cuana da eid'e cuana sa puji bahui. Aimue manujiji cuana sa puji mahue. <sup>2</sup> Daja huecha butseji cuana. Epuna ahueji sa yahue neje ani taji yahue emanu teje. Ahua yahue emanu su, da su epuna d'eji su epu pia deja neje yahueti puji. <sup>3</sup> Ahua tueda epuna

mesa yahue eid'e biame, pia deja neje equinati su, jucha aida epu jacuatsasiati butse su. Ahua mesa yahue emanu su, ahua pia deja neje yahueti su, da su beju aimue jucha aida epu mahue jacuatsasiati butse su.

<sup>4</sup> Edue cuana, daja huecha micuaneda. Cristo neje tupupai micuaneda curusu su manwana pu cua nime putsu, da su d'eji su epuani jacuatsasiati cuana sa eme jenetia. Micuaneda beju Cristo sa puji. Cristo eid'e pujiji neje dunejiji yani Diusu sa ai saida cuana bahui ya puji. <sup>5</sup> Ecuana equene Cristo shanapaji mahue su, jacuatsasiati cuana sa eme su anina su, pamapa ai utsatada madhada cuana aina. Tueda ai madhada cuana ja ecuaana emanu su dusutaina. <sup>6</sup> Jiahue mu aimue ecuaneda jacuatsasiati cuana sa eme su yani mahue, Cristo neje tupupai ecuaneda manwana pu cua nime putsu. Aimue jiahue ecuaneda Diusu emebajainia mahue, jacuatsasiati edhi cuana a putsu. Jiahue mu ecuaneda nimeeichacua, eid'e putsu, Espiritu Santo sa tucheda neje Diusu emebajainia.

### *Jucha ja ema emadhatani*

<sup>7</sup> Edue cuana, aimue ema jacuatsasiati cuana madhada hue epuani su mahue. Tueda jacuatsasiati cuana da saida, butsepi, ecuaneda juchaji eshanapametani putsu. Beju piada jabahuequisati yama micuana etia. Uja Diusu sa jacuatsasiati epuani: "Pia sa ai cuana be utsatabaji." Ahua daja yama eutsataba su, da su ema juchaji epu. Ahua tueda jacuatsasiati aimue pu cua su, da su, ¿ai yama shanapa cua bata, ema jucha epuani, ahua mahue? <sup>8</sup> Yama jacuatsasiati cuana daja saida eshanapaeninia biame, daja hue jucha aja yainia. Ahua jacuatsasiati cuana aimue pu cua su, da su aimue ema juchaji pu cua mahue. <sup>9</sup> Beju yama jacuatsasiati cuana shanapaji mahue su, ema jucha mahue jabatiana. Jucha a putsu, aimue ema pibapibana mahue, jacuatsasiati cuana mue yama shanapa putsu. Tueda jacuatsasiati cuana yama beju shanapana su, ye chu ema juchaji jabatiana. Cuati castigo su quema puti taji yama shanapana, Diusu sa jacuatsasiati cuana mue yama ape putsu. <sup>10</sup> Tueda jacuatsasiati saida cuana da eid'e eni jaametiji biame, ema matsetana. <sup>11</sup> Jucha ja mu ema baseatana. Jacuatsasiati cuana da saida biame, ema ematsetani jucha jepuiti.

<sup>12</sup> Daja biame, jacuatsasiati cuana da saida, butsepi. <sup>13</sup> ¿Ai da, da su jacuatsasiati saida, butsepi cuana ja ema madhatiatana bata? Jucha ja mu ema madhatiatana. Ema juchaji putsu, jacuatsasiati cuana ja ema matsetana. Da su jacuatsasiati cuana ja jucha cuana da ebia su madhada eni ecuaana ebametani.



<sup>14</sup> Ema bahue Diusu sa jacuatsasiati cuana da saida, butsepi, Espíritu Santo ja tiatana putsu. Quema utsatada cuana mu madhada hue, ema jucha sa eme su yani putsu. <sup>15</sup> Mue shanapa cuaja su daja ema epuani. Yama ai saida cuana aja yainia biame, cuaja a taji mahue yama ebainia. Ai madhada cuana bahui yama atasaida ebainia ya puji, yama daja aja yainia mahue biame. <sup>16</sup> Beju bahue ema yama yainia ai cuana da madhada hue. Daja huecha Diusu sa jacuatsasiati cuana saida, butsepi. Tueda jacuatsasiati cuana yama aimue yainia mahue putsu, ebia su ema epibapibani. <sup>17</sup> Beju cuaja pishitiame taji mahue yama ebainia jucha. Tueda jucha ja ema ai madhada cuana yametani. <sup>18-19</sup> Ema peje su mu mue ai saida biame yani mahue. Ai saida cuana aja yama yainia biame, cuaja a taji mahue yama ebainia. Ai madhada cuana yama aja mahue yainia biame, tueda bahui yama yainia. <sup>20</sup> Da su jucha ja mu ema daja ai madhada cuana yametani, aimue daja yama aja yainia mahue biame.

<sup>21</sup> Da su beju yama ai saida cuana aja yainia su, ai madhada cuana yainia. <sup>22-23</sup> Yama Diusu sa jacuatsasiati cuana pamapa muesumu neje aja yainia biame, quema equita sa utsatada madhada cuana ja ema pishitiame putsu, jucha sa eme su eichatani.

<sup>24</sup> ¡Aba ema! ¿Aiya jia ema d'eji su ata cua tueda manu su edusutani ai madhada cuana jenetia? <sup>25</sup> Daja biame, yama Diusu diusulupai yainia, tuahueda bahui tueda ai madhada cuana jenetia ema d'eji su atana putsu, Echua Puji Jesucristo jepuiti. Da su Diusu sa ai tsada cuana bahui ebia su yama aja yainia biame, quema equita sa ai utsatada madhada cuana ja ema jucha ameja yatani.

## 8

### *Espíritu Santo sa tucheda neje puniuneti taji*

<sup>1-4</sup> Da su beju aimue Diusu ja

Cristo neje dunejiji yani cuana ematsetayu mahue. Eid'e jaemetiji Espíritu Santo ja ema manu jenetia d'eji su atana. Daja huecha jucha sa eme jenetia ema Cristo neje dunejiji yani putsu. Jacuatsasiati cuana ecuaneda cuaja a taji mahue ebainia, jucha sa eme su yani putsu. Daja biame, Diusu ja mu ecuana d'eji su atana. Mesa Ebacua Jesucristo beitutana ye mundo su deja equita pu putsu, ecuana sa jucha jepuiti emanu puji. Da su Cristo manuana putsu, Diusu ja ecuana jucha sa eme jenetia d'eji su atana. Jiahue ecuaneda Diusu sa jacuatsasiati cuana a cua, ahua Espíritu Santo neje ecuaneda epuniuneti su, ahua ai utsatada madhada cuana ecuaneda ya mahue su.

<sup>5</sup> Quebata cuana ja mesa ai utsatada madhada cuana bahui aja yatani su, da huapiba bahui eputani. Daja huecha quebata cuana Espíritu Santo neje epuniunetitani su, ai saida cuana huapiba bahui eputani. <sup>6</sup> Quebata cuana tueda ai madhada cuana huapiba bahui eputa su, emanuenita huecuana. Daja huecha quebata cuana Espíritu Santo sa ai cuana huapiba bahui eputa su, Diusu ja eid'e ameeni putsu, enimepijajametayu huecuana. <sup>7-8</sup> Beju quebata cuana ai utsatada madhada cuana huapiba bahui eputa su, Diusu neje emajaititani huecuana. Aimue Diusu sa jacuatsasiati saida cuana aja yatani huecuana mahue. Tueda jacuatsasiati cuana aimue cuaja a taji mahue ebatani, Diusu neje emajaitiani putsu. Aimue Diusu beidaji ameta cua huecuana mahue.

<sup>9</sup> Edue cuana, aimue micuaneda mu micuana sa ai utsatada madhada cuana sa eme su yani mahue. Micuaneda da nimeeichacua, Espíritu Santo neje epuniunetiani putsu. Quebata sa aimue Espíritu Santo mesa muesumu su yani mahue su, aimue tueda Cristo sa puji mahue. <sup>10</sup> Micuana sa equita cuana jucha jepuiti emanu biame, micuana sa enid'u eid'e epu, Diusu ja micuana Cristo jepuiti nimebutsepi atana putsu, daja huecha Cristo micuana sa muesumu su yani putsu. <sup>11</sup> Cuaja Diusu, Espíritu Santo detse ja Jesús manujiji cuana duju jenetia id'emetaibana nime, daja micuana sa equita cuana manujiji biame neicha eid'e yameenitayu, Espíritu Santo micuana sa muesumu su yani putsu.

<sup>12</sup> Da su edue cuana, aimue ecuana sa ai utsatada madhada cuana a taji mahue. <sup>13</sup> Ahua micuaneda tueda ai utsatada madhada cuana bahui ya su, micuaneda emanueni. Ahua micuaneda Espíritu Santo sa tucheda neje tueda ai utsatada madhada cuana epishitiame su, micuaneda eid'e epueni.

<sup>14</sup> Pamapa Espíritu Santo ja ehuidusutani cuana da Diusu sa ebacua cuana. <sup>15</sup> Edue cuana, cuaja esclavo cuana emetse butse su iyuame neje puniunetitana nime, daja micuaneda equene puniunetina Diusu butse su. Jiahue beju be iyuame mepuji equene micuaneda puina nime su, Diusu ja micuana mesa Espíritu Santo tucheda tiatana putsu. Tueda Espíritu ja ecuana Diusu sa ebacua quitaita cuana atana. Jiahue ecuana Diusu, "Tata", yametani. <sup>16</sup> Tuahueda quitaita ecuana eshanapameenitani ecuaneda Diusu sa ebacua cuana. <sup>17</sup> Tueda ecuana sa Tata putsu, pamapa tusa ai cuana ecuaneseda cama. Diusu ja mesa Ebacua Jesucristo etiatani ai cuana da ecuaneseda di epuani, ecuaneda Cristo neje dunejiji yani putsu. Ahua ecuaneda Cristo neje cielo su anienitija su, ahua tu neje ecuatsasia puja su, da su mundo su tu sufri puana nime ecuaneseda di sufri pu taji.

<sup>18</sup> Edue cuana, ema epibatiani, ecuaneda cielo su ecuinati su, ye mundo sa sufrimiento cuana mue ai biame pu cua nime epu, dapia ecuaneda Diusu neje ebia su beidaji epueni putsu. <sup>19</sup> Pamapa Diusu ja ai ataidha cuana ja cuaja pamapa ai cuana eichacua yatayu eid'uatani, mesa ebacua cuana enetianametayu tsine su. Da tsine su Diusu ja pamapa mesa ai ataidha cuana di neicha eichacua yatayu. <sup>20</sup> Pamapa Diusu ja ai ataidha cuana Diusu ja matsetaidha jucha jepuiti. Daja biame, janimeid'uati cuana tiatana. <sup>21</sup> Diusu ja pamapa mesa ebacua cuana enetianametayu tsine su pamapa ai ataidha cuana di d'oji su eichacua yatayu. Pamapa mesa ebacua cuana yatayu nime, daja pamapa ai ataidha cuana ai madhada cuana jenetia d'oji su eichacua yaenitayu. Da su pamapa su Diusu sa hueda su yanienititayu. <sup>22</sup> Bahue ecuaneda cuaja epuna nedaji puja epuani su, jubida enebatiani nime, daja ai ataidha cuana jubida enebatitani, d'oji su eichacua puja putsu. <sup>23</sup> Ecuaneda di ai ataidha cuana nime ebia su eutsatabainia d'oji su eichacua epu puji, Espiritu Santo ja ecuana eshanapametani putsu. Diusu ja ecuana equita eichacua tia putsu, ecuana cielo su mesa ebacua nime ebat-suta puji ecuaneda eid'uatiani. <sup>24-25</sup> Da puji ecuaneda daja hue Diusu peje su enimeid'uatiani. Beju ecuaneda jiahue d'oji su eni mahue tsuhu putsu, Diusu peje su ecuaneseda janimeid'uati taji, ecuana eid'emetayu teje. Da putsu, paciencia neje ecuaneda Diusu eid'uainia tuahueda ecuana d'oji su yaenita puji.

<sup>26</sup> Edue cuana, ecuaneda nimepishihue biame, Espiritu Santo ecuana etsahuatani. Aimue ecuaneda Diusu mitsu bue mahue biame, Espiritu ja ecuana etsahuatani Diusu emitsu puji. Tueda ecuana sa muesumu su yani. Tuahueda quitaita Diusu ebajatani ecuaneseda puji. Mimi mahue janasiati neje bahui Diusu ebajatani ecuaneseda puji, muesumu su yani putsu. <sup>27</sup> Beju Tata Diusu ja pamapa ecuana sa piba cuana eshanapatani. Daja huecha Espiritu Santo sa janasiati jabajati cuana eshanapaenitani. Tueda Espiritu Santo ja ecuaneseda puji Tata Diusu ebajatani, cuaja tusa tsada epuani batame.

### *Cristo ja ecuana epishitiametsahuatani*

<sup>28</sup> Edue cuana, bahue ecuaneda pamapa cuaja ecuana epuani cuana ecuaneseda puji saida epu, ecuaneda Diusu ibuneda ebainia putsu, daja huecha tuahueda ecuana dharetana putsu mesa ai tsada cuana ya puji. <sup>29</sup> Beju pamapa ai cuana epupiruji su, Diusu bahue puidha aidhe cuana tu peje su jei eputa. Cuaja mesa ebacua Jesucristo nime paputa puji dharetaidha huecuana. Cristo da Diusu sa equene Ebacua. Tije beju tu peje su jei eputani cuana Cristo nime Diusu ja

ebacua cuana yatayu. <sup>30</sup> Beju tueda mesa dharejiji cuana Diusu ja ihuatana tu peje su jei paputa huecuana puji. Da su jei putana su, batsutana huecuana, nimebutsepia putsu. Huaraji aida, tucheda yata huecuana, mesa ebacua cuana putsu.

<sup>31</sup> Edue cuana, mepibaenique tueda ai saida cuana. Diusu ecuana neje yani putsu, ¿aiya biame detse ecuana pishiti-ameta cua? <sup>32</sup> Diusu ja ecuaneseda puji mesa piada quita ebacua emanu puji menajatiatana putsu, ¿aimue jia maida ecuana pamapa ai saida cuana etiata mahue? <sup>33</sup> Aimue detse aiya biame Diusu sa dharejiji cuana tuaquisata cua mahue, Diusu ja nimebutsepi atana huecuana putsu. <sup>34</sup> Aimue detse aiya biame matseta cua huecuana mahue, Cristo tuneseda puji manuana putsu. Manu putsu, manujiji cuana duju jenetia netianaibana. Jiahue cielo su Tata Diusu sa bai eni bene yani. Dapia tuahueda Tata Diusu ebajatani mesa dharejiji cuana sa puji. <sup>35</sup> Cristo ja ecuana ebia su ibuneda ebatani. Ahua ecuaneda sufri epu, enime cuana ecuana sa paani, ecuana tijetije paata huecuana, ai dia taji ecuana sa pahueiti, daja huecha ejud'uji pahueiti, rejada su ecuaneda papuniuneti, ecuana manumeja paata huecuana, bahue ecuaneda tueda ai cuana su ecuaneda sufri papu biame, Cristo ja ecuana daja hue ibuneda ebaderata. <sup>36</sup> Uja derejiji yani tueda ai cuana jepuiti:

Mi jepuiti pamapa tsine ecuanaju manu su hue epuani.

Ecuanaju da emanuame puji huisha cuana nime. <sup>37</sup> Cristo ja ecuana etsahuata pamapa tueda ai cuana epishitiame puji, ecuana ebia su ibuneda ebatani putsu. <sup>38-39</sup> Bahue saida ema Diusu ja ecuana daja hue ibuneda ebaderata. Ecuaneda eid'e ahua emanu su, aimue Diusu ja ecuana ibuneda ebarijita mahue. Aimue ángel, einid'u tucheda cuana, jiahue ejaitianani ai cuana, daja huecha epusiu ai cuana, baqui bauda, dueda eni su ai cuana, pia ai papu, tueda ai cuana ja Diusu sa ecuana neje jaibunebati cuana arijiameta cua mahue, ecuaneda Cristo neje dunejiji yani putsu.

## 9

### *Diusu ja judío cuana dharetaidha*

<sup>1</sup> Edue cuana, Cristo bahue yama micuana butsepi equisainia. Daja huecha Espíritu Santo bahue aimue ema bid'umimi epuani mahue. <sup>2</sup> Pamapa hora su ebia su ema epibapibani judío cuana jepuiti. <sup>3</sup> Tsada quema pamapa tuneda Cristo peje su jei paputa puji. Ema quitaita detse jamenajatiati cua tuna sa eturuca matsejiji epu puji, d'eji

su paputa huecuana puji. Daja ema epu, tuneda quema judío edue cuana putsu. <sup>4</sup> Beju tuneda da judío cuana. Biahua tiempo Diusu ja dharetaidha huecuana mesa dharejiji cristiano cuana paputa huecuana puji. Tuna peje su aida jabametidha. Tuna neje huamahuama jamitsuti jatiatitaidha huecuana. Mesa jacuatsasiati cuana tiataidha huecuana. Cuaja tu mitsutsuame buetsuataidha huecuana. Mesa jamitsuti saida tiataidha huecuana. <sup>5</sup> Abraham chenu sa ebacua cuana eputani huecuana. Cristo di judío deja bataji puina. Tueda da pamapa ai cuana sa huaraji aida, Diusu putsu. Pamapa cristiano cuana ja tueda pamitsutsuaenita. Daja papu.

<sup>6-7</sup> ¿Ai da Diusu ja mesa jamitsuti mue ape atana bata? Mesa jamitsuti cuana da mesa dharejiji cuana sa puji bahui. Aimue pamapa israelita cuana Diusu sa ene quita dharejiji cuana mahue, Abraham chenu sa familia jenetia biame. Biahua tiempo Diusu ja Abraham chenu uja quisataidha: “Mique ebacua Isaac jepuiti bahui mique ene quita familia chenu bataji eputa.” <sup>8</sup> Isaac da Abraham chenu sa ebacua bataji puidha, Diusu ja mesa jamitsuti tiataidha jepuiti. Daja huecha Diusu sa jamitsuti cuana su jei eputani cuana da Diusu sa ebacua cuana eputani. <sup>9</sup> Uja Diusu ja Abraham chenu jamitsuti tiataidha: “Sara sa nedaji pu taji tsine cuana beju su, ema esiapati.”

<sup>10</sup> Tueda ebacua Isaac banime puidha. Isaac Rebeca neje jahuanetidha su, pere mesa ebacua bataji puidha. Tuatseda Esaú, Jacob banime puidha. Esaú da equene bataji puidha. Tije puji Jacob. <sup>11-13</sup> Tuatseda bataji puji mahue su, Diusu ja Jacob dharetaidha tuseda puji. Aimue Esaú mu dhare tueda da edue edhi puji biame. ¿Jucuaja su jia Diusu ja daja dharetaidha? ¿Ai madhada Esaú ja ataidha bata? ¿Ai saida Jacob ja ataidha bata? Aimue detse daja pu cua mahue, ai mahue tsuhu puina tse putsu. Beju Diusu ja Jacob bahui dharetaidha, mesa tsada puidha putsu. Bataji puji mahue tse su, Diusu ja Rebeca uja ataidha: “Beju Jacob tije bataji epu biame, Esaú da tusa emebajaji epu.” Beju uja deremetaidha Diusu ja mesa quirica su: “Yama Jacob ibuneda bana. Esaú mu mahue.”

<sup>14</sup> ¿Ai daja ataidha putsu, Diusu butsepi mahue bata? Beju tuahueda cuaja mesa tsada mahui yatani. <sup>15</sup> Moisés chenu uja ataidha: “Quebata quema tsada epuani, beju tueda yama eibunebata.” <sup>16</sup> Da su Diusu sa tsada bahui putsu, cristiano cuana eibunebata. Aimue tuna sa tsada, ai saida ajiji cuana jepuiti eibunebata huecuana mahue. <sup>17</sup> Uja Diusu ja Egipto yahua sa echua puji ataidha: “Quema tucheda cristiano cuana ebani puji, yama mi echua puji ichana. Ai nimetiuda

cuana neje yama mi butsepiameana jepuiti, cristiano cuana ja quema tucheda ba putsu, quema ebani di eshanapata huecuana.” <sup>18</sup> Da putsu, bahue ecuaneda Diosu ja cuaja mesa tsada epuani batame cristiano cuana yatani. Piada piada cuana eibunebatani. Pia cuana mu muesumu tadada yametani.

<sup>19</sup> Da su cuapuitime piada piada micuaneda uja pu cua: “¿Jucuaja su Diosu ja cristiano cuana ematsetani, tuahueda quitaita daja yametani huecuana putsu? Aimue detse aiya biame Diosu mimijeutsuta cua mahue.” <sup>20</sup> Be daja mepibatiji. Micuaneda cristiano cuana bahui putsu, aimue micuaneseda Diosu mimijeutsu taji mahue. ¿Ai eicha jutu ja tu muduji, “¿Jucuaja su miada ema uja aitia?” yata bata? <sup>21</sup> Cuaja eicha jutu muduji sa tsada batame daja yatani. Ahua tuahueda rutu jenetia dhepe ania chidi misha bia su eicha puji aja su, daja da yata. Daja huecha ahua tueda rutu quitaita jenetia jutu ania chidi mahue cuati su eicha puji aja su, daja da yata. Cuaja mesa tsada batame, daja da yata.

<sup>22</sup> Diosu ja ai madhada yatani cuana paciencia aida neje tucheda putsu, ahua castigaja huecuana su, daja tucheda neje mesa castiga taji. <sup>23</sup> Equene jenetia ecuana dharetaidha mesa jaibunebati aida cuana ebameti puji. Ecuana da rutu jenetia dhepe ania ajiji nime. Diosu sa tsada tu neje cielo su yanieniti puji. <sup>24</sup> Edue cuana, ecuaneda da Diosu sa jadhareti cuana. Ecuana dharetana judío, judío mahue cuana duju jenetia tuseda puji. <sup>25</sup> Uja Diosu ja profeta Oseas chenu deremetaidha mesa quirica su:

Edhare yama pia cristiano cuana judío mahue cuana.

Quema dharejiji cuana putaina huecuana mahue biame, beju quema dharejiji cuana eputa.

Quema ibuneda putaina huecuana mahue biame, quema ibuneda cuana eputa.

<sup>26</sup> Judío eputani mahue huecuana biame, quema dharejiji cuana eputa.

<sup>27-28</sup> Beju profeta Isaías chenu ja uja deretaidha judío cuana jepuiti: “Judío cuana da ebia su dueji jutujutuji nime biame, quejucua chidi hue tuneda d'ejí su eputa, Diosu ja jubida neje tipeida ecastigatayu huecuana putsu.” <sup>29</sup> Neicha uja Isaías chenu quitaita ja deretaidha judío cuana jepuiti:

Diosu tucheda ja aimue judío cuana manuamepetaidha mahue, cuaja Sodoma, Gomorra ejude detse su aniji cuana ataidha nime.

Mesa jaibunebati jepuiti piada piada judío cuana d'ejí su ataidha.

*Judío cuana ja Cristo jepuiti quisa saida cuana tsada mahue batana*

<sup>30</sup> Edue cuana, bahue mepuenique, judío mahue cuana ja aimue Diusu chacutaina mahue biame, Diusu ja enimebutsepiata huecuana, ahua tu peje su enimetucheatita huecuana su. <sup>31</sup> Judío cuana mu nimebutsepi puja putana biame, mue teje atana huecuana, Diusu sa jacuatsasiati cuana bahui aja ataina huecuana putsu. Tueda jacuatsasiati cuana mue ape atana huecuana putsu, aimue nimebutsepi putana huecuana mahue. <sup>32</sup> Diusu peje su janimetucheatija mahue nimebutsepi epu puji. Jacuatsasiati cuana bahui a putsu, nimebutsepi puja epudhaatani huecuana. Da su epitsatitani huecuana. <sup>33</sup> Uja derejiji yani tuna jepuiti Diusu sa quirica su:

Yama Jerusalén ejude su Cristo huaraji eichati.

Tu jei aja mahue yatani cuana da deja yaseneti je, tumu su jahuatsitud'iti putsu, eduiniani nime.

Daja Cristo neje eduininita huecuana, tu jei aja mahue putsu.

Daja biame, tu jei yatani cuana mu tuahueda ene quita d'eji su yaenitayu.

## 10

<sup>1</sup> Edue cuana, quema tsada pamapa judío cuana d'eji su paputa. Da puji yama Diusu jubida ebajainia pamapa hora su. <sup>2-3</sup> Bahue ema Diusu ebia su mebajaja yatani huecuana. Daja biame, cuaja Diusu ja cristiano cuana enimbutsepiatani aimue eshanapatani huecuana mahue. Aimue Cristo peje su jei puja eputani huecuana mahue Diusu ja panimebutsepiata huecuana puji. Tuneda quitaita hue janimebutsepiatija, Diusu sa jacuatsasiati cuana bahui a putsu. <sup>4</sup> Cristo ja mu pamapa Moisés chenu sa jacuatsasiati cuana saida apetana putsu, aimue detse etse jacuatsasiati cuana a cua mahue nimebutsepi epu puji. Jiahue tu peje su jei pu putsu bahui, etse nimebutsepi pu cua.

<sup>5</sup> Edue cuana, biahua tiempo Moisés chenu ja uja dere-  
taidha tueda ai cuana jepuiti: “Ahua quebata ja Diusu sa jacuatsasiati cuana aja yatani su, tuseda pamapa quitana ape taji nimebutsepi epu puji.” <sup>6-7</sup> Beju jiahue yama micuana saida equisa. Atasaida nimebutsepi epu puji. Cristo peje su jei pu putsu bahui, micuaneda nimebutsepi pu cua. <sup>8</sup> Be daja hue ai saida cuana bahui aja meaderaji Cristo etejeti puji, tueda mu micuana naja su yani putsu. Diusu sa quisa saida cuana ecuanaju quisaquisa epuani su, jei pu putsu bahui, micuaneda nimebutsepi pu cua. <sup>9-10</sup> Uja ecuanaju quisaquisa epuani: Ahua quebata cristiano cuana butse su, “Cristo da quema Echua Puji”, epu su, ahua Diusu ja Cristo id'emetana

jei epu su, da su tueda d'ejí su epu. Daja huecha Diusu ja tueda enimebutsepiatayu.

11 Uja Diusu sa quirica su derejiji yani: “Quebata tu peje su jei epu su, ene quita d'ejí su epueniyu.” 12 Beju Cristo ja judío, judío mahue cuana tupupai ebatani, tueda da pamapa sa Echua Puji aida putsu. Aiya papu tu ebajata su, tuahueda mesa jaibunebati cuana etiata. 13 Uja derejiji yani: “Pamapa Echua Puji sa ebani su Diusu ebajatani cuana Diusu ja d'ejí su yata.” 14 Daja biame, ¿cuaja ni da Diusu bajame ata cua huecuana, Echua Puji Jesucristo peje su jei puji mahue putsu? Daja huecha, ¿cuaja ni da tu peje su jei pume puta cua huecuana, tusa quisa saida cuana id'abaji mahue putsu? 15 Daja huecha, ¿cuaja ni da aiya quisame ata cua huecuana, ahua Diusu ja mue beitu su? Uja Diusu sa quirica su derejiji yani: “Saida chidi Diusu sa quisaquisa puji cuana, Diusu sa quisa saida cuana quisaquisa eputaniuneti huecuana putsu.”

16 Beju aimue pamapa jei putana mahue Diusu sa quisa saida cuana su. Profeta Isaías chenu ja uja Diusu ataidha tueda ai cuana jepuiti: “Echua Puji, ¿quejucua cuana ja bahui ema jei atana, mique quisa saida cuana quisaquisa puana su?” 17 Da su beju cristiano cuana sa jei epu puji equene Cristo sa quisa saida cuana id'aba taji.

18 ¿Ai judío cuana ja Diusu sa quisa saida cuana mue id'aba bata?

Pamapa yahua je quepia tuna yanita je Diusu sa quisa saida cuana cuinatiana. 19 ¿Ai judío cuana ja Diusu sa quisa saida cuana mue shanapa bata? Biahua tiempo Moisés chenu ja Diusu sa quirica su deretaidha cuaja Diusu ja judío cuana ataidha. Uja Diusu ja ataidha huecuana, jei aja mahue ataidha huecuana putsu:

Micuaneda envidia epu, yama pia judío mahue cristiano cuana micuana sa eturuca eibuneba su.

Ema eshanapatani huecuana biame, quema dharejiji cristiano quitaita cuana eputa huecuana micuana sa eturuca.

Yama micuana eduininiame tuna jepuiti.

20 Daja huecha Isaías ja cuaja Diusu puidha uja deretaidha:

Judío mahue cuana ja ema mue chacu biame, ema tejetana huecuana.

Ema tuna peje su jabametiana, ema mue chacu huecuana biame.

21 Cuaja neicha Diusu puidha judío cuana jepuiti Isajas ja deretaidha uja: “Judío cuana ja mu aimue ema jei aja atana mahue, yama pamapa tsine ibuneda neje ihuana huecuana biame. Japibatadadatitana huecuana ema neje.”



# 11

## *Quejucua hue judío cuana d'ejí su eputa*

<sup>1</sup> ¿Aí Diosu ja mesa judío cristiano cuana jusiaichaenitana bata? Mepibaque, ema quitaita judío deja epuani biame, Diosu ja ema d'ejí su atana. Tata Abraham chenu da quema tata chenu. Ema da Benjamín sa familia jenetia.

<sup>2</sup> Aimue Diosu ja mesa judío cristiano cuana jusiaichaenitana mahue, tuahueda equene su dharetaidha huecuana putsu.

<sup>3</sup> Mepibaque profeta Elías chenu. Biahua tiempo tuahueda uja Diosu ataidha: “Echua Puji, ye judío cuana ja pamapa mique pia profeta cuana manuametana. Pamapa mique altar cuana di dajajamepetana huecuana. Beju ema bahui eid'e yani. Jiahue ema macha echacutani huecuana emanuame puji.”

<sup>4</sup> Da su Diosu ja tueda jeitsuataidha uja: “Beju quema mu yani siete mil deja cuana aimue Baal eimea mitsutsuajita mahue.”

<sup>5</sup> Daja huecha jiahue tsine. Yani beju quejucua hue Diosu ja mesa jaibunebati jepuiti dharetana.

<sup>6</sup> Da su bahue ecuaneda Diosu ja cristiano cuana edharetani mesa jaibunebati jepuiti bahui. Aimue mecuana sa ai saida ajiji cuana jepuiti edharetani huecuana mahue.

<sup>7</sup> Da su beju bahue ecuaneda aimue pamapa judío cuana ja Diosu tejetana mahue, Diosu ebia su chacutana huecuana biame. Quejucua cuana ja bahui Diosu tejetana. Pia cuana mu japibatadadatitana.

<sup>8</sup> Uja derejiji yani Diosu sa quirica su tuna jepuiti: “Diosu ja tuna sa piba teritana pashanapata huecuana mahue puji. Jiahue teje daja hue eputani huecuana.”

<sup>9</sup> Echua puji David chenu ja di uja deretaidha tuna jepuiti: Tuneseda pamapa ai saida cuana yani putsu, Diosu neje saida yani pepe eputani huecuana.

Daja hue pabaseaderatita huecuana.

Castigajiji paputa huecuana.

<sup>10</sup> Chamatani, eid'abatani huecuana biame, be pashanapata huecuana.

Mecuana sa sufrimiento cuana pupe bue mahue papu.

## *Judío mahue cuana Diosu ja d'ejí su atana*

<sup>11</sup> Edue cuana, aimue Diosu ja mesa judío cristiano cuana jusiaichaenitana mahue. Aimue dajajapetana huecuana mahue. Diosu jei aja mahue atana huecuana putsu, Diosu ja pamapa yahua cuana su aniji cristiano cuana eihuatani tu peje su jei paputa huecuana puji. Daja Diosu ja atana judío cristiano cuana tu peje su neicha pasiapatita huecuana puji, envidia pu putsu.

<sup>12</sup> Diosu ja pamapa yahua su aniji cristiano cuana mesa quisa saida cuana quisamepiru putsu, eibunebatani huecuana judío cuana ja jei aja mahue atana putsu. Daja biame, pamapa judío cuana Diosu jei yata su,

tuna jepuiti pamapa ye mundo su aniji cristiano cuana Diosu ja ebia su eibunebatayu, judío cuana Diosu jei atana putsu.

<sup>13</sup> Edue cuana, micuaneda da judío mahue cuana putsu, yama micuana saida pibameja yainia, Diosu ja ema micuana peje su beitutana mesa quisa saida cuana quisaquisa epu puji. <sup>14</sup> Daja yama yainia ba putsu, cuapuitime tuneda di d'ejí su puta cua Cristo peje su jei pu putsu, Diosu ja judío mahue cuana ebia su ibuneda ebatani bahue pu putsu. <sup>15</sup> Judío cuana ja Diosu jei aja mahue atana putsu, Diosu ja pamapa pia judío mahue cristiano cuana ihuatana tu peje su jei pu putsu, d'ejí su paputa huecuana puji. Da su judío cuana Cristo peje su jei eputa su, Diosu ja pamapa ye mundo su aniji cristiano cuana ebia su eibunebatayu. Tuneda emanu Diosu ja eid'e ametayu cua pu cua nime. <sup>16</sup> Equene Diosu ja Abraham chenu, tata chenu cuana dharetaidha. Da su pamapa tuna tije judío cuana di tuna nime Diosu sa dharejiji cuana eputa. Tueda da equi saida nime. Abraham chenu, tata chenu cuana da ed'au nime. Tije judío cuana equi nime. Ahua equi sa ed'au saida su, pamapa echa cuana di saida eputa.

<sup>17</sup> Beju judío cuana da echa cuana pu cua nime. Piada piada cuana Diosu ja dheutana, tu peje su jei puja mahue putana huecuana putsu. Micuaneda da pia echa cuana pu cua nime, judío mahue putsu. Diosu ja micuana tueda tu dheutana echa cuana sa eti jude su eturuca ribaichatana pu cua nime. Beju jahue Diosu ja micuana judío cuana neje dunemetana. Da su pamapa Diosu sa tuneseda puji ai saida cuana micuaneseda di. <sup>18</sup> Da putsu, be ebia su aida mebatiji pia judío echa nime dheutana cuana neje. Mepibaenitique, micuaneda da echa nime hue. Aimue micuaneda ed'au nime mahue. Ed'au ja echa cuana ebia su aida a putsu, eid'e yametani.

<sup>19</sup> Cuapuitime micuaneda ebia su aida jabati cua, Diosu ja micuana judío cuana sa eturuca ribaichatana putsu. <sup>20</sup> Beju Diosu ja dheutana huecuana, aimue tu peje su jei putana mahue putsu. Micuaneda ribaichatana tuna sa eturuca, micuaneda tu peje su jei puana putsu. Da putsu, nimemitsida mepuque Diosu peje su. Be ebia su aida mebatiji. <sup>21</sup> Cuaja Diosu ja judío cuana dheutana nime, daja huecha micuaneda di dheuta cua, ahua micuaneda tuna nime tu peje su jei puja mahue epu su. <sup>22</sup> Beju bahue ecuaneda Diosu da ebia su saida biame, tu jei aja mahue cuana jubida castiga bahue. Judío cuana jei puja mahue putana putsu, Diosu ja dheutana huecuana. Micuana neje mu ebia su saida puana, micuaneda tu peje su jei puana putsu. Ahua micuaneda Diosu peje su jei puderaja mahue su, tuahueda micuaneda di edheutayu. <sup>23</sup> Daja huecha dheutana judío cuana Diosu

ja neicha ribaichatayu cua, ahua neicha tu peje su jei eputa huecuana su. Daja ata cua Diusu ja, tuseda puji mu aimue ai biame atadhada mahue putsu. <sup>24</sup> Beju micuana batsutana tu neje dunejiji yaniti puji, aimue micuaneda tusa jadhareti judío cristiano cuana puana biame. Daja huecha dheutana judío cuana neicha eribaichatayu tuna sa equene eti jude su paanititayu huecuana puji.

*Judío cuana di Diusu ja d'oji su yatayu, judío mahue cuana sa jei pu taji tiempo epupe su*

<sup>25</sup> Edue cuana, be ebia su aida mebatiji. Bahue mepuque ye etsia quisa cuana: Judío cuana da quejucua tiempo puji aimue Cristo peje su jei eputani mahue judío mahue cuana sa jei pu taji tiempo epupe teje. <sup>26</sup> Da su jei pu taji tiempo epupe su, Diusu ja pamapa judío cuana d'oji su yatayu. Uja Diusu puidha mesa quirica su tueda ai cuana jepuiti:

Jerusalén ejude jenetia D'oji su Jaatiji ja ecuatsasiata.

Pamapa judío cuana sa ai madhada cuana emejemipeta.

<sup>27</sup> Tuna sa jucha cuana mejemipe putsu, quema jamitsuti eichacua yama etiayu huecuana.

<sup>28</sup> Jiahue mu judío cuana ja Diusu sa quisa saida cuana tsada mahue ebatani. Da putsu, jiahue Diusu ja mesa quisa saida cuana judío mahue cuana peje su equisametani tu peje su jei paputa huecuana puji. Daja biame, Diusu ja judío cuana daja hue ibunebainiame yatani, Abraham chenu peje jenetia huecuana putsu. <sup>29</sup> Beju Diusu ja pamapa mesa jamitsuti cuana yapetayu. Ai hora su biame judío cuana esetata mahue, Abraham chenu equene ihuataidha putsu. Judío cuana d'oji su ya jamitsuti tia putsu, daja yatayu huecuana. <sup>30</sup> Micuaneda equene Diusu jei aja mahue aina. Daja biame, jiahue Diusu ja micuana eibunebatani, judío cuana ja jei aja mahue atana putsu. <sup>31</sup> Daja huecha judío cuana ja Diusu jei aja mahue atana biame, Diusu ja neicha eibunebatayu huecuana, cuaja micuana jiahue eibunebatani nime. <sup>32</sup> Pamapa cristiano cuana a taji mahue Diusu ja batana putsu, ibunebatana huecuana.

<sup>33</sup> Beju Diusu da ebia su bahue eni. Pamapa ai cuana eshanapatani. Ecuana cuaja shanapa taji mahue mesa piba aida cuana. Tu yatani ai cuana ecuaneda cuaja shanapa taji mahue ebainia, tueda da ebia su aida putsu. <sup>34</sup> “¿Aidhe ni da bahue pu cua Diusu sa piba cuana? ¿Aiya ni da Diusu buetsuata cua? <sup>35-36</sup> Diusu sa mu aidhe sa jatsahuati tsada mahue. Aimue detse aiya biame ai tiata cua mahue Diusu tuahueda eturuca patiatu puji, pamapa ai cuana tu peje jenetia putsu.” Pamapa ai cuana beju eid'e, yanita tusa tucheda su

cama. Tuseda puji bahui pamapa ai cuana yani. ¡Gloria Tata Diosu papueni! Daja papu.

## 12

### *Cuaja Diosu sa dharejiji cuana puniuneti taji*

<sup>1</sup> Da su beju edue cuana, yama micuana jubida ebajainia daja hue memenajatiaderapetique Diosu peje su, tuahueda micuana ebia su ibunebatana putsu. Micuana sa equita cuana tuseda puji saida, ichaderajiji papu. Daja a putsu, micuaneda Diosu beidaji yame. Daja micuaneseda pu taji Diosu emitsutsua puji. <sup>2</sup> Be ye mundo sa ai puiti madhada cuana su mepuniunetiji. Nimeeichacua mepuque, Diosu peje su japibaturucati putsu. Daja pu putsu, micuaneda eshanapa cuaja Diosu sa tsada ya puji. Daja huecha madhada ahua saida micuaneda eshanapa ai saida cuana bahui ya puji.

<sup>3</sup> Beju Diosu ja ema ebia su ibuneba putsu, ema mesa quisaquisa puji ichatana. Da putsu, yama micuana jubida equisainia be ebia su aida mebatiji, Diosu ja metse su hue micuana sa tupu mesa tucheda tiatana putsu. Piba butsepi neje mepibatique cuaja Diosu ja metse su hue micuana tiatana. <sup>4</sup> Pamapa ecuaneda piada equita nime, huamahuama dunejiji yani putsu. Equita sa pamapa tsapiapiati ai cuana yani. Yani equita sa ebai, eme, eid'aja, ehuaitsi, muesumu. Daja da equita sa dueji ai cuana yani. Pamapa sa tsapiapiati mudu cuana yani. <sup>5</sup> Daja huecha ecuaneda di, Cristo sa equita nime putsu. Metse su hue ecuaneseda tsapiapiati ai mudu yani biame, piada hue ecuaneda.

<sup>6</sup> Ecuana sa tupu teje Diosu ja ecuana tsapiapiati ai mudu cuana tiatana tu emebaja puji, cuaja mesa tsada epuani batame. Da putsu, tueda mudu quitaita cuana ecuaneseda saida a taji Diosu sa puji. Ahua quebata Diosu ja quisaquisa puji ichatana su, tu etiatani quisa saida cuana tuseda edue cuana saida quisaquisa a taji. <sup>7</sup> Ahua quebata Diosu ja ilisha sa emebajaji ichatana su, tuseda puji saida pia cuana mebaja taji. Ahua quebata Diosu ja ebuetsuaji ichatana su, tuseda puji saida buetsua taji. <sup>8</sup> Ahua quebata Diosu ja pia cuana nimetucheameji ichatana su, daja saida paata. Chipilu etiatani cuana sa saida neje tia taji aimue eturuca einatsu puji mahue. Ehuidusuji cuana sa jarejati neje huidusu taji. Tsahuataja cuana etsahuaji cuana sa beidaji neje tsahua taji.

### *Cuaja jei eputani cuana sa puniuneti taji*

<sup>9</sup> Edue cuana, huamahuama ibuneda mebaenitique. Be tsada mebaji ai madhada cuana. Ai saida cuana bahui meaque. <sup>10</sup> Edue quitaita nime huamahuama ibuneda

mebatique. Meiyubatique huamahuama. Daja huecha huamahuama d'ejí metiatique.

<sup>11</sup> Be tunada mepuji. Echua Puji Jesucristo jubida memebajaque muesumu beidaji neje.

<sup>12</sup> Beidaji mepuque, Diusu peje su ebia su enimeid'uatiani putsu. Micuana tijetije yatani huecuana su, metucheatique. Be Cristo tije mearijiji. Daja hue Diusu memitsuderaque.

<sup>13</sup> Tsahuataja edue cuana metsahuaque. Saida mebatsuque micuana sa ete su ecuinatani cuana.

<sup>14</sup> Meibunebaque micuana neje madhada eputani cuana. Diusu mebajaque paibunebata huecuana puji. Be mimi madhada metiaji huecuana.

<sup>15</sup> Beidaji mepuque beidaji eputani cuana neje tupupai. Daja huecha mepaque eputani cuana neje.

<sup>16</sup> Saida neje huamahuama meanique. Be ebia su aida mebatiji. Nimemitsida cuana neje tupupai mepuniunetique. Be ebia su bahue eni mabatiji.

<sup>17</sup> Ahua pia cuana ja micuana madhada hue yatani su, be micuaneda di eturuca daja madhada meaji. Saida, butsepi neje cristiano cuana butse su mepuniunetique. <sup>18</sup> Saida meanipad'iichaque pamapa cristiano cuana neje. <sup>19</sup> Edue ibunedada cuana, be eturuca mebiahuanatiji. Diusu sa bahui eturuca a taji. Uja Diusu puidha mesa quirica su: "Yama bahui ecastigayu. Daja huecha yama bahui eturuca yayu."

<sup>20</sup> Neicha Diusu puidha uja: "Ahua mique majai edhemanuani su, mihuaque. Ahua jaid'itija su, id'imeque. Ahua daja saida miada ya su, tueda ebidhuame." <sup>21</sup> Be mepishitiametiji, ai madhada cuana eturuca a putsu. Ai madhada cuana mepishitiameque, ai saida cuana a putsu.

## 13

<sup>1</sup> Meiyubaque pamapa huaraji cuana, Diusu ja ichtana huecuana putsu. <sup>2</sup> Ahua quebata ja huaraji cuana jei aja mahue yatani su, tuahueda aimue Diusu jei aja mahue yatani pu cua nime, pamapa huaraji cuana Diusu ja ichtana putsu. Beju huaraji ja a taji mahue cuana bahui ecastigata. <sup>3</sup> Huaraji cuana da Diusu ja ejude inatsihuaji ichtana aimue saida yatani cuana iyuame yame puji mahue. Ai madhada yatani cuana bahui iyuame yame puji ichtana. Da putsu, ahua micuaneda ai saida cuana bahui ya su, aimue tuna neje eiyuati mahue. Ai saida micuaneda ya su, saida micuana etsabata huecuana. <sup>4</sup> Pamapa huaraji cuana da Diusu sa emebajaji cuana cristiano cuana einatsihua puji. Ahua micuaneda ai madhada cuana ya su, micuaneseda jaiyuati taji, huaraji cuana ja ene putsu ecastigata putsu. Da puji Diusu ja huaraji cuana ichtana. <sup>5</sup> Da putsu, micuaneseda

iyuba taji huecuana castigo einatsu puji mahue, daja huecha Diusu butse su saida, beidaji yaniti puji. <sup>6</sup> Da putsu, huaraji cuana micuaneseda tsahua taji, Diusu ja madhada aji cuana castigaji paputa puji ichatana huecuana putsu.

<sup>7</sup> Metse su hue mechujetiaque quejucua mecuana sa inatsu taji tupu. Quejucua jia micuaneseda chujetia taji tupu beju mechujetiaque huecuana. Quejucua jia micuaneseda echujebajaji chujetia taji metiaque. Pamapa ai iyuba taji cuana meiyubaque. Pamapa saida ba taji cuana saida mebaque. <sup>8</sup> Be manuji mepuji. Huamahuama ibuneda manuji bahui mepuque. Huamahuama saida, ibuneda jabati putsu, pamapa Diusu sa jacuatsasiati cuana yape. <sup>9</sup> Uja Diusu sa jacuatsasiati cuana puani: “Be pia sa ebutse neje jaquinatiji. Be jamanuametiji puji. Be tsi puji. Be bid'umimi puji. Be pia sa ai cuana utsatabaji.” Beju pamapa tueda Diusu sa jacuatsasiati cuana ecuaneda yape, ahua ecuaneda cristiano cuana ibuneda eba su. Echua Puji Jesucristo ja ecuana uja buetsuatana: “Cuaja mida quitaita ibuneda ebaitiani nime, daja mique pia cuana ibuneda ba taji.” <sup>10</sup> Ahua ecuaneda pia cuana ibuneda ebainia su, aimue ai madhada ya huecuana mahue. Da su beju ibuneda ba putsu, pamapa Diusu sa jacuatsasiati cuana yapeinia.

<sup>11</sup> Edue cuana, bahue mepuenique tiempo beju epupeni. Ejaitianani beju. Da su menimepitique Cristo quetsunu hue beju epue. Ecuaneda equene jei puana su, tueda ebia su nari beju. <sup>12</sup> Dhidha epupecueni. Hueda beju enariatiani. Aimue ecuaneseda apuda su nime puniuneti taji mahue. Hueda su nime bahui mepuniunetija. Pamapa ai madhada cuana ecuaneseda ariji taji. <sup>13</sup> Ai saida cuana bahui ebia su paatija. Be tsetse aida mepuja. Be tsine ete id'apadada su mepuniunetija. Be deja, epuna cuana ja ai utsatada madhada cuana paata. Be meacuicuinatija. Be envidia neje mepuniunetija. <sup>14</sup> Be ebia su tsada mebaji ai utsatada madhada cuana. Echua Puji Jesucristo sa tucheda neje tueda ai madhada cuana mepishitiameque.

## 14

### *Be pia edue satsiaji*

<sup>1</sup> Quebata Cristo jepuiti Diusu sa ai cuana tupu shanapaji mahue edue saida mebatsuque. Be tu neje meacuicuinatiji yanacane ai cuana jepuiti. <sup>2</sup> Piada piada edue cuana Diusu sa ai cuana tupu shanapaji mahue putsu, bid'umimi diusu eimea cuana peje su irutsuajiji aicha diaja mahue yatani. Ahua tueda aicha micuaneseda puji mu saida edia puji su,

be da jepuiti meacuicuinatiji Diusu sa ai cuana tupu shana-paji edue cuana neje. <sup>3</sup> Da su pamapa ai ediatani cuana ja irutsuajiji aicha diaja mahue edue cuana be ai eni mahue nime mebaji. Daja huecha aicha diaja mahue edue cuana sa aicha ediatani edue cuana satsia taji mahue, Diusu ja pamapa saida batsutana huecuana putsu. <sup>4</sup> ¿Ai da mida pia edue esatsia puji? Echua Puji ja bahui tueda cuatsasiata cua cuaja tuseda ani taji. Mesa tucheda neje tueda etsahuata butsepi papuniuneti puji.

<sup>5</sup> Daja huecha tsapiapiati piba cuana yani. Piada piada cuana ja piada tsine pia tsine ebia su aida ebatani edhitati puji. Pia cuana ja mu pamapa tsine cuana tupupai ebatani. Aimue pamapa su daja pibame cama mahue. Pamapa sa shanapaeni taji cuaja su daja jei eputani. <sup>6</sup> Ahua quebata ja piada tsine pia tsine ebia su aida ebatani su, Diusu sa puji daja yatani tu beidaji yame puji. Daja huecha quebata ja piada tsine pia tsine neje tupupai ebatani su, daja yatani Diusu beidaji yame puji. Ahua quebata ja aicha ediatani su, Diusu sa puji ediatani tu beidaji yame puji, diusulupai a putsu. Daja huecha ahua quebata ja aicha mue dia su, Diusu sa puji daja yatani tu beidaji yame puji. Da neje tuahueda di diusulupai Tata Diusu yatani pia cuana ja yatani nime.

<sup>7</sup> Beju pamapa ecuaneda yainia ai cuana da Diusu sa puji pu taji. Aimue ecuaneda sa tsada quitaita jepuiti puniuneti taji mahue. <sup>8</sup> Emanu ahua eid'e tuseda puji cama ecuaneda. <sup>9</sup> Beju Cristo manu putsu, id'eibana manujiji, daja huecha eid'e cuana sa Echua Puji epu puji.

<sup>10</sup> ¿Jucuaja su miada mique edue esatsiainia? ¿Jucuaja su miada tueda ai eni mahue nime ebainia? Cristo sa bahui ecuaneda juzga taji, tu butse su ecuaneda eneti su. <sup>11</sup> Beju uja derejiji yani Diusu sa quirica su:

Ene putsu, pamapa su ema butse su etururutayu.

Pamapa ja, "Mida da ene quita Diusu", ema yatayu.

<sup>12</sup> Da su beju pamapa ecuaneseda Diusu jeutsu taji cuaja ecuaneda ye mundo su anime puana.

### *Be mique edue jucha ameji*

<sup>13</sup> Da putsu, huamahuama mesatsiarijitique. Be jucha meameji pia edue cuana, tuneda aja mahue yatani ai cuana tuna butse su a putsu. <sup>14</sup> Ema da Echua Puji Jesucristo sa putsu, bahue ema aimue ai papu ja etse enid'umadhatani mahue. Daja biame, quebata tueda ai cuana ja etse enid'umadhatani epibatiani biame, ahua yata su, da su tueda enid'umadhatiani. Jucha yatani, tueda ai cuana tuseda puji saida mahue putsu. <sup>15</sup> Beju yama piada jabahuequisati etia. Bid'umimi diusu eimea peje su irutsuajiji aicha

da saida edia puji. Aimue etse juchaji epuani mahue, dia putsu. Daja biame, ahua piada edue ja tueda ai aicha dia taji mahue epibatiani biame, ediata su, da su beju tueda juchaji epuani. Da putsu, be micuana sa Diosu sa ai cuana tupu shanapaji mahue edue cuana butse su tueda aicha mediaji. Ahua micuaneda edia su, micuana sa edue cuana enid'umadha. Beju aimue micuana sa edue cuana ibuneda ebameinia mahue. Da su be micuana sa tupu shanapaji mahue edue cuana menid'umadhaji, Cristo tuneseda puji di manuana putsu. <sup>16</sup> Merejatique micuana sa ai jaati cuana neje, micuana neje aidhe biame pamimi mahue puji. <sup>17</sup> Beju aimue ecuaneseda ai biame a taji mahue diadia cuana neje Diosu beidaji yame puji. Diosu sa tsada bahui ecuaneda butsepi, nimepijajajiji, beidaji, Espíritu Santo neje epuniuneti puji. <sup>18</sup> Quebata ja daja Cristo emebajata su, tuahueda Diosu beidaji yametayu. Daja huecha cristiano cuana neje tsabajiji epu.

<sup>19</sup> Da putsu, ai saida cuana bahui meaque huamahuama saida, nimepijajajiji yani puji. Metsahuatique huamahuama daja hue Diosu saida eshanapaenidera puji. <sup>20</sup> Be Diosu ja ai saida yatani cuana metaitanameji, micuana sa ai tsada cuana bahui a putsu. Pamapa jana da saida edia puji biame, dia taji mahue, ahua pia edue sa jucha puji pu cua putsu. <sup>21</sup> Ahua micuana sa edue cuana enid'umadhatita, micuaneda tueda aicha ediainia, vino eid'inia ba putsu, ebia su saida tueda aicha edia mahue puji. Daja huecha vino. <sup>22</sup> Micuaneda jei epuani cuana da Diosu, micuaneda bahui bahue papu. Ahua quebata beta piba mahue neje ai papu yata su, ahua aimue juchaji ebatiani mahue su, da su tueda beidaji epu. Aimue jucha yatani mahue. <sup>23</sup> Ahua quebata mu beta piba neje ai papu yata su, ahua juchaji ebatiani su, da su tuahueda jucha yatani. Beju beta piba neje ajiji ai cuana da jucha.

## 15

### *Mique edue beidaji ame taji*

<sup>1</sup> Edue cuana, be ecuaneseda puji quitaita bahui meanija. Diosu sa ai cuana tupu eshanapatani edue cuana sa tupu shanapaji mahue edue cuana tsahua taji. <sup>2</sup> Pamapa ecuaneseda pia edue cuana sa saida puji a taji. Tsahua taji huecuana Diosu peje su jubida panimetucheatita huecuana puji. <sup>3</sup> Cristo biame aimue mesa saida puji bahui ai cuana atana mahue. Ecuaneseda puji sufri puana. Uja Diosu sa quirica su derejiji yani tu jepuiti: "Tata, yama mique ai cuana bahui yainia putsu, mi madhabaji cuana ja ya di madhabatana." <sup>4</sup> Beju pamapa ai derejiji yani cuana



da ecuana sa saida puji, daja huecha ebuetsuati puji. Tueda derejiji yani cuana ja ecuana pacienciaji yametani, mimiame putsu. Daja huecha ecuana Diusu peje su jubida enimetucheametani. <sup>5</sup> Da su beju Diusu ja paciencia metiataque. Menimetucheametaque. Metsahuataque micuaneda huamahuama saida, ibuneda neje mebatique puji, cuaja Jesucristo ja ecuana buetsuatana batame. <sup>6</sup> Daja micuaneda saida jabati putsu, pamapa micuaneda paije hue ecuana sa Echua Puji Jesucristo sa Tata Diusu emitsutsuayu.

*Pablo da judío mahue cuana peje su Diusu sa quisaquisa puji puana*

<sup>7</sup> Da su beju saida mebatsutique huamahuama, cuaja Cristo ja ecuana pamapa batsutana nime. Ahua daja micuaneda epu su, ene putsu Diusu emitsutsua. <sup>8</sup> Edue cuana, yama micuana butsepi equisainia, Cristo pueana judío cuana peje su tuna d'ejí su ya puji, cuaja Diusu ja tuna sa tata chenu cuana mesa jamitsuti tiataidha batame. Beju jiahue Diusu ja mesa jamitsuti apetana ebametani, Cristo beitu putsu. <sup>9</sup> Daja huecha Cristo pueana judío mahue cuana di d'ejí su ya puji mesa jaibunebati cuana jepuiti, Diusu pamitsutsuata huecuana puji. Uja derejiji yani tueda ai cuana jepuiti: Da putsu, mi yama emitsutsua pamapa judío mahue cuana butse su.

Miqueda puji ema esatsu tuna butse su.

<sup>10</sup> Pia su neicha uja derejiji yani:

Judío, judío mahue cuana neje tupupai, beidaji mepuque.

<sup>11</sup> Pia su neicha uja epuani:

Pamapa ejude cuana su aniji judío mahue cuana ja Diusu pamitsutsuata.

<sup>12</sup> Uja Isaías deretaidha:

Isaí sa familia jenetia tueda epue.

Pamapa ejude cuana su aniji judío mahue cuana ecuatsasi-atayu.

Tu peje su enimeid'uatitayu huecuana.

<sup>13</sup> Diusu ja menimeid'uametaque. Nimepijajame putsu, beidaji meametaque. Daja meataque, tu peje su jei puana putsu. Espíritu Santo ja metsahuataque Diusu peje su jubida menimetucheatique puji.

<sup>14</sup> Edue cuana, bahue ema micuaneda saida neje epuni-UNETIANI. Diusu sa ai cuana jepuiti micuaneda tupu eshanapainia. Daja huecha micuaneda huamahuama saida quisaquisa jaati bahue. <sup>15-16</sup> Beju ye quirica su yama micuana ai cuana butsepi neje equisainia aimue micuaneda tipeida eseta mahue puji. Daja yama micuana butsepi neje equisainia, da puji ema Diusu ja huaratiatana putsu. Tuahueda ema

ibunebatana putsu, ema mesa quisaquisa puji ichatana, judío mahue cuana peje su Cristo sa quisa saida cuana quisaquisa eputi puji, tuna d'oji su paputa puji. Da su Diosu ja tuneda di ebatsutayu, Espíritu Santo ja nimebutsepiatana huecuana putsu.

<sup>17</sup> Ebia su beidaji ema, Diosu emebajainia putsu, aimue ema quema ai jaati cuana jepuiti emimi mahue. <sup>18</sup> Cristo ja ema yametani ai cuana bahui ema emimiani. Quema quisa, ai jaati cuana jepuiti, Diosu ja judío mahue cuana quisatana. Da neje jei putana huecuana. <sup>19</sup> Ai nimetiuda cuana Espíritu Santo ja ema ametana mesa tucheda neje. Tueda ai cuana a putsu, Cristo jepuiti quisa saida cuana yama quitaneana pamapa ejude cuana je. Cristiano cuana d'oji su puta cua, Cristo peje su jei pu putsu, ema quisaquisa puana. Daja ema quisaquisa puana Jerusalén ejude jenetia, Ilírico yahua teje. <sup>20</sup> Cristo shanapaji mahue ejude cuana su bahui ema cua putsu, Diosu sa quisa saida cuana quisaquisa puja puana. Putija mahue ema puana pia cuana quisaquisa putitana ejude je. <sup>21</sup> Uja derejiji yani Diosu sa quirica su tueda ai cuana jepuiti:

Quetsunu su biame tu jepuiti quisa cuana id'aba bue mahue cuana beju eid'abata.

Tu jepuiti eshanapatayu huecuana.

### *Pablo Roma ejude su putija puana*

<sup>22</sup> Edue cuana, ema micuana peje su mue puti puana, ema putija puana biame, ejude meamea ema puniunetiana putsu. <sup>23</sup> Beju jiahue quema mudu tueda ejude cuana je apejiji. Da su jiahue ema micuana peje su eputi, cuaja equene quema tsada puana batame. <sup>24</sup> Ema España yahua su eputi su, yama micuana eperehuanana. Da su micuana neje quejucua tsine chidi ani putsu, tsada quema micuaneda ema saida, edid'i je puji ai cuana neje ebeitu ema, España yahua su ejaitiana su. <sup>25</sup> Beju jiahue mu tsuhu ema Jerusalén ejude su eputi. Edue cuana sa dhitajiji chipilu yama edusu dapia ejude su aniji edue cuana etsahua puji. <sup>26</sup> Macedonia, Acaya yahua detse su aniji edue cuana ja tueda chipilu dhitatana Jerusalén ejude su aniji edue puri cuana etsahua puji. <sup>27</sup> Saida batana huecuana tueda chipilu ebeitu puji. Beju daja tuneseda a taji puana Jerusalén ejude su aniji edue cuana sa puji, tueda ejude jenetia Cristo jepuiti quisa saida cuana equene cuinanapiruana putsu. Jiahue beju tueda Macedonia, Acaya yahua detse su aniji edue cuana sa tsahua taji huecuana chipilu neje. <sup>28</sup> Da su Jerusalén ejude su aniji edue cuana yama chipilu tia putsu, micuana yama eperehuanana, España yahua su epuhu je.

<sup>29</sup> Bahue ema Cristo ja ema mesa aida jaibunebati quisa etiata micuana sa saida puji yama equisa puji.

<sup>30</sup> Edue cuana, daja hue mebajaderaque Diosu quema puji. Daja yama micuana ebajainia Jesucristo da ecuana sa Echua Puji putsu, daja huecha Espíritu Santo ja ecuana ebia su ibuneda ebametani putsu. <sup>31</sup> Diosu jubida mebajaque tuahueda d'ejí su ema paata Jerusalén ejude su aniji jei ep-utani mahue judío ate cuana peje jenetia. Mebajaque Diosu Jerusalén ejude su aniji edue cuana ja saida ye chipilu painat-suta puji. <sup>32</sup> Da su beju ahua Diosu sa tsada su, yama micuana beidaji neje eperehuanana huai chidi cama ejanahua puji. <sup>33</sup> Diosu ja menimepijajametaque. Daja papu.

## 16

### *Pablo ja edue cuana neje jamitsutibna*

<sup>1</sup> Edue cuana, saida mebatsuque edue epuna Febe. Tueda da Cencrea ejude jenetia. Tuahueda dapia ejude su aniji edue cuana saida mebajatana, ilisha sa emebajaji putsu. <sup>2</sup> Saida mabatsuque tueda, Jesucristo peje su jei pujiji putsu. Metsahuaque tueda pamapa mesa ai tsahuataji cuana su, tuahueda jucuada edue cuana ya di tsahuatana putsu. Daja ecuaneseda saida batsu taji pamapa Cristo jepuiti edue cuana.

<sup>3</sup> Memitsuque Priscila, Aquila detse. Tuatseda ema neje tupupai Jesucristo emebajatani. <sup>4</sup> Manu su hue puana tse ema d'ejí su ya puji. Ema, pamapa edue judío mahue cuana neje diusulupai yainia tse. <sup>5</sup> Memitsuque Priscila, Aquila detse sa ete su ehitatitani edue cuana. Memitsuque quema ibuneda eshanapa Epeneto. Pamapa pia cuana equene tueda Cristo peje su jei puana Acaya yahua su. <sup>6</sup> Memitsuque María. Tuahueda micuana duju su Diosu jubida mebajatana. <sup>7</sup> Memitsuque quema Cristo jepuiti judío edue Andrónico, Junias detse. Tuatseda ema neje tupupai terijiji aniana. Ema equene Cristo peje su jei puana tse. Apóstol cuana ja quitaita eiyubatani tse.

<sup>8</sup> Memitsuque quema Cristo jepuiti eshanapa Amplias. <sup>9</sup> Memitsuque Urbano. Tueda da ecuana neje tupupai Cristo sa emebajaji. Ibuneda edue Estaquis memitsuque. <sup>10</sup> Memitsuque Apeles. Quejucua nuati biame tueda Cristo sa deja saida jabametiana. Aristóbulo sa familia cuana memitsuque. <sup>11</sup> Memitsuque quema Cristo jepuiti judío edue Herodión. Narciso sa familia cuana memitsuque. Cristo peje su jei putana huecuana pamapa. <sup>12</sup> Memitsuque Trifena, Trifosa detse. Saida Cristo emebajatani tse. Memitsuque ibuneda edue epuna Pérsida. Tuahueda di Echua

Puji Jesucristo sa puji jubida mebajatana. <sup>13</sup> Memitsuque Rufo, daja huecha mesa cuara. Rufo da Cristo peje su jei pujiji butsepi. Tusa cuara da quema cuara nime puina. <sup>14</sup> Memitsuque edue Asíncrito, Flegonte, Hermas, Patrobas, Hermes cuana. Pamapa tuna neje yanita edue cuana di memitsuque. <sup>15</sup> Memitsuque Filólogo, Julia, Nereo cuana. Nereo sa dudu, Olimpás detse memitsuque. Memitsuque pamapa tuatse neje yanita Cristo jepuiti edue cuana.

<sup>16</sup> Huamahuama ibuneda neje memitsutique. Pamapa upia ejude su aniji edue cuana ja micuana emitsuametani.

<sup>17</sup> Mebaenitique jasajasajatiji cuana neje. Aimue micuaneda mu da puji jabuetsuatiana mahue. <sup>18</sup> Menetideraque tuna peje jenetia, ecuana sa Echua Puji Jesucristo aimue emebajatani huecuana mahue putsu. Tuna sa ai utsatada madhada cuana quitaita sa eme su bahui yanita huecuana. Ania mimi cuana neje ai papu su jei eputani cristiano cuana ebaseatani huecuana. <sup>19</sup> Pamapa su bahueta cuaja micuaneda Cristo jei yainia. Da putsu, ema beidaji. Quema tsada micuaneda ai saida cuana bahui meaenique puji, aimue ai madhada cuana ya puji mahue. <sup>20</sup> Da su Diosu janimepijajametiji ja micuaneda Ishahua epishitiamemetayu. Ecuana sa Echua Puji Jesucristo ja meibunebataque.

<sup>21</sup> Timoteo ja micuana emitsuametani. Tueda da ema neje tupupai Cristo sa emebajaji. Quema Cristo jepuiti judío edue Lucio, Jasón, Sosípater cuana ja di micuana emitsuametani.

<sup>22</sup> (Ema da Tercio, Pablo sa quirica dereji. Yama di micuana emitsuameinia Echua Puji Jesucristo sa ebani su.)

<sup>23</sup> Ema da Pablo. Gayo sa ete su yani. Gayo ja micuana emitsuametani. Daja huecha pamapa tusa ete su edhitatitani edue cuana ja. Erasto ja micuana emitsuametani. Tueda da ejude sa chipilu quinaji epuani. Tije puji, edue Cuarto ja di micuana emitsuametani.

<sup>24</sup> Echua Puji Jesucristo ja meibunebataque. Daja papu.

### *Tije quisa cuana*

<sup>25</sup> Beju pamitsutsuatija Diosu. Tuahueda micuana ebia su nimetucheda yametayu Jesucristo peje su. Daja yama cristiano cuana equisainia, cuaja Diosu ja ema quisatana batame. Beju tueda Cristo jepuiti quisa saida cuana aimue Diosu ja biahua tiempo cristiano cuana quisataidha mahue. Ye mundo ai mahue jenetia, tueda quisa saida cuana Diosu sa enime su ichasetajiji quinataina. <sup>26</sup> Biahua tiempo profeta chenu cuana ja chu tueda quisa saida cuana derepirutaidha Diosu sa quirica su. Jiahue mu beju ecuanaju pamapa cristiano cuana peje su tueda quisa saida cuana quisaquisa

epuani Cristo peje su jei paputa huecuana puji. Daja yama yainia, cuaja eid'e eni Diusu ja cuatsasiatana batame.

<sup>27</sup> Piada quita bahue eni Diusu pamitsutsuaenitija Jesu-cristo jepuiti. Daja papu.

## PRIMERA CARTA DEL APOSTOL SAN PABLO A LOS CORINTIOS

Equene Corintios quirica su Pablo ja Corinto ejude su aniji Diusu sa dharejiji cuana d'ayataidha tuna sa ajiji ai madhada cuana jepuiti. Dharejiji cama jasajasajati, pia sa ebutse neje jaquinatiji, cuaja papu hue edhitatitani cuana jepuiti buetsuataidha huecuana. Daja huecha Pablo ja buetsuataidha huecuana Espíritu Santo sa jatiati ai cuana jepuiti. Diusu sa dharejiji cuana da Cristo peje su d'ejí su eputani, daja huecha manujiji cuana eid'etayu buetsuataidha huecuana.

Capítulo 13 su quisa epuani ebia su saida ibuneda neje jadasuti taji, aimue bue mahue yana su emimi puji mahue. Da su tueda jaibunebati neje Diusu sa dharejiji cuana saida puderatita cua.

Ye versiculo cuana da ebia su saida quita ebuetsuati puji:

1.8  
2.14  
3.11  
6.19,20  
9.24-27  
10.13,31  
15.57,58

*Pablo ja Corinto ejude su aniji edue cuana quirica tiametana*

<sup>1</sup> Ema da Pablo. Diusu ja ema ichatana.

Jesucristo sa apóstol epu puji. <sup>2</sup> Hue ema upia yani edue Sóstenes neje. Tu neje yama ye quirica ebeituinia Corinto ejude su aniji edue cuana peje su. Edue cuana, micuaneda Jesucristo neje dunejiji putsu, Diusu ja micuana nimebut-sepiatana pamapa pia ejude cuana su Jesucristo peje su jei eputani cuana neje tupupai. Jesucristo da mecuana sa Echua Puji, daja huecha ecuaneseda. <sup>3</sup> Ecuana sa Tata Diusu, Echua Puji Jesucristo detse ja meibunebataque. Menimepija-jametaque tse.

*Diusu ja edue cuana ibunebatana*

<sup>4</sup> Pamapa hora su yama Tata Diusu diusulupai yainia, tuahueda Jesucristo jepuiti micuana ebia su ibunebatana putsu. <sup>5</sup> Jesucristo neje jadunetijiji jepuiti, micuana Diusu ja ibunebatana. Tuahueda micuana tsahuatana cristiano cuana tu jepuiti equisa puji. Pamapa mesa jabuetsuati cuana micuana bahue ametana. <sup>6</sup> Beju daja Diusu ja micuana ametana, cuaja yama micuana quisana batame. <sup>7</sup> Micuana sa pamapa mesa jatsahuati cuana yani mesa ai tsada cuana

ya puji tu eid'uainia tupu. <sup>8</sup> Tuahueda micuana etsahuaenita jucha mahue epu puji tu epueicha teje. <sup>9</sup> Beju Diosu ja daja micuana yatayu, cuaja mesa jamitsuti puana batame. Tuahueda micuana dharetana mesa ebacua Jesucristo neje eduneti puji.

*Edué cuana jasajasajatitana*

<sup>10</sup> Edué cuana, yama micuana jubida ebajainia Echua Puji Jesucristo sa ebani su aimue micuaneda cama huamahuama yacuicuinati mahue puji, esajasajati mahue puji. Saida micuaneda medunetique. <sup>11</sup> Daja yama micuana equisainia, Cloé sa familia cuana ja ema quisatana putsu, micuaneda cama huamahuama yacuicuinatiani. <sup>12</sup> Piada piada micuaneda, "Ecuánaju da Pablo tije aji cuana", epuani. Pia cuana micuaneda, "Ecuánaju da Apolos tije aji cuana", epuani. Pia cuana micuaneda, "Ecuánaju da Pedro tije aji cuana", epuani. Pia cuana micuaneda, "Ecuánaju da Cristo tije aji cuana", epuani. <sup>13</sup> Beju aimue detse daja pu cua mahue. ¿Ai Cristo sajasajajiji yani bata? ¿Ai Pablo curusu su tatatana huecuana micuaneseda puji bata? ¿Ai quema ebani su micuana yahui neje jaichaderametiana bata? ¡Mahue! Cristo sa ebani su bahui. <sup>14-16</sup> Beidaji ema, quejucua chidi hue micuaneda yama yahui neje ichaderana putsu. Crispo, Gayo detse bahui yama ichaderana yahui neje Diosu sa puji. Estéfanos sa familia di yama ichaderana yahui neje. Mue piba ahua pia aidhe yama yahui neje ichaderana. Da putsu, aimue detse aidhe biame quema ebani su yahui neje jaichaderametiana pu cua mahue. Ema beidaji, quejucua chidi bahui yama ichaderana yahui neje putsu. <sup>17</sup> Beju aimue Cristo ja ema beitutana cristiano cuana yahui neje Diosu sa puji eichadera puji mahue. Ema beitutana tusa quisa saida cuana bahui quisaquisa epu puji. Tueda quisa saida cuana ema quisaquisa epuani id'abata saida mimi cuana neje aimue cristiano cuana ja ema ebia su aida ebata puji mahue. Quema mu tsada cristiano cuana ja, Cristo curusu su manuana tuna d'eji su ya puji pashanapaenita.

*Cristo da bahue eni, tucheda*

<sup>18</sup> Beju ecuaneseda puji tueda curusu jepuiti ai quisa saida cuana da tucheda eni ecuana d'eji su ya puji. Castigo su eputita cuana sa tsada mahue Diosu sa curusu jepuiti ai quisa saida cuana. Tueda curusu jepuiti ai quisa saida cuana da quisa tseitsi nime tuneseda puji ebia su bahue eni ebatitani huecuana putsu. <sup>19</sup> Beju uja Diosu ja deremetaidha tuna jepuiti mesa quirica su:

Bahue eni cuana sa piba cuana Diosu ja etaitanamepeta. Tuna sa piba eni cuana eichadera.

<sup>20</sup> ¿Ai puji saida ni da bahue eni cuana pu cua? ¿Ai puji saida ye mundo sa ebuetsuaji cuana pu cua? ¿Ai puji saida jacuicuinatiji aida cuana pu cua? Beju Diusu da tuna ebia su bahue eni. Tuna sa piba bahue eni ai cuana mue ai puji saida pu cua nime ametana. <sup>21</sup> Cua ja shanapa taji mahue Diusu ebatani huecuana tuna sa piba bahue eni ai cuana jepuiti. Beju cristiano cuana d'oji su puta cua, Diusu sa quisa saida su jei pu putsu bahui. Tueda quisa saida neje Diusu ja cristiano cuana d'oji su yatani, bahue eni cuana ja tueda quisa saida cuana quisa tseitsi nime hue ebatani biame.

<sup>22</sup> Judío cuana sa ai nimetiuda cuana bahui tsada Diusu peje su jei epu puji. Judío mahue cuana mu tuna sa piba bahue eni ai cuana bahui jepuiti Diusu shanapaja yadhaatani. <sup>23</sup> Ema judío cuana peje su, Cristo manuana tuna d'oji su ya puji, quisaquisa epuani su, cha ebia su duinini hue eputani huecuana ema neje. Daja huecha ema judío mahue cuana peje su Cristo jepuiti quisa saida cuana quisaquisa epuani su, tueda quisa saida da quisa tseitsi nime hue ebatani huecuana. <sup>24</sup> Beju Diusu sa judío, ahua judío mahue dharejiji cuana sa puji, tueda Cristo jepuiti quisa saida cuana da bahue eni, tucheda tuna d'oji su ya puji. <sup>25</sup> Diusu sa piba cuana da cristiano cuana sa piba ebia su aida, bahue eni. Cristiano cuana: “Cristo curusu su manuana quisa da quisa tseitsi nime hue”, eputani biame, daja Diusu sa tsada batana cristiano cuana d'oji su ya puji. <sup>26</sup> Edue cuana, mepibaenique. Diusu ja quejucua chidi hue dharetana aida, bahue eni cuana peje jenetia tuseda eputa puji. <sup>27</sup> Dueji cristiano nimemitsida cuana dharetana bahue eni cuana ebidhuame puji. Nimetucheda mahue, nimemitsida cuana dharetana nimetucheda, aida ebatitani cuana ebidhuame puji. <sup>28</sup> Aida mahue, puri cuana Diusu ja edharetani aida nimetucheda, bahue eni cuana etaitaname puji. <sup>29</sup> Daja Diusu ja yatani aimue aidhe biame tu butse su ebia su aida, bahue eni pabati mahue puji. <sup>30</sup> Diusu ja ecuana Jesucristo neje dunemetana. Cristo ja ecuana Diusu sa piba bahue eni cuana shanapametana. Ecuana saida, nimebutsepi Diusu butse su ametana. Tueda manuana ecuana d'oji su ya puji. <sup>31</sup> Beju uja derejiji yani: “Ahua quebata tuseda puji quitaita bahui saida mimija epu su, ebia su saida quita Diusu sa puji saida pamimi.”

## 2

### *Cristo tatajiji quisa*

<sup>1</sup> Edue cuana, ema micuana neje anina su,

Diusu sa quisa saida cuana quisaquisa puana id'abata saida mimi cuana neje. Aimue ema mimi aida eni cuana neje



quisaquisa puana mahue. <sup>2</sup> Ema micuana quisaquisa puana Cristo curusu su manuana jepuiti bahui. <sup>3</sup> Micuana peje su ema cuinatiana iyuame, riaria neje. <sup>4</sup> Aimue micuana yama quisana mimi aida eni cuana neje mahue. Espiritu Santo tucheda ja mu micuana Diosu peje su jei ametana, quema id'abata saida mimi cuana jepuiti. <sup>5</sup> Aimue ema micuana peje su piba bahue eni neje quisaquisa puana mahue, micuaneda Cristo peje su jei yame puji. Espiritu Santo ja bahui micuana Cristo peje su jei ameta cua.

*Espiritu Santo ja bahui eshanapametani*

<sup>6</sup> Beju daja biame, yama Diosu shanapaeniji cuana mimi bahue eni neje equisainia. Tueda mimi bahue eni cuana da aimue ye mundo jenetia mahue. Aimue huaraji aida cuana sa piba peje jenetia mahue. Beju Diosu ja huaraji cuana sa piba bahue eni cuana etaitanamepeta. <sup>7</sup> Yama Diosu sa piba bahue eni cuana bahui ebuetsuainia. Ye mundo ajiji mahue su, cuaja cristiano d'oji su ya puji Diosu ja mesa enime su dusutaidha. Jiahue beju tueda mesa ai piba cuana ema quisa epuani. <sup>8</sup> Ye mundo sa huaraji cuana ja aimue tueda ai cuana eshanapatani mahue. Ahua tueda ai cuana shanapatana huecuana su mu detse, aimue Echua Puji Jesucristo manumeta cua huecuana puina mahue. <sup>9</sup> Beju uja derejiji yani Diosu sa quirica su tueda ai cuana jepuiti:

Aimue aiya biame ba, aimue aiya biame id'aba, aimue aiya biame piba Diosu ja cielo su ichatana ai saida cuana tu ibuneda baji cuana sa puji. <sup>10</sup> Beju Espiritu Santo ja mu ecuana tueda ai cuana shanapametana. Pamapa Diosu sa piba quitaita cuana tuahueda ecuana eshanapametani. <sup>11</sup> Etse sa piba quitaita bahui etse eshanapaeninia. Daja huecha Espiritu Santo ja pamapa Diosu sa ai piba cuana eshanapaenitani, tueda da Diosu quitaita putsu. <sup>12</sup> Beju Diosu ja ecuana Espiritu Santo tiatana, pamapa Diosu ja ecuana tiatana ai saida cuana ecuana pashanapameta puji. Aimue ecuana ye mundo sa piba bahue eni neje Diosu sa ai cuana eshanapainia mahue. <sup>13</sup> Espiritu Santo ja ema mesa mimi quitaita cuana tiatana Diosu sa ai quisa saida cuana micuana ebuetsua puji. Aimue yama micuana buetsua quema mimi bahue eni cuana neje.

<sup>14</sup> Quebata sa Espiritu Santo aimue yani mahue su, aimue Diosu sa piba ai cuana shanapata cua mahue. Tuseda puji mu mue ai puji saida mahue nime ebatani Diosu sa ai cuana. Cuaja shanapa taji mahue ebatani, tuseda aimue muesumu su Espiritu Santo yani mahue putsu. <sup>15</sup> Beju quebata sa Espiritu Santo yani su, tuahueda pamapa ai cuana saida

dhareta cua, quebata saida ahua mahue. Aimue detse pia cuana ja tueda tuaquisata cua mahue tu yatani ai cuana jepuiti, Espíritu Santo tuseda yani putsu. <sup>16</sup> Uja derejiji yani Diusu sa quirica su tueda ai cuana jepuiti: “¿Aidhe biame detse Diusu sa piba cuana bahue pu cua? ¿Aiya biame detse Diusu quisata cua tu ebuetsua puji?” Beju ecuaneda bahui Cristo sa piba cuana bahue epuani, Diusu ja ecuanana tu neje dunemetana putsu.

### 3

#### *Diusu sa emebajaji cuana*

<sup>1-2</sup> Edue cuana, quema puji micuana

Cristo sa ai cuana jepuiti buetsua taji epuani yanana chidi cuana pu cua nime, aimue micuaneda Diusu sa ai cuana tsuhu eshanapaeninia mahue putsu. Micuana sa ai tsada cuana bahui micuaneda yainia. Aimue micuaneda bahue eni mahue Diusu sa ai cuana su, micuaneda Espíritu Santo neje aimue epuniuneti mahue putsu. <sup>3</sup> Envidia neje micuaneda cama edusutiani. Micuaneda jasajasajati bahue ebia su, micuaneda cama yacuicuinatiani putsu. Diusu shanapaji mahue cuana nime micuaneda cama edusutiani. <sup>4</sup> Piada piada micuaneda, “Ecuanaju Pablo tije aji cuana”, epuani. Pia cuana micuaneda, “Ecuanaju Apolos tije aji cuana”, epuani. Daja sajasajajiji Diusu shanapaji mahue cuana jadasuti bahue. Beju micuaneda tuna nime daja edusutiani.

<sup>5</sup> ¿Aidhe ni da Pablo? ¿Aidhe ni da Apolos? Beju etseju da Cristo sa emebajaji detse bahui. Diusu ja tiatana mudu bahui etseju yainia. Etseju jepuiti micuaneda Echua Puji Jesucristo peje su jei puana. <sup>6</sup> Yama Diusu sa mimi banana micuana sa muesumu su. Apolos ja biad'uichatana. Beju Diusu ja mu mesa mimi muruametana micuana sa muesumu su. <sup>7</sup> Beju ebanaji, ebiad'uichaji detse mu aimue ai cuatajuse mahue. Diusu bahui da aida eni, emuruametani putsu. <sup>8</sup> Ebanaji, ebiad'uichaji detse da tupupai Diusu butse su. Pamapa Diusu mebijaji cuana Diusu ja echuje etiata, cuaja mebijatana huecuana batame. <sup>9</sup> Etseju da Apolos neje Diusu sa mudu puji detse bahui. Micuaneda da Diusu sa banabana jude nime.

<sup>10</sup> Micuaneda da ete emuduinia Diusu ja yatani nime. Ema da ete mudupiruji nime. Equene yama eti jude basetana. Da bia su pia ete muduji cuana ja ete emudutani. Beju saida pamudumuduta huecuana yama eti jude basetana bia su. <sup>11</sup> Jesucristo bahui Diusu sa ete eti jude. Tu bia su ecuanaju Diusu sa ete mudupiruana. Aimue pia eti jude yani mahue ecuaneda bia su emudu puji. <sup>12</sup> Beju yani piapiati Cristo sa mudu puji cuana. Ahua quebata cuana ja Diusu

saida emebajata su, tuna sa Diosu sa puji ai mudu saida ajiji cuana da chujeji, oro, plata, joya cuana nime Diosu ja ebata. Quebata cuana ja mu Diosu saida emebajata mahue su, tuna sa ai mudu ajiji cuana da aqui, nutsa, eina cuana nime Diosu ja ebata. <sup>13</sup> Beju Cristo cuati utsu neje epueicha su, pamapa ecuana sa ai ajiji cuana edhareta. Pamapa ai saida ajiji cuana, oro, plata, joya nime, cuati utsu je jaitiana putsu, ebia su saida eputayu. Pamapa ai saida mahue ajiji cuana mu cuati utsu su beju etiupetayu. Diosu ja pamapa ecuana sa jamebajati cuana ebapeta saida ahua saida mahue, tu epueicha su. <sup>14-15</sup> Ahua quebata edue ja Jesucristo saida emebajata su, Diosu ja tueda saida echuje etiatayu, mesa Diosu sa puji ai jamebajati chujeji cuana da oro, plata, joya cuana nime Diosu ja ebata putsu. Ahua quebata edue ja Jesucristo saida emebajata mahue su, aimue Diosu ja tueda echuje etiata mahue, mesa ai jamebajati saida mahue cuana da aqui, nutsa, eina cuana nime Diosu ja ebata putsu. Tueda saida mahue jamebajati cuana cuati utsu su etiupetayu. Beju mesa mudu saida mahue epu biame, tueda edue da d'ejí su epu.

<sup>16</sup> ¿Bue mahue jia maida micuaneda quitaita Diosu sa ani jude ete epuani? ¿Bue mahue jia maida Espíritu Santo da micuana sa equita dume su yani? <sup>17</sup> Ahua quebata ja tueda Diosu sa ani jude ete emadhatiata su, Diosu ja tueda di emadhatiaenita, tueda Diosu sa ani jude ete da iyuda putsu. Bahue mepuque micuaneda quitaita da Diosu sa ani jude ete cuana.

<sup>18</sup> Be mebaseatiji micuana mehua. Quebata ja ye mundo sa ai cuana jepuiti bahue eni ebatiani su, ebia su saida pasetata tueda bahue eni ai cuana. Diosu sa bahue eni ai cuana bahui pashanapata. <sup>19</sup> Ye mundo sa bahue eni ai cuana da mue ai puji saida Diosu ja ebatani. Beju uja derejiji yani Diosu sa quirica su: “Diosu ja deja cuana ebaseametani tuna sa bahue eni ai cuana quitaita jepuiti.” <sup>20</sup> Neicha hue uja epuani: “Diosu bahue deja bahue eni cuana sa piba cuana da mue ai puji saida.” <sup>21</sup> Da su be tije aja meaji ye mundo sa bahue eni deja cuana, Diosu ja micuana pamapa mesa ai piba cuana shanapametana putsu. Pamapa ai cuana da micuaneseda. <sup>22</sup> Pablo, Apolos, Pedro cuana beju micuana Diosu ja tiatana. Ye mundo di micuana tiatana. Pamapa jahue quita ejaitianani ai cuana beju micuana tiatana. Pamapa epu ai cuana di micuana tiatana. <sup>23</sup> Beju micuaneda da Cristo sa puji cuana. Cristo da Tata Diosu sa puji.

## 4

<sup>1</sup> Micuaneseda ecuanaju Cristo sa emebajaji nime bahui ba taji. Diosu ja ecuanaju cuatsasiatana mesa etsia quisa micuana ebuetsua puji. <sup>2</sup> Beju emebajaji sa saida ape taji mesa echua puji sa jacuatsasiati cuana. <sup>3</sup> Echua Puji Jesucristo ja bahui pabata yama saida tueda mebijana, ahua mahue. Quema puji mu mue ai biame a taji ahua quebata, yama Diosu saida emebajainia, ahua mahue, emimi su. Aimue detse yama saida emebajainia ema pu cua mahue. <sup>4</sup> Ema Diosu butse su saida ebatiani biame, cuaja shanapa taji mahue yama ebainia yama Cristo saida emebajainia, ahua mahue. Echua Puji Jesucristo ja bahui quema jamebijati cuana pabata. <sup>5</sup> Da su beju be mejuzgaji Cristo sa emebajaji cuana, Cristo pueji mahue su. Tueda epue su, pamapa ecuana sa piba, ai ajiji cuana eshanapamepeta. Da tsine su pamapa su bahue eputa ecuaneda Diosu saida mebijana, ahua mahue. Da tsine su Diosu ja pamapa ecuana echuje etiata, cuaja ecuaneda tu mebijana batame.

<sup>6</sup> Edue cuana, daja yama micuana equisainia micuaneda ema, Apolos neje, tupupai eba puji. Beju pamapa Diosu sa emebajaji cuana tupupai micuana sa ba taji. Be piada hue pia ebia su aida mebijaji. <sup>7</sup> ¿Micuaneda jia maida pia cuana ebia su saida? ¿Jucuaja su micuaneda pia cuana ebia su aida ebatiani? ¿Aimue jia maida Diosu ja micuana pamapa mique ai cuana tiatana mahue? Aimue micuaneda quitaita micuana sa ai cuana jatejetiana mahue. Diosu ja micuana cha tia hue atana biame, ¿jucuaja su micuaneda ebia su aida ebatiani micuane quitaita jatejeti cua pu cua nime?

<sup>8</sup> Beju micuaneda bahue eni pepe epuani putsu, aimue etseju sa jabuetsuati cuana tsada mahue ebainia. Diosu ecuatasiati su echua puji aida cuana nime micuaneda ebatiani. Aimue micuaneda etseju etsainia mahue. Ahua daja pu cua su, beju saida epu, etseju sa puji di micuana neje echua puji aida pu cua putsu. <sup>9</sup> Diosu ja ecuanaju apóstol cuana pamapa pia cuana tije puji ichatana pepe hue ema epibatiani. Ecuanaju da matse putsu manuamejiji deja cuana pu cua nime pamapa cristiano, ángel cuana echamata puji. <sup>10</sup> Beju pamapa cristiano cuana ja ecuanaju apóstol cuana tseitsi nime ebatiani. Ecuanaju ai eni mahue nime ebatiani huecuana ecuanaju sa Cristo jepuiti jabuetsuati cuana jepuiti. Beju micuaneda mu ebia su bahue eni ebatiani. Micuaneda ecuanaju nimetucheda mahue ebainia cama, micuaneda ebia su nimetucheda ebatiani. Cristiano cuana ja ecuanaju ai eni mahue nime ebatiani cama, micuaneda mu ebia su aida ebatiani huecuana. <sup>11</sup> Jiahue teje aimue ecuanaju sa tupu ai dia taji, ai id'i taji, ejud'uji cuana mahue. Aimue

ecuanaju sa ete quitaita yani mahue. Cristiano cuana ja ecuanaju nedaneda yatani. <sup>12</sup> Ecuanaju sa eme quitaita neje emudumuduani. Cristiano cuana ecuanaju sa puji madhada hue emimitani su, ecuanaju mimi saida neje eibunebainia huecuana. Ecuanaju eichetani huecuana su, paciencia neje ecuanaju ejeitsuinia. Ecuanaju tije yatani biame, ecuanaju etuheatiani. <sup>13</sup> Ecuanaju emadhabatani huecuana su, saida neje ecuanaju equisainia huecuana. Jiahue teje beju ecuanaju bubu nime ebatani huecuana.

<sup>14</sup> Aimue yama micuana daja equisainia micuana ebia su ebidhuame puji mahue. Ibuneda neje yama micuana daja equisainia micuana ebutsepame puji, micuaneda da quema ebacua chidi cuana nime putsu. <sup>15</sup> Beju micuaneseda dueji ebuetsuaji cuana paani papu biame, ema bahui da micuana sa Cristo jepuiti tata, yama micuana Cristo peje su dusuana putsu. <sup>16</sup> Da su jubida yama micuana ebajainia ema nime mepuque puji. Quema ai puiti cuana meaque.

<sup>17</sup> Da putsu, yama micuana peje su Timoteo ebeituinia. Tueda da quema saida Cristo jepuiti ebacua. Tuahueda micuana quema Cristo jepuiti ai puiti cuana ebuetsuata. Tueda ai puiti cuana daja yama buetsuana pamapa ejude je edue cuana. <sup>18</sup> Edue cuana, piada piada micuaneda ebia su quita jabatija epuani. Ema ebia su bahue eni ebatiani pepe. Ema micuana peje su eputi puji iyuame epuani pepe hue. <sup>19</sup> Beju daja micuaneda epibatiani biame, ema micuana peje su tipeida eputi, ahua Diosu sa tsada su. Beju ema micuana peje su ecuinati su, da su eba yama, ahua ene quita Diosu sa tucheda micuana sa yani, ahua mimi aida bahui epuani. <sup>20</sup> Ahua micuaneda ene quita hue Diosu emebajainia su, Diosu sa tucheda micuana sa yaniti. Aimue mimi aida neje bahui Diosu emebaja puji mahue. <sup>21</sup> ¿Ai ni micuana sa tsada, castigo neje ema micuana peje su eputi, ahua ibuneda neje?

## 5

### *Edue jucha aidaji castiga taji*

<sup>1</sup> Edue cuana, ema bahue piada deja micuana duju su ai madhada jucha aida yatani. Tueda mesa tata sa ehuanee neje equinatiani. Beju aimue Diosu shanapaji mahue cuana ja biame, daja ai madhada a bue mahue. <sup>2</sup> Daja tueda ai madhada micuana duju su epuani biame, micuaneda aida quita ebatiani. Micuaneda aida quita ebatiani eturuca bidhu putsu, jalutuati taji tueda jucha jepuiti. Beju mejusiacuinaque tueda deja micuana duju jenetia. <sup>3-4</sup> Ema micuana duju su mue neti biame, yama tueda deja juzgana Echua Puji Jesucristo

sa ebani su, ema micuana neje neti cua pu cua nime. Beju ema upia uqueda yani biame, micuaneda edhitatiani su, quema piba cuana micuana peje su yaniti micuana ehuidusu puji. Echua Puji Jesucristo sa tucheda di micuana neje yaniti. <sup>5</sup> Mue micuana sa ai biame a taji mahue tueda deja neje. Beju tueda pabidhuti, ebia su juchaji aida epuani putsu. Daja paarijita tueda jucha madhada, Cristo epueicha su d'ejí su papu puji.

<sup>6</sup> Beju aimue micuana sa ebia su aida jabati taji mahue. Micuaneda bahue huai chidi levadura ja pamapa harina bebajiji ehuarupetani. Daja huecha pamapa micuaneda juchaji pu cua, ahua micuaneda tueda deja micuana duju su daja hue epuneti su. <sup>7</sup> Da su beju mejusiacuinaque tueda deja juchaji micuana duju jenetia micuaneda saida, jucha mahue epu puji. Da puji Cristo curusu su manuana ecuaneda saida, jucha mahue epu puji. <sup>8</sup> Tu neje dunejiji daja hue mepuderaja. Pamapa ai madhada cuana meichaderatija. Diosu sa ene quita jabuetsuati cuana su butsepi neje daja hue mepuniunetija.

<sup>9</sup> Edue cuana, quema equene quirica su yama micuana quisana mue micuana sa ai biame a taji mahue quebata jucha aidaji neje. <sup>10</sup> Beju micuaneda mu aimue ema butsepi shanapaeniana mahue. Equene yama micuana quisana edue juchaji cuana jepuiti. Tuna neje bahui ai biame a taji mahue. Aimue yama micuana quisa Diosu peje su jei eputani mahue cuana jepuiti mahue. Juchaji cuana duju su beju micuaneseda puniuneti taji pamapa tsine ejude cuana su. Ye mundo su yani pamapa ai cuana eje puji, tsi puji eimea peje su eirutsuaji cuana. Ye mundo su ecuaneda epuniuneti cama, tuna duju je puniuneti taji. <sup>11</sup> Ahua quebata Cristo jepuiti edue jucha aida epu su, ahua ai cuana eje puji epu su, ahua eimea cuana peje su eirutsua su, ahua cuatsa aidaji epu su, ahua tsetse aida epu su, ahua tsi puji epu su, da su beju tu neje micuana sa ai biame a taji mahue, tueda da edue jucha aidaji putsu. <sup>12</sup> ¿Ai ecuaneseda yani Diosu shanapaji mahue cuana neje? Aimue ecuaneseda cuaja tuaquisa taji mahue huecuana Diosu ja bahui juzga ata cua huecuana. Beju ecuaneseda Cristo jepuiti edue cuana bahui jucha yata su, tuaquisa putsu, butsepiame taji. <sup>13</sup> Da putsu, edue cuana, mejusiacuinaque tueda edue jucha aidaji micuana duju jenetia.

## 6

*Be huaraji cuana peje su medusutiji*

<sup>1</sup> ¿Ai puji micuaneda cama edusutiani

Diusu shanapaji mahue huaraji cuana peje su ai enime cuana ebasetati puji? Micuaneda cama hue jabasetati taji epuani, Cristo jepuiti edue cuana putsu. Be Diusu shanapaji mahue huaraji cuana peje su medusutiji. <sup>2</sup> Bahue mepuenique Cristo peje su jei eputani cuana ja Cristo neje tupupai pamapa tu peje su jei puja mahue cristiano cuana ejuzgatayu. Da putsu, micuaneda cama micuana sa ai enime chidi cuana jabasetati taji epuani. <sup>3</sup> Beju micuaneda ángel cuana di ejuzgayu putsu, ¿jucuaja ni da micuana sa ai enime chidi cuana aimue jabasetati cua mahue ye mundo su yani tupu? <sup>4</sup> ¿Ai puji ni da micuaneda Diusu peje su jei eputani mahue huaraji cuana peje su eputiani Cristo jepuiti edue cuana etuaquisa puji? <sup>5</sup> Beju daja ema micuana peje su emimiani micuana ebidhuame puji. ¿Aimue jia maida micuana duju su piada edue biame yani mahue micuana sa ai enime chidi cuana ebasetati puji? <sup>6</sup> ¿Ai puji ni da piada edue ja pia edue Diusu shanapaji mahue huaraji aida butse su tuaquisata cua?

<sup>7</sup> Beju micuaneseda puji saida mahue pia edue etuaquisa puji huaraji butse su. Ahua quebata edue ja pia edue ebasetani su, be huaraji peje su padusuta. Ebia su saida etuchea puji paciencia neje edue sa jabaseati cuana. Saida mahue edue huaraji peje su edusu puji. <sup>8</sup> Edue huaraji peje su dusu putsu, micuaneda quitaita ebasetiani.

<sup>9-10</sup> Be mepitsatiji. Ai madhada yatani cuana aimue Diusu ecuatsasiati su eputita mahue. Pamapa ai eimea cuana peje su ai irutsuaji, butse mahue biame jaquinatiji, pia sa ebutse neje jaquinatiji, deja tatse jaquinatiji, tsi puji, ai cuana eje puji, tsetse aida, cuatsa aida cuana aimue Diusu ecuatsasiati su enubita mahue. <sup>11</sup> Equene piada piada micuaneda daja puina. Jiahue mu mahue, beju micuana sa jucha cuana Cristo ja dhipa putsu, tuseda puji ichaderatana. Diusu ja micuana nimebutsepiatana Echua Puji Jesucristo jepuiti. Jesucristo, Espíritu Santo detse ja daja atana micuaneseda puji.

### *Equita da Diusu sa puji*

<sup>12</sup> Cristo ja ema d'eji su atana biame, aimue pamapa ai cuana saida ya puji. Beju ecuaneda da pamapa ai cuana ya puji d'eji su. Daja biame, piada piada ai cuana saida mahue ya puji. Be ai papu cuana ja ecuana mepishitiametaja. <sup>13</sup> Ene putsu, Diusu ja ecuana edhe tiatana. Jana di ecuana tiatana edia puji. Daja biame, aimue ecuana sa jana aida pu taji mahue. Diusu ja jana atana edhe sa puji. Beju tueda da betana su Diusu ja etaitanamepeta. Aimue Diusu ja ecuana sa equita cuana tiatana ecuaneda jucha aidaji epu puji, ai utsatada cuana ya puji mahue. Diusu ja ecuana equita

cuana tiatana Echua Puji Jesucristo sa puji. Daja huecha Jesucristo da equita sa puji. <sup>14</sup> Beju cuaja Diusu ja Jesús sa equita eid'e netianametana manujiji cuana duju jenetia nime, daja ecuana sa equita cuana di eid'e enetianametayu mesa tucheda neje.

<sup>15</sup> Edue cuana, micuaneda bahue micuana sa equita cuana da Cristo sa puji. Da su equita da Cristo sa putsu, ¿ema jia maida epuna chuamadhada neje jaduneti cua? ¡Mahue! <sup>16</sup> ¿Bue mahue jia maida micuaneda ahua quebata deja epuna chuamadhada neje eduneti su, tuatseda da piada equita hue pu cua nime? Uja Diusu sa quirica su derejiji yani tueda ai cuana jepuiti: “Ahua betana tuatse sa equita edunetiani su, tuatseda piada hue epuani.” <sup>17</sup> Daja huecha ahua quebata Echua Puji Jesucristo neje dunejiji yani su, tueda da tu neje piada hue epuani.

<sup>18</sup> Da su be tueda jucha meaji. Metuasiuque tueda jucha madhada. Quebata ja tueda jucha yata su, tueda mesa equita quitaita sa puji jucha epuani. Pamapa pia jucha cuana ahua etse a cua su, aimue tueda mu etse sa equita quitaita sa puji jucha mahue. <sup>19</sup> Bahue mepuenique micuana sa equita cuana da Espíritu Santo sa ani jude ete. Tata Diusu ja micuana Espíritu Santo tiatana micuana sa equita cuana dume su paaniti puji. Aimue micuaneda micuana sa equita emetse epuani mahue, Diusu ja chujeneda saida neje micuana bajatana putsu d'eji su yame puji. <sup>20</sup> Da putsu, Diusu sa tsada ai cuana bahui meaque micuana sa equita, piba cuana neje, equita, piba detse da Diusu sa putsu.

## 7

### *Jabutseneti jepuiti quisa*

<sup>1</sup> Edue cuana, quirica su micuaneda ema quisabana ai cuana ye chu yama micuana ejeutsu. <sup>2</sup> Ebia su saida micuaneda ebutseneti mahue puji. Ahua etse cuaja tuchea taji mahue ebainia su, ebia su saida ebutseneti puji, aimue tuahueda jucha yata mahue puji. Pamapa deja sa mesa ehuané neje bahui ani taji. Daja huecha da epuna sa mesa ani taji. <sup>3</sup> Yahue ja ehuané sa ai tsada cuana ape taji. Daja huecha ehuané sa a taji. <sup>4</sup> Ehuané sa equita da yahue sa puji. Daja huecha yahue sa equita da ehuané sa puji. <sup>5</sup> Aimue betana su emenahuéti puji mahue. Ahua tuatseda quejucua tsine chidi puji Diusu emitsu puji enariati mahue su, beju tueda da saida. Tueda tiempo chidi ejaitiana su, beju neicha hue panariatiyu tse, aimue Ishahua ja papirubata tse mahue puji.

<sup>6</sup> Aimue yama micuana tueda ai cuana ecuatsasiainia mahue. Beju yama micuana equisainia quema piba jenetia



bahui. Ahua quebata cuana jabutsenetija su, tueda da saida. <sup>7</sup> Quema piba mu ebia su saida pabutsenetita huecuana mahue puji, ema nime. Beju aimue ecuana daja cama mahue. Diusu sa tsada piada piada pabutsenetita, pia cuana mu pabutsenetita mahue.

<sup>8</sup> Butse mahue, butse manujiji cuana sa puji ebia su saida daja hue butse mahue paputa puji, ema nime. <sup>9</sup> Ahua etse cuaja tuchea taji mahue ebainia su, ebia su saida ebutseneti puji mesa utsatada cuana ja tueda epishitiameta mahue puji.

<sup>10</sup> Beju Echua Puji Jesucristo ja jei eputani jabutsenetijiji cuana uja ecuatsasiatani: Aimue ehuanne ja mesa yahue pamesiaenita mahue. <sup>11</sup> Ahua tueda emesiaenita su, aimue pia deja neje neicha tuseda jahueti taji mahue. Ebia su saida mesa yahue neje pabasetati puji, tuatseda huamahuama saida paaniti puji. Daja huecha aimue yahue sa mesa ehuanne mesiaeni taji mahue.

<sup>12</sup> Edue cuana, tueda jaquisati cuana de quema piba cuana jenetia. Aimue Echua Puji sa jacuatsasiati mahue. Ahua quebata Cristo jepuiti edue sa ehuanne aimue Cristo peje su jei puji mahue su, daja biame, ehuanne yahue neje anienitija su, aimue yahue sa ehuanne mesiaeni taji mahue. <sup>13</sup> Daja huecha ahua quebata Cristo jepuiti edue epuna sa yahue aimue Cristo peje su jei puji mahue su, daja biame, yahue ehuanne neje anienitija su, aimue ehuanne sa yahue mesiaeni taji mahue. <sup>14</sup> Cuapuitime yahue jei puji mahue da Cristo peje su jei pu cua ehuanne jepuiti, tu neje jamesiatija mahue putsu. Daja huecha ehuanne jei puji mahue Cristo peje su jei pu cua yahue jepuiti, tu neje jamesiatija mahue putsu. Ahua tata detse emesiaeniti su, aimue saida mahue ebacua cuana sa puji. Ahua tata detse aimue emesiaeniti mahue su, tueda da ebia su saida ebacua cuana sa puji, cuapuitime ebacua cuana di Cristo peje su jei puta cua putsu. <sup>15</sup> Ahua quebata tuatseda jei puji mahue jamesiaenitija epu su, pamesiaeniti tse, Diusu sa tsada ecuaneda saida paaniti putsu. <sup>16</sup> Ahua quebata tuatseda putiyuja epu su, nahue taji mahue. Beju paputiyu a taji. Ahua yaniti su, bue mahue ecuaneda, ahua Cristo peje su jei epu, ahua mahue. Da putsu, ebia su saida pamesiaeniti tse, ahua tuatse sa tsada su.

<sup>17</sup> Cuaja equene ecuaneda Echua Puji peje su jei puana jenetia, daja hue ecuaneseda puniunetidera taji. <sup>18</sup> Ahua quebata judío puina Cristo peje su jei puana jenetia, daja hue judío mesa pu taji, Cristo peje su jei epuani biame. Daja huecha ahua quebata judío mahue puina Cristo peje su jei puana jenetia, daja hue judío mahue mesa pu taji, Cristo peje su jei epuani biame. Jahuitsanasiquiti taji mahue. Judío pu

taji mahue. <sup>19</sup> Tueda ai eni mahue Diusu butse su. Beju Diusu sa mu tsada mesa jacuatsasiati cuana bahui paata puji. <sup>20</sup> Cuaja mida anime puina nime, Diusu ja mida dharetana jenetia, daja hue puderati taji. <sup>21</sup> Ahua mida esclavo puina biame Cristo peje su jei puana su, beju daja miqueda puderati taji. Daja biame, ahua mida d'ejí su pu cua su, beju tueda da miqueda puji ebia su saida. <sup>22</sup> Mida esclavo puina biame Echua Puji Jesucristo peje su jei puana jenetia, Cristo ja mi jucha sa eme jenetia d'ejí su atana. Ahua mida esclavo mahue puina biame Cristo peje su jei puana jenetia, beju jiahue mida Cristo sa esclavo. <sup>23</sup> Edue cuana, be pia deja cuana sa esclavo mepuji, Cristo ja chujeneda neje micuana bajatana putsu. <sup>24</sup> Da su cuaja micuaneda anime puina nime Cristo peje su jei puana jenetia, daja hue Diusu neje puniuneti taji.

<sup>25</sup> Beju butse mahue cuana yama equisainia, ebia su saida butse mahue paanitita huecuana puji. Tueda quisa da quema piba quitaita jenetia. Aimue tueda mu Cristo sa jacuatsasiati mahue. Meid'abaenique quema quisa cuana, Diusu ja ema etsahuatani putsu, micuana saida butsepi equisa puji. <sup>26</sup> Ebia su saida aimue ebutsenetita huecuana mahue puji, enime cuana ebia su iyuda epuani putsu. Da putsu, pamapa edue cuana cuaja anime puina nime, daja hue paanitita huecuana. <sup>27</sup> Edue cuana, ahua micuaneda jabutsenetijiji su, daja hue meanique. Be memesiatiji. Ahua micuaneda jabutsenetiji mahue su, daja hue meanique. Be mebutsenetiji. <sup>28</sup> Daja biame, quebata ebutseneti su, aimue tuahueda jucha yatani mahue. Beju yama epibainia ebia su saida mebutsenetique mahue, ye mundo su jiahue ebia su sufrimiento cuana yani putsu. Quema tsada mahue micuaneda sufri epu. Da putsu, yama micuana daja equisainia.

<sup>29</sup> Edue cuana, yama micuana jubida equisainia, tiempo beju epupeni. Echua Puji beju tipeida epueicha. Jabutsenetijiji cuana jabutsenetiji mahue nime paputa. <sup>30</sup> Epadarititani cuana epadarititani mahue nime paputa. Beidaji cuana beidaji mahue nime paputa. Iruiruji cuana iruiruji mahue nime paputa. <sup>31</sup> Be ye mundo sa ai cuana ebia su tsada mebaji, tiempo beju epupeni putsu. Daja huecha ye mundo sa ai cuana tipeida ejaitianatani beju.

<sup>32</sup> Tsada quema micuaneda d'ejí su epu ye mundo sa ai cuana jenetia. Deja huane mahue cuana ja Cristo saida mebajata cua, tuna mehua yanita putsu. Cristo sa ai cuana su bahui mecuana sa piba. Cuaja Cristo beidaji yame puji bahui mecuana sa piba. <sup>33</sup> Deja huaneji cuana ja mu aimue Cristo saida mebajata cua mahue, familia cuana mecuana sa ba taji putsu. <sup>34</sup> Daja huecha epuna ahue mahue cuana ja

Cristo saida me bajata cua, tuna mehua yanita putsu. Epuna ahueji cuana ja mu aimue Cristo saida me bajata cua mahue, familia cuana mecuana sa ba taji putsu.

<sup>35</sup> Beju daja yama equisainia micuana etsahua puji. Aimue yama micuana menahue putsu, daja equisainia mahue. Quema tsada micuaneda ye mundo sa ai cuana jenetia d'oji su epu Cristo saida emebaja puji.

<sup>36</sup> Quebata deja sa ebia su saida mesa ebaquepuna pahueti tsada su, tusa mara beju ejaitianani putsu, tueda da saida. Pahueti beju ebaquepuna. <sup>37</sup> Quebata deja sa mu mesa ebaquepuna pahueti tsada mahue su, tueda da saida. Be pahueti mesa ebaquepuna. <sup>38</sup> Quebata deja ja mesa ebaquepuna yahuetiatani su, tuahueda saida yatani. Quebata deja ja mu mesa ebaquepuna ahuetiaja mahue yata su, tuahueda pia deja ebia su saida quita yatani.

<sup>39</sup> Beju ehuanes mesa yahue neje dunejiji yani, yahue eid'e tupu. Ahua yahue beju emanu su, epuna da d'oji su epuani pia deja neje yahueti puji. Tueda deja da Cristo jepuiti edue papu. <sup>40</sup> Beju yama epibainia ahue mahue sa puji ebia su saida daja hue ahue mahue papuderati. Ebia su beidaji tueda epu. Beju daja da quema piba cuana micuaneseda puji. Tueda da quema piba hue biame, Diosu sa piba cuana neje tupupai yama epibainia.

## 8

*Bid'umimi diusu eimea cuana peje su irutsuajiji jana jepuiti quisa*

<sup>1</sup> Pia micuana sa jaquisabati cuana jiahue yama ejeutsu. Uja yama micuana equisa diusu eimea cuana peje su irutsuajiji jana cuana jepuiti. Beju pamapa micuaneda ye ai cuana jepuiti bahue eni pepe hue ebatiani. Micuaneda daja aida ebatiani, ebia su bahue eni pepe hue epibatiani putsu. Beju ebia su saida micuaneda cama huamahuama ibuneda ebatu puji. Ahua etse pia cuana ebia su ibuneda ebainia su, aimue tueda quitaita aida ebatiani mahue. Pia cuana sa puji saida bahui epibata. <sup>2</sup> Ahua quebata pamapa ai cuana bahue eni pepe epuani su, tueda da ene putsu bue mahue. <sup>3</sup> Ahua quebata Diosu ibuneda ebatiani su, Diosu ja tueda eshanapatani.

<sup>4</sup> Edues cuana, yama micuana equisa eimea cuana peje su irutsuajiji jana dia taji, ahua mahue. Beju ecuaneda bahue tueda bid'umimi diusu eimea cuana da aimue eid'e mahue. Diosu mu hue eid'e. <sup>5</sup> Beju cristiano cuana sa tsapiapiati eimea cuana yani. Tuneseda puji yahua, buepa su dueji diusu cuana yani pepe hue eputani. <sup>6</sup> Beju ecuaneseda puji

mu piada hue Tata Diosu yani. Tuahueda pamapa ai cuana ataidha. Ecuanaeda di ataidha tuseda epu puji. Jesucristo bahui da ecuana sa Echua Puji. Tu jepuiti pamapa ai cuana yani. Daja huecha tu jepuiti ecuaneda eid'e yani.

<sup>7</sup> Beju aimue pamapa edue cuana ja tueda ai cuana eshanapaenitani mahue. Tueda eimea cuana di Diosu nime eid'e pepe putana huecuana, Cristo shanapaji mahue huecuana su, tueda eimea cuana peje su jei putaina su. Jiahue Cristo eshanapatani huecuana putsu, aimue eimea cuana peje su irutsuajiji jana diaja yatani huecuana mahue, tueda eimea cuana eid'e pepe hue eputani huecuana tsuhu putsu. Tueda irutsuajiji jana ahua diata cua huecuana su, jucha yatani pepe eputani huecuana. <sup>8</sup> Da putsu, edue cuana, bahue mepuenique ahua ecuaneda irutsuajiji jana dia cua ahua mahue su, Diosu sa puji mu mue cuaja biame. D'ejí ecuaneseda yani edia puji, ahua edia mahue puji. <sup>9</sup> Beju micuaneda tueda ai cuana eshanapaeninia putsu, tueda jana micuaneda dia bahue. Micuaneseda puji mu mue cuaja biame. Beju daja biame, Diosu sa ai cuana tupu shanapaji mahue edue be jucha amejí. <sup>10</sup> Piada piada edue shanapaji cuana sa puji beju saida tueda irutsuajiji jana edia puji eimea sa templo su, tueda eimea cuana da eid'e mahue eshanapatani huecuana putsu. Pia edue tupu shanapaji mahue ja mu aimue daja eshanapatani mahue, eimea cuana eid'e pepe eputani putsu. Ahua tuahueda pia shanapaji edue cuana eimea sa templo su jana ediatani bata cua su, cuapuitime tuahueda di janimetucheati cua irutsuajiji jana edia puji, tuseda puji saida mahue tueda jana edia puji biame, eimea cuana eid'e pepe epuani putsu. <sup>11</sup> Da su edue irutsuajiji jana diaji cuana ja pia edue tupu shanapaji mahue jucha ameta cua, diame putsu. Beju mepibaenitique tuseda puji di Cristo manuana. <sup>12</sup> Ahua quebata edue ja pia edue tupu shanapaji mahue daja jucha yameta su, tuahueda Cristo sa puji jucha yatani pu cua nime. <sup>13</sup> Da su ahua yama pia edue tupu shanapaji mahue jucha ame cua irutsuajiji jana diame putsu, ebia su saida yama tueda jana mue dia ya puji.

## 9

### *Cristo sa apóstol*

<sup>1</sup> Beju d'ejí su da ema deja cuana sa jacuatsasiati cuana jenetia, Diosu sa apóstol putsu. Yama Echua Puji Jesucristo bana. Micuaneda quitaita Cristo peje su jei puana quema quisaquisa cuana jepuiti. <sup>2</sup> Pia cuana ja ema Diosu sa apóstol mahue nime ebatani. Daja biame, micuaneseda puji ema apóstol shanapa taji, micuaneda Cristo peje su jei puana

quema quisaquisa jepuiti. <sup>3</sup> Uja da yama ejeitsuinia ema madhabaji cuana: <sup>4</sup> Cuaja micuaneda pia apóstol cuana ebainia nime, daja huecha ema micuaneseda ba taji. <sup>5</sup> Ahua ema huaneji pu cua su, yama di quema ehuané dusu cua Pedro, pia apóstol, Jesús sa edue cuana ja yatani nime, quisaquisa eputitani huecuana su. <sup>6</sup> ¿Jucuaja su ni micuaneda tuneda bahui etsahuainia? ¿Jucuaja su ni micuaneda ema Bernabé neje aimue tsahuaja yainia mahue? Etseju sa jubida mudumudu taji etseju sa ai dia taji cuana ebajati puji, aimue micuaneda etseju tsahuaja mahue yainia putsu. Pia quisaquisa puji cuana sa mu aimue mudumudu taji mahue, micuaneda etsahuainia huecuana putsu. <sup>7</sup> Mejeitsuque ema, ¿ai soldado cuana sa chujetia taji tuna sa ai dia taji cuana bata? Tuna sa echua puji ja etiatani huecuana. Daja huecha, ¿aimue jia maida te emetse ja mesa jabanati ejaja cuana diata cua mahue? ¿Aimue jia maida huisha quinaji ja huisha sa leche id'ita cua mahue? <sup>8</sup> Daja huecha Diosu sa quisaquisa puji cuana sa chujetia taji. Aimue tueda quema piba mahue bahui. Daja Moisés chenu ja cuatsasiataidha. <sup>9</sup> Uja derejiji yani Diosu sa quirica su: “Be juye ehuibud'equeji ichaji emudia epuneti su.” Daja cuatsasiataidha Moisés chenu ja juye emudia epuneti cama, tuseda diadia taji echuje puji. ¿Ai Moisés chenu ja daja cuatsasiataidha juye cuana sa saida puji bahui bata. Daja cuatsasiataidha ecuana sa saida puji. <sup>10</sup> Da neje Diosu ja ecuana ebuetsuatani mesa quisaquisa puji cuana edue cuana sa chujetia taji. Beju ebanaji, huiruhuiruji cuana pamapa mecuana sa dia taji banajiji ejaja cuana. <sup>11</sup> Da putsu, micuaneseda etseju tsahua taji micuana sa ai chidi cuana neje, etseju micuana sa muesumu su Diosu sa mimi banana putsu. <sup>12</sup> Pia quisaquisa puji cuana micuaneda tsahua bahue. Beju tueda da saida. Etseju di micuaneseda tsahua taji ebia su, etseju equene micuana peje su Diosu sa quisa saida cuana quisaquisa puana putsu. Beju daja biame, aimue yama micuana jubida bajana mahue micuaneda etseju tsahua puji. Etseju quitaita hue jachacutiana etseju sa ai dia taji cuana. Beju daja etseju mudumuduana micuana duju su etseju sa ai dia taji cuana ebajati puji. Daja etseju puana micuana duju su etseju sa ai dia taji cuana ebajati puji. Daja etseju puana micuana duju su micuaneda eshanapa puji aimue etseju micuana sa ai chidi cuana tsada bana mahue.

<sup>13</sup> Micuaneda bahue Diosu ja cuatsasiataidha, pamapa mesa templo su emebajaji cuana sa templo jenetia tuna sa ai dia taji cuana jemi taji. Diosu sa altar muduji sacerdote cuana sa di Diosu peje su irutsuajiji aicha jenetia jemi taji padiadiata huecuana puji. <sup>14</sup> Daja huecha Echua Puji Jesu-

cristo ja ecuana cuatsasiatana, mesa quisaquisa puji cuana chujetiajiji pu taji, mesa quisa saida quisaquisa eputani huecuana putsu. <sup>15</sup> Beju daja biame aimue yama micuana chipilu bajana mahue. Aimue yama micuana ye quirica ebeituinia mahue micuaneda ema chipilu etia puji mahue. Ema diadi-aja pamanuneti biame, aimue yama micuana echuje ebaja mahue.

<sup>16</sup> Diusu sa quisaquisa puji jabati putsu, aimue ema aida ebatiani mahue. Aimue yama tueda mudu dhareana mahue, Diusu ja ema da puji dharetana putsu. Diusu sa quisa saida cuana quema puji cuaja quisaquisa puriji taji mahue. Ahua ema quisaquisa puriji cua su, aba ema, da puji ema Diusu ja dharetana putsu. <sup>17</sup> Ahua ema quema tsada hue Diusu sa quisa saida quisaquisa epuani su, da su Diusu ja ema echuje tiata cua. Beju aimue daja mahue. Aimue quema piba jenetia mahue, Diusu ja ema dharetana putsu, mesa quisa saida quisaquisa epu puji. Da putsu, aimue yama echuje echacuinia mahue. <sup>18</sup> Beju ema mu beidaji Diusu sa quisa saida cuana cristiano cuana peje su cha quisaquisa puniuneti hue epu puji. Beju tueda da quema echuje puji. Edue cuana sa chuje tia taji ema biame, aimue yama baja bue mahue huecuana.

<sup>19</sup> Da su aimue ema aidhe sa eme su yani mahue, aimue aiya biame ema echuje etiatani mahue putsu. Beju daja ema aidhe sa eme su yani mahue biame, ema da pamapa cristiano cuana sa emebajaji Cristo peje su edusu huecuana puji. <sup>20</sup> Ema judío cuana neje yani su, ema judío nime ebametiani, quema quisaquisa cuana id'abame putsu, Cristo peje su edusu huecuana puji. <sup>21</sup> Daja huecha ema judío mahue cuana neje yani su, ema judío mahue nime ebametiani Cristo peje su edusu huecuana puji. <sup>22</sup> Ema tupu shanapaji mahue edue cuana neje yani su, ema tupu shanapaji nime ebametiani tuna etsahua puji. Beju quebata cristiano cuana papu biame ema neje yani su, tuna nime ebametiani, cuapuitime piada piada tuneda Cristo peje su yama dusu cua putsu. <sup>23</sup> Daja ema epuani cristiano cuana peje su Diusu sa quisa saida cuana saida quisaquisa epu puji.

<sup>24</sup> Bahue micuaneda ejududutani su, jucuada deja cuana ejududutani. Beju piada betsuda ja bahui echuje einatsuta. Micuaneda da ejududutani cuana nime. Da su tuna nime menimetuheatique Diusu ebia su saida emebaja puji, mesa echuje einatsu puji. <sup>25</sup> Pamapa jasitutiji cuana tuneseda puji ai saida mahue cuana eichaderatani. Ebia su esitubuetsuatitani huecuana eina jenetia ajiji corona einatsu puji echuje puji. Tueda eina jenetia ajiji echuje tipeida etaitanape biame, jubida echacutani huecuana. Beju ecuandeda mu Diusu

jubida, saida emebajainia mesa pupe bue mahue echuje einatsu puji. <sup>26</sup> Da su cuaja jasitutiji cuana ja echuje jubida echacutani nime, daja yama Diosu saida meabajaja yainia. <sup>27</sup> Da putsu, pamapa quema puji ai saida mahue cuana yama eichaderainia. Quema equita sa ai utsatada cuana neje ema etupuatiani. Daja ema epuani Diosu saida emebajaderati puji, aimue tuahueda ema eichaderata mahue puji.

## 10

### *Diosu eimea cuana jepuiti quisa*

<sup>1</sup> Edue cuana, be mesetaji judío cuana sa tata chenu cuana. Cuaja putaidha huecuana d'anita yahua je putaniunetidha huecuana su, be mesetaji. Diosu ja judu neje huidusutaidha huecuana. Tueda judu tuna hui su puniunetidha putsu, tije ataidha huecuana. Mar Dherena dusetete je, ena sarajiji yahua murida bia je jaitianataidha huecuana. <sup>2</sup> Moisés chenu da tuna sa ehuidusuji echua puji puidha. Pamapa tuneda tu neje dunejiji anidha. <sup>3-4</sup> Diosu ja mihuataidha huecuana. Tumu jenetia yahui cuinanametaidha tuna eid'ime puji. Cristo bataji mahue tuna neje anidha etsahua huecuana puji. Beju tuneseda puji Cristo da tumu epa jenetia yahui cuinanaidha nime puidha, tu peje jenetia eid'e jaametiji yahui cuinanaidha putsu. <sup>5</sup> Daja puidha biame, dueji tuneda aimue Diosu beidaji ametaidha mahue, Diosu sa jacuatsasiati cuana aja mahue ataidha putsu. Da su Diosu ja manuametaidha huecuana d'anita yahua su.

<sup>6</sup> Beju tueda biahua tiempo ai cuana da daja puidha ecuaneseda saida puji, tuna ataidha nime ai utsatada madhada cuana aimue ecuaneda yaicha puji mahue. <sup>7</sup> Be micuaneda diosu eimea peje su irutsuaji cuana mepuji, tuna putaidha nime. Beju uja derejiji yani Diosu sa quirica su tuna jepuiti: "Tuneda anitutetaidha ediadia, eid'iti puji. Nentanataidha huecuana diosu eimea cuana butse su etiritiri puji." <sup>8</sup> Be ecuaneda mecuana sa ai utsatada madhada cuana paatija. Tuneda tuna sa ai utsatada madhada cuana ataidha putsu, Diosu ja beta tunca quimisha ejaitiana mil manuametaidha piada tsine su. <sup>9</sup> Aimue ecuaana sa Echua Puji Jesucristo aba taji mahue. Daja tuneda Diosu abataidha putsu, Diosu ja madhada bacua cuana beitutana tuna peje su pamanuameta huecuana puji. <sup>10</sup> Be memimibapebapeja Diosu sa puji. Daja piada piada cuana ja ataidha putsu, Diosu ja mesa ángel beitutana pamanuameta huecuana puji.

<sup>11</sup> Beju daja puidha biahua tiempo ecuaana sa saida puji. Pamapa tueda puidha cuana da derejiji yani ecuaneda emimiamé puji. <sup>12</sup> Parejatita Diosu peje su janimetuchteatiji

pepe hue eputani cuana padajajata mahue puji. <sup>13</sup> Pamapa cristiano cuana sa tupupai abajiji pu taji. Beju daja biame, Diosu ja ecuana etsahuata pamapa japirubati cuana etucheame puji. Ishahua ja epiruba puji enariata su, Diosu ja ecuana etucheameta.

<sup>14</sup> Da su, edue cuana, mepibaenique quema mimi cuana diusu eimea cuana jepuiti. Menetideraque tueda diusu eimea cuana jenetia. <sup>15</sup> Beju micuaneda eshanapaeninia tueda ai cuana. Mebaque quema mimi cuana butsepi ahua mahue. <sup>16</sup> Ecuanaeda Echua Puji sa cena ediania su, diusulupai Tata Diosu ecuanaeda yainia Cristo sa ami d'uichajiji, mesa equita ped'uped'uajiji sa puji. Ecuanaeda vino iyuda eid'inia su, ecuanaeda tu neje dunejiji yani ebametani Cristo sa ami curusu su d'uichajiji jepuiti. Daja huecha pan ediania su, ecuanaeda tu neje dunejiji yani ebametani Cristo mesa equita curusu su jamenajatiatiana jepuiti. <sup>17</sup> Ecuanaeda dueji biame, pamapa ecuanaeda Cristo peje su dunejiji yani.

<sup>18</sup> Daja huecha israelita cuana sa sacerdote cuana edunetitan Diusu peje su irutsuajiji jana ediatani huecuana su. <sup>19</sup> Aimue eimea irutsuaji cuana tueda bid'umimi diusu eimea cuana neje edunetitan mahue, irutsuajiji jana ediatani huecuana su, tueda eimea cuana eid'e mahue putsu. Ene putsu, aimue bid'umimi diusu eimea quitaita cuana peje su jana eirutsuatani huecuana mahue. <sup>20</sup> Da mu tueda eimea irutsuaji cuana ja einid'u madhada cuana peje su jana eirutsuatani. Aimue Diosu peje su eirutsuatani huecuana mahue. Beju quema tsada mahue micuaneda einid'u cuana neje dunejiji yani epu. <sup>21</sup> Micuaneda Echua Puji Jesucristo sa misha su ediadiani putsu, aimue einid'u madhada cuana sa misha su di diadia taji mahue. <sup>22</sup> Micuaneda da Diosu sa puji dharejiji cuana putsu, ¿ai puji ni micuaneda Diosu duininiameja? ¿Micuaneda jia maida tu ebia su tucheda?

### *Pia sa ai saida puji mechacuke*

<sup>23</sup> Beju micuaneda d'eji su putsu, pamapa ai cuana a cua. Ahua micuaneda bid'umimi diusu eimea peje su irutsuajiji jana diaja su, beju daja a cua. Daja biame, ebia su saida padiadia mahue, cuapuitime pia edue ja jucha ata cua, micuana jana ediania ba putsu. <sup>24</sup> Be micuaneseda saida puji mechacuji. Pia edue cuana sa saida puji chacu taji.

<sup>25</sup> Beju meaque cuaja yama equisa nime. Micuaneda aicha iru jude su aicha ebajati su, be mequisabaji ahua eimea peje su irutsuajiji. Da su aimue tueda mu cuaja biame micuaneseda puji, mue shanapa putsu. <sup>26</sup> Saida tueda aicha ebaja puji, pamapa ye mundo sa ai cuana da Diosu sa putsu. Tuahueda pamapa ai cuana ichatana ecuana sa saida puji.



<sup>27</sup> Ahua quebata Diosu peje su jei puji mahue ja micuana ediadia puji eihuata su, beju meputique hue. Mediaque pamapa ediaji ai cuana mishu su eichatani huecuana. Be mequisabatiji que jenetia tueda aicha. <sup>28</sup> Ahua pia edue ja micuana: “Tueda aicha eimea peje su irutsuajiji”, equisatani su, da su ebia su saida edia mahue puji, aimue tueda edue cuaja biame ya mahue puji. <sup>29</sup> Micuaneseda tueda edue sa piba saida ba taji. Micuaneseda puji tueda aicha edia puji mue ai jucha biame, ebia su saida be edia mahue puji, aimue tueda edue cuaja biame ya mahue puji. <sup>30</sup> Ahua cuapuitime quebata micuaneda uja epu: “¿Ai puji ni da yama pia sa enime tije a cua? ¿Ahua yama tueda jana sa puji Diosu diusulupai yainia su, ai puji ni da ema pia cuana ja mimimadhabata cua?” <sup>31</sup> ¡Jade! Yama micuana ejeutsu. Pamapa micuaneda yainia cuana Diosu sa puji micuaneseda a taji. Ahua micuaneda ediadiani su, ahua eid'itiani su, pamapa micuaneda ai yainia cuana Diosu sa puji a taji. <sup>32</sup> Be cristiano cuana cuaja biame meaji. Be judío, Diosu peje su jei puji mahue, Cristo jepuiti edue cuana cuaja biame meaji. <sup>33</sup> Pamapa cristiano cuana neje saida meanija. Pia sa saida puji mechacunque. Cuaja yama pamapa cristiano cuana saida bame yainia nime, daja huecha micuaneseda bame a taji Cristo peje su jei paputa huecuana puji.

## 11

<sup>1</sup> Edue cuana, cuaja yama Cristo sa ai puiti cuana yainia nime, daja quema ai puiti cuana micuaneseda a taji.

### *Epuna cuana cuaja ilisha su jadasutime pu taji*

<sup>2</sup> Beidaji ema micuaneda quema jabuetsuati cuana aimue setana mahue. Yama micuana tiana jabuetsuati cuana micuaneda yainia jiahue teje. <sup>3</sup> Beju yama micuana pia jabuetsuati macha equisa. Cristo da pamapa edue deja cuana sa echua puji. Daja huecha yahue cuana da ehuanne cuana sa echua puji. Tata Diosu da Cristo sa echua puji. <sup>4</sup> Ahua quebata daja ja cristiano cuana butse su jachuad'amati Diosu emitsutani, ahua quisaquisa epuani su, beju Cristo ebidhuametani. <sup>5</sup> Daja huecha ahua quebata epuna jachuad'amati mahue ja cristiano cuana butse su Diosu emitsutani, ahua quisaquisa epuani su, beju mesa yahue ebidhuametani. Tueda da piabidhutada jachuarajapetijiji nime. <sup>6</sup> Ahua quebata epuna jachuad'amati mahue su, pachuarajapeti. Beju ahua daja jaatija mahue su, pachuad'amati. <sup>7</sup> Deja sa mu aimue jachuad'amati taji mahue Diosu emitsutani, ahua quisaquisa epuani su, tueda Diosu ja tu nime ataidha putsu. Beju epuna mu Diosu ja ataidha deja sa puji. <sup>8</sup> Aimue deja

epuna jenetia Diusu ja ataidha mahue. Beju epuna da Diusu ja deja jenetia ataidha. <sup>9</sup> Daja huecha aimue Diusu ja deja ataidha epuna sa puji mahue. Epuna da Diusu ja ataidha deja sa puji. <sup>10</sup> Da putsu, epuna sa jachuad'amati taji tueda deja sa jacuatsasiati ema su yani ebame puji, ángel cuana ebatani putsu. <sup>11</sup> Edue cuana daja epuani biame, deja epuna cuana huamahuama etsatitani, daja Diusu ja ichataidha putsu. <sup>12</sup> Equene epuna deja jenetia Diusu ja ataidha biame, pamapa deja cuana epuna peje jenetia bataji eputani. Beju betana su Diusu peje jenetia tuatseda.

<sup>13</sup> ¿Jucuaja micuaneda epibainia tueda ai cuana jepuiti? ¿Ahua butsepi epuna ja Diusu pamitsuta jachuad'amatiji mahue cristiano cuana butse su, ahua mahue? <sup>14</sup> Daja huecha deja sa puji bidhutada chuaina bauda epu puji. <sup>15</sup> Beju epuna sa puji mu saida echuaina bauda epu puji. Tueda echuaina bauda da tuseda puji echuad'amaji pu cua nime. <sup>16</sup> Ahua quebata ja tueda ai cuana jepuiti jacuicuinatija su, uja yama tueda, daja pamapa cuana eputani, equisainia.

*Echua Puji sa cena su bidhutada ai cuana atana huecuana (Mateo 26.26-29; Marcos 14.22-25; Lucas 22.14-20)*

<sup>17</sup> Beju jiahue yama micuana equisa Echua Puji Jesucristo sa cena jepuiti. Micuaneda edhitatiani je, Echua Puji sa cena edia puji, aimue saida, butsepi yainia mahue, saida a taji biame. Aimue micuaneda cama dunejiji yani mahue. <sup>18</sup> Pia cuana ja ema equisatani micuana sa jadhitati jepuiti. Micuaneda edhitatiani su, ebia su yacuicuinatiani micuaneda cama ema equisatani huecuana. Ebia su esajasajatiani micuaneda. ¿A da ene quita ema daja equisatani huecuana? <sup>19</sup> Enei hue jasajasajatiji cuana jepuiti Diusu sa ene quita jabuetsuati cuana micuaneda eshanapa. <sup>20</sup> Micuaneda edhitatiani su, Echua Puji sa cena edia puji ebia su esajasajatiani. Ebia su yacuicuinatiani micuaneda cama. ¿Ai tueda Echua Puji Jesucristo sa cena bata? <sup>21</sup> Micuaneda edhitatiani ediadia, eid'iti puji bahui. Micuana sa duseana jana cuana tipeida ediapainia. Pia edue jana mahue cuana aimue micuaneda etiainia mahue. Da su piada piada edue cuana da edhemanu yanita biame, pia cuana mu ebia su esejetani, etsetse teje eputani huecuana. <sup>22</sup> ¿Jucuaja su ni da micuaneda micuana sa ete cuana su aimue esejeani mahue? ¿Ai puji ni da micuaneda tueda bidhutada cuana yainia puri edue cuana ebidhuame puji, edhitatiani je? ¿Ai ema micuana sa puji saida emimi, tueda ai bidhutada ai cuana a putsu bata? Aimue yama daja ya mahue.

*Echua Puji sa cena*

<sup>23</sup> Beju Echua Puji Jesucristo quitaita ja ema quisatana cuaja mesa cena su edue cuana sa jadasuti taji. Cuaja yama micuana equene su quisana nime, neicha yama micuana equisa tusa cena jepuiti. Tueda dhidha su discípulo cuana jadhitatitana cena edia puji. (Tueda dhidha su huecha Judas ja Echua Puji Jesucristo menajatiatana sacerdote cuana peje su.) <sup>24</sup> Jesús ja pan jemitsua putsu, diusulupai Diosu atana. Ped'u putsu discípulo cuana uja atana: “Ye pan da quema equita micuaneseda puji emanu puji menajatiajiji epu pu cua nime. Mediapeque, ema piba putsu.” <sup>25</sup> Daja huecha diadiape putsu, vinoji emeji jemitsua putsu, uja atana huecuana: “Ye vino da quema ami pu cua nime. Tueda ami ed'uichati putsu, Diosu ja cristiano cuana mesa jamitsuti eichacua etiata. Meid'ipeque, ema epiba putsu.” Daja atana Jesús ja mesa discípulo cuana. <sup>26</sup> Edue cuana, da su micuaneda tueda pan ediania, vino eid'inia su, Cristo curusu su manuana piba taji. Daja a taji tu esiapati teje.

### *Cuaja Echua Puji sa cena diame a taji*

<sup>27</sup> Beju quebata ja tueda pan, vino madhada neje hue ediatani su, aimue Cristo sa equita, ami eiyubatani mahue. <sup>28</sup> Da su edue cuana, Echua Puji sa cena diaji mahue su, equene mepibaenique ai jepuiti micuaneda pan, vino diaja yainia. Ahua etse Echua Puji sa cena iyuda neje edia su, ediadiani cama, ahua Cristo sa equita, ami jepuiti epiba su, beju tuahueda saida yatani. <sup>29</sup> Ahua etse Echua Puji sa cena iyuda mahue neje ediadia puji bahui eputi su, Diosu ja tueda ecastigata. <sup>30</sup> Da putsu, piada piada micuaneda nedaji, Echua Puji sa cena iyuda mahue neje ediainia putsu. Piada piada micuaneda manuana. <sup>31</sup> Cena su putiji mahue su, ecuaneseda japibaeniti taji ahua ecuaneda iyuda neje edia, ahua mahue. Ahua daja ecuaneda epu su, aimue Diosu ja ecuana ecastigata mahue. <sup>32</sup> Ahua ecuaneda iyuda mahue neje Echua Puji sa cena edia su, Diosu ja ecuana ecastigatayu. Daja yatayu ecuana ibunedata ebatani putsu, ecuana ebutsepame puji. Daja yatayu ecuana Diosu peje su jei puji mahue cuana neje tupupai econdenata mahue puji.

<sup>33</sup> Da su, edue cuana, micuaneda Echua Puji sa cena edia puji edhitiani su, meid'uatique huamahuama ediadia puji. <sup>34</sup> Ahua quebata ebia su edhemanuani su, ahua sejeja bahui su, tusa ete su hue padiadia. Ahua daja epu su, aimue Diosu ja tueda ecastigata mahue. Beju pia ai cuana quema yani micuana equisa puji. Ema micuana peje su eputiicha su, yama micuana equisa.

## 12

### *Espíritu Santo sa jatiati ai cuana jepuiti quisa*

<sup>1</sup> Edue cuana, jiahue yama micuana equisa Espíritu Santo sa jatiati ai cuana jepuiti micuaneda eshanapaeni puji.

<sup>2</sup> Micuaneda Diosu shanapaji mahue su, tsapiapiati eimea mimi bue mahue cuana peje su puti bahue puina tuna emit-sutsua puji. <sup>3</sup> Beju yama micuana equisa cuaja micuaneda bahue pume pu cua ahua Espíritu Santo ja etse emimi-ametani, ahua mahue: Ahua Espíritu Santo ja etse emimi-ametani su, aimue detse etse Jesucristo sa puji madhada hue mimi cua mahue. Espíritu Santo ja bahui etse, “Jesús da Echua Puji”, ameta cua.

<sup>4</sup> Edue cuana, Espíritu Santo sa jatiati ai cuana tsapiapiati ecuana etiatani ecuaneda saida Diosu emebaja puji. Mesa jatiati ai cuana tsapiapiati biame, tueda mu piada hue.

<sup>5</sup> Ecuaneda tsapiapiati neje emebajainia biame, Echua Puji mu piada hue. <sup>6</sup> Beju tsapiapiati mudu cuana yani biame, Diosu ja huecha ecuana etsahuatani tueda ai cuana ya puji, tueda mu piada hue putsu. <sup>7</sup> Diosu ja Espíritu Santo ecuana metse su hue etiatani pamapa Diosu peje su jei eputani cuana sa saida puji. <sup>8</sup> Tuahueda piada piada mesa tucheda etiatani mesa ai bahue eni cuana emimi puji. Pia cuana eshanapametani edue cuana pabuetsuata huecuana puji.

<sup>9</sup> Pia cuana Diosu peje su jubida nimetucheda yametani. Pia cuana tucheda etiatani cristiano nedaji cuana pasaisiameta puji. <sup>10</sup> Pia cuana tucheda etiatani ai nimetiuda aida cuana ya puji. Pia cuana tucheda etiatani quisaquisa papu puji. Pia cuana eshanapametani, ahua einid'u madhada cuana ja cristiano cuana emimiametani, ahua Espíritu Santo ja emimiametani. Pia cuana tucheda etiatani tsapiapiati yana cuana su pamimi puji, bue mahue biame. Pia cuana eshanapametani cuaja tueda yana cuana su emimiani pamapa dapia yanita edue cuana pashanapameta puji. <sup>11</sup> Tueda pamapa mesa jatiati ai cuana Espíritu Santo ja tsapiapiati edue cuana etiatani, cuaja mesa tsada epuani batame.

### *Pamapa edue cuana Cristo neje dunejiji yani*

<sup>12</sup> Beju equita sa mesa tsapiapiati ai cuana yani biame, equita mu piada hue. Daja huecha da Cristo sa equita. <sup>13</sup> Dueji ecuaneda biame, ecuaneda da Cristo sa equita nime piada hue, tu neje dunejiji putsu. Piada piada ecuaneda judío cuana, judío mahue cuana. Piada piada ecuaneda esclavo cuana, daja huecha d'ejí su epuani. Beju Espíritu Santo ja pamapa ecuana dunetana piada equita hue epu puji. Piada Espíritu Santo quitaita bahui Diosu ja pamapa ecuana tiatana.

<sup>14</sup> Beju equita sa tsapiapiati ai cuana yani. <sup>15-16</sup> Equita sa ehua, eme, eid'aja, etua cuana yani. Pamapa equita sa ai cuana tsapiapiati emudumudutani biame, beju pamapa su equita sa eputani. <sup>17</sup> Ahua equita quitana etua pu cua su, ¿cuaja ni da equita ja id'abame ata cua? Daja huecha, ahua equita quitana eid'aja pu cua su, ¿cuaja ni da huanibame ata cua? <sup>18-19</sup> Ahua equita sa ai cuana mahue pu cua su, ¿cuaja ni da puniunetime pu cua? Beju Diosu ja pamapa equita sa ai cuana equita su ichatana, cuaja mesa tsada batame equita saida papuniuneti puji. <sup>20</sup> Da su tsapiapiati equita su ai cuana yani biame, equita da piada hue.

<sup>21</sup> Pamapa equita sa ai cuana duji huamahuama equita su saida emudumudutani. Etua, eme, echua, ehua, cuana pamapa duji huamahuama saida emudumudutani. Tuneda cama etsatitani equita saida papuniuneti puji. <sup>22</sup> Beju equita sa bataji mahue rejada ai cuana tucheda mahue biame, tuneda da ebia su chujeji. <sup>23</sup> Equita sa pia ai cuana ecuaneda erubuainia, ejud'uinia putsu. <sup>24</sup> Equita sa pia ai cuana mu aimue ecuaneda ejud'uinia mahue. Daja Diosu ja equita atana. Equita sa rubuajiji ai cuana pia ai cuana ebia su ecuaneda erejainia. <sup>25</sup> Beju pamapa equita sa ai cuana duji yanita. Saida tuneda ebatitani huamahuama. <sup>26</sup> Ahua piada hue equita sa ai neda epuani su, pamapa su sufri eputani, tueda neda enebatani huecuana putsu. Tueda neicha esaisiani su, pamapa equita sa ai cuana beidaji eputaniyu. Da su ahua piada edue sufri epuani su, pamapa edue cuana di tu neje tupupai sufri eputani. Daja huecha ahua piada edue saida, beidaji epuani su, pamapa edue cuana di tu neje tupupai beidaji eputani.

<sup>27</sup> Beju micuaneda da Cristo sa equita sa ai cuana nime. <sup>28</sup> Daja huecha Diosu ja mesa dharejiji cuana pamapa tsapiapiati ai mudu cuana tiatana tu emebaja puji. Beju equene piada piada tuneda apóstol cuana ichatana. Tije beju quisaquisa puji, ebuetsuaji, ai nimetiuda aji, esaisiameji, etsahuaji, ehuidusuji, bue mahue biame tsapiapiati yana cuana su mimiji cuana ichatana. <sup>29-30</sup> Edue cuana, aimue ecuaneda daja cama mahue Cristo sa equita su. Aimue ecuaneda quisaquisa puji, ebuetsuaji, ai nimetiuda aji, esaisiameji, tsapiapiati yana cuana su mimiji, tsapiapiati yana cuana shanapaji cama mahue. <sup>31</sup> Beju ecuaneda sa tsapiapiati ai mudu cuana yani. Tsada mebaque ebia su saida quita Espiritu Santo sa ai jatiati cuana pamapa edue cuana etsahua puji. Beju jahue yama micuana jaibunebati jepuiti equisa. Tueda da pamapa jatiati ai cuana ebia su saida quita.

# 13

## *Jaibunebati jepuiti quisa*

<sup>1</sup> Edue cuana, ebia su saida quita cristiano cuana ibuneda eba puji. Ahua ema bue mahue biame tsapiapiati yana cuana su mimi cua su, tueda da chuje mahue, ahua yama cristiano cuana ibuneda ba bue mahue su. Quema mimi cuana da bombo, platillo sa id'apadada nime. <sup>2</sup> Ahua ema bahue cuaja ai cuana epu pu cua su, tueda da chuje mahue, ahua yama cristiano cuana ibuneda ba bue mahue su. Ahua yama pamapa etsia cuana, daja huecha pamapa ai cuana eshanapa su, tueda da chuje mahue, ahua yama cristiano cuana ibuneda ba bue mahue su. Ahua ema Diosu peje su ebia su jatucheameti cua su, emata enetiadera puji, tueda da chuje mahue, ahua yama cristiano cuana ibuneda ba bue mahue su. <sup>3</sup> Ahua yama pamapa quema ai cuana puri cuana tia cua su, tueda da chuje mahue, ahua yama cristiano cuana ibuneda ba bue mahue su. Ahua ema Cristo jepuiti pamanuameta huecuana puji emenajatiati su, tueda da chuje mahue, ahua yama cristiano cuana ibuneda ba bue mahue su.

<sup>4</sup> Ahua quebata ja ibuneda ba bahue su, tueda saida, paciencia aidaji epu cristiano cuana neje. <sup>5</sup> Aimue tueda envidia, cachi puji mahue. Aimue tueda ebia su aida ebatiani mahue. Aimue tueda duinini aida mahue. <sup>6</sup> Aimue tueda beidaji epuani mahue pia cuana sa jucha jepuiti. Beidaji tueda epuani, pia cuana ja ai saida cuana yatani su. <sup>7</sup> Ahua quebata ja ibuneda ebatani su, tuahueda pia cuana ebianetiata. Pia cuana saida ebata. Pia cuana neje paciencia aidaji epu.

<sup>8</sup> Pamapa Diosu ja etiatani ai cuana epupeta biame, aimue ecuaneda huamahuama ibuneda ebarijiti mahue. Beju tiempo ecuina su, aimue ecuaneseda cuaja ai cuana epu quisa pu taji mahue. Aimue ecuaneseda sa bue mahue biame tsapiapiati yana cuana su mimi taji mahue. Tueda ai cuana etaitanapeta. Jiahue ecuaneda bahue epudujudujuani. <sup>9</sup> Daja huecha quisaquisa epuani ecuaneda eshanapapad'ipad'inia ai cuana. <sup>10</sup> Beju Cristo epue su, pamapa ecuaneda eshanapaeniyu.

<sup>11</sup> Ema yanana tupu, yanana nime mimiana. Daja huecha yanana nime japibatina. Deja equita puana su, deja bahue eni nime mimipiruana. Daja huecha japibapirutiana. <sup>12</sup> Beju ecuaneda jiahue quita aimue Diosu eshanapaeninia mahue. Yanana piba pishihue cuana nime ecuaneseda sa piba cuana Diosu peje su. Aimue ecuaneda ebaeninia mahue, espejo padhepadhe su echamatiani nime. Beju Cristo epue su, pamapa ai cuana batasaida ecuaneda eshanapaenipeyu,

Diusu quitaita sa ebu ecuaneda eba putsu. Jiahue quita ecuaneda eshanapadujudujuainia. Da tsine su cuaja Diusu ja ecuana jiahue eshanapaenitani nime, daja ecuaneda eshanapaenipeyu. <sup>13</sup> Edue cuana, saida da Espíritu Santo sa ai jatiati cuana ecuaneseda yani puji. Daja biame, Diusu peje su janimetucheati cuana da Espíritu Santo sa ai cuana ebia su saida quita. Tu peje su janimeid'uati cuana di tueda ai cuana ebia su saida quita. Ibuneda jabati da tueda ai cuana ebia su saida.

## 14

### *Tsapiapiati bue mahue biame yana cuana jepuiti quisa*

<sup>1</sup> Beju edue cuana, micuaneseda jubida huamahuama ibuneda jabati taji. Espíritu Santo sa jatiati ai cuana mechacque. Quisaquisa mepuque Diusu sa quisa saida cuana. Tueda da pamapa pia Espíritu Santo sa jatiati ai cuana ebia su saida. <sup>2</sup> Ahua quebata pia yana su bue mahue biame emimi su, tueda Diusu peje su bahui emimiani. Espíritu Santo ja tueda Diusu jepuiti ai cuana emimiametani biame, aimue cristiano cuana ja eshanapatani mahue. <sup>3</sup> Ahua quebata cristiano cuana peje su tuna sa eshanapa yana su Diusu sa quisa saida cuana quisaquisa epu su, tuahueda etsahuatani Diusu pashanapata huecuana, tu peje su enimetucheame huecuana puji. <sup>4</sup> Da su quebata eshanapa mahue yana su emimi su, tusa saida puji bahui emimiani tuahueda bahui Diusu eshanapa puji. Quebata mu eshanapa yana su emimi su, tuahueda pamapa edue cuana etsahuatani Diusu pashanapata huecuana puji.

<sup>5</sup> Beju saida da micuaneda tsapiapiati bue mahue biame yana cuana su emimi puji. Daja biame, ebia su saida micuaneda eshanapa yana cuana su emimi puji, Diusu sa quisa saida cuana quisaquisa epu puji. Ahua quebata jadhitati jude su bue mahue biame yana su emimi su, da su piada tusa mimi shanapaji sa ani taji pia yanita edue cuana tu cuaja quisaquisa puitia cuana equisa puji. <sup>6</sup> Edue cuana, ahua ema bue mahue biame yana su micuana peje su emimi su, ¿cuaja ni da yama micuana buetsuame a cua Diusu sa jabuetsuati cuana? Ebia su saida ema micuaneda eshanapainia yana su micuana peje su emimi puji Diusu jepuiti ai cuana micuana equisa puji.

<sup>7</sup> Ahua aimue saida mui turu su, ¿cuaja ni da cristiano cuana ja shanapame ata cua ai huainiu eturutani? <sup>8</sup> Ahua aimue saida soldado ja corneta turu su, ¿cuaja ni da pia soldado cuana ja shanapame ata cua ai mecuana sa taji? <sup>9</sup> Daja nime da micuaneda. Ahua micuaneda pia cuana peje su

tuna eshanapatani mahue yana su emimi su, ¿cuaja ni da shanapame ata cua huecuana cuaja micuaneda emimiani? Beju yanacane micuaneda emimi tuna peje su. <sup>10</sup> Ye mundo su tsapiapiati yana cuana yani. Pamapa hue saida. <sup>11</sup> Ahua pia ja mesa yana quitaita su ema emitsuta su, ahua mue yama shanapa su, da su eshanapa mahue tatse etseju epu, aimue etseju jashanapati putsu. <sup>12</sup> Edue cuana, bahue ema micuaneda Espíritu Santo sa jatiati ai cuana ebia su tsada ebainia. Da putsu, tusa jatiati ai saida cuana bahui mechacuque, pamapa edue cuana tsahua putsu, Diosu peje su enimetucheame huecuana puji.

<sup>13</sup> Da su quebata bue mahue biame yana su emimi su, tuahueda Diosu pabajata Diosu ja tueda cuaja mesa ai quisa cuana epuani pashanapameta puji pia edue cuana equisa puji. <sup>14</sup> Ahua yama bue mahue biame yana su quema enime su Diosu emitsu su, aimue yama quema piba neje emitsuinia mahue, enime su bahui emitsuinia putsu. <sup>15</sup> Da su, ¿cuaja ni da ema pu cua? Beju uja quema a taji. Yama daja hue Diosu pamitsuiti enime su, daja huecha piba neje. Diosu sa puji ema esatsu enime su, daja huecha piba neje. <sup>16</sup> Edue cuana, ahua micuaneda enime su eshanapa mahue yana neje Diosu emitsutsua su, ¿cuaja ni da pia edue cuana ja micuana neje tupupai Diosu mitsutsuame ata cua, mue shanapa huecuana putsu? <sup>17</sup> Beju micuaneseda puji bue mahue biame yana su Diosu emitsu puji saida biame, pia edue cuana sa puji chuje mahue, micuana sa Diosu neje jamitsuti cuana mue shanapa huecuana putsu. <sup>18</sup> Beju yama Diosu diusulupai yainia, ema micuana ebia su bue mahue biame yana cuana su mimi cua putsu. <sup>19</sup> Daja biame, ¿ai puji saida ni ema piada tunca mil mimi cuana emimi puji cristiano cuana ja mue shanapa biame? Ebia su saida pishica mimi cuana bahui tuna sa yana su ema emimi puji, pashanapata huecuana puji.

<sup>20</sup> Edue cuana, deja bata, butsepi mepibatique. Aimue yanana nime. Daja biame, jucha cuana jepuiti, yanana jucha pu bue mahue cuana nime mepibatique. Espíritu Santo sa jatiati ai cuana jepuiti mu bahue eni butsepi mepuque. Be yanana cuana nime mepibatiji tueda ai cuana jepuiti. <sup>21</sup> Beju Diosu sa quirica su uja derejiji yani tueda ai cuana jepuiti: “Ema pia yahua su aniji cuana sa yana cuana neje judío cuana peje su emimi. Daja biame, aimue Israel ja ema id'abaja yata mahue.” <sup>22</sup> Da putsu, bahue ecuaneda bue mahue biame yana cuana da Diosu peje su jei eputani cuana ja Diosu jei aja mahue ebametani. Aimue jei eputani cuana sa puji mahue. Ahua etse Espíritu Santo ja Diosu jepuiti quisaquisa yameta su, tueda da Diosu peje su jei eputani cuana sa saida puji.



<sup>23</sup> Micuaneda edhitatiani su, ahua pamapa micuaneda tsapiapiati yana cuana su emimi su, ahua jei puji mahue cristiano cuana nubí cua su, beju pamapa micuana tseitsi nime epibata huecuana, jid'apadada eid'abatani huecuana putsu. <sup>24</sup> Beju ahua micuaneda Diusu sa quisa saida quisaquisa epuani tuna eshanapatani yana su, da su Diusu peje su jei puta cua huecuana micuaneda saida quisaquisa epuani eid'abata huecuana putsu. <sup>25</sup> Micuana sa quisaquisa cuana saida id'aba putsu, ebia su pibapibata cua huecuana, tuna sa jucha cuana jepuiti. Diusu peje su jei puta cua huecuana, tu butse su tururu putsu. Beju eshanapata huecuana, Diusu micuana duju su yani.

*Saida meaque pamapa ai cuana, edhitatiani je*

<sup>26</sup> Da su edue cuana, micuaneda edhitatiani su, piada piada micuaneda esatsuani, ebuetsua epuani, Diusu ja ai quisa tiatana quisaquisa epuani, bue mahue biame yana su emimiani, tueda mimi cuana edue cuana eshanapametani. Beju pamapa tueda ai cuana da saida. Daja micuaneseda a taji pamapa edue cuana Diusu peje su enimetucheame puji. <sup>27</sup> Da su tsapiapiati bue mahue biame yana cuana su micuaneda mimija su, paije hue mimi taji mahue. Tisutisu bahui mimi taji. Piada, beta ahua quimisha sa bahui mimi taji. Pia edue paani tuna cuaja emimitani ai cuana edue yanita cuana eshanapame puji. <sup>28</sup> Ahua eshanapameji edue ai mahue ani su, da su edhitatiani su, be memimiji bue mahue biame yana su. Micuana mehua bahui Diusu memitsuque huecuana bue mahue biame yana su, aimue eshanapameji edue ani mahue putsu. <sup>29</sup> Daja huecha Diusu sa quisaquisa puji cuana mecuana sa uja pu taji: Piada, beta, ahua quimisha edue cuana sa bahui quisaquisa pu taji, micuaneda edhitatiani su. Quisaquisa pupeja su, pia yanita edue cuana ja paabata ahua tueda quisaquisa cuana Diusu peje jenetia, ahua mahue. <sup>30</sup> Piada edue quisaquisa epuneti cama, ahua pia ja Diusu peje jenetia quisa eichacua einatsutani su, tueda pamimi. Equene quisaquisa puji epuneti beju pamimiriji. <sup>31</sup> Daja pamapa quisaquisa puja edue cuana tisutisu quisaquisa paputa pamapa yanita edue cuana saida pabuet-suatita puji, daja huecha Diusu peje su panimetuheatita huecuana puji. <sup>32</sup> Pamapa Diusu sa quisaquisa puji cuana tupuajiji hue paputa. Bahue paputa huecuana cuaja emimipe puji. <sup>33</sup> Micuaneda edhitatiani su, daja saida quisaquisa puji cuana paputa, Diusu sa tsada pamapa ai cuana saida papu putsu. Diusu sa tsada mahue ebia su ai jid'apadada edhitatiani su paputa.

<sup>34</sup> Edue cuana, jiahue pia ai cuana jepuiti yama micuana equisa. Pamapa pia dharejiji cuana ja ebuetsuatani cuaja epuna cuana sa edhitatiani su pu taji. Epuna cuana sa micuaneda edhitatiani su quisaquisa pu taji mahue, deja cuana sa eme su huecuana putsu. Beju Diusu sa jacuatsasiati daja epuani. <sup>35</sup> Ahua tuneda ai cuana shanapaja su, ete su putiyu putsu, paquisabata mecuana sa yahue cuana. Beju saida mahue epuna edhitatiani hora su emimi puji.

<sup>36</sup> Edue cuana, ahua micuaneda quema quisa cuana jei aja mahue su, da su micuaneda epitsatiani. Mepibaenitique aimue Diusu sa quisa cuana micuana neje pupiruana mahue. Daja huecha aimue micuaneda bahui tueda quisa inatsuana mahue. <sup>37</sup> Ahua ene micuaneda Espíritu Santo eshanapainia su, ahua ene tuahueda micuana mesa jatiati ai cuana tiatana su, da su micuaneda bahue epu quema jacuatsasiati cuana da Echua Puji Jesucristo peje jenetia. <sup>38</sup> Ahua quebata ja tueda quema jabuetsuati cuana jei aja mahue yata su, aimue micuaneseda tueda id'aba taji mahue.

<sup>39</sup> Da su beju edue cuana, tsada mebaque Diusu sa quisa saida cuana quisaquisa epu puji. Be memenahueji quebata edue cuana, tsapiapiati bue mahue biame yana cuana su mimija eputani su. <sup>40</sup> Daja biame, saida meaque pamapa ai cuana, edhitatiani je.

## 15

### *Cristo id'eibana jepuiti quisa*

<sup>1</sup> Edue cuana, yama micuana epibame Diusu sa quisa saida jepuiti. Equene ema micuana neje anina su, tueda quisa saida ema micuana peje su quisaquisa puana. Beju micuaneda tueda quisa saida su jei puana. Jiahue teje micuaneda daja hue jei epuderani. <sup>2</sup> Micuaneda d'ejí su puana, Diusu sa quisa saida su jei puana putsu. Ahua daja hue jiahue teje micuaneda quema jabuetsuati cuana su jei epuderani su, beju d'ejí su micuaneda. Da su aimue yanacane micuaneda quema quisa cuana eid'aba mahue.

<sup>3</sup> Ema jabuetsuatiana cuana yama micuana equene quisaderana uja: Cristo manuana ecuana sa jucha cuana jepuiti, cuaja Diusu sa quirica su derejiji yani batame. <sup>4</sup> Beju sepulcro su huananubiatana huecuana. Quimisha tsine jenetia id'eibana. Daja puana, cuaja Diusu sa quirica su derejiji yani batame. <sup>5</sup> Equene Jesús Pedro peje su jabametiana eid'e. Da su beju pamapa pia apóstol cuana dhitajiji peje su macha jabametiana. <sup>6</sup> Da su pishica cien ejaitiana tupu edue cuana peje su macha jabametiana. Dueji tuneda eid'e yanita jiahue teje, piada piada tuneda manutana

biame. <sup>7</sup> Da su Jacobo peje su macha jabametiana. Jacobo peje su jabameti putsu, neicha pamapa apóstol cuana peje su jabametiana.

<sup>8</sup> Tuna ebia su tije ema peje su macha jabametiana. <sup>9</sup> Ema da pamapa apóstol cuana tije puji quitaita. Aimue ema ai eni mahue apóstol epu puji Cristo peje su jei eputani cuana yama tijetije ana, emanuame huecuana puji putsu. <sup>10</sup> Daja biame, Diosu ja ema ibunebatana. Beju mesa apóstol ema ichatana. Mesa jaibunebati cuana ema peje su aimue yanacane puana mahue, ema Diosu sa puji pia apóstol cuana ebia su mudumuduana putsu. Beju aimue ema quitaita daja saida mudumuduana mahue. Diosu ja ema daja mesa mudu saida ametana. <sup>11</sup> Beju quema mu aimue cuaja biame aidhe cuana micuana peje su quisaquisu puana, ema ahua pia apóstol cuana. Ema mu beidaji hue, Diosu sa quisa saida cuana micuana peje su cuinana putsu. Tueda quisa saida su micuaneda jei puana.

*Manujiji cuana eid'etayu jepuiti quisa*

<sup>12</sup> Beju yama micuana equene Cristo manujiji cuana duju jenetia id'eibana quisana biame, piada piada micuaneda, manujiji cuana aimue eid'etayu mahue, epuani? ¿Jucuaja su ni micuaneda daja epuani? <sup>13</sup> Ahua cristiano cuana manu putsu id'etayu cua mahue su, daja huecha Cristo di aimue id'eyu cua puana mahue. <sup>14</sup> Ahua Cristo ene quita mue id'eyu puana su, da su ecuanaju sa quisaquisu cuana micuana peje su beju yanacane. Micuaneda yanacane hue Diosu peje su enimeid'uatiani. <sup>15</sup> Ahua manujiji cuana ene quita id'etayu cua mahue su, da su ecuanaju bid'umimi puji apóstol cuana epuani, ecuanaju Diosu ja Cristo id'emetaibana micuana peje su quisaquisu puana putsu. <sup>16</sup> Ahua manujiji cuana ene quita id'etayu cua mahue su, aimue Cristo id'eyu cua puana mahue. <sup>17</sup> Ahua ene daja su, da su micuaneda jucha jepuiti matsejiji tsuhu, yanacane hue micuaneda Diosu peje su jei puana putsu. <sup>18</sup> Ahua ene daja su, Cristo peje su jei eputani manutana cuana beju aimue eid'etayu mahue. <sup>19</sup> Ahua ecuaneda aimue eid'eyu mahue su, ahua ye mundo sa puji bahui eid'e yani su, da su ecuaneda Diosu peje su jei puji mahue cuana ebia su ichenuda aida.

<sup>20</sup> Beju Cristo mu enei hue id'eibana manujiji cuana duju jenetia. Tueda equene id'eibana beju. Tu tije tu peje su jei eputani cuana macha eid'etayu. <sup>21</sup> Adán ja jucha ataidha jepuiti, pamapa cristiano cuana sa manu taji. Cristo ja atana jepuiti mu, cristiano cuana eid'etayu. <sup>22</sup> Adán jepuiti pamapa sa manu taji biame, Cristo jepuiti mu pamapa eid'e eputayu. <sup>23</sup> Equene Cristo id'eibana. Tueda cielo jenetia

ye mundo su epueicha su, beju tu peje su jei epuani je manujiji cuana macha eid'etayu. <sup>24-28</sup> Cristo sa cuatsasia taji, Diosu ja pamapa tusa majai cuana pishitiame putsu etaitanamepetayu teje. Aimue cristiano cuana neicha emanutayu mahue, Cristo ja beju apetana putsu. Tata Diosu ja Cristo sa eme su pamapa ai cuana ichatana, cuaja Diosu sa quirica su derejiji yani batame. Pamapa ai cuana tusa eme su yani biame, aimue Tata Diosu mu tusa eme su yani mahue. Da su beju Cristo ja pamapa ye mundo su aniji huaraji aida cuana etaitanamepeta su, pamapa ai cuana Tata Diosu peje su emenajatiata su, beju tiempo epupe. Da hora su, Cristo quitaita Tata Diosu sa eme su emenajatiati. Daja Cristo yatayu Tata Diosu da pamapa ai cuana ebia su huaraji aida eni papu puji.

<sup>29</sup> Edue cuana, piada piada micuaneda, manujiji cuana aimue eid'etayu mahue, epuani. Ahua ene daja su, ¿ai puji ni da pia cristiano cuana manujiji cuana sa puji eturuca epaduametiani? Beju daja manujiji cuana sa puji yatani huecuana, eid'etayu jei eputani huecuana putsu.

<sup>30</sup> Ahua aimue manujiji cuana eid'etayu mahue su, ¿ai puji saida ema Diosu sa quisa saida cuana jepuiti ai iyuda cuana sufri a cua? <sup>31</sup> Edue cuana, micuaneda bahue yama ebia su beidaji, micuaneda Jesucristo peje su jei puana putsu. Beju pamapa tsine ema manu su hue yani. <sup>32</sup> Ahua aimue manujiji cuana eid'etayu mahue su, yanacane ema Efeso ejude su deja d'aida neje jacuicuinatiana. Ahua ecuaneda eid'eyu mahue su, da su Diosu peje su jei puji mahue cuana nime mepuniunetija. Mediadiaja, meid'itija, tsine mepuja tuna eputani nime, mueta jia ecuaneda cuapuitime manu cua putsu. Manu putsu, pamapa etaitanape, ahua ene ecuaneda eid'eyu mahue su.

<sup>33</sup> Edue cuana, be meid'abaji daja eputani cuana. Ahua micuaneda eid'aba huecuana su, tuna nime madhada hue micuaneda epuyu. <sup>34</sup> Neicha piba butsepi neje meanique. Jucha mearijique. Edue cuana, aimue piada piada micuaneda Diosu eshanapaeninia mahue. Tueda da micuaneseda puji bidhutada.

### *Cuaja manujiji cuana id'eyume epu jepuiti quisa*

<sup>35</sup> Cuapuitime piada piada jaquisabatita cua: “¿Cuaja ni da manujiji cuana neicha id'eyume puta cua? ¿Cuaja jia da mecuana sa equita epu?” <sup>36</sup> Be quisabaji tseitsi nime ai cuana. Etse ejaja yahua su ebanainia su, equi eid'e epu puji equene ejaja sa manu taji. <sup>37</sup> Tueda equi da aimue banajiji ejaja nime mahue. Beju equi sa pia equita eichacua yani. <sup>38</sup> Tsapiapiati ejaja cuana Diosu ja ichataidha. Pamapa banajiji ejaja cuana

mea hue emurutani. <sup>39</sup> Daja huecha da pamapa equita cuana da tsapiapiati yani. Cristiano cuana sa equita yani. Animalo cuana sa pia equita. D'ia cuana sa pia equita. Se cuana sa pia equita. <sup>40</sup> Angel cuana sa equita cuana da cielo sa puji. Daja huecha cristiano cuana sa equita cuana da yahua sa puji. <sup>41</sup> Id'eti, badi, atujai cuana da tsapiapiati. Id'eti, badi neje tsapia. Pamapa atujai cama beju tsapiapiati. <sup>42</sup> Daja huecha da eid'eyu jepuiti. Ecuana sa yahua su yani equita cuana da papa putsu, beju eihuita. Da jenetia da Diosu ja ecuana sa equita cuana eid'emetayu. Pia equita eichacua cuana ecuana etiatayu ecuaneda cielo su yaniti puji. Tueda ecuana sa equita eichacua cuana da aimue beju neicha emanutayu mahue. <sup>43</sup> Ecuana sa jiahue equita cuana da ye mundo su tucheda mahue, emanuta putsu. Beju ecuaneda eid'eyu su, ecuana sa equita eichacua cuana da tucheda eputayu, aimue beju neicha emanutayu mahue putsu. <sup>44</sup> Jiahue ecuana sa equita cuana yahua su yani puji. Equita cuana emanutani su, beju papa taji. Papa putsu, Diosu ja eichacua enetianametayu cielo su yanienitiyu puji. Da su bahue ecuaneda Diosu ja ecuana equita tiatana yahua su yani puji. Daja huecha pia equita eichacua macha ecuana etiatayu cielo su yaniti puji.

<sup>45</sup> Diosu ja Adán deja eid'e ataidha. Equita tiataidha yahua sa puji. Ecuaneda da tu nime quitaji eid'e epuani. Beju Cristo mu Adán ebia su saida, ecuana sa enid'u eid'e yatani putsu. <sup>46</sup> Equene beju Diosu ja ecuana equita etiatani yahua su yani puji. Da tije ecuana pia equita eichacua etiata cielo su yaniti puji. <sup>47-48</sup> Equene beju Diosu ja Adán ataidha yahua jenetia. Pamapa cristiano cuana sa equita da Adán sa nime. Beju manu taji, yahua jenetia ajiji putsu. Cristo mu da aimue yahua jenetia mahue, cielo jenetia pueana putsu. Pamapa Cristo neje dunejiji yanita cuana da Diosu ja pia Cristo sa equita nime etiatayu cielo su paanitita huecuana puji. <sup>49</sup> Ecuana sa equita cuana da Adán sa nime biame, Diosu ja ecuana Cristo sa equita nime eichacua etiatayu.

<sup>50</sup> Edue cuana, yama micuana equisaeninia, aimue detse aidhe biame yahua su yani equita neje cielo su nubi cua mahue. Tueda equita cuana sa equene manu taji. <sup>51</sup> Beju jiahue yama etsia quisa micuana equisa. Aimue pamapa ecuaneda emanu mahue. Cristo epueicha su, pamapa mesa dharejiji cuana eid'e ahua manujiji equita eichacua Diosu ja etiatayu. <sup>52</sup> Diosu sa pututu cielo jenetia eturuta su, ecuana sa equita cuana eturucatum. Manujiji cuana eid'etayu equita eichacuaji. Manuji mahue cuana sa equita cuana di Diosu ja eturucata equita eichacua neje. Beju pamapa tueda ai cuana yatayu Diosu ja piada jatuarabiati su yatayu Cristo

epueicha su. <sup>53</sup> Ecuana sa equita tucheda mahue cuana sa jaturucati taji equita tucheda, manu bue mahue neje cielo su yaniti puji. <sup>54</sup> Daja da epu, cuaja Diosu sa quirica su derejiji yani batame: “Aimue beju manu, Cristo ja pishiti-ametana putsu. <sup>55</sup> Aimue ecuaneda manu sa tucheda su yani mahue. Aimue beju manu ja ecuana pishitiata cua mahue.” <sup>56</sup> Jucha jepuiti cristiano cuana sa manu taji, cuaja Diosu sa jacuatsasiati cuana batame. <sup>57</sup> Daja biame, ecuaneda Diosu diusulupai yainia, tuahueda ecuana eid'e yametayu Echua Puji Jesucristo jepuiti.

<sup>58</sup> Da putsu, ibuneda edue cuana, nimetucheda mepuque. Daja hue memudumududeraque Diosu sa puji. Beju ecuaneda bahue Cristo neje dumejiji putsu ecuana sa mudu cuana Diosu sa puji aimue yanacane epu mahue, tuahueda ecuana eid'e enetianametayu putsu.

## 16

### *Chipilu dhitajiji jepuiti quisa*

<sup>1</sup> Edue cuana, jiahue micuana yama equisa chipilu dhitajiji jepuiti Jerusalén ejude su aniji edue cuana sa puji. Cuaja yama Galacia yahua su aniji edue cuana quisana nime, daja micuaneseda di a taji. <sup>2</sup> Pamapa domingo tsine micuaneseda quejucua chidi chipilu ichadera taji. Cuaja Diosu ja micuana etiatani nime, daja hue micuaneseda tia taji. Jiahue beju chipilu chudubarereapiru taji. Da su meichasetaque chipilu ema micuaneda peje su ecuinati teje. <sup>3</sup> Ema ecuinati su, tueda chipilu ecuaneda ebeitu aidhe eshanapa cuana neje Jerusalén ejude su aniji edue cuana peje su. Beju yama quirica etiam chipilu neje padusuta huecuana puji Jerusalén ejude su aniji edue cuana sa puji. <sup>4</sup> Ahua micuaneseda tsada su, ema tuna neje eputi, da su mu quema di puti taji.

### *Pablo edue cuana peje su eputi jepuiti quisa*

<sup>5</sup> Edue cuana, micuana peje su cuinatiji mahue su, ema Macedonia yahua su equene eputi. <sup>6</sup> Micuana neje aniji ema quejucua tiempo chidi. Cuapuitime huinahuina badi cuana pamapa yama bape cua micuana neje. Beju huinahuina badi cuana ejaitiana su, micuaneda ema saida neje beitu cua. <sup>7</sup> Tsada mahue quema quejucua tsine chidi hue micuana neje yani puji. Ahua Diosu sa tsada su, ema micuana neje tsunuda pad'i yaniti. <sup>8</sup> Efeso ejude su ema yaniti pentecostés tsine teje. <sup>9</sup> Dapia ejude su quema majai cuana dueji yani biame, tueda ejude su jucuada quema a taji tsuhu Diosu sa puji. Dapia dueji cristiano cuana Cristo peje su jei putana.

<sup>10</sup> Ahua Timoteo micuana peje su ecuinati su, saida mebaque ai pibapiba papu mahue puji, tuahueda ema

nime Diosu emebajatani putsu. <sup>11</sup> Be aiya biame tueda ai eni mahue nime pabata. Metsahuaque tueda saida neje mebeituque tueda pia edue cuana neje tipeida ema pabatajeu puji.

<sup>12</sup> Pia edue cuana micuana peje su yama beituana su, Apolos di yama beituja adhaana tuna neje. Putija mahue tsuhu puana. Ahua Diosu sa tsada su, pia nuati su chu da micuana peje su eputi ema quisatana.

*Tije quisa cuana*

<sup>13</sup> Da su edue cuana, menimepitique. Diosu peje su jubida menimetichetique. Nimetucheda mepuque. <sup>14</sup> Ibuneda neje huamahuama medusutique.

<sup>15</sup> Mepibaque Estéfnas sa familia cuana. Pamapa pia cuana equene Cristo peje su jei putana huecuana Acaya yahua su. Jiahue teje edue cuana jubida etsahuatani huecuana. <sup>16</sup> Jubida yama micuana ebajainia tuna quisa epuani cuana micuaneseda a taji. Pamapa tuna nime Diosu emebajatani cuana sa quisa epuani cuana micuaneseda a taji. <sup>17</sup> Beidaji ema, edue Estéfnas, Fortunato, Acaico cuana micuana eturuca ema peje su nuajeutana putsu. <sup>18</sup> Cuaja tuneda micuana nimetucheametana nime, daja ema ebia su nimetucheametana huecuana. Pamapa tuna nime edue cuana micuaneseda saida iyuba taji.

<sup>19</sup> Pamapa Asia yahua su aniji edue cuana ja micuana emitsuametani. Aquila, Priscila detse ja di micuana emitsuametani. Tuatse sa ete su edhitatitani edue cuana ja di micuana emitsuametani Echua Puji Jesucristo sa ebani su. <sup>20</sup> Pamapa upia edue cuana ja micuana emitsuametani. Ibuneda neje huamahuama memitsutique.

<sup>21</sup> Ema da Pablo. Quema eme quitaita neje ye tije queju-cua etsa chidi quirica su yama edereinia micuaneda bahue mepuque puji yama ye quirica etiamenia.

<sup>22</sup> Ahua quebata ja Echua Puji Jesucristo ibuneda baja mahue yatani su, tueda matsejiji papu. Ecuana sa Echua Puji papue.

<sup>23</sup> Echua Puji Jesucristo ja ebia su ibuneda mebataque. <sup>24</sup> Yama micuana ebia su ibuneda ebainia Cristo jepuiti. Daja papu.

## SEGUNDA CARTA DEL APOSTOL SAN PABLO A LOS CORINTIOS

Beta puji Corintios quirica su Pablo ja dharejiji edue cuana sa puji neicha deretaidha ai enime cuana jepuiti. Daja huecha tusa sufrimiento cuana neje Cristo ja mesa tucheda bametana Pablo ja deretaidha.

Ye versiculo cuana da ebia su saida quita ebuetsuati puji:

2.14

3.5

6.14

8.9

9.6,7

12.7-9

*Pablo ja Corinto ejude su aniji edue cuana quirica tiametana*

<sup>1</sup> Ema da Pablo. Diusu ja ema ichatana

Jesucristo sa apóstol epu puji. Mesa beituji quisaquisa puji da ema. Hue ema upia yani edue Timoteo neje. Tu neje yama ye quirica ebeituinia Corinto ejude su aniji Diusu sa dharejiji cuana peje su. Pamapa Acaya yahua su aniji Diusu sa dharejiji cuana peje su di ye quirica yama ebeituinia. <sup>2</sup> Ecuana sa Tata Diusu, Echua Puji Jesucristo detse ja meibunetaque. Menimepijajametaque tse.

*Pablo sufri puana*

<sup>3</sup> Ecuana sa Echua Puji Jesucristo sa Tata Diusu pamitsut-suatiya, tuahueda ecuana pamapa hora su ebia su enimetucheametani putsu. <sup>4</sup> Ahua ecuaneda sufri epuani su, Diusu ja ecuana enimetucheametani. Da su ecuaneseda pia sufri eputani cuana nimetucheame taji, cuaja Diusu ja ecuana enimetucheametani nime. <sup>5</sup> Beju ecuaneda Cristo jepuiti sufri epu su, Diusu ja ecuana daja huecha Cristo jepuiti enimetucheameta. <sup>6</sup> Yama micuana saida tsahua cua, ema ebia su sufri pu bahue putsu. Quema sufrimiento cuana da micuaneseda puji beju saida micuaneda d'ejí su epu puji. Cuaja yama tueda sufrimiento cuana etucheinia nime micuaneda tuchea cua paciencia neje. Diusu ja ema enimetucheametani putsu, yama micuana tucheame cua. <sup>7</sup> Bahue ema micuaneda nimetucheda epu Cristo peje su. Ahua micuaneda Cristo jepuiti sufri epu su, Diusu ja micuana ebia su enimetucheametayu.

<sup>8</sup> Edue cuana, bahue mepuque, ema ebia su sufri puana Cristo jepuiti Asia yahua su, ema anina su. Cuaja tuchea taji mahue putsu, beju ema manucueana. <sup>9</sup> Emanuame



puji deja nime ema jabatiana. Tueda enime iyuda cuana ja ema manujiji cuana id'emeyuji Diusu peje su ebia su jubida nimetucheametana. Aimue ema tucheda su mahue. <sup>10</sup> Beju Diusu ja mu ema d'ejí su atana tueda ai enime iyuda cuana jenetia. Daja hue ema d'ejí aderame yatani. Tu peje su quema janimeid'uati cuana ichana tuahueda ema daja hue yaderata puji. <sup>11</sup> Daja Diusu ja ema yatayu, ahua micuaneda quema puji tueda ebaja su. Pia edue cuana di quema puji pabajata Diusu. Daja a putsu, diusulupai Tata Diusu yatayu huecuana Diusu ja ema etsahuatayu putsu.

*Pablo Corinto ejude su eputi puji tsunutana*

<sup>12</sup> Ema nimebeidaji, beju ema saida, butsepi micuana duju su puniunetiana putsu. Aimue ema daja saida micuana duju su puniuneti quema tucheda neje mahue. Diusu ja ema tsahuatana daja saida micuana duju su epuniuneti puji. <sup>13</sup> Yama micuana saida, butsepi quisana quema quirica cuana su micuaneda quema piba cuana saida eshanapa puji. Tsada quema micuaneda pamapa tueda ai cuana eshanapape. <sup>14</sup> Aimue micuaneda ema eshanapaeninia mahue tsuhu biame, Echua Puji Jesucristo epue su, micuaneda ema jepuiti beidaji epu. Daja huecha da tsine su ya di micuana jepuiti beidaji epu.

<sup>15</sup> Da putsu, yama micuana beta nuati peretija adhaana. <sup>16</sup> Equene yama micuana perhuananaja adhaana, Macedonia yahua su epuhu je. Da je pubeyu neicha hue perhuananaja adhaana micuaneda ema etsahua puji, Judea yahua su ema micuaneda saida ebeitu puji. <sup>17</sup> Be ema beta pibaji pepe hue mepuji, micuana peje su mue cuinati putsu. Mue ema cuinati micuana peje su aimue ema bid'umimi puji su mahue. Aimue yama quema ai cuana yainia mahue, Diusu shanapaji mahue cuana ja yatani nime. Ema mu butsepi emimiani. <sup>18</sup> Diusu bahue aimue ema beta pibaji mahue. <sup>19</sup> Aimue Diusu sa Ebacua Jesucristo daja puina mahue. Beju yama Silvano, Timoteo detse neje Jesús sa jabuetsuati cuana micuana buetsuana. Tueda jabuetsuati cuana da ene quita, butsepi. <sup>20</sup> Cristo ja pamapa Diusu sa jamitsuti cuana ecuana peje su yapeenita. Da putsu, ecuaneda Diusu emitsutsuainia Cristo jepuiti. <sup>21</sup> Tata Diusu ja ecuana nimetucheametana Cristo peje su. Tuseda puji ecuana ichaderatana. <sup>22</sup> Cuaja cristiano cuana ja mecuana sa ai cuana emarcayani nime tueda ai cuana tunseseda ebame puji, daja Diusu ja ecuana Espíritu Santo tiatana ecuaneda tuseda ebame puji. Tueda Espíritu Santo ja ecuana eshanapametani cielo su ecuaneda d'ejí su epuenitiyu.

<sup>23</sup> Edue cuana, jiahue yama micuana equisa jucujaja jepuiti ema mue puti micuana peje su. Ahua ema putiana su, dapia detse yama micuana jubida d'aya cua puina. Ema micuana peje su putija puana biame, mue ema puti micuana d'ayaja mahue putsu. Diusu bahue yama micuana butsepi equisainia. Ahua daja mahue su, ahua ema micuana bid'umimi yainia su, Diusu ja ema pacastigata emanu teje. <sup>24</sup> Aimue ema micuana emetse mahue cuaja micuana sa jei pu taji cuana equisa puji, beju micuaneda Diusu peje su jubida enime-tuchteatiani putsu. Micuana tsahuaja bahui ema micuaneda Diusu peje su ebia su beidaji epu puji.

## 2

<sup>1</sup> Da putsu, aimue yama micuana peretija ana mahue micuana ebia su epibapibame puji mahue. <sup>2</sup> Ahua yama micuana ebia su epibapibame su, aimue micuaneda ema beidaji yame mahue. <sup>3</sup> Da putsu, yama micuana pia quirica su jubida d'ayana tueda ai madhada mebasetaque puji, ema micuana peje su cuinatiji mahue su. Da su beju ema micuana peje su ecuinati su, aimue ema ebia su epibapiba mahue, micuana d'aya putsu. Bahue ema micuaneda beidaji epu, ahua ema micuana neje beidaji epu su. <sup>4</sup> Equene quirica edereinia je, ebia su japibapibametiana. Epani huaru ema puana. Aimue yama tueda quirica beitu micuana ebia su epibapibame mahue puji. Daja yama quirica su micuana jubida d'ayana micuaneda bahue epu puji cuaja yama micuana ebia su ibuneda ebainia.

### *Edue cuana ja edue juchaji perdonatana*

<sup>5</sup> Bahue mepuenique, tueda micuana duju su edue juchaji ja pamapa ecuana pibapibamepad'itana. <sup>6</sup> Micuaneda jadhitati putsu, castigo tueda deja tiana beju tupu saida tuseda puji. <sup>7</sup> Jiahue beju micuaneseda perdona taji. Nime-tucheda ame taji aimue tueda ebia su papibapiba mahue puji. <sup>8</sup> Neicha micuaneseda tueda ibuneda ba taji. <sup>9</sup> Equene yama daja micuana jubida d'ayana quirica su, micuana yaba puji, ahua quema jad'ayati neje micuaneda quema quisa cuana jei aja yainia eba puji. <sup>10</sup> Ahua quebata micuaneda eperdonainia su, daja huecha yama di tueda eperdonayu. Tueda yama eperdonainia Cristo butse su micuana sa saida puji. <sup>11</sup> Daja ecuaneseda perdona taji tueda deja aimue Ishahua ja ecuana esajasajata mahue puji. Beju ecuaneda eshanapaeninia tusa jabaseati madhada cuana.

### *Pablo Troas ejude su janimepibapibametiana*

<sup>12</sup> Troas ejude su ema cuinatiana su, saida ema punuatiana Cristo sa quisa saida cuana quisaquisa epu puji. <sup>13</sup> Daja

biame, aimue ema nimebeidaji puana mahue, edue Tito neje mue ema jatsuti puana putsu. Da putsu, ema tueda ejude su aniji edue cuana neje jamitsutiyu putsu, ema putiana Macedonia yahua su.

*Cristo ja ecuana nimetucheda, saida ametana*

<sup>14</sup> Diosulupai Tata Diosu yama yainia pamapa hora su, Cristo neje tupupai ecuaneda epishitiame epuani putsu. Ecuana etsahuatani tusa quisa saida cuana pamapa cristiano cuana eshanapame puji. Tueda quisa saida da ai puida pu cua nime cristiano cuana peje su eberereatiani. <sup>15</sup> Ecuana da incienso puida Tata Diosu peje su eirutsuaji nime. Daja puidame nime da ecuaneda Diosu peje su, Cristo neje dunejiji yani putsu. Tueda Diosu sa quisa saida puida nime cuana eberereatiani tu peje su jei eputani cuana peje su. Daja huecha tu peje su jei puja mahue cuana peje su di eberereatiani. <sup>16</sup> Tueda quisa saida puida nime cuana da jei puja mahue cuana sa puji ai ehuaní jamanuametiji pu cua nime. Diosu peje su jei eputani cuana sa puji mu tueda quisa saida puida nime cuana da eid'e jaametiji. ¿Aidhe cuana da tueda quisa saida cuana quisa pu cua? <sup>17</sup> Beju ecuaneda mu tueda quisa saida cuana quisa pu cua, Diosu ja quitaita ecuana da puji huaratiatana putsu. Ecuana Cristo sa tucheda neje Diosu sa quisa saida cuana quisaquisa epuani. Ecuana butsepi neje Diosu butse su mesa quisa saida cuana cristiano cuana equisainia. Aimue ecuaneda mu Diosu sa quisa saida cuana chipilu einatsu puji quisaquisa epuani mahue, cuaja pia cuana ja yatani nime.

### 3

*Diosu sa jamitsuti eichacua*

<sup>1</sup> Aimue quema saida puji bahui ema emimiani mahue, cuaja tueda bid'umimi quisaquisa puji cuana micuana duju su eputani nime. Tuneda mu tuna sa saida puji bahui yatani. Tuna biamimiaji quirica cuana edusutitani. Beju aimue quema tuna nime daja pu taji mahue. <sup>2</sup> Micuaneda quitaita hue quema ebiamimiaji quirica cuana nime, pamapa cristiano cuana ja micuaneda saida edusutiani ebatani putsu. Pamapa su beju bahue ecuanaju micuana duju su saida mudumuduana Diosu sa puji. <sup>3</sup> Cristiano cuana ja micuana sa puniuneti cuana saida ba putsu, micuaneda da Cristo sa dharejiji cuana eshanapata huecuana. Espíritu Santo eid'e eni ja micuana butsepi mepuniunetique yatani.

<sup>4</sup> Ema Diosu peje su enimetucheatiani ema etsahuata puji, mesa ai saida cuana ya puji. <sup>5</sup> Aimue ema tupu saida mahue Diosu sa puji ai saida cuana ya puji. Diosu ja mu

ema mesa tucheda etiatani mesa ai saida cuana ya puji. <sup>6</sup> Ema tucheametana mesa jamitsuti eichacua saida cuana quisaquisa epu puji. Aimue beju ecuaneseda Moisés chenu sa jacuatsasiati cuana a taji mahue d'iji su epu puji. Tueda jacuatsasiati cuana da emanu teje puji bahui. Beju jiahue mu Diusu ja mesa Espíritu Santo ecuana etiatani ecuaneda butsepi epuniuneti puji. Tuahueda ecuana eid'e yatani.

<sup>7</sup> Biahua tiempo Diusu ja mesa jacuatsasiati cuana tumu pachata su derejiji yani Moisés chenu tiataidha. Mesa hueda jubida neje tiataidha. Da putsu, Moisés chenu judío cuana peje su jasiapatidha su, mesa ebu cuaja chama taji mahue bataidha huecuana, ebia su cuareda saida puidha putsu, tueda Diusu neje anidha putsu. Daja puidha biame, tueda hueda mesa ebu su tipeida chamumuidha. Tueda jacuatsasiati tiajiji cuana emanu teje puji bahui biame, ebia su hueda tucheda neje cuinaidha. <sup>8</sup> Daja biame, Diusu sa Cristo jepuiti eichacua quisa saida cuana ebia su saida quita, Espíritu Santo ja ecuana sa edusetani putsu. <sup>9</sup> Diusu ja Moisés chenu tiataidha jacuatsasiati cuana da hueda tucheda neje biame, beju emanu teje puji bahui. Diusu sa Cristo jepuiti eichacua quisa saida cuana mu da ebia su saida quita, ecuana Diusu peje su nimebutsepi yametani putsu. <sup>10</sup> Biahua tiempo tueda jacuatsasiati cuana tucheda eni puidha. Jiahue mu beju aimue tucheda mahue, Cristo jepuiti eichacua quisa saida cuana neje turucajiji putsu. <sup>11</sup> Tueda jacuatsasiati tiajiji cuana quejucua tiempo chidi puji hue tucheda eni puidha. Beju jiahue Cristo jepuiti eichacua quisa saida cuana mu ebia su tucheda eni yanieniti.

<sup>12</sup> Da putsu, ema Cristo jepuiti ai eichacua quisa saida cuana jubida, nimetucheda neje quisaquisa epuani, aimue quetsunu su biame epupe mahue putsu. <sup>13</sup> Moisés chenu jabud'amatidha Diusu sa hueda mesa ebu su epene puji, judío cristiano cuana ja tueda hueda echamumuani ebata huecuana mahue puji. Beju Moisés chenu ja ataidha nime, aimue ema yainia nime mahue. Aimue ema Diusu sa eichacua quisa saida cuana Cristo jepuiti erubuainia mahue, Moisés chenu jabud'amatidha nime, Diusu sa edhamutiani hueda mesa ebu su erubua puji. Jubida ema tueda quisa saida cuana cristiano cuana peje su quisaquisa epuani. <sup>14</sup> Biahua tiempo judío cuana ja aimue Diusu shanapaenitaidha mahue, tu peje su pibatadadaji putaidha huecuana putsu. Jiahue teje daja ta huecuana. Tueda tiataidha jacuatsasiati derejiji cuana emimiametani je, aimue eshanapaenitani huecuana mahue. Diusu eba mahue puji jabud'amatiji pu cua nime huecuana. Daja biame, Cristo ja bahui Diusu sa eichacua

quisa saida cuana shanapameta cua huecuana. <sup>15</sup> Enei hue, jahue teje aimue Diosu eshanapaenitani huecuana mahue Moisés chenu sa jacuatsasiati cuana emimiametani je, tuna sa piba bud'amajiji pu cua nime putsu. <sup>16</sup> Etse Cristo peje su jei epuani su, Diosu ja tueda ebud'amaji ejemitani Cristo etse pashanapa puji. <sup>17</sup> Beju Echua Puji da Espíritu Santo neje piada hue epuani. Quebata sa Espíritu Santo yani, tueda da d'eji su beju. <sup>18</sup> Edue cuana, aimue ecuaneseda ebud'amaji yani mahue Moisés chenu sa anidha nime. Ecuanteda Diosu sa hueda ebainia putsu, aimue ecuaneda mu Moisés chenu puidha nime jabud'amatiji mahue. Ecuanteda Diosu sa eichacua quisa saida cuana su jei puana su, aimue tueda quisa saida cuana rubuana mahue, cristiano cuana peje su jubida quisaquisa puana putsu. Ecuanteda da espejo pu cua nime cuaredame. Diosu sa hueda ecuana peje su etsucuahuatiani pamapa cristiano cuana ja pabata puji. Aimue ecuaneda Diosu sa quisa saida cuana erubainia mahue. Pamapa cristiano cuana peje su ecuaneda quisaquisa epuani. Beju Diosu ja ecuana etsapiatani. Tsapia chidi tsapiadera yainia je, Cristo nime ecuaneda epu puji. Echua Puji da Espíritu Santo neje piada hue epuani. Tuahueda daja ecuana saida etsapiaderatani tu nime epu puji.

## 4

<sup>1</sup> Da putsu, aimue ema enimetuchedataitanameti mahue. Diosu ja quitaita mesa jaibunebati jepuiti ema huaratiatana mesa ai quisa saida cuana quisaquisa epu puji. <sup>2</sup> Pamapa ai puiti madhada cuana yama ichajusiapeana. Ai rubuajiji, bidhutada yatiani cuana beju ichajusiapeana. Aimue yama etsapiainia mahue Diosu sa quisa saida cuana cristiano cuana ebaseame puji. Butsepi neje bahui ema tueda quisa saida cuana cristiano cuana peje su quisaquisa epuani. Pamapa ema eshanapatani cuana beju bahue ema Diosu butse su butsepi quisaquisa epuani. <sup>3</sup> Cuati castigo su eputita cuana ja aimue quema Cristo jepuiti quisaquisa cuana eshanapatani mahue, Ishahua ja tuna sa piba cuana pitsametana putsu. <sup>4</sup> Daja Ishahua ja atana huecuana aimue Cristo jepuiti quisa saida cuana pashanapata huecuana mahue puji. Tueda Cristo da ene quita Diosu. <sup>5</sup> Aimue ema jepuiti quitaita bahui quisaquisa epuani mahue. Echua Puji Jesucristo jepuiti bahui ema quisaquisa epuani. Beju ema micuana emebajainia Jesús ja ema ibuneda ebatani putsu. <sup>6</sup> Cuaja Diosu ja bi-ahua tiempo apuda su hueda ametaidha nime, daja huecha jahue mesa quisa saida cuana ecuana eshanapametani, Cristo peje su jei epuani su.

*Diusu peje su bahui janimetucheati taji*

<sup>7</sup> Ema pishihue biame, Diusu ema duju su yani mesa tucheda quitaita ebame puji. <sup>8</sup> Da su quema ebia su tsapiapiati enime cuana yani biame, aimue ema pishitiamejiji yani mahue. <sup>9</sup> Pia cuana ja ema tijetije yatani biame, aimue Diusu ja ema emesiata mahue. Ema edajajametani huecuana biame, neicha ema enetiananiyu daja hue epuderati puji. <sup>10</sup> Queje papu ema paputi biame, manu su hue ema epuani, cuaja Cristo puana nime. Daja ema sufri epuani biame, Cristo quema equita su eid'e yani ja ema etucheametani cristiano cuana ja ebatani. <sup>11</sup> Ema eid'e tupu, manu su hue epuani, Cristo emebajainia putsu. Daja biame, Cristo quema equita su eid'e yani ja ema etucheametani cristiano cuana ja ebatani. <sup>12</sup> Da su ema Diusu sa quisa saida cuana quisaquisa pu putsu, manu su hue epuani biame, micuaneseda puji mu saida, eid'e yametani putsu.

<sup>13</sup> Uja Diusu sa quirica su derejiji yani: "Ema mimi-ana, Diusu peje su janimetuheatiana putsu." Daja huecha ema Diusu peje su enimetuheatiani putsu, tu peje su jei epuani, tu jepuiti emimiani. <sup>14</sup> Bahue ema cuaja Diusu ja Jesucristo manujiji cuana duju jenetia netianametaibana nime, daja ecuana enetianametayu. Da su beju micuana neje tupupai ema Cristo butse su cielo su edusutsuatitayu. <sup>15</sup> Pamapa quema Cristo jepuiti tsapiapiati ai sufrimiento cuana micuana sa saida puji puana. Jucuada cristiano cuana Cristo peje su jei putana quema tsapiapiati ai sufrimiento cuana jepuiti. Tueda da saida micuaneseda puji. Tu peje su jei eputani cuana eyapacatitani putsu, Diusu emitsutsuatani huecuana micuana neje tupupai. Da neje Diusu aida ebameti.

<sup>16</sup> Da putsu, aimue yama etaitaname mahue quema Diusu peje su janimetuheatie cuana. Quema equita pishihue emanu puji biame, Diusu ja ema pamapa tsine etucheametani. <sup>17</sup> Ye quema mundo su tsapiapiati ai sufrimiento cuana da ubu hora puji hue. Diusu ja ema cielo su etiata mesa ai saida cuana mu daja hue saida epueni. <sup>18</sup> Da putsu, be papibatija ye mundo su ai sufrimiento cuana, tipeida etaitana putsu. Diusu sa bataji mahue ai saida cuana su bahui mepibatija, tueda ai saida cuana da daja hue saida epueni putsu.

## 5

<sup>1</sup> Beju bahue ecuaneda ecuana sa equita cuana emanuta biame, Diusu ja pia equita eichacua ecuana etiata cielo su. Aimue tueda equita cuana ye yahua su equita cuana nime mahue. <sup>2</sup> Ye yahua su ecuana sa equita cuana eid'e tupu,

turucaja ecuaneda yainia pia ebia su saida, eichacua cielo su equita cuana neje. <sup>3</sup> Aimue ecuana sa enid'u cuana quitaji eputa mahue dapia cielo su. <sup>4</sup> Ye mundo su eid'e yani tupu, ecuaneda ebia su epibapibani. Manuja mahue epuani biame, ye equita cuana, manu bue mahue equita cuana neje turucaja yainia. <sup>5</sup> Daja Diosu ja ecuana yatayu. Jiahue ecuana ye mundo su eid'e tupu, Diosu ja Espiritu Santo ecuana tiatana. Tueda Espiritu Santo ja ecuana eshanapametani Diosu ja equita eichacua cuana cielo su ecuana etiatayu.

<sup>6</sup> Da su beju pamapa hora su ecuaneda Diosu peje su enime-tuheatiani, ecuana equita eichacua cuana cielo su etiatayu putsu. Bahue ecuaneda ye mundo su ecuaneda quitaji yani tupu, aimue Echua Puji Jesucristo neje yani mahue. <sup>7</sup> Tueda ecuaneda mue ba putsu, ye mundo su yani tupu, ecuaneda tu peje su jubida enimetuheatiani. <sup>8</sup> Aimue ecuaneda iyuame epuani mahue emanu puji. Beju ecuaneseda puji ebia su saida quita ye equita cuana eichajusia puji Echua Puji neje saida yanieniti puji. Tueda da ecuaneseda tsada. <sup>9</sup> Da putsu, ecuaneseda pamapa hora su Echua Puji nimebeidaji ame taji, quitaji su, ahua cielo su quitaji mahue su. <sup>10</sup> Pamapa ecuaneseda Cristo butse su neti taji. Da tsine su tuahueda ecuana equisabata ecuaneda ye equita neje eid'e anina tupu, ai saida cuana ana, ahua mahue. Cuaja ecuaneda ana batame, ecuana metse su hue eturuca etiatayu.

### *Diosu neje saida pu taji*

<sup>11</sup> Da su yama Echua Puji eiyubainia putsu, pamapa cristiano cuana quema jei ame taji Diosu peje su. Diosu ja eshanapaenitani aimue ema bid'umimi puji mahue. Daja huecha micuaneseda shanapaeni taji. <sup>12</sup> Beju aimue quema puji quitaita ema saida emimiani mahue. Daja yama micuana equisainia micuaneda ema neje saida, nimebeidaji epu puji, ebia su aida ebatitani cuana ejeutsu puji. Tuneda aida ebatitani, piba mahue ta biame. <sup>13</sup> Ahua pia cuana ja ema tseitsi nime ebatani su, jade, daja tseitsi ema epu Diosu sa puji. Ahua ema piba saida ebatani huecuana su, tueda da micuana sa saida puji hue. <sup>14</sup> Cristo pamapa cristiano cuana sa puji manuana, ebia su ibuneda batana huecuana putsu. Da putsu, daja ema tu jepuiti jubida quisaquisa epuani. Ecuaneda pamapa su tu neje curusu su manuana pu cua nime, tu neje dunejiji yani putsu. <sup>15</sup> Cristo pamapa ecuaneseda puji beju manuana. Daja huecha pamapa ecuaneseda puji id'eibana. Da putsu, pamapa tu jepuiti eid'e, nimeeichacua cuana sa tueda bahui mebaja taji. Aimue tuneseda puji bahui eid'e ani taji mahue. <sup>16</sup> Ecuaneda Cristo sa dharejiji cuana putsu, cristiano cuana equene Cristo

shanapaji mahue su ecuaneda baina nime, aimue ebainia mahue. Beju yama Cristo shanapaji mahue su, quema enime japitsatijiji puina, yama Cristo deja nime hue bana putsu. Jiahue mu aimue daja ema tu jepuiti epibatiani mahue. <sup>17</sup> Quebata Cristo neje dunejiji yani, tueda da nimeeichacua, mesa equene ai puiti madhada cuana pupeana putsu. Jiahue beju pamapa mesa ai puiti cuana eichacua epupiruani.

<sup>18</sup> Beju Diosu ja daja yatani ecuaneseda puji. Ecuana Diosu neje jamajaiti bahue puina biame, tuahueda ecuanu tu neje saida ametana, ecuaneda Cristo peje su jei puana putsu. Tuseda tsada ecuaneda pia cristiano cuana peje su Cristo jepuiti quisa saida cuana quisaquisa epu puji, tuneda di Diosu neje saida paputa huecuana puji. <sup>19</sup> Diosu ja Cristo jepuiti pamapa cristiano cuana tu neje saida yametani, Cristo peje su jei eputani huecuana su. Pamapa mecuana sa jucha cuana edhipatayu. Cristo jepuiti ai quisa saida cuana Diosu ja ecuanu tiatana pia cristiano cuana equisati puji. <sup>20</sup> Beju ecuaneda da Cristo sa quisa puji cuana ye mundo su aniji cristiano cuana peje su. Ecuana jepuiti Diosu ja mesa ai quisa saida cuana cristiano cuana equisatani. Jubida ecuanaju cristiano cuana ebajainia Diosu neje pabasetatita huecuana puji Cristo jepuiti. <sup>21</sup> Cristo juchaji mahue biame, Diosu ja tueda curusu su juchaji pu cua nime manuanemetana. Ecuana eturuca curusu su tueda matsetana, ecuaneda Cristo peje su jei pu putsu, nimebutsepi epu puji.

## 6

<sup>1</sup> Edue cuana, micuaneda ema neje tupupai Diosu emebajainia. Diosu ja micuana daja ebia su ibunibatana putsu, saida mebaja taji. Beju micuana sa mudu tuseda puji cuaja arijinetia taji mahue. <sup>2</sup> Uja derejiji yani Diosu sa quirica su: Beju yama mique jabajati id'uana. Yama mi tsahuana, mi d'ejí su yainia je. Jiahue beju tiempo cuinaitia cristiano cuana d'ejí su paputa puji.

<sup>3</sup> Beju ema saida, butsepi epuniunetiani cristiano cuana duju su Cristo peje su tuna jei puja paputa huecuana puji, ema ba putsu. Daja ema saida epuniunetiani aimue tuneda ema patuaquisata mahue puji, aimue Echua Puji Jesucristo sa puji madhada hue papibatita huecuana mahue puji. <sup>4</sup> Pamapa ai cuana su ema Diosu sa emebajaji butsepi ebametiani cristiano cuana butse su. Pamapa ai tsapiapiati sufrimiento cuana yama etucheainia paciencia neje ema Diosu sa emebajaji saida, butsepi cristiano cuana peje su ebameti puji. <sup>5</sup> Beju cristiano cuana ja ema neje duinini putsu, ebia su ichemetana. Teriichanubiametana huecuana. Nimetipei



cuana ema sufri puana. Mudu tadada cuana yama ana. Tahuiji mahue, dhemanu neje sufri ema puana. <sup>6</sup> Pamapa ai saida cuana neje ema Diusu sa emebajaji saida cristiano cuana peje su jabametiana. Ema saida, butsepi, jucha mahue puniunetiana tuna duju su. Yama Diusu eshanapaeninia batana huecuana. Ema tuna neje paciencia, saida neje puniunetiana batana huecuana. Espiritu Santo sa tucheda quema yani batana huecuana. Ibuneda neje ema jadasu-tiniunetiana batana huecuana. <sup>7</sup> Ema Diusu sa tucheda neje butsepi mimiana batana huecuana. Beju tueda pamapa ai saida cuana neje ema Diusu sa emebajaji saida jabametiana cristiano cuana butse su. <sup>8</sup> Pia puji su quema puji saida mimitaina huecuana. Pia puji su mu madhada hue. Pia puji su ema bid'umimi puji mahue, pia puji su mu ema butsepi quisa puji batana huecuana. <sup>9</sup> Pia puji su ema eshanapa mahue, pia puji su mu ema eshanapa batana huecuana. Manu su hue ema epuani biame, ema eid'e beju. Ema jubida eichetani huecuana biame, aimue ema manu. <sup>10</sup> Ema ebia su epibapibani biame, pamapa hora su ema nimebeidaji Echua Puji peje su. Quema ye mundo su ai cuana mue ani biame, Diusu sa quisa saida cuana ema cristiano cuana peje su quisaquisa epuani. Beju quema ye mundo su ai cuana mue ai ani biame, pamapa Diusu sa ai saida cuana quema yani.

<sup>11</sup> Corinto ejude su aniji edue cuana, yama pamapa ai cuana micuana butsepi equisainia pamapa muesumu ebeibi neje. <sup>12</sup> Quema ibuneda cuana, yama micuana mue menahue. Micuaneda mu micuana sa ibuneda ema emenahueinia. <sup>13</sup> Tata cuana ja mecuana sa ebacua ibuneda neje ebajatani nime, daja yama micuana ebajainia. Pamapa muesumu ebeibi neje ibuneda mebaque ema, cuaja yama micuana ebainia nime.

*Ecuana sa equita cuana da eid'e eni Diusu sa ani jude*

<sup>14</sup> Be medunetiji pia Diusu peje su jei puja mahue cuana neje. ¿Ai da ai saida cuana sa a taji ai madhada cuana neje? ¿Ai da hueda sa a taji apuda neje? <sup>15</sup> ¿Ai da Cristo sa a taji Ishahua neje? ¿Ai da Diusu peje su jei eputani cuana sa a taji jei puja mahue cuana neje? <sup>16</sup> ¿Ai da Diusu sa templo sa a taji eimea cuana neje? Beju ecuana sa equita cuana da eid'e eni Diusu sa ani jude. Tueda ecuana sa equita duju su yani. Uja Diusu epuani mesa quirica su:

Ema tuna duju su yaniti, daja huecha epuniuneti.  
Tuna sa Diusu ema epu.

Quema dharejiji cristiano cuana eputa huecuana.

<sup>17</sup> Neicha Diusu uja epuani mesa quirica su:

Mecuinanaque tuna peje jenetia.

Menetideraque tuna peje jenetia.  
 Be mecuana sa ai jucha adhida cuana meaji.  
 Da su yama micuana ebatsu.  
<sup>18</sup> Ema micuana sa Tata epu.  
 Micuaneda da quema ebacua cuana epu.

## 7

<sup>1</sup> Da su ibuneda edue cuana, daja  
 Diusu ja mesa jamitsuti saida cuana tiatana putsu, pamapa  
 ai madhada cuana jenetia ecuaneseda netidera taji. Equita,  
 enime madhatiaji ai cuana jenetia netidera taji. Diusu sa puji  
 bahui nimebutsepi ecuaneseda pu taji, tu eiyubainia putsu.

### *Corinto ejude su aniji edue cuana japibaturucatitana*

<sup>2</sup> Meibunebaque ema. Aimue yama aidhe biame ai mad-  
 hada a. Aimue yama aidhe biame baseana mahue. <sup>3</sup> Aimue  
 yama micuana daja yainia mahue micuana juchaji ya puji.  
 Equene yama micuana quisana yama micuana ebia su  
 ibuneda ebainia. Ema micuana neje dunejiji yani eid'e epu  
 puji ahua emanu puji. <sup>4</sup> Ema micuana neje nimebeidaji. Ema  
 ebia su sufri epuani biame, nimetucheda, nimebeidaji ema.

<sup>5</sup> Macedonia yahua su cuinana jenetia, ema janahuaji  
 mahue. Tsapiapiati enime iyuda cuana quema puji  
 puana. <sup>6</sup> Daja biame, Diusu enimetucheameji ja ema  
 nimetucheametana, Tito ema peje su cuinatiana putsu.  
 Beidaji neje yama batsuana. <sup>7</sup> Tito ja ema cuaja micuana neje  
 saida aniana quisatana. Micuaneda ema jubida ibuneda  
 ebainia tsuhu quisatana. Micuaneda ebia su pibapibana  
 cuaja ema ai cuana puana jepuiti quisatana. Micuaneda ema  
 jepuiti etacuamadhatiani quisatana. Da su tueda quisa saida  
 cuana neje Tito ja ema ebia su nimebeidaji ametana.

<sup>8</sup> Bahue ema quema equene quirica neje yama micuana  
 ebia su pibapibameana quejucua tsine puji hue. Daja bi-  
 ame, mue ema pibapiba tueda quirica beituana jepuiti.  
 Tueda quirica ja micuana Diusu peje su pibaturucametana  
 putsu, ema beidaji epuani. <sup>9</sup> Aimue ema beidaji mahue,  
 micuaneda ebia su pibapibameana putsu. Ema beidaji,  
 micuana sa ai madhada cuana jenetia japibaturucatia  
 putsu. Quema jad'ayati cuana ja aimue micuana mad-  
 hatana mahue. <sup>10</sup> Ebia su saida, jucha cuana jepuiti etse  
 pibapiba putsu, Diusu peje su epibaturucati puji. Da su  
 etse japibaturucati putsu, Diusu ja d'eji su yametayu. Da  
 putsu, etse sa beidaji pu taji, Diusu ja etse jucha jepuiti  
 epibapibametani su. Jucha jepuiti epibapibametitani cuana  
 bahui Diusu ja eid'e yameenitayu. Pia pibapiba cuana  
 mu da emanu puji bahui. <sup>11</sup> Beju micuaneseda puji tueda

pibapiba cuana saida puana, micuana Diusu peje su pibatucametana putsu. Yama micuana sa jucha cuana jepuiti pibapibameana putsu, micuaneda jabasetapetiana. Tueda deja juchaji micuana duju su micuaneda castigana. Neicha micuaneda Diusu iyuba putsu, micuaneseda tsada puana ema eba puji, micuana etsahua puji. <sup>12</sup> Aimue yama quema quirica su micuana jubida d'ayana mahue micuaneda tueda edue juchaji ecastiga puji. Daja huecha aimue tueda quirica micuana peje su yama beituana mahue micuaneda tueda deja sa enime cuana tusa tata detse neje ebaseta puji. Beju yama micuana daja quirica su ameanu micuaneda Diusu jepuiti neicha ema ebia su ibuneda eba puji.

<sup>13</sup> Da su ema jatucheatiana, micuaneda ema daja hue ibuneda ebainia putsu. Beidaji ema, micuaneda Tito saida batsuana putsu. Tuahueda micuaneda neicha Diusu peje su saida batana. <sup>14</sup> Yama Tito micuana peje su beituji mahue su, ema bahue puina micuaneda tueda saida ebatsu. Daja yama Tito quisana. Beju ene daja puana. <sup>15</sup> Cuaja yama tueda quisana batame, daja micuaneda tueda saida batsuana. Tuahueda micuana ebia su ibuneda ebatani, micuaneda saida batsuana putsu. Daja huecha tusa ai quisa cuana iyuda neje jei ana. <sup>16</sup> Da su ema micuana neje ebia su beidaji, micuaneda ema neje neicha saida yani putsu.

## 8

### *Beidaji neje chipilu Diusu tia taji*

<sup>1</sup> Edue cuana, pia ai cuana jepuiti yama micuana equisa, cuaja Diusu ja Macedonia yahua je aniji dharejiji cuana ibunebatana nime. <sup>2</sup> Mecuana sa ebia su tsapiapiati sufrimiento cuana yani biame, nimebeidaji huecuana. Ebia su puri huecuana biame, tiatana tuna sa ucua chidi ai cuana yani jenetia pia edue cuana etsahua puji. <sup>3</sup> Ene putsu, yama micuana equisainia, tuna sa tupu tiatana huecuana. Cha ebia su tiajucujucua atana huecuana. Tuneda quitaita daja tiaja atana. <sup>4</sup> Jubida ema bajatana huecuana pia edue cuana daja etsahua puji. <sup>5</sup> Da su yama bajana ebia su tiatana huecuana. Tuneda quitaita Diusu peje su jamenajatiatitana Diusu sa ai tsada cuana ya puji, ema etsahua puji. <sup>6</sup> Da putsu, yama Tito jubida ebajainia micuana peje su neicha panuati puji. Equene Tito micuana neje anina su, micuana sa chipilu tia taji pia edue cuana etsahua puji micuana buetsuapirutana. Jiahue quema tsada micuana peje su tueda paputi micuaneda dhitapiruana chipilu edhitapetsahuati puji. <sup>7</sup> Beju micuaneda pamapa ai saida cuana bahue eni epuani. Diusu peje su janimetucheti bahue. Pia cristiano

cuana buetsua bahue. Micuaneda Diosu eshanapaeninia. Ebia su micuaneda ema ibuneda ebainia putsu, ema jubida tsahuaja yainia. Daja huecha cuaja micuana sa chipilu pia edue cuana etsahua puji tia taji, micuaneseda jabuetsuaeniti taji.

<sup>8</sup> Aimue yama micuana ecuatsasiainia mahue cuaja micuana sa chipilu tia taji. Cuaja pia edue cuana ja chipilu tiame yatani bahui yama micuana quisaja yainia. Aimue mimi neje bahui etse ibuneda ebametiani mahue. Ahua micuaneda micuana sa chipilu neje tsahuaji mahue edue cuana etia su, da su micuaneda ene quita ibuneda ebainia huecuana ebametiani. <sup>9</sup> Beju micuaneda eshanapaeninia Echua Puji Jesucristo sa jaibunebati cuana. Tueda pamapa aiji biame, deja puri nime jabametiana micuaneda pamapa aiji tu jepuiti epu puji. Daja tueda puana, micuaneda ebia su ibuneda ba putsu.

<sup>10</sup> Micuana sa saida puji hue yama micuana uja equisainia: Micuaneda mara jaitianajiji su equene pibapiruana chipilu neje edue dharejiji tsahuaji mahue cuana etsahua puji. <sup>11</sup> Beju micuaneda mue ape putsu, jiahue micuana sa apelayuji. <sup>12</sup> Ahua ene quita micuaneda chipilu tiaja su, micuana sa ai chidi cuana jenetia tia taji. Quejucua tiaja tupu beju tia taji. Daja Diosu sa tsada.

<sup>13</sup> Tsada mahue quema micuana sa ai dia taji cuana ehueiti, pia cuana etsahuainia je. <sup>14</sup> Tsada quema micuaneda tuna neje micuana sa ai chidi cuana esajatiati puji, tuneseda pahueiti mahue puji. Daja huecha micuaneseda chipilu ehueitiani su, tuneda mesajatiataque. Daja micuana sa huamahuama jabati taji. <sup>15</sup> Uja israelita cuana putaidha, d'anita yahua su maná chudutaidha huecuana su: Dueji jachudutitaidha cuana ucua chidi jachudutitaidha cuana neje jasajatiatitaidha huecuana. Da su pamapa sa tupu anidha.

*Tito, mesa ebuqueji cuana neje*

<sup>16</sup> Jubida yama Diosu diusulupai yainia, cuaja tuahueda ema micuana ebia su eibunebametani nime, daja huecha Tito micuana ibunebametana. <sup>17</sup> Tueda yama micuana peje su paputi puji quisana biame, tueda quitaita micuana jubida batija epuani. Tusa piba hue micuana peje su eputi.

<sup>18</sup> Tu neje pia edue Diosu sa quisa puji yama ebeitu micuana peje su. Pamapa pia ejude je Diosu sa dharejiji cuana ja tueda eshanapaenitani, tueda Diosu sa ai quisa saida cuana saida quisaquisa pu bahue putsu. <sup>19</sup> Beju dharejiji cuana ja equene tueda edue dharetana ema pabuqueta puji, dhitajiji chipilu cuana etsahuaji mahue edue cuana

peje su edusuta puji. Tueda dhitajiji chipilu neje micuaneda edue cuana ibuneda ebame. Tueda dhitajiji chipilu etiainia jepuiti Echua Puji Jesucristo jepuiti saida emimita huecuana. <sup>20</sup> Ecuanaaju tueda dhitajiji chipilu saida, butsepi dusuja yainia aimue aiya biame tueda chipilu aida jepuiti ecuanaju patuaquisata mahue puji. <sup>21</sup> Ecuanaaju tueda ai cuana butsepi aja yainia Diosu butse su, daja huecha pamapa cristiano cuana butse su.

<sup>22</sup> Tuatse neje yama pia edue ebeitu. Bahue ecuanaju tueda da edue saida, butsepi Diosu peje su. Tuseda ebia su tsada yani micuana ebati puji. Micuana peje su tuseda ebia su janimetucheati cuana yani. <sup>23</sup> Ahua quebata Tito jepuiti equisabati su, mequisaque tueda Tito da quema ebuqueji. Tueda ema neje tupupai emudumuduani micuana sa saida puji. Daja huecha pia edue ebuqueji detse jepuiti equisabati su, mequisaque tueda Diosu sa jadhareti cuana sa jabeituti tuatseda. Cristo saida emebajatani tse mequisaque tueda. <sup>24</sup> Da su saida batsuque tueda quimisha edue cuana yama micuana peje su ebeituinia. Dhitajiji chipilu aida metiaque huecuana etsahuaji mahue edue cuana sa puji. Daja a putsu, pamapa pia ejude je aniji dharejiji cuana ja micuaneda etsahuaji mahue cuana ebia su ibuneda ebainia ebameta. Da su pamapa dharejiji cuana bahue eputa jucuaja su ema micuana neje nimebeidaji epuani.

## 9

*Chipilu dhitatana huecuana edue etsahuaji mahue edue cuana sa puji*

<sup>1</sup> Edue cuana, aimue tsada quita mahue yama micuana ebaja puji edue tsahuaji mahue cuana metsuahuaque puji. <sup>2</sup> Mara jaitianajiji jenetia micuaneda dhitapiruana chipilu cuana tuneseda puji. Macedonia yahua su aniji edue cuana di daja yama quisana micuaneda quitatita tsahuaja epuani mara jaitianajiji jenetia. Beju daja id'aba putsu, tuneda di janimetuheatitana pia tsahuaji mahue edue cuana chipilu neje etsahua puji. <sup>3</sup> Da su yama ye quimisha edue micuana peje su ebeituinia tueda chipilu dhitajiji pabata huecuana puji. Beju paani tueda chipilu dhitapejiji micuana peje su ecuinatita huecuana su, ema pamapa edue cuana peje su micuana jepuiti saida mimiana putsu. <sup>4</sup> Cuapuitime piada piada Macedonia yahua jenetia aniji edue cuana ema neje micuana peje su puti cua. Da putsu, tiempo neje hue yama micuana equisainia, chipilu dhitaichapejiji papu puji aimue pamapa ecuaneda bidhutada su ebameti mahue puji, ecuanaju micuana peje su ecuinati su. <sup>5</sup> Da putsu, ema putiji

mahue su, yama ye quimisha edue cuana micuana peje su ebeituinia micuana chipilu medhitatsahuataque puji. Ahua micuaneda daja edhitape mahue su, ema micuana peje su ecuinati su, micuaneda tipeitipei chipilu dhita cua ema nimebeidaji yame puji. Beju tueda saida mahue epu. Ebia su saida tueda chipilu dhitaichapejiji paani, ema cuinatiji mahue su. Ahua daja micuaneda ya su, pamapa edue cuana ja micuana sa tsada quitaita neje chipilu cuana edhitainia ebata. Aimue yama micuana cuatsasiana mahue ebata huecuana.

<sup>6</sup> Mepibaenitique tueda ai cuana su. Quebata ja ucu chidi hue ebanata su, ucu chidi hue ejemitsuati. Daja huecha quebata ja jucuada ebanata su, dueji ejemitsuati. <sup>7</sup> Micuaneseda tia taji, cuaja micuaneda pibana batame. Be metiaji tiaja mahue neje ahua jubida neje. Beidaji neje tia taji, beidaji neje etiatani cuana Diosu ja eibunebatani putsu. <sup>8</sup> Beju Diosu ja micuana pamapa ai saida cuana ebia su tiata cua pamapa micuana sa ai cuana pahueiti mahue. Ehueitiani cuana ebia su etiatayu mesa ai saida cuana paata huecuana puji. <sup>9</sup> Uja epuani Diosu sa quirica su:

Tuahueda pamapa muesumu neje puri cuana tiatana.

Mesa ai saida mudu cuana da chujeji eni yanienitita.

<sup>10</sup> Micuana sa Diosu sa puji mudu da ejaja banajiji cuana nime. Cuaja Diosu ja ejaja cuana ebana puji etiatani nime, daja huecha tuahueda mesa mudu cuana micuana etiatani micuaneda ya puji. Cuaja Diosu ja tueda ejaja cuana ejucuetani cristiano cuana sa ediaji puji nime, daja huecha micuana sa mudu tuseda puji ejucuetayu mesa dharejiji cuana etsahua puji.

<sup>11-12</sup> Tuahueda micuana sa ai cuana eyapacuetayu micuaneda pia edue cuana ebia su etsahua puji. Beju ecuanaju micuana sa dhitajiji chipilu edue etsahuaji mahue cuana peje su edusuti su, beidaji eputa huecuana. Jamitsuati neje diusulupai Tata Diosu yata huecuana, micuaneda tsahuana putsu. <sup>13</sup> Diosu emit-sutsuata huecuana, micuaneda tueda jei yainia putsu, tuna etsahuainia je. <sup>14</sup> Da su micuaneseda puji ibuneda neje Diosu jubida ebajata huecuana, Diosu ja edue tsahuataja cuana tueda dhitajiji chipilu neje micuana tsahuametana putsu. <sup>15</sup> Beju yama Diosu diusulupai yainia, mesa Ebacua Jesucristo ecuana tiatana putsu. Tusa jaati ai cuana cuaja quisape taji mahue ecuaneda ebainia.

## 10

*Diosu ja Pablo apóstol ichatana*

<sup>1</sup> Edue cuana, cuaja Cristo ja micuana quisata cua pu cua nime, yama ibuneda nimemitsida neje micuana equisainia. Piada piada micuaneda uja epuani: “Pablo ecuanaju neje yani su, nimemitsida epuani. Ecuanaaju peje jenetia uqueda yani su, beju nimetucheda ebatiani.” <sup>2</sup> Aimue ema pia deja cuana nime emimiani mahue. Diusu ja ema huaratiatana putsu, yama micuana jubida butsepia cua. Daja biame, tsada mahue quema mimi jubida neje micuana ebutsepia puji. <sup>3-4</sup> Aimue ema pia deja cuana nime mahue, piada piada micuaneda daja epuani biame. Aimue yama pia deja cuana ja yatani nime quema ai cuana yainia mahue. Yama ai yainia cuana Diusu sa tucheda neje bahui yainia. Tueda tucheda neje Ishahua epishitiameinia. <sup>5</sup> Pamapa ema tuaquisaji cuana di yama epishitiameinia. Daja huecha pamapa aida jibatiji cuana yama epishitiameinia. Tsada mahue mecuana sa cristiano cuana ja Diusu sa ene quita quisa saida cuana eid'abata puji. Aimue yama cristiano cuana sa piba cuana epibainia mahue. Cristo sa saida piba cuana neje bahui yama cristiano cuana jei yameinia, Cristo jei paata huecuana puji. <sup>6</sup> Ahua quema jabuetsuati su micuaneda jei epudera mahue su, yama micuana butsepia cua. Daja huecha yama yayu quebata pia jei puja mahue cuana.

<sup>7</sup> Aimue micuaneda ema ebainia mahue cuaja ema. Ema da Cristo sa puji micuaneda nime. <sup>8</sup> Aimue ema ebidhuani mahue micuana ebia su equisaicha puji, Diusu ja ema huaratiatana putsu. Daja ema Diusu ja huaratiame atana micuana tsahua putsu, tu peje su jubida enimetucheame puji. Aimue micuana sa madhada puji ema huaratiatana mahue. <sup>9</sup> Be mepibatiji quema quirica neje cha rubutaname hue ya puji mahue. <sup>10</sup> Piada piada micuaneda uja epuani: “Pablo ja ecuana jubida ed'ayatani mesa quirica su bahui. Beju tueda ecuinani su, nimemitsida epuani ecuana duju su, mimi eni bue mahue putsu.” <sup>11</sup> Aimue yama eiyubainia mahue micuana ebutsepia puji. Mepibaenique cuaja yama micuana uqueda jenetia quirica su jubida butsepiameana. Daja huecha yama ya, micuana neje yani tupu.

<sup>12</sup> Aimue ema quema puji bahui saida emimiani mahue, cuaja pia deja cuana micuana duju su eputani nime. Beju tuneda da bue mahue nime, pia cuana ebia su quita jibatija eputani huecuana putsu. <sup>13</sup> Yama micuana ecuatsasiainia, cuaja Diusu ja ema huaratiatana batame. Diusu ja ema mesa ai mudu cuana etiatani. Tuahueda ema micuana peje su Corinto ejude su dusucuinatitana. <sup>14</sup> Yama micuana peje su equene Diusu sa ai quisa saida cuana Cristo jepuiti dusucuinatiana putsu, da su quema puji micuana cuatsasia

taji. <sup>15</sup> Aimue yama pia edue cuana sa Diosu sa puji mudu micuana duju su emetseneinia mahue. Quema mu tsada micuana etsahua puji bahui Diosu micuaneda ebia su eshanapaeni puji. <sup>16</sup> Da su beju micuaneda Diosu shanapaenija su, ema ejaitiana Diosu sa ai quisa saida cuana shanapaji mahue ejude uqueda cuana su tueda ai quisa saida cuana quisaquisa epupiru puji. Putija mahue ema quepia pia quisaquisa pujiji ejude cuana su.

<sup>17</sup> Ahua quebata tuseda puji quitaita bahui saida mimija epu su, ebia su saida quita Diosu sa puji bahui emimi puji.

<sup>18</sup> Ahua quebata tuseda puji bahui saida emimi su, tueda da chuje mahue. Ahua Diosu etseseda puji saida emimi su, da su tueda tsabajiji epu Diosu butse su.

## 11

### *Bid'umimi puji apóstol cuana*

<sup>1</sup> Edue cuana, paciencia mepuque ema neje, yama daja micuana equisainia putsu. Paciencia neje quema quisa cuana meid'abaque. Be ema mimi aida, tseitsi nime mebaji.

<sup>2</sup> Diosu ja ema micuana ebia su ibuneda ebametani Echua Puji Jesucristo jepuiti. Tsada quema micuaneda da Cristo sa puji bahui mepuque puji. Cuaja yahueti nimebutsepi, saida emenajiatani mesa yahue epu peje su nime, daja yama micuana nimebutsepi, saida Cristo peje su menajatiaja yainia. <sup>3</sup> Daja biame, cuaja Ishahua ja Eva jucha a putsu, baseataidha nime, cuapuitime daja tuahueda micuaneda di baseata cua quema piba. Ahua micuana baseata cua su, micuaneda seta cua Echua Puji Jesucristo. <sup>4</sup> Beju tipeida micuaneda pamapa ai papu su jei epuani yama ebainia. Ahua aidhe micuana peje su Jesucristo jepuiti ai bid'umimi quisaquisa epuani su, tipeida micuaneda jei epuani. Micuaneda Espíritu Santo batsuana biame, quebata pia espíritu madhada tipeida micuaneda ebatsuinia. Daja huecha pia cuaja d'ejí su epu puji ai jabuetsuati cuana su di micuaneda tipeida jei epuani. <sup>5</sup> Tueda ai bid'umimi quisaquisa puji cuana da aimue ema ebia su ta mahue. <sup>6</sup> Ema ebia su saida quisaquisa eputani huecuana biame, ema mu Diosu sa ene quita quisa saida cuana eshanapaeninia. Beju pamapa tueda Diosu sa quisa saida cuana micuana yama butsepi quisapeana.

<sup>7</sup> Ema micuana peje su Diosu sa ai quisa saida cuana quisaquisa puana su, aimue yama micuana chipilu bajana mahue quema ai dia taji cuana ebajati puji. Daja yama yainia micuana sa saida puji, quema puji mu tadada puana biame. Daja ema mehua ai eni mahue jaatiana micuaneda aida epu



puji. ¿Cuaja jia da ahua yama madhada hue ana, daja yainia je? <sup>8</sup> Pia dharejiji cuana jenetia yama chipilu inatsuana quema ai dia taji cuana ebajati puji, micuana peje su Diusu sa quisa saida cuana quisaquisa epu puji. <sup>9</sup> Ema micuana neje anina su, quema ai cuana pishihue epuani su, aimue yama micuana sa jatsahuati cuana bajana mahue. Macedonia yahua su aniji edue cuana mu ema tsahuatana, ema peje su cuinati putsu. Da tiempo su aimue yama micuana sa jabajati cuana bajaja ana mahue micuana sa atadhada mahue puji. Beju daja hue ema jahue teje epibaderati. <sup>10</sup> Yama pamapa Acaya yahua su aniji edue cuana butsepi equisapeti uja: Aimue ema Diusu sa quisa saida cuana quisaquisa epuani chipilu einatsu puji. <sup>11</sup> ¿Cuaja su jia ema daja jubida emimiani? ¿Aimue jia maida yama micuana ibuneda ebainia mahue? Beju Diusu bahue yama micuana ebia su ibuneda ebainia.

<sup>12</sup> Daja hue yama pamapa butsepi equisaderati, “Pablo quisaquisa epuani chipilu einatsu puji”, pamimita mahue huecuana puji. Tuneda yama Diusu emebajainia nime, Diusu emebajatani eputani huecuana biame, aimue daja yatani huecuana mahue. <sup>13</sup> Aimue ene quita Diusu sa quisaquisa puji quitaita eputani huecuana mahue. Bid'umimi puji, jabaseatiji ta huecuana. Micuana duju su ene quita Cristo sa quisaquisa puji cuana nime jabametitana huecuana. Beju aimue daja ta mahue. <sup>14</sup> Beju aimue bid'umimi mahue. Ishahua quitaita Diusu sa quisaquisa puji nime cristiano cuana duju su ebametiani. <sup>15</sup> Daja huecha Ishahua emebajatani deja cuana Diusu sa quisaquisa puji cuana nime ebametitani Diusu sa dharejiji cuana ebasea puji. Beju Diusu ja ematsetayu huecuana cuati castigo su mecuana ai madhada ajiji cuana jepuiti.

### *Pablo sufri puana*

<sup>16</sup> Neicha yama micuana equisainia, be ema tseitsi nime mebaji, ema daja mimiana putsu. Tseitsi nime ema mebaque papu biame, meid'abaque ema. Cuaja tueda bid'umimi quisaquisa puji deja madhada cuana tuneseda puji ebia su saida emimitani nime, daja ya di ema jepuiti huai chidi cama micuana neje quema puji saida mimija. Aimue tuna jepuiti quitaita butsepi emimiani mahue. Ema mu saida, butsepi emimiani quema puji. <sup>17</sup> Aimue Echua Puji Jesucristo ema micuana neje daja quema puji saida emimiametani mahue. Da mu ema jenetia bahui. <sup>18</sup> Tueda bid'umimi quisaquisa puji deja madhada cuana aida, bahue eni micuana peje su ebia su ebametitani putsu, ya di butsepi neje micuana peje su quema puji saida mimija. <sup>19</sup> Micuaneda bahue eni ebatiani biame,

mimi aida, bid'umimi quisaquisa puji deja cuana eid'abainia. <sup>20</sup> Tuneda micuana jubida neje mebajame putsu, micuana emetsenetani huecuana. Micuana sa chipilu bahui mecuana sa tsada. Micuana ai eni mahue nime ebatani huecuana. Micuana ecastigatani huecuana. Beju daja ai madhada cuana micuana yatani huecuana biame, micuaneda jei camacama tuna peje su epuani. <sup>21</sup> Aimue ema mu nimetadada mahue daja micuana yame puji. Tueda ai madhada cuana aimue yama a bue mahue.

Ahua tuneseda puji micuana peje su ebia su saida emimita huecuana su, ya di quema puji saida emimi, micuaneda ema mimi aida, tseitsi nime ebainia biame. <sup>22</sup> Ebia su aida ebatitani huecuana judío deja cuana putsu. Daja huecha ema. Ebia su aida ebatitani huecuana, Israel yahua jenetia putsu. Daja huecha ema. Ebia su aida ebatitani huecuana, Abraham chenu sa familia jenetia putsu. Daja huecha ema. <sup>23</sup> “Ecuanaju da Cristo sa emebajaji cuana”, eputani huecuana biame, yama tuna ebia su saida quita Cristo emebajainia. Beju daja ema micuana peje su quema puji saida emimiani biame, quema tsada mahue, saida mahue jepuiti saida emimi puji putsu. Tuna ebia su ema mudumuduana Diosu sa puji. Pia hora su ema jateriametiana, jaichemetiana tuna ebia su. Pia hora su ema manu su hue puana tuna ebia su. <sup>24</sup> Pishica nuati judío cuana ja ema quimisha tunca nueve ejaitiana ebai ichetana. <sup>25</sup> Quimisha nuati ema aquiriji neje ichetana huecuana. Piada nuati tumu neje ema maracatana huecuana. Quimisha nuati quema barco jabusiapatiana. Mar su ema piada tsine, piada dhidha bed'asana, jabarcobusiapati putsu. <sup>26</sup> Pamapa ejude, yahua je ema puniunetina. Ena iyuda cuana je ema puniunetina. Tsi puji, judío, judío mahue iyuda cuana duju je puniunetina. Ejude, ejije, mar iyuda cuana su puniunetina. Edue bid'umimi puji iyuda cuana duju su di ema puniunetina. Pamapa tueda ai iyuda cuana su ema puniunetina. <sup>27</sup> Beju ebia su ema sufri puana. Jubida mudumudu bahue. Piada piada hora su ema mue tahui. Edhemanu, jaid'itija, ayuna, huiname, jud'uji mahue pu bahue puina.

<sup>28</sup> Tueda ai cuana ebia su dharejiji cuana jepuiti ema epibapibani. <sup>29</sup> Nimepishihue edue cuana jepuiti ema ebia su epibapibani. Ahua quebata ja edue jucha yameta su, tu neje ema enimepuani. <sup>30</sup> Ahua quema puji ema mimi taji epu su, da su quema Cristo jepuiti ai sufrimiento cuana jepuiti bahui ema emimi. Quema ai saida jaati cuana jepuiti mimija mahue. <sup>31</sup> Echua Puji Jesucristo sa Tata Diosu bahue ema butsepi emimiani. Beju pamapa su tueda pamitsutsuaenita.

<sup>32</sup> Ema Damasco ejude su anina su, tueda ejude sa huaraji aida ja ejude sa esacuinaji su soldado cuana ichatana ema ina putsu, eteriicha puji, dapia yahua sa echua puji Aretas ja daja cuatsasiatana putsu. <sup>33</sup> Beju tueda ejude su aniji edue cuana ja ema d'iti aida su nubiamе putsu, ejude tumu pirica barereajiji baqui bauda jenetia butemetana huecuana. Da jepuiti ema huaraji sa eme jenetia d'еji su puana.

## 12

### *Diusu ja Pablo tahui su nime ai iyuda cuana bametana*

<sup>1</sup> Edue cuana, saida mahue quema puji bahui ema daja saida emimi puji. Daja biame, daja hue yama micuana Cristo ja ema bametana ai cuana equisadera. <sup>2</sup> Piada tunca pushi ejaitiana mara jaitianana jenetia Diusu ja ema atujai cuana chu bene cielo su dusutana. Bue mahue ema ahua ema quitaji cielo su dusutana, ahua mahue. <sup>3</sup> Cuaja ema cielo su putiana bue mahue ema. Diusu bahui bahue. <sup>4</sup> Dapia yama id'abatiana etsia ai iyuda cuana. Tueda ai cuana jepuiti cuaja quisa pu taji mahue yama ebainia, Diusu ja ema be quisa puji cuatsasiatana putsu. <sup>5</sup> Beju tueda etsia ai iyuda cuana ba putsu, ema detse ebia su aida jabati cua. Daja biame, aimue ema aida ebainia ebatiani mahue. Aimue ema tueda ai cuana jepuiti emimi mahue. Quema Cristo jepuiti ai sufrimiento cuana jepuiti bahui ema emimi. <sup>6</sup> Quema jaati saida cuana jepuiti ema butsepi neje mimi cua biame, aimue daja emimi mahue pia cuana ja ema ebia su aida pabata mahue puji. Quema tsada mu papibata huecuana quema ai puiti, jabuetsuati saida cuana bahui su.

<sup>7</sup> Beju Diusu ja ema mesa etsia ai iyuda cuana chamametana biame, ema ai neda macha tiatana aimue ema ebia su aida ebati mahue puji. Tueda neda da aquid'a nime quema equita su. Diusu ja Ishahua d'еji tiatana daja ema neda yame puji ema aimue ebia su aida ebati mahue puji. <sup>8</sup> Quimisha nuati yama Diusu bajana ema esaisiameta puji. <sup>9</sup> Beju ema mahue atana. Uja ema atana: "Tupu saida quema jaibunebati miqueda puji. Beidaji hue puque da jepuiti. Cristiano cuana peje su quema tucheda yama ebia su saida bame cua quema emebajaji tucheda mahue cuana peje jenetia." Da su ema beidaji hue epuani daja nedaji epu puji, Cristo sa tucheda ema peje jenetia ebameti puji. <sup>10</sup> Da putsu, ahua ema tucheda mahue, nedaji epu su, ahua ema emadhabatani huecuana su, ahua quema ai cuana ehueiti su, ahua ema tijetije yata huecuana su, ahua ema Cristo jepuiti ebia su sufri epu su, beju ebia su beidaji ema epu. Ema

tucheda mahue epuani su, da su beju ema ebia su tucheda epuani Cristo peje su.

*Pablo Corinto ejude su dharejiji cuana jepuiti pibapibana*

<sup>11</sup> Edue cuana, quema puji mimi taji mahue biame, daja ema mimiana micuana peje su. Ema tseitsi nime puana, daja mimiana putsu. Beju micuaneda da juchaji ema daja emimi puji. Aimue quema puji micuaneda saida mimiana mahue putsu, quema quitaita mimi taji quema puji. Ema mue ai eni papu biame, beju ema tueda bid'umimi quisaquisa puji deja cuana ebia su bahue eni quita. <sup>12</sup> Ema micuana neje anina su, yama micuana bameana Diosu ja ema huaratiantana mesa quisa saida cuana quisaquisa epu puji. Diosu ja ema mesa apóstol ichtana yama micuana bameeniana, ai nimetiuda cuana a putsu. Paciencia neje yama Diosu sa mudu ana micuana duju su. <sup>13</sup> Pamapa pia dharejiji cuana sa jatsahuati cuana yama inatsuana. Micuaneseda mu mahue micuana sa atadhada epu mahue puji. Ahua ema japitsatiana su, meperdonaque ema.

<sup>14</sup> Beju jahue ema micuana peje su eputi neicha quimisha nuati puji. Equene ema micuana neje anina su puina nime, daja ema epu micuana peje su, eputiicha su. Aimue yama micuana sa jatsahuati cuana ebaja mahue micuana sa atadhada epu mahue puji. Beju micuana sa saida cuana bahui quema tsada. Aimue micuana sa ai chidi cuana mahue. Tata cuana sa tuna sa ebacua cuana sa saida puji chacu taji. Aimue yanana cuana sa tata cuana sa puji chacu taji mahue. Micuaneda da quema ebacua cuana nime, ema da micuana sa Cristo jepuiti tata nime putsu. <sup>15</sup> Beidaji neje yama quema chipilu chidi, ai cuana etia micuana sa saida puji. Emanu teje, quema mudumudu taji micuana sa saida puji, yama micuana ibuneda ebainia putsu. Yama micuana ebia su ibuneda ebainia biame, micuaneda mu aimue ema ibuneda ebainia mahue.

<sup>16</sup> Piada piada micuaneda uja epuani: “Pablo ja aimue ecuanaju sa ai chidi cuana bajatana mahue biame, ai chidi su papu biame ecuana jemitana, tueda da nimepirida putsu. Beju ecuanaju baseacuatajusiatana.” <sup>17</sup> ¿Ai quema beitu-jiji cuana ja micuana baseatana bata? <sup>18</sup> Yama Tito beitu-ana micuana peje su pia edue neje. ¿Ai tuatseda micuana baseatana bata? Bahue micuaneda, Tito ema neje tupupai saida micuana duju su puniunetiana, Espíritu Santo ja huidusu etseju putsu.

<sup>19</sup> Edue ibuneda cuana, bahue mepuenique, aimue ema micuana peje su daja emimiani mahue ema ebiahuanati puji. Beju Diosu bahue ema micuana peje su daja Cristo

jepuiti mimiana micuana sa saida puji, micuana Diosu peje su enimetucheame puji. <sup>20</sup> Yama epibainia cuapuitime ema micuana peje su eputi su, yama micuana jucha su epuniuneti ba cua. Ahua daja micuana epu su, quema puji micuana neje nimetadada pu taji epu. Beju micuaneseda tsada mahue tueda epu. Cuapuitime yama micuana envidia, duinini neje huamahuama yacuicuinatiani ba cua. Cuapuitime ebia su aida micuana ebatiani, pia sa puji micuaneda madhada hue emimiani, aimue micuaneda edunetiani mahue yama ba cua. Beju pamapa tueda ai madhada cuana cuapuitime yama ba cua, micuana peje su ema eputiicha su. <sup>21</sup> Neicha ema micuana peje su puti cua su, beju Diosu butse su ema ebidhuti, daja madhada hue micuana ba putsu. Beju piada piada micuaneda ema ebia su epibapibame, micuana sa jucha jenetia japibaturucatija mahue putsu. Tueda equene ai madhada jucha aina cuana daja hue jiahue teje piada piada micuaneda yaderainia. Piada piada micuaneda pia sa ebutse neje equinatiani tsuhu. Tueda ai madhada jucha cuana ichajusiaja mahue yainia putsu, ema ebia su epibapiba micuana peje su eputiicha su.

## 13

### *Tije quisa cuana*

<sup>1</sup> Edue cuana, quimisha nuati puji beju micuana peje su eputi. Aimue detse micuaneda pia edue matse cua mahue, piada ja hue etuaquisatani su. Beta ahua quimisha etuaquisaji cuana sa pu taji. <sup>2</sup> Ema micuana neje anina su, tueda juchaji cuana micuana duju su yama jubida quisana jucha paarijita huecuana. Beju equene yama jubida quisana huecuana nime, jiahue ema uqueda biame daja hue yama be jucha meaderaji yainia huecuana. Ahua ema neicha micuana peje su eputi su, jubida yama tueda juchaji edue cuana ematseti. <sup>3</sup> Da su micuaneda bahue epu Cristo ja micuana jubida equisatani quema mimi jepuiti. Tuahueda micuana jubida ebutsepiatayu, micuana duju su tucheda eni putsu. <sup>4</sup> Mesa equita tucheda mahue curusu su manuana biame, jiahue mu Tata Diosu sa tucheda neje beju eid'e yani. Daja huecha ya di tucheda mahue biame, quema yani tusa tucheda micuana ebutsepia puji, ema tu neje dunejiji putsu.

<sup>5</sup> Meabatique ahua micuaneda ene quita Cristo peje su enimetucheatiani, ahua mahue. ¿Bue mahue jia maida micuaneda Cristo micuana sa muesumu su eid'e yani? Quebata sa muesumu su Cristo yani mahue su, aimue tueda Cristo sa mahue. <sup>6</sup> Meshanapaenique ema da Cristo sa puji tueda quema muesumu su yani. Aimue ema bid'umimi

puji mahue. <sup>7</sup> Yama Diosu jubida ebajainia micuaneda tu peje su nimebutsepi epu puji, ai madhada cuana ya mahue puji. Quema tsada mu micuaneda ai saida cuana bahui meaque puji. <sup>8</sup> Tsada mahue quema micuaneda ai madhada cuana ya. Quema mu tsada micuaneda tsine mea hue Echua Puji Jesucristo peje su butsepi, nimetucheda mepuque puji. <sup>9</sup> Beidaji ema micuaneseda puji sufri epu puji, ahua tueda sufrimiento jepuiti micuaneda Diosu peje su nimetucheda pu cua. Beju yama Diosu daja hue ebajadera micuaneseda puji, micuaneda tu peje su nimebutsepi epu puji. <sup>10</sup> Daja yama jubida micuana equisainia ema micuana peje jenetia uqueda yani tupu, micuaneda mebasetatique puji, ema micuana peje su cuinatiji mahue su. Ahua micuaneda daja epu su, aimue quema d'aya taji epu mahue, ema micuana neje yani su. Beju Echua Puji Jesucristo ja ema huaratiatana micuana etsahua puji, tu peje su jubida enimetucheame puji. Aimue ema huaratia micuana emadha puji mahue.

<sup>11</sup> Da su edue cuana, mepuchidiniunetique. Nimebutsepi, nimebeidaji mepuque. Huamahuama saida medunetique. Nimepijajajiji mepuque. Ahua micuaneda daja hue yaderati su, janimepijajametiji Diosu mesa jaibunebati micuana neje yaniti. <sup>12</sup> Ibuneda neje huamahuama memitsutique. <sup>13</sup> Pamapa upia aniji edue cuana ja micuana emit-suametani.

<sup>14</sup> Ecuana sa Echua Puji Jesucristo ja meibunebataque. Tata Diosu ja ibuneda mebataque. Espiritu Santo ja mebuque-taque. Daja papu.

## La CARTA DEL APOSTOL SAN PABLO A LOS GÁLATAS

Pablo ja ye quirica deretaidha Galacia ejude su aniji Diosu dharejiji edue cuana sa puji. Tueda ejude su aniji edue cuana duju su bid'umimi ebuetsuaji cuana anitaina. Tuneda buetsuataina jacuatsasiati cuana jei a taji d'eji su epu puji. Pablo ye quirica su quisa puidha d'eji su epu puji, Cristo peje su bahui jei pu taji. Da su Espiritu Santo ja mesa tucheda etiatani Diosu peje su enimetuchederati puji, daja huecha tusa jabuetsuati cuana eshanapaeni puji.

Ye versiculo cuana da ebia su saida quita ebuetsuati puji:

2.20

5.22,23

6.7,9

*Pablo ja Galacia yahua su aniji edue cuana quirica tiametana*

<sup>1</sup> Ema da Pablo. Galacia yahua su aniji jei eputani edue cuana peje su yama ye quirica ebeituinia. Ema da Cristo sa apóstol. Aimue ema deja cuana ja apóstol ichatana mahue. Tata Diosu, Jesucristo detse ja bahui ema ichatana. Tata Diosu ja Cristo manujiji cuana duju jenetia id'emetaibana.

<sup>2</sup> Upia yanita edue cuana neje tupupai yama micuana emitsuameinia. <sup>3</sup> Tata Diosu, Echua Puji Jesucristo detse ja meibunebataque. Memimepijajametaque tse. <sup>4</sup> Tueda Jesús da jamenajatiatiana emanu puji ecuana sa jucha cuana jepuiti. Daja puana ye mundo sa ai madhada cuana jenetia ecuana d'eji su ya puji. Daja Tata Diosu sa tsada puana. <sup>5</sup> Da putsu, ecuaneseda Tata Diosu mitsutsuaeni taji. Daja papu.

*Piada quisa saida bahui yani*

<sup>6</sup> Edue cuana, Cristo sa jaibunebati jepuiti Diosu ja micuana dharetana tuseda mepuque puji. Beju ema enimetiuni, micuaneda Cristo eichaderainia putsu, pia jabuetsuati bid'umimi cuana su epudera puji. <sup>7</sup> Pia deja madhada cuana ja micuana epitsametani. Piada hue Diosu sa quisa saida cuana yani biame, tueda quisa saida turucaja yatani huecuana micuana ebasea puji. <sup>8</sup> Be jei mepuji pia jabuetsuati cuana su. Yama micuana buetsuana Diosu sa ene quita jabuetsuati cuana. Daja hue mepuniunetideraque tueda jabuetsuati su bahui. Ahua quebata ja micuana pia jabuetsuati ebuetsuata su, Diosu ja tueda pamatseta. Yama, ahua ángel cuana ja micuana pia jabuetsuati ebuetsuata

su, Diusu ja mematasetaja. <sup>9</sup> Cuaja yama butsepi micuana equene quisana nime, daja neicha jiahue yama micuana jubida equisainia, ahua quebata ja quema Cristo jepuiti pia jabuetsuati neje eturucata su, Diusu ja tueda pamataseta.

<sup>10</sup> Aimue yama cristiano cuana beidaji ameja mahue. Diusu bahui yama beidaji ameja, ema tusa emebajaji putsu. Da putsu, Diusu sa Cristo jepuiti jabuetsuati saida bahui yama ebuetsuainia.

### *Pablo da Cristo sa apóstol*

<sup>11</sup> Edue cuana, bahue mepuque, yama micuana buetsuana Jesucristo jepuiti jabuetsuati cuana da aimue deja cuana sa jatiati mahue. <sup>12</sup> Aimue deja ja cuaja cristiano cuana d'eji su eputa puji ema buetsuatana mahue. Jesucristo ja bahui ema buetsuatana.

<sup>13</sup> Bahue micuaneda ema Cristo peje su jei puji mahue su, judío cuana sa jabuetsuati cuana su jubida ema jei puana. Da putsu, yama Cristo peje su jei eputani cuana jubida tijetije aniunetiainia tuna eteriichame puji. <sup>14</sup> Yama pia cuana ebia su ecuanaju sa tata chenu cuana sa ai puiti cuana bianetiaina. <sup>15</sup> Ema daja puina biame, Diusu ja ema bataji puji mahue su, dharetana ema mesa emebajaji epu puji, ema ebia su ibunebatana putsu. <sup>16</sup> Da su Diusu ja mesa ebacua Jesucristo ema shanapametana tusa quisa saida cuana judío mahue cuana peje su quisaquisa eputi puji. Da su beju aimue ema aidhe neje biame jamitsuti puana tueda ai cuana jepuiti. <sup>17</sup> Mue ema puti Jerusalén ejude su pia apóstol cuana emitsuti puji. Tipeida ema putiana Arabia yahua su. Da su beju ema jasiapatibana Damasco ejude su.

<sup>18</sup> Quimisha mara jenetia chu ema putiana Jerusalén ejude su. Dapia yama Pedro ye chu shanapana. Piada tunca pishica ejaitiana tsine ema tu neje aniana. <sup>19-24</sup> Dapia Jesús sa edue Jacobo di yama shanapana. Pia apóstol cuana mu mue ba yama ana.

Da su beju Siria, Cilicia yahua detse su ema putiana. Judea yahua su aniji Cristo peje su jei eputani edue cuana ja aimue ema shanapatana mahue. Tuneda id'abatana bahui cuaja yama jei eputani cuana tijetije aina. Daja biame jiahue mu ema Diusu sa Cristo jepuiti quisa saida cuana quisaquisa epuniuneti bahueta huecuana. Da su beju Diusu saida mitsuatana huecuana, tuahueda ema d'eji su atana putsu. Edue cuana, ye yama edereinia ai cuana da butsepi, ene quita. Aimue ema bid'umimi puji mahue.

## 2

*Apóstol cuana ja Pablo saida batsutana*



<sup>1</sup> Beju piada tunca pushi mara ejaitiana jenetia ema putichana Jerusalén ejude su edue Bernabé, Tito detse neje, Diosu ja ema dapia paputi cuatsasiatana putsu. <sup>2</sup> Dapia ejude su ema edue cuana sa ehuidusuji cuana neje jadhitatiana. Dapia yama quisana huecuana cuaja Diosu sa quisa saida cuana ema quisaquisa epuani judío mahue cuana peje su. Daja yama ana pashanapaenita huecuana puji yama yainia ai cuana. Quema tsada puana yama yainia ai cuana saida etsabata huecuana puji. <sup>3-4</sup> Yama deja quisana putsu, saida ema tsabatana huecuana. Beju dapia anitaina piada piada edue quitaita mahue cuana di. Mecuana sa tsada puana ecuanaju judío cuana sa jacuatsasiati cuana ya puji, Cristo jepuiti ecuanaju tueda jacuatsasiati cuana jenetia d'oji su puana biame. Daja huecha mecuana sa tsada puana Tito pahuitsanasiquiti, judío mahue putsu. <sup>5</sup> Mecuana sa tsada puana Cristo peje su jei putana cuana ja Moisés chenu sa jacuatsasiati cuana di paata puji. Beju daja mecuana sa tsada puana biame, aimue edue huidusuji cuana sa tsada puana mahue. Daja huecha Tito pahuitsanasiquiti mecuana sa tsada mahue puana. Ecuanaju sa di tsada mahue puana micuaneda judío cuana sa ai puiti cuana ya mahue puji. Ebia su saida ecuanaju sa tsada micuaneda daja hue Cristo sa quisa saida cuana su d'oji su mepuderaque puji.

<sup>6</sup> Aimue ehuidusuji cuana ja ema pia jacuatsasiati eichacua tiatana mahue. ¿Ai da ema tuneda bahuetsuatana bata? Cristo ja bahui ema buetsuapetana. Beju tuneda edue cuana sa ehuidusuji cuana putaina biame, aimue quema puji mu cuaja biame, Diosu ja pamapa su tupupai cama ebatani putsu. <sup>7</sup> Beju bahue putana huecuana Diosu ja ema huaratiatana mesa Cristo jepuiti quisa saida cuana judío mahue cuana peje su quisaquisa eputi puji. Daja huecha Pedro huaratiatana Diosu ja tueda quisa saida cuana judío cuana peje su quisaquisa paputi puji bahue putana huecuana. <sup>8</sup> Da su Diosu quitaita ja cuaja Pedro apóstol ichatana nime judío cuana peje su quisaquisa epu puji, daja huecha ya di apóstol ichatana judío mahue cuana peje su quisaquisa eputi puji.

<sup>9</sup> Beju Jacobo, Pedro, Juan cuana da edue cuana sa ehuidusuji aida putana. Tuneda bahue putana Diosu ja ema huaratiatana. Bernabé neje ema saida batsutana huecuana Diosu sa emebajaji cuana nime tupupai. Paije hue uja putana huecuana: “Mida judío mahue cuana peje su quisaquisa putique. Ecuanaju judío cuana peje su.” <sup>10</sup> Mecuana sa tsada puana edue judío mahue cuana ja Jerusalén ejude su aniji edue puri cuana dhitajiji chipilu neje patsahuata puji. Beju tueda mecuana sa tsada yama saida yapeinia.

*Pablo ja Pedro d'ayatana Antioquía ejude su*

<sup>11</sup> Edue cuana, Pedro Antioquía ejude su putiana su, yama tueda jubida d'ayana tu butsepi yame puji, tueda japitsatiana putsu. <sup>12</sup> Tueda equene judío mahue edue cuana neje diadiaina. Beju Jacobo peje jenetia beituji de ja cuana Pedro yani su, cuinatitana su Pedro judío mahue edue cuana neje diadiarijiana. Aimue Pedro sa tsada mahue Jerusalén ejude su aniji judío cuana ja pashanapata, judío mahue cuana neje diadia bue mahue putaina huecuana putsu. Beju daja mecuana sa ai puiti cuana puina. <sup>13</sup> Da su pia Antioquía ejude su aniji judío edue cuana di, Pedro puana nime, putana. Judío mahue edue cuana neje diadiaja mahue pupirutana huecuana. Bernabé di daja puana. Beju tuneda pamapa bubeta cuana putana. <sup>14</sup> Da su aimue Cristo sa jabuetsuati cuana butsepi yatani huecuana mahue ba putsu, yama Pedro uja jubida d'ayana pamapa edue cuana butse su: "Mida da judío quitaita biame, aimue judío cuana sa jacuatsasiati cuana yainia mahue d'ejí su epu puji. Da su, ¿jucuaja su miada judío mahue edue cuana ecuatsasiainia judío cuana sa jacuatsasiati cuana paata huecuana puji, d'ejí su eputa huecuana biame?"

*Ecuaneda d'ejí su epuani, Cristo peje su jei pu putsu*

<sup>15</sup> Beju ecuanaju da judío cuana bataji epuani jenetia. Aimue ecuanaju juchaji mahue pia yahua su aniji judío mahue, Diosu shanapaji mahue cuana nime. <sup>16</sup> Daja biame, ecuanaju bahue aimue Moisés chenu sa jacuatsasiati cuana a putsu, Diosu ja ecuanaju nimebutsepi yametani mahue. Cristo peje su jei pu putsu bahui, Diosu ja etse nimebutsepi yatani. Da putsu, ecuaneda Cristo peje su jei puana Diosu ja ecuanaja nimebutsepi yata puji. Aimue jacuatsasiati cuana a putsu, ecuanaja nimebutsepi yatani mahue. Aimue detse aidhe papu biame jacuatsasiati cuana a putsu, Diosu ja nimebutsepi ata cua mahue. <sup>17</sup> Ahua ene tueda jacuatsasiati cuana a putsu, ecuaneda nimebutsepi pu cua su, da su Cristo ja ecuanaja baseatana. Be daja mepibatiji ecuanaja sa Echua Puji Jesucristo jepuiti. Aimue ecuanaja baseata cua mahue. <sup>18</sup> Ecuaneda quitaita da juchaji pu cua ahua neicha tueda jacuatsasiati cuana ecuaneda ya su nimebutsepi epu puji. Ahua yama jacuatsasiati cuana a putsu, d'ejí su epu ebuetsua su, da su ema jucha yainia. <sup>19</sup> Tueda jacuatsasiati cuana a putsu, ecuaneda manuana pu cua nime epuani. Jiahue ecuaneda nimeeichacua, eid'e epuani Diosu emebaja puji. <sup>20</sup> Ecuaneda Cristo neje tupupai curusu su manuana pu cua nime putsu, ecuaneda manujiji nime epuani. Da putsu, jiahue Diosu sa Ebacua Jesucristo ecuanaja sa equita su eid'e

yani. Tu peje su janimetucheati jepuiti bahui ecuaneda eid'e epuani. Tuahueda ecuana ebia su ibuneda batana putsu, ecuana eturuca jamatsemetiana manu neje. <sup>21</sup> Aimue yama Diusu sa jaibunebati cuana ichaderaja mahue. Ahua ene jacuatsasiati cuana a putsu, etse nimebutsepi pu cua su, da su mu Cristo yanacane manuana.

### 3

*Aimue jacuatsasiati cuana a putsu, ecuaneda d'ejí su epu mahue*

<sup>1</sup> Ibuneda edue cuana, ¿jucuaja su micuaneda tseitsi nime edusutiani? Jesucristo curusu su manuana ecuana d'ejí su ya puji micuaneda bahue eni biame, bid'umimi jabuetsuati cuana su jei epupiruani. <sup>2</sup> ¿Ai micuaneda Espíritu Santo batsuana, Moisés chenu sa jacuatsasiati cuana a putsu bata? Diusu ja mu micuana Espíritu Santo tiatana, micuaneda Cristo peje su jei puana putsu. <sup>3</sup> Micuaneda da tseitsi nime? Cristo ja Espíritu Santo jepuiti micuana d'ejí su atana biame, jiahue micuaneda tueda jacuatsasiati cuana neicha aja yainia d'ejí su epu puji. <sup>4</sup> ¿Ai cristiano madhada cuana ja jiahue teje micuana yanacane nedaneda yatani bata? <sup>5</sup> ¿Ai Diusu ja Espíritu Santo micuana tiatana, jacuatsasiati cuana a putsu bata? ¿Ai Diusu ja ai nimetiuda cuana micuana duju su atana, jacuatsasiati cuana a putsu bata? Diusu ja tueda ai cuana micuana duju su atana, micuaneda Cristo peje su jei puana putsu.

<sup>6</sup> Beju Abraham chenu da Diusu peje su jei puidha putsu, Diusu ja tueda nimebutsepi ataidha. <sup>7</sup> Da su pamapa Diusu peje su jei eputani cuana da Abraham chenu sa ene quita familia jenetia pu cua nime. Aimue jacuatsasiati aji cuana mu judío biame, Abraham chenu sa ene quita familia jenetia mahue. <sup>8-9</sup> Beju Diusu sa quirica epuani uja: “Diusu ja judío mahue cuana nimebutsepi yata mesa dharejiji cuana epu puji, ahua tu peje su jei eputa huecuana su.” Uja Diusu ja Abraham chenu ataidha: “Mi jepuiti da pamapa cristiano cuana yama eibuneba.” Da su cuaja Diusu ja Abraham chenu ibunebataidha nime, daja pamapa tu peje su jei eputani cuana di eibunebatayu.

<sup>10</sup> Mue aiya biame Moisés chenu sa jacuatsasiati cuana apeta cua mahue. Quebata cuana Diusu peje su nimebutsepi puja eputa su, jacuatsasiati cuana a putsu, aimue etejetita huecuana mahue. Tueda jacuatsasiati cuana cuaja ape taji mahue ebatani huecuana putsu, beju Diusu ja ematseta huecuana. Uja derejiji yani Diusu sa quirica su tueda ai cuana jepuiti: “Pamapa derejiji yani jacuatsasiati apejiji mahue

cuana da Diusu ja ematsetayu.” <sup>11</sup> Beju bahue ecuaneda aimue ecuaneda jacuatsasiati yainia putsu, Diusu ja ecuana nimebutsepi yatani mahue. Uja derejiji yani Diusus sa quirica su: “Quebata Diusu peje su jei epu su, Diusu ja tueda nimebutsepi a putsu, eid'e cielo su yameenitayu.” <sup>12</sup> Beju quebata papu Cristo peje su jei puji mahue cuana ja Moisés sa jacuatsasiati cuana aja adhaata cua. Diusu uja epuani mesa quirica su: “Ahua etse tueda jacuatsasiati cuana jepuiti d'ejí su puja su, da su mesa pamapa jacuatsasiati cuana apeeni taji.”

<sup>13</sup> Beju cuaja ecuaneda apeeni taji mahue jacuatsasiati cuana ebainia biame, aimue Diusu ja ecuana ematseta mahue, Cristo ja ecuana d'ejí su atana putsu. Ecuana eturuca Diusu ja Cristo curusu su matsetana. Uja derejiji yani: “Quebata da aquí su ebade, tueda da matsejiji.” <sup>14</sup> Daja Diusu ja Cristo atana tuahueda judío mahue cuana Abraham chenu neje tupupai paibunebata puji Jesucristo jepuiti. Da su Diusu ja jiahue mesa Espíritu Santo ecuana etiatani, ecuaneda Cristo peje su jei epu su. Daja Diusu ja ecuana yatani, cuaja mesa jamitsuti Abraham chenu tiataidha batame.

<sup>15</sup> Edue cuana, yama micuana piada jabahuequisati equisa. Ahua quebata deja ja mesa derejiji jamitsuti pia etiata su, da su aimue detse turucata cua mahue. Daja da Diusu. <sup>16</sup> Tuahueda mesa jamitsuti Abraham chenu tiataidha tusa ebacua neje tupupai. Aimue Diusu ja Abraham chenu sa pia ebacua cuana mesa jamitsuti tia atana mahue. Piada ebacua bahui tiataidha. Diusu ja mesa jamitsuti Jesucristo tiataidha, Jesucristo da Isaac chenu pu cua nime putsu. <sup>17</sup> Beju Diusu ja Abraham chenu mesa jamitsuti equene tiataidha. Da su beju Moisés chenu sa jacuatsasiati cuana cuinaidha pushi cien quimisha tunca ejaitana mara jenetia. Da su jacuatsasiati cuana Abraham chenu tije cuinaidha. Da putsu, aimue detse jacuatsasiati cuana ja Diusu sa jamitsuti Abraham chenu neje taitanameta cua puana mahue, tueda jamitsuti equene anidha putsu. Aimue Moisés chenu sa jacuatsasiati cuana ja Diusu sa jamitsuti taitanameta cua mahue. <sup>18</sup> Aimue ecuaneda jacuatsasiati cuana yainia putsu, Diusu ja ecuana d'ejí su yatani mahue. Da mu mesa jamitsuti jenetia ecuana d'ejí su yatani. Daja da Abraham chenu jamitsuti tiataidha, cha tia hue jaibunebati ya puji.

<sup>19</sup> Da su, ¿ai puji ni da tueda jacuatsasiati cuana ecuaneda a cua, ecuana d'ejí su yatani mahue biame? Beju equene Diusu ja Abraham chenu mesa jamitsuti tiataidha. Da su beju tije tueda jacuatsasiati cuana ye chu tiataidha cristiano cuana juchaji pabametita puji. Tueda jacuatsasiati cuana

sa ani taji puana Cristo epue teje. Tu jepuiti mu Diosu ja pamapa cristiano cuana eibunebata. Beju mesa jacuatsasiati cuana equene ángel cuana menajatiataidha Moisés chenu patiaiderata huecuana puji. Da su beju Moisés chenu ja tueda jacuatsasiati cuana judío cristiano cuana tiataidha. <sup>20</sup> Beju Diosu quitaita ja mu Abraham chenu mesa jamitsuti tiataidha. Aimue pia cuana jepuiti tiataidha mahue.

*¿Ai puji Diosu ja mesa jacuatsasiati cuana ichataidha?*

<sup>21</sup> ¿Jucuaja puji da su Diosu ja cristiano cuana mesa jacuatsasiati cuana tiataidha paata huecuana puji, tueda jacuatsasiati a putsu, Diosu peje su nimebutsepi eputa huecuana mahue biame? Beju aimue Diosu ja jacuatsasiati cuana tiataidha mahue cristiano cuana nimebutsepi paputa puji. Mesa jamitsuti jepuiti bahui Diosu ja cristiano cuana nimebutsepi yatani. Aimue detse Diosu peje su nimebutsepi puta cua huecuana mahue, jacuatsasiati cuana a putsu. <sup>22</sup> Tueda jacuatsasiati cuana Diosu ja tiataidha pamapa cristiano cuana juchaji pabametita puji bahui. Diosu sa quirica su epuani pamapa cristiano cuana juchaji. Matsejiji huecuana jucha jepuiti. Daja biame, jiahue Diosu ja Cristo peje su jei eputani cuana cha nimebutsepi a hue yatani cuaja mesa jamitsuti puidha batame. Daja yatayu Diosu ja pamapa Jesucristo peje su jei eputani cuana.

<sup>23</sup> Cristo pueji mahue su, ecuaneda jacuatsasiati cuana ema su anina. <sup>24</sup> Tueda jacuatsasiati cuana ja ecuana inatsihuataina Cristo epue teje. Beju Cristo pueana jenetia ecuaneda d'eji su, nimebutsepi epuani, tu peje su janimetucheati putsu. <sup>25</sup> Jiahue mu beju aimue ecuaneda jacuatsasiati cuana ema su yani mahue, Cristo pueana putsu.

<sup>26</sup> Jiahue ecuaneda Diosu sa ebacua cuana, Jesucristo peje su jei pu putsu. Ecuana tu neje dunejiji yani. <sup>27</sup> Diosu ja ecuana Cristo neje dunemetana tu nime epu puji. <sup>28</sup> Jiahue mu pamapa ecuaneda tupupai Cristo peje su. Judío, ahua judío mahue, esclavo, ahua d'eji su, deja, ahua epuna cuana papu biame, beju ecuaneda piada hue epuani, Cristo neje dunejiji yani putsu. <sup>29</sup> Ecuana Cristo sa dharejiji putsu, da su ecuaneda Abraham chenu sa ebacua cuana pu cua nime, Diosu sa Abraham chenu neje jamitsuti da ecuaneseda di putsu.

## 4

<sup>1-2</sup> Neicha yama micuana piada jabahuequisati equisa. Pida deja manu putsu, mesa ai cuana mesa ebacua yanana chidi sa puji eichajusiatani. Tueda ai cuana da ebacua sa biame, aimue detse jametseneti cua mahue, yanana hue

tsuhu putsu. Da su tueda da emetse biame, mesa tata sa ete su emebajaji nime tu inatsihuaji cuana jei a taji tsuhu putsu, deja epu teje. <sup>3</sup> Daja ecuaneda puina, Cristo pueji mahue su. Ecuaneda judío cuana sa ai puiti, jacuatsasiati cuana sa eme su anina tueda ai puiti cuana bahui jei ya puji. Daja a putsu, d'oji su epu pepe ecuaneda japibatiana. <sup>4</sup> Beju Diosu sa tsada hora cuinana su, mesa ebacua Jesucristo ye mundo su beitutana. Judío epuna peje jenetia bataji puana. <sup>5</sup> Jacuatsasiati cuana ema su puniunetina. Cristo jacuatsasiati cuana ema su jamenajatiatiana jacuatsasiati ema su yanita cuana d'oji su ya puji, Diosu sa ebacua cuana quitaita paata huecuana puji.

<sup>6</sup> Da su ecuaneda Diosu sa ebacua cuana putsu, Diosu ja Espíritu Santo beitutana ecuana sa muesumu su paaniti puji. Espíritu Santo ecuana sa muesumu su yani putsu, ecuaneda Diosu, "Tata", yametani. <sup>7</sup> Aimue beju ecuaneda jacuatsasiati cuana sa eme su yani mahue, Diosu sa ebacua cuana putsu. Da putsu, pamapa Cristo sa ai cuana da ecuaneseda di.

*Pablo ebia su janimenebametiana edue cuana jepuiti*

<sup>8</sup> Edue cuana, micuaneda Diosu shanapaji mahue su, bid'umimi diusu eimea cuana sa eme su anina. Ene putsu, tueda eimea cuana da aimue eid'e mahue. <sup>9</sup> Beju jiahue micuaneda Diosu neje huamahuama eshanapatiani biame, neicha micuaneda micuana sa equene ai puiti cuana su jasiapatija epuani d'oji su epu puji. Tueda ai puiti cuana da tupu mahue micuana d'oji su ya puji biame, neicha tueda ai puiti ema su micuaneda jamenajatiatija. ¿Jucuaja su ni da micuaneda daja neicha aja yainia? <sup>10</sup> Micuaneda jiahue teje piada piada yanacane ai puiti cuana yainia hue tsuhu. Aimue beju micuaneda tueda ai puiti cuana jenetia d'oji su tsuhu mahue. Tsine cuana micuaneda eiyubainia hue tsuhu. Tueda a putsu, micuaneda Diosu beidaji yameinia pepe hue epuani. <sup>11</sup> Ema ebia su enimenebametiani cuapuitime quema Cristo jepuiti quisaquisa cuana micuana peje su yanacane hue puana.

<sup>12</sup> Edue cuana, mearijique tueda ai puiti cuana d'oji su epu puji, yama arijiana nime. <sup>13</sup> Aimue micuaneda ema madhada neje batsu bahue puina mahue, ema micuana peje su quisaquisa pupiruana su. Quema ai neda yani biame, ema micuana peje su Diosu sa quisa saida cuana quisaquisa puana. <sup>14</sup> Ema daja nedaji biame, aimue micuaneda ema baja mahue neje bana mahue. Saida micuaneda ema batsuana Diosu sa ángel pu cua nime. Ema Jesucristo quitaita pu cua nime micuaneda ema batsuana. <sup>15</sup> Da su ¿jucuaja su micuaneda jiahue saida mahue ema ebainia? Ema micuana

neje anina su, micuaneda ema micuana sa etua tia cua puina quemá etua saida mahue eturuca puji. <sup>16</sup> ¿A da micuaneda ema neje jiahue eduiniani, yama micuana butsepi quisana jepuiti?

<sup>17</sup> Beju tueda bid'umimi ebuetsuaji cuana quitaita ja micuana baseatana. Tuneda bahui micuaneda tije ya mecuana sa tsada. Tuneseda tsada micuaneda ema peje jenetia enetideraeni puji. <sup>18</sup> Ahua pia cuana ja micuana quisaja yatani su, mequisataque huecuana, ema micuana neje ani biame. Beju mequisataque huecuana saida piba neje micuana ebasea mahue puji. <sup>19</sup> Edue chidi cuana, neicha micuaneda ema enimenebameinia. Epuna ja yanana chidi bataji yametani enebatani nime, daja nime ema micuana jepuiti nebana, yama micuana Cristo peje su dusuana su. Beju jiahue neicha ema enimenebametiani micuana jepuiti, aimue micuaneda Cristo neje epuniunetiani mahue putsu. <sup>20</sup> Ebia su tsada quemá micuana neje duji yani puji. Ema micuana neje ani cua su, yama micuana quisa cua cuaja micuaneda Cristo neje puniunetime pu cua.

### *Hagar, Sara detse jepuiti quisa*

<sup>21</sup> Micuaneseda jacuatsasiati cuana a taji Diosu peje su nimebutsepi epu puji pepe hue epuani. Aimue daja mahue. Aimue etse d'ejí su epuani mahue, jacuatsasiati cuana a putsu. Meid'abaenique ema. Jiahue yama micuana butsepi equisa tueda ai cuana jepuiti. <sup>22</sup> Uja Diosu sa quirica su epuani: Abraham chenu sa beta ebacua anidha. Piada ebacua da mesa emebajaji epuna jenetia. Tueda emebajaji epuna da Hagar banime puidha. Pia ebacua da mesa ehuané jenetia. Tueda mesa ehuané Sara banime puidha. <sup>23</sup> Beju Hagar chenu sa ebacua da cha yanana pu cua nime bataji puidha. Sara chenu sa ebacua mu bataji puidha, Diosu ja daja jamitsuti tiataidha putsu. <sup>24-25</sup> Beju tueda ai cuana da ecuaneda ebuetsuati puji. Hagar chenu da Diosu sa jacuatsasiati cuana pu cua nime. Diosu ja Sinaí emata jenetia mesa jacuatsasiati cuana israelita cristiano cuana tiataidha. Tueda emata da Arabia yahua su yani. Dapia aniji cristiano cuana ja tueda emata Hagar emata banime yatani. Pamapa jacuatsasiati ema su aniji cuana da Hagar chenu pu cua nime. Hagar chenu da yahua su Jerusalén ejude pu cua nime. <sup>26</sup> Beju ecuaneda mu d'ejí su. Aimue jacuatsasiati cuana sa eme su yani mahue. Ecuaneda eichacua cielo Jeruslén ejude su cielo yanienitiyu. <sup>27</sup> Uja derejiji yani: Bacua mahue epuna, beidaji papu. Quetsunu su bacuaji pu bué mahue biame, jiahue tueda dueji ebacuaji epu.

Ahueji sa ebacua cuana emebajaji epuna sa ebia su epu.

<sup>28</sup> Edue cuana, ecuaneda da Isaac chenu nime. Cuaja Diusu ja jamitsuti tiataidha batame, daja tueda bataji pume puidha. Daja huecha ecuaneda Diusu sa ebacua cuana, Diusu ja mesa jamitsuti ecuanata tiatana putsu, Cristo peje su ecuaneda janimetucheatiana putsu. <sup>29</sup> Cuaja Hagar chenu sa ebacua chenu ja Isaac chenu nedaneda ametaidha nime, daja jiahue jacuatsasiati aji cuana ja Diusu peje su jei eputani cuana nedaneda yametani. Espíritu Santo ja ecuanata Diusu sa ebacua atana biame, tuseda tsada ecuaneda jacuatsasiati cuana ya puji, Diusu peje su nimebutsepi epu puji. <sup>30</sup> Beju uja derejiji yani tueda ai cuana jepuiti: “Cuinanameque tueda esclava epuna mesa ebacua neje. Ehuane sa ebacua sa bahui mesa tata sa ai cuana inatsu taji.” <sup>31</sup> Da su, edue cuana, aimue ecuaneda esclava epuna sa ebacua nime mahue. Ecuaneda mu ahueji sa ebacua nime. Pamapa jacuatsasiati aji cuana da esclava epuna sa ebacua nime. Beju jacuatsasiati cuana sa eme su yanita huecuana.

## 5

<sup>1</sup> Edue cuana, Cristo ja ecuanata jacuatsasiati sa eme jenetia d'ejí su atana, tu peje su janimetucheatiana putsu. Daja hue d'ejí su mepuderaque. Be neicha jacuatsasiati sa eme su memenajatiatiji tueda jacuatsasiati ya puji.

<sup>2</sup> Meid'abaenique ema. Ahua micuaneda neicha jacuatsasiati cuana aja epu su, Diusu peje su nimebutsepi epu puji, da su micuaneseda puji Cristo curusu su manuana mue ai puji saida pu cua nime. <sup>3</sup> Neicha yama micuana jubida ene quita equisainia, ahua quebata Diusu peje su nimebutsepi epu puji ehuitsanasiquiti su, tuseda pamapa Moisés chenu sa jacuatsasiati cuana ape taji. <sup>4</sup> Quebata Diusu peje su nimebutsepi epu puji jacuatsasiati cuana yatani su, Cristo peje jenetia netiderana. Diusu sa jaibunebati cuana mue shanapa. <sup>5</sup> Cristo peje su janimetucheatiana putsu, Espíritu Santo sa quitaita ecuanata eshanapametani ecuaneda Diusu butse su nimebutsepi epu. <sup>6</sup> Ecuaneda Cristo neje dunejiji yani putsu, mue ai puji saida ecuaneseda huitanasiquijiji ahua mahue epu puji. Diusu peje su janimetucheatiana bahui ebia su saida quita. Daja huecha ibuneda neje edusuti puji.

<sup>7</sup> Beju micuaneda Diusu sa ene quita jabuetsuati saida cuana sa puniunetina. ¿Aiya da micuana tueda ene quita jabuetsuati cuana tije arijiametana? <sup>8</sup> Aimue Diusu ja daja micuana sa piba turucatana mahue. Tuahueda micuana dharetana mesa ene quita jabuetsuati cuana jei ya puji.



<sup>9</sup> Micuaneda bahue huai chidi levadura ja pamapa harina bebajiji aida ehuarusiapapetani. Daja da bid'umimi puji cuana sa jabuetsuati cuana. Tueda jabuetsuati madhada cuana ja micuana epibaturucametani. <sup>10</sup> Beju ema Echua Puji peje su enimetucheatiani micuaneda quema jabuetsuati su bahui epuniuneti puji, aimue pia sa jabuetsuati su epuniuneti puji mahue. Quebata papu ja micuana epibaturucameta su, Diusu ja tueda jubida ematsetayu.

<sup>11</sup> Piada piada, “Pablo ja edue cuana pahuitsanasiquitita ebuetsuatani”, eputani. Beju aimue yama daja ebuetsuainia mahue. Ahua daja yama edue cuana ebuetsuainia su, ¿jucujaja su ni judío cuana ema neje eduininitani? Ema neje eduininitani huecuana, yama jahuitsanasiquiti taji mahue Diusu peje su nimebutsepi epu puji ebuetsuainia huecuana putsu. Beju Cristo curusu su manuana ecuana nimebutsepi ya puji yama ebuetsuainia putsu, ema neje eduininitani huecuana jubida. <sup>12</sup> Tueda jahuitsanasiquitiji ebuetsuaji cuana da tuneda quitaita equene pahuitsanasiquipeenitita.

<sup>13</sup> Edue cuana, Diusu ja ecuana d'eji tiatana. Daja ecuaneda d'eji su epuani biame, aimue ecuana sa ai utsatada madhada cuana ecuaneseda a taji mahue. Ecuaneda cama huamahuama saida ibuneda neje jabati taji. Daja huecha jatsahuati taji. <sup>14</sup> Beju Diusu sa equene jacuatsasiati da uja epuani: “Mida quitaita ibuneda ebatiani nime, daja huecha pia cuana ibuneda baque.” Ahua daja micuaneda cama epu su, da su pamapa Diusu sa jacuatsasiati cuana micuaneda yapeyu. <sup>15</sup> Ahua micuaneda cama madhada hue ebati su, micuaneda cama enimemadhapetiyyu.

### *Be utsatada madhada cuana meaji*

<sup>16</sup> Yama micuana equisainia, jei meaque Espíritu Santo. Ahua micuaneda tueda jei ya su, aimue micuana sa ai utsatada madhada cuana aja epu mahue. <sup>17</sup> Beju daja hue ecuaneda tueda ai utsatada madhada cuana aja epuani biame, Espíritu Santo ja mu tsada mahue ebatani tueda ai madhada cuana ecuaneda ya puji. Ecuana sa ai utsatada madhada cuana Espíritu Santo neje aimue tsada ebatiani tse mahue. Da putsu, ecuaneda ai saida cuana aja epuani biame, ai madhada cuana yainia. <sup>18</sup> Ahua Espíritu Santo ja micuana ehuidusutani su, da su aimue micuaneda jacuatsasiati cuana ema su yani mahue, tueda jacuatsasiati cuana ya puji.

<sup>19</sup> Beju uja da ai utsatada madhada aji cuana: Deja, epuna cuana jabutsenetiji mahue biame jaquinatiji, ai madhada pibaji, tisutisu ai madhada aji, <sup>20-21</sup> bi'umimi diusu eimea mitsutsuaji, jamahuatiji, jadininibatiji, jacuicuinatiji, jarejatiji, cha duinini puji, tuseda puji quitaita ai saida chacuji,

jasajasajatiji, envidia jaatiji, jamanuametiji, tsetse aida, jana aida. Daja ai utsatada madhada aji cuana ja yatani. Daja huecha pia ai madhada cuana yatani huecuana. Edue cuana, cuaja yama micuana equene quisana nime, neicha yama micuana jubida equisainia, aimue tueda ai madhada aji cuana Diosu ecuatsasiati su enubita mahue.

<sup>22-23</sup> Ahua ecuaneda Espíritu Santo jei ya su, ecuana ibuneda, beidaji, nimepijajajiji, pacienciaji, saida, jamitsuti bahue, nimemitsida, jatupuati bahue yameta. Daja saida Espíritu Santo ja ecuana edusumetayu, ahua ecuaneda tueda jei ya su. Ahua daja saida ecuaneda edusuti su, Diosu sa jacuatsasiati cuana pamapa yapeyu. <sup>24</sup> Cristo neje dunejiji cuana ja pamapa mecuana sa ai utsatada madhada cuana Cristo neje tupupai curusu su tatatana pu cua nime. Beju aimue tueda ai utsatada cuana sa eme su yanita huecuana mahue. <sup>25</sup> Espíritu Santo ja ecuana nimeeichacua atana putsu, pamapa ai su tueda tije ecuana sa a taji.

<sup>26</sup> Be ebia su aida mebatija aimue ecuaneda cama madhada neje ebatí mahue puji. Be ecuaneda cama envidia meatija.

## 6

### *Metsahuatique huamahuama*

<sup>1</sup> Ahua quebata edue jucha yatani micuaneda bahue epuani su, micuaneda, Espíritu Santo jei yaderainia cuana sa ibuneda neje tueda tsahua taji Diosu peje su saida, butsepi neicha papu puji. Daja ibuneda neje tsahua taji micuaneseda, cuapuitime Ishahua ja micuaneda di pirubata cua putsu.

<sup>2</sup> Menimetucheamétique, metsahuatique huamahuama aba cuana etuche puji. Ahua daja ibuneda neje micuaneda ebatiani su, da su Cristo sa jacuatsasiati micuaneda yapeyu.

<sup>3</sup> Ahua quebata ai mahue biame tueda quita ebia su aida ebatí su, tueda quitaita ebaseatiani. <sup>4</sup> Pamapa ecuaneseda cama ecuana mehua ecuana sa ai jaati cuana jabati taji, saida ahua mahue. Ahua ecuana sa ai jaati cuana da saida ebatí su, da su nimebeidaji ecuaneda epu. Pia sa ai jaati cuana ecuaneseda tsada mahue ba taji ecuana sa jaati cuana saida ahua mahue eba puji. <sup>5</sup> Pamapa ecuana mehua ecuana sa ai a taji cuana a taji.

<sup>6</sup> Cristo jepuiti ebuetsuatitani cuana sa ebuetsuaji mecuana sa ai cuana neje tsahua taji.

<sup>7</sup> Edue cuana, be mebaseatiji micuaneda quitaita. Aimue detse aidhe biame Diosu neje jashishati cua mahue. Quebata ejaja etse ebanainia, tueda ejaja quitaita huecha etse ehuiruinia. <sup>8</sup> Daja huecha ahua etse mesa ai utsatada madhada cuana ya su, Diosu ja tueda cuati castigo su ebeituenitayu.

Beju ahua etse Espíritu Santo sa ai tsada cuana ya su, Espíritu Santo ja tueda eid'e yameenitayu. <sup>9</sup> Da putsu, ecuaneseda jatunati taji mahue ai saida cuana ya puji. Ahua ecuaneda ecuana sa janimetuchteati cuana etaitaname mahue su, da su Diosu ja ecuana pamapa ai saida cuana etiatayu. <sup>10</sup> Da putsu, pamapa hora su ai saida cuana ecuaneseda a taji pamapa cristiano cuana neje. Tuna ebia su saida quita edue cuana neje ecuaneseda ai saida cuana a taji.

### *Tije quisa cuana*

<sup>11</sup> Mechamaque cuaja yama aida edereinia quema eme quitaita neje micuaneda bahue mepuque puji ye quirica yama quitaita micuana etiamenia. Micuaneda bahue daja yama aida edereinia quema etua saida mahue jepuiti.

<sup>12</sup> Merejatique jahuitsanasiquitiji ebuetsuaji cuana neje. Tuneda ebuetsuatani edue cuana sa jahuitsanasiquiti taji Diosu peje su nimebutsepi epu puji. Daja edue cuana buetsuaja yatani huecuana curusu jepuiti quisa saida cuana aja mahue cuana ja aimue tijetije paata huecuana mahue puji.

<sup>13</sup> Beju jahuitsanasiquiti bahue quitaita cuana ja aimue jacuatsasiati cuana yapetani mahue. Tuneseda tsada micuaneda ehuitsanasiquiti micuaneda tuna tije aji cuana epu puji. Beju tuneda aida ebatitani, tuna tije aji cuana dueji ba putsu.

<sup>14</sup> Aimue ema mu aida ebatiani mahue quema ai jaati cuana jepuiti. Cristo curusu su manuana quisa jepuiti neje bahui ema beidaji epuani. Ema Cristo neje tupupai curusu su manuana pu cua nime putsu, yama ye mundo sa ai madhada cuana aja mahue yainia. <sup>15</sup> Ecuana Jesucristo neje dunejiji yani putsu, ¿ai puji saida ecuaneda huitsanasiquijiji ahua mahue epu puji? Ebia su saida quita Cristo peje su nimeeichacua epu puji. <sup>16</sup> Diosu ja pamapa tueda ai cuana su jei eputani cuana panimepijajameta. Paichenubata huecuana, tuneda da tusa ene quita dharejiji cuana putsu.

<sup>17</sup> U jenetia su, be aidhe biame ema neje pacuicuinati, quema equita su d'ipi yani putsu, Cristo sa quisa saida cuana ema quisaquisa puana jepuiti. <sup>18</sup> Edue cuana, ecuana sa Echua Puji Jesucristo micuana neje paaniti. Daja papu.

## La CARTA DEL APOSTOL SAN PABLO A LOS EFESIOS

Pablo ja deretaidha ye quirica Efeso ejude su aniji Diosu sa dharejiji edue cuana sa puji. Ye quirica su Pablo quisa epuani dharejiji cuana sa saida jaduneti taji, Cristo peje su jei eputani putsu. Daja huecha quisa epuani judío, judío mahue cuana neje tupupai piada hue epuani, Cristo peje su jei eputani huecuana su.

Capítulo 3 a 6 su saida jabuetsuati cuana yani. Pamapa edue cuana ibuneda neje saida huamahuama jadasuti taji ebuetsuatani.

Ye versículo cuana da ebia su saida quita ebuetsuati puji:

2.8,9

3.20,21

4.30-32

5.18-20

6.10-17

*Pablo ja Efeso ejude su aniji edue cuana quirica tiametana*

<sup>1</sup> Ema da Pablo. Diosu ja ema huaratiatana Jesucristo sa apóstol epu puji. Edue cuana, yama ye quirica ebeituinia micuana peje su. Beju micuaneda da Diosu sa dharejiji cuana, Cristo peje su jei epuani putsu. <sup>2</sup> Ecuana sa Tata Diosu, Echua Puji Jesucristo detse ja meibunebataque, menimepija-jametaque.

*Cristo ja ecuana ibunebatana*

<sup>3</sup> Tata Diosu da ecuana sa Echua Puji Jesucristo sa tata. Tuahueda cielo jenetia ecuana ebia su ibunebatana, ecuaneda Cristo neje dunejiji yani putsu. Da putsu, ecuaneda Diosu saida emitsutsuainia. <sup>4-5</sup> Ye mundo ajiji mahue su, tuahueda ecuana ibuneda bataidha. Ecuana dharetaidha mesa ebacua cuana epu puji, Cristo neje ecuaneda dunejiji putsu. Ecuana dharetaidha tu butse su jucha mahue, nimebutsepi epu puji. Daja tuseda tsada puidha ecuaneseda puji. <sup>6</sup> Ecuana Diosu saida emitsutsuainia, ecuana ebia su ibuneda batana, mesa ebacua Jesucristo neje ecuana dunetana putsu. <sup>7</sup> Diosu ja ecuana daja ebia su ibuneda batana putsu, ecuana d'ejí su atana Cristo jepuiti. Tueda curusu su manuana jepuiti, Diosu ja ecuana sa jucha cuana dhipatana. <sup>8</sup> Beju Diosu ja ecuana ebia su ibunebatana. Mesa piba bahue eni cuana ecuana bahue ameenitana. <sup>9</sup> Mesa etsia piba cuana ye chu shanapameenitana. Cuaja ecuana d'ejí su pu cua Cristo jepuiti, ecuana ye chu shanapameenitana. Ye mundo ajiji mahue su, cuaja Diosu ja cristiano cuana d'ejí su yata pibataidha.

<sup>10</sup> Mesa tsada hora ecuinati su, pamapa cielo, mundo su yani ai cuana Cristo sa eme su eichata. Daja huecha Cristo Echua Puji aida eichatayu.”

<sup>11</sup> Beju ecuaneda Cristo neje dunejiji yani putsu, ecuana dharetaidha mesa dharejiji cuana epu puji. Daja pibataidha Diosu ja, ye mundo ajiji mahue su. Tuahueda ai cuana yatani, cuaja mesa tsada batame. <sup>12</sup> Beju ecuanaju equene Cristo peje su jei puana putsu, tueda ecuaneseda mitsutsua taji. <sup>13</sup> Daja huecha micuaneda di Diosu ja Cristo neje dunemetana, Cristo peje su jei puana putsu, mesa ene quita quisa saida cuana id'aba putsu. Cristiano cuana ja mecuana sa ai cuana emarcata tuneseda quitaita epuani ebame puji. Daja huecha Diosu ja ecuana Espiritu Santo tiatana tuseda quitaita ecuana epuani ebame puji. Biahua tiempo Diosu, “Yama Espiritu Santo ebeitu”, puidha. Beju jiahue tueda mesa jamitsuti yapetani. <sup>14</sup> Espiritu Santo ja ecuana Diosu ja ecuana d'ejí su yapetayu eshanapametani. Diosu neje ecuaneda eid'e yanienitiyu ecuana eshanapametani. Da su ecuaneseda Diosu saida mitsutsua taji, tueda aida putsu.

*Pablo ja Diosu bajatana tusa bahue eni piba cuana edue cuana patiata puji*

<sup>15</sup> Edue cuana, pia cuana ja ema quisatana micuaneda Echua Puji Jesucristo peje su jubida enimetuheatiani. Daja huecha micuaneda pamapa Cristo jepuiti edue cuana ebia su ibuneda ebainia ema quisatana huecuana. <sup>16</sup> Da putsu, yama ai hora papu Diosu diusulupai yainia micuaneseda puji. Daja huecha yama micuaneseda puji jubida ebajainia. <sup>17</sup> Tueda da ecuana sa Echua Puji Jesucristo sa tata aida. Jesucristo sa ai cuana jepuiti ebia su meshanapameenitaque yama tueda ebajainia. <sup>18</sup> Beju meshanapameenitaque micuana dharetana tu neje cielo su yanieniti puji. Daja huecha micuana meshanapameenitaque pamapa mesa ai saida cuana micuana etiatayu. <sup>19</sup> Meshanapameenitaque tueda da ebia su tucheda eni tu peje su jei pujiji cuana etsahua puji. <sup>20</sup> Tueda ebia su tucheda eni putsu, Cristo netianametaibana manujiji cuana duju jenetia. Mesa bai eni bene aniutemetana tu neje ecuat-sasiaeniti puji. <sup>21</sup> Cristo huaraji aida ametana. Pamapa cielo, yahua su huaraji aida cuana ebia su aida ametana. Daja hue Cristo huaraji aida epueniderati. <sup>22</sup> Diosu ja pamapa ai cuana Cristo sa eme su menajatiatana tueda huaraji ebia su aida papu puji. Daja huecha Cristo Echua Puji ichatana pamapa tu peje su jei eputani cuana sa puji. <sup>23</sup> Beju pamapa Cristo peje su jei eputani cuana da Cristo sa equita pu cua nime. Tuahueda quitaita esejeapetani huecuana. Daja huecha tueda quitaita pamapa ai ajiji cuana su yani.

## 2

*Diusu ja ecuana d'oji su atana, ebia su ibunibatana putsu*

<sup>1</sup> Edue cuana, equene Diusu butse su micuaneda jucha jepuiti matsejiji puina biame, Diusu ja micuana eid'e eni ametana, micuaneda Cristo neje dunejiji yani putsu. <sup>2</sup> Equene micuaneda ye mundo sa ai madhada cuana su puniunetina. Beju Ishahua da ye mundo sa echua puji putsu, micuaneda tusa ai tsada cuana bahui aina. Tueda da Diusu jei aji mahue cuana sa echua puji. <sup>3</sup> Equene pamapa ecuaneda jucha su puniunetina. Pamapa ecuana sa ai utsatada, piba madhada cuana aina. <sup>4</sup> Ecuaneda pia juchaji cuana neje Diusu sa castigo su puti taji puina biame, tuahueda ecuana ichenubatana, ecuana ebia su ibuneda ebatani putsu. <sup>5</sup> Beju jucha jepuiti ecuaneda matsejiji puina biame, Diusu ja ecuana d'oji su atana, Cristo neje dunemetana putsu. Jiahue ecuaneda d'oji su yani, Diusu ja ecuana ebia su ibunibatana putsu. <sup>6</sup> Diusu ja ecuana Cristo neje tupupai netianametaibana pu cua nime. Tu neje dunejiji yani putsu, jiahue cielo su Cristo neje ecuana yani pu cua nime ametana. <sup>7</sup> Daja ecuana Diusu ja atana, tuahueda ecuana ebia su ibuneda ebatani putsu, pamapa ecuana tije cristiano cuana ebame puji. <sup>8</sup> Diusu ja ecuana ebia su ibunibatana putsu, d'oji su atana, Cristo peje su jei puana putsu. Aimue ecuaneda quitaita d'oji su jaati cua mahue. Diusu ja bahui ecuana d'oji su atana, beju ecuaneda Cristo peje su janimetuheatiana putsu. Tuahueda ecuana cha d'oji su a hue atana. <sup>9</sup> Aimue detse etse ai saida cuana a putsu, d'oji su pu cua mahue. Diusu ja bahui etse d'oji su yatani, Cristo peje su jei pu putsu. Da su beju aimue ecuaneseda ebia su aida jabati taji mahue, aimue ecuaneda quitaita d'oji su jaati cua mahue putsu. <sup>10</sup> Ecuaneda Cristo peje su jei puana putsu Diusu ja ecuana nimeechacua atana ai saida cuana bahui ya puji. Diusu ja pibataidha biahua jenetia ecuaneseda puji.

*Cristo ja ecuana nimepijajametana*

<sup>11</sup> Da su beju, mepibaenitique aimue micuaneda equene Diusu shanapaina mahue. Judío cuana ja micuana adhida nime bataina, aimue micuaneda huitsanasiquijiji mahue putsu. Tuneda bahui Diusu sa dharejiji cuana ebatitani, huitsanasiquijiji ta putsu. Beju aimue daja mahue. <sup>12</sup> Mepibaenitique micuaneda equene Cristo mahue puniunetina. Aimue Diusu sa dharejiji cuana puina mahue. Aimue Diusu sa jamitsuti cuana shanapaina mahue. Ye mundo su Diusu mahue anina putsu, cielo su eputi piba mahue anina. <sup>13</sup> Jiahue mu micuaneda Cristo neje dunejiji yani. Equene tu peje jenetia uqueda anina biame, jiahue mu

Diusu ja micuana tu peje su nariametana, tu neje tupupai curusu su manuana pu cua nime putsu. <sup>14</sup> Judío cuana ja judío mahue cuana aimue saida ebatani mahue, Moisés chenu sa jacuatsasiati cuana mue a huecuana putsu. Jiahue mu Cristo jepuiti judío cuana, judío mahue cuana neje saida yanita. Mesa manu neje Cristo ja dunemetana huecuana. <sup>15</sup> Beju shanapametana huecuana mesa manu jepuiti bahui d'eji su eputani huecuana. Aimue Moisés chenu sa jacuatsasiati cuana a putsu, d'eji su eputani huecuana mahue. Beju jiahue mu judío cuana judío mahue cuana neje saida yanita, Cristo ja tu neje dunemetana huecuana putsu. <sup>16</sup> Aimue eduiniametitani huecuana mahue beju, Cristo neje dunejiji yanita huecuana putsu. Tueda curusu su manuana putsu, daja huecha pamapa tuneda Diusu neje saida ametana.

<sup>17</sup> Beju Cristo da Diusu sa quisa saida cuana quisaquisa puana cristiano cuana peje su. Cuaja Diusu neje saida anime puta cua huecuana quisaquisa puana. Tueda quisa saida cuana da micuaneseda puji, micuaneda judío mahue Diusu shanapaji mahue cuana putsu. Daja huecha ecuanaju sa puji di, ecuanaju judío Diusu shanapaji cuana biame. <sup>18</sup> Beju Cristo ja atana jepuiti quebata cristiano cuana ja papu Tata Diusu nariata cua, judío, judío mahue cuana paputa biame. Espíritu Santo quitaita ja etsahuatani huecuana Diusu peje su enariati puji. <sup>19</sup> Jiahue mu beju aimue micuaneda Diusu peje su jenetia uqueda yani mahue, equene su nime. Micuaneda da Diusu sa dharejiji ebacua, cuana quitaita. Tueda da micuana sa tata. <sup>20</sup> Micuaneda da ete saida ajiji nime eti jude basetaenijiji bia su yani. Equene apóstol, quisaquisa puji cuana ja pamapa saida basetatana. Jesucristo jepuiti quisaquisa pupirutana huecuana. Tueda huecha da Echua Puji quitaita. Micuaneda da Diusu sa ete pu cua nime. Daja huecha Cristo da ete sa tade tucheda pu cua nime. <sup>21</sup> Pamapa tu peje su jei eputani cuana da Diusu ja edunemetani huamahuama. Tuneda da Diusu sa ani jude. <sup>22</sup> Beju micuaneda pia jei eputani cuana neje Diusu ja edunemetani mesa ani jude epu puji, Espíritu Santo dapia paaniti puji.

### 3

*Diusu ja Pablo huaratiatana mesa quisa saida cuana judío cuana peje su quisaquisa papu puji*

<sup>1</sup> Edue cuana, Diusu ja judío mahue cuana di Cristo jepuiti d'eji su yatani. Ema quisaquisa epuani jepuiti, judío cuana ja ema teriametana. Yama Diusu ebajainia micuana sa saida

puji. <sup>2</sup> Micuaneseda bahue pu taji Diosu ja ema huara-tiatana mesa quisa saida cuana judío mahue cuana peje su quisaquisa epu puji. Tueda da micuana sa saida puji, micuaneda da judío mahue putsu. <sup>3</sup> Micuaneseda bahue pu taji cuaja Diosu quitaita ja mesa judío mahue jepuiti piba cuana ema shanapametana. Jiahue teje mue aidhe biame shanapameji mahue. Ema bahui shanapametana tueda ai cuana. Beju equene pia quirica su yama micuana tueda ai cuana quisana. <sup>4</sup> Neicha ye quirica su yama micuana tueda ai cuana equisainia cuaja yama Diosu sa piba cuana eshanapainia micuaneda bahue epu puji. <sup>5</sup> Biahua tiempo aimue Diosu ja aidhe biame shanapametaidha mahue mesa ai piba cuana judío mahue cuana jepuiti. Jiahue mu Espíritu Santo ja Diosu sa ai piba cuana apóstol, tusa quisaquisa puji cuana shanapametana. <sup>6</sup> Beju tueda tusa ai piba cuana jiahue yama micuana equisainia. Biahua tiempo judío cuana bahui Diosu sa dharejiji cuana putaina. Jiahue mu beju Diosu ja quebata judío mahue cuana di ebatsutani mesa dharejiji cuana epu puji, ahua Cristo peje su jei eputani huecuana su. Beju pamapa judío, judío mahue cristiano cuana Diosu ja ebatsutani mesa dharejiji cuana epu puji, mesa quisa saida cuana su jei eputani huecuana su. <sup>7</sup> Diosu ja ema ebia su ibuneda ebatani putsu, mesa quisaquisa puji ichatana mesa quisa saida cuana quisaquisa epu puji. Daja huecha ema mesa tucheda tiatana mesa quisa saida cuana quisaquisa epu puji. <sup>8</sup> Beju pamapa pia Cristo jepuiti edue cuana ebia su ai eni mahue ema biame, Diosu ja ema dharetana Cristo sa chujeji quisa saida cuana judío mahue cuana peje su quisaquisa epu puji. <sup>9</sup> Biahua tiempo Diosu ja pamapa ai cuana aji mahue su, cuaja cristiano cuana d'ejí su a taji pibataidha. Etsia piba putsu, aimue Diosu ja cristiano cuana quisataidha mahue cuaja tuahueda d'ejí su yata huecuana. Beju jiahue mu yama pamapa cristiano cuana equisainia Diosu sa piba cuana. Ye chu Diosu ja cristiano cuana eshanapametani cuaja d'ejí su puta cua huecuana, Cristo peje su jei pu putsu. <sup>10</sup> Dios ja yatani huecuana pamapa cielo su yani ángel aida cuana Diosu ebia su bahue eni ebame puji. Angel cuana Diosu ja judío, judío mahue cuana neje edunemetani ba putsu, “Diosu da ebia su bahue eni”, eputa huecuana. <sup>11</sup> Beju jiahue Diosu ja cristiano cuana d'ejí su yatani, ecuana sa Echua Puji Jesucristo peje su jei eputani huecuana su. Daja jiahue yatani Diosu ja, cuaja biahua tiempo pibataidha nime. <sup>12</sup> Da su ecuaneda Tata Diosu quitaita naria cua emitsu puji. Iyuname mahue neje naria taji, ecuaneda tu peje su enimetucheatiani putsu. Tuahueda ecuana ebatsuta ecuaneda Cristo neje



dunejiji yani putsu. <sup>13</sup> Da su be ebia su mepibataitanametiji terijiji ema sufri epuani putsu, ema micuana peje su Diusu sa quisa saida cuana quisaquisa puana jepuiti. Beidaji mepuque, ema micuana jepuiti sufri epuani biame. Beju tueda quema sufrimiento cuana da micuana sa saida puji.

### *Cristo ja ecuana ebia su ibuneda batana*

<sup>14</sup> Da su ecuana sa Echua Puji Jesucristo sa Tata Diusu butse su ema etururuani, tuahueda cristiano cuana d'ejí su yatani putsu. <sup>15</sup> Tueda da pamapa cielo, yahua su Cristo peje su jei eputani cuana sa Tata. <sup>16</sup> Yama tueda ebajainia jubida menimetucheametaque puji Espíritu Santo sa tucheda neje, micuaneda Diusu peje su saida nimebutsepi meanique puji. <sup>17</sup> Tueda yama ebajainia ibuneda neje micuana sa muesumu su Cristo paanimeta puji. Tu peje su micuaneda jubida enimtuchehati puji yama ebajainia. <sup>18</sup> Meshanapaque pamapa pia edue cuana neje tupupai Cristo ja micuana ebia su ibuneda ebatani. <sup>19</sup> Mesa jaibunebati cuana ecuaneseda puji beju ebia su aida. Aimue epupeiti mahue. Tuahueda ecuana ibuneda ebatani, ecuaneda cuaja shanapaeni taji mahue ebainia. Beju ecuaneda Diusu sa jaibunebati eshanapaeni su, aimue ecuaneseda pia ai cuana tsada epu mahue. Daja Diusu yama ebajainia pamapa hora su micuana sa saida puji.

<sup>20</sup> Pamitsutsuatija Tata Diusu, tusa tucheda neje ecuana jepuiti ye mundo su tusa ai tsada cuana yatani putsu. Tuahueda ecuaneda ebajainia ebia su tiata cua. Daja huecha ecuaneda epibainia ebia su tiata cua, tueda da ebia su tucheda putsu. <sup>21</sup> Pamapa Diusu sa dharejiji cuana ja Diusu pamitsutsuaenita, tuahueda Jesucristo jepuiti d'ejí su atana huecuana putsu.

## 4

### *Epíritu Santo ja ecuana dunemetana*

<sup>1</sup> Beju ema upia terijiji yani, Echua Puji Jesucristo jepuiti ema quisaquisa puana putsu. Yama micuana jubida ebajainia nimebutsepi cristiano cuana butse su mepuniunetique, tueda da Diusu sa tsada putsu. Da puji Diusu ja micuana dharetana. <sup>2</sup> Nimemitsida mepuque. Saida mepuque. Paciencia neje mepuniunetique. Ibuneda mebatique huamahuama. <sup>3</sup> Saida, dunejiji meanique huamahuama Espíritu Santo sa jatsahuati neje. <sup>4-5</sup> Beju pamapa Cristo peje su jei eputani cuana da piada equita pu cua nime hue. Espíritu Santo da piada hue. Daja huecha ecuaa sa Echua Puji. Ecuaneda Diusu peje su tupupai enimeid'uatiani. Ecuaneda Cristo peje su tupupai jei epuani. Pamapa ecuana tupupai Cristo neje Diusu ja dunemetana.

<sup>6</sup> Tata Diosu da piada hue, pamapa ecuana sa Tata. Pamapa ai cuana ebia su tucheda, aida. Tueda yani pamapa ecuana sa muesumu su. <sup>7</sup> Beju Cristo ja pamapa ecuana metse su hue mesa jatiati ai cuana cuaja mesa tsada nime etiatani. <sup>8</sup> Uja Diosu sa quirica su epuani tueda ai cuana jepuiti:

Tueda da cielo su tsuatibana terijiji cuana neje.

Da jenetia tusa jatiati ai cuana pamapa tusa dharejiji cuana etiatani.

<sup>9-10</sup> Equene Cristo ye yahua su buteana. Da su buepa chu bene cielo su tsuatibana. Tueda mu queje papu biame yani beju. Cielo jenetia pamapa ai cuana ecuatsasiatani.

<sup>11</sup> Pamapa tusa dharejiji cuana tusa tucheda tiatana. Piada piada cuana apóstol ichatana. Pia cuana quisa puji ichatana Diosu peje jenetia ai quisa cuana quisa epu puji. Pia cuana mesa quisaquisa puji ichatana cristiano cuana cuaja d'ejí su puta cua equisa puji. Pia cuana ehuidusuji ichatana. Pia cuana tusa jabuetsuti ebuetsuaji ichatana. <sup>12</sup> Daja Cristo ja mesa dharejiji cuana etsahuatani tu saida emebaja puji, pamapa edue cuana Diosu peje su enimetucheame puji.

<sup>13</sup> Daja huecha ecuana yatani ecuaneda tusa jabuetsuati cuana su dunejiji epu puji, tu jepuiti ai cuana ecuaneda eshanapaeni puji. Da su ecuaneda tu nime epuyu. Aimue ecuaneda Diosu shanapaji cuana nime epu mahue. <sup>14</sup> Da su aimue ecuaneda yanana nime epibati mahue. Pia cuana ja ecuana bid'umimi jabuetsuati eichacua neje buetsuaja yatani su, aimue ecuaneda atasaida ecuana sa piba eturucati mahue. Ecuana baseaja yata huecuana mecuana sa mimi cuana neje. Tuneseda tsada ecuaneda mecuana sa bid'umimi jabuetsuati cuana su jei epu puji biame, aimue ecuaneda daja epu mahue. <sup>15</sup> Ahua ecuaneda ibuneda neje Diosu sa jabuetsuati eni cuana su epuniuneti su, ecuana sa Echua Puji Jesucristo nime ecuaneda epuyu. Tueda da pamapa dharejiji cuana sa Echua Puji. <sup>16</sup> Mesa jacuatsasiati ema su pamapa ecuaneda saida, dunejiji huamahuama epuniuneti. Pamapa ecuaneda saida etsahuati ibuneda su saida esehua puji.

### *Cristo peje su nimeeichacua*

<sup>17</sup> Edue cuana, Echua Puji sa ebani su jubida yama micuana equisainia, be medusutiji Diosu shanapaji mahue cuana nime. Saida mahue mecuana sa piba cuana. <sup>18</sup> Apuda su puniuneti cua nime. Aimue Diosu sa ai cuana eshanapatani huecuana mahue. Aimue tu peje su eid'e huecuana mahue, tuna sa muesumu cuana tu peje su tadada putsu. <sup>19</sup> Aimue ebidhutani huecuana mahue, ai madhada cuana a putsu. Jamenajatiatitana huecuana pamapa mecuana sa utsatada madhada cuana su tueda ai madhada cuana ya puji. Pamapa

ai madhada cuana yatani huecuana pamapa muesumu neje.  
<sup>20</sup> Cristo ja mu aimue micuana daja buetsuatana mahue.  
<sup>21-22</sup> Ahua enei hue micuaneda Cristo jepuiti jabuetsuatiana  
 su, ahua tuahueda micuana mesa jabuetsuati cuana buetsu-  
 atana su, da su menetideraque micuana sa ai puiti madhada  
 cuana jenetia. <sup>23</sup> Micuana sa enime, piba cuana beju eichacua  
 pu taji. <sup>24</sup> Pamapa tsine daja hue saida, eichacua puderati taji,  
 Diosu ja micuana tu nime saida, nimeeichacua atana putsu.  
 Nimebutsepi, jucha mahue puderati taji ibuneda neje.

<sup>25</sup> Da putsu, be bid'umimi meatiji. Butsepi memimique,  
 ecuaneda piada equita pu cua nime putsu, daja huecha Cristo  
 ecuana sa Echua Puji putsu.

<sup>26</sup> Ahua micuaneda eduinini su, tipeida duininiriji taji  
 juchaji epu mahue puji. Be meduininiji piada tsine quitana.  
<sup>27</sup> Be d'iji metiaji Ishahua jucha yameta mahue micuana puji.

<sup>28</sup> Aidhe tsi epuani, parijita. Saida pamudumudu tusa eme  
 neje quitaita tusa ai dia taji cuana ebajati puji, daja huecha  
 tsahuataja cuana etsahua puji.

<sup>29</sup> Be mimi madhada cuana memimiji. Mimi saida, but-  
 sepi cuana bahui memimique eid'abaji cuana sa saida puji.

<sup>30</sup> Be Espiritu Santo mepibapibameji, jucha a putsu. Diosu ja  
 ecuana tueda Espiritu Santo neje señalatana ecuaneda mesa  
 dharejiji cuana epu puji ecuana cielo su edusutayu teje.

<sup>31</sup> Be meacuicuinatiji huamahuama. Meichaderaque  
 pamapa ai duinini, madhada cuana. Be pia sa puji mad-  
 hada hue memimiji. <sup>32</sup> Jiahue mu saida, butsepi mepuque  
 micuaneda cama. Meibunebatique huamahuama. Cuaja  
 Diosu ja micuana Cristo jepuiti cha perdona hue atana nime,  
 daja micuaneseda cama japerdonati taji. Cristo ja ecuana  
 sa jucha cuana dhipatana putsu, Tata Diosu ja tueda jucha  
 cuana setatana. Daja huecha ecuaneseda pia cuana ja ai  
 madhada yatani su, perdona putsu, seta taji.

## 5

### *Cuaja Diosu sa ebacua cuana sa puniuneti taji quisa*

<sup>1</sup> Edue cuana, micuaneda Diosu sa ibuneda ebacua cuana  
 putsu, tu nime micuaneseda pu taji. <sup>2</sup> Cuaja Cristo ja ecuana  
 ibuneda batana nime, daja micuaneseda cama ibuneda ja-  
 bati taji. Tueda huisha janana nime jairutsuatiana Diosu peje  
 su ecuana sa jucha cuana jepuiti. Tueda da eirutsuaji ania,  
 puida nime Diosu sa puji puana. Beju Diosu beidaji puana  
 Cristo curusu su manuana jepuiti.

<sup>3</sup> Be jucha meaji deja ahua epuna neje, micuaneda da  
 Diosu sa dharejiji cuana putsu. Be micuana sa ai utsatada  
 madhada cuana meaji. Be pamapa ai eje mepuji. <sup>4</sup> Be ai mimi

bidhutada, adhiadhi cuana mepuji. Be mimi madhamadha mepuji. Tueda ai cuana da saida, mahue ecuaneseda puji. Beju ebia su saida ecuaneseda puji Diusu diusulupai ya puji. <sup>5</sup> Edue cuana, bahue mepuenique, tueda ai madhada yatani cuana da aimue Diusu, Cristo detse ecuatsasiati su enubi mahue. Beju ai eje eputani cuana da eimea mitsut-suaji cuana nime. <sup>6</sup> Ahua quebata micuana peje su, “Saida ecuaneseda puji tueda ai madhada cuana ya puji”, epuani su, be meid'abaji tueda. Be pia cuana mebaseaji mimi neje. Diusu ja pamapa tueda ai madhada yatani cuana jubida ematsetayu. <sup>7</sup> Da su beju menetideraque tuna peje jenetia. Aimue tuna neje micuana sa ai a taji mahue.

<sup>8</sup> Equene Cristo shanapaji mahue tiempo su, micuaneda apuda su puniunetina. Jiahue mu Diusu sa hueda su micuaneda epuniuneti, Echua Puji Jesucristo neje dunejiji yani putsu. <sup>9</sup> Da su saida, butsepi medusutique micuaneda da Diusu sa dharejiji cuana putsu, tusa hueda su yani putsu. <sup>10</sup> Mebuetsuatique Echua Puji sa ai tsada cuana bahui ya puji. <sup>11</sup> Be meaji apuda su epuniunetita cuana sa ai madhada cuana. Ahua micuaneda saida, butsepi epuniuneti su, pia cuana di juchaji eshanapatita. <sup>12</sup> Tuna sa jaati ai rubuajiji madhada cuana da bidhutada emimi puji. <sup>13</sup> Cuaja hueda ja pamapa ai cuana ejurabatani nime, daja Diusu ja tuna sa ai madhada jaati cuana hueda su eichacuinapetayu pamapa cristiano cuana ja pashanapata puji. <sup>14</sup> Da putsu, uja epuani: Etahuisa, id'eque beju.

Netianayuque manujiji cuana duju jenetia.  
Cristo ja beju mida ejurabata.

<sup>15-16</sup> Da putsu, merejatique, ebia su ai madhada cuana yani putsu. Saida medusutique bahue eni cuana nime. Be medusutiji Diusu shanapaji mahue cuana nime. Diusu saida mebajaji saida cuana bahui mepuque. <sup>17</sup> Be ai shanapa bue mahue cuana nime mepuji. Bahue mepuque Diusu sa ai tsada cuana micuaneseda puji. <sup>18</sup> Be metsetseji, etse etaitanametani putsu. Be tsetse su mepuniunetiji. Espiritu Santo ja huidusu bahui mepuniunetique. <sup>19</sup> Micuaneda cama quisaquisa meatique Diusu sa ai cuana jepuiti. Mesatsuque Diusu satsu cuana pamapa muesumu neje Echua Puji emit-sutsua puji. <sup>20</sup> Pamapa ai cuana jepuiti diusulupai Tata Diusu meaque pamapa hora su Echua Puji Jesucristo sa ebani su.

*Cuaja ani taji familia cuana neje*

<sup>21</sup> Edue cuana, micuaneda cama huamahuama memebajatique, daja Cristo sa tsada putsu.

<sup>22</sup> Ehuane cuana, cuaja micuaneda Cristo eiyubainia nime, daja micuana sa yahue cuana iyuba taji. <sup>23</sup> Beju yahue da

ehuane sa echua puji, cuaja Cristo pamapa tu peje su jei eputani cuana sa Echua Puji nime. Pamapa jei eputani cuana da Cristo sa equita pu cua nime. Tuahueda d'eji su yatani huecuana. <sup>24</sup> Cuaja pamapa ai su Cristo jei yatani huecuana nime, daja ehua cuana ja tuna sa yahue cuana jei a taji.

<sup>25</sup> Daja huecha yahue cuana, ibuneda mebaque micuana sa ehua cuana, cuaja Cristo ja tu peje su jei eputani cuana ibuneda ebatani nime. Tueda manuana tuneseda puji, ebia su ibuneda ebatani huecuana putsu. <sup>26</sup> Daja manuana tusa dharejiji cuana nimebutsepi ya puji. Jucha jenetia d'eji su atana huecuana, tusa mimi jei atana huecuana putsu. <sup>27</sup> Dharetana huecuana tuseda puji nimebutsepi, jucha mahue, budhu mahue nime eputa huecuana puji. <sup>28</sup> Da putsu, yahue sa mesa ehua tsada ba taji, cuaja tueda quitaita tsada ebatiani nime. Quebata ja mesa ehua tsada ebatani su, tueda quitaita tsada jabati cua pu cua nime. <sup>29</sup> Aimue aidhe biame tueda quitaita tsada mahue ebatiani mahue. Beju tueda quitaita saida ebatiani, saida emihuatiani, einatsihuatiani. Daja huecha Cristo ja mesa dharejiji cuana ebia su tsada ebatani, tuneda da tusa equita pu cua nime putsu. <sup>30</sup> Beju ecuaneda da mesa equita pu cua nime. <sup>31</sup> Uja derejiji yani Diosu sa quirica su tueda ai cuana jepuiti: Da putsu, deja sa mesa tata, cuara detse eichajusiatani mesa ehua neje eduneti puji.

Beju tuatseda piada pu cua nime epu. <sup>32</sup> Tueda mimi cuana da atadhada eshanapape puji biame, daja da Cristo mesa dharejiji cuana neje. <sup>33</sup> Edue cuana, neicha yama micuana equisainia, yahue cuana sa ehua cuana ebia su tsada ba taji, cuaja tuneda quitaita tsada ebatiani nime. Daja huecha ehua cuana sa yahue cuana iyuba taji.

## 6

<sup>1</sup> Ebacua cuana, jei meaque micuana sa tata cuana, micuaneda Cristo peje su jei epuani putsu. Saida micuaneseda jei a taji huecuana, Diosu ja micuana bia su ichatana huecuana putsu. <sup>2</sup> Beju uja Diosu sa jacuatsasiati epuani: "Meiyubaque micuana sa tata, cuara. <sup>3</sup> Ahua micuaneda daja epu su, beidaji epuyu. Jucuada mara micuaneda eid'e epu yahua su."

<sup>4</sup> Tata cuana, be meduininiameji micuana sa ebacua cuana. Mesehuameque huecuana Diosu sa jabuetsuati cuana neje Echua Puji Jesucristo peje su jei paputa huecuana puji. Jubida butsepia taji huecuana.

<sup>5</sup> Esclavo cuana, micuana sa emetse cuana jei meaque iyuda neje. Memebajaque huecuana Cristo emebajainia pu

cua nime. <sup>6</sup> Saida memebajaque huecuana aimue micuana echamatani su bahui. Pamapa hora su micuaneseda saida mebaja taji huecuana. Cuaja micuaneda Cristo emebajainia Diosu sa ai tsada cuana ya puji nime, daja micuana sa emetse cuana pamapa muesumu neje mebaja taji. <sup>7</sup> Saida neje memudumuduque Cristo emebajainia pu cua nime. <sup>8</sup> Ahua etse esclavo, esclavo mahue epuani su, pamapa etse sa ai saida jaati cuana jepuiti Diosu ja etse saida eturuca echuje etiatayu.

<sup>9</sup> Emetse cuana, daja huecha saida micuaneseda pu taji micuana sa esclavo cuana neje. Be med'ayaji huecuana. Mepibaenitique, micuaneda esclavo cuana neje tupupai Echua Puji Jesucristo ema su yani. Tueda cielo su yani. Tu-ahueda pamapa tupupai ebatani. Aimue edharetani mahue.

*Cuaja jei eputani cuana sa jabianetiatime pu taji*

<sup>10</sup> Edue cuana, menimetuheatique Echua Puji Jesucristo sa tucheda neje. Tu neje dunejiji meanique. <sup>11</sup> Cuaja soldado cuana equita epeneti puji ejud'utitani nime, daja micuaneseda Diosu sa tucheda ani taji Ishahua jenetia epeneti puji, daja huecha mesa ai jabaseati cuana etuchea puji. <sup>12</sup> Beju aimue ecuaneda cristiano cuana neje emajaitiani mahue. Da mu einid'u madhada cuana neje emajaitiani. Tuneda da huaraji aida, tucheda saida, madhada eni cuana. Buepa su yanita huecuana. Ye mundo madhada su cristiano cuana ecuatsasiatani huecuana. <sup>13</sup> Da putsu, edue cuana, cuaja soldado cuana emajaiti puji ejud'utitani nime, daja micuaneseda di Diosu sa tucheda ani taji Ishahua sa jabaseati cuana etuchea puji. Tueda jamajaiti cuana ape putsu, micuaneda Diosu peje su nimetucheda epu, Diosu ja micuana nimetucheametana putsu. <sup>14</sup> Soldado cuana ebasetati puji, equene eturisiji cuana eichatitani. Diosu sa jabuetsuati cuana neje basetajiji mepuque cuaja soldado eturisijiji nime epu. Daja huecha nimebutsepi mepuque. Ahua daja micuaneda nimebutsepi epuniuneti su, micuaneda da soldado cuana etsedu epenetitani nime epu. <sup>15</sup> Soldado cuana pulucu edusutitani saida yaseti puji. Ahua micuaneda Diosu sa quisa saida cuana quisaquisa epuani su, micuaneda da soldado cuana pulucuji nime epu. <sup>16</sup> Soldado cuana escudo edusutitani carashana cuana jenetia epeneti puji. Ahua micuaneda Diosu peje su jubida enime-tuheatiani su, micuaneda da soldado cuana escuduji nime epu. Da neje micuaneda Ishahua sa jabaseati cuana jenetia epeneti. Tueda jabaseati cuana da carashana eutsuani nime. <sup>17</sup> Soldado cuana casco edusutitani echua epeneti puji. Ahua ene quita Diosu ja micuana d'ejí su atana su, micuaneda da

soldado cuana cascoji nime epu. Medusutique Diusu sa mimi. Tueda da espada nime. Espiritu Santo ja quitaita tueda mimi ecuana eshanapametani. <sup>18</sup> Pamapa hora su Diusu memitsuque. Mebajaque tueda cuaja Espiritu Santo ja micuana ebajametani nime. Janimepitijiji neje Diusu memitsuderaque. Be menimetuchedataitanametiji. Pamapa edue cuana sa puji Diusu mebajaque pamapa hora su. <sup>19</sup> Quema puji di mebajaque Diusu tuahueda ema mesa mimi quitaita cuana pamimiameta puji. Mebajaque Diusu ema patucheameta puji mesa quisa saida cuana cristiano cuana peje su ema quisaquisa epu puji, tuneda di id'aba putsu d'eki su paputa huecuana puji. <sup>20</sup> Beju Diusu ja ema huaratiatana mesa ai quisa saida cuana quisaquisa epu puji. Da putsu, jiahue ema terijiji yani. Da su mebajaque Diusu tuahueda ema patucheameta puji, mesa ai quisa saida cuana ema jubida iyuame mahue neje, quisaquisa epu puji. Tueda da quema tsada ya puji.

### *Tije quisa cuana*

<sup>21</sup> Tíquico da ecuana sa ibuneda edue. Tueda da etsahuaji saida, butsepi Echua Puji Jesucristo sa puji. Tuahueda micuana equisata pamapa ema jepuiti. <sup>22</sup> Da puji yama tueda micuana peje su ebeituinia ema jepuiti ai cuana shanapame putsu, micuana enimetucheame puji.

<sup>23</sup> Beju Tata Diusu, Echua Puji Jesucristo detse ja ebia su meibunebataque. Ebia su menimepijajametaque, daja huecha jubida Diusu peje su menimetucheametaque tse. <sup>24</sup> Ecuana sa Echua Puji Jesucristo butsepi ibuneda ebatani cuana Diusu ja ebia su paibunebata. Daja papu.

## La CARTA DEL APOSTOL SAN PABLO A LOS FILIPENSES

Pablo ja ye quirica deretaidha beidaji neje Filipos ejude su aniji Diosu sa dharejiji cuana sa puji. Terijiji yani biame, mue pibapiba tueda. Ebia su beidaji Diosu peje su puidha. Da su ebametani ecuana Cristo peje su janimetucheati cuana ebia su saida quita. Cristo ja ecuana saida ebatani, queja papu meputija biame.

Ye versículo cuana da ebia su saida quita ebuetsuati puji.

1.6,21

2.5-11

3.7-13,14

4.4,6-8,11,13

*Terijiji yani jenetia Pablo ja Filipos ejude su aniji edue cuana quirica tiametana*

<sup>1</sup> Ema da Pablo. Timoteo ema neje yani

Etseju da Jesucristo sa emebajaji detse. Pamapa Filipos ejude su aniji edue cuana peje su etseju ye quirica ebeituinia. Edue cuana sa ehuidusuji, ilisha sa emebajaji cuana peje su di ebeituinia. Tuneda da Cristo neje dunejiji yani. <sup>2</sup> Beju ecuana sa Tata Diosu, Echua Puji Jesucristo detse ja meibunebataque. Menimepijajametaque tse.

*Pablo ja edue cuana sa puji Diosu bajatana*

<sup>3</sup> Ai hora papu yama micuana piba putsu, diusulupai Tata Diosu yainia micuana jepuiti. <sup>4-5</sup> Beidaji da ema, micuaneda ema tsahuana putsu. Ema micuana peje su Diosu sa quisa saida cuana quisaquisa pupiruana su, micuaneda ema tsahuapiruana. Daja hue jiahue teje beju micuaneda ema etsahuainia. Da putsu, beidaji neje yama Diosu ebajainia micuaneseda puji. <sup>6</sup> Diosu ja micuana duju su apirujiji mudu saida cuana beju daja hue yaderaenita Jesucristo epueicha teje. <sup>7</sup> Ema saida epibatiani micuana jepuiti, micuana ebia su ibuneda ebainia putsu. Ema neje tupupai micuana Diosu ja ibunebatana. Ema terijiji yani su, ahua huaraji cuana butse su, ema Diosu sa ai quisa saida cuana quisaquisa epuani. Beju micuaneda ema etsahuatani tueda quisa saida cuana quisaquisa epu puji. <sup>8</sup> Diosu bahue yama micuana ebia su ibuneda ebainia, cuaja Jesucristo ja micuana ibuneda ebatani nime. Tuahueda ema micuana ibuneda ebametani. <sup>9</sup> Yama Diosu ebajainia metsahuataque puji, micuaneda daja hue huamahuama ebia su saida ibuneda ebatu puji. Tuahueda metsahuataque mesa mimi saida eshanapa puji.



10-11 Daja huecha metsahuataque ai saida cuana dhare bahue mepuque puji. Daja yama Diusu ebajainia micuaneseda puji micuaneda pamapa ai saida, butsepi cuana a putsu, jucha mahue epu puji. Ahua daja micuaneda epu su, Cristo ja micuana etsahuata mesa ai saida cuana bahui ya puji. Da su cristiano cuana Diusu sa puji saida emimita. Da su Cristo epueicha su, aimue Diusu ja ai madhada cuana micuana peje su ebata mahue.

*Pablo Cristo sa puji eid'e*

12-13 Edue cuana, bahue mepuque, ema terijiji yani Diusu sa quisa saida cuana quisaquisa puana putsu. Pamapa romano echua puji aida sa ete su aniji cuana bahue eputani cuaja su ema terijiji yani. Daja huecha pamapa soldado cuana di bahue eputani. <sup>14</sup> Ema terijiji yani ba putsu, upia aniji edue cuana janimetucheatitana Diusu sa quisa saida cuana iyuame mahue neje quisaquisa epu puji.

<sup>15</sup> Beju pamapa tuneda Cristo jepuiti quisaquisa eputani biame, piada piada tuneda Cristo jepuiti envidia neje quisaquisa eputani. <sup>16</sup> Daja quisaquisa eputani huecuana cristiano cuana tuna tije bahui paputa puji. Tuneseda tsada mahue cristiano cuana ja ema paid'abata puji. Beidaji huecuana, ema terijiji yani ba putsu. Quema sufrimiento cuana yapacaja yatani huecuana. <sup>17</sup> Pia edue cuana mu piba saida, ibuneda neje quisaquisa eputani. Tuneda bahue Diusu ja ema teriametana mesa quisa saida cuana upia terijiji yani quisquisa epu puji. <sup>18</sup> Da su beju piada piada edue cuana envidia neje Cristo jepuiti quisaquisa eputani ebia su aida ebameti puji. Pia edue cuana mu ibuneda neje quisaquisa eputani cristiano cuana Cristo tije paputita puji. Beju daja biame, beidaji ema, Cristo jepuiti quisaquisa eputani huecuana putsu.

<sup>19</sup> Daja hue ema ebia su beidaji epudera, quema puji micuaneda Diusu ebajainia putsu. Bahue ema quema puji pamapa ai cuana beju saida epu, Espíritu Santo ja ema etsahuatani putsu. <sup>20</sup> Ema mu bidhujá mahue Cristo jepuiti quisaquisa epu puji. Ema quisaquisa puja pamapa hora su nimetucheda neje. Ema eid'e epu su, ahua emanu su, Cristo sa puji bahui ema epu. Quema tsada pamapa hora su saida epuniuneti puji cristiano cuana ja Cristo aida tucheda pashanapata puji. <sup>21</sup> Ahua ema eid'e su, quema puji ebia su saida Cristo emebaja puji. Ahua ema emanu su, beju ebia su saida quita quema puji, ema tu neje cielo su yaniti putsu. <sup>22</sup> Ahua ema eid'e epu su, Diusu sa quisa saida cuana quisaquisa daja hue punetime epu. <sup>23</sup> ¿Quebata jia da ebia su saida quita quema puji, eid'e epu puji ahua emanu puji? Bue

mahue ema. Manuja da ema Cristo neje yaniti puji. Tueda da ebia su saida quema puji. <sup>24</sup> Micuaneseda puji mu ebia su saida ema ye mundo su eid'e paani puji, micuana Diosu peje su beidaji yame puji, daja huecha jubida enimetucheame puji. <sup>25</sup> Bahue ema micuana sa saida puji Diosu ja ema quejucua tiempo puji tsuhu eid'e yameta micuana yama etsahua puji. <sup>26</sup> Da su beju beidaji micuaneda Jesucristo peje su epu, ema micuana neje yaniti putsu.

<sup>27</sup> Medusutique saida, butsepi, cuaja Cristo sa jabuet-suati cuana ja micuana ebuetsuatani batame. Ahua ema micuana peje su eputi ahua mahue su, micuaneda saida, huamahuama medusutique. Saida medunetique. Menimetucheatique Diosu peje su pamapa cristiano cuana Cristo jepuiti ai cuana equisa puji. Daja medusutique ai saida quisa micuana jepuiti yama eid'aba puji. <sup>28</sup> Be meiyubaji micuana duininibaji cuana. Ahua micuaneda eiyuba mahue su, eshanapatita huecuana micuaneda Diosu ja d'eji su atana. Daja huecha Diosu ja cuati castigo su ebeituta eshanapatita huecuana. <sup>29</sup> Diosu ja micuana Cristo peje su jei ametana. Micuaneda da Cristo sa dharejiji putsu, tu jepuiti micuaneseda sufri pu taji. Daja da Diosu sa tsada. <sup>30</sup> Micuaneda bahue cuaja Cristo shanapaji mahue cuana ja ema neda neda yametani. Daja hue sufri punetime jiahue teje. Micuaneda di daja huecha yata huecuana.

## 2

### *Diosu ja Cristo huaraji aida ametana*

<sup>1-2</sup> Edue cuana, cuaja Cristo ja micuana ibuneda ebatani nime, daja micuaneseda huamahuama ibuneda neje jabati taji. Cuaja micuaneda Espiritu Santo neje edunetiani nime, daja micuaneseda huamahuama jaduneti taji. Saida, ibuneda neje mebatique. Mepibadunetique huamahuama. Medunetique Diosu saida emebaja puji. Ahua daja micuaneda epu su, nimebeidaji da ema epu. <sup>3</sup> Be micuaneseda puji bahui meaniji. Be ebia su aida mebatiji. Nimemitsida mepuque micuaneda cama. Pamapa ibuneda edue cuana neje huamahuama mebatique. <sup>4</sup> Be micuaneseda puji bahui ai saida mechacuji. Pia edue cuana sa saida puji di chacu taji.

<sup>5</sup> Cristo nime mepuque. Mepibatique Cristo sa japibati nime. <sup>6-7</sup> Tueda da Diosu biame, tueda quitaita ja mesa tucheda aida ichaderatana deja epiati puji. Emebajaji nime japiatiana. <sup>8</sup> Cristiano cuana duju su deja bataji puana. Beju deja japiati putsu, janimemitsiatiana. Tata Diosu jei apetana

curusu su emanuameti teje. <sup>9</sup> Da putsu, Diusu ja tueda nedianametaibana manujiji cuana duju jenetia. Huaraji ebia su aida quita ichatana. Tusa ebani da pamapa pia ebani cuana ebia su aida quita ichatana tu butse su pamapa cristiano cuana patururuta puji. <sup>10</sup> Pamapa cielo su aniji, mundo su aniji, manujiji, einid'u cuana: "Jesucristo bahui da Echua Puji aida", eputa. <sup>11</sup> Beju Diusu sa tsada Cristo da Echua Puji aida bahue paputa huecuana puji. Da neje Tata Diusu beidaji epu.

*Diusu sa dharejiji cuana da ye mundo su hueda pu cua nime*

<sup>12</sup> Ibuneda edue cuana, micuaneda quema jabuetsuati cuana jei a bahue puina, ema micuana neje anina su. Beju jahue ema aimue micuana neje yani mahue biame, daja hue jei aniamie ema meaque. Diusu memebajaque nimemitsida, iyuda neje. <sup>13</sup> Diusu ja micuana enimetucheametani mesa tsada saida cuana micuaneda aja ya puji. Diusu mebajaque daja hue d'ejji su meaderataque.

<sup>14</sup> Meaque pamapa ai cuana mimicuicuinaji mahue neje. Be micuaneda cama meacuicuinatiji. <sup>15</sup> Ahua daja saida micuaneda epuniuneti su, Diusu sa ebacua cuana nimebutsepi, jucha mahue micuaneda epu. Daja hue saida puniuneti taji cristiano nimemadhada cuana duju su. Cuaja atujai cuana buepa apuda su cuareda eputani nime, daja huecha micuaneda cristiano cuana madhada cuana duju su. <sup>16</sup> Micuaneda Diusu sa quisa saida cuana tuna peje su quisaquisa epuani su, tuneda di jei eputa eid'e eni paputa huecuana puji. Ahua micuaneda saida epuniuneti su, Cristo epueicha su, ema nimebeidaji epu micuana jepuiti quema jabuetsuati cuana micuana peje su aimue yanacane puana mahue putsu, yama eba. <sup>17</sup> Ahua ema emanuameta huecuana su, ahua quema ami ed'uichata huecuana su, nimebeidaji ema epu. <sup>18</sup> Daja epu biame, micuaneseda di beidaji pu taji ema nime.

*Timoteo, Epafrodito detse jepuiti quisa*

<sup>19</sup> Ahua Echua Puji Jesucristo sa tsada su, yama Timoteo ebeitu micuana peje su, tuahueda ema peje su jasiapati putsu, micuana sa quisa saida cuana ema paquisata puji. Da su ema beidaji epu, micuana sa quisa id'aba putsu. <sup>20</sup> Tuahueda bahui micuana ibuneda ebatani, cuaja yama micuana ibuneda ebainia nime. Micuana sa saida puji bahui echacutani. <sup>21</sup> Pia cuana mu tuna sa saida puji bahui echacutani. Aimue Jesucristo sa saida puji echacutani huecuana mahue. <sup>22</sup> Beju micuaneda bahue Timoteo saida jabame-tiana. Saida ema neje tupupai Diusu sa quisa saida cuana quisaquisa puana. Ema tsahuatana quema ebacua pu cua

nime. <sup>23</sup> Da su Timoteo yama ebeitu micuana peje su quema ai enime cuana basetapejiji su, micuana equisa puji. <sup>24</sup> Yama Echua Puji Jesús enimeid'uainia ya di d'ejí patiata micuana tipeida epereti puji.

<sup>25</sup> Micuaneda edue Epafrodito ema peje su beituana ema patsahuata puji. Tueda da quema ebuqueji saida puina. Ema saida tshuatana Diusu emebaja puji. <sup>26</sup> Beju micuaneda ebia su janimepibapibametiana, tu nedaji puana putsu. Jiahue tueda jasiapatija micuana peje su tueda beju saisijiji micuaneda eba puji. <sup>27-28</sup> Ene quita nedaji saida puana. Que chidi hue manucueana. Diusu ja tueda ichenubatana putsu, beju saisibana. Ema beidaji ametana, Epafrodito saisiametana putsu. Da putsu, tueda yama tipeida micuana peje su beituja yainia micuaneda di tu ba putsu, beidaji mepuque puji. Da su aimue ema ebia su enimepibapibameti mahue. <sup>29</sup> Mebatsuque tueda beidaji neje, tueda da Cristo jepuiti edue putsu. Meiyubaque tueda. Pamapa tu nime Diusu emebajatani cuana di ecuaneseda saida iyuba taji. <sup>30</sup> Daja micuaneseda tueda iyuba taji, Cristo mebaja epuani cama, que chidi manucueana putsu. Micuana sa eturuca ema tsahuatana. Beju manucueana, ema etsahuanetia je.

### 3

*Cristo peje su jei pu putsu bahui, etse d'ejí su pu cua*

<sup>1</sup> Da su edue cuana, beidaji mepuque, micuaneda Echua Puji neje dunejiji yani putsu. Equene yama micuana quisana ai cuana neicha yama micuana equisainia. Quema mu mue ai madhada micuana neicha equisa puji. Micuaneseda puji beju saida neicha yama tueda ai quisa cuana equisa puji. <sup>2</sup> Merejatique deja nimemadhada cuana neje. Merejatiqu jahuitsanasiquitiji cuana neje. Pia jabuetsuati madhada cuana micuana buetsuaja yatani huecuana. Cristiano cuana sa jahuitsanasiquiti taji d'ejí su epu puji ebuetsuatani huecuana. <sup>3</sup> Beju ecuaneda da Diusu sa ene quita dharejiji cuana. Aimue ecuaneda jahuitsanasiquitiana mahue tusa dharejiji cuana epu puji. Ecuaneda mu enime su bahui Diusu emitsuameinia. Ecuaneda Cristo neje dunejiji putsu, ¿ai puji ni da ecuaneda jaquitasiquiti cua d'ejí su epu puji? <sup>4</sup> Equene yama di tueda ai cuana aina d'ejí su epu pepe. Tueda jacuatsasiati cuana su ema janimeid'uatina pia cuana ebia su. <sup>5</sup> Beju ema ocho tsineji su, huitsanasiquitana huecuana, judío cuana sa jacuatsasiati daja putsu. Quema tata chenu cuana da israelita cuana puidha. Da putsu, ya di israelita deja quitaita. Ema da Benjamín chenu sa familia jenetia. Ema da judío deja quitaita, quema tata detse da judío tatse puina

putsu. Judío cuana sa jacuatsasiati cuana daja hue yama aderaina, fariseo ema puina putsu. <sup>6</sup> Tucheda ema puina Diosu emebaja puji. Saida yama yainia pepe hue ema puana, Jesús peje su jei eputani cuana tijetije yainia je. Pamapa Moisés chenu sa jacuatsasiati cuana yama apeina. Mue aiya biame ema tuaquisa. Ema da deja butsepi, saida puina Moisés chenu sa jacuatsasiati cuana su. <sup>7</sup> Tueda ai cuana chujeji quema puji puina. Beju jiahue mu pamapa tueda ai cuana quema puji mue ai puji saida, Cristo beju yama eshanapainia putsu. <sup>8</sup> Tueda da quema Echua Puji beju. Tu jepuiti bahui ema bahue puja. Pamapa pia ai cuana quema puji mue ai puji saida. Da putsu, yama pamapa tueda equene ai cuana taitanameana. Tueda ai cuana da ai budhu pu cua nime hue yama ebainia Cristo bahui eshanapa puji. Tueda ai cuana yama ichajusiana Cristo neje bahui eduneti puji. Tueda bahui da quema tsada quitaita. <sup>9</sup> Aimue beju yama Moisés chenu sa jacuatsasiati cuana aja yainia mahue d'eji su epu puji. Cristo peje su bahui ema enimetuheatiani d'eji su epu puji. Da su ema Diosu ja enimebutsepiata, ema Cristo peje su enimetuheatiani putsu. <sup>10</sup> Cristo bahui yama saida shanapaja. Mesa tucheda eni bahui quema tsada. Tueda tucheda quitaita neje manujiji cuana duju jenetia janetianametibana. Yama tueda jei aja yainia tu nime emanu teje, sufri epu puji. <sup>11</sup> Da su cuaja tu netianayume puana nime, ya di manujiji cuana duju jenetia Diosu ja ema enetianametayu.

*Diosu sa dharejiji cuana da jasitutiji cuana nime*

<sup>12</sup> Beju yama tejetiji mahue tsuhu. Aimue ema tupu, butsepi, jucha mahue tsuhu biame, daja hue ema Diosu peje su enimeid'uaderatiani Cristo nime epu teje. <sup>13</sup> Da putsu, edue cuana, quema jaitiana japitsati ai cuana yama setaenija. Daja hue ema ehui su puderatija Cristo nime epu teje. <sup>14</sup> Jasitutiji cuana ejududutani eina jenetia ajiji corona einatsu puji. Daja nime yama Diosu saida meabajaja mesa echuje tu peje jenetia einatsu puji. Cristo neje ema dunejiji putsu, Diosu ja ema tu neje eid'e yanienimetayu cielo su. Da puji ema etuheatiani.

<sup>15</sup> Edue cuana, pamapa Diosu jepuiti piba tupuji cuana sa daja ema epibatiani nime japibati taji. Ahua micuaneda ema nime daja epibati mahue su, da su Diosu ja micuana ebameta. <sup>16</sup> Que teje Diosu sa jabuetsuati cuana ecuaneda eshanapainia beju da neje saida mepuniunetija.

<sup>17</sup> Edue cuana, daja hue meaniaque ema nime. Mebaenique ema nime ai yatani edue cuana tuna sa ai puiti saida cuana ya puji. <sup>18</sup> Equene micuana yama quisana. Beju jiahue neicha yama equisainia piba neda neje ebia su Cristo neje jamajaitiji cuana yani. Cristo curusu su manuana

ecuana sa jucha cuana jepuiti id'abaja mahue huecuana. <sup>19</sup> Cuati castigo teje ecuinatita huecuana. Aimue Diusu eshanapatani huecuana mahue. Mecuana sa ai utsatada madhada cuana bahui a bahue huecuana. Ai bidhutada cuana ya puji bahui mecuana sa tsada. Tueda bahui mecuana sa piba pamapa hora su. <sup>20</sup> Beju ecuaneda mu aimue daja epuani mahue, Diusu sa dharejiji cuana putsu. Cielo jenetia ecuana Deji su Aji Echua Puji Jesucristo epue ecuaneda eid'uainia. <sup>21</sup> Tuahueda epueicha su, ecuana sa equita pishihue cuana eturucata pia equita saida, manu bue mahue neje. Tusa equita tucheda nime ecuana equita etiatayu, tu epueicha su. Daja ecuana yatayu, ebia su tucheda eni putsu. Tusa tucheda quitaita neje pamapa ai cuana tu ema su eichapetayu pamapa ai cuana ecuatsasiata puji.

## 4

*Diusu sa dharejiji cuana sa daja hue nimebeidaji pu taji*

<sup>1</sup> Ibuneda edue cuana, ebia su yama micuana baja yainia. Micuaneda ema nimebeidaji yameinia, Cristo sa dharejiji cuana putsu. Echua Puji Jesucristo peje su menimetucheatique.

<sup>2</sup> Evodia, Síntique yama jubida equisainia pacuicuinarijiti tse. Paduneti tse, Jesucristo jepuiti edue epuna detse putsu.

<sup>3</sup> Edue, tsahuaque tueda edue epuna detse paduneti tse puji. Dapia mique ejude su ema Diusu sa quisa saida cuana quisaquisa puana su, tuatseda ema ebia su tsahuatana edue Clemente, pia edue cuana neje. Beju tuna sa ebani cuana cielo su Diusu ja quirica su derejiji yani.

<sup>4</sup> Pamapa hora su nimebeidaji mepuque Echua Puji peje su. Jubida yama neicha micuana equisainia, nimebeidaji mepuque. <sup>5</sup> Pamapa cristiano cuana duju su saida meanique saida mebataque huecuana puji, Echua Puji Jesucristo tipeida esiapatiyu putsu.

<sup>6</sup> Be ebia su menimepibapibametiji, ai iyuda enime cuana micuana peje su ecuinatani su. Diusu memitsuque pamapa ai cuana jepuiti. Mebajaque Diusu metsahuataque puji. Diusulupai di meaque Tata Diusu pamapa ai su. <sup>7</sup> Ahua daja micuaneda epu su, aimue ebia su enimepibapibameti mahue, Diusu ja micuana sa muesumu epijajametayu putsu. Daja Diusu ja micuana yatayu, micuaneda Cristo neje dunejiji putsu. Beju cuaja shanapa taji mahue ecuaneda ebainia biame, Diusu ja ecuana enimepibajametani.

*Mepibatique ai saida cuana su bahui*

<sup>8</sup> Da su edue cuana, daja hue mepibatique pamapa ai saida, ene quita, butsepi cuana su. Mepibatique pia ja ai saida

yatani cuana su. Be mepibatiji pia ja ai madhada yatani cuana su.

<sup>9</sup> Meaque quema saida jabuetsuati cuana. Daja huecha ema micuana neje anina su yama ai ana cuana di meaque. Ahua micuaneda daja epu su, Diusu ja micuana enimepija-jametayu.

*Filipo ejude su aniji edue cuana ja Pablo tsahuatana*

<sup>10</sup> Ebia su beidaji ema Echua Puji peje su, neicha micuaneda ema pibana putsu. Bahue ema quejucua tsine puji micuaneda cuaja tsahua taji mahue ema bana. Beju jahue mu micuaneda ema neicha etsahuainia. <sup>11</sup> Aimue ema ai eje su mahue. Ema mu beidaji quema ai cuana neje. <sup>12</sup> Pia puri ema ani bahue. Daja huecha quema tupu ai cuana ani bahue. Beju ema jabuetsuatiana cuaja saida anime pu taji, quema jucuada yani, ahua mahue. <sup>13</sup> Yama pamapa Diusu sa puji ai cuana a cua, Cristo ja ema enimetucheametani putsu. <sup>14</sup> Daja biame, saida micuaneda ana, ema tsahuaja putsu.

<sup>15</sup> Micuaneda bahue ema Macedonia yahua jenetia cuinanana su, Diusu sa quisa saida cuana quisaquisa epupiru puji, mue ema pia aidhe ja biame tsahua. Micuaneda bahui ema tsahuana. Ema etsahua puji micuaneda daja hue chipilu beituame ana. <sup>16</sup> Ema Tesalónica ejude su anina su, micuaneda chipilu quejucua nuati biame beituana quema ai chidi cuana ebajati puji. <sup>17</sup> Tueda micuaneda ai yainia cuana da saida. Aimue ema micuana sa ai cuana eje epuani su mahue. Ema beidaji epuani, micuaneda ema daja etiainia su, Diusu ja micuana eturuca etiatayu putsu. <sup>18</sup> Beju yama inatsuana pamapa micuaneda ema peje su beituana chipilu cuana. Ebia su quita yama inatsuana, edue Epafrodito quema dusetana putsu. Micuana sa tiajiji chipilu da Diusu peje su irutsujiji puida nime. Diusu da beidaji micuana neje, micuaneda daja tsahuana putsu. <sup>19</sup> Diusu da pamapa ai cuana emetse putsu, pamapa micuana sa ai mahue cuana micuana etiatayu, micuaneda Cristo neje dunejiji yani putsu. <sup>20</sup> Beju Diusu da aida, saida putsu, daja hue tuseda puji saida memimienija.

*Tije quisa cuana*

<sup>21</sup> Pamapa dapia aniji Diusu sa dharejiji cuana yama emit-suameinia Jesucristo sa ebani su. Pamapa upia ema neje aniji edue cuana ja micuana emitsuametani. <sup>22</sup> Daja huecha pamapa ye ejude su Cristo peje su jei eputani cuana ja micuana emitsuametani. Pamapa romano echua puji aida sa ete su aniji edue cuana ja di micuana emitsuametani.

<sup>23</sup> Beju ecuana sa Echua Puji Jesucristo ja meibunetaque. Daja papu.

## La CARTA DEL APOSTOL SAN PABLO A LOS COLOSENSES

Ye quirica Pablo ja deretaidha Colosas ejude su Diosu sa dharejiji edue cuana sa puji. Pablo ye quirica su Cristo da Diosu sa Ebacua, daja huecha ye mundo D'ejí su Aji quisa epuani. Ecuana ebuetsuatani dharejiji cuana sa muesumu su Cristo eid'e yani, Diosu butse su saida, butsepi papuniunetita huecuana puji. Daja huecha ebuetsuatani ecuana ai puiti cuana ya puji ebia su saida Cristo neje dunejiji yani puji.

Ye versículo cuana da ebia su saida quita:

1.27

2.6,7,10

3.1-4,15-17,23

4.5,6

*Pablo ja Colosas ejude su aniji edue cuana quirica tiametana*

<sup>1</sup> Ema da Pablo. Diosu ja ema ichatana

Jesucristo sa apóstol epu puji. Timoteo neje yama ye quirica ebeituinia Colosas ejude su aniji edue cuana peje su. <sup>2</sup> Edue cuana, micuaneda Cristo peje su jei puana putsu, micuaneda Diosu sa dharejiji cuana. Ecuana sa Diosu ja meibunebataque, menimepijajametaque.

*Pablo ja edue cuana sa puji Diosu bajatana*

<sup>3</sup> Edue cuana, pamapa hora su ecuanaju ecuana sa Echua Puji Jesucristo sa Tata Diosu diusulupai yainia micuaneseda puji. <sup>4</sup> Bahue ecuanaju micuaneda Jesucristo peje su jubida enimetuheatiani, daja huecha pamapa Cristo jepuiti edue cuana micuaneda ebia su ibuneda ebainia. <sup>5</sup> Micuaneda enimeid'uatiani cielo su Diosu peje su eputi puji. Beju micuaneda Cristo jepuiti ene quita quisa saida cuana su jei puana jenetia daja hue Diosu peje su janimeid'uatianiame epu. <sup>6</sup> Tueda quisa saida cuana micuana peje su cuinatiana jenetia dueji cristiano cuana Cristo peje su jei eputani. Aimue micuana peje su bahui cuinatiana mahue. Pamapa ejude cuana je daja hue dueji cristiano cuana jei eputani. Tuneda di Diosu sa ene quita ibuneda quisa id'aba putsu, beju jei putana huecuana. <sup>7</sup> Ecuana sa ibuneda edue Epafra ja tueda quisa saida cuana micuana equene buetsuatana. Tueda da ecuanaju neje tupupai Diosu sa emebajaji saida. <sup>8</sup> Beju tuahueda ecuana quisatana, cuaja Espíritu Santo ja micuana pamapa edue cuana saida ibuneda ebametani.



<sup>9</sup> Da putsu, jiahue teje ecuanaju Diusu daja hue ebajainia micuaneseda puji Espiritu Santo ja Diusu sa tsada, bahue eni piba cuana meshanapametaque puji. <sup>10</sup> Ecuanaju tueda ebajainia metsahuataque, mesa ebacua nime saida, butsepi mepuniunetique puji, daja huecha mesa ai saida tsada cuana bahui meaque puji. Metsahuataque tu eshanapaeni puji ecuanaju Diusu ebajainia. <sup>11</sup> Daja huecha ecuanaju Diusu ebajainia metucheametaque mesa tucheda neje. Daja metucheametaque micuaneda paciencia, beidaji neje pamapa sufrimiento cuana etuchea puji. <sup>12</sup> Beju diusulupai Tata Diusu meaque, tuahueda ecuanaja pamapa mesa ai saida cuana cielo su etiatayu putsu, ecuaneda mesa dharejiji cuana putsu. <sup>13</sup> Beju Diusu ja ecuanaja d'eji su atana Ishahua sa eme jenetia. Mesa ibuneda ebacua Jesucristo sa eme su ecuanaja ichaderatana. <sup>14</sup> Tueda Jesucristo ja ecuanaja d'eji su atana, curusu su manuana putsu. Tueda manu jepuiti ecuanaja sa jucha cuana perdonatana.

*Cristo curusu su manuana putsu, Diusu ja ecuanaja tu neje saida ametana*

<sup>15</sup> Diusu bataji mahue biame, mesa ebacua Jesucristo jepuiti ecuanaja peje su jabametiana. Tueda Jesucristo da anidha, pamapa ai cuana ajiji mahue su. <sup>16</sup> Diusu ja Jesucristo jepuiti pamapa cielo, yahua su aniji ai cuana ataidha. Pamapa ai bataji, bataji mahue cuana ataidha. Pamapa huaraji cuana cielo, yahua su ichataidha. Pamapa tueda ai cuana ataidha Jesucristo jepuiti tu pamebajata huecuana puji. <sup>17</sup> Pamapa tueda ai cuana ajiji mahue su, beju Cristo anidha. Pamapa tueda ai cuana tuahueda ebatani. Saida yasemetani. <sup>18</sup> Beju Cristo da pamapa jei eputani cuana sa Echua Puji. Tuahueda jei amepirutana huecuana. Tueda equene manujiji cuana duju jenetia netianaibana pamapa sa Echua Puji papu puji. <sup>19</sup> Jesucristo, Tata Diusu neje daja bataitime tatse. Tata Diusu sa tsada Jesucristo jepuiti ebameti puji. <sup>20</sup> Tu jepuiti Diusu ja pamapa cielo, yahua su ai cuana Diusu neje saida ametaibana. Cristo sa ami curusu su d'uichajiji jepuiti pamapa ai cuana butsepi atana.

<sup>21</sup> Equene micuaneda Diusu neje jamajaitiji puina, pamapa ai madhada cuana aina putsu. Jiahue mu Diusu ja micuanaja tu neje saida ametana, Cristo curusu su manuana putsu. <sup>22</sup> Daja Cristo manume puana ecuanaja Diusu butse su jucha mahue, nimebutsepi, saida emenajatia puji. <sup>23</sup> Daja micuaneda yatayu, ahua daja hue micuaneda Diusu peje su jubida enimetuchteati su, ahua mesa quisa saida cuana jenetia aimue enetidera mahue su. Ema huaratiana tueda quisa saida cuana cristiano cuana peje su quisaquisa epu puji. Beju

tueda quisa saida cuana pamapa ejude cuana je ebererea-tiani.

*Pablo da Diosu sa dharejiji cuana sa emebajaji*

<sup>24</sup> Edue cuana, micuana sa puji ema terijiji yani su sufri epuani biame, nimebeidaji ema. Cristo sa eturuca mesa sufrimiento cuana yama yaderainia mesa dharejiji cuana sa puji, mesa equita pu cua nime putsu. <sup>25</sup> Diosu ja ema mesa dharejiji cuana sa emebajaji ichatana tuna sa saida puji, tu jepuiti quisa saida cuana quisaquisa epupe puji. <sup>26</sup> Ema ichatana mesa etsia quisa cuana quisaquisa epupe puji. Tueda etsia quisa cuana equene jenetia rubuajiji anina biame, jahue mu Diosu ja mesa dharejiji cuana eshanapametani. <sup>27</sup> Mesa etsia piba saida cuana uja eshanapametani huecuana: Pamapa Cristo peje su jei eputani cuana da Cristo neje dunejiji yani. Tu peje su enimeid'uatitani putsu, cielo su eputita huecuana.

<sup>28</sup> Da putsu beju, ecuanaju Cristo jepuiti jubida quisaquisa epuani. Pamapa su ecuanaju equisainia, Cristo jepuiti ai cuana saida bahue paputa huecuana puji. <sup>29</sup> Da puji ema jubida emudumuduani, Cristo ja ema enimetucheametani putsu.

## 2

<sup>1</sup> Edue cuana, bahue mepuque, yama micuana ebia su ibuneda ebainia. Jubida ema emudumuduani micuaneseda puji. Aimue micuaneseda puji bahui mahue. Laodicea ejude su aniji, ema baji mahue edue cuana sa puji di ema emudumuduani. <sup>2</sup> Tsada quema tuneda pamapa janimetuheatiputsu, dunejiji paanita huecuana puji. Daja pu putsu, Diosu ja Cristo jepuiti etsia quisa cuana eshanapameenita huecuana, tsine meamea ebia su saida Cristo pashanapata huecuana puji. <sup>3</sup> Beju Cristo sa pamapa Tata Diosu sa bahue eni piba cuana yani. Ecuaneseda di yani pamapa Diosu sa bahue eni piba cuana. <sup>4</sup> Da putsu, be mebaseametiji cristiano bahue eni cuana sa mimi neje. <sup>5</sup> Edue cuana, ema micuana neje mue ani biame, quema piba cuana micuana neje dunejiji yani. Nimebeidaji da ema micuaneda pamapa ai su dunejiji, saida yani, Cristo peje su jubida enimetuheatiani putsu.

<sup>6</sup> Cuaja micuaneda Cristo peje su janimetuheatiana d'eji su epu puji, daja tu neje dunejiji putsu, janimetuheatitaji saida, butsepi ye mundo su epuniuneti puji. <sup>7</sup> Tu peje su nime-tucheda mepuque, cuaja micuaneda jabuetsuatiana nime. Pamapa hora su diusulupai Diosu meaque.

*Cristo jepuiti nimeeichacua*

<sup>8</sup> Merejati que bid'umimi jacuicuinatiji deja cuana neje. Beju tuneda micuana baseaja yatani mecuana sa mimi bid'umimi cuana neje. Aimue Cristo sa piba cuana mecuana sa yani mahue. Deja cuana sa piba cuana bahui mecuana sa yani. Pamapa Cristo tsada mahue cuana sa piba nime mecuana sa yani.

<sup>9</sup> Jesucristo deja quitame puniunetina biame, Diosu quitaita jabametiana. <sup>10</sup> Micuaneda eid'e eni, nimeeichacua, Cristo neje dunejiji putsu. Pamapa mesa ai cuana micuaneseda di, tu neje dunejiji putsu. Tueda da pamapa cielo su aniji huaraji aida cuana ebia su aida. <sup>11</sup> Micuaneda tu peje su jei puana su, tuahueda micuana sa utsatada madhada cuana arijiametana. <sup>12</sup> Micuaneda tu neje dunejiji putsu, tu neje tupupai papajiji pu cua nime. Daja huecha tu neje id'eibana pu cua nime. Micuaneda Diosu ja mesa tucheda neje Cristo id'emetaibana, jei puana putsu, Diosu ja micuana nimeeichacua ametana. <sup>13</sup> Equene micuaneda emanu nime puina, jucha cuana tisutisu aina putsu. Aimue micuana sa utsatada madhada cuana rijinetiaja mahue ana. Micuaneda da judío mahue cuana puina Diosu sa jacuatsasiatiji mahue. Beju jahue mu Diosu ja micuana Cristo neje tupupai eid'e eni ametana, pamapa micuana sa jucha cuana perdonatana putsu. <sup>14</sup> Beju aimue ecuaneda matsejiji mahue, mesa jacuatsasiati cuana mue a biame. Ecuana sa Diosu neje manu Diosu ja chujetiapetana Cristo curusu su manuana jepuiti. <sup>15</sup> Cristo ja Ishahua, einid'u sa huaraji madhada cuana pishitiametana, curusu su manu putsu. Bidhuametana huecuana pamapa butse su.

### *Cielo sa ai cuana bahui chacu taji*

<sup>16</sup> Edu e cuana, aimue ebia su tsada saida mahue judío cuana sa ai puiti cuana ya puji. Aimue micuana aiya biame esatsiata mahue, ai micuaneda edia ahua eid'i su. Daja huecha judío cuana sa tsine ya mahue su. Mecuana sa janahua tsine jacuatsasiati cuana beju a taji mahue. <sup>17</sup> Pamapa tueda ai puiti cuana ataina huecuana, Cristo pueji mahue su. Cristo pueana jenetia beju tueda ai puiti cuana a taji mahue. Aimue tsada quita mahue tueda ai puiti cuana a putsu, d'eji su epu puji. <sup>18</sup> Ahua quebata cuana ja micuana, "Angel cuana mitsutsua taji d'eji su epu puji", yata su, be meid'abajaji. Tuneda, "Diosu ja ecuanaju tahui su nime daja quisatana", eputani biame, be meid'abajaji. Tuneda da bid'umimi puji cuana. Ebia su aida ebatitani huecuana. <sup>19</sup> Aimue Cristo neje dunejiji yanita huecuana mahue. Beju Cristo da equita sa echua nime. Daja huecha Diosu sa dharejiji cuana sa Echua Puji. Tuahueda bahui dharejiji cuana

ebuetsuatani. Tu neje edunemetani, cuaja Diosu sa tsada batame.

<sup>20</sup> Beju micuaneda Cristo neje tupupai curusu su manuana pu cua nime putsu, ye mundo sa ai cuana jenetia Diosu ja ichaderatana. Da su, ¿ai puji ni da micuaneda deja cuana sa ai puiti cuana aja a cua d'oji su epu puji? <sup>21</sup> Tuneda uja ebuetsuatani: “Be ye ai cuana med'apabaji. Be ye ai cuana mediaji.” <sup>22</sup> Beju tueda deja cuana sa ai puiti cuana da yanacane hue. <sup>23</sup> Tueda ai puiti aji deja cuana da ebia su aida, bahue eni ebatitani. Da puji bahui saida tueda ai puiti cuana. Aimue ecuana sa utsatada madhada cuana jenetia d'oji su ata cua mahue.

### 3

<sup>1</sup> Edue cuana, micuaneda nimeeichacua

Cristo neje id'eibana pu cua nime putsu, mechacuque cielo su ai saida cuana bahui. Dapia cielo su Diosu sa bai eni bene su Cristo yani ecuatsasia epuani. <sup>2</sup> Mepibaque cielo su ai saida cuana bahui. Be mepibaji ye mundo sa ai cuana. <sup>3</sup> Beju micuaneda Cristo neje tupupai curusu su manuana pu cua nime putsu, jiahue micuaneda tu neje dunejiji, eid'e Diosu peje su yani. <sup>4</sup> Tuahueda quitaita ecuana eid'e yameenitaniyu. Beju tueda epueicha su, ecuaneda tu neje cielo su eputiyu. Dapia ecuaneda tu nime tucheda epu.

*Cristo jepuiti nimeeichacua quisa*

<sup>5</sup> Meichaderaque pamapa ai madhada cuana. Micuaneseda jabutsenetiji mahue biame, jaquinati taji mahue. Daja huecha edue butseji cuana sa mecuana ebutse neje bahui jaquinati taji. Be ai utsatada madhada cuana meaji. Be pamapa ai ebainia cuana meutsatabaji. Tueda utsatabaji cuana da eimea peje su irutsuaji cuana neje tupupai. <sup>6</sup> Tueda ai madhada cuana yatani huecuana putsu, Diosu ja ematseta, tu jei aja mahue eputani huecuana putsu. <sup>7</sup> Edue cuana, micuaneda Cristo peje su jei puji mahue su, pamapa tueda ai madhada cuana aji puina. <sup>8</sup> Jiahue mu micuaneseda ariji taji pamapa tueda ai madhada cuana. Duinini, utsatada madhada, pia cuana madhabaji, mimi madhada cuana beju ariji taji. <sup>9</sup> Be bid'umimi meatiji micuaneda cama, pamapa micuaneda ai madhada aina cuana ariji putsu. <sup>10</sup> Jiahue mu micuaneda nimeeichacua Cristo jepuiti. Tsine meamea tu jepuiti ai cuana eshanapainia. Tsine meamea Diosu ja micuana Cristo nime yatani. <sup>11</sup> Aimue cuaja biame ahua etse judío, judío mahue, huitsanasiquijiji, ahua mahue, extranjero mepu, ahua mahue, esclavo, ahua d'oji su epu puji. Ebia su saida Cristo neje dunejiji epu puji. Tueda beju queje papu yani.

<sup>12</sup> Edue cuana, micuaneda da Diusu sa dharejiji cuana. Diusu ja micuana ibuneda ebatani. Tuseda puji micuana dharetana. Da putsu, micuaneda cama saida, butsepi nimemitsida mepuque. Huamahuama meibunebatique. <sup>13</sup> Micuaneda cama pacienciaji mepuque. Cuaja Cristo ja micuana perdonatana nime, daja meperdonatique huamahuama. <sup>14</sup> Ibuneda mebatique. Jaibunebati neje pamapa ai cuana saida yapemetani. <sup>15</sup> Huamahuama saida meanique, Diusu sa tsada micuaneda dunejiji meanique puji putsu. Pamapa hora su diusulupai Tata Diusu meaque.

<sup>16</sup> Meshanapaenique pamapa Cristo sa mimi cuana. Huamahuama mebuetsuatique, menimetuheatique pamapa bahue eni neje. Mesatsuque Diusu sa puji. <sup>17</sup> Diusulupai Tata Diusu meaderaque, Cristo ja ecuaneseda puji ai saida cuana atana putsu.

### *Cuaja Diusu sa dharejiji cuana sa puniuneti taji*

<sup>18</sup> Epuna cuana, jei meaque micuana sa yahue cuana. Daja hue micuana sa pu taji, Cristo sa dharejiji putsu. <sup>19</sup> Deja cuana, ibuneda mebaque micuana sa ehuae cuana. Be nimemadhada mepuji tuna neje. <sup>20</sup> Yanana cuana, meiyubaque micuana sa tata cuana, tueda da Tata Diusu sa tsada putsu. <sup>21</sup> Tata cuana, be meduininiameji micuana sa ebacua, ebaquepuna cuana mecuana sa janimetuheatu cuana etaitaname mahue puji. <sup>22</sup> Emebajaji cuana, pamapa hora su atasaida mepuque micuana sa emetse cuana neje, aimue tuneda micuana echamatani su bahui mahue. Pamapa muesumu neje memebajaque huecuana, Diusu iyuba putsu. <sup>23</sup> Pamapa micuana sa a taji cuana saida meaque, Echua Puji emebajainia pu cua nime. <sup>24</sup> Ene putsu, micuaneda Cristo quitaita emebajainia. Mesa echuje yani mesa dharejiji cuana etia puji. <sup>25</sup> Madhada yatani cuana mu Diusu ja daja madhada huecha echuje etiatayu. Aimue Diusu ja edharetani mahue. Pamapa cristiano cuana tupupai hue ebatani.

## 4

<sup>1</sup> Emetse cuana, saida, butsepi micuaneseda pu taji micuana sa mudu puji cuana neje. Mepibaenique Jesucristo da micuana emetse cielo su yani.

<sup>2</sup> Be Diusu memitsurijiji. Menimepitique. Diusu diusulupai meaderaque. <sup>3</sup> Diusu mebajaque ecuanaju sa puji ecuanaju patsahuata puji, mesa Cristo jepuiti quisa saida cuana cristiano cuana peje su quisaquisa epu puji. Da jepuiti ema teriametana huecuana, ema tueda quisa saida cuana quisaquisa puana putsu. <sup>4</sup> Mebajaque Diusu quema puji ema patsahuata

puji mesa quisa saida cuana id'abata saida mimi cuana neje quisaquisa epu puji.

<sup>5</sup> Medusutique saida, butsepi Diusu peje su jei puji mahue cuana duju su. Ai hora papu quisa taji huecuana Cristo jepuiti. <sup>6</sup> Micuana sa quisaquisa cuana saida, butsepi papu tuna neje. Bahue mepuque cuaja saida cristiano cuana ejeutsu puji, micuana equisabatani huecuana su.

### *Tije quisa cuana*

<sup>7</sup> Ecuana sa ibuneda edue Tíquico ema neje Echua Puji saida mebajatana. Tuahueda micuana equisatita ema jepuiti ai cuana. <sup>8</sup> Da puji yama tueda ebeituinia micuana peje su micuana ecuanaju jepuiti mequisataque puji, micuana enimetuchteati puji. <sup>9</sup> Tu neje di yama ibuneda edue Onésimo ebeituinia. Tueda da micuana duju jenetia. Tuatseda micuana equisata pamapa upia ai cuana puana jepuiti.

<sup>10</sup> Edue Aristarco da ema neje upia terijiji yani. Tuahueda micuana emitsuametani. Marcos ja di micuana emitsuametani. Tueda da Bernabé sa edue puji. Saida mebat-suque Marcos, ahua micuana peje su ecuinati su. <sup>11</sup> Edue Jesús ja di micuana emitsuametani. Mesa pia ebani da Justo. Tueda quimisha edue judío cuana bahui, pamapa pia edue judío cuana jenetia, ema neje Diusu mebajatana. Tuneda ema ebia su nimetucheda ametana. <sup>12</sup> Epafras ja di micuana emitsuametani. Tueda da micuana duju jenetia. Tueda da Cristo sa emebajaji saida. Tuahueda pamapa hora su micuaneseda puji Diusu ebajatani micuaneda Diusu peje su nimetucheda epu puji, daja huecha Diusu sa ai tsada cuana bahui ya puji. <sup>13</sup> Beju bahue ema cuaja Epafras jubida Diusu ebajatani micuaneseda puji. Pamapa Laodicea, Hierápolis ejude detse su aniji edue cuana sa puji di ebajatani. <sup>14</sup> Ibuneda edue jaiduenitiji Lucas, Demas detse ja di micuana emitsuametani.

<sup>15</sup> Ecuanaaju emitsuameinia Laodicea ejude su aniji edue cuana. Daja huecha edue Ninfas, mesa ete su jadhitati bahue edue cuana emitsuameinia. <sup>16</sup> Ye quema quirica micuana peje su mimiamepe putsu, mebeituque Laodicea ejude su aniji edue cuana peje su, tuneda di pamimiameta puji. Daja huecha Laodicea ejude jenetia micuana peje su ecuina quirica di memimiamequé. <sup>17</sup> Mequisaque edue Arquipo uja: "Diusu ja mi tiatana ya puji ai cuana beju aenipeque."

<sup>18</sup> Ema da Pablo. Quema eme quitaita neje ye tije quejucua etsa quirica su yama edereinia beju yama ye quirica yainia micuaneda bahue epu puji. Mepibaenique ema terijiji yani. Diusu ja meibunebataque. Daja papu.

## PRIMERA CARTA DEL APOSTOL SAN PABLO A LOS TESALONICENSES

Pablo ja beta nuati Tesalonica ejude su Diosu sa dharejiji cuana quirica tiametaidha. Equene quirica su eichacua dharejiji edue cuana nimetucheametaidha. Daja huecha buetsuataidha huecuana cuaja Cristo peje su janimetucheati cuana neje pamapa ai atadhada cuana pishitiameta cua. Da su epishitiameji cuana Cristo ja eid'e yameenitayu. Daja huecha equene quirica su Pablo quisa epuani Cristo ye mundo su esiapati jepuiti.

Ye versículo cuana da ebia su saida quita ebuetsuati puji:

4.16-18

5.16-18,24

*Pablo ja Tesalónica ejude su aniji edue cuana quirica tiametana*

<sup>1</sup>Ema da Pablo. Yama ye quirica ebeituinia Tesalónica ejude su aniji edue cuana peje su. Ema da upia edue Silvano, Timoteo detse neje. Tuatse neje yama quirica edereinia. Edue cuana, micuaneda Tata Diosu neje dunejiji yani. Echua Puji Jesucristo neje di micuaneda dunejiji yani. Tuatseda meibunebataque, menimepijajametaque.

*Tesalónica ejude su aniji edue cuana Diosu peje su jubida janimetucheatitana*

<sup>2</sup>Edue cuana, pamapa hora su ecuanaju diusulupai Diosu yainia micuana jepuiti. <sup>3</sup>Tu butse su micuana ecuanaju epibainia, micuaneda tuseda puji emudumuduani putsu. Jubida micuaneda tu peje su enimetucheatiani. Ebia su ibuneda neje emebajainia. Jubida micuaneda Echua Puji Jesucristo peje su enimeid'uatiani. Pamapa ye ai cuana ecuanaju tu butse su epibainia putsu, diusulupai ecuanaju Diosu yainia. <sup>4</sup>Edue cuana, bahue ecuanaju Diosu ja micuana dharetana, micuana ebia su ibuneda ebatani putsu. <sup>5</sup>Equene ecuanaju micuana peje su quisaquisa puana Diosu sa quisa saida cuana. Espíritu Santo di mi peje su tucheda neje cuinana, ecuanaju micuana peje su quisaquisa puana su. Tuahueda micuana saida shanapametana ecuanaju sa ene quita quisa saida cuana. Beju micuaneda bahue, ecuanaju micuana neje anina su, saida ecuanaju jadasutiana micuana sa saida puji.

<sup>6</sup>Ecuanaju sa puiti cuana micuaneda jabuetsuatiana. Daja huecha Echua Puji Jesucristo sa puiti cuana. Ecuanaju sa jaquisati cuana su micuaneda jei puana putsu, Espíritu

Santo ja micuana ebia su beidaji ametana. Pia cuana ja micuana duininibatana biame, micuaneda ecuanaju sa jaquisati cuana su jei puana beidaji neje. <sup>7</sup> Da putsu beju, micuana sa puiti cuana da saida Macedonia, Acaya yahua detse su aniji edue cuana pabuetsuatita puji. <sup>8</sup> Beju micuana peje jenetia Jesús quisa saida cuana cuinanana. Pamapa yahua, ejude cuana je cuinatiana. Pamapa cristiano cuana bahue eputani micuaneda Diosu peje su jubida enimetuheatani. Da putsu, aimue ecuanaju sa micuana jepuiti saida mimi taji mahue, pamapa cristiano cuana bahue putsu. <sup>9</sup> Beju tuneda quitaita huecha ecuanaju saida equisatani micuana jepuiti. Cuaja micuaneda ecuanaju saida batsuana, equisatani huecuana. Daja huecha cuaja micuana sa bid'umimi diusu eimea cuana mesiana eid'e eni Diosu tije a putsu, tu emebaja puji, ecuanaju equisatani huecuana. <sup>10</sup> Cuaja micuaneda Diosu sa Ebacua, Jesucristo cielo jenetia esiapati eid'uainia, ecuanaju equisatani huecuana. Diosu ja Jesucristo manujiji cuana duju jenetia netianametaibana. Tueda Jesucristo ja huecha ecuaana d'ejí su yametayu Diosu sa castigo jubida epusiu jenetia.

## 2

### *Pablo ja Diosu mebajatana Tesalónica ejude su*

<sup>1</sup> Edue cuana, micuaneda quitaita bahue aimue ecuanaju micuana neje yanacane anina mahue, micuaneda ecuanaju sa jabuetsuati cuana saida inatsuana putsu. <sup>2</sup> Micuana peje su cuinatiji mahue su, Filipos ejude su ecuanaju putiana Diosu sa quisa saida cuana quisaquisa epu puji. Tueda ejude su cristiano cuana ja ecuanaju ebia su sufri ametana micuaneda bahue. Ecuanaju ebia su madhaba putsu, nedaneda atana huecuana. Beju Tesalónica ejude su di piada piada cuana ja ecuanaju daja atana biame, Diosu ja ecuanaju nimetucheametana micuana peje su mesa quisa saida cuana quisaquisa epu puji. <sup>3</sup> Ecuanaju sa quisaquisa micuana peje su butsepi puina. Aimue ecuanaju sa piba cuana japitsatijiji puina mahue. <sup>4</sup> Diosu quitaita ja ecuanaju beitutana, tsaba putsu. Tuahueda ecuanaju huaratiatana mesa quisa saida cuana cristiano cuana peje su quisaquisa epu puji. Daja ecuanaju quisaquisa epuani Diosu bahui beidaji yame puji. Aimue cristiano cuana beidaji yame puji ecuanaju quisaquisa epuani mahue. Diosu bahui ecuanaju beidaji yameinia, tuahueda ecuanaju sa piba cuana tsabatana putsu. <sup>5</sup> Beju bahue micuaneda aimue ai hora su biame mimi bitada neje ecuanaju micuana quisana mahue micuana sa ai chidi cuana micuaneda ecuanaju etia puji. Daja huecha Diosu



bahue tueda ai cuana. <sup>6</sup> Aimue ecuanaju sa tsada ahua micuaneda ahua pia cuana ja ecuanaju aida pabata puji mahue. Ecuanaju da Cristo sa jabeituti cuana biame, aimue ecuanaju micuana jubida cuatsasiana mahue micuaneda ecuanaju etsahua puji. <sup>7</sup> Ecuanaju micuana duju su saida neje bana. Epuna ja mesa yanana ibuneda ebatani nime, daja ecuanaju micuana neje jadasutiana. <sup>8</sup> Ecuanaju Diosu sa quisa saida cuana micuana peje su duseana, micuana ibuneda ba putsu. Micuana jepuiti ecuanaju sa manu taji, micuana ebia su ibuneda ba putsu. <sup>9</sup> Edue cuana, mepibaenique, ecuanaju jubida mudumuduana, micuana neje anina su. Dhidha, tsine beju jubida ecuanaju mudumuduana ecuanaju sa ai dia taji cuana ebajati puji. Daja ecuanaju puana micuana sa putadhada epu mahue puji, ecuanaju micuana duju su quisaquisa epuani cama.

<sup>10</sup> Micuaneda bahue, Diosu neje tupupai ecuanaju saida, butsepi jadasutiana micuana duju su. <sup>11</sup> Cuaja tata ja mesa ebacua ibuneda neje equisatani nime, daja ecuanaju micuana quisana. Ecuanaju micuana pamapa su nime-tucheameana. “Paciencia mepuque”, micuana ecuanaju ana. <sup>12</sup> Ecuanaju micuana quisana micuaneda saida, butsepi medusutique puji, Diosu sa dharejiji putsu, tu neje micuaneda ecuatsasia epu putsu.

<sup>13</sup> Pamapa hora su ecuanaju diusulupai Diosu yainia, micuaneda tu peje su jei puana putsu, ecuanaju micuana peje su tusa quisa saida cuana quisaquisa puana su. Tueda quisa saida cuana da Diosu peje jenetia micuaneda bahue puana. Aimue cristiano cuana sa piba jenetia mahue. Tueda Diosu sa quisa saida cuana da tucheda micuana etsahua puji. <sup>14</sup> Edue cuana, micuana sa jude pai cuana ja micuana ebia su sufri ametana. Daja huecha judío cuana ja Cristo sa puji cuana Judea yahua su ebia su sufri ametana. <sup>15</sup> Tueda judío cuana ja quitaita Echua Puji Jesús manuametana. Daja huecha biahua tiempo judío cuana ja Diosu sa profeta cuana manuametaidha. Beju jiahue ecuanaju jusiatana huecuana. Aimue Diosu beidaji yametani huecuana mahue. Pamapa cristiano cuana neje madhada hue ebatitani huecuana. <sup>16</sup> Aimue tuneseda tsada mahue ecuanaju judío mahue cuana Diosu sa quisa saida cuana equisa puji tunedada di d'ejí su paputa puji. Da putsu, tueda judío cuana sa jucha cuana eyapacatiani. Beju jiahue chamacama Diosu sa jubida castigo tuna peje su cuinana.

*Neicha Pablo Tesalónica ejude su putija puana*

<sup>17</sup> Edue cuana, ecuanaju micuana ichajusiana su, neicha tpeida micuana peje su ecuanaju jasiapatija puana, micuana

baja quita ecuanaju puana putsu. Micuana uqueda anina biame, ecuanaju micuana hua piba puana. <sup>18</sup> Da putsu, ecuanaju micuana peje su neicha tipeida putija pudhaana. Ema mehua quitaita hue putija pudhaana. Beju Ishahua ja ecuanaju nahuetana. <sup>19</sup> Echua Puji Jesucristo epue su, beidaji ecuanaju epu, micuana tu neje yani ba putsu. <sup>20</sup> Enei hue, micuaneda ecuanaju ebia su beidaji yameinia.

### 3

<sup>1</sup> Ebia su ecuanaju micuana hua piba puana. Yama tuchea taji mahue ba putsu, edue Timoteo beituana micuana peje su. Beju ema upia Atenas ejude su anitiana. <sup>2</sup> Timoteo da Diosu sa emebajaji. Ecuanaju neje tupupai Diosu mebatatana. Cristo sa quisa saida cuana quisaquisa pu bahue. Yama tueda micuana peje su beituana micuana Diosu peje su enimetucheame puji. <sup>3</sup> Tueda yama beituana micuana peje su micuana sa janimetucheati cuana etaitanameti mahue puji, micuaneda sufri epuani putsu. Beju micuaneda bahue pamapa ecuaneseda sufri pu taji Diosu sa puji. <sup>4</sup> Ecuanaju micuana neje anina su, tueda ai cuana ecuanaju micuana butsepi quisana. Ecuaneseda sufri pu taji ecuanaju micuana quisana. Cuaja ecuanaju micuana quisana nime, beju daja epuani micuaneda ebainia. <sup>5</sup> Yama cuaja tuchea taji mahue bana, micuana hua piba hue puana putsu. Da putsu, yama, Timoteo micuana peje su beituana micuana eba puji. Bahue puja ema puana. Iyume ema puana cuapuitime Ishahua ja micuana pirubata cua su, ecuanaju sa mudu cuana micuana neje yanecane hue pu cua.

<sup>6</sup> Timoteo jasiapatibana micuana peje jenetia su, ecuanaju quisatana micuaneda Diosu peje su saida, jubida enimetucheatiani. Jiahue teje micuaneda ecuanaju ibuneda ebainia. Ecuanaju micuana ebia su baja yainia nime, daja huecha micuaneda ecuanaju baja yainia. Daja Timoteo ja ecuanaju quisatana. <sup>7-8</sup> Beju beidaji ecuanaju upia sufri epuani biame, micuaneda Diosu peje su jubida enimetucheatiani putsu. <sup>9</sup> ¿Cuaja ni da ecuanaju Diosu diusulupai tupu a cua? Micuaneda ecuanaju ebia su beidaji ameanu tu butse su. <sup>10</sup> Dhidha, tsine beju ecuanaju jubida Diosu ebajainia tuahueda ecuanaju d'ejí patiata ecuanaju micuana ebati puji. Ecuanaju sa tsada micuana etsahua puji, Cristo jepuiti jabuet-suati cuana eyapaca puji, micuaneda Diosu peje su ebia su enimetucheati puji.

<sup>11</sup> Beju ecuanu sa Tata Diosu, Echua Puji Jesucristo detse ja ecuanaju patsahuata peje su eputi puji. <sup>12</sup> Echua Puji ja micuana tu jepuiti ai cuana ebia su meshanapametaque.

Metsahuataque micuaneda cama huamahuama ibuneda mebatique puji, cuaja ecuanaju micuana ibuneda ebainia nime. Micuaneda pamapa cristiano cuana di ibuneda eba puji metsahuataque. <sup>13</sup> Tuahueda menimetucheametaque micuaneda saida, butsepi, jucha mahue Tata Diosu butse su epu puji, Echua Puji Jesucristo epue su pamapa mesa ángel cuana neje.

## 4

### *Diosu beidaji ame taji*

<sup>1</sup> Edue cuana, ecuanaju micuana jubida equisainia Cristo sa ebani su. Cuaja ecuanaju micuana buetsuana nime, daja hue micuaneseda puderati taji Diosu beidaji yame puji. <sup>2</sup> Micuaneda eshanapainia ecuanaju micuana buetsuana Jesús sa jabuetsuati cuana. Tuahueda quitaita ecuanaju huaratiatana micuana ebuetsua puji. <sup>3</sup> Diosu sa tsada bahui micuaneda tuseda puji ichaderajiji epu. Edue butseji mahue cuana jabutsenetiji mahue biame, be mequinatiji. Daja huecha edue butseji cuana sa mecuana sa ebutse cuana neje bahui jaquinati taji. <sup>4</sup> Metupuatique. Pamapa deja cuana sa ebutse cuana neje saida, ibuneda neje jaquinati taji. <sup>5</sup> Be meaji Diosu shanapaji mahue cuana nime. Tuneda pamapa ai madhada cuana a bahue tuna sa equita cuana neje. <sup>6</sup> Be aidhe biame pia edue sa ebutse neje paquinati. Daja a bahue cuana Echua Puji Jesucristo ja jubida ecastigatayu. Equene tueda ai cuana jubida neje yama micuana quisana. <sup>7</sup> Diosu ja ecuana ichaderatana saida, butsepi ecuaneda epuniuneti puji. Aimue ecuana ichaderatana madhada neje epuniuneti puji mahue. <sup>8</sup> Ahua quebata ja tueda jabuetsuati saida aimueid'abaja yatani mahue su, tuahueda Diosu quitaita tsada mahue ebatani, Diosu sa ecuana tueda jabuetsuati cuana tiatana putsu. Tuahueda Espíritu Santo ecuana tiatana ecuaneda, butsepi epuniuneti puji.

<sup>9</sup> Edue cuana, Diosu ja quitaita micuana ebuetsuatani cuaja micuaneseda cama huamahuama ibuneda jabati taji. Aimue micuaneseda puji quema ai biame dere taji mahue tueda ai cuana jepuiti, tuahueda micuana ebuetsuatani putsu. <sup>10</sup> Cuaja micuaneda Macedonia yahua je edue cuana ibuneda ebainia nime, daja hue micuana sa puderati taji. <sup>11-12</sup> Edue cuana, saida meanique pia cuana neje. Cuaja yama micuana equene buetsuana nime, daja hue memudumudraduque, aimue micuana sa ai biame ehueiti mahue puji. Saida memudumuduque Diosu shanapaji mahue cuana ja micuana saida ebata puji.

### *Cuaja Jesucristo pueichame*

<sup>13</sup> Edue cuana, tsada quema micuaneda bahue epueni manujiji cuana jepuiti aimue micuaneda ebia su epibapiba mahue puji Diosu peje su enimeid'uatitani mahue cuana nime. Tuneda ebia su epibapibatani manujiji cuana jepuiti. Be tuna nime mepuji. <sup>14</sup> Ecuanaedi jei epuani Jesús manu putsu, netianaibana manujiji cuana duju jenetia. Daja huecha jei epuani ecuaneda Diosu ja pamapa Cristo peje su jei epuani je manutana cuana enetianametayu. Cristo ye mundo su epueicha su, tu neje tupupai epuetayu huecuana.

<sup>15</sup> Da putsu, ecuanaju micuana Echua Puji Jesucristo sa jabuetsuati cuana butsepi ebuetsuainia. Cristo ye mundo su epueicha su, tu peje su jei epuani je manutana cuana equene equita eichacuaji Diosu ja eid'emetayu. Da su beju Cristo peje su jei eputani eid'e cuana di equita eichacuaji buepa su etsuatitayu. <sup>16</sup> Da hora su Echua Puji Jesucristo quitaita ebute cielo jenetia. Etsui jubida neje ecuatsasiata. Angel huaraji aida di etsui jubida neje ecuatsatiata. Diosu sa pututu jubida eturuta. Da hora su pamapa, tu peje su jei epuani je manutana cuana netiana putsu, equene etsuatitayu. <sup>17</sup> Da su beju tu peje su jei eputani eid'e cuana enetianatayu cuana neje tupupai Diosu ja buepa su judu duju je edusutayu dapia Echua Puji Jesucristo etsu puji. Daja ecuaneda Echua Puji Jesucristo neje yanienitiyu. <sup>18</sup> Da su micuaneda cama huamahuama janimetucheati taji tueda quisa cuana neje.

## 5

<sup>1</sup> Edue cuana, quetsunu tueda tsine ecuina aimue ecuanaju sa micuana dere taji mahue. <sup>2</sup> Micuaneda bahue Echua Puji sa epue tsine micuaneda eid'uainia mahue hora su ecuina. Tsi puji dhidha su epueni nime, daja tueda tsine ecuina. <sup>3</sup> Cristiano cuana ja eid'uatani mahue hora su beju tueda tsine ecuina. Tuneda, "Pamapa beju saida yaseni", eputani su, da hora su tueda castigo tsine tuna peje su ecuina. Epuna nedaji puja epuani su enebatiani nime, daja Diosu sa castigo tsine ecuina jei puja mahue cristiano cuana peje su. Cuaja d'eji su pu taji mahue ebatita huecuana tueda castigo jenetia. <sup>4</sup> Edue cuana, micuaneda mu aimue apuda su yani mahue tuna nime. Aimue tueda castigo tsine ja micuana ebiatejeta tsi puji nime mahue, micuaneda jabasetatijiji putsu. <sup>5</sup> Beju micuaneda Diosu sa hueda su yani. Aimue apuda su yani mahue. <sup>6</sup> Da putsu, be Diosu peje su enimeid'uatitani mahue cuana nime mepuji. Ecuanaedi basetajiji meanija. Janimepiti neje meanija, Jesús enimeid'uainia je. <sup>7</sup> Be Jesús peje su jei puja mahue cuana nime mepuji. Aimue Jesús enimeid'uatani huecuana mahue. Aimue janimepiti neje yanita huecuana

mahue. <sup>8</sup> Aimue ecuaneda mu tuna nime epuani mahue, Diusu sa hueda su yani putsu. Ecuaneseda basetajiji ani taji. Daja huecha janimepiti neje ani taji. Cuaja soldado cuana ja etsedu su piama edusutani etsedupeneti puji nime, daja ibuneda neje ecuaneseda Diusu peje su janimetuchteati taji. Cuaja soldado cuana echuapeneti puji casco eichatitani nime, daja ecuana Diusu ja epenetani ecuana d'eji su atana putsu. <sup>9</sup> Aimue Diusu ja castigo sa puji ecuana ichaderataidha mahue. Beju ecuana ichaderataidha d'eji su epu puji, ecuaneda Echua Puji Jesucristo peje su jei puana putsu. <sup>10</sup> Jesucristo ecuaneseda puji manuana ecuaneda tu neje yanienitiyu puji, eid'e ahua emanu mepuja biame. <sup>11</sup> Da putsu, edue cuana, cuaja micuaneda cama huamahuama enimetuchteatiani nime, daja hue menimetuchheaderatique.

*Pablo ja edue cuana quisatana*

<sup>12</sup> Edue cuana, yama micuana ebajainia meiyubaque micuana duju su Diusu sa quisaquisa puji cuana, Echua Puji Jesucristo jepuiti micuana ebuetsuatani huecuana putsu. <sup>13</sup> Jubida micuaneseda ibuneda ba taji huecuana, micuana emebajatani huecuana putsu. Saida meanique micuaneda cama huamahuama.

<sup>14</sup> Edue cuana, yama micuana pia ai cuana equisainia, d'aya taji mudumuduja mahue eputani cuana. Nimetucheda mahue cuana nimetucheame taji. Metsahuaque pamapa tucheda mahue cuana. Paciencia mecuana sa pu taji pamapa cristiano cuana neje.

<sup>15</sup> Ahua aiya micuana madhada hue yatani su, be eturuca madhada meaji. Pamapa hora su saida cuana bahui micuaneseda huamahuama a taji. Daja huecha pamapa cristiano cuana peje su di ai saida cuana a taji.

<sup>16-17</sup> Beidaji mepuque, Diusu memitsuque pamapa hora su. <sup>18</sup> Pamapa ai su diusulupai Diusu a taji. Daja Diusu sa tsada, micuaneda Cristo neje dunejiji yani putsu.

<sup>19</sup> Jei meque Espiritu Santo. Meid'abaque tueda. <sup>20</sup> Diusu sa quisquisa puji cuana meid'abaenique, Diusu peje jenetia quisa saida cuana quisa eputani huecuana putsu. <sup>21</sup> Pamapa jabuetsuati cuana meabaque, saida, ahua mahue. Jabuetsuati saida cuana neje meanitique. <sup>22</sup> Menetideraque pamapa ai madhada cuana jenetia.

<sup>23</sup> Diusu ja menimepijajametaque. Nimebutsepi meanitaque. Pamapa micuaneda quitana saida jucha mahue mequinataque Echua Puji Jesucristo epueicha teje. <sup>24</sup> Micuana dharejiji Diusu da butsepi. Tuahueda daja micuana saida yatayu, mesa jamitsuti a bahue putsu.

*Pablo ja edue cuana mitsuametaibana*

<sup>25</sup> Edue cuana, mebajaque Diosu ecuanaju sa puji.

<sup>26</sup> Memitsuque pamapa Cristo jepuiti edue cuana quema ebani su. Ibuneda neje memitsuque huecuana.

<sup>27</sup> Echua Puji sa ebani su yama micuana jubida ecuatsasiainia, ye quirica memimiameque pamapa edue cuana peje su.

<sup>28</sup> Echua Puji Jesucristo sa jaibunebati cuana micuana neje paaniti. Daja papu.

## SEGUNDA CARTA DEL APOSTOL SAN PABLO A LOS TESALONICENSES

Beta puji quirica su Pablo quisa epuani deja madhada juchaji saida epue jepuiti. Tueda Diosu nime cristiano cuana ja mitsutsuataja epu.

Ye versículo cuana da ebia su saida quita ebuetsuati puji:

2.16,17

3.3

*Neicha Pablo ja Tesalónica ejude su aniji edue cuana quirica tiametana*

<sup>1</sup> Ema da Pablo. Ema upia edue Silvano, Timoteo detse neje yani. Tuatse neje yama ye quirica ebeituinia Tesalónica ejude su aniji edue cuana peje su. Beju edue cuana, micuaneda ecuana sa Tata Diosu, Echua Puji Jesucristo detse neje di micuaneda dunejiji yani. <sup>2</sup> Tuatseda meibunebataque, menimepijajametaque.

*Diosu ja juchaji cuana ecastigata, Cristo epueicha su*

<sup>3</sup> Edue cuana, pamapa hora su ecuanaju diusulupai Tata Diosu yainia micuana jepuiti. Daja ecuanaju sa a taji, micuaneda Diosu peje su ebia su enimetuheatiani putsu, micuaneda cama huamahuama ebia su eibunebatiani putsu.

<sup>4</sup> Da su ecuanaju micuana jepuiti saida emimiani pia edue cuana peje su. Cristiano cuana ja micuana Cristo jepuiti ebia su sufri yametani biame, micuaneda Diosu peje su jubida enimetuheatiani. <sup>5</sup> Diosu da butsepi, micuana sufri epuani biame. Tueda sufrimiento cuana neje tuahueda micuana ebutsepiatani cielo su micuaneda saida enubi puji. Da putsu beju, micuaneda jiahue sufri epuani, daja tuseda tsada putsu.

<sup>6</sup> Diosu da butsepi putsu, pamapa micuana sufri yametani cuana di sufri yametayu. <sup>7</sup> Jiahue ecuaneda sufri epuani biame, Diosu ja ecuana ejanahuameta, Cristo epueicha su. Da tsine su ecuana sa sufrimiento cuana yapetayu. Cristo cielo jenetia epue mesa ángel tucheda cuana neje cuati utsu duje. <sup>8</sup> Da tsine su tuahueda Diosu shanapaji mahue, tu jei aja mahue cuana jubida ecastigatayu, aimue Echua Puji Jesucristo peje su jei puja mahue putana huecuana putsu.

<sup>9</sup> Da putsu, Diosu ja jubida ematseenitayu huecuana. Tu peje jenetia mesa hueda yani mahue su ebeituenitayu huecuana. <sup>10</sup> Daja Diosu ja yatayu huecuana, Echua Puji Jesucristo ye mundo su epueicha su. Da tsine su pamapa mesa dharejiji cuana mu tuseda puji saida emimitayu, tu ba putsu, enimetiuta huecuana putsu. Micuaneda di dapia tuna

neje yaniti, micuaneda ecuanaju sa Cristo jepuiti quisa saida cuana su jei puana putsu.

<sup>11</sup> Da putsu, ecuanaju pamapa hora su Diusu ebajainia saida meataque puji. Metsahuataque micuaneda saida memebajaque puji. <sup>12</sup> Ahua daja saida micuaneda Diusu emebaja su, cristiano cuana ja Cristo sa puji saida emimitayu. Daja huecha tueda di micuana jepuiti saida emimiyu. Daja da epu, Diusu, Jesucristo detse ja micuana ebia su ibunebatana putsu.

## 2

### *Deja madhada, jucha aidaji jepuiti quisa*

<sup>1</sup> Edue cuana, jiahue yama micuana equisa Echua Puji Jesucristo epue tsine jepuiti. Cuaja ecuaneda Jesús neje jadhitatime epu, tueda epueicha su, yama micuana equisa.

<sup>2</sup> Be tipeida jei mepuji pia jabuetsuati cuana su. Be tipeida mepibaturucatiji. Be mepitsatiji. Be merubutanaji. Ahua quebata ja micuana, “Cristo sa tsine beju cuinana, Diusu ja ema quisatana putsu”, equisata su, be tueda meid'abaji. Ahua quebata quirica papu daja quisa epuani micuana peje su ecuinati su, ecuanaju sa jabeituti pu cua nime, be jei mepuji tueda quirica su. <sup>3</sup> Be aiya biame mebaseataji. Echua Puji sa tsine cuinaji mahue su, equene pamapa cristiano cuana ja Diusu eduinibata. Diusu tije aja mahue eputa huecuana. Da tiempo su tueda deja madhada, jucha aida bataji epu pamapa cristiano cuana ja tije paata puji. Beju Diusu ja tueda matse putsu, cuati castigo jubida su ebeituenitayu. <sup>4</sup> Tueda deja madhada, jucha aida Diusu neje emajaiti epu. Tueda Diusu sa templo su aniute putsu, ebia su aida quita puja epudhaa. Tueda, “Ema da Diusu”, cristiano cuana butse su epu.

<sup>5</sup> Edue cuana, mepibaenique ema micuana neje anina su, yama micuana tueda ai cuana jepuiti quisana. <sup>6</sup> Micuaneda bahue, Diusu ja tueda deja madhada enahuetani tueda bataji papu mahue puji tsuhu. Diusu sa tsada epu su, da hora su tueda deja madhada d'ejí etiata bataji papu puji. <sup>7</sup> Jiahue ebia su yani madhada ai cuana ye mundo su biame, tueda deja madhada, jucha aidaji aimue yani mahue tsuhu, Diusu ja enahuetani putsu. Beju aimue enahueta mahue su, da hora su tueda deja madhada bataji epu. <sup>8</sup> Tueda bataji epu su, Echua Puji Jesucristo ja mesa hueda, jajujuti neje emanu-ametayu. <sup>9</sup> Tueda deja madhada da Ishahua sa jabeituti deja. Ishahua ja tueda jubida etucheameta bid'umimi nimetiuda ai cuana paata puji, cristiano cuana ebasea puji. <sup>10</sup> Pamapa Diusu tsada mahue cristiano cuana ebaseatayu, Diusu peje



su jei puja mahue huecuana putsu. Tueda deja madhada sa bid'umimi quisa su bahui jei eputa huecuana. <sup>11</sup> Da putsu, Diusu ja d'ejí etiata huecuana tuna mehua quitaita ebaseatita huecuana puji, bid'umimi quisa cuana su jei eputani putsu. <sup>12</sup> Diusu sa quisa saida cuana su jei puja mahue eputa huecuana putsu, Diusu ja ematsetayu huecuana. Ai madhada cuana bahui mecuana sa tsada eputa huecuana putsu, matsejiji eputa huecuana.

### *Diusu sa dharejiji cuana*

<sup>13</sup> Edue cuana, pamapa hora su ecuanaju Diusu diusulu-pai yainia, micuana d'ejí su atana putsu. Ye mundo ajiji mahue su, Diusu ja micuana dharetaidha d'ejí su epu puji. Micuaneda Diusu sa quisa saida su jei puana putsu, Espíritu Santo ja micuana dharetana Diusu sa epu puji. <sup>14</sup> Ecuanaju sa quisa saida su micuaneda jei puana putsu, Diusu ja micuana Echua Puji Jesucristo neje dunemetana, pamapa tusa ai saida cuana einatsu puji.

<sup>15</sup> Da putsu, edue cuana, menimetucheatique. Be mesetaji ecuanaju sa mimi neje ahua quirica neje jabuetsuati cuana. <sup>16</sup> Tata Diusu, Echua Puji Jesucristo detse ja ecuan ebía su ibuneda ba putsu, ecuan beidaji eni, nimetucheda ametana. Tuatse peje su janimetucheati saida cuana ecuanatiana. <sup>17</sup> Micuana sa muesumu tucheda a putsu, nime-tucheda meataque tse pamapa ai saida cuana, mimi saida cuana ya puji.

## 3

### *Pablo ja edue cuana bajatana tuseda puji Diusu pabajata huecuana puji*

<sup>1</sup> Edue cuana, mebajaque Diusu ecuanaju sa puji tusa quisa saida cuana ecuanaju saida quisaquisa epu puji. Tipeida tusa quisa saida cuana pamapa yahua je pacuinati puji mebajaque. Tusa quisa saida cuana pamapa cristiano cuana ja saida neje painatsuta puji mebajaque. Cuaja micuaneda tusa quisa saida cuana saida inatsuana nime, daja huecha saida painatsuta huecuana puji mebajaque. <sup>2</sup> Mebajaque Diusu ecuanaju deja madhada cuana peje jenetia pabianetiata puji, aimue pamapa cristiano cuana ja Diusu tsada ebatani mahue putsu. Aimue ecuanaju ai madhada paata huecuana mahue puji mebajaque Diusu. <sup>3</sup> Echua Puji da saida, mesa jaibunebati cuana a bahue putsu. Micuana nimetucheda yametayu. Micuana ebianetiatayu Ishahua peje jenetia. <sup>4</sup> Echua Puji peje su ecuanaju enimeid'uatiani micuaneda ecuanaju sa jacuatsaiati cuana daja hue meaderaque puji.

<sup>5</sup> Echua Puji Jesucristo ja metsahuataque micuaneda Diusu sa ibuneda, paciencia meshanapaque puji.

*Ecuaneseda mudumudu taji*

<sup>6</sup> Edue cuana, ecuanaju micuana ecuatsasiainia Echua Puji Jesucristo sa ebani su, be tunada mepuji. Aimue ecuanaju micuana tunada epu puji buetsuana mahue. Quebata edue tunada epu su, menetideraque tu peje jenetia. <sup>7</sup> Micuaneda bahue aimue ecuanaju tunada puina mahue, micuana neje anina su. Daja hue meaderaque ecuanaju sa puiti cuana. <sup>8</sup> Aimue ecuanaju chujetiaji mahue diadia puana mahue micuana sa ete cuana je. Dhidha, tsine beju ecuanaju jubida mudumuduana ecuanaju sa ai cuana ebajati puji. Daja ecuanaju mudumuduana, micuana sa ai chidi cuana cha dia hue aja mahue putsu. <sup>9</sup> Papu jia micuaneseda puji ecuanaju cha mihua hue a taji biame, ecuanaju aimue daja ana mahue. Ecuanaju jubida mudumuduana ecuanaju sa ai puiti cuana micuana ebuetsua puji. <sup>10</sup> Ecuanaju micuana neje anina su, ecuanaju micuana jubida buetsuana, quebata mudumuduja mahue aimue tuseda diadia taji mahue. <sup>11</sup> Beju bahue ecuanaju piada piada micuana duju su aimue emudumudutani mahue, tunada putsu. Pia cuana sa ai saida su bahui eputaniuneti huecuana. <sup>12</sup> Beju yama ecuatsasiainia huecuana Jesucristo sa ebani su. Cuatsa mahue pamudumuduta huecuana tuna sa ai dia taji cuana ebajati puji.

<sup>13</sup> Edue cuana, be tunada mepuji ai saida cuana ya puji. <sup>14</sup> Ahua quebata ja ecuanaju sa jabuetsuati cuana aja mahue yata su, mebaenique tueda. Be tu neje mebuquetiji tu pabidhu puji. <sup>15</sup> Edue putsu, micuaneseda tueda butsepia taji. Be tueda majai nime mebaji.

*Pablo ja edue cuana mitsuametaibana*

<sup>16</sup> Echua Puji Jesucristo ja quitaita menimepijajametaque pamapa hora su. Micuana neje paanieniti.

<sup>17</sup> Edue cuana, yama ye quirica edereinia quema eme neje quitaita. Daja yama yainia micuaneda eshanapa puji ye quirica da quema quitaita. <sup>18</sup> Ecuaana sa Echua Puji Jesucristo ja pamapa micuana meibunebataque. Daja papu.

## PRIMERA CARTA DEL APOSTOL SAN PABLO A TIMOTEO

Timoteo da edeahue puina. Cristo peje su jei puana, Pablo sa Cristo jepuiti quisaquisa id'aba putsu. Da su ebia su buquetaina tu puniunetina je. Da su Pablo ja beta quirica dere-taidha Timoteo sa puji. Equene quirica su ebuetsuatani cuaja ehuidusuji sa, Diusu sa dharejiji cuana huidusume a taji jepuiti. Daja huecha ebuetsuatani jahue tiempo bid'umimi ebuetsuaji cuana, ai iyuda cuana, chipilu ibuneda cuana neje parejatita puji. Daja huecha ebuetsuatani cuaja edue cuana sa ehuidusuji cuana sa puniuneti taji. Dharejiji edue cuana sa ahue mahue, yanana, tata cuara mahue cuana inatsihuame a taji ebuetsuatani.

Ye versículo cuana da ebia su saida quita ebuetsuati puji:

1.15

2.5

4.12

6.6,11,12

### *Pablo ja Timoteo quirica tiametana*

<sup>1</sup> Ema da Pablo. Ecuana D'ejí su Aji,

Diusu, Jesucristo detse ja apóstol ema ichatana. Tu peje su ecuaneda enimeid'uatiani. <sup>2</sup> Timoteo, mida da quema Cristo jepuiti ebacua. Tata Diusu, Echua Puji Jesucristo detse ja ibuneba putsu, nimepijajametaque.

### *Bid'umimi ebuetsuaji deja cuana aimue id'aba taji mahue*

<sup>3</sup> Edue, Macedonia yahua su ema putiana su, yama mi quisana Efeso ejude su mi yaniti puji. Tueda ejude su piada piada cuana ja piapiati jabuetsuati cuana ebuetsuatani. Da su cuatsasiaque jubida huecuana aimue pabuet-suata huecuana mahue puji. <sup>4</sup> Biahua tiempo tata edhi chenu cuana sa jabuetsuati ai puiti cuana parijinetiata huecuana. Tueda jabuetsuati cuana ja aimue epibatsahuatani mahue Diusu eshanapa puji. Tueda ai cuana ja ebia su yacuicuinametani huecuana. Diusu peje su janimetucheati putsu bahui ecuaneda Diusu saida mebaja cua.

<sup>5</sup> Daja miqueda cuatsasia taji edue cuana huamahuama ibuneda pabatita huecuana puji. Nimebutsepi paputa huecuana. Daja huecha saida Diusu peje su panimetucheatita huecuana. <sup>6</sup> Beju aimue piada piada cuana daja eputani mahue. Jeitid'utana huecuana yanacane jacuicuinati jepuiti. <sup>7</sup> Moisés sa jacuatsasiati cuana buetsuaja eputani huecuana,

tueda jacuatsasiati cuana bue mahue biame. Tuna sa jabuetsuati cuana aimue tuneda quitaita eshanapatani mahue.

<sup>8</sup> Beju Moisés sa jacuatsasiati cuana da saida. Daja biame, jucuaja puji tueda jacuatsasiati cuana Diusu ja tiataidha ecuaneseda shanapa taji. <sup>9-10</sup> Tueda jacuatsasiati cuana mu aimue ai saida, butsepi yatani cuana sa puji mahue. Tueda jacuatsasiati cuana da juchaji, Diusu duininida baji, a taji mahue, nimebutsepi mahue, cuatsa adhiadhi, tata, cuara manuameji, deja manuameji, pia sa ebutse neje jaquinatiji, deja cama jucha aji, cristiano iruji, bid'umimi puji, yanacane Diusu bahue cuana sa puji bahui. Beju tuneseda puji tueda jacuatsasiati cuana Diusu ja tiataidha. Tueda jacuatsasiati cuana da Diusu sa jabuetsuati saida su jei puja mahue cuana sa puji di. <sup>11</sup> Diusu sa jabuetsuati cuana da saida. Da jepuiti Diusu ja cristiano cuana cuaja d'ejí su puta cua eshanapametani. Tueda quisa saida cuana quisaquisa puji ema Diusu ja ichatana.

*Ecuaneseda Diusu diusulupai a taji mesa jaibunebati jepuiti*

<sup>12</sup> Yama ecuaña sa Echua Puji Jesucristo diusulupai yainia tuahueda ema tucheametana mesa jabuetsuati cuana cristiano cuana ebuetsua puji. Mesa emebajaji ema ichatana, ema saida, butsepi ba putsu. <sup>13</sup> Equene yama Jesús madhabana biame, tuahueda ema mesa emebajaji ichatana. Daja huecha mesa dharejiji cuana yama jubida tijetije aina madhada hue ya puji. Yama madhabaina huecuana. Daja madhada yama aina biame, tuahueda ema ibunebatana, yama tueda ai madhada cuana aina tu shanapaji mahue su. Bue mahue ema puina putsu, daja yama aina. <sup>14</sup> Da putsu, mesa jaibunebati ema neje ebia su saida puana. Da putsu beju ema tu peje su jubida enimetuheatiani. Tueda yama ebia su ibuneda ebainia.

<sup>15</sup> Jesucristo ye mundo su pueana juchaji cuana d'ejí su ya puji. Tueda quisa da ene quita, butsepi. Beju ema pamapa pia juchaji cuana ebia su jucha aidaji biame, ema ibunebatana. <sup>16</sup> Daja yama ai madhada cuana aina biame, ema ebia su ibunebatana. Daja ema neje paciencia aidaji puana pamapa cristiano cuana ja mesa paciencia, ibuneda aida pabata, daja huecha tueda paciencia aidaji pamapa juchaji cuana neje pashanapata huecuana puji. <sup>17</sup> Da putsu, ecuaneda eid'e eni Diusu aida pamitsutsuaenitija. Tueda da quetsunu su biame emanu mahue Diusu. Aimue aiya biame bata cua mahue. Tueda da piada quita, bahue eni Echua Puji. Pamapa su tu jepuiti saida pamimienita. Daja papu.

<sup>18</sup> Ibuneda Timoteo, jahue yama mi jubida equisainia. Diusu peje su janimetuheatí, enime eni saida neje Diusu sa

quisa saida cuana quisaquisa puderaque. Daja aque, cuaja equene su edue cuana ja mi Diosu sa ebani su cuatsasiatana batame. <sup>19</sup> Diosu peje su jubida janimetuheatique. Nime eni saida mepuderaque. Pia cuana ja mu mecuana sa Diosu peje su janimetuheatu cuana taitanametana, ai madhada cuana a putsu. Tueda ai madhada cuana atana huecuana, saida mahue ya puji shanapatana huecuana biame. Daja a putsu jamadhatitana huecuana. <sup>20</sup> Daja Himeneo, Alejandro detse puina. Tuatseda yama Ishahua peje su menajatiana pacastigata tse puji. Daja yama ana, Cristo sa puji madhada mimi pu taji mahue, pabuetsuati tse puji.

## 2

### *Cuaja Diosu mitsume a taji*

<sup>1</sup> Beju yama micuana equisa cuaja micuaneseda Diosu mitsume a taji. Equene micuaneseda Diosu baja taji pamapa cristiano cuana sa puji. Diosu diusulupai a taji. <sup>2</sup> Ecuaneseda Diosu baja taniji. Pamapa huaraji cuana sa puji Diosu baja taji. Daja a putsu, saida micuaneda yani Diosu butse su ye mundo su. <sup>3</sup> Tueda da Diosu sa tsada. <sup>4</sup> Mesa tsada pamapa cristiano cuana d'oji su paputa puji, mesa mimi pashanapata huecuana puji. <sup>5</sup> Beju Diosu da piada hue. Tu butse su Jesucristo yani pamapa cristiano cuana sa puji ebaja puji. Diosu biame, tueda da ene quita deja. <sup>6</sup> Tueda quitaita hue jamenajatitana Diosu ja cristiano cuana eturuca tueda curusu su ematseta puji d'oji su paputa huecuana puji. Diosu ja tueda ai cuana mesa tsada hora su pamapa cristiano cuana id'abametana. <sup>7</sup> Da puji ema Diosu ja huaratitana mesa quisa saida cuana quisaquisa epu puji. Judío mahue cuana peje su ema beitutana mesa jabuetsuati cuana tuna buetsua putsu, tu peje su jei yame huecuana puji.

<sup>8</sup> Da su quema tsada deja cuana ja pamapa hora su Diosu pamitsuta. Be duinini aida, jacuicuinatiji paputa huecuana. Muesumu saida, butsepi paputa huecuana. <sup>9</sup> Daja huecha epuna cuana pajud'utita saida neje. Be ebia su pajud'usaisaisiatita huecuana. <sup>10</sup> Ai saida cuana bahui paata huecuana, Diosu sa huecuana putsu. <sup>11</sup> Cuatsa mahue, iyuda neje pabuetsuatita huecuana. <sup>12</sup> Quema tsada mahue epuna cuana ja deja cuana pabuetsuata puji. Be epuna cuana ja deja cuana pacuatsasiata. Cuatsa mahue ani taji huecuana. <sup>13</sup> Beju Diosu ja equene Adán ataidha. Tije Eva macha. <sup>14</sup> Aimue Ishahua ja Adán baseataidha mahue. Beju Eva bahui Ishahua ja baseataidha. Tueda epuna jucha puidha, Ishahua ja baseataidha putsu. <sup>15</sup> Da putsu, epuna cuana nedaji puja eputa su, ebia su mecuana sa neba taji. Yanana

cuana saida pabatita huecuana. Ibuneda neje daja hue papuderatita huecuana. Daja huecha Diosu butse su butsepi padusuderatita huecuana. Patupuaderatita huecuana. Ahua daja yata huecuana su, d'oji su eputa huecuana.

### 3

#### *Diosu sa dharejiji huidusuji cuana sa saida jadasuti taji*

<sup>1</sup> Ahua quebata edue cuana sa ehuidusuji puja su, tueda saida. Tueda mudu da ebia su saida. <sup>2</sup> Beju ehuidusuji sa deja butsepi pu taji aimue aiya biame tueda patuaquisata mahue puji. Piada ehuanaji bahui mesa pu taji. Pamapa ai su jatupuati bahue pu taji. Saida jadasuti taji pamapa cristiano cuana neje. Ai hora papu perepereji cuana epuetani su, saida neje batsu taji. Diosu sa jabuetsuati cuana saida buetsua bahue pu taji. <sup>3</sup> Be tsetse aida, icheiche aida papu. Saida, paciencia aidaji papu. Be jasatsiati aida papu. Be chipilu tsada papu. <sup>4</sup> Mesa familia saida cuatsasia bahue papu. Mesa ebacua cuana atasaida paputa. <sup>5</sup> Ahua ehuidusuji ja mesa familia quitaita cuatsasia bue mahue su, da su, ¿jucuaaja ni da Diosu sa dharejiji cuana saida bame ata cua? <sup>6</sup> Be ehuidusuji ye chu jei Diosu peje su pujiji papu, cuapuitime tueda ebia su aida quita jabati cua putsu. Tueda jucha neje Ishahua jucha puidha, ebia su aida jabatidha putsu. <sup>7</sup> Jei Diosu peje su eputani mahue cuana neje ehuidusuji sa saida jadasuti taji tueda saida pabata huecuana puji tueda aiya biame etuaquisata mahue puji. Daja ehuidusuji sa pu taji madhada su ehameti mahue puji.

#### *Ilisha mebajaji deja cuana sa saida jadasuti taji*

<sup>8</sup> Daja huecha ilisha mebajaji deja cuana sa saida, butsepi jadasuti taji. Tuneseda jatupuati taji. Mecuana sa jamitsuti a bahue paputa huecuana. Be tsetse aida paputa huecuana. Be chipilu tsada paputa huecuana. <sup>9</sup> Diosu sa jabuetsuati cuana paata huecuana enime eni saida neje. <sup>10</sup> Ehuidusuji cuana nime tsabajiji paputa huecuana. Da su ahua jucha mahue ta huecuana su, ilisha mebajaji puta cua huecuana. <sup>11</sup> Daja huecha ilisha mebajaji cuana sa ehuan cuana sa saida, butsepi jadasuti taji. Be pia sa ebani yanacane pajemitsuata huecuana. Jatapuati bahue paputa huecuana pamapa ai su. Pamapa ai ape bahue paputa huecuana. <sup>12</sup> Ilisha mebajaji sa piada ehuan bahui ani taji. Mesa familia cuana saida cuatsasia bahue pu taji. Mesa ebacua cuana atasaida paputa. <sup>13</sup> Ahua ilisha mebajaji cuana saida emebajata su, cristiano cuana ja di saida ebata huecuana. Cristo peje su ebia su enimetuheaderatita huecuana.

*Diusu sa jabuetsuati ai cuana ebia su aida, nimetiuda*

<sup>14</sup> Timoteo, ema mi peje su tipeida putija. Cuapuitime ema tsunuta cua ye quirica yama mi peje su ebeituinia mi ai cuana equisa puji. <sup>15</sup> Daja mi yama equisainia mida bahue epu puji cuaja edue cuana sa jadasutime pu taji Diusu sa dharejiji cuana duju su. Pamapa Cristo peje su jei eputani cuana da eid'e eni Diusu sa familia. Diusu ja mesa jabuetsuati cuana tuna peje su menajatiatana painatsihuata huecuana puji, da je papuniunetita huecuana puji. <sup>16</sup> Beju Diusu sa jabuetsuati ai cuana da ebia su aida, nimetiuda:

Diusu da ye mundo su quitaji jabametiana.

Tueda da nimebutsepi.

Espíritu Santo ja tueda butsepi quisanetiacuinatana.

Angel cuana ja tueda batana.

Pamapa ejude cuana je cristiano cuana ja mesa jabuetsuati cuana id'abatana.

Daja huecha dueji cristiano cuana pamapa ejude cuana je tu peje su jei putana.

Da su bejo cielo su Diusu yani su tsuatibana.

## 4

*Piada piada cuana Diusu sa jabuetsuati cuana jenetia enetiderata*

<sup>1</sup> Espiritu Santo ja ecuana butsepi equisatani. Tiempo beju epupeni su, piada piada cuana Diusu sa jabuetsuati cuana jenetia enetideratayu. Bid'umimi ebuetsuaji cuana sa jabuetsuati cuana su bahui jei eputa huecuana. Tueda bid'umimi jabuetsuati cuana da Ishahua peje jenetia. <sup>2</sup> Cristiano cuana ja bid'umimi ebuetsuaji, bubeta cuana bahui id'abaja yata. Tueda bid'umimi ebuetsuaji, bubeta cuana da mue mecuana sa ai biame piba, ai madhada cuana a putsu. <sup>3</sup> Tuneda emenahuebatani ebutseneti puji. Diusu ja pamapa saida ai dia taji cuana ichataidha biame, cristiano cuana ebuetsuatani huecuana piada piada ai dia taji cuana padiata huecuana puji. Beju Diusu sa tsada tu peje su jei eputani cuana ja pamapa ai dia taji cuana tu diusulupai a putsu, padiata huecuana. <sup>4</sup> Aimue detse etse aidhe biame ai dia taji cuana menahueba cua mahue, pamapa ai dia taji Diusu ja ataidha cuana da saida putsu. Beidaji neje ecuaneseda inatsu taji, diusulupai Diusu a putsu. <sup>5</sup> Ahua ecuaneda Diusu sa mimi neje diusulupai ya su, pamapa ai dia taji cuana da saida epu.

*Jesucristo sa emebajaji saida*

<sup>6</sup> Timoteo, ahua miada ye quema jabuetsuati cuana edue cuana ebuetsua su, mida Jesucristo sa emebajaji saida epu. Quema jabuetsuati cuana miada pia cuana buetsua putsu,

miada quitaita Diusu eshanapaderati, daja huecha Diusu peje su enimetuheaderati. <sup>7</sup> Netideraque bid'umimi jabuet-suati cuana peje jenetia. Saida nimebutsepi Diusu butse su puniunetique. <sup>8</sup> Equita sa saida puji jasituti taji biame, ebia su saida, chujeji Diusu butse su nimebutsepi epu puji. Ahua ecuaneda Diusu butse su ye mundo su yani tupu nimebutsepi epu su, ecuaneda saida, nimebeidaji epu. Cielo su di ecuaneda ecuinati su, nimebeidaji Diusu neje yanienitiyu. <sup>9</sup> Beju tueda quema quisa cuana da ene quita, butsepi putsu, pamapa sa jei pu taji ema peje su. <sup>10</sup> Ecuaneda Diusu jubida emebajainia, pia cuana ja ecuana emadhabatani biame. Tu peje su ecuaneda ebia su enimetuheatiani, tueda da eid'e eni Diusu putsu. Tueda da pamapa D'ejji su Aji. Quebata cuana tu peje su jei eputa su, tuahueda d'ejji su yata huecuana.

<sup>11</sup> Jubida cristiano cuana buetsuaque quema quisa cuana.

<sup>12</sup> Be aiya biame ai eni mahue nime ba taji, mida edeahue ba putsu. Mique mimi, ai puiti cuana da saida, butsepi papu. Pamapa su ibuneda baque. Diusu peje su jubida janimetuheatique. Da su pamapa edue cuana ja daja mida ba putsu, daja huecha ata cua huecuana. <sup>13</sup> Ema epue teje Diusu sa derejiji mimi cuana edue cuana butse su mimiam taji. Da neje nimetucheameque huecuana, buetsuadera putsu. <sup>14</sup> Equene Diusu ja mi huaratitana, ehuidusuji cuana ja tuna sa eme mi bia su ichatana putsu. Be setaji Diusu ja mi tiatana ai cuana.

<sup>15</sup> Daja hue tueda ai saida cuana su puderatique pamapa ja cuaja mi Diusu neje saida epuderaniuneti bataque puji.

<sup>16</sup> Mida quitaita jarejatique. Daja huecha mique jabuetsuati cuana su. Mique jabuetsuati cuana quitaita miada di aque. Pamapa ai su nimetucheda puderaque. Ahua daja miada yaderati su, mida d'ejji su epu. Daja huecha mi id'abaji cuana d'ejji su eputa.

## 5

### *Cuaja edue cuana neje jadasutime pu taji*

<sup>1</sup> Edue Timoteo, be d'ayaji tata edhi cuana. Mique tata quitaita nime quisaque huecuana ibuneda neje. Edeahue cuana mique edue quitaita nime ba taji. <sup>2</sup> Punatia cuana mique cuara quitaita nime ba taji. Epuneje cuana mique dudu quitaita nime ba taji. Tuna neje saida, butsepi jadasuti taji.

<sup>3</sup> Ahue manujiji ene quita tsahuataja eputani cuana edue cuana sa tsahua taji. <sup>4</sup> Ahua quebata ahue manujiji bacuaji, utsecuaji su, tuneseda puji tueda ba taji. Tueda da Diusu sa tsada. <sup>5</sup> Ahue manujiji bacua mahue cuana Diusu peje



su jubida enimetuheatitani, familia mahue putsu. Tsine, dhidha Diosu ebia su ebajatani huecuana. Tueda ahue manujiji ichenu cuana da edue cuana sa tsahua taji. <sup>6</sup>Quebata ahue manujiji tu mehua hue mesa ai utsatada madhada cuana yatani su, tueda eid'e biame, manujiji nime Diosu butse su. Aimue tueda edue cuana sa tsahua taji mahue. <sup>7</sup>Quisague edue cuana pamapa tueda ai cuana pashanapenita huecuana puji, cuaja ahue manujiji cuana neje a taji. <sup>8</sup>Ahua quebata deja ja mesa familia quitaita aimue ebatani mahue su, Diosu sa jacuatsasiati cuana aimue yaderatani mahue. Tueda da Diosu peje su jei eputani mahue ebia su madhada hue.

<sup>9</sup>Ahua quebata ahue manujiji sa sucuta tunca maraji ebia su yani su, tueda ebutseneti mahue jamitsuti pu putsu, ilisha sa etsahuaji pu cua. <sup>10</sup>Ahua mesa piada ebutse neje bahui saida jaquinatina, ai saida cuana a bahue, ebacua saida sehuame bahue, perepereji cuana saida ba bahue, edue cuana pamapa ai chidi su saida ba bahue, sufri eputani cuana tsahua bahue, pamapa ai saida cuana jubida neje a bahue puina su, da su tueda ilisha sa etsahuaji pu cua. <sup>11</sup>Epuneje ahue manujiji cuana aimue inatsu taji mahue ilisha sa etsahuaji paputa huecuana puji. <sup>12</sup>Cuapuitime tuneda neicha ahueji puja puta cua, epuneje putsu. Ahua jahuetita cua su, Cristo emebajarijita. Da su juchaji eputa, huecuana, mecuana sa jamitsuti arijitana putsu. <sup>13</sup>Epuneje ahue manujiji cuana tunada detse puta cua, jahuetiji mahue putsu. Ete meamea puniuneti putsu, mimi aida puta cua huecuana. Pia cuana sa ai cuana su bahui jahuarutita cua huecuana. <sup>14</sup>Da su yama epuneje ahue manujiji jubida equisainia pahuetita huecuana puji. Bacuaji paputa hucua. Tuna sa ete quitaita cuana saida pabatita huecuana. Ahua daja saida epuniunetita huecuana su, cristiano cuana ja aimue madhada ebata huecuana mahue. <sup>15</sup>Piada piada ahue manujiji cuana Cristo peje jenetia netidera putsu, Ishahua tije yatani huecuana.

<sup>16</sup>Neicha yama mi equisainia, ahua quebata edue sa familia ahue manujiji yani su, tuseda puji saida ba taji dharejiji edue cuana sa atadhada epu mahue puji. Da su edue cuana ja ahue manujiji ene quita tsahuataja eputani cuana bahui patshuata.

<sup>17</sup>Ehuidusuji cuana ja edue cuana saida pahuidusuta. Saida pabuetsuatita huecuana. Saida Diosu sa quisa cuana pamimita huecuana. Meiyubaque ehuidusuji cuana. Saida chujetia taji huecuana. <sup>18</sup>Uja Diosu sa mimi epuani tueda ai cuana jepuiti: "Be juye sa ehuiburisiji ichaji, emudia epuneti

su.” Neicha uja epuani Diusu sa mimi: “Mudu puji sa yani echuje einatsuti puji.”

<sup>19</sup> Be tipeida edue cuana sa ehuidusuji tuaquisaji. Beta ahua quimisha etuaquisaji yani su, da su bahui tuaquisata cua. <sup>20</sup> Ahua ehuidusuji ene quita jucha atana su, pamapa dharejiji edue cuana butse su, tuaquisa putsu, d'aya taji pamapa edue cuana iyuame paputa puji. <sup>21</sup> Diusu, Jesucristo, mesa dharejiji ángel cuana butse su yama mi jubida ecuatsasiainia, daja hue quema jacuatsasiati aque, aimue dhare putsu mahue. <sup>22</sup> Be aidhe biame tipeida edhuidusuji ichaji. Equene ba taji mesa jucha yani ahua mahue. Ahua mesa jucha yani su, be tueda ichaji ehuidusuji. Tueda juchaji eshanapainia biame, ehuidusuji eicha su, da su miada tueda etsabainia.

<sup>23</sup> Be yahui bahui id'iji. Vino chidi id'ique eidue nime mique edhe saida papu puji, mida nedaji pad'i putsu.

<sup>24</sup> Piada piada cristiano cuana sa jucha cuana batasaida epuani. Castigo su tueda jucha cuana ja edusutani huecuana. Pia cuana sa jucha cuana mu bataji mahue biame, pia tsine su mecuana sa jucha cuana bataji epu. <sup>25</sup> Daja huecha ai saida ajiji cuana batasaida. Pia ai saida cuana ajiji cuana mu bataji mahue biame, pia tsine su bataji epu.

## 6

### *Emebajaji cuana jepuiti quisa*

<sup>1</sup> Pamapa emebajaji edue cuana sa emetse cuana iyuba taji. Tuneseda puji saida pamudumuduta huecuana cristiano cuana saida Diusu sa puji pamimita puji. <sup>2</sup> Ahua quebata emebajaji sa emetse Cristo jepuiti edue epuani su, emebajaji ja tueda saida neje pabata. Be iyubarijiji emetse, Cristo jepuiti edue ba putsu. Ebia su saida quita emetse iyuba taji, Cristo jepuiti edue ibuneda putsu. Beju daja buetsuaque dharejiji edue cuana.

<sup>3</sup> Ahua quebata ja pia jabuetsuati cuana ebuetsuatani su, aimue Echua Puji Jesucristo sa jabuetsuati butsepi quitaita cuana ebuetsuatani mahue. <sup>4</sup> Tueda ebia su aida ebatiani. Aimue ai biame eshanapatani mahue. Jacuicuinatija bahui epuani. Tueda jacuicuinati cuana jepuiti pamapa ai madhada cuana ecuinanani. Cristiano cuana huamahuama eduiniametitani. Huamahuama madhada hue ebatitani huecuana jacuicuinati cuana jepuiti. <sup>5</sup> Tuneseda jacuicuinati cuana pupe bue mahue. Mecuana sa piba madhada cuana pitsajiji, Diusu sa ene quita mimi cuana bue mahue ta huecuana putsu. Tuna sa piba su Diusu sa quisa saida cuana quisaquisa pu putsu, chipilu einatsu puji bahui pepe hue eputani huecuana. Beju tueda cristiano madhada cuana peje jenetia netideraque.

<sup>6</sup> Enei hue, quebata ja Cristo eshanapatani, tueda da nimebeidaji. Chipilu mesa tsada mahue nimebeidaji epu puji. <sup>7</sup> Beju ye mundo su ecuaneda aiji mahue bataji puana. Daja huecha ecuaneda emanu su, aimue ai biame edusu mahue. Da putsu, aimue ecuaneseda ebia su chipilu tsada ba taji mahue. <sup>8</sup> Saida ecuaneseda ani taji jana, ejud'uji tupu neje. <sup>9</sup> Ebia su chipilu inaja eputani cuana Ishahua ja epirubatani enimemadhatia puji huecuana. Tipeida jucha yametani huecuana, mecuana sa utsatada madhada cuana a putsu. <sup>10</sup> Cristiano cuana chipilu eje cua biame eputani putsu, pamapa ai madhada cuana yani. Piada piada cuana da chipilu eje cua biame putana putsu, Diosu sa jabuetsuati cuana jenetia netideratana. Daja netidera putsu, ebia su sufrimiento neje jamadhatitana huecuana.

*Ai madhada cuana tuchea putsu, Diosu sa quisa saida cuana quisaquisa pu taji*

<sup>11</sup> Timoteo, aimue mida chipilu tsada baji cuana nime mahue, mida da Diosu sa deja putsu. Tuasiuque pamapa tueda ai madhada cuana. Ai butsepi cuana bahui a putsu, Diosu peje su janimetuheaderatique. Pia cuana ibuneda baderaque. Paciencia aidaji, nimemitsida puque. <sup>12</sup> Diosu peje su nimetucheda puque pamapa ai madhada cuana su tuchea putsu, mesa jabuetsuati saida cuana ebuetsua puji. Pibaderaenique Diosu ja mi tu neje cielo su eid'e yameen-itayu. Da puji Diosu ja mi dharetana. Saida miada Diosu quisanetiacuina dueji cristiano cuana butse su. <sup>13</sup> Daja huecha Jesús di saida jaquisanetiacuinatiana Pilato butse su. <sup>14</sup> Beju pamapa eid'e amejia Diosu, Jesucristo detse butse su yama mi jubida ecuatsasiainia, butsepi puque aimue aiya biame mi etuaquisata mahue puji. Apeque pamapa quema jacuatsasiati cuana Cristo epueicha teje. <sup>15</sup> Diosu aida sa tsada hora su Cristo epue cielo jenetia, tueda da pamapa pia echua puji cuana ebia su aida Echua Puji Diosu putsu. <sup>16</sup> Tueda bahui manu bue mahue. Hueda jubida su eid'e yanieni. Dapia aimue aiya biame nariata cua mahue. Aimue aiya biame tueda batana mahue, daja huecha aimue bata cua mahue. Pamapa cristiano cuana ja tueda bahui saida pabaenita. Tuseda puji saida pamimienita huecuana. Tuahueda pacuatsasiaenita tucheda neje. Daja papu.

<sup>17</sup> Quisaque chipiluji cuana jubida be ebia su aida pabatita huecuana, chipiluji huecuana putsu. Be chipilu su panimetuheatita huecuana, chipilu cuana da epupe putsu. Diosu peje su bahui panimetuheatita huecuana, tueda da eid'e eni putsu. Tuahueda ecuaana pamapa ai saida cuana etiatani ecuaana sa saida puji. <sup>18</sup> Quisaque chipiluji cuana

ja ai mudu saida cuana paata huecuana. Ai hora papu tsahuataja eputani cuana patsahuata huecuana. <sup>19</sup>Ahua daja yata huecuana su, Diosu ja echuje cielo su etiata huecuana. Dapia tu neje saida yanienititayu huecuana.

*Tije quisa cuana*

<sup>20</sup> Timoteo, yama mi uja equisainiayu: Diosu ja mi menajatiatana jabuetsuati cuana saida quinaenique. Be jacuicuinatiji deja bahue eni nime ebatitani cuana neje. Bahue eni pepe epibatitani huecuana biame, aimue daja mahue, mecuana sa jabuetsuati cuana da bid'umimi putsu. Be jahuarutiji tueda bid'umimi jabuetsuati neje. <sup>21</sup> Tueda bid'umimi jabuetsuati tije aji cuana da Diosu sa ene quita jabuetsuati cuana jenetia jeitid'utana.

Diosu ja ebia su ibunebataque. Daja papu.

## SEGUNDA CARTA DEL APOSTOL SAN PABLO A TIMOTEO

Beta puji quirica su Pablo ja Timoteo quisataidha mesa huedhue puina jepuiti. Ye quirica su Pablo ja Timoteo quisataidha Diosu pamapa muesumu neje pamebajata, daja huecha ai enime cuana duju su Diosu peje su daja hue panimetuheaderati puji.

Ye versículo cuana da ebia su saida quita ebuetsuati puji:

1.7,12

2.1-6.15

3.12,16,17

4.7,8

### *Neicha Pablo ja Timoteo quirica tiametana*

<sup>1</sup> Ema da Pablo. Diosu ja ema

Jesucristo sa apóstol ichatana, mesa tsada putsu. Diosu ja pamapa Cristo peje su jei eputani cristiano cuana d'eji su yata ema quisa epuani. Cristo neje edunemeta huecuana, tu peje su jei eputa su. Da puji Diosu ja ema huaratiatana mesa quisa saida cuana cristiano cuana peje su quisaquisa epu puji. <sup>2</sup> Timoteo, mida da quema Cristo jepuiti ebacua. Tata Diosu, Echua Puji Jesucristo detse ja ibunebataque, nimepijajametaque.

### *Cristo jepuiti jaquisanetiakuinati taji*

<sup>3</sup> Diosu su da quema tata chenu cuana sa Diosu. Daja huecha quema di Diosu. Tuneda Diosu mebajataidha nime, daja yama Diosu enime eni saida neje emebajainia. Tueda yama diusulupai yainia mi jepuiti pamapa hora su. Tsine, dhidha yama tueda ebajainia miqueda puji. <sup>4</sup> Yama epibainia mi pibapibana cuana, etseda jamitsutibana su. Beju yama mida ebia su baja yainia neicha ema beidaji epu puji. <sup>5</sup> Yama epibainia mida Cristo peje su ebia su enimetuheatiani. Mi equene mique ahuicha Loida, mique cuara Eunice detse Cristo peje su janimetuheatiana. Bahue ema daja hue mida Diosu peje su enimetuheaderati tuatse nime.

<sup>6</sup> Da putsu, yama mi epibameinia quema eme detse mi bia su huanana su, Diosu ja mi nimetucheda ametana mesa quisa saida cuana quisaquisa epu puji. Beju daja hue janimetuheaderatique tueda quisa saida cuana quisaquisa epu puji.

<sup>7</sup> Diosu ja ecuana Espíritu Santo tiatana. Da putsu, aimue ecuaneda iyuame epuani mahue cristiano cuana peje su quisaquisa epu puji, Espíritu Santo ja ecuana nimetucheda yametani putsu. Ecuana sa piba saida yametani. Ecuana

cristiano cuana ebia su ibuneda ebametani. <sup>8</sup> Da su be bidhuji Jesucristo jepuiti equisanetiacuinati puji. Daja huecha be bidhuji ema jepuiti, ema Cristo jepuiti terijiji yani putsu. Ema tuseda puji sufri epuani nime, daja miqueda di sufri pu taji. Diusu ja ecuana mesa tucheda etiatani sufrimiento cuana etuchea puji. <sup>9</sup> Tuahueda ecuana d'eji su atana. Ecuana dharetana tu emebaja puji, daja huecha nimebutsepi epu puji. Daja tuahueda ecuana dharetana, ecuana ebia su ibunebatana putsu. Ecuana ai saida cuana ana jepuiti, aimue ecuana daja dharetana mahue. Cuaja mesa tsada batame bahui ecuana dharetana. Ye mundo aimue su, ecuana Cristo jepuiti ibuneda bataidha. <sup>10</sup> Jiahue mu ecuana D'eji su Aji Jesucristo pueana Diusu sa jaibunebati cuana ecuana ebame puji. Cristo curusu su manuana putsu, pamapa tu peje su jei eputani cuana aimue emanuenita mahue. Beju tu neje cielo su eid'e yanienititayu huecuana, tusa quisa saida cuana su jei putana putsu.

<sup>11</sup> Diusu ja ema mesa quisaquisa puji ichatana mesa quisa saida cuana judío mahue cuana quisaquisa ya puji. <sup>12</sup> Tueda quisa saida ema quisaquisa epuani putsu, upia ema terijiji sufri epuani. Aimue ema ebidhuani mahue, Jesucristo peje su ema enimetuchetiani putsu. Bahue ema tueda tucheda eni yama pamapa tu menajatiana ai jabuetsuati saida eba puji tu epueicha teje.

<sup>13</sup> Beju yama mi tiana jabuetsuati cuana daja hue aderatique. Ibuneda neje Jesucristo peje su ebia su daja hue janimetuheaderatique, tu neje dunejiji yani putsu. <sup>14</sup> Espíritu Santo mique muesumu su yani putsu, tuahueda mi etsahuatayu Diusu sa ene quita jabuetsuati cuana eba puji.

<sup>15</sup> Mida bahue pamapa Asia yahua su aniji edue cuana ja ema jusiaichatana. Daja ema atana Figelo, Hermógenes detse ja. <sup>16</sup> Beju Onesíforo ja mu quejucua nuati biame ema perejeutana. Ebia su ema tsahuatana, nimetucheametana. Aimue tueda bidhuana mahue, ema terijiji putsu. <sup>17</sup> Tueda upia Roma ejude su cuinana su, mue ema chacuriji atana mahue ema tejetana teje. <sup>18</sup> Da putsu, Diusu ja tusa familia quitaita cuana paibunebata. Cuaja tuahueda ema tsahuatana batame, Diusu ja tueda saida eturuca echuje etiatayu, Cristo epueicha su. Timoteo, mida bahue saida cuaja Onesíforo ja ema ebia su tsahuatana, ema Efeso ejude su anina su.

## 2

*Soldado nime pu taji Jesucristo sa puji*

<sup>1</sup> Timoteo, mida da quema

Jesucristo jepuiti ibuneda ebacua. Janimetuheatique, Jesucristo ja ebia su ibuneba putsu, tu neje ecuana dunejiji yani putsu. <sup>2-3</sup> Pamapa yama mi tiana jabuetsuati cuana pia edue butsepi cuana miqueda buetsuadera taji. Daja huecha tuneda pia edue butsepi cuana macha buetsuaderata. Soldado nime tucheda jatucheati taji Jesucristo sa puji. <sup>4</sup> Beju soldado cuana sa pamapa mecuana sa ai piba cuana setape taji saida emajaiti puji. Daja yatani huecuana mecuana sa echua puji sa jacuatsasiati cuana yape puji. Daja huecha ye mundo sa ai cuana miqueda setape taji Echua Puji Jesucristo saida emebaja puji. <sup>5</sup> Daja huecha jasitutiji cuana sa ebia su jasitubuetsuati taji echuje einatsu puji. <sup>6</sup> Daja huecha te su mudumuduji cuana sa equene jubida mudumudu taji banajiji ejaja cuana ehuru puji. <sup>7</sup> Japibatique quema mimi cuana su. Diusu ja quema mimi cuana shanapametaque puji.

<sup>8</sup> Japibatique Jesucristo da echua puji David chenu sa familia jenetia bataji puana. Juchaji deja cuana ja tueda man-uametana putsu, manujiji cuana duju jenetia netianaibana. Jiahue beju quebata tu peje su jei epu su, Diusu ja tueda d'ei su yata. <sup>9</sup> Daja ema cristiano cuana peje su quisaquisa epuani putsu, ema teriichametana huecuana, jamanuametiji pu cua nime. Ema terijiji biame, aimue Diusu sa quisa saida cuana mu aiya biame terita cua mahue. <sup>10</sup> Da putsu, ema beidaji, sufri epuani biame. Ema daja sufri epuani Diusu sa dharejiji cuana d'ei su papuenita puji, Jesucristo dunejiji yanita putsu.

<sup>11</sup> Ye quema mimi cuana da ene quita:

Ahua ene ecuaneda Cristo neje tupupai curusu su manuana pu cua nime su, da su tu neje tupupai ecuaneda cielo su eid'e epueniyu.

<sup>12</sup> Daja huecha ahua ecuaneda tu jepuiti sufri epu su, tu neje tupupai ecuaneda ecuatsasia epu.

Ahua ecuaneda Cristo quisanetiakuinaja mahue su, daja huecha tuahueda ecuana quisanetiakuinaja mahue yata.

<sup>13</sup> Ecuaneseda tu peje su janimetuheatique cuana pishihue epuani biame, tueda mu daja hue tucheda epuani ecuana etsahua puji.

Daja ecuana etsahuata, ecuana mesa jamitsuti tiatana putsu. Aimue detse mesa jamitsuti aja mahue ata cua mahue.

*Diusu sa emebajaji tsabajiji*

<sup>14</sup> Timoteo, ye quema quisa cuana edue cuana pibameque. Diusu sa ebani su jubida cuatsasiaque huecuana yanacane ai cuana jepuiti pacuicuinarijitita huecuana puji. Ahua daja eputa huecuana mahue su, janimemadhatita cua huecuana, tueda jacuicuinati cuana mue ai puji saida putsu. <sup>15</sup> Diusu

sa emebajaji saida, tsabajiji puque aimue Diusu butse su ebidhu mahue puji. Diusu sa jabuetsuati cuana cristiano cuana butsepi neje miqueda buetsua taji. <sup>16</sup> Yanacane jacuicuinati cuana jenetia netideraque. Tueda jacuicuinati cuana jepuiti aimue cristiano cuana Diusu eshanapatani mahue. <sup>17</sup> Jacuicuinatiji cuana sa quisa cuana da chadi ja yami eihuiametani nime. Daja da Himeneo, Fileto detse. Tuatseda da jacuicuinati aida. <sup>18</sup> Diusu sa ene quita jabuetsuati cuana jenetia jeitid'uana tse. Tueda jabuetsuati cuana tsapiatana tse. Manujiji cuana beju id'etaibana ebuetsuatani tse. Daja ebuetsuainia je, tuatseda piada piada edue cuana sa Diusu peje su janimetucheati cuana pitsametana. <sup>19</sup> Beju Diusu sa jabuetsuati cuana mu ene quita, tucheda eni. Echua Puji Jesucristo ja mesa dharejiji quitaita cuana eshanapatani. Mesa dharejiji cuana sa pamapa ai madhada cuana jenetia netidera taji.

<sup>20</sup> Chipiluji sa ete su dueji emeji cuana yani. Piada piada oro, plata jenetia ajiji. Pia cuana aqui, rutu jenetia ajiji. Oro, plata jenetia ajiji emeji cuana da chujeneda, ania, mudu saida puji. Aqui, rutu jenetia ajiji emeji cuana da chujeneda mahue, mudu adhida puji. <sup>21</sup> Beju ecuaneda da tueda emeji cuana nime. Ahua ecuaneda pamapa ai madhada jenetia enetidera su, Diusu ja ecuana emeji chujeneda, ania mudu saida cuana yameta.

<sup>22</sup> Timoteo, tuasiuque edeahue cuana sa ai utsatada madhada cuana. Butsepi, ibuneda, nimepijajajiji neje bahui puniunetique. Diusu peje su saida janimetucheatique. Cristo tsada cuana neje bahui puniunetique. <sup>23</sup> Netideraque pamapa yanacane jacuicuinati cuana jenetia. Jacuicuinati jepuiti cristiano cuana huamahuama eduininiametitani. <sup>24</sup> Diusu sa emebajaji cuana sa mu aimue daja puniuneti taji mahue. Tuneseda saida pu taji cristiano cuana neje. Saida neje buetsua taji huecuana. Pamapa ai cuana su paciencia aidaji mecuana sa pu taji. <sup>25</sup> Tuna neje duininija eputani cuana saida neje jeutsu taji. Ahua daja saida ejeutsuta huecuana su, cuapuitime duininija eputani cuana di Diusu peje su japibaturucatita cua. Diusu sa ene quita jabuetsuati cuana cuapuitime shanapata cua huecuana. <sup>26</sup> Shanapa putsu, cuapuitime Ishahua sa eme jenetia siuta cua huecuana aimue mesa emebajaji cuana epudera mahue puji.

### 3

*Cristo epue tiempo enariatiani su, cristiano cuana da madhada hue eputa*



<sup>1</sup> Timoteo, bahue puque Cristo epue tiempo enariatiani su, pamapa ai iyuda enime cuana bataji epu. Rejada hue ye mundo su Diusu sa dharejiji cuana sa puji epu. <sup>2</sup> Cristiano cuana tuneda quitaita ebia su aida ebatita. Chipilu bahui mecuana sa tsada epu. Diusu neje jubida eduininita huecuana. Tuseda puji ebia su madhada hue emimita huecuana. Tata, cuara neje a taji mahue eputa huecuana. Diusulu-pai pu bahue mahue, Diusu iyuba bue mahue eputa huecuana. <sup>3</sup> Nimetadala, duinini aida, mimi aida eputa huecuana. Pamapa ai madhada cuana yata huecuana. Ai saida yatani cuana neje ebia su emajaitita huecuana. <sup>4</sup> Pia menajataiji eputa huecuana. Pia cuana iyuba bue mahue eputa huecuana. Pamapa mecuana sa ai utsatada madhada chacuji bahui eputa huecuana, Diusu chacu taji biame. <sup>5</sup> Ilisha su eputaneti biame, aimue Diusu eshanapatani huecuana mahue.

Netideraque tuna peje jenetia. <sup>6</sup> Tuneda ete meamea eputaniuneti epuna pibapiba bue mahue cuana mecuana sa jabuetsuati madhada cuana ebuetsua puji. Tueda epuna cuana sa pamapa tsapiapiati jucha cuana yani. <sup>7</sup> Ai papu su jei eputani huecuana. Atasaida ebasea puji huecuana ai papu jabuetsuati eichacua cuana neje. Aimue Diusu sa ene quita jabuetsuati cuana shanapata cua huecuana mahue. <sup>8</sup> Tueda bid'umimi ebuetsuaji deja cuana da Janes, Jambres chenu mau detse nime. Biahua tiempo tuatseda Moisés chenu sa jacuatsasiati cuana aja mahue putsu, duininidha tse. Daja jiahue bid'umimi puji deja cuana ja Jesucristo sa ene quita jabuetsuati cuana aja mahue putsu, duininida ebatani huecuana. Aimue aja yatani huecuana mahue. Adhida pamapa mecuana sa piba cuana. Aimue Diusu peje su janimetucheati bahueta huecuana mahue. <sup>9</sup> Daja biame, aimue daja hue cristiano cuana ebaseaderatita huecuana mahue, tuna sa jabuetsuati cuana da bid'umimi hue, cristiano cuana da bahue eputa putsu. Cuaja Janes, Jambres detse puidha nime, daja huecha jiahue bid'umimi ebuetsuaji cuana neje epu.

*Pablo ja Timoteo jubida quisataibana*

<sup>10</sup> Timoteo, miada quema jabuetsuati cuana eshanapaeninia. Mida bahue aimue ema tueda bid'umimi jabuetsuati deja cuana nime mahue. Mida bahue quema ai puiti, piba saida, butsepi cuana. Yama paciencia aida neje pamapa cristiano cuana ibuneda ebainia mida bahue. Cuaja ema sufri epuani mida bahue. Daja huecha cuaja ema Jesucristo peje su jubida enimetuheatiani bahue. <sup>11</sup> Cuaja deja madhada cuana ja ema sufri ametana ema Diusu sa quisa saida cuana quisaquisa puana putsu, beju mida bahue.

Ema Antioquía, Iconia, Listra ejude cuana je anina su, mida bahue cuaja ema sufri ametana huecuana. Daja biame, Echua Puji Jesucristo ja ema d'ejí su atana pamapa tueda sufrimiento cuana jenetia. <sup>12</sup> Enei hue, quebata ja Jesucristo emebajata su, tuseda sufri pu taji, Cristo tsada mahue cuana ja tueda eduininibata putsu. <sup>13</sup> Beju deja madhada cuana ebia su eyapacatita. Ebia su madhada enieni epuderata huecuana. Mecuana sa bid'umimi jabuetsuati cuana neje dueji cristiano cuana ebaseata huecuana, cuaja Ishahua ja baseame atana huecuana nime.

<sup>14</sup> Timoteo, yama quitaita mi butsepi buetsuana. Tueda mi jabuetsuatiana saida cuana su mique jubida puderati taji. <sup>15</sup> Yanana jenetia miada Diosu sa derejiji mimi shanapana. Tueda mimi da saida mi ebuetsuati puji. Daja shanapa putsu, mida Jesucristo peje su jei puana. <sup>16</sup> Beju Diosu ja mesa mimi cuana deremepetaidha. Pamapa tueda mimi da ecuana sa saida puji. Tueda mimi ja ecuana butsepi ebuetsuatani. Ecuana jubida ebutsepiatani ecuana butsepi epuniuneti puji. <sup>17</sup> Daja ecuaneseda Diosu sa derejiji mimi jabuetsuati taji ecuaneda Dios saida emebaja puji, daja huecha pamapa ai saida cuana ya puji.

## 4

<sup>1</sup> Beju Echua Puji Jesucristo ye mundo su epueicha ecuat-sasia epu puji. Da tsine su pamapa manujiji cuana, pamapa manujiji, eid'eni cuana beju yabata. <sup>2</sup> Timoteo, Jesucristo, Tata Diosu detse butse su yama mi jubida ecuatsasiainia, daja hue cristiano cuana peje su quisaquisa puderaque Diosu sa quisa saida cuana. Pamapa hora su quepia mi eputiani je, quisaquisa puque. Paciencia neje Diosu sa jabuetsuati cuana edue cuana buetsuaque. Jubida butsepiaque huecuana. Diosu jepuiti quisaque huecuana. <sup>3</sup> Tiempo ecuina cristiano cuana ja jabuetsuati saida cuana aimue id'abaja yata mahue. Mecuana sa ebuetsuaji quitaita cuana etejetita huecuana mecuana sa tsada madhada jabuetsuati cuana bahui pabuet-suata huecuana puji. <sup>4</sup> Aimue Diosu sa mimi id'abaja yata huecuana mahue. Yanacane quisa cuana bahui id'abaja yata huecuana. <sup>5</sup> Timoteo, miqueda puji pamapa hora su jatupuati taji. Sufrimiento cuana sufri pu taji paciencia neje. Cristo sa quisa saida cuana quisaquisa pudera taji. Apeque pamapa Diosu ja mi tiatana cuana.

<sup>6</sup> Beju quema manu hora enariatiani. Diosu jepuiti ema emanuameta huecuana. <sup>7</sup> Yama saida Diosu mebajapeana. Pamapa tuahueda ema tiatana cuana saida apeana. Tu peje su bahui ema janimetucheanitiana. <sup>8</sup> Diosu ja echuje ema etiatayu, Cristo epueicha su. Daja huecha pamapa tu

eid'uatani cuana di. Da tsine su Cristo ja butsepi neje pamapa su ejuzgatayu.

*Pablo ja Timoteo quisataibana*

<sup>9</sup> Timoteo, cuaja papu biame ema peje su tipeida pueque. <sup>10</sup> Demas ja ema mehua jusianetiatana, tuseda ebia su tsada ye mundo sa ai cuana putsu. Tesalónica ejude su putiana. Crescente di Galacia yahua su putiana. Tito di Dalmacia yahua su putiana. <sup>11</sup> Lucas bahui ema neje yani. Chacuque Marcos. Duseque tueda, mi epue su. Tueda da saida ema tsahuaji Diusu emebaja puji. <sup>12</sup> Tíquico Efeso ejude su yama beituana. <sup>13</sup> Troas ejude su Carpo sa ete su quema ebiad'amaji yama ichajusiana. Jetiyuque quema. Mi epue su, quema duseyuque. Quema quirica cuana di duseyuque.

<sup>14</sup> Herrero Alejandro ja ema ebia su madhada atana. Echua Puji Jesucristo jatueda cuaja ema madhada hue atana eturuca ecastigata. <sup>15</sup> Jarejatique Alejandro neje, tueda ecuana sa jabuetsuati cuana neje ebia su eduinibatani putsu.

<sup>16</sup> Beju upia ema huaraji cuana butse su dusutana huecuana su, ema mehua yama jeitsuana huecuana. Aimue aidhe edue ja biame ema tsahuatana mahue. Pamapa ja ema jusianetiatana. Daja biame, yama Diusu ebajainia aimue tuahueda pacastigata huecuana mahue puji. <sup>17</sup> Pamapa ja ema jusianetiatana biame, Diusu mu ema neje netina. Ema nimetucheametana quisaquisa mesa quisa saida cuana epu puji judío mahue cuana peje su. Diusu ja ema león cuana sa ecuatsa jenetia d'eji su atana. <sup>18</sup> Beju Echua Puji ja ema pamapa ai iyuda cuana jenetia d'eji su yatayu. Ema einatsihuata cielo su ema edusuyu teje. ¡Gloria Tata Diusu papueni! Daja papu.

*Pablo ja edue cuana ibuneda neje mitsuametaibana*

<sup>19</sup> Mitsuque Prisca, Aquila detse quema ebani su. Onésiforo sa familia cuana di mitsuque. <sup>20</sup> Erasto Corinto ejude su anitiana. Trófimo yama nedaji ichajusiana Mileto ejude su. <sup>21</sup> Cuaja papu biame ema peje su pueque, huinahuina badi cuana cuinaji mahue su. Edue Eubulo, Pudente, Lino, Claudia cuana ja mi emitsuametani. Pamapa pia edue cuana ja di mi emitsuametani.

<sup>22</sup> Timoteo, Echua Puji Jesucristo mi neje paanieniti. Diusu ja pamapa meibunebaenitaque. Daja papu.

## LA CARTA DEL APOSTOL SAN PABLO A TITO

Pablo ja ye quirica edeahue Tito tiametaidha. Ye quirica sa quimisha capítulo bahui yani. Pablo ja Tito buetsuataidha cuaja dharejiji cuana huidusume a taji. Daja huecha dere-  
taidha cuaja dharejiji huidusuji cuana sa pu taji.

Ye versículo cuana da ebia su saida quita ebuetsuati puji:

1.9

3.4,5

### *Pablo ja Tito quirica tiametana*

<sup>1</sup> Ema da Pablo Diusu sa emebajaji.

Cristo sa apóstol da ema. Tuahueda ema mesa dharejiji cuana peje su beitutana mesa jabuetsuati cuana yama ebuetsua huecuana puji. Daja yama yainia Diusu pashanapaenita huecuana puji. <sup>2</sup> Biahua tiempo Diusu ja mesa jamitsuti ichataidha, ahua quebata papu tu peje su enimetucheati su, tueda eid'e yameenitayu. Diusu aimue bid'umimi epuani mahue. <sup>3</sup> Jiahue cristiano cuana mesa quisa saida cuana eshanapametani ema quisaquisa epuani jepuiti. Ecuana Déji su Aji Diusu ja ema huaratiatana mesa quisa saida cuana quisaquisa epu puji. <sup>4</sup> Tito, yama mi ye quirica etiamenia. Mida da quema Cristo jepuiti ebacua. Tata Diusu, ecuana Déji su Aji Jesucristo detse ja ibunebataque. Tuatseda nimepija-jametaque.

### *Tito ja Diusu mebajatana Creta edhapupu su*

<sup>5</sup> Tito, Creta edhapupu su mi yama ichajusiana dapia mi Diusu emebaja puji. Yama Diusu sa mudu apiruana miada yapeyu puji, yama mi ichajusiana. Pamapa ejude cuana je Diusu sa dharejiji cuana sa ehuidusuji huaratiaque puji yama mi cuatsasiana, mi neje ema anina su. <sup>6</sup> Ehuidusuji cuana sa saida, butsepi ani taji aimue aiya biame patuaquisata huecuana mahue puji. Ehuidusuji cuana sa piada ehuaneki cama bahui pu taji. Tuna sa ebacua cuana sa Diusu peje su jei pu taji. Saida padusutita huecuana cristiano cuana neje. Be a taji mahue paputa huecuana aimue aiya biame patuaquisata huecuana puji mahue. <sup>7</sup> Ehuidusuji cuana sa saida, butsepi puniuneti taji, Diusu sa quisaquisa puji huecuana putsu. Be tuneda ebia su aida pabatita. Be nimemadhada, duinini aida, tsetse aida, icheiche aida paputa huecuana. Be cristiano cuana pabaseata huecuana chipilu inatsu puji. <sup>8</sup> Ai hora biame epereji cuana epuetani su, ehuidusuji cuana sa saida ba taji huecuana. Mecuana sa ai saida cuana bahui a

taji. Jatupuatiji, butsepi mecuana sa pu taji. Diusu sa puji ichaderajiji mecuana sa pu taji. <sup>9</sup> Cuaja Diusu sa ene quita jabuetsuati cuana jabuetsuatiana batame, daja mecuana sa puderati taji. Tuneseda Diusu sa mimi pia cuana buetsua taji. Jei ame taji Diusu sa puji madhada hue emimitani cuana.

<sup>10</sup> Beju deja a taji mahue cuana jucuada yani. Ebia su yanita judío cuana duju su. Tuneda bid'umimi jabuetsuati cuana ebuetsuatani cristiano cuana ebasea puji. <sup>11</sup> Mitaname taji pamimiderata huecuana mahue puji. Tuneda familia quitaita cuana ebaseametani. Ai bid'umimi cuana ebuetsuatani huecuana chipilu einatsu epu puji.

<sup>12</sup> Biahua tiempo Creta edhapupu su piada profeta anidha. Creta edhapupu su aniji cuana jepuiti uja puidha: "Creta edhapupu su aniji cristiano cuana da bid'umimi aida puji. Tuneda da animalo d'aida cuana nime. Diadia aida, tunada huecuana." Daja puidha profeta tuna jepuiti. <sup>13</sup> Beju tusa quisa da ene quita, butsepi. Da putsu, Tito, miqueda puji jubida d'aya taji huecuana nimebutsepi Diusu butse su paputa huecuana puji. <sup>14</sup> Jubida butsepia taji huecuana judío cuana sa bid'umimi jabuetsuati cuana paid'abata mahue huecuana puji, daja huecha Diusu sa mimi jei aja mahue cuana sa jacuatsasiati cuana paid'abata mahue huecuana puji.

<sup>15</sup> Ahua quebata cristiano cuana saida, butsepi epibatiani su, tuneseda puji pamapa ai cuana da saida butsepi. Ahua quebata cristiano cuana madhada hue epibatiani su, ahua aimue Diusu peje su jei eputani mahue su, tuneseda puji mue ai biame saida, butsepi mahue, tuna sa piba cuana da adhida putsu. <sup>16</sup> Tuneda pa Diusu eshanapatani eputani biame, aimue daja mahue, madhada hue edusutitani huecuana putsu. Ebia su ate, a taji mahue, ai saida papu biame a bue mahue ta huecuana.

## 2

### *Jabuetsuati saida*

<sup>1</sup> Tito, buetsuaque jabuetsuati saida cuana bahui. <sup>2</sup> Tata edhi cuana saida padusutita, jatupuatijiji, paciencia aidaji paputa huecuana. Saida Diusu peje su panimetuheatita, pamapa cristiano cuana neje ibuneda pabatita huecuana. <sup>3</sup> Daja huecha punatia cuana. Saida padusutita huecuana Diusu butse su. Be yanacane pia cuana pabanijemitsuata huecuana. Be patsetseta huecuana. <sup>4</sup> Epuneje cuana saida buetsua taji yatani huecuana tuna sa yahue, ebacua cuana ibuneda pabata huecuana puji. <sup>5</sup> Epuneje cuana saida, butsepi, jatupuatijiji paputa. Mecuana sa ete cuana saida pabata huecuana. Yahue cuana saida pai'dabata huecuana. Daja

epuneje cuana sa pu taji cristiano cuana Diosu sa puji aimue madhada hue emimita mahue puji.

<sup>6</sup> Tito, edeahue cuana di miada buetsua taji yainia saida jatupuatijiji paputa huecuana puji. <sup>7</sup> Miqueda butsepi puniuneti taji, tuneda daja mi saida epuniuneti ba putsu, mi nime paputa puji. Saida neje miada buetsua taji yainia huecuana. <sup>8</sup> Beju daja a putsu, aimue aiya biame mi madhabata cua mahue. Quebata ja mi madhabaja yata su, tueda pabidhu, mique jabuetsuati cuana butsepi putsu.

<sup>9</sup> Emebajaji cuana di miada quisa taji yainia mecuana sa emetse cuana saida paid'abata huecuana puji. Pamapa tuna sa jacuatsasiati cuana paata huecuana. <sup>10</sup> Saida, butsepi, ja-jeutsuti aida mahue, tsi puji mahue paputa huecuana. Ahua daja saida eputa huecuana su, pamapa cristiano cuana ja ecuana D'ejí su Aji Diosu ja jabuetsuati cuana saida ebatsuta.

<sup>11</sup> Beju Diosu ja pamapa cristiano cuana ebia su ibuneda ebatani putsu, mesa jabuetsuati cuana tiatana huecuana. Tueda jabuetsuati cuana ja ecuana ebuetsuatani cuaja ecuaneda d'ejí su pume pu cua. <sup>12</sup> Diosu ja ecuana ebia su ibuneda ebatani putsu, ecuaneseda pamapa ai madhada, utsatada madhada cuana jenetia netidera taji ecuana ebuetsuatani. Daja huecha jatupuatijiji ecuaneseda pu taji ecuana ebuetsuatani. Ye mundo su ecuaneseda saida, butsepi Diosu butse su jadasuti taji ecuana ebuetsuatani. <sup>13</sup> Ecuaneda ye mundo su yani tupu, daja butsepi ecuaneseda jadasuti taji, Cristo ecuína eid'uainia tupu. Tueda da ecuana D'ejí su Aji Diosu aida. <sup>14</sup> Tueda huecha curusu su manuana pamapa ai madhada cuana jenetia ecuana d'ejí su ya puji, ecuaneda tuseda puji bahui papu puji. Daja ecuana atana ecuaneda ai mudu saida cuana ya puji.

<sup>15</sup> Pamapa tueda ai cuana miqueda buetsua taji, enime-tucheame huecuana puji. Jubida butsepia taji huecuana. Be aiya biame mida ai eni mahue nime ba taji, edeahue putsu.

### 3

#### *Jei eputani cuana sa ai a taji cuana*

<sup>1</sup> Diosu peje su jei eputani cuana miada pibame taji yainia huaraji aida cuana sa jacuatsasiati cuana paata huecuana puji. Atasaida, nimemitsida paputa huecuana. Ai saida cuana bahui paata huecuana. <sup>2</sup> Be aidhe sa puji biame madhada hue pamimita huecuana. Pia cristiano cuana neje saida padusutita huecuana.

<sup>3</sup> Equene ecuaneda di aimue saida puina mahue jei puja mahue cuana nime. Diosu jei a fue mahue cuana ecuaneda puina. Tu peje jenetia uqueda, jeitid'ujiji, envidia neje

puniunetina. Pamapa ai madhada cuana aina. Cristiano cuana duininibaina. Daja huecha tuneda ecuana bataina. <sup>4</sup> Beju daja ecuaneda puina biame, Diosu ja ecuana d'oji su atana, pamapa cristiano cuana ebia su ibuneda ba putsu. <sup>5</sup> Aimue ecuaneda ai saida cuana ana jepuiti, Diosu ja d'oji su atana mahue. Mesa jaibunebati jepuiti bahui ecuana d'oji su atana. Ecuana nimeeichacua atana, Espíritu Santo ja ecuana nimebutsepi atana putsu. Tuahueda ecuana Diosu peje su eid'e ameenitana. <sup>6</sup> Diosu ja ecuana Espíritu Santo tiaenitana, ecuaneda D'oji su Jaatiji Jesucristo peje su jei puana putsu. <sup>7</sup> Da putsu beju, Diosu ja mesa jaibunebati jepuiti ecuana saida ebatsuenitani. Tu neje cielo su ecuaneda yanienitiyu. Da puji ecuaneda tu peje su enimeid'uatiani.

<sup>8</sup> Beju tueda quema quisa cuana da ene quita, butsepi. Tueda ai cuana jubida buetsuaque Diosu peje su jei eputani cuana ai saida cuana bahui paata huecuana puji. Tueda quisa cuana da saida pamapa edue cuana sa puji. <sup>9</sup> Be yanacane jasatsiati cuana jasatsiatiji. Be jasatsiatiji tata edhi chenu cuana sa yanacane ai puiti cuana jepuiti. Moisés chenu sa jacuatsasiati cuana jepuiti jasatsiatiji cuana jenetia beju netideraque. Tueda jasatsiati cuana da yanacane.

<sup>10</sup> Ahua quebata deja micuana duju su jasatsiati aida epuani su, ahua piada, beta nuati d'ayaque tueda be daja papu. Ahua id'abaja mahue mi yata su, jusiacuinaque tueda edue cuana peje jenetia. <sup>11</sup> Beju tueda deja da japitsatijiji. Matsejiji epu, juchaji putsu.

### *Pablo ja Tito quisataibana*

<sup>12</sup> Edue Artemas, ahua edue Tíquico yama mi peje su ebeitu. Mi peje su ecuinati su, putique Nicópolis ejude su. Tueda ejude su ema yaniti huinahuina badi cuana epuani tupu. <sup>13</sup> Tsahuaenique ebia quisaji Zenas, edue Apolos detse. Tiaque tse tuatse sa ai tsada cuana tuatse sa quepia eputiani su puji, ai biame tuatse sa pahueiti mahue puji. <sup>14</sup> Pamapa Diosu peje su jei eputani cuana sa saida mudumudu taji quisaquisa puji, tsahuataja cuana etsahua puji. Ahua daja tuneda yata su, aimue yanacane yanita huecuana mahue ye mundo su.

### *Tije quisa cuana*

<sup>15</sup> Pamapa upia ema neje yanita edue cuana neje mi yama emitsuameinia. Daja huecha dapia yani ibuneda Cristo jepuiti edue cuana ecuanaju emitsuameinia. Diosu ja pamapa meibunebataque. Daja papu.

## LA CARTA DEL APOSTOL SAN PABLO A FILEMON

Ye Pablo sa quirica da pia mesa quirica cuana ebia su huai chidi, piada capítulo bahui putsu. Pablo ja ye quirica Filemón tiametaidha, tuahueda emebajaji Onésimo neicha pabatsuta puji. Filemón sa ete jenetia Roma ejude su Onésimo jududuidha. Dapia Pablo ja tsu putsu, Cristo peje su huidusutaidha. Daja huecha Pablo, Filemón neje tueda ai enime cuana saida piba neje basetaja epuani, ahua tuahueda Onésimo ibunebatayu cua. Ye quirica chidi ja cuaja Diusu ja juchaji cuana eperdonatani mesa jalbunebati jepuiti ecuana ebametani. Cuaja Filemón ja Onésimo perdonataidha nime, daja ecuana Diusu ja eperdonatani, Jesucristo peje su jei pu putsu.

### *Pablo ja Filemón quirica tiametana*

<sup>1</sup> Ema da Pablo. Terijiji da ema Jesucristo sa quisa saida cuana quisaquisa puana jepuiti. Timoteo neje yama ye quirica edereinia. Edue Filemón, mi peje su ye quirica ebeituinia miada da etseju neje tupupai Diusu meabajaji. Daja huecha pamapa mique ete su edhitatitani dharejiji edue cuana peje su etseju ye quirica ebeituinia. <sup>2</sup> Daja huecha edue Arquipo, edue epuna Apia detse peje su etseju ebeituinia. Tuatseda di etseju neje tupupai Diusu meabajaji detse. <sup>3</sup> Ecuana sa Tata Diusu, Echua Puji Jesucristo detse ja pamapa meibunebataque, menimepijajametaque.

### *Filemón Jesucristo peje su jubida janimetucheatiana*

<sup>4</sup> Edue, pamapa hora su yama diusulupai Diusu yainia mi jepuiti. <sup>5</sup> Bahue ema mida Jesucristo peje su jubida enime-tucheatiani. Ebia su miada Diusu ibuneda ebainia. Pamapa Cristo peje su jei eputani edue cuana di miada ibuneda ebainia. Da putsu, yama diusulupai yainia Diusu. <sup>6</sup> Mi jepuiti piada piada cristiano cuana Cristo peje su jei putana. Yama Diusu ebajainia tuneseda puji, pamapa Diusu sa jaibunebati cuana pashanapaenita huecuana puji. Tueda jaibunebati cuana Diusu ja ecuana etiatani, Cristo peje su jei pu putsu. <sup>7</sup> Beju nimebeidaji, nimetucheda da ema, miada pamapa edue cuana ebia su ibuneda ebainia putsu, nimetucheda yameinia huecuana putsu.

### *Pablo ja Filemón bajatana Onésimo sa puji*

<sup>8</sup> Cristo sa jabeituti ema putsu, yama mi jubida cuatsasia cua ai saida cuana miada ya puji. <sup>9</sup> Yama mi cuatsasia cua biame, aimue mida yama ecuatsasia mahue. Yama mi ai



chidi ebaja, miada ema ibuneda ebainia putsu. Ema upia edhi, terijiji Cristo jepuiti. <sup>10</sup> Onésimo sa puji yama mi jubida ebajainia. Upia ema terijiji yani su tueda ema peje su pueana. Yama tueda Cristo peje su jei ameaná. Da su tueda da quema Cristo jepuiti ebacua beju, tu peje su jei puana putsu.

<sup>11</sup> Tueda da miqueda puji equene emebajaji saida mahue puina, jududuana putsu. Jiahue mu tueda chujeji etseseda puji. <sup>12</sup> Beju yama mi peje su neicha tueda ebeituinia. Saida batsuque tueda ema quitaita pu cua nime. <sup>13</sup> Quema tsada epudhaani tueda ema neje paaniti puji ema terijiji yani tupu, ema patsahuata puji mi eturuca. <sup>14</sup> Aimue daja ya mahue, ahua mique tsada mahue su. Aimue yama mi jubida neje ecuatsasia mahue ai chidi su ema etsahua puji. <sup>15</sup> Edue, cuapuitime Onésimo quejucua tiempo chidi puji mi peje jenetia cuinanana jiahue miada tueda neicha ebatsueni puji. <sup>16</sup> U jenetia su be baji tueda emebajaji nime. Jiahue mu edue ibuneda nime baque. Beju yama tueda ebia su ibuneda ebainia. Miqueda puji mu ebia su ibuneda ba taji, Cristo jepuiti edue putsu. <sup>17</sup> Da su beju ahua miada ema mique ebuqueji nime ebainia su, batsuque tueda ema quitaita pu cua nime. <sup>18</sup> Ahua tuahueda mi ai madhada atana su, ahua tuseda manu mi neje yani su, ema chujebajaque. <sup>19</sup> Ema da Pablo. Quema eme quitaita neje ye quirica edereinia. Yama pamapa mesa manu echujetiayu. Beju yama mi epibameinia mique manu ema neje ebia su, yama mi Jesús shanapameana putsu. <sup>20</sup> Edue, quema jabajati chidi aque, mida Echua Puji Jesucristo peje su jei epuani putsu. Beidaji ema amequé, etseda Cristo jepuiti edue putsu.

<sup>21</sup> Bahue ema yama ebajainia ebia su miada yayu. <sup>22</sup> Beju tahui jude quema puji basetaque. Ema Diosu peje su enimeid'uatiani tuahueda ema d'eji patiata micuana peje su eputi puji, cuaja micuaneda Diosu jubida ebajainia batame.

### *Tije quisa cuana*

<sup>23</sup> Hue upia ema neje Epafra ya. Tueda di ema neje Cristo jepuiti terijiji yania. Tuahueda micuana emitsuametani. <sup>24</sup> Edue Marcos, Aristarco, Demas, Lucas cuana ja di micuana emitsuametani. Tuneda da ema neje tupupai Diosu mejajaji cuana.

<sup>25</sup> Ecuana sa Echua Puji Jesucristo ja ebia su meibunebataque. Daja papu.

## LA CARTA A LOS HEBREOS

Ye quirica Cristo peje su jei putana judío cuana sa puji bahui puina. Piada cuana ye quirica Pablo ja deretaidha eputani biame, cuaja shanapa taji mahue aiya deretaidha.

Ye quirica su yani beta saida jabuetsuati:

1. Cristo da Moisés, ángel cuana, judío cuana jacuatsasiati cuana ebia su aida. Equene jacuatsasiati, jairutsuati cuana pamapa pepeana, Cristo pueana su.

2. Aimue saida mahue Cristo jepuiti quisa saida cuana id'aba putsu biame, neicha jacuatsasiati cuana tije ya puji d'ejí su epu puji. Ebia su saida Cristo sa jabuetsuati cuana su daja hue ai pibapiba mahue epuderati puji.

Ye versículo cuana da ebia su saida quita ebuetsuati puji:

2.3

4.12-16

6.10

7.25

9.22

10.23

11.1-40

12.1,2,5,6

13.8

*Diusu ja mesa quisa saida cuana ecuana quisatana mesa Ebacua Jesucristo jepuiti*

<sup>1</sup> Biahua tiempo Diusu ja profeta cuana jepuiti mesa quisa cuana pamapa nuati, tsapiapiati jabuetsuati neje ecuana sa tata chenu cuana quisataidha. <sup>2</sup> Jiahue mu mesa quisa saida cuana ecuana quisatana mesa Ebacua Jesucristo jepuiti. Diusu ja pamapa ai cuana ataidha mesa Ebacua Jesucristo jepuiti. Tueda pamapa ai cuana Diusu ja Jesucristo tiataidha tuseda puji cama papu puji. <sup>3</sup> Jesúcristo ja Tata Diusu Aida cristiano cuana ebametani. Tueda da ene quita Diusu, Tata Diusu neje tupupai putsu. Pamapa Diusu ja ai ataidha cuana tusa tucheda neje yasemetani. Tueda curusu su manuana ecuana sa jucha cuana dhipa putsu, ecuana d'ejí su ya puji. Daja a putsu, cielo su tsuatibana Diusu sa bai eni bene yaniute puji, da jenetia tu neje tupupai ecuatsasia epu puji.

*Diusu sa Ebacua Jesucristo da ángel cuana ebia su aida*

<sup>4</sup> Jesucristo da pamapa ángel cuana ebia su aida, Diusu sa Ebacua putsu. <sup>5</sup> Aimue ai hora su biame Diusu ja quebata ángel biame uja ataidha mahue:

Mida da quema ebacua.

Beju ema da mique tata.

Daja huecha aimue quebata ángel biame uja ataidha mahue:  
Ema tuseda puji tata epuani.

Tueda quema puji ebacua epuani. <sup>6</sup> Diusu ja Jesús ye mundo  
su beitutana su, pamapa ángel cuana cuatsasiatana  
Jesús pamitsutsuata huecuana puji. <sup>7</sup> Diusu sa ángel  
cuana jepuiti uja derejiji yani Diusu sa quirica su:

Diusu ja mesa ángel cuana beni, cuati utsu nime hus ataidha  
tu emebaja puji. <sup>8</sup> Diusu sa Ebacua Jesucristo da ene  
quita Diusu. Uja Diusu puidha Cristo jepuiti:

Mida da Diusu.

Mida da ecuatsasia epueni.

Butsepi neje mida ecuatsasia equeni.

<sup>9</sup> Pamapa ai saida, butsepi cuana miqueda tsada eni.

Pamapa ai madhada cuana miada jubida eduininibainia.

Da putsu, yama mi pia cuana ebia su nimebeidaji yame.

<sup>10</sup> Pia su uja Diusu puidha Cristo jepuiti:

Mida da Echua Puji aida.

Miada ye mundo aidha.

Buepa di miada aidha.

<sup>11</sup> Beju tueda pamapa ai cuana etaitanapeta biame, mida daja  
hue yanienitiyu.

Tueda pamapa ai cuana ejud'uji edhi nime eputa.

<sup>12</sup> Tueda ai cuana miada etanuja ejud'uji pu cua nime.

Tueda ai cuana pamapa miada eturucepeyu etse pia ejud'uji  
neje jaturucati cua nime.

Mida mu daja hue yanienitiyu.

Aimue emanu mahue. <sup>13</sup> Daja huecha aimue Diusu ja quebata  
ángel uja ataidha mahue:

Aniuteque quema bai eni bene ema neje tupupai ecuatsasia  
epu puji, yama mi neje jamajaitiji cuana pishitiame  
putsu, mique eme su eicha teje.

Daja Diusu ja ataidha Cristo jepuiti bahui. <sup>14</sup> Pamapa ángel  
cuana da Diusu sa emebajaji cuana Diusu ja ebeitutani hue-  
cuana mundo su mesa d'oji su eputani cuana etsahua puji.

## 2

### *Id'abaeni taji Diusu sa ai quisa saida cuana*

<sup>1</sup> Beju Cristo huaraji aida ebainia putsu, ecuaneseda ebia  
su id'abaeni taji tu jepuiti ai quisa saida cuana, ecuaneda  
tusa jabuetsuati butsepi cuana jenetia ejeitid'u mahue puji.

<sup>2</sup> Biahua tiempo Diusu ja mesa ai quisa cuana cristiano cuana  
quisataidha ángel cuana jepuiti. Tueda quisa cuana da ene  
quita mimi Diusu ja bametaidha huecuana. Da su quebata  
ja ángel sa quisa aja mahue ataidha, Diusu ja tueda jubida  
matsetaidha. <sup>3</sup> Jiahue mu ebia su jubida quita Diusu ja Cristo

jepuiti quisa saida id'abaja mahue yatani cuana ematsetayu. Equene Echua Puji Jesucristo ja quitaita tueda quisa saida cuana cristiano cuana quisapirutana. Da su beju tu id'abaji cuana ja di ecuanaju quisatana. <sup>4</sup> Diusu ja ai nimetiuda cuana atana cristiano cuana tueda quisa saida su jei paputa puji. Espíritu Santo di ecuanaju tiatana. Tuahueda mesa tsapiapiati jatiati ai cuana ecuanaju tiatana, cuaja mesa tsada batame, cristiano cuana tueda quisa saida ene quita ebame puji.

*Jesucristo da ecuana sa Ehuidusuji*

<sup>5</sup> Beju Diusu ja ye yahua eichacua yatayu. Aimue ángel cuana tueda yahua eichacua su ecuatsasia eputa mahue. Jesucristo bahui ecuatsasia epu. <sup>6</sup> Diusu sa quirica su uja derejiji epuani tueda ai cuana jepuiti:

¿Jucuaja su ni da Diusu ja cristiano cuana ebia su ibuneda ebatani?

¿Jucuaja puji tuna jepuiti ebia su epibajucuatiani?

<sup>7</sup> Angel cuana sa chidi puji cristiano cuana ichataidha quejucua tiempo puji.

Beju daja biame, Diusu ja mesa dharejiji cristiano cuana huaraji aida, tucheda atana.

<sup>8</sup> Pamapa ajiji cuana tuna ema su ichaenitana.

Diusu ja pamapa ai cuana emetse ichatana huecuana. Daja biame, jiahue mu aimue pamapa ai cuana tuna ema su yani mahue tsuhu ebatani. <sup>9</sup> Mepibatija Jesús peje su. Tueda da Diusu biame, ye mundo su deja bataji puana. Diusu ja tueda ángel cuana sa chidi puji ichatana quejucua tiempo puji. Diusu sa tsada puana Cristo pamanu puji pamapa cristiano cuana sa eturuca, ebia su ibuneda ebatani huecuana putsu. Jianhue beju Cristo eid'e yani cielo su. Tata Diusu ja Jesús pamapa pia cuana ebia su huaraji aida atana, curusu su manuana putsu.

<sup>10</sup> Diusu ja pamapa ai cuana ataidha tuseda cama papu puji. Tuahueda pamapa ai cuana yasemetani. Tuseda tsada pamapa mesa ebacua dharejiji cuana, Cristo neje cielo su cama paanitita puji. Da putsu, Diusu ja Cristo curusu su sufri ametana. Da neje Diusu ja Cristo tuna D'ejí su Aji atana.

<sup>11</sup> Beju Jesucristo sa Tata Diusu da ecuaneseda di Tata Diusu epuani, Jesús ja ecuana tu peje su nimebutsepi atana putsu. Da putsu, Jesús aimue ebidhuani mahue ecuana neje edue yati puji. <sup>12</sup> Uja Diusu sa Ebacua Jesucristo puidha Diusu sa quirica derejiji su:

Tata Diusu, ema quema edue cuana peje su mi jepuiti saida emimi.

Tuna duju su satsu neje yama mi emitsutsua. <sup>13</sup> Uja Cristo pia puidha Diusu sa quirica su derejiji yani:

Ema Tata Diusu peje su enimetucheati.

Neicha uja Cristo pia puidha Diusu sa quirica su derejiji yani: Hue ema upia yani Diusu ja ema tiatana edue cuana neje.

<sup>14</sup> Beju Jesús da deja quitaji bataji puana ecuana nime epu puji. Daja bataji puana tueda equita neje emanu puji. Manu putsu, beju Ishahua sa tucheda apeenitana, Ishahua da emanu emetse puina biame. <sup>15</sup> Emanu puji ebia su iyume eputani cuana Cristo ja d'ejí su atana, tueda id'eibana putsu. <sup>16</sup> Bahue ecuaneda aimue Cristo pueana ángel cuana etsahua puji mahue. Abraham chenu sa familia jenetia deja bataji puana cristiano cuana bahui etsahua puji. <sup>17</sup> Daja etsahua huecuana puji Cristo sa bataji pu taji puana tuna nime deja quitame. Tuna nime pu putsu, beju tuna sa sacerdote puji puana tuneseda puji ibuneda neje Tata Diusu daja hue ebajadera puji. Deja equita pu putsu, Cristo quitaita curusu su jairutsuatiana Diusu peje su tuna sa jucha cuana echujetia puji. <sup>18</sup> Da su beju jiahue Cristo ja Ishahua ja epirubatani cristiano cuana saida tsahuata cua, pamapa ai sufrimiento, Ishahua sa japirubati je jaitianana putsu.

### 3

#### *Cristo da Moisés chenu ebia su huaraji aida*

<sup>1</sup> Da su edue cuana, micuaneda da Diusu sa cielo su puji tuseda puji ichaderajiji putsu. Mepibaenitique Jesucristo peje su. Tueda da Diusu sa quisaquisa puji ecuana peje su. Daja huecha tuahueda ecuaneseda puji Tata Diusu ebajatani, cuaja biahua tiempo sacerdote cuana sa echua puji aida ja israelita cristiano cuana sa jucha cuana sa puji Diusu bajataidha nime. <sup>2-6</sup> Pamapa Diusu sa jacuatsasiati tu tiatana cuana tuahueda apetana. Tueda da Tata Diusu sa Ebacua quitaita atasaida. Tueda da Diusu ecuatsasiati emetse saida. Beju ecuaneda da tusa dharejiji cuana. Tata Diusu ja Jesús pamapa ai cuana ametaidha. Daja hue ecuaneda Diusu sa ene quita dharejiji cuana epuderati, ahua ecuaneda tu peje su jubida janimetucheati putsu, emanu teje beidaji neje tu peje su enimeid'uaderati su. Biahua tiempo Moisés chenu ja Tata Diusu ja cuatsasiataidha cuana apetaidha. Moisés chenu da emebajaji hue puidha Diusu ecuatsasiati su. Saida neje Diusu meabajataidha. Tueda da cuaja ai cuana epu quisa puidha. Daja biame, Jesús mu da Moisés chenu ebia su aida, tueda da Diusu sa Ebacua putsu.

*Diusu ja mesa dharejiji cristiano cuana ejanahuameta*

<sup>7</sup> Da su edue cuana, merejatique. Espíritu Santo sa mimi cuana Diusu sa quirica su uja derejiji yani:

Jiahue ahua micuaneda quema ai quisa saida cuana eid'aba su, atasaida mepuque tueda quisa saida cuana su.

<sup>8</sup> Be nimetadada mepuji ema peje su micuana sa tata chenu cuana putaidha nime, ema jei aja mahue ataidha huecuana putsu.

D'anita yahua je jaitianaidha su, ema duiniametaidha huecuana, ema neje mimicuicuinataidha putsu.

<sup>9</sup> Dapia d'anita yahua su micuana sa tata chenu cuana ema neje janimetadadatitaidha pushi tunca mara puji, yama saida quinaidha huecuana biame.

<sup>10</sup> Da putsu, ema tuna neje jubida duininidha.

Uja ema puidha tuna jepuiti:

“Pamapa hora su jeitid'ujiji epuniuneti huecuana, quema edid'i saida je puniunetija mahue putsu.”

<sup>11</sup> Da putsu, ema tuna neje jubida duininidha.

Ema Diusu bahue puidha quema janahua yahua su be panubita mahue huecuana puji.

<sup>12</sup> Edue cuana, merejatique. Be quebata micuana duju su eid'e eni Diusu peje su muesumu tadada papu Diusu peje jenetia enetidera puji. <sup>13</sup> Beju pamapa tsine huamahuama menimetuheatique Diusu peje su d'eji yani tupu. Daja micuana sa pu taji jucha jepuiti muesumu tadada epu mahue puji. <sup>14</sup> Cuaja ecuaneda Diusu peje su jei pu putsu, saida janimetuheapirutiana nime, ahua daja hue emanu teje ecuaneseda Diusu peje su saida janimetuheaderati taji. Da su Cristo neje ecuaneda yanienitiyu cielo su. Dapia pamapa tusa ai cuana ecuaneseda di epueni.

<sup>15</sup> Uja Diusu epuani mesa quirica su:

Jiahue ahua micuaneda Diusu sa ai quisa saida cuana eid'aba su, atasaida mepuque tueda quisa saida cuana su.

Be nimetadada mepuji micuana sa tata chenu cuana putaidha nime, ema jei aja mahue ataidha huecuana putsu.

Daja putaidha putsu, ema duiniametaidha huecuana.

<sup>16</sup> Pamapa Egipto yahua jenetia Moisés chenu ja huidusutaidha cristiano cuana Diusu neje mimicuicuinataidha. Diusu sa quisa saida cuana id'abataidha huecuana biame, tu neje jubida mimicuicuinataidha. <sup>17</sup> Pushi tunca mara Diusu juchaji cuana neje duininidha. Da putsu, d'anita yahua su manutaidha huecuana. <sup>18</sup> Diusu ja Diusu bahue ataidha aimue mesa janahua yahua su panubita mahue huecuana puji, mesa quisa saida cuana su

jei puja mahue putaidha huecuana putsu. <sup>19</sup> Da su beju bahue ecuaneda mue nubi putaidha huecuana janahua yahua su, Diosu jei aja mahue ataidha huecuana putsu.

#### 4

<sup>1</sup> Beju jiahue teje Diosu ja pamapa ecuaneda eihuatani tu neje cielo su yanieniti puji. Da su merejati que piada piada micuaneda cielo mue teje ya, tusa quisa saida cuana su jei puja mahue, pu putsu. <sup>2</sup> Cuaja Diosu ja ecuaneda sa tata chenu cuana quisametaidha nime, jiahue ecuaneda mesa quisa saida cuana quisametana ecuaneda d'ejí su epu puji. Tuneda mue janahua yahua su nubi putaidha, Diosu jei aja mahue ataidha huecuana putsu. Be tuna nime mepuji. <sup>3</sup> Diosu jei yatani cuana bahui cielo su enubita. Jei aja mahue cuana aimue enubita mahue. Uja Diosu puidha tuna jepuiti:

Diosu bahue ema puidha quema janahua yahua su panubita huecuana mahue puji, ema duiniametaidha huecuana putsu. Beju daja Diosu ja ataidha huecuana, mundo ataidha jenetia tueda janahua yahua ataidha biame. <sup>4</sup> Sucuta tsine jenetia pamapa ai cuana Diosu ja apetaidha. Uja derejiji yani tueda ai cuana jepuiti:

Siete <sup>5-6</sup> tsine puji beju janahuaidha, pamapa ape putsu. Tuseda tsada pamapa su tu neje cielo su pajanahuatita puji. Beju piada piada cuana enubitayu tusa janahua eti jude su. Tata chenu cuana ja Diosu sa quisa saida cuana jei aja mahue ataidha putsu, aimue enubita mahue. Uja Diosu puidha:

Aimue quema janahua yahua su enubita huecuana mahue.

<sup>7</sup> Beju jiahue di cristiano cuana eihuatani cielo su panubita puji. Uja echua puji David chenu puidha Diosu sa quirica su derejiji yani:

Ahua jiahue miada Diosu ja mi eihuatani eid'abainia su, be muesumu tadada puji. <sup>8</sup> Beju biahua tiempo Josué chenu ja tata chenu cuana Diosu sa janahua yahua su huidusutaidha. Diosu mu pia janahua eti jude jepuiti mimiana. Tueda eti jude da cielo epuani. <sup>9</sup> Da su Diosu sa dharejiji cristiano cuana cielo su enubi puji enimeid'uatitani. <sup>10</sup> Cuaja Diosu janahuaidha mudu ape putsu nime, daja huecha tusa dharejiji cristiano cuana cielo su enubitayu ejanahua puji, tuna sa mudu ye mundo su ape putsu. <sup>11</sup> Da su Diosu sa quisa saida cuana daja hue jei paaderatija cielo su enubi puji. Be tata chenu cuana putaidha nime mepuja. Aimue Diosu sa janahua yahua su nubitaidha huecuana mahue, Diosu jei aja mahue putaidha huecuana putsu.

<sup>12</sup> Beju Diusu sa quisa saida cuana da eid'e, tucheda, espada bubeta queuda nime. Cuaja espada equita su enubiani nime, daja Diusu sa quisa saida cuana enime su enubiani. Tueda quisa saida cuana ja pamapa cristiano cuana sa piba madhada cuana ebametani. <sup>13</sup> Diusu butse su mue ai biame rubuajiji. Tuahueda d'ejí su cama ebapetani. Tu butse su pamapa cristiano cuana sa jajeutsuti taji.

*Jesús da ecuana sa sacerdote aida. Diusu ecuaneseda puji ebajatani*

<sup>14</sup> Diusu sa Ebacua Jesucristo da ecuana sa sacerdote aida. Beju cielo su putiana. Diusu butse su yani ecuaneseda puji Diusu ebaja puji. Da putsu, tu peje su ecuaneseda ebia su janimetuchteati taji. <sup>15</sup> Tueda Jesucristo ja quitaita eshanapaenitani pamapa ecuana sa sufrimiento cuana, tueda di sufri puana putsu, ye mundo su quitaji anina su. Cuaja Ishahua ja ecuana epirubatani eshanapatani, tueda di Ishahua ja pirubatana putsu. Daja Ishahua ja pirubatana biame, aimue Jesús ja jucha atana mahue. <sup>16</sup> Da su beju pamapa muesumu neje Diusu peje su menariatija tuahueda ecuana meibunebataja puji, daja huecha ecuaneda tsahuataja epuani su, metsahuataja puji.

## 5

<sup>1</sup> Beju sacerdote cuana sa echua puji aida deja cuana duju jenetia Diusu ja edharetani. Tuahueda Diusu ebajatani cristiano cuana sa puji. Ai eirutsuaji cuana Diusu peje su eirutsuatani. Animalo manuamejiji cuana altar bia su Diusu peje su eirutsuatani cristiano cuana sa jucha cuana sa puji. <sup>2</sup> Cristiano cuana paciencia neje ebatani, tueda tuna nime deja tucheda mahue epuani putsu. <sup>3</sup> Tueda da deja juchaji epuani putsu, mesa jucha quitaita cuana jepuiti equene Diusu peje su irutsua taji. Da su beju cristiano cuana sa jucha cuana jepuiti di Diusu peje su irutsuata cua.

<sup>4</sup> Aimue detse aidhe deja biame mesa piba quitaita sacerdote aida puji tu mehua jaichati cua mahue. Diusu ja bahui sacerdote aida puji edharetani. Daja Diusu ja Aarón chenu dharetaidha. <sup>5</sup> Daja huecha Cristo. Aimue tusa piba quitaita sacerdote aida puji jaichatiana mahue. Diusu ja Cristo sacerdote aida ichatana. Uja Diusu puidha mesa quirica su: Mida da quema Ebacua.

Beju ema da mique Tata. <sup>6</sup> Neicha uja Diusu pia puidha quirica su:

Mida da sacerdote epueni Melquisedec puidha nime. <sup>7</sup> Beju Cristo ye mundo su puniunetina su, Diusu jubida bajatana tuana neje, mimi jubida neje Diusu ja tueda



manujiji cuana duju jenetia panetianametayu puji. Da su Diusu ja id'aba putsu, Cristo netianametaibana, Diusu peje su jubida jamenajatiatiana putsu. <sup>8</sup> Cristo da Diusu sa Ebacua biame, Tata Diusu jei ya puji jabuetsuatiana. Diusu sa tsada puana Cristo sufri papu puji. Beju Cristo ja Diusu jei apetana, tueda sufrimiento cuana su jamenajatiatiana putsu. <sup>9</sup> Tueda ai sufrimiento cuana ape putsu, pamapa Cristo jei yatani cuana sa D'ejí su Jaatiji puana tuna d'ejí su yaeni puji. <sup>10</sup> Diusu ja Cristo sacerdote aida ichaenitana Melquisedec puidha nime.

### *Rejada saida Diusu peje jenetia enetidera puji*

<sup>11</sup> Beju ebia su yama micuana quisaja tueda ai cuana jepuiti biame, cuaja quisa taji mahue ebainia micuaneda, cuaja shanapaeni taji mahue ebainia putsu. <sup>12</sup> Micuaneseda Diusu sa ai cuana su bahue eni pu taji dhahua biame, micuaneda yanana nime epuani. Micuaneseda pia cuana buetsua taji biame, quema puji jiahue teje micuana buetsua taji. Diusu sa atadhada jabuetsuati cuana su tupu mahue micuana sa piba cuana. Atasaida jabuetsuati cuana bahui eshanapainia. <sup>13</sup> Quebata ja Diusu sa atasaida jabuetsuati cuana bahui eshanapatani, tueda da tupu mahue Diusu sa atadhada jabuetsuati cuana eshanapa puji. <sup>14</sup> Quebata ja mu Diusu sa atadhada jabuetsuati cuana eshanapaenitani, tuahueda ebutsenetani ai madhada cuana, ai saida cuana neje, ai saida bahui su epuniuneti puji.

## 6

<sup>1-2</sup> Da su beju ehui su meputique

Cristo jepuiti jabuetsuati cuana su. Micuaneda Cristo jepuiti equene jabuetsuati cuana beju eshanapainia. Jiahue mebuetsuatique Cristo jepuiti atadhada jabuetsuati cuana. Be neicha equene jabuetsuati cuana meaji. Beju micuaneda Diusu peje su japibaturucatia micuana sa ai puiti madhada jenetia. Micuaneda jei epuani Diusu ja manujiji cuana enetianametayu. Daja huecha tuahueda pamapa cristiano cuana ejuzgaenitayu jei epuani. Beju bahue micuaneda cuaja jarucuati taji Diusu emebaja puji, daja huecha eme echua bia su huana putsu, eibuneba puji. Tueda ai puiti cuana micuaneda eshanapainia. <sup>3</sup> Jiahue beju ehui su meputique Cristo jepuiti jabuetsuati atadhada cuana su. Tueda micuaneda ape cua Diusu sa jatsahuati neje.

<sup>4-5</sup> Ahua quebata ja Cristo jepuiti quisa saida cuana eid'abatani su, daja huecha Diusu ja ai saida cuana etiatani, Espíritu Santo, Diusu sa mimi, mesa ai nimetiuda yatani

cuana, mesa ecuatsasiati aida epusiu shanapa putsu biame, Cristo peje su jei puja mahue epuani su, aimue detse tueda d'oji su pu cua mahue, Diosu sa quisa saida cuana ichaderatana putsu. <sup>6</sup> Ahua daja epu su, da su Cristo curusu su neicha tata cua pu cua nime. Cristiano cuana butse su Cristo neje jashishati cua pu cua nime, tusa quisa saida cuana eichaderatani putsu. <sup>7</sup> Beju tueda ai cuana da Diosu ja nai edajajametani yahua cuana bia su nime. Te cuana saida jajaji eputani su, emetse cuana nimebeidaji eputani. <sup>8</sup> Jaja mahue, ahua aquid'a, id'ene madhada cama emurutani su, emetse cuana aimue nimebeidaji eputani mahue. Tueda aquid'a, id'ene madhada cuana da ed'ed'a puji bahui. Daja da Diosu sa quisa saida cuana eichaderatani cuana eputani. Diosu tsada mahue eputani huecuana biame, Diosu ja tuna bia su mesa jaibunebati cuana edajajametani nai nime. Daja biame, ahua daja hue Diosu tsada mahue epuderatani huecuana su, Diosu ja cuati castigo su beituta cua huecuana.

*Ecuana da Diosu peje su nimetucheda epu, ahua tu peje su enimeid'uati su*

<sup>9</sup> Ibuneda edue cuana, yama micuana ye quirica su daja equisameinia biame, bahue ema aimue micuaneda Diosu sa jabuetsuati butsepi cuana daja eichadera mahue. Bahue ema micuaneda d'oji su epu. <sup>10</sup> Beju Diosu da butsepi. Aimue tueda micuana sa ai saida ajiji cuana esetata mahue. Micuaneda edue cuana ibuneda neje tsahuana aimue esetata mahue. Jiahue teje micuaneda edue cuana daja hue etsahuainia. <sup>11</sup> Beju quema tsada epuani pamapa micuaneda daja hue mepuderaniunetique emanu teje. Daja a putsu, Diosu neje cielo su yanienitiyu micuaneda bahue. <sup>12</sup> Be tunada mepuji Diosu sa ai cuana tije ya puji. Cuaja pia cuana paciencia, janimetucheati neje cielo su cuinatitana nime, daja mepuque.

<sup>13</sup> Diosu ja mesa jamitsuti Abraham chenu tiataidha su, mesa ebani neje Diosu bahue puidha, aimue pia tu ebia su aida anidha mahue putsu. <sup>14</sup> Uja Diosu ja Abraham chenu ataidha: "Yama mi ebia su eibuneba. Mique ebacua cuana ebia su eyapacameyu." <sup>15</sup> Da su Abraham chenu ja paciencia neje Diosu id'uataidha. Daja id'ua putsu, inatsutaidha Diosu ja tueda jamitsuti tiataidha ai cuana. <sup>16</sup> Cristiano cuana da Diosu bahue eputani pia ebani aida su mecuana sa jamitsuti chujeji papu puji. Da neje pamapa jacuicuinati cuana epupeni. <sup>17</sup> Daja Diosu ja Diosu bahue neje Abraham chenu mesa jamitsuti tiataidha. Daja Diosu ataidha Abraham sa epusiu ebacua cuana ja pashanapata puji Diosu ja mesa jamitsuti cuana yatayu. <sup>18</sup> Aimue Diosu bid'umimi puji mahue. Mesa

jamitsuti Abraham chenu neje yatayu, tueda Diusu bahue puidha putsu. Da su ecuaneda Diusu peje su janimetuchteati cua d'ejí su epu puji, aimue detse Diusu bid'umimi pu cua mahue putsu. Pamapa mesa jamitsuti cuana ecuana neje beju yatayu. <sup>19</sup> Da su ecuaneda nimetucheda epuani, ecuana sa janimetuchteati cuana Jesús peje su yani putsu, tuahueda ecuana cielo jenetia ebaenitani. <sup>20</sup> Dapia Diusu butse su ecuana equene putiana ecuaneseda Diusu ebaja puji, tueda da ecuana sa sacerdote aida eni putsu Melquisedec puidha nime.

## 7

### *Melquisedec*

<sup>1</sup> Mepibaenitique Melquisedec chenu su. Tueda da Salem ejude sa echua puji aida puidha. Diusu aida sa sacerdote puidha. Biahua tiempo Abraham chenu, mesa soldado cuana neje echua puji madhada cuana manuamepe putsu, esiapatibeyu su, Melquisedec chenu ja tsutitaidha. “Diusu ja ibunebataque”, Abraham chenu ataidha. <sup>2</sup> Da su Abraham chenu ja echua puji madhada cuana jenetia jemitaidha ai cuana Melquisedec chenu piada diezmo tiataidha. Melquisedec chenu ebani da, “Salem ejude sa Echua Puji Nimebutsepi”, puidha. Tueda ejude su pamapa nimepijajajiji anitaidha. <sup>3</sup> Tata, cuara mahue bataji puidha. Cuaja shanapa taji mahue cuaja pupirume puidha. Cuaja shanapa taji mahue tusa bataji puidha tsine. Daja huecha cuaja manume puidha. Da su tueda da sacerdote epuani Diusu sa Ebacua Jesucristo nime.

<sup>4</sup> Mepibaenitique Melquisedec chenu su. Tueda da deja aida puidha putsu, ecuana sa tata Abraham chenu ja echua puji madhada cuana jenetia jemitaidha ai cuana piada diezmo tiataidha. <sup>5</sup> Beju Moisés chenu ja judío cristiano cuana uja cuatsasiataidha: “Pamapa Levi chenu sa familia jenetia sacerdote cuana diezmo tia taji tuna etsahua puji.” Daja Moisés chenu ja cuatsasiataidha patiata huecuana, sacerdote cuana Abraham chenu sa familia cuana jenetia putaidha biame. <sup>6</sup> Beju Melquisedec chenu da aimue Levi chenu sa familia jenetia mahue biame, diezmo inatsutaidha. Da putsu, Melquisedec chenu ja Abraham chenu: “Diusu ja ibunebaque”, ataidha. <sup>7</sup> Daja Melquisedec chenu ja Abraham chenu ataidha tueda Abraham chenu ebia su aida puidha putsu, Diusu ja Abraham chenu bahui mesa jamitsuti tiataidha biame. <sup>8</sup> Sacerdote cuana da deja emanu cuana biame, diezmo einatsutani huecuana cristiano cuana peje jenetia. Melquisedec chenu ja mu deja emanu mahue nime

putsu, diezmo inatsutaidha Abraham chenu jenetia. <sup>9-10</sup> Beju sacerdote cuana da Levi chenu sa familia jenetia. Tuneda diezmo cuana inatsutaidha cristiano cuana peje jenetia. Levi chenu da Abraham chenu jenetia bataji puidha. Da su Abraham chenu ja Melquisedec chenu diezmo tiataidha su, Levi chenu di tia cua pu cua nime diezmo tiame ataidha, bataji puji mahue biame, Abraham chenu da Levi chenu sa tata chenu puidha putsu.

<sup>11</sup> Levi chenu, pamapa sacerdote cuana di Aarón chenu sa familia jenetia. Tuneda Moisés chenu sa jacuatsasiati cuana israelita cuana tiataidha. Aimue tueda sacerdote cuana ja jacuatsasiati neje cristiano cuana saida, nimebutsepi Diusu peje su ataidha mahue. Da putsu, pia sacerdote Melquisedec chenu nime jatsatidha cristiano cuana Diusu peje su saida, nimebutsepi yameta puji. <sup>12</sup> Beju sacerdote cuana eturucati su, jacuatsasiati cuana sa di jaturucati taji. <sup>13-14</sup> Equene sacerdote cuana da Levi chenu sa familia jenetia bahui dharejiji puina. Tuneda Diusu peje su irutsuataidha cristiano cuana sa puji. Jiahue mu Echua Puji Jesucristo ecuana sa sacerdote aida eichacua. Diusu ja tueda sacerdote ichatana, tueda Judá chenu sa familia jenetia biame.

<sup>15-16</sup> Beju tueda da sacerdote aida Melquisedec chenu nime. Aimue Levi chenu sa familia jenetia mahue. Pamapa Levi chenu sa familia jenetia sacerdote cuana emanutani. Cristo mu aimue emanu mahue. Da putsu, Diusu ja tueda sacerdote aida ichataidha Melquisedec chenu nime. <sup>17</sup> Uja Diusu puidha Cristo jepuiti:

Mida da sacerdote epueni Melquisedec puidha nime. <sup>18</sup> Da su Moisés chenu sa jacuatsasiati cuana Diusu ja apemetana, tueda jacuatsasiati cuana ja cristiano cuana cuaja d'ejí su a taji mahue batana putsu. <sup>19</sup> Tueda jacuatsasiati cuana ja aimue aidhe biame nimebutsepi atana mahue. Tueda jacuatsasiati cuana sa eturuca jiahue mu ecuana sa ebia su saida janimeid'uati yani. Jiahue ecuaneda Diusu peje su enariati Jesucristo jepuiti.

<sup>20-21</sup> Biahua tiempo sacerdote cuana aimue Diusu bahue neje ichajiji putaidha mahue. Tuneda sacerdote putaidha, Levi chenu sa familia jenetia hue putsu. Jiahue mu beju Diusu ja Cristo sacerdote ichatana Diusu bahue neje. Uja Diusu sa quirica su derejiji yani:

Uja Diusu Diusu bahue puidha putsu, aimue detse aiya biame turucata cua mahue:

“Mida da sacerdote epueni Melquisedec puidha nime.”

<sup>22</sup> Daja Diusu Diusu bahue puidha putsu, Jesucristo ja

ecuana Diosu peje su, nimebutsepi ata cua pia equene sacerdote ebia su saida. <sup>23</sup> Equene sacerdote cuana da tisutisu manutaidha. Da putsu, anitaidha jucuada. <sup>24</sup> Jiahue mu aimue daja mahue Jesús neje. Tueda emanu mahue putsu, aimue pia ja tueda eturucata mahue. <sup>25</sup> Da putsu, cristiano cuana d'ejí su ata cua. Quebata cuana Cristo jepuiti Diosu peje su enariatita su, d'ejí su eputa. Beju Cristo ja tuneseda puji Diosu pamapa hora su ebajatani, eid'e eni putsu.

<sup>26</sup> Da su Jesucristo da ecuana tsana sacerdote aida. Tueda da nimebutsepi, ai madhada jucha mahue. Juchaji cuana peje jenetia ichaderajiji yani. Tueda cielo su yani pamapa ai cuana ebia su aida. <sup>27</sup> Aimue tueda pia equene sacerdote aida nime mahue. Aimue tuseda animalo cuana manuame taji puina mahue Diosu peje su eirutsua puji. Pia equene sacerdote cuana ja tuna sa jucha quitaita sa puji Diosu peje su manujiji animalo cuana equene irutsuataidha. Da su beju pia cristiano cuana sa jucha cuana sa puji di irutsuataidha huecuana. Jesús ja mu piada nuati hue Diosu peje su tueda quitaita jairutsuatiana pamapa cristiano cuana sa jucha cuana sa puji. <sup>28</sup> Equene sacerdote aida cuana da deja juchaji cuana putaidha biame, sacerdote puji ataidha huecuana cuaja Moisés sa jacuatsasiati batame. Da su Diosu ja jacuatsasiati cuana apemetana, mesa Ebacua Jesucristo Diosu bahue neje sacerdote aida, eichacua, butsepi ichaenitana putsu.

## 8

### *Cristo da equene sacerdote cuana ebia su saida*

<sup>1</sup> Ibuneda edue cuana, meid'abaenique yama equisainia ai cuana. Beju ecuaneseda yani sacerdote aida cielo su Diosu sa bai eni bene yani. <sup>2</sup> Dapia cielo su Diosu ja ataidha iyuda ete su ecuaneseda puji Diosu ebajatani pamapa hora su. <sup>3</sup> Pamapa equene sacerdote cuana sa echua puji aida cuana Diosu peje su ai eirutsuaji cuana eirutsuatani. Da su beju Cristo sa di Diosu peje su irutsua taji puina. <sup>4</sup> Cristo ahua ye mundo su ani cua hue su, aimue detse sacerdote pu cua mahue, sacerdote cuana yani hue putsu. Tueda sacerdote cuana ja daja hue Diosu eirutsuaderatani, cuaja Moisés chenu sa jacuatsasiati puidha batame. <sup>5</sup> Tueda sacerdote sa Diosu peje su eirutsuaji mudu cuana da aimue ene quita mahue. Yahua su iyuda ete eti jude di aimue ene quita mahue. Beju ene quita iyuda ete eti jude da cielo su yani. Moisés ja yahua su iyuda ete eti jude aji mahue su, Diosu ja uja tueda cuatsasiataidha: "Yahua su di aque iyuda ete eti jude cielo su

yani eti jude nime cuaja mi yama emata su bameana nime.”  
<sup>6</sup> Beju Cristo sa Diosu peje su eirutsuaji mudu cuana da ene quita, sacerdote cuana sa ebia su saida. Tuahueda equene sacerdote cuana ebia su saida Diosu ebajatani ecuaneseda puji. Diosu ja tueda sacerdote aida, ebia su saida ichatana mesa jamitsuti eichacua neje. Uja Diosu sa jamitsuti eichacua epuani: Diosu ja cristiano cuana sa jucha cuana eperdonatayu Cristo jepuiti.

<sup>7</sup> Israelita cristiano cuana ja mecuana sa Diosu neje jamitsuti cuana aimue apetaidha mahue. Da putsu, Diosu ja pia jamitsuti eichacua tiataidha huecuana. <sup>8</sup> Diosu ja tueda israelita cristiano cuana nimebutsepi mahue bataidha. Uja tuna jepuiti Diosu puidha mesa quirica su:

Jiahue pia jamitsuti eichacua yama etia israelita cristiano cuana.

<sup>9</sup> Tata chenu cuana neje puidha jamitsuti nime epu mahue. Tueda equene jamitsuti yama tiaidha huecuana, yama Egipto yahua jenetia jemicuinaidha huecuana su.

Beju yama tiaidha jamitsuti cuana aimue apetaidha huecuana mahue.

Da putsu, yama setana huecuana.

<sup>10</sup> Neicha jamitsuti eichacua yama etiayu huecuana.

Da tiempo su yama quema jacuatsasiati cuana eshanapamepeyu huecuana.

Da su ema da tuna sa Diosu epu.

Daja huecha quema dharejiji cuana eputayu.

<sup>11</sup> Aimue tuneda cama huamahuama ema jepuiti jabuetsuati taji mahue, pamapa su ema eshanapaenita huecuana putsu.

Pamapa ai eni mahue, aida cuana ja ema eshanapaenitayu.

<sup>12</sup> Beju yama tuna sa ai madhada cuana eperdonayu.

Tuna sa jucha cuana dhipape putsu, aimue yama neicha epibayu mahue.

<sup>13</sup> Daja Diosu puidha mesa jamitsuti eichacua jepuiti. Equene jamitsuti eturucata jamitsuti eichacua neje, equene jamitsuti da tupu saida mahue putsu. Beju ai tupu saida mahue cuana da yapetayu.

## 9

### *Iyuda ete eti jude jepuiti quisa*

<sup>1</sup> Biahua tiempo equene sacerdote cuana ja iyuda ete eti jude ataidha dapia Diosu emitsutsua puji. <sup>2-4</sup> Tueda iyuda ete sa beta eti jude anidha. Equene eti jude da iyuda eti jude banime puidha. Dapia piada candelero, piada misha netidha. Misha bia su pan iyuda cuana anidha. Telón naja su piada altar oro jenetia ajiji netidha. Tueda altar da incienso tiume

jude puidha. Beju telón tibeini su pia eti jude anidha. Tueda eti jude banime iyuda saida eti jude. Dapia Diusu sa cacha nime oro neje dichujiji anidha. Tueda dume su piada emeji netidha oro jenetia ajiji. Tueda emeji manaji netina. Tueda cacha nime dume su Aarón chenu sa huara di badeina. Tueda huara Diusu ja equene huid'atametaidha Egipto yahua sa echua puji butse su, israelita cristiano cuana tueda yahua su anitaidha su. Tueda cacha nime dume su tumu pachata detse derejiji anina. <sup>5</sup> Beju cacha nime bia je Diusu sa querubín ángel detse eimea netina. Tuatse sa enabai neje cacha nime biapenetaidha. Tueda cacha nime bia jenetia sacerdote cuana ja eirutsuaji animalo sa ami Diusu peje su irutsuataina. Da neje Diusu bajatana cristiano cuana sa jucha cuana sa puji. Da teje hue yama jiahue micuana equisa ye ai cuana jepuiti.

<sup>6</sup> Beju daja hue yama micuana quisainiame yainia iyuda ete jepuiti. Sacerdote chenu cuana iyuda eti jude tisutisu nubitana tuna sa Diusu sa tsapiapiati mudu cuana ya puji. <sup>7</sup> Beju iyuda saida eti jude su mu sacerdote cuana sa echua puji aida bahui nubina. Piada mara su piada nuati bahui nubina animalo sa ami neje Diusu peje su eirutsua puji mesa jucha sa puji, daja huecha cristiano cuana sa puji. <sup>8</sup> Beju Espíritu Santo ja ecuana bahue yameenitani tueda ai cuana jepuiti. Bahue ecuaneda da tiempo su cristiano cuana cuaja Diusu yani su iyuda saida eti jude su cuinati taji mahue jabatitaidha. Equene iyuda eti jude teje bahui mecuana sa nubi taji puina, cuaja mecuana sa puiti batame. <sup>9</sup> Beju tueda ai cuana daja puidha ecuaneda ebuetsuati puji. Tueda Diusu peje su irutsuataidha cuana da aimue tupu saida mahue puina cristiano cuana d'ejí su ya puji. Daja hue irutsuataina huecuana biame, juchaji puderataidha huecuana. <sup>10</sup> Mecuana sa ai puiti bahui aderataina huecuana. Jana, eid'iji cuana irutsuataina huecuana. Daja huecha jarucuatitana huecuana, cuaja mecuana sa puiti batame. Daja huecuana Diusu ja pamapa ai cuana Cristo jepuiti turucatana teje.

<sup>11</sup> Jiahue beju Cristo pueana. Diusu sa jabuetsuati eichacua cuana ecuana sa buetsuataina. Jiahue tueda sacerdote aida cielo su iyuda ete su yani. Tueda cielo su iyuda ete da yahua su iyuda ete ebia su saida quita, aimue deja cuana sa jamuduti mahue putsu. <sup>12</sup> Cristo cielo su iyuda saida eti jude su nubiana. Aimue cabra, huaca deja janana cuana sa ami neje nubiana mahue. Tusa ami neje quitaita Diusu butse su piada nuati bahui nubiana tu eirutsua puji. Tueda ami neje ecuana d'ejí su aenitana. <sup>13</sup> Equene sacerdote cuana ja huaca deja, cabra janana cuana sa ami neje janid'umadhatitaidha cuana

biahuiretaina. Huaca epuna emud'u tiumepe putsu, sacerdote cuana ja etimu yahui neje huaru putsu, biahuiretaina. Daja a putsu, mecuana sa equita cuana saitiameyaiyuina. <sup>14</sup>Beju jiahue mu Cristo sa ami ebia su tucheda ecuana esaitia puji. Espíritu Santo sa tucheda neje Cristo Diusu peje su jairutsuatiana, jucha mahue putsu. Tusa ami neje ecuana sa enime esaitiametani. Da su beju jiahue ecuaneda eid'e eni Diusu baja cua jacuatsasiati cuana aji mahue.

<sup>15</sup>Cristo ja Diusu sa jamitsuti eichacua cuana ecuana sa puji apirutana. Diusu sa biahua tiempo dharejiji cuana beju cielo su cuinaenitita cua, cuaja Diusu ja jamitsuti eichacua tiatana batame. Jiahue Cristo manuana putsu, cielo su putita cua huecuana, mecuana sa Cristo manuji mahue su jucha ataidha cuana Diusu ja perdonatana putsu. <sup>16-17</sup>Beju etse emanuani su, etse sa ai cuana pia cuana sa puji eichajusiainia. Etse eid'e hue su, aimue detse aidhe biame etse sa ai cuana jametsenetita cua mahue. Daja da Cristo neje. Tusa manu jepuiti, Diusu ja ecuana mesa jaibunebati saida cuana etiatani. <sup>18</sup>Da putsu, equene sacerdote cuana ja animalo ami Diusu peje su irutsuatiana tusa equene jamitsuti tuna neje chujeji papu puji. <sup>19</sup>Moisés chenu ja Diusu sa jacuatsasiati cuana israelita cristiano cuana tiataidha su, huaca deja, cabra janana sa ami yahui neje huaru putsu, Diusu sa quirica bia su, cristiano cuana bia su di biahuiretaidha. Huapese nime dherena hisopo equi echa huitsana su icha putsu, ami su tsabiataidha. Da neje biahuiretaidha. <sup>20</sup>Daja biahuire putsu, Moisés chenu ja cristiano cuana uja ataidha: "Ye ami Diusu ja mesa jamitsuti ecuana etiatani. Daja huecha micuana sa jamitsuti Diusu etiaia." <sup>21</sup>Daja ape putsu, Moisés chenu ja iyuda ete eti jude ami yahui neje huarujiji biahuiretaidha. Daja huecha edume su ai cuana biahuiretaidha. <sup>22</sup>Cuaja ai puiti cuana batame, que chidi ai cuana ami neje esaitiamepecuetani. Ami d'uicha putsu bahui, Diusu ja jucha cuana perdonata cua. Ami d'uichajiji mahue su, aimue Diusu ja perdonata cua mahue.

*Cristo sa d'uichajiji ami neje jucha cuana Diusu ja edhipatani*

<sup>23</sup>Da su beju animalo cuana sa ami neje yahua su iyuda ete dume su ai cuana esaitiame puji tsada bataidha. Beju cielo su ene quita iyuda ete dume su ai cuana mu Cristo sa ami neje saitiyajiji, tueda ami da animalo cuana sa ami ebia su saida quita putsu. <sup>24</sup>Aimue Cristo yahua su iyuda saida eti jude su nubiana mahue. Cielo su iyuda saida eti jude quitaita su tusa ami quitaita neje nubiana Tata Diusu yani su ecuana sa puji tu ebaja puji. <sup>25-26</sup>Yahua su iyuda saida eti



jude su judío cuana sa sacerdote aida piada mara su piada nuati enubiani animalo sa ami Diusu peje su eirutsua puji. Daja biame, aimue Cristo sa equene jenetia quejucua nuati biame manu cua puina mahue. Tueda mu piada nuati hue jairutsuatiana Diusu peje su. Da su beju Diusu sa tsada hora cuinana su, Cristo piada nuati hue bataji puana ye mundo su emanu puji. Tueda quitaita curusu su piada nuati hue jairutsuatiana Diusu peje su ecuana sa jucha cuana sa puji. <sup>27</sup> Beju pamapa cristiano cuana sa piada nuati hue manu taji. Emanuta su, tuna sa ajiji ai cuana jepuiti Diusu ja equisabata huecuana. <sup>28</sup> Daja huecha Cristo piada nuati curusu su Diusu peje su jairutsuatiana ecuana sa jucha cuana edhipa puji. Da su beju neicha beta nuati puji epueicha tu eid'uatani cuana cielo su edusuyu puji, aimue jucha jepuiti neicha emanu puji mahue.

## 10

<sup>1</sup> Diusu ja mesa jacuatsasiati cuana israelita cuana tiataidha Cristo epue jepuiti ai quisa saida cuana tuna ebuetsua puji bahui. Beju tueda jacuatsasiati cuana a putsu, aimue Cristo sa ai saida cuana einatsuta huecuana mahue. Ed'eji su tueda pamapa mara Diusu peje su jairutsuati cuana ja aimue detse Diusu peje su nimebutsepi ata cua huecuana mahue. <sup>2</sup> Ahua tueda jairutsuati cuana ja cristiano cuana sa jucha cuana dhipataidha su, ¿jucuaaja puji ni da, da su pamapa mesa daja irutsuataidha huecuana? Ahua ene tueda jairutsuati cuana ja saitiataidha huecuana su, da su aimue detse juchaji jabatita cua puidha mahue. <sup>3</sup> Enei hue, tueda jairutsuati cuana ja pamapa mara cristiano cuana pibametaidha tuna sa jucha cuana jepuiti. <sup>4</sup> Beju animalo cuana sa ami ja aimue detse cristiano cuana sa jucha cuana dhipata cua mahue.

<sup>5</sup> Da putsu, Cristo ja ye mundo su pueana su, uja Tata Diusu atana:

Miqueda tsada mahue animalo manujiji jairutsuati cuana.

Miada ema equita tiana mi peje su ema eirutsuati puji.

<sup>6</sup> Miqueda tsada mahue animalo cuana pamanuameta huecuana.

Daja huecha animalo sa equita cuana patiumeta huecuana.

Aimue tueda ai cuana tupu saida mahue jucha cuana edhipape puji.

<sup>7</sup> Tata Diusu, hue ema upia mique tsada ya puji.

Da puji ema pueana.

Daja, mique quirica su derejiji yani ema jepuiti.

<sup>8</sup> Beju daja Cristo ja Tata Diusu ataidha. Diusu sa tsada mahue animalo manujiji jairutsuati cuana. Tsada mahue mesa animalo cuana sa equita tiamejiji jucha cuana edhipape puji.

Moisés chenu sa jacuatsasiati cuana ja daja ebuetsuatani biame, aimue tueda ai cuana tupu saida jucha cuana edhipape puji. <sup>9</sup> Mepibaenique Cristo ja Tata Diusu uja ataidha: “Tata Diusu, hue ema upia mique tsada ya puji.” Equene animalo manujiji jairutsuati cuana beju apemetana. Mesa equita quitaita jairutsuati putsu, tueda animalo jairutsuati cuana apemetana. <sup>10</sup> Da su Diusu ja jiahue ecuana mesa dharejiji cuana yatani, Cristo ja Diusu sa tsada atana putsu. Piada nuati hue tusa equita quitaita Diusu peje su curusu su irutsuatana ecuana sa jucha cuana edhipa puji.

<sup>11</sup> Pamapa sacerdote cuana ja pamapa tsine tueda animalo manujiji jairutsuati cuana atiyuatiyu ape bue mahue. Beju tueda jairutsuati cuana ja aimue jucha cuana edhipapetani mahue biame, daja hue atiyuatiyu eirutsuatani huecuana Diusu peje su. <sup>12</sup> Jesucristo mu piada nuati hue Diusu peje su jairutsuatiana cristiano cuana sa jucha cuana edhipape puji. Daja ape putsu, Tata Diusu sa bai eni bene cielo su aniteeniana Diusu neje tupupai ecuatsasia epu puji. <sup>13</sup> Dapia eid'uatani Diusu ja tu neje jamajaitiji cuana pishitiame putsu, tusa eme su eichata teje. <sup>14</sup> Piada jairutsuati neje bahui Cristo ja mesa dharejiji cristiano cuana nimebutsepiaenitana. <sup>15</sup> Espíritu Santo ja tueda ecuana eshanapameenitani. Uja tueda puidha Diusu sa quirica derejiji yani su:

<sup>16</sup> Neicha jamitsuti eichacua yama etiayu huecuana.

Da tiempo su yama quema jacuatsasiati cuana eshanapamepeyu huecuana.

<sup>17</sup> Beju tuna sa ai madhada cuana eperdonayu.

Tuna sa jucha cuana dhipape putsu, aimue yama neicha epibayu mahue.

<sup>18</sup> Da su Diusu ja cristiano cuana sa jucha cuana perdona putsu, aimue beju Diusu peje su irutsuaji cuana neicha irutsua taji pu cua mahue jucha cuana sa puji.

### *Diusu peje su ecuaneseda janariati taji*

<sup>19</sup> Da putsu, edue cuana, Diusu yani iyuda saida eti jude su iyuame mahue neje ecuaneda nubi cua Cristo sa ami jepuiti. <sup>20</sup> Mesa equita ecuana sa jucha cuana jepuiti Diusu peje su curusu su jairutsuatiana putsu, ecuaneda Diusu yani huacuinati cua. Ecuaneseda Diusu peje su ecuinahu edid'i eichacua yani. Jiahue aimue aiya biame ecuana nahuebata cua Diusu peje su enariati puji, eid'e eni Jesús ja ecuana Diusu peje su ecuinati puji etsahuatani putsu. <sup>21</sup> Da su edue cuana, menariatija Diusu peje su, ecuana sa sacerdote aida Jesús ja ecuaneseda puji Tata Diusu ebajatani putsu. <sup>22</sup> Da su beju pamapa muesumu butsepi neje menariatija. Tu peje su jubida menimetucheatija. Daja ecuaneda Diusu nariati cua,

Cristo ja mesa ami neje ecuana saitiatana putsu. Aimue beju ecuaneda juchaji jabati cua mahue. Cuaja equene cristiano cuana jarucuatitaidha Diusu meabajaji mahue su nime, daja Diusu ja ecuana Espiritu Santo tia putsu ecuana rucuatana tu saida emebaja puji. <sup>23</sup> Diusu ja mesa tiajiji jamitsuti eichacua cuana ecuana neje yapetayu putsu, be paichaderatija Cristo jepuiti jabuetsuati cuana pia jabuetsuati cuana tije ya puji. <sup>24</sup> Metsahuatija ecuaneda cama huamahuama ibuneda ebati puji, daja huecha ai saida cuana ya puji. <sup>25</sup> Da putsu, be mepuerijiji jadhitati hora cuana su, cuaja piada piada cuana eputani nime. Be tuna nime mepuji. Edhitatiani je, menime-tucheametija huamahuama, Echua Puji Jesucristo tipeida epue putsu.

<sup>26</sup> Ahua quebata ja Cristo sa jabuetsuati saida cuana shanapa putsu biame, ene quita piba neje eichaderata su, aimue detse tueda d'ejí su pu cua mahue, Cristo sa jabuetsuati saida cuana ichaderatana putsu. <sup>27</sup> Diusu ja tueda cuati castigo su ebeituenitayu pamapa Diusu neje jamajaitiji cuana neje tupupai. <sup>28</sup> Mepibaenitique Moisés chenu sa jacuatsasiati cuana su. Da tiempo su ahua quebata ja tueda jacuatsasiati cuana jei aja mahue yatani su, beta ahua quimisha etuaquisaji yani su, da su beju tuseda manu taji puidha, tu neje aimue ai jaibunebati mahue putsu. Daja epuani Moisés chenu sa jacuatsasiati cuana su. <sup>29</sup> Daja huecha Diusu ja mesa Ebacua eichaderatani cuana jubida ecastigaenitayu, tusa ami ai puji saida mahue nime ebatani huecuana putsu. Espiritu Santo eichaderatani huecuana putsu, Diusu sa jaibunebati cuana di eichaderatani huecuana. Da putsu, Diusu ja cuati castigo jubida neje ecastigaenitayu huecuana. Tueda Cristo sa d'uichajiji ami jepuiti Diusu ja mesa dharejiji cuana d'ejí su yatani, cuaja mesa jamitsuti eichacua cuana epuani batame. <sup>30</sup> Beju Diusu uja puidha mesa quirica derejiji yani su: “Quema puji bahui cristiano cuana castiga taji. Yama echujetia castigo neje.” Uja neicha mesa quirica su derejiji epuani: “Diusu ja mesa dharejiji cuana biame ejuzgatayu.” <sup>31</sup> ¡Aba, eid'e eni Diusu ja ecastigatani cuana!

<sup>32</sup> Mepibaenitique micuaneda equene Diusu sa quisa saida cuana id'abapiruana su. Da tiempo su cristiano cuana ja micuana duininibapirutana. Micuana sufri apirutana huecuana biame, paciencia neje micuaneda tucheana. <sup>33</sup> Piada piada cuana micuana neje jashishatiana. Daja huecha micuana ichetana huecuana pamapa cristiano cuana butse su. Piada piada micuana aimue daja sufri ametana huecuana mahue biame, micuaneda pia sufri yametani edue cuana ba putsu, tsahuana huecuana. <sup>34</sup> Daja huecha teri-

jiji cuana micuaneda tsahuana. Cristiano madhada cuana ja micuana sa ai cuana mejemitana biame, beidaji neje micuaneda tucheara, micuana sa cielo su ebia su saida eni ai cuana aimue micuana aiya biame emetsita mahue, micuaneda bahue putsu. <sup>35</sup> Da su menimetuheaderatique Echua Puji peje su. Be meichaderaji tueda janimetucheati cuana. Ahua micuaneda daja hue enimetuheaderati su, cielo su micuaneda ecuinati. <sup>36</sup> Ahua daja hue enimetuheaderati su, micuaneda Diosu sa ai tsada cuana yape. Ahua daja micuaneda ya su, Diosu ja micuana pamapa mesa jamitsuti ai saida cuana etiatayu. <sup>37</sup> Beju uja derejiji yani Diosu sa quirica su:

Hua chidi hue beju Diosu sa Jabeituti Deja epue puji.

Aimue etsunuta mahue beju.

<sup>38</sup> Quebata ema peje su enimetucheati su, tueda yama saida ebatsu.

Tusa ema peje su janimetucheati jepuiti eid'e yanieniti.

Ahua cristiano madhada cuana iyuba putsu, ema peje su enimetuhearijiti su, da su aimue ema tu neje beidaji epu mahue.

<sup>39</sup> Beju ecuaneda mu aimue daja mahue. Aimue ecuaneda Diosu sa castigo su eputita cuana nime mahue. Beju ecuaneda Diosu peje su enimetuheatiani putsu, d'oji su epueni.

## 11

*Cuaja tata chenu cuana Diosu peje su janimetuheatitaidha nime, daja ecuaneseda di janimetucheati taji*

<sup>1</sup> Bahue ecuaneda eid'uainia ai cuana Diosu ja ecuanetaiatayu, tu peje su ecuaneda enimetuheatiani putsu. Tueda janimetucheati neje cielo jenetia ai bataji mahue cuana da ene quita ecuaneda eshanapaeninia. <sup>2</sup> Ecuanetaiatayu sa tata chenu cuana Diosu peje su janimetuheatitaidha putsu, Diosu ja tsabataidha huecuana.

<sup>3</sup> Janimetucheati jepuiti bahue ecuaneda Diosu ja pamapa mundo ataidha mesa mimi tucheda jepuiti. Pamapa ai ajiji ecuaneda ebainia cuana, bataji mahue jenetia bataji puidha.

### *Abel*

<sup>4</sup> Janimetucheati jepuiti Abel chenu sa Diosu peje su jairutsuati cuana Caín chenu sa ebia su saida quita puidha. Da putsu, Diosu ja Abel chenu tsabataidha. Tusa jairutsuati cuana jepuiti Diosu ja tueda nimebutsepi bataidha. Abel chenu da manujiji biame, cuaja tueda eid'e hora su Diosu peje su janimetuheatidha nime, daja jiahue ecuaneseda di janimetucheati taji.

*Enoc*

<sup>5</sup> Janimetucheati jepuiti Enoc chenu Diusu ja cielo su eid'e dusutsuatitaidha, Enoc chenu ja Diusu beidaji ametaidha putsu, ye mundo su anidha su. Beju cristiano cuana ja Enoc chenu mue tejeju ataidha. <sup>6</sup> Ahua etse Diusu peje su aimue enimetucheatiani mahue su, aimue detse etse Diusu beidaji ame cua mahue. Ahua etse Diusu nariaja su, equene jei pu taji Diusu eid'e yani. Daja huecha jei pu taji Diusu ja tu echacutani cristiano cuana mesa ai saida cuana etiatayu.

*Noé*

<sup>7</sup> Biahua tiempo Diusu ja Noé chenu a neje ye mundo ebieterita quisataidha. Ena neje ye mundo biateriji mahue su, Noé chenu janimetucheati jepuiti Diusu quisa su jei puidha. Beju Diusu jei ataidha. Barco aida ataidha mesa familia cuana d'eji su ya puji. Pamapa pia cristiano cuana huidipetaidha, jei puja mahue putaidha huecuana putsu. Beju Diusu ja Noé chenu nimebutsepi bataidha, tu peje su janimetucheatidha putsu.

*Abraham*

<sup>8</sup> Janimetucheati jepuiti Abraham chenu ja Diusu jei ataidha, Diusu ja tueda ihuatana su. Beju cuinanaidha mesa yahua jenetia Diusu ja etiata yahua su. Quepia tueda yahua shanapaji mahue cuinana puidha. <sup>9</sup> Aimue mesa ani jude anidha mahue biame, janimetucheati jepuiti tueda tiajiji yahua je Abraham chenu puniunetidha yahua emetse mahue nime. Da putsu, carpa ete su bahui anidha. Daja huecha Isaac, Jacob chenu detse puniunetidha. Diusu ja tuatseda Abraham chenu neje tupupai tueda yahua tiataidha. <sup>10</sup> Beju Abraham chenu da Diusu sa ejude cielo su eputi puji janimeid'uatidha. Tueda ejude da Diusu ja quitaita ataidha.

*Sara*

<sup>11</sup> Janimetucheati jepuiti Sara chenu punatia eni biame, bacuaji puidha, cuaja Diusu ja tueda quisataidha batame. Beju mesa piada ebacua bataji puidha, Sara ja Diusu sa jamitsuti jei puidha putsu. <sup>12</sup> Da su Abraham chenu ebia su edhi eni putsu, cuaja bacuaji pu taji mahue biame, bacuaji puidha. Da jenetia jiahue teje tusa familia cuana ebia su jajucuatitaidha. Atujai nime jucudame epuani jiahue. Ena sa jutujutuji nime jucudame epuani. Beju cuaja idadape taji mahue huecuana.

<sup>13</sup> Pamapa tuneda Diusu peje su enimetucheatiani je, manupetaidha. Ye mundo emetse mahue cuana nime puniunetidha huecuana. Ye mundo su eid'e anitaidha su, aimue inatsupetaidha mahue Diusu sa jamitsuti ai saida cuana. Da putsu, ye mundo su mue inatsu ataidha huecuana

biame, manutaidha huecuana Diusu peje su enimetucheati je, Diusu ja cielo su pamapa ai saida cuana etiatayu huecuana bahue putaidha putsu. <sup>14</sup> Tuneda daja puniuneti putsu, pia yahua saida chacutana jabametitaidha huecuana. <sup>15</sup> Jasiapatiyuja mahue tuna cuinanataidha yahua su. <sup>16</sup> Cielo bahui chacuenitaidha huecuana yanieniti puji. Da putsu, aimue Diusu bidhuidha mahue tuna sa Diusu epu puji. Piada ejude basetataidha tuneseda puji.

<sup>17</sup> Abraham chenu Diusu peje su janimeid'uatidha, Diusu ja tueda abataidha su. Diusu ja Abraham tusa ebacua manuame putsu, pairutsuata cuatsasiataidha. Da su janimetucheati jepuiti Abraham chenu ja Isaac dusutaidha emanuame puji, Diusu peje su eirutsua puji, Isaac dueji bacuame epu jamitsuti Diusu ja tiataidha biame. <sup>18</sup> Uja Diusu ja Abraham chenu, "Isaac jepuiti mique familia ebia su ejucuati", ataidha biame, Abraham chenu ja Diusu jei ataidha. Diusu ja, "Mique ebacua Isaac manuameque", ataidha su. <sup>19</sup> Abraham chenu iyuame mahue puidha mesa ebacua Isaac emanuame puji, Diusu peje su jubida janimetucheatidha Diusu ja Isaac eid'emetayu putsu. Da su Abraham chenu ja mesa ebacua emanuame quitaita su, Diusu ja, "Be daja aji", ataidha. Daja biame, Abraham ja Isaac manuametaidha pu cua nime. Daja huecha Abraham chenu ja mesa ebacua Isaac manujiji cuana duju jenetia neicha eid'e batsutaidha pu cua nime.

### *Isaac, Jacob, Josué cuana*

<sup>20</sup> Janimetucheati jepuiti Isaac chenu ja Jacob, Esaú chenu detse ibunebataidha uja: "Cuaja ema Diusu ja mesa jamitsuti tiataidha nime, daja metseda di metiataque." <sup>21</sup> Janimetucheati jepuiti Jacob chenu ja emanu quitaita su, José sa ebacua cuana ibunebataidha. Diusu mitsutsuataidha mesa eituneji su tud'inetiti putsu. <sup>22</sup> Janimetucheati jepuiti José chenu beju emanu quitaita su, "Israelita cristiano cuana Egipto yahua jenetia ecuinanatayu", puidha. Cuatsasiataidha huecuana mesa etsau cuana padusuta huecuana Diusu ja jamitsuti tiataidha yahua su papapata huecuana puji.

### *Moisés*

<sup>23</sup> Moisés chenu bataji puidha su, mesa tata detse ja janimetucheati jepuiti rubuataidha quimisha badi puji. Daja ataidha tse, Moisés yanana ebia su ania chidi bataji puidha putsu. Echua puji ja pamapa judío cuana sa yanana deja chidi cuana pamanuameta jacuatsasiataidha biame, aimue iyuba ataidha tse. Da putsu, rubuataidha tse Moisés yanana chidi. <sup>24</sup> Beju Moisés chenu deja puidha su, aimue beju echua puji sa utsecua puja mahue puidha. <sup>25</sup> Tsada mahue mesa puidha

Egipto yahua su chipiluji huaraji epu puji, tueda ai cuana ja juchaji ameta cua putsu. Tuseda tsada puidha Diusu sa israelita cristiano cuana neje eduneti puji, tuna neje tupupai sufri epu puji bahui. <sup>26</sup> Tuseda puji ebia su saida Cristo jepuiti sufri epu puji. Aimue Egipto yahua su ai saida cuana mesa tsada mahue puidha, Diusu ja tueda mesa ai saida cuana bahui cielo su patiata puji putsu. <sup>27</sup> Janimetucheati jepuiti echua puji sa duinini mue iyuba. Nimetucheda eni puidha echua puji butse su, tu neje Diusu eneti tu etsahua puji bataidha putsu.

<sup>28</sup> Janimetucheati jepuiti Moisés chenu ja israelita cristiano cuana cuatsasiataidha huisha janana pamanuameta huecuana puji. Daja a putsu, huisha sa ami neje ete eteriji queque papapita huecuana puji, cuaja Diusu ja cuatsasiataidha huecuana batame. Daja ataidha huecuana Diusu ja equene ebacua cuana pamapa ete je pamanuameta mahue puji. Beju egipcio cristiano cuana ja eteriji cuana je ami neje mue papi ataidha putsu, pamapa mecuana sa ete je equene ebacua cuana manutaidha. Da neje Moisés chenu pamapa israelita cristiano cuana neje Egipto yahua jenetia cuinanaidha. <sup>29</sup> Janimetucheati jepuiti Mar Dherena dusetete je jaitianataidha huecuana, Diusu ja dusetetepai muritametana putsu. Egipcio soldado chenu cuana daja huecha jaitianaja pudhaataidha biame, pamapa huidipetaidha huecuana, Diusu ja ena neicha dhitataibana putsu.

### *Rahab*

<sup>30</sup> Janimetucheati jepuiti israelita chenu cuana ja Jericó ejude tumu jenetia ajiji edichu barereajiji baqui bauda dajajametaidha. Siete tsine Jericó ejude asebarereataidha huecuana. Asebarerea putsu, siete tsine su tueda tumu edichu baqui bauda dajajametaidha beju. <sup>31</sup> Janimetucheati jepuiti Rahab epuna chenu chuamadhada ja israelita jacuadhitiji detse equene rubuataidha putsu, aimue israelita soldado cuana ja tueda manuametaidha mahue pamapa pia Jericó ejude su aniji cuana neje tupupai.

<sup>32</sup> Beju yani hue jucuada pia ai cristiano cuana jepuiti equisa puji. Gedeón, Barac, Sansón, Jefté, David, Samuel chenu, profeta chenu cuana jepuiti yama quisa cua. <sup>33</sup> Janimetucheati jepuiti Diusu sa jatsahuati inatsutaidha huecuana. Pia cuana ejude cuana jaicheti putsu, jametsenetitaidha tueda ejude cuana. Saida jacuatsasiatitaidha huecuana. Diusu ja jamitsuti tiataidha inatsutaidha huecuana. Pia cuana león d'aida cuana sa rara su ichanubiametaidha huecuana biame, Diusu ja bianetiataidha huecuana. <sup>34</sup> Pia cuana utsu jubida su

ichanubiametaidha huecuana biame, Diusu ja d'eji su ataidha huecuana. Pia cuana espada jenetia d'eji su ataidha huecuana. Tucheda mahue cuana tucheda saida putaibana. Pia cuana pamapa mecuana sa majai soldado cuana pishitiametaidha, Diusu ja tucheatmetaidha huecuana putsu. <sup>35</sup> Piada piada epuna ichenu cuana mecuana sa manujiji cuana eid'e jabatsutitaibana. Pia Diusu peje su enimetuheatitani cuana deja madhada cuana ja nedaneda a putsu, manuametaidha huecuana. Daja manume putaidha huecuana, Diusu peje su jei purijiji mahue pu putsu. Diusu peje su enimeid'uatiani je, manutaidha huecuana. Diusu ja neicha eid'e yameenitayu jaid'uatitaidha huecuana. <sup>36</sup> Pia Diusu peje su janimetuheatitaidha cuana deja madhada cuana ja shishataidha. Huacabiti neje ichetaidha huecuana. Risi putsu, ichanubiametaidha huecuana. <sup>37</sup> Pia cuana tumu neje maracataidha huecuana. Pia cuana beta eped'u su siquitaidha huecuana. Pia cuana espada neje chuarijitaidha huecuana. Pia cuana abataidha huecuana Diusu tije parijita puji. Pia cuana puri ametaidha huecuana, mecuana sa ete cuana jenetia jududuametaidha huecuana putsu. Jajud'utitaidha huecuana huisha, cabra biti neje. Nedaneda ajiji, bataichenu da puniunetitaidha huecuana. <sup>38</sup> D'anita yahua cuana emata cuana je puniunetitaidha huecuana. Emata ebu rara cuana je anitaidha huecuana. Beju tuneda da ye mundo su Diusu peje su jei puja mahue cristiano cuana ebia su saida quita putaidha. <sup>39</sup> Daja pamapa tuneda jubida abajiji putaidha biame, aimue Diusu peje su janimeid'uarijiti putaidha huecuana. Daja biame, Diusu ja etiata jamitsuti ai cuana mue inatsu ataidha huecuana. <sup>40</sup> Diusu sa tsada puidha paid'uata huecuana. Beju ecuaneda tuna neje cielo su tupupai duji yani su chu, Diusu ja pamapa ecuaana mesa ai saida cuana etiatayu.

## 12

### *Cuaja Jesucristo pachamaenitija*

<sup>1</sup> Da su jahue mepibaenitique tueda dueji Diusu peje su janimetuheatitaidha tata chenu cuana peje su. Tuneda ebia su sufri putaidha biame, daja hue Diusu peje su jubida janimetuheaderatitaidha huecuana. Beju ecuaneseda di tuna nime pamapa ai jucha cuana ichadera taji jucha cuana enahuebameti mahue puji. Paciencia neje ehui su meputija Diusu sa mudu yadera puji. <sup>2</sup> Pachamaenideratija Jesucristo ejeitid'u mahue puji. Tuahueda ecuaana ehuidusutani. Ecuana sa janimetuheatitaidha cuana Diusu peje su butsepi yametani. Bidhutada curusu su emanu puji biame, tuseda puji mue ai bidhutada puana dapia emanu puji. Tueda bahue



puana curusu su manu putsu, ebia su beidaji neje neicha eid'e enetianayu. Jiahue beju Diusu sa bai eni bene yanieni da jenetia tu neje ecuatsasia epu puji.

<sup>3</sup> Mepibaenitique Jesucristo peje su. Juchaji cuana ja tueda ebia su sufri ametana biame, aimue janimetuchedataitanametiana mahue. Daja huecha micuaneda di be menimetuchedataitanametiji. <sup>4</sup> Aimue aiya biame micuana amicuametana mahue, jucha cuana parijita huecuana quisaquisa puana su. <sup>5</sup> Be mesetaji micuaneda da Diusu sa ebacua cuana. Tuahueda micuana aba neje ebuetsuatani. Uja puana mesa quirica su derejiji yani: Ebacua, be tsada mahue quema jabutsepiati cuana mi peje su.

Be janimetuchedataitanatiji, yama mi ebutsepiainia su.

<sup>6</sup> Beju yama ibuneda ebainia cuana bahui yama ebutsepiainia.

Pamapa yama ebatsuinia ebacua cuana yama ebutsepiainia. <sup>7</sup> Da su micuaneseda tuchea taji, Diusu ja micuana ebutsepiatani su. Daja micuana yatani micuana sa saida puji, micuana ebacua nime ebatani putsu. ¿Aimue jia maida tata cuana ja tuna sa ebacua cuana ebutsepiatani mahue? <sup>8</sup> Ahua micuana Diusu ja ebutsepiatani mahue su, da su aimue micuaneda Diusu sa ebacua quitaita mahue. <sup>9</sup> Enei hue, ecuana sa tata cuana ecuana ebutsepiatani putsu, ecuaneda iyuda neje ebainia huecuana. Daja huecha ecuana sa Tata Diusu peje su ecuaneseda jamenajatiati taji ecuaneda eid'e yanieniti puji. <sup>10</sup> Ecuana sa tata cuana ja ecuaneda yanana tupu quejucua tiempo chidi puji ecuana ebutsepiatani, cuaja mecuana sa piba cuana epuani batame. Diusu ja mu ecuana ebutsepiatani ecuana sa saida quita puji ecuaneda tu nime jucha mahue papueni puji. <sup>11</sup> Enei hue, ecuaneseda tsada mahue jabutsepiati cuana, neda putsu. Daja biame, jabutsepiati cuana ejaitianani su, ecuaneda Diusu neje saida, nimebutsepi epuani.

### *Rejada saida Diusu eichadera puji*

<sup>12</sup> Da su jiahue nimetucheda mepuque. <sup>13</sup> Saida, butsepi neje mepuniunetique pia cuana di micuana tije saida papuniunetita puji. Diusu peje su nimepishihue cuana micuana tije a putsu, enimetucheatita huecuana. <sup>14</sup> Saida mepuque pamapa cristiano cuana neje. Diusu nime jucha mahue mepuque. Jucha mahue cuana ja bahui Echua Puji Jesucristo ebata. <sup>15</sup> Merejatique. Be meichaderaji Diusu sa jaibunebati cuana. Be micuaneda cama huamahuama memadhatiji,

jaduininibati putsu. Meperdonaque pamapa micuana neje ai madhada eputani cuana. <sup>16</sup> Be quebata epuna ahua deja jabutsenetiji mahue biame, paquinati. Daja huecha quebata jabutsenetiji epuna ahua deja be pia neje paquinati. Be tsada mahue mebaji Diosu sa ai iyuda cuana. Be Esaú chenu nime mepuji. Tuahueda mesa tata ja tu etiata ai cuana tsada mahue bataidha. Piada jana dhepe echuje neje turucataidha. <sup>17</sup> Da su chu beju neicha mesa tata chenu sa ai cuana inat-suja ataidha su, mesa tata ja cuaja tia taji mahue bataidha, pia ebacua jamitsuti tiataidha putsu. Esaú chenu ebia su janebatidha biame, cuaja inatsu tayuji mahue bataidha.

<sup>18</sup> Biahua tiempo israelita cristiano chenu cuana Diosu netidha emata senida butse su anidha. Tueda emata jenetia Diosu ja mesa jacuatsasiati cuana tiataidha huecuana. Emata jenetia utsu jubida cuinanaidha. Apuda eni, judu padha, beni nime jubida anidha. <sup>19-20</sup> Da su pututu etsui jubida id'abataidha huecuana. Diosu ja mitsutaidha huecuana mimi jubida neje. Emata pad'apabata huecuana mahue ataidha huecuana. Cristiano ja animalo ja emata etidhita su, tumu ahua, lanza neje pamanuameta huecuana. Da su Diosu ebia su bajataidha huecuana pamimiriji, mesa jacuatsasiati etsui jubida iyubataidha huecuana putsu. <sup>21</sup> Beju tueda ai cuana da ebia su iyuda puidha putsu, Moisés chenu biame riariaidha, ebia su iyuame pu putsu. Beju tueda ai iyuda puidha cuana neje jiahue micuaneseda ai biame a taji mahue. Micuaneda mu aimue iyuda neje Diosu enariainia mahue cuaja israelita chenu cuana ja tueda yahua su emata senida nariame ataidha nime.

<sup>22</sup> Micuaneda eid'e eni Diosu sa ejude Jerusalén banime cielo su enariatiani. Daja huecha tusa emata saida Sión banime cielo su enariatiani. Dapia dueji ángel cuana ja Diosu emitsutsuatani. <sup>23</sup> Micuaneda da Diosu sa dharejiji ebacua cuana. Pamapa mesa dharejiji cuana sa ebani cuana mesa cielo su yani quirica su derejiji yani. Diosu ebaji saida micuaneda enariainia. Tu peje su jei epuani je manutana cuana sa enid'u cuana cielo su micuaneda enariainia. Diosu ja nimebutsepi atana cuana sa enid'u cuana enariainia. <sup>24</sup> Micuaneda Jesús quitaita enariainia. Tuahueda Tata Diosu ebajatani ecuaneseda puji, cuaja Diosu sa jamitsuti eichacua epuani batame. Micuaneda tusa ami d'uichajiji enariainia. Tueda ami jepuiti Diosu ja micuana eperdonatani. Biahua tiempo Diosu Caín chenu neje eturuca puidha, tuahueda mesa edue Abel chenu manuametaidha putsu. Beju jiahue aimue Diosu cristiano cuana neje eturuca epu mahue, mesa Ebacua Jesús manuametana huecuana biame.

<sup>25</sup> Da putsu, merejatique. Be meichaderaji Diosu sa jiahue

equisatani ai cuana. Mepibaenique ecuana sa tata chenu cuana. Diusu ja ye jubida quisataidha huecuana, ye mundo su anidha huecuana su. Manuametaidha huecuana, mesa quisa saida cuana id'abaja mahue ataidha huecuana putsu. Beju jiahue Diusu ja ecuana cielo jenetia mesa quisa saida cuana equisatani. Tata chenu cuana ebia su madhada hue ecuaneseda puji epu, ahua ecuaneda tueda cielo jenetia quisa saida cuana eichadera su. <sup>26</sup> Biahua tiempo Diusu ja yahua riariametaidha mesa etsui neje. Beju Diusu uja puidha mesa quirica su derejiji yani: "Neicha yama eriarame yahua. Aimue yahua bahui mahue. Cielo di yama eriarame." <sup>27</sup> Beju tueda mimi derejiji yani ja ecuana eshanapametani Diusu ja pamapa mesa jaati ai cuana etaitanamepeta, riariame putsu. Daja biame, tu ecuatsasiati bahui yanienitiyu. <sup>28</sup> Aimue quetsunu su biame etiatanaeni mahue. Da su Diusu diusulu-pai ecuaneseda a taji tuahueda tu ecuatsasiati etaitanaeni mahue su, ecuana ichatana putsu. Iyuda neje ecuaneseda Diusu mebaja taji tueda beidaji yame puji. <sup>29</sup> Daja iyuda neje ecuaneseda Diusu mebaja taji, tueda da cuati utsu ja pamapa ai cuana etiumepetani nime putsu.

## 13

### *Cuaja Diusu beidaji ame taji*

<sup>1</sup> Edue cuana, be ibuneda mebarijitiji micuaneda cama huamahuama. <sup>2</sup> Mebatsuque saida neje perepereji cuana micuana sa ete cuana su. Mepibaenique, piada piada cuana ja ángel cuana batsutana ai pibaiti mahue, tueda ángel cuana deja cuana nime batame putsu.

<sup>3</sup> Mepibaenique Cristo jepuiti terijiji yanita cuana, micuaneda quitaita tuna neje tupupai terijiji ani cua pu cua nime. Metsahuaque Cristo jepuiti nedaneda yametitani cuana, tuna nime micuaneda di daja huecha nedaneda jaameti cua putsu.

<sup>4</sup> Be mebaseatiji ebutse cuana neje. Be pia neje mequinatiji. Daja yatani cuana Diusu ja jubida ejuzgatayu.

<sup>5</sup> Be ebia su quita tsada chipilu mebaji. Beidaji mepuque mecuana sa ai chidi cuana neje, Diusu uja puidha putsu: "Ai hora su biame yama mi enetiajusia mahue." <sup>6</sup> Da su beju ecuaneda jubida neje uja mimi cua:

Echua Puji ja ema etsahuatani putsu, aimue yama aidhe biame eiyuba mahue.

<sup>7</sup> Mepibaenitique micuana Diusu jepuiti buetsuatana cuana su. Mepibaenitique tuna sa ai puiti saida cuana su. Cuaja tuneda Cristo peje su janimetucheati putsu, puniunetitana nime, daja huecha micuaneseda pu taji.

<sup>8</sup> Jesucristo da aimue eturucati mahue. Cuaja epuani nime, daja hue tueda epueni. <sup>9</sup> Daja huecha mesa jabuetsuati cuana aimue eturucati mahue. Da putsu, be pia tsapiapiati jabuetsuati cuana tije meaji. Beju aimue micuaneda Diosu peje su nimetucheda epu mahue, pia tsapiapiati ai puiti cuana a putsu. Tueda ai puiti aji cuana ja aimue detse Diosu shanapata cua mahue. Diosu ja mu ecuana tu peje su nimetucheda yatani mesa jaibunebati jepuiti bahui.

<sup>10</sup> Jesucristo da pamapa altar bia su manuametaidha animalo cuana ebia su saida quita Diosu peje su eirutsua puji. Equene sacerdote cuana sa mue ai chidi biame a taji Cristo sa jairutsuati neje, jiahue teje daja hue Diosu peje su animalo cuana eirutsuaderatani huecuana putsu yahua su ete iyuda eti jude su. <sup>11</sup> Beju sacerdote aida ja animalo cuana sa ami edusutani iyuda saida eti jude su Diosu peje su eirutsua puji cristiano cuana sa jucha cuana jepuiti. Tueda animalo cuana sa ami iyuda saida eti jude su edusutani biame, equita cuana erere tipe su etiumepetani. <sup>12</sup> Daja huecha Jesucristo Jerusalén ejude tipe su curusu su manuana, cristiano cuana tusa ami jepuiti nimebutsepi paputa puji. <sup>13</sup> Da su Jesucristo neje tupupai meputija tusa bidhu sufri ya puji. <sup>14</sup> Beju ye mundo su aimue piada ejude biame yanieniti mahue. Ecuanaeda Diosu sa ejude epusiu bahui eid'uainia. <sup>15</sup> Da putsu, ecuaneseda daja hue Diosu mitsutsuadera taji Jesucristo jepuiti. Ecuana sa jamitsutsuati da Diosu peje su eirutsuaji papu puji. Tusa ebani jepuiti saida memimija. <sup>16</sup> Be mesetaji ai saida cuana ya puji pia cuana sa saida puji. Mesajatiatique micuana sa ai cuana tsahuataja eputani cuana. Daja a putsu, Diosu beidaji yame.

<sup>17</sup> Atasaida mepuque micuana sa ehuidusuji cuana neje. Tuna sa jacuatsasiati cuana ema su meanique, Diosu ja ichatana huecuana putsu, micuana Diosu peje su saida mehuidusutaque huecuana puji. Beju tuneseda jeutsu taji Diosu cuaja micuana huidusutana saida, ahua mahue. Beidaji meameque huecuana, tuna sa jacuatsasiati cuana a putsu. Ahua atasaida mahue micuaneda epu su, pamapa ai atasaida mahue epu tuneseda puji. Da su beju tueda da saida mahue epu micuana sa saida puji.

<sup>18</sup> Ecuanaaju sa enime cuana butsepi Diosu butse su. Daja hue ecuanaju puderatija. <sup>19</sup> Da su Diosu jubida mebajaque ecuanaju sa puji, ecuanaju pamapa ai su butsepi epu puji. Daja huecha mebajaque tuahueda d'eji patiata ema micuana peje su neicha tipeida eputi puji.

<sup>20</sup> Diusu ecuana sa Echua puji Jesucristo manujiji cuana duju jenetia netianametaibana ja menimepijajametaque. Netianaibana putsu, Jesucristo da ecuana sa Huisha Quinaji Nime epuani. Tusa ami d'uichajiji jepuiti Diusu ja cristiano cuana d'oji su yaenitani, cuaja mesa jamitsuti eichacua batame. <sup>21</sup> Tuahueda pamapa ai su saida, nimebutsepi meataque. Metsahuataque mesa ai saida cuana bahui meaque puji Jesucristo jepuiti. Tueda da Diusu beidaji yametani. ¡Gloria Jesucristo papueni! Daja papu.

<sup>22</sup> Edue cuana, ye quirica chidi yama micuana etiameinia. Yama micuana jubida ebajainia paciencia neje meid'abaenique quema quisa cuana. <sup>23</sup> Bahue mepuque ecuana sa edue Timoteo d'oji su. Aimue terijiji mahue beju. Ahua tueda ema peje su tipeida ecuina su, ema tu neje micuana peje su eputiyu.

<sup>24</sup> Pamapa edue cuana, mecuana sa ehuidusuji cuana yama emitsuameinia. Italia yahua su aniji edue cuana ja di micuana emitsuametani.

<sup>25</sup> Diusu ja meibunebataque. Daja papu.

## LA CARTA DE SANTIAGO

Ye quirica da Santiago sa jadereti. Tueda da Jesús sa edue puina. Mesa ebani quitaita da Jacobo. (Baque ye versículo cuana: Hechos 15.13 y 21.18; Marcos 6.3; Mateo 13.55; Gálatas 1.19 y 2.12.) Jerusalén ejude su Diosu sa dharejiji cuana sa piada ehuidusuji puina. Ebuetsuatani ye quirica su ecuaneseda Diosu sa mudu cuana a taji, tu peje su enimetuchteatiani putsu. Ecuana ebuetsuatani japirubati, nimemitsida, bahue eni, Diosu mitsuji cuana jepuiti. Chipiluji, puri cuana jepuiti di ebuetsuatani. Daja huecha janimetuchteati taji, tupuajiji saida mimi taji ecuana ebuetsuatani.

Ye versículo cuana da ebia su saida quita ebuetsuati puji:

1.2-8.12,25

2.10

3.17

4.7,17

5.16

### *Santiago ja berebereajiji edue cuana quirica tiametana*

<sup>1</sup> Ema da Santiago. Diosu, Echua Puji Jesucristo detse sa emebajaji da ema. Pia yahua cuana je berebereajiji judío cuana ye quirica neje yama emitsuameinia.

### *Diosu ja mesa bahue eni piba saida cuana ecuana etiatayu*

<sup>2</sup> Edue cuana, beidaji mepuque, Diosu ja ai papu neje micuana yabatani su. <sup>3</sup> Bahue micuaneda aba neje micuaneda ebia su paciencia aidaji epu. <sup>4</sup> Da su paciencia aidaji pu putsu, micuaneda Diosu peje su ebia su enimetuchteati. Micuana sa piba bahue eni cuana tupu epu. Aimue ehueiti mahue.

<sup>5</sup> Ahua quebata micuana sa piba bahue eni ehueitiani su, mebajaque Diosu. Tuahueda micuana mesa piba saida cuana eshanapametayu, ahua micuaneda ebaja su. Aimue micuana ed'ayata mahue, micuana sa piba ehueitiani jepuiti. Mue ai rejareja mesa piba saida cuana etiata. <sup>6</sup> Ahua micuaneda ai saida cuana Diosu peje jenetia inatsuja su, jei pu putsu, janimetuchteati neje Diosu baja taji. Be beta piba neje Diosu mebajaji. Quebata deja da beta piba neje epuani su, tueda da beni ja bai jubida edhapujutani su anuati yatani nime. Daja da mesa piba cuana. <sup>7-8</sup> Diosu ja tueda deja aimue ai biame etiata mahue, beta pibaji putsu.

<sup>9</sup> Edue nimemitsida, puri biame, beidaji papu, Diosu ja tueda aida ebatani putsu. <sup>10</sup> Chipiluji edue sa daja huecha nimemitsida pu taji, mesa chipilu cuana ejaitiana putsu.

Beju chipiluji sa ai cuana etaitanape shasha cuana nime. Quejucua tiempo chidi puji shasha yani. <sup>11</sup> Id'eti beju jubida ed'iatiani su, nutsa esarani. Shasha di beju esaramtani. Shasha sa ania chidi cuana etaitanapeeni. Daja nime chipiluji deja eiruiruani je, etaitana.

### *Aba cuana*

<sup>12</sup> Ahua quebata paciencia neje aba cuana sufri epu su, tueda da beidaji epu. Tsabajiji pu putsu, tueda Diusu neje cielo su yanienitiyu. Daja yata Diusu ja pamapa tu ibuneda ebatani cuana, cuaja mesa jamitsuti cuana batame. <sup>13</sup> Aimue Diusu ja cristiano cuana epirubatani mahue jucha ya puji. Aimue Diusu ai madhada a bue mahue. Daja huecha aimue cristiano cuana ai madhada yametani mahue. <sup>14</sup> Cristiano cuana sa utsatada ai madhada cuana ja mu jucha yametani huecuana. <sup>15</sup> Ahua quebata ja mesa utsatada ai madhada cuana yata su, beju tuahueda jucha yatani. Jucha cuana jepuiti cristiano cuana sa manu taji.

<sup>16</sup> Ibuneda edue cuana, be mebaseatiji tueda ai cuana su. <sup>17</sup> Pamapa ai saida cuana bahui Diusu ja etiatani. Aimue ai madhada cuana etiatani mahue. Tuahueda id'eti, badi, atujai cuana ataidha. Tueda mu aimue jaturucati bue mahue, dhidha tsine eturucati nime. Tueda mu daja daja hue yani pamapa hora su. <sup>18</sup> Mesa tsada putsu, ecuana mesa ebacua cuana ametana, tu peje su jei puana putsu. Mesa equene ebacua cuana ecuana ametana. Pia cuana macha ecuana tije epueta.

### *¿Aidhe da Diusu sa ene quita dharejiji cuana?*

<sup>19</sup> Edue cuana, id'aba bahue mepuque. Be tipei neje memimiji, meduininiji. <sup>20</sup> Duinini aida deja ja mu aimue Diusu sa ai saida quana ata cua mahue. <sup>21</sup> Ye mundo su ebia su ai madhada cuana yani. Tueda ai madhada cuana ariji taji. Nimemitsida neje jei meaque Diusu sa quisa saida cuana. Ahua daja micuaneda ya su, Diusu ja micuana d'ejí su yatayu.

<sup>22</sup> Cuaja tusa quisa saida cuana epuani, meaque. Be tueda quisa saida cuana cha id'aba bahui meaji. Ahua micuaneda cha id'aba bahui ya su, micuaneda cama ebaseati. <sup>23</sup> Quebata ja tueda ai quisa saida cuana cha id'aba bahui yata su, tueda da deja espejo su mesa ebu tipeitipei echamatiani nime. <sup>24</sup> Echamatiani cama, mesa ebu ebatiani. Beju ecuinanahu je, esetatani cuaja mesa ebu epu mane. <sup>25</sup> Quebata ja mu Diusu sa quisa saida aimue esetatani mahue daja huecha yatani su, tueda Diusu ja beidaji yatayu. Tueda Diusu sa quisa saida cuana ja ecuana d'ejí su yatani.

<sup>26</sup> Quebata Diusu sa dharejiji ebatiani biame, ahua aimue mesa mimi cuana etupuatiani mahue su, da su aimue tueda

Diusu sa dharejiji mahue. Tu mehua ebaseatiani. Aimue Diusu beidaji yametani mahue. Mesa Diusu peje su jamitsutsuati cuana da ai puji saida mahue. <sup>27</sup> Diusu sa ene quita dharejiji cuana ja mu tata mahue, ahue manujiji cuana tsahua bahue. Pamapa ye mundo sa ai madhada cuana rijinetia bahueta huecuana.

## 2

### *Be cristiano cuana pia ebia su saida mebaji*

<sup>1</sup> Edue cuana, micuaneda Echua Puji

Jesucristo aida peje su jei puana putsu, pamapa cristianoo cuana tupupai saida ba taji. <sup>2-4</sup> Ahua micuana edhitatiani su, quebata jud'uji saida, oro metaraji enubi su, ahua tueda bahui micuaneda, “Aniuteque upia aniude saida su”, ya su, ahua quebata puri di jud'uji edhi enubi su, ahua tueda micuaneda, “Etibeini bene yahua su aniuteque”, ya su, da su micuaneda cama edharetiani. Aimue micuaneda butsepi yainia mahue. Chipiluji deja bahui saida micuaneda ebainia, chipiluji putsu. Puri deja mu madhada neje micuaneda ebainia, puri putsu.

<sup>5</sup> Ibuneda edue cuana, meid'abaque ye quema quisa cuana. Diusu ja puri cuana ye mundo su dharetana tu peje su jei paputa huecuana puji. Tu peje su jei eputani huecuana putsu, tu neje cielo su eid'e epuenitayu huecuana. Dapia pamapa mesa ai saida cuana etiatayu huecuana. Pamapa tu ibuneda ebatani cuana etiatayu, cuaja mesa jaibunebati cuana batame. <sup>6</sup> Da su beju, ¿jucuaja puji micuaneda puri cuana bidhutada su eichainia? ¿Aimue jia maida chipiluji cuana ja micuana ebaseatani mahue? ¿Aimue jia maida micuana huaraji peje su eriredusutani huecuana mahue? <sup>7</sup> ¿Aimue jia maida micuana neje dunejiji yani Cristo emadhabatani huecuana mahue?

<sup>8</sup> Edue cuana, uja Cristo ja ecuana cuatsasiatana: “Cuaja mida quitaita ebatiani nime, daja mique pia cuana ibuneda ba taji.” Daja mesa jacuatsasiati aida ecuaneseda puji. Ahua micuaneda daja epu su, beju saida epuani. <sup>9</sup> Ahua micuaneda cristiano cuana edhareinia su, jucha micuaneda yainia. Cristo sa jacuatsasiati aida aimue yainia mahue. <sup>10-11</sup> Beju Diusu ja uja cuatsasiataidha mesa quirica derejiji yani su: “Be pia sa ebutse neje mequinatiji. Be jamanuametiji puji.” Da su etse pia sa ebutse neje mue jaquinati biame, ahua etse deja emanuame su, juchaji hue etse epuani pamapa jacuatsasiati cuana butse su. <sup>12</sup> Mepibaenique, Cristo ja micuana equisabata ahua micuaneda mesa ai tsada cuana bahui ana, ahua mahue. Da putsu, mepibaenitique micuana



sa ai jaati mimi cuana su. Cristo sa jacuatsasiati aida su ecuaneseda puniuneti taji. Beju ecuaneda d'oji su epuani, tueda jacuatsasiati aida a putsu. <sup>13</sup> Quebata ja pia mue ichenuba su, daja huecha Diosu ja ichenuba mahue neje tueda ejuzgatayu. Quebata ja pia eichenubatani su, Diosu ja tueda eichenubatayu mesa juzga tsine su.

*Ai saida cuana a taji*

<sup>14</sup> Edue cuana, ¿ai puji saida micuaneda Diosu peje su janimetucheati cuana pu cua, aimue ai saida cuana a biame? ¿A da micuaneda da su d'oji su pu cua? <sup>15-16</sup> Ahua quebata edue jud'uji, diadiaji mahue su, ahua micuaneda tueda, “Puchiditiuque saida, jabiad'amatique, diadiatique”, ya su, ¿ai puji saida micuana sa mimi cuana pu cua, mue micuaneda ai biame tia biame? <sup>17</sup> Daja huecha ahua micuaneda ai saida cuana a bue mahue su, Diosu peje su yanacane enimetuheatiani. <sup>18</sup> Cuapuitime etse uja pu cua: “Ema Diosu peje su enimetuheatiani d'oji su epu puji. Beju tueda da tupu saida. Aimue quema ai saida cuana a taji mahue.” Beju ema mu uja epuani: Ahua miada ai saida cuana a bue mahue su, aimue mida Diosu peje su enimetuheatiani bata mahue. Daja huecha ahua miada ai saida cuana a bahue su, da su mida Diosu peje su enimetuheatiani bata. <sup>19</sup> Ahua etse piada Diosu bahui yani jei epuani su, beju saipie hue. Daja huecha einid'u madhada cuana jei eputani. Jei eputani putsu, eriariatani huecuana, ebia su iyuame epuani putsu. <sup>20</sup> Bahue mepuque, ahua etse, “Ema Diosu peje su jei epuani”, epu su, daja huecha ai saida cuana etse sa a taji. Ahua etse ai saida cuana a bue mahue su, da su Diosu peje su yanacane enimetuheatiani. <sup>21</sup> Mepibaenique Abraham chenu. Diosu ja tueda nimebutsepi ataidha, saida ai cuana ataidha jepuiti. Mesa ebacua Isaac chenu manunameja adhaataidha Diosu peje su irutsua puji, daja Diosu ja cuatsasiataidha putsu Abraham chenu nimebutsepi ataidha, tu jei ataidha putsu. <sup>22</sup> Da su bahue ecuaneda Abraham chenu ene quita Diosu peje su janimetuheatidha, mesa ai saida jaati cuana jepuiti. <sup>23</sup> Uja Diosu sa quirica su derejiji yani tu jepuiti: “Abraham chenu Diosu peje su janimetuheatidha putsu, Diosu ja tueda nimebutsepi ataidha.” Da putsu, Abraham chenu Diosu sa eshanapa puidha.

<sup>24</sup> Edue cuana, bahue mepuenique, Diosu ja quebata papu nimebutsepi yatayu tusa jaati ai saida cuana jepuiti, daja huecha tusa janimetucheati jepuiti di. <sup>25</sup> Daja puidha Rahab chenu neje. Tueda epuna chuamadhada puidha biame, Diosu ja Rahab nimebutsepi ataidha, tuahueda israelita jacuadhiti detse rubuataidha putsu. Ejude jenetia saida

cuinanametaidha tse, pamanuameta huecuana mahue puji. <sup>26</sup> Beju enid'u ecuinanani su, equita da saida mahue. Daja huecha ahua ecuaneda ai saida cuana a bue mahue su, ecuana sa Diosu peje su janimetucheati cuana yanacane hue.

### 3

#### *Yana*

<sup>1</sup> Ibuneda edue cuana, micuana duju su quejucua hue Diosu sa mimi ebuetsuaji cuana papu. Tuneseda pia cuana ebia su saida quita, butsepi puniuneti taji. Diosu ja tuneda pia cuana ebia su equisabaenita cuaja ye mundo su puniunetitana. Da putsu, quejucua hue Diosu sa mimi ebuetsuaji cuana papu. <sup>2</sup> Pamapa su ecuaneda japitsati bahue. Ahua etse mimi madhada pu bue mahue, mimi cuana jatupuati bahue su, da su tueda deja nimebutsepi eni Diosu peje su. Tueda jatupuati bahue deja epu. <sup>3</sup> Mepibatique caballo su. Ecuatsa su piama etse eichainia ase cuana etupuame puji. <sup>4</sup> Daja huecha barco aida etse etupuameinia. Beni ja jubida enunutani, aida biame, piloto ja timón, leme chidi neje bahui barco aida queda putija da da edusutani. Da neje barco etupuametani. <sup>5</sup> Daja nime da ecuana sa yana. Huai chidi papu biame, yana neje ecuaneda ai aida cuana emimiani. Beju piada cuati utsu chidi neje ejije aida tiupe cua. <sup>6</sup> Daja huecha yana huai chidi biame, ai aida madhada cuana ameta cua, mimi madhada pu putsu. Cuaja cuati utsu ja ejije aida etiumepetani nime, daja ecuana sa mimi madhada neje pia cuana emadhainia. <sup>7-8</sup> Cristiano cuana ja pamapa animalo, d'ia, se cuana bahueneta cua biame, aimue aiya biame yana tupuameta cua mahue. Ai patseda jamanuametiji pu cua nime ecuana sa mimi cuana. <sup>9</sup> Yana neje ecuaneda Tata Diosu emitsutsuainia. Daja huecha ecuana sa yana neje quitaita ecuaneda Diosu nime ajiji cristiano cuana emadhainia. <sup>10</sup> Beju ecuana sa ecuatsa jenetia jamitsutsuati mimi cuana ecuinanani. Daja huecha ai madhada mimi cuana di ecuinanani. Edue cuana, tueda ai cuana da saida mahue. <sup>11</sup> ¿Ai piada enaputiti jenetia yahui bitada, patseda tupupai cuinana cua bata? <sup>12</sup> ¿Ai piada mango equi jenetia narasu ejaja bataji pu cua bata? ¿Ai nasa jenetia cuahue bataji pu cua bata? Daja huecha aimue piada enaputiti jenetia yahui bitada, patseda tupupai cuinana cua mahue.

#### *Diosu ja ecuana bahue eni saida ata cua*

<sup>13</sup> Ahua micuana duju su piada bahue eni yani su, beju tuseda puji jabameti taji, saida puniuneti putsu. Nimemitsida neje puniuneti taji. <sup>14</sup> Ahua micuaneda envidia, nimemadhada neje epu su, ahua micuaneseda puji bahui echacutiani

su, be ebia su bahue eni mebatiji. Ahua micuaneda bahue eni ebati su, micuaneda da bid'umimi puji hue. <sup>15</sup> Deja Ishahua nime epibatiani. Aimue Diusu nime epibatiani mahue. <sup>16</sup> Ahua ecuaneseda envidia yani su, aimue dunejiji yani mahue. Ai madhada cuana bahui ecuaneda yayu. <sup>17</sup> Ahua ecuaneseda Diusu sa bahue eni cuana bahui yani su, nimebutsepi ecuaneda epu. Da su ecuaneda cama huamahuama saida yani. Paciencia aidaji, piba butsepiji, jaibunebatiji ecuaneda epu. Ai saida cuana bahui ecuaneda ya. Pamapa su ecuaneda tupupai saida huamahuama ebati. Aimue bubeta ecuaneda epu mahue. <sup>18</sup> Ahua quebata ja edue cuana saida, butsepi paani puji etsahuata su, tuahueda saida yatani. Edue cuana etsahuatani saida, nimebutsepi paputa huecuana puji.

## 4

### *Be medunetiji Diusu tsada mahue ebatani cuana neje*

<sup>1</sup> Micuaneda cama madhada hue huamahuama edusutiani, micuana sa ai utsatada madhada cuana ebia su yani putsu. <sup>2</sup> Micuaneseda tsada pamapa ai cuana putsu, emanuameinia pia sa ai cuana emejemi puji. Micuaneda pia cuana sa ai cuana eutsatabainia. Tuna neje eichetiani tuna sa ai cuana emejemi puji. Aimue micuaneseda yani mahue, Diusu ebajainia mahue putsu. <sup>3</sup> Micuaneda Diusu ebajainia su, aimue tuahueda micuana etiatani mahue, micuana sa ai utsatada madhada cuana sa puji bahui ebajainia putsu. <sup>4</sup> Micuaneda Diusu esetainia tu tsada mahue ebatani cuana neje epuniuneti puji. Ahua micuaneda Diusu neje jama-jaitiji cuana neje edunetiani su, beju tuna neje tupupai micuaneda Diusu majaiji epu. <sup>5</sup> Uja Diusu sa quirica su epuani: "Diusu ja ecuana sa muesumu su Espiritu Santo ichatana. Tueda Espiritu Santo ja ecuana erejatani. Tuseda tsada ecuaneda Diusu sa puji bahui papu puji." <sup>6</sup> ¿Ai Diusu ecuana peje su daja yanacane emimiani bata? Tuahueda ecuana etsahuatani, ebia su ibuneda ebatani putsu. Uja neicha epuani mesa quirica su: "Diusu ebia su aida jabatiji cuana neje eduininiani. Nimemitsida cuana mu jubida etsahuatani mesa jaibunebati neje." <sup>7</sup> Da su Diusu sa eme su meanique. Metucheaque Ishahua. Daja tuche a putsu, tueda ejududu micuana peje jenetia. <sup>8</sup> Diusu peje su menariatique. Ahua daja micuaneda epu su, tuahueda di micuana enaritata. Juchaji cuana, jucha mearijique. Bubeta cuana, aimue detse da hora su cama micuaneda Diusu ibuneda ebainia neje tupupai ai madhada cuana a cua mahue. Ahua daja micuaneda epibatiani su, micuaneda da beta pibaji epuani. Menimebutsepiatique. <sup>9</sup> Jubida mepadaritique jucha jepuiti.

Meturucaque jaid'ebati cuana tuana neje, daja huecha bei-daji pibapiba neje. <sup>10</sup> Nimemitsida mepuque Diusu butse su. Ahua daja micuaneda nimemitsida epu su, Diusu ja micuana aida ebatayu.

*Be pia edue sa puji madhada hue mimiji*

<sup>11</sup> Edue cuana, be pia edue cuana sa puji madhada hue memimiji, Diusu ja ecuana, "Ibuneda mebatique huamahuama", ecuatsasiatani putsu. Ahua aimue micuaneda ibuneda ebati mahue su, aimue Diusu sa jacuatsasiati micuaneda saida yainia mahue. Tueda Diusu sa jacuatsasiati da saida mahue pu cua nime micuaneda ebainia. Ahua daja micuaneda ya su, micuaneda Diusu sa jacuatsasiati ebia su aida ebatiani. <sup>12</sup> Beju Diusu ja mu mesa jacuatsasiati cuana ichataidha. Tuahueda bahui cristiano cuana d'ejí su ata cua ahua taitanamepeta cua. Da su, ¿aidhe ni da mida pia cuana etuaquisa puji, Diusu bahui cristiano cuana emetse putsu? Tuahueda bahui ejuzgatayu huecuana.

*Bue mahue ecuaneda cuaja ai cuana epu*

<sup>13</sup> Meid'abaenique ye quema quisa cuana. Cuapuitime micuaneda uja japibati cua: "Beju meputija pia ejude su. Dapia piada mara meanija. Dapia iruiru putsu, chipiluji mepuja." <sup>14</sup> Edue cuana, be daja mepibatiji, bue mahue micuaneda cuaja ai cuana epu putsu. Mepibaenitique cuaja ecuaneda ye mundo su yani. Ecuaneda da judu padha nime. Ubu hora puji bataji epuani. Daja huecha beju tipeida etaitanani. <sup>15</sup> Beju uja micuaneseda japibati taji: "Ahua Diusu sa tsada su, ecuaneda ai papu ai cuana ayu cua." <sup>16</sup> Aimue micuaneda butsepi epibatiani mahue, micuaneseda puji bahui emimiani putsu. Micuaneda ebia su aida ebatiani. Beju tueda da madhada hue. <sup>17</sup> Quebata ja ai saida cuana ya puji eshanapatani biame, ahua mue a su, tueda da juchaji epuani.

## 5

*Chipiluji cuana jepuiti quisa*

<sup>1</sup> Chipiluji cuana, meid'abaque ema.

Mepadaritique. Metsiatsiaque, micuaneda ebia su sufri epu putsu. <sup>2</sup> Micuana sa ai chujeneda cuana jurujuru epupe. Micuana sa ejud'uji saida eni cuana di musu ja yapeta. <sup>3</sup> Micuana sa oro, plata chuje mahue epupe, micuaneda rubuajiji equinati putsu. Micuaneda daja chipilu erubuainia putsu, cristiano cuana ja micuana etuaquisatayu. Tueda chipilu su bahui micuaneda janimetuchteatiana putsu, Diusu ja micuana etuaquisatayu. <sup>4</sup> Micuana sa te su mudu puji

cuana aimue saida chujetiana mahue. Micuaneda baseana huecuana, mecuana sa echuje emejeminia je. Tueda mudu puji cuana sa jachujebajati tsiatsia cuana Diusu aida, tucheda ja id'abatana. <sup>5</sup> Beju ye mundo su micuaneda saida, ania chidi anina. Micuaneda jatseitiana. Pamapa ai saida cuana diaina. <sup>6</sup> Micuaneda jucha mahue cristiano cuana matseana. Cha manuame hue ana huecuana, jabiahuanatija mahue eputani biame. Da putsu, Diusu ja micuana ematsetayu.

*Paciencia mepuque. Janimetucheati neje Diusu mebajaque*

<sup>7</sup> Da su edue cuana, paciencia mepuque Echua Puji epueicha teje. Mepibatique deja banabanaji peje su. Ejaja bana putsu, paciencia neje equene nai, tije nai cuana eid'uatani ejaja cuana ehuru puji. <sup>8</sup> Beju micuaneda di tu nime pacienciaji mepuque. Be Diusu peje su micuana sa janimetucheati metaitanametiji, Echua Puji Jesucristo tipeida epueicha putsu. <sup>9</sup> Edue cuana, be meacuicuinaji micuaneda cama huamahuama. Ahua daja micuaneda cama yatiani su, Diusu ja micuana juchaji cuana nime ebatayu, tueda beju epue quitaita putsu. Be huamahuama metu-aquisatiji, tuseda bahui dharejiji cuana tuaquisa taji putsu. <sup>10</sup> Edue cuana, mepibatique profeta chenu cuana su, sufri putaidha huecuana Diusu sa quisaquisa cuana putaidha putsu. Micuaneseda tuna nime paciencia neje sufri pu taji Diusu sa puji. <sup>11</sup> Quebata ja sufrimiento cuana etucheata su, beidaji epu. Micuaneda bahue Job chenu jepuiti. Tueda paciencia aidaji puidha. Daja hue Diusu peje su jubida janimetuheaderatidha, ebia su sufri puidha biame. Pamapa mesa ai cuana taitanapeidha biame, Diusu ja tueda ne-icha eichacua ebia su tiataidha, tu peje su jubida janime-tuheatidha putsu. Daja huecha Echua Puji Jesucristo da ecuana neje saida, jaibunebati bahue.

<sup>12</sup> Edue cuana, be cielo, yahua, ai papu jepuiti Diusu bahue mepuji. Be micuaneda, "Ya da ecuanaju", epuani biame, aja mahue meaji. Daja huecha be micuaneda, "Aimue da ecuanaju ya mahue", epuani biame, aja meaji. Aimue daja micuaneseda a taji mahue Diusu ja micuana pamatseta mahue puji.

<sup>13</sup> Ahua micuana duju su quebata sufri epuani su, Diusu baja taji. Ahua saida, beidaji epuani su, satsu neje Diusu taji mitsutsua. <sup>14</sup> Ahua quebata nedaji epuani su, edue cuana sa ehuidusuji cuana ihua taji tuseda puji Diusu pabajata huecuana puji. Echua Puji Jesucristo sa ebani su nedaji sa echua bia su aceite paichata huecuana. <sup>15</sup> Ahua janimetucheati neje nedaji sa puji Diusu ebajata huecuana su, beju Diusu ja nedaji esaisiametayu. Ahua nedaji ja jucha atana su, Diusu ja tueda

eperdonatayu. <sup>16</sup> Da putsu, micuana sa ai jaati madhada jucha cuana metuaquisatique huamahuama. Micuaneseda puji huamahuama Diusu mebajaque micuaneda esaisiyu puji. Deja nimebutsepi sa Diusu peje su jabajati cuana da chujeji saida Diusu peje su. <sup>17</sup> Mepibatique profeta Elías chenu peje su. Tueda da deja puidha ecuana nime hue. Tuahueda Diusu bajataidha nai mahue papu puji yahua bia su. Bajataidha putsu, beju quimisha mara edusete puji mue nai pu puidha. <sup>18</sup> Da su beju Diusu bajataidha neicha yahua bia su nai papu puji. Bajataidha putsu, neicha nai puidha. Yahua su ejaja putaidha.

<sup>19-20</sup> Edue cuana, ahua quebata micuana duju su Diusu sa ene quita jabuetsuati cuana jenetia enetidera su, ahua pia edue ja netiderajiji edue ene quita jabuetsuati su esiapameta su, tuahueda neideajiji edue d'ejí su yataniyu. Diusu ja mesa jucha cuana eperdonatayu. Daja papu.

## PRIMERA CARTA DEL APOSTOL SAN PEDRO

Ye beta quirica Pedro ja deretaidha Diusu peje su jei ep-utani judío cuana sa puji pia yahua uqueda cuana je bereberegiji anitaina su. Ye equene quirica su quisataidha huecuana tuna Diusu peje su jubida, nimetucheda pu putsu, ai enime, sufrimiento cuana etuchea puji.

Ye versículo cuana da ebia su saida quita ebuetsuati puji:

1.15,25

2.20,24

5.6-9

*Pedro ja Diusu sa bereberegiji dharegiji cuana peje su quirica beitutana*

<sup>1</sup> Ema da Pedro. Jesucristo sa jabeituti da ema. Tusa apóstol ema a ichatana. Ye quirica yama ebeituinia Diusu sa bereberegiji dharegiji cuana peje su. Edue cuana, micuaneda uqueda yani micuana sa yahua jenetia. Micuaneda da pia ejude cuana su yahua emetse mahue cuana nime. Micuaneda yani Ponto, Galacia, Capadocia, Asia, Bitinia yahua cuana su. <sup>2</sup> Ye mundo ajiji mahue su, Tata Diusu ja micuana dharetaidha mesa cristiano cuana epu puji. Espíritu Santo ja micuana nimebutsepi atana Diusu sa puji, Cristo jei ya puji. Diusu ja micuana sa jucha cuana dhipatana, Cristo ja mesa ami d'uichatana putsu. Diusu ja ebia su menimepija-jametaque. Daja huecha meibunebataque.

*Diusu peje su janimetucheati taji*

<sup>3</sup> Diusu jubida pamitsutsuatija. Tu jepuiti saida memimija. Tueda da Echua Puji Jesucristo sa Tata. Tuahueda ecuana ebia su ibuneda ebatani putsu, ecuana nimeeichacua atana. Jesucristo manujiji cuana duju jenetia netianaibana putsu, beju daja huecha ecuaneda di enetianayu. Da putsu, ecuaneda tu peje su janimeid'uati yani. <sup>4</sup> Beju ecuaneda tu yani cielo su ecuinatiyu su, pamapa mesa ai saida cuana ecuana etiatayu. Jiahue ecuaneseda puji eichasetatani tueda ai cuana. Ye mundo su yani ai cuana beju epupeta. Tusa tiajiji ai cuana mu saida eni. Chubita bue mahue. <sup>5</sup> Diusu ja mesa tucheda neje micuana ebianetiatani, tu peje su enimetucheatiani putsu. Tiempo epupe su, micuana edusuta tu neje eid'e yanienitiyu puji.

<sup>6</sup> Da putsu, micuaneda ebia su nimebeidaji yani beju, quejucua tiempo puji micuaneseda ebia su sufri pu taji biame.

<sup>7</sup> Micuaneda ebia su sufri epuani putsu, Diusu peje su ebia su enimetucheati. Jesucristo epueicha su, Diusu ja micuana

saida etsabata. Cuaja cristiano cuana ja oro cuati su ed-hureametani nime, daja huecha micuana sa janimetuheatu cuana Diusu peje su ebia su saida epu, sufri pu putsu. Beju Cristo epueicha su, Diusu ja micuana saida ebatsutayu cielo su, micuana neje beidaji epu putsu.

<sup>8</sup> Micuaneda Jesucristo bana mahue biame, tueda ebia su ibuneda ebainia. Aimue jiahue tueda ebainia mahue biame, tu peje su jubida enimetuheatiani. Da putsu, micuaneda ebia su saida, nimebeida aida neje yani. <sup>9</sup> Da su tu peje su enimetuheatiani putsu, Diusu ja micuana tu neje cielo su eid'e yameenitayu.

<sup>10</sup> Biahua tiempo Diusu sa profeta chenu cuana bahue putaidha Cristo peje su jei eputani cuana d'eji su yata, ebia su ibunebatana huecuana putsu. Cuaja Diusu ja ecuana d'eji su yata quisa putaidha huecuana. <sup>11</sup> Espíritu Santo ja biahua tiempo bahue ametaidha huecuana Cristo epue jepuiti. Cuaja Cristo ye mundo su epue emanu puji, eid'e enetianayu, Echua Puji Aida, tucheda epuyu bahue ametaidha huecuana. Da su tuneda beju japibatitaidha uja: “¿Aidhe ni pu cua Cristo? ¿Quetsunu jia ye mundo su pue cua?” <sup>12</sup> Espíritu Santo ja uja bahue ametaidha huecuana: “Micuaneda beju pupejiji su, Cristo ye mundo su epue. Aimue micuaneda eba mahue. Pia cristiano cuana ja bahui Cristo epue ebatayu.” Beju jiahue mu Cristo pueana. Jiahue Diusu sa quisaquisa puji cuana Cristo jepuiti quisa saida cuana micuana peje su quisaquisa putana. Espíritu Santo cielo jenetia pueana. Diusu sa quisaquisa puji cuana etsahuatani mesa ai quisa saida cuana micuana peje su quisaquisa papu puji. Beju ángel cuana biame tueda Cristo jepuiti quisa saida cuana shanapaenija.

### *Nimebutsepi ecuaneseda puniuneti taji*

<sup>13</sup> Beju jiahue micuaneda tueda Cristo jepuiti quisa saida cuana bahue putsu, nimebutsepi mepuniunetique. Saida jatupuatijiji meanique. Daja hue Jesús peje su menimetuheaderatique. Ahua daja micuaneda epu su, Diusu ja micuana saida ebatsuta, Cristo epueicha su. Pamapa mesa ai saida cuana micuana etiatayu. Cielo su micuana edusutayu tu neje yanienitiyu puji. <sup>14</sup> Cuaja yanana cuana ja mecuana sa tata cuana eid'abatani nime, daja micuaneseda Diusu id'aba taji. Pamapa tu yametani jacuatsasiati cuana a taji. Be neicha meaji Diusu shanapaji mahue su ai madhada aina cuana, micuaneda da Diusu sa ebacua cuana putsu. <sup>15</sup> Diusu da nimebutsepi. Da putsu, micuaneseda di tu nime nimebutsepi pu taji, tuahueda micuana dharetana putsu. <sup>16</sup> Uja Diusu puidha mesa quirica derejiji yani su: “Nimebutsepi mepuque, ema nimebutsepi putsu.”



<sup>17</sup> Diusu da micuana sa Tata. Da putsu, meiyubaque tueda. Aimue cristiano cuana dhare putsu, ejuzgatani mahue. Da putsu, micuaneseda Diusu iyuba taji. <sup>18</sup> Tuahueda micuana d'oji su atana micuana sa tata chenu cuana sa yanacane ai puiti cuana jenetia. Aimue tueda ai puiti cuana ja micuana Diusu eshanapametani mahue. Beju bahue micuaneda Diusu ja mesa ebacua quitaita tiatana echuje puji micuana d'oji su ya puji. Aimue micuana d'oji su atana oro, plata neje mahue. <sup>19</sup> Cristo ja mesa ami d'uichatana putsu, Diusu ja micuana d'oji su atana. Cristo sa ami da oro, plata ebia su chujeneda. Cuaja sacerdote cuana ja huisha janana pasapasa Diusu peje su eirutsuatani nime, daja Cristo Diusu peje su jairutsuatiana curusu su ecuana sa jucha cuana jepuiti. <sup>20</sup> Beju ye mundo aniji mahue su, Diusu ja uja pibataidha: "Yama Cristo mundo su ebeitu cristiano cuana sa jucha jepuiti emanu puji, tuna d'oji su ya puji." Jiahue mu cuaja Diusu ja pibataidha nime, daja puana. Cristo manuana ecuana sa jucha cuana jepuiti. <sup>21</sup> Jiahue micuaneda Diusu peje su jei epuani Cristo jepuiti. Tueda Diusu ja quitaita Cristo manujiji cuana duju jenetia netianametaibana. Echua Puji ebia su aida, tucheda ichatana. Da putsu, micuaneda ebia su enimetuheatiani Diusu peje su.

<sup>22</sup> Beju micuaneda Espiritu Santo ja tiajiji ene quita quisa saida cuana jei a putsu, nimebutsepí epuani. Pamapa Cristo jepuiti edue cuana ibuneda ebainia. Daja huecha ibuneda jabaderati taji pamapa muesumu neje. <sup>23</sup> Beju Diusu sa mimi quetsunu su biame epupe mahue. Tueda mimi su jei pu putsu, micuaneda nimeeichacua epuani. Neicha micuaneda eichacua bataji epuani nime, Diusu micuana sa tata epuani putsu. <sup>24</sup> Uja Diusu sa quirica su derejiji yani:

Pamapa cristiano cuana id'ene nime.

Ubu hora puji saida, ania chidi, shashaji epuani.

Tipeida esarani su, shasha edajajani.

<sup>25</sup> Beju Diusu sa mimi mu aimue quetsunu su biame epupe mahue.

Tueda mimi da Diusu sa quisa saida cuana. Quebata tueda mimi su jei epu su, Diusu ja tueda d'oji su yata. Ema tueda quisa saida cuana micuana peje su quisaquisa puana.

## 2

<sup>1</sup> Edue cuana, micuaneda Diusu peje su jei puana putsu, pamapa ai madhada cuana memesiaque. Be mebaseaji. Be bubeta mepuji. Be pia sa ai cuana utsatabaji puji. Be pia sa puji mimi madhada puji. <sup>2</sup> Cusja yanana edhere chidi cuana ja esehua puji atsuna ebia su tsada ebatani nime, daja Diusu sa mimi micuaneseda tsada ba taji d'oji su, nime ucheda epu

puji. <sup>3</sup> Daja micuaneseda a taji ahua ene micuaneda Diusu eshanapaeninia su.

*Cristo da tumu saida nime*

<sup>4-5</sup> Edue cuana, Cristo da tumu saida, chujeneda nime. Diusu da ete muduji nime. Ecuanaeda di da tumu cuana nime. Diusu ja Cristo dharetana mesa ete yapiruji tumu nime, Diusu tsada mahue baji cuana ja Cristo tsada mahue batana biame. Ecuanaeda tumu cuana putsu, Diusu ja ecuaneda di edhare-tani mesa ete ya puji nime. Cristo jepuiti Diusu ja ecua-na tuseda puji dharetana mesa sacerdote cuana nime epu puji. Cuaja sacerdote cuana ja Diusu beidaji yame puji templo su tu peje su eirutsuaji cuana eirutsuatani nime, daja ecuaneseda ai saida cuana a taji Diusu beidaji yame puji. <sup>6</sup> Da putsu, Diusu sa quirica su uja derejiji yani:

Yama tumu saida, chujeneda dhareana.

Jerusalén ejude su yama eichati.

Tueda da quema ete su yapiruji tumu saida nime.

Tueda tumu da quema Jabeituti Deja.

Quebata tu peje su jei jei epu su, aimue ebidhu mahue.

<sup>7</sup> Beju ecuaneseda puji Cristo ebia su chujeneda. Tu peje su jei puji mahue cuana su puji mu chujeneda mahue nime. Tuna jepuiti uja Diusu sa quirica su derejiji yani:

Ete muduji cuana ja tumu saida, chujeneda jusiaderatana biame, beju yapiruji tumu puana.

<sup>8</sup> Pia su uja derejiji yani:

Tueda tumu nime ja cristiano cuana edajajameta.

Ehuatsitud'imeta huecuana.

Beju tuneda Diusu sa quisa saida cuana jei aja mahue putsu, cuati castigo su eputita huecuana, Diusu sa Jabeituti Deja tsada mahue batana huecuana putsu. Biahua tiempo Diusu ja ye ai cuana epu shanapataidha.

*Diusu sa dharejiji cuana*

<sup>9</sup> Beju ecuaneda da Diusu sa dharejiji cuana. Tusa sacer-dote cuana nime ecuaneda epuani tu emebaja puji. Diusu ja ecua-na dharetana tuseda puji epu puji. Daja Diusu ja ecua-na dharetana ecuaneda mesa quisa saida cuana cris-tiano cuana peje su quisaquisa epu puji, apuda jenetia, mesa hueda su pacuinanata huecuana puji. <sup>10</sup> Equene ecuaneda aimue Diusu sa dharejiji cuana puina mahue. Jiahue mu ecuaneda tusa dharejiji cuana epuani. Equene aimue ecua-na aiya biame ichenubatana mahue. Jiahue mu Diusu ja ecua-na ebia su eichenubatani Jesucristo jepuiti.

*Diusu bahui memebajaque*

<sup>11</sup> Ibuneda edue cuana, micuaneda da ye mundo su Diosu sa dharejiji putsu, be micuana sa ai utsatada madhada cuana meaji. Tueda ai utsatada madhada cuana a putsu, micuaneda Diosu tije ariji cua. <sup>12</sup> Diosu peje su jei puji mahue cuana duju su saida, butsepi medusutique. Jiahue micuaneseda puji madhada hue emimitani huecuana biame, micuana sa ai ajiji saida cuana ba putsu, tuneda Diosu peje su jei puta cua, Diosu tuna peje su enariatiani hora su.

<sup>13</sup> Huaraji cuana jei a taji, micuaneda da Diosu sa dharejiji cuana putsu. <sup>14</sup> Beju tuneda pamapa ai madhada yatani cuana ecastigatani. Pamapa ai saida yatani cuana mu saida ebatani huecuana. <sup>15</sup> Diosu sa tsada micuaneda ai saida cuana bahui ya puji, micuana madhabaji cuana emitaname puji.

<sup>16</sup> Micuaneda ye mundo sa jacuatsasiati cuana jenetia d'eji su epuani, micuaneda da Diosu sa dharejiji cuana putsu. Daja biame, meaque pamapa jacuatsasiati cuana, cristiano cuana duju su saida yaniti puji. Ahua daja micuaneda epu su, Diosu sa emebajaji saida cuana epu. <sup>17</sup> Pamapa cristiano cuana saida neje ba taji. Pamapa Cristo jepuiti edue cuana ibuneda ba taji. Diosu iyuba taji. Romano echua puji aida di iyuba taji.

### *Cristo nime ecuaneseda pu taji*

<sup>18</sup> Emebajaji cuana, meiyubaque micuana sa emetse cuana, tuneda saida ahua madhada hue paputa biame. Saida memebajaque huecuana. <sup>19</sup> Daja Diosu sa tsada micuaneseda puji, saida ya puji sufri mepuque biame. <sup>20</sup> Ahua micuaneda ai madhada a cua su, ahua micuana castigata cua huecuana su, tueda castigo da micuana ebutsepia puji. ¿Ai puji ni da micuaneda tueda castigo paciencia neje sufri a cua? Ahua micuaneda ai saida yainia biame, micuana castigata cua huecuana su, ahua paciencia neje tueda castigo sufri ya su, tueda da saida Diosu butse su. <sup>21</sup> Da puji Diosu ja micuana dharetana. Cuaja Cristo sufri ametana huecuana nime, daja micuaneseda sufri pu taji, Cristo tije aji putsu. <sup>22</sup> Aimue tueda jucha atana mahue biame, aimue aidhe biame baseatana mahue biame, sufri ametana huecuana. <sup>23</sup> Tueda madhabatana huecuana biame, aimue jamadhabati neje jajeutsutiana mahue. Tueda sufri ametana huecuana biame, aimue jabiahuanatiana mahue. Diosu peje su bahui jamenajatiatiana, tuahueda butsepi neje ejuzgatani putsu. <sup>24</sup> Cristo da ecuana sa jucha jepuiti curusu su manuana. Tueda sufri puana ecuana esaisiameeni puji. Da putsu, be jucha cuana tsada mebaji. Saida, butsepi neje medusutique. <sup>25</sup> Edue cuana, Cristo shanapaji mahue su, micuaneda huisha jeitid'ujiji nime puniunetina. Diosu peje jenetia uqueda,

taitanajiji puniunetina. Jiahue mu Cristo peje su micuaneda jasiapatiana. Huisha quinaji saida ja huisha equinatani nime, daja micuana jiahue equinatani. Pamapa ai madhada jenetia micuana ebianetiatani.

### 3

#### *Cuaja butseji cuana sa anime pu taji*

<sup>1-2</sup> Epuna cuana, jei meaque micuana sa yahue cuana. Ahua piada piada yahue cuana Cristo peje su jei puji mahue pu cua su, micuana sa puniuneti cuana saida ba putsu, cuapuitime Cristo peje su jei putayu cua. <sup>3</sup> Be ebia su saida quita mebasetatiji oro, joya neje. Be ebia su saida quita mejud'utiji. <sup>4</sup> Pamapa tueda ai cuana epupeta. Enime saida neje bahui mepuniunetique, aimue tueda epupe mahue putsu. Tueda da pamapa pia ai cuana ebia su chujeneda Diusu butse su. <sup>5</sup> Biahua tiempo Diusu sa ichaderajiji epuna cuana daja puniunetidha huecuana. Diusu peje su jubida janimetuchteatidha. Mecuana sa yahue cuana jei ataidha huecuana. <sup>6</sup> Daja da Sara chenu puidha. Tuahueda Abraham chenu jei ataidha. "Quema echua puji", ataidha. Ahua micuaneda ai saida cuana ya puji eyuati mahue su, Sara chenu puidha nime micuaneda epu.

<sup>7</sup> Daja huecha deja cuana, saida medusutique micuana sa ehuanne cuana neje. Saida mebaque, tucheda mahue huecuana putsu, Diusu ja mesa jaibunebati cuana micuana neje tupupai tuneda di tiatana putsu. Ahua daja saida tuna neje micuaneda edusuti su, Diusu ja micuana sa jabajati cuana etiatayu.

#### *Ai saida cuana ya puji sufri pu taji*

<sup>8</sup> Edue cuana, dunejiji meanique. Huamahuama meichenubatique. Cristo jepuiti edue cuana nime huamahuama ibuneda mebatique. Nimemitsida mepuque. <sup>9</sup> Ahua quebata cuana ja micuana madhada hue yatani su, be daja huecha eturuca meaji. Eтуруca saida tia taji huecuana, tueda da Diusu sa putsu. Ahua daja micuaneda ya su, Diusu ja micuana ebia su eibunebatayu. <sup>10</sup> Mepibaenique: Quebata saida, beidaji anija su, jatupuati taji mesa mimi cuana.

Be bid'umimi pamimi.

<sup>11</sup> Be ai madhada paata.

Saida ai cuana bahui paata.

Saida paani cristiano cuana neje.

<sup>12</sup> Diusu ja nimebutsepi cuana saida ebatani.

Mecuana sa jabajati cuana etiatani.

Ai madhada yatani cuana neje eduininiani.

<sup>13</sup> ¿Aiya ni da micuana madhata cua, micuaneda ai saida yainia biame? <sup>14</sup> Beidaji mepuque, micuaneda ai saida yainia biame, sufri yameta huecuana su. Be aidhe butse su meiyu-atiji. Be merubutanaji. <sup>15</sup> Pamapa muesumu neje Cristo meiyubaque, tueda micuana sa Echua Puji putsu. Ahua quebata, “¿Ai jepuiti micuaneda Cristo peje su jei epuani?” equisabatani su, cuaja saida jeutsu bahue pu taji. Iyuda, nimemit-sida neje jeutsu taji. <sup>16</sup> Saida meanique cristiano cuana neje micuana etuaquisata huecuana mahue puji. Ahua deja madhada cuana ja micuana etuaquisatani su, tuneda hue bidhuta cua, micuaneda Cristo neje saida epuniuneti ba putsu. <sup>17</sup> Ebia su saida sufri epu puji Diusu sa ai saida cuana yainia jepuiti, aimue ai madhada cuana a putsu mahue.

<sup>18</sup> Cristo quitaita sufri puana emanu teje ecuana sa jucha cuana jepuiti. Piada nuati hue sufri puana pamapa sa puji. Tueda da saida biame, madhada cuana sa puji sufri puana Diusu peje su edusu huecuana puji. Curusu su manuametana huecuana biame, Espíritu Santo ja id'emetaibana. <sup>19</sup> Mesa enid'u putiana manujiji cuana sa eti jude su tuna quisaquisa ya puji. <sup>20</sup> Tuneda Noé chenu sa tiempo su eid'e anitaidha. Da tiempo su Diusu ja paciencia neje id'uataidha huecuana tu peje su papibaturucatita puji, Noé ja ataidha cama. Mue japi-baturucatitaidha mahue putsu, Diusu ja manuamepetaidha huecuana ena neje. Noé chenu, mesa familia neje barco su nubi putsu, d'eji su putaidha. Tuneda ocho putaina. <sup>21</sup> Daja nime huecha ecuaneda d'eji su epuani, ahua Cristo neje ecuaneda eduneti su. Cristo da manujiji cuana duju jenetia netianaibana putsu, daja huecha ecuaneda di epu. Yahui neje jaichaderameti cuana da aimue equita erucua puji mahue. Daja a putsu, ecuaneda Diusu peje su epibaturucati-ani ebametiani. Diusu ja ecuana nimeeichacua yatani, ahua ecuaneda ebaja su. Cristo da manujiji ecuana duju jenetia netianaibana putsu, Diusu ja ecuana daja nime yatayu, ahua ecuaneda tu peje su jei epu su. <sup>22</sup> Tueda cielo su tsuatibana. Dapia Diusu sa bai eni bene yani. Pamapa ángel, huaraji cuana tusa eme su yani.

## 4

### *Diusu mebaja taji ecuana sa tucheda tupu*

<sup>1</sup> Cuaja Cristo ye mundo su sufri puana nime, daja micuaneseda sufri pu taji. <sup>2</sup> Sufri eputani cuana ja jucha yarijitani. Diusu sa ai tsada cuana bahui ya puji. Aimue mecuana sa ai utsatada madhada cuana aja yatani mahue. <sup>3</sup> Beju da tupu micuaneda ai madhada cuana ana, Diusu shanapaji mahue cuana nime. Cristo shanapaji mahue su,

micuaneda pamapa ai madhada cuana aina. Pamapa ai utsatada madhada cuana aina. Tsetse aida, tsine cuana su jaid'iti aida, eimea cuana mitsutsuaji cuana puina. <sup>4</sup> Ai madhada a bahui cristiano cuana micuana neje eduininitani, tuna yatani ai madhada cuana micuaneda etsahuainia mahue huecuana putsu. Da putsu, micuana neje madhada hue emimitani. <sup>5</sup> Beju tuneseda Diusu jeutsu taji, pamapa eid'eni, manujiji cuana Diusu ja ejuzgatayu putsu. <sup>6</sup> Da putsu, Diusu ja ecuana sa tata chenu cuana mesa quisa saida cuana quisaquisa ametaidha. Pamapa tueda quisa saida cuana su jei eputani cuana jucha jepuiti manutaidha biame, eid'e Diusu neje cielo su yanita huecana.

<sup>7</sup> Ye mundo tipeida epupe beju. Da putsu, piba saidaji, jatupuatijiji meanique Diusu neje pamapa hora su emitsuti puji. <sup>8</sup> Huamahuama saida, ibuneda mebatique. Daja a putsu, micuana sa jucha cuana huamahuama eperdonati. <sup>9</sup> Saida neje micuana sa ete cuana su huamahuama mebat-sutique. <sup>10</sup> Diusu ja micuana mesa jatiati cuana tiatana putsu, huamahuama saida memebajatique. Tusa jatiati ai cuana neje jatsahuati taji huamahuama. <sup>11</sup> Ahua quebata quisaquisa epu su, Diusu sa mimi bahui quisaquisa pu taji. Daja huecha quebata ja ai saida aja yata su, Diusu sa tucheda neje paata. Pamapa meaque Diusu emitsutsua puji, micuaneda Cristo neje dunejiji yani putsu. Diusu tucheda, aida papueni. Daja papu.

### *Diusu sa dharejiji cuana sa sufri pu taji*

<sup>12</sup> Ibuneda edue cuana, be menimetsatiji, Diusu ja micuana jubida yabata su. <sup>13</sup> Beidaji hue pu taji, Cristo sufri puana nime micuaneda sufri epu su. Daja micuaneda sufri epu su, Cristo epueicha su, ebia su beidaji micuaneda epu. <sup>14</sup> Ahua cristiano madhada cuana ja micuana Cristo jepuiti emadhabata su, beidaji hue mepuque, Espiritu Santo micuana neje yani putsu. <sup>15</sup> Ahua etse ai madhada yainia jepuiti ecastigatani huecuana su, tueda da bidhutada. Da su be manuametiji, tsi puji mepuji. Daja huecha be pia sa ai cuana su chapubadeti hue mepuji. <sup>16</sup> Ahua ecuaneda Cristo jepuiti sufri yameta huecuana su, aimue tueda bidhutada mahue. Diusu ecuaneseda mitsutsua taji, ecuaneda Cristo sa putsu.

<sup>17-18</sup> Beju jiahue Diusu ja mesa dharejiji cuana ebutsepi-  
apirutani. Ahua daja mesa dharejiji cuana yatani su, ¿cuaja  
ni da yatayu tu jei aji mahue cuana? ¿Cuaja ni da tuna sa  
pupe epu? Cuati castigo su eputita huecuana beju. <sup>19</sup> Edue  
cuana, daja hue ai saida cuana meaderatique, Diusu sa  
tsada micuaneda sufri epuani biame. Jubida Diusu peje su

menimetuheatique, tuahueda micuana atana putsu. Tueda da saida eni. Aimue micuana emesiata mahue.

## 5

### *Cuaja Diosu sa dharejiji cuana sa jadasutime pu taji*

<sup>1</sup> Edue cuana sa ehuidusuji cuana, yama micuana equisainia, ya di micuana nime ehuidusuji putsu. Cristo curusu su sufri puana yama bana. Ema micuana neje tupupai huaraji aida, tucheda Cristo ja yametayu, tu epueicha su.

<sup>2</sup> Saida mebaque Diosu sa dharejiji cuana. Cristo sa jabuet-suati cuana mebuetsuaque huecuana, Diosu ja micuana equinametani putsu. Daja micuaneseda a taji pamapa muesumu, ibuneda neje, aimue jubida neje mahue. Be echuje einatsu puji bahui saida mequinaji huecuana. Saida piba neje memebajaque huecuana. Daja Diosu sa tsada. <sup>3</sup> Be emetse nime jubida neje mecuatsasiaji huecuana. Tuna duju su saida, butsepi puniuneti taji, tuneda di micuana daja ba putsu, saida paputa huecuana puji. <sup>4</sup> Da su ecuana sa Echua Puji Jesucristo epueicha su, tuahueda micuana quetsunu su biame epupe mahue echuje aida etiatayu.

<sup>5</sup> Edeahue, epuneje cuana, meiyubaque ehuidusuji cuana. Daja huecha pamapa micuaneseda edue cama huamahuama jaiyubati taji nimemitsida neje. Uja derejiji yani:

Pamapa aida jabatiji cuana Diosu ja tsada mahue ebatani.

Nimemitsida cuana mu etsahuatani mesa jaibunebati cuana neje. <sup>6</sup> Da su nimemitsida mepuque. Diosu sa eme su meanique. Daja a putsu, Diosu ja micuana aida yatayu, mesa tsada tiempo su. <sup>7</sup> Be ai pibapiba biame mepuji. Diosu peje su jubida menimetuheatique, tuahueda micuana ebia su ibuneda ebatani putsu.

<sup>8</sup> Jatupuatijiji, janimepitijiji meanique, Ishahua da iba di-adiaja cuatacuata nime epuniuneti putsu. Tuahueda aidhe emadha puji echacutaniuneti. <sup>9</sup> Beju metucheaque tueda, Diosu peje su janimetuheatu neje. Aimue micuaneda bahui Ishahua ja sufri yametani mahue. Pamapa micuana sa edue cuana pamapa yahua su daja sufri yametani. <sup>10</sup> Beju micuaneda ubu hora chidi sufri pu putsu, Diosu ja micuana nimebutsepi, tucheda yametayu. Tuahueda ecuana pamapa mesa jaibunebati cuana tiatana. Cielo su eid'e yameenitayu, ecuaneda Cristo neje dunejiji yani putsu. <sup>11</sup> Diosu aida, tucheda papueni. Daja papu.

### *Tije quisa cuana*

<sup>12</sup> Edue cuana, ye quirica chidi Silvano neje yama edereinia. Tueda ecuana sa Jesucristo jepuiti edue. Diosu peje su ebia su enimetuheatiani. Yama ye quirica edereinia

micuana equisa puji. Bahue micuaneda Diosu ja micuana ebia su ibuneda ebatani, mesa jaibunebati cuana micuana ebia su tiatana putsu. Daja hue mesa ibuneda su mepuderatique.

<sup>13</sup> Upia Roma ejude su aniji edue cuana ja micuana emit-suametani. Diosu ja tuneda di micuana nime dharetana. Marcos ja di micuana emitsuametani. Tueda da quema Cristo jepuiti ebacua nime, quema quisaquisa jepuiti Jesús peje su jei puana putsu. <sup>14</sup> Huamahuama ibuneda neje memitsu-tique.

Diosu ja menimepijajametaque, micuaneda Cristo sa puji cuana putsu. Daja papu.



## SEGUNDA CARTA DEL APOSTOL SAN PEDRO

Beta puji quirica su Pedro ja edue cuana buetsuataidha papitsatita mahue huecuana puji ye mundo su ai iyuda cuana ecuinata su, Diosu neje epishitiame eputa huecuana putsu.

Ye versículo cuana da ebia su saida quita ebuetsuati puji:

1.4-8.21

2.9

3.9,14

*Pedro ja Diosu sa dharejiji cuana peje su quirica beitutana*

<sup>1</sup> Ema da Simon Pedro. Jesucristo sa emebajaji da ema. Tusa apóstol ema ichatana. Tueda da ecuana sa D'ejí su Jaatiji Diosu butsepi. Edue cuana, yama micuana ye quirica ebeituinia, micuaneda ecuanaju nime tu peje su jei puana putsu. <sup>2</sup> Micuaneda Tata Diosu, ecuana D'ejí su Aji Jesucristo eshanapainia putsu, tuatseda meibunebataque. Menimepi-jajametaque tse.

*Cuaja dharejiji cuana sa pu taji*

<sup>3</sup> Diosu ebia su tucheda putsu, ecuana pamapa tiatana saida meanija puji, daja huecha tu emitsutsua puji. Cristo ecuana shanapametana. Ecuana dharetana tu nime epu puji. <sup>4</sup> Tusa jamitsuti chujeneda aida cuana ecuana tiatana. Ahua ecuaneda tueda jamitsuti cuana su jei epu su, tu-ahueda ecuana pamapa ai madhada, utsatada cuana jenetia d'ejí su yatayu, tu neje ecuana edunetayu tu nime epu puji. <sup>5</sup> Da putsu, Diosu peje su jubida menimetuheatique. Daja huecha saida mepuniunetique. <sup>6</sup> Diosu meshanapaenideraque. Jatupuatijiji meanique. Paciencia aidaji mepuque. Diosu memitsutsuaderaque. <sup>7</sup> Huamahuama micuaneda cama meichenubatique. Daja huecha ibuneda mebatique.

<sup>8</sup> Ahua micuaneda daja ya su, micuana sa puani cuana aimue yanacane epu mahue. Echua Puji Jesucristo saida eshanapaeniyu. <sup>9</sup> Ahua quebata ja mu aimue daja aja yata mahue su, tueda da Diosu shanapaji mahue nime. Tuahueda Diosu ja tusa equene jucha cuana dhipapetana esetatani. <sup>10</sup> Da su edue cuana, mepibaenique Diosu ja micuana dharetana. Ahua daja micuaneda epiba su, aimue jucha su edajaja mahue. <sup>11</sup> Da su Diosu ja micuana saida ebatsutayu cielo su. Dapia ecuana sa Echua Puji Jesucristo ecuatsasiati epupe mahue.

<sup>12</sup> Da putsu, yama micuana daja hue quisainiame ya, micuaneda bahue biame. Diosu sa ene quita jabuetsuati micuaneda eshanapaeninia biame, yama micuana tueda

ai cuana epibameinia. <sup>13</sup> Ema eid'e tupu, daja hue yama micuana quisainiame ya tueda ai cuana jepuiti. <sup>14</sup> Ecuana sa Echua Puji Jesucristo ja ema shanapametana tipeida quema manu taji. <sup>15</sup> Daja ema micuana quisatiyu quisatiyu yainia, micuaneda eseta mahue puji ema emanu su.

*Cristo aida, tucheda batana huecuana*

<sup>16</sup> Edue cuana, yama micuana Jesucristo tucheda neje ye mundo su pueana jepuiti buetsuana. Tueda jabuetsuati cuana da aimue bid'umimi puina mahue. Aimue quema epiba hue daja mimiana mahue micuana ebasea puji. Beju ecuanaju sa etua neje quitaita Jesús sa tucheda bana. <sup>17</sup> Ecuanaju Cristo neje murucu baqui bauda bia su anina su, Tata Diosu cielo jenetia tu jepuiti uja atana: "Ye da quema ibunedada ebacua. Tu neje ema beidaji epuani." <sup>18</sup> Daja ecuanaju Diosu sa etsui id'abana murucu baqui bauda bia jenetia.

<sup>19</sup> Beju pia ecuaneseda yani ene quita Cristo quisaneti-acuinaji. Tueda da Diosu sa mimi derejiji mesa profeta chenu cuana sa jadereti. Saida micuaneseda puji tueda Cristo jepuiti derejiji quisa saida cuana id'aba taji. Tueda quisa saida cuana da apuda su hueda ja ejurabatani nime. Ahua micuaneda tueda Cristo jepuiti quisa saida cuana su jei epu su, Diosu ja micuana Cristo sa ai cuana eshanapameenitayu. Cuaja huena atujai dhidha su cuareda epuani nime, daja Cristo micuaneseda puji epu. <sup>20-21</sup> Edue cuana, mepibaenique aimue profeta chenu cuana ja tuna sa epiba hue deretaidha mahue. Espíritu Santo ja quitaita Diosu sa piba cuana deremetaidha huecuana.

## 2

*Bid'umimi ebuetsuaji cuana jepuiti quisa*

<sup>1</sup> Beju da tiempo su bid'umimi puji profeta chenu cuana anitaidha israelita cristiano cuana duju su. Daja huecha micuana duju su bid'umimi ebuetsuaji cuana bataji eputa. Tuneda mecuana sa bid'umimi jabuetsuati cuana etsia mimi neje micuana ebuetsuata. D'ejí su Aji Echua Puji Jesucristo peje jenetia enetiderata huecuana. Da putsu, Diosu ja tipeida ematsetayu huecuana. <sup>2</sup> Jucuada tuna sa bid'umimi jabuetsuati cuana su jei eputa. Tuneda da edue cuana ai madhada cuana saida hue ya puji ebuetsuata. Da su jucuada ja tije yata huecuana. Tuna jepuiti cristiano cuana da Diosu sa quisa saida cuana jepuiti madhada hue emimita. <sup>3</sup> Daja tueda bid'umimi ebuetsuaji cuana ja micuana ebuetsuata, micuana sa chipilu bahui mejemija putsu. Equene jenetia Diosu ja shanapataidha huecuana putsu, jubida ematsetayu.

<sup>4</sup> Biahua tiempo ángel cuana biame aimue Diusu ja perdona-  
nataidha mahue, jucha ataidha huecuana su. Cuati castigo,  
apuda su risijiji ichanubiataidha huecuana. Dapia ichasetajiji  
yanita huecuana tuna ejuzga tiempo ecuina teje. <sup>5</sup> Daja  
huecha aimue Diusu ja biahua tiempo jei puja mahue cris-  
tiano cuana perdonataidha mahue, jucha ataina huecuana  
su. Diusu ja manuamepetaidha huecuana ena neje. Noé,  
mesa siete familia cuana neje bahui ena jenetia d'ejí su  
ataidha. Equene ena sejeji mahue su, Noé ja cristiano cuana  
quisaquisa ataidha Diusu peje su papibaturucatita huecuana  
puji. <sup>6</sup> Daja huecha Diusu ja Sodoma, Gomorra ejude detse  
tiumpetaidha, dapia aniji cristiano cuana ja ebia su ai mad-  
hada cuana ataina putsu. Daja ataidha Diusu ja tije cristiano  
cuana ja cuaja jei aja mahue cristiano cuana ematsetani  
pashanapata puji. <sup>7</sup> Daja biame, Lot, mesa familia neje cuati  
utsu jenetia d'ejí su ataidha, Lot da deja butsepi puidha putsu.  
<sup>8</sup> Tueda pamapa tsine ebia su jatacuamadhatidha, cristiano  
cuana ja ebia su ai madhada cuana yatani ba putsu. <sup>9</sup> Beju  
Diusu ja tu neje saida epuniuneti cuana ai senida cuana  
jenetia d'ejí su a bahue. Daja huecha tu jei aja mahue cuana  
ecastigatayu, castigo tsine ecuina su.

<sup>10</sup> Pamapa ai utsatada madhada yatani, Echua Puji Jesu-  
cristo jei aja mahue cuana ecastigatayu. Huaraji jei a bue  
mahue ta huecuana. Einid'u huaraji aida cuana bahueta  
huecuana. <sup>11</sup> Diusu sa ángel cuana einid'u cuana ebia su  
tucheda biame, aimue tuna jepuiti Diusu butse su madhada  
hue emimitani mahue.

<sup>12</sup> Beju tueda deja madhada cuana da animalo cuana nime,  
aimue saida, butsepi epibatitani mahue putsu. Pamapa  
mecuana sa ai utsatada madhada cuana bahui a bahueta hue-  
cuana. Animalo ina putsu, emanuame puji nime huecuana.  
Mue shanapa ai cuana jepuiti madhada hue emimitani. Da  
putsu, einid'u cuana neje Diusu ja ematseenitayu huecuana.  
<sup>13</sup> Sufri eputa huecuana, pia cuana sufri ametana putsu. Ai  
madhada cuana a putsu, beidaji eputani huecuana pepe hue  
epibatitani. Micuana sa cena edia puji hora cuana su deja  
saida, butsepi nime micuana peje su ebametitani micuana  
ebasea puji. Tueda da bidhutada micuana neje yanita puji.

<sup>14</sup> Aimue detse epuna cuana utsatabaji mahue chama ata  
cua huecuana mahue. Tisutisu hue jucha yatani huecuana.  
Nimepishihue cuana jucha yametani huecuana. Pamapa  
ai ebatani cuana mecuana sa tsada. Tuneda da deja ate  
cuana. <sup>15</sup> Jeitid'ujiji eputaniuneti huecuana, Diusu sa ene  
quita jabuetsuati cuana jenetia netideratana putsu. Cuaja  
Beor chenu sa ebacua Balaam chenu ataida nime, daja jiahue  
yatani huecuana. Tueda Balaam chenu da ai madhada cuana

a putsu, chipilu gana puja pudhaaidha. <sup>16</sup> Tusa asunu ja d'ayataidha cristiano sa etsui neje aimue tueda ai madhada paata mahue puji. Da su mue a ataidha. Mesa tseitsi cuana pupeidha.

<sup>17</sup> Beju tueda micuana duju su bid'umimi ebuetsuaji cuana da yahui rara yahui mahue nime. Saida mahue huecuana. Tsapiapiati jabuetsuati cuana su jei eputani. Tuneda da beni ja judu ya ati ya ati yatani nime. Diusu ja matse putsu, apuda eni su ebeituenitayu huecuana. <sup>18</sup> Tuneseda puji ebia su aida emimitani. Diusu sa eichacua dharejiji cuana jucha arijitana biame, tuna nime jucha ameja yatani huecuana. <sup>19</sup> Uja dharejiji cuana yatani huecuana: "Diusu sa dharejiji cuana biame micuaneda d'eji su pamapa ai utsatada madhada cuana ya puji." Beju aimue ene quita d'eji su eputani huecuana mahue. Jucha sa eme su yanita huecuana pamapa mecuana sa ai madhada cuana ya puji. Ahua etse quebata ai papu su emenajatiatiani su, tueda ai sa eme su etse yani. <sup>20</sup> Quebata Echua Puji Jesucristo peje su jei pu putsu jucha jenetia d'eji su puana biame, ahua neicha jucha sa eme su emenajatiati su, tueda equene puina ebia su epuyu. <sup>21</sup> Tuneseda puji ebia su saida mue shanapa tueda jabuetsuati saida cuana ya puji puina. <sup>22</sup> Uja epuani tuna jepuiti: "Uchi batasiu putsu, esiapatianiyu tueda neicha ediayu puji. Cuchi nahuijiji di rutu su neicha hue esiapatianiyu." Daja huecha tuneda neicha jucha ya puji esiapatitani.

### 3

#### *Cristo epueicha jepuiti quisa*

<sup>1</sup> Ibuneda edue cuana, ye beta puji quirica yama micuana peje su ebeituinia. Quema beta quirica su yama micuana pibameana. <sup>2</sup> Mepibaenique Diusu sa profeta chenu cuana sa quisa derejiji cuana. Daja huecha Echua Puji Jesucristo sa jabuetsuati cuana apóstol cuana ja micuana buetsuatana.

<sup>3</sup> Meshanapaenique Cristo pueji mahue su, piada piada cuana Cristo jepuiti eshishatita. Tuna sa ai utsatada madhada cuana bahui yata huecuana. <sup>4</sup> Uja equisabata huecuana: "¿Quepia detse Cristo neicha pueicha cua? Ye mundo ajiji jenetia, daja huecha ecuana sa tata chenu cuana manutaidha jenetia jiahue teje daja hue." <sup>5</sup> Beju aimue tuneda shanapaja mahue cuaja Diusu ja ataidha. Biahua tiempo buepa, yahua ataidha. Yahua ena jenetia jemicuinaidha. Beju jiahue yahua ena bia su yani. <sup>6</sup> Biahua tiempo, Diusu ja cristiano cuana matse putsu, taitanamepetaidha huecuana ena neje. <sup>7</sup> Daja huecha mesa castigo tsine epue su jiahue buepa, yahua cuati utsu neje etiumepetayu. Yahua su pamapa ai madhada

cuana etiumepetayu. Tueda ai cuana su aimue epibatitani mahue jashishatiji cuana. Da putsu, eshishatitani huecuana.

<sup>8</sup> Ibuneda edue cuana, meshanapaenique Echua Puji sa mu piada tsine mil mara pu cua nime. <sup>9</sup> Echua Puji aimue etsunutani mahue cuaja piada piada cuana eputani nime. Aimue tipeida epueni mahue pamapa su tu peje su papibaturucatita huecuana puji, paciencia aidaji cristiano cuana neje putsu.

<sup>10</sup> Beju Echua Puji Jesucristo epueicha eid'uatiani mahue hora. Tsi puji tsi epu puji epueni nime, daja Echua Puji pueme epu. Da hora su buepa eberebereati nimetiuda id'apadada neje. Cuati utsu ja pamapa etaitanamepetayu. Yahua di pamapa ai madhada cuana neje tupupai etiupetayu.

<sup>11</sup> Beju daja pamapa ai cuana epupe micuaneda eshanapainia putsu, saida, nimebutsepi, Diusu neje micuaneseda puniuneti taji. <sup>12</sup> Diusu epue tsine meid'uaque. Ai papu meaque tueda tsine pacuinapuda puji. Da tsine su pamapa buepa su aniji cuana da edhureapetitayu cuati utsu su. <sup>13</sup> Daja biame, Diusu ja pia buepa eichacua, yahua eichacua yatayu ecuaneda eid'uainia. Dapia pamapa ai cuana saida butsepi eputayu. Daja Diusu ja yatayu, mesa jamitsuti tiataidha putsu.

<sup>14</sup> Da su edue cuana, tueda ai cuana ecuaneda eid'uainia cama, nimepijajajiji huamahuama meanique. Be jucha mepuji tu epue su micuana jucha mahue ebata puji. <sup>15</sup> Mepibaenique ecuana sa Echua Puji Jesucristo etsunutani epue puji, cristiano cuana d'ejí etia puji, tu peje su jei paputa huecuana puji. Tueda ai cuana ecuana sa edue Pablo ja di micuana quirica su quisatana. Tueda ai cuana micuana quisatana Diusu ja tu shanapametana teje. <sup>16</sup> Pamapa tusa quirica cuana su deretana tueda ai cuana jepuítí, piada piada mesa jabuetsuati cuana atadhada pad'i biame. Beju piada piada bue mahue quitaita cuana ja Pablo sa jabuetsuati cuana etsapiatani. Daja huecha pia Diusu sa derejiji jabuetsuati cuana di etsapiatani huecuana. Da putsu, Diusu ja ematsetayu huecuana.

<sup>17</sup> Ibuneda edue cuana, jiahue yama micuana tueda ai cuana butsepi equisainia micuaneda merejatique puji. Be deja madhada cuana sa bid'umimi jabuetsuati cuana su jei mepuji. Be tuna jepuítí baseajiji mepuji. Be tije meaji huecuana. Jiahue beju micuaneda Diusu peje su nimetucheda yani. Daja biame, ahua micuaneda tueda bid'umimi jabuetsuati cuana tije ya su, micuana sa janimetucheati cuana etaitanameti. <sup>18</sup> Ecuana sa Echua Puji Jesucristo saida me-

shanapaenique. Daja hue ibuneda mebaderaque. Tueda tucheda, aida papueni. Daja papu.

## PRIMERA CARTA DEL APOSTOL SAN JUAN

Ye quimisha quirica cuana da Juan sa jadereti, tueda edhi eni puina su.

Tuahueda edue cuana equene quirica tiametaidha ahua tata pu cua nime saida neje quisaquisa mesa ebacua cuana ataina. Buetsuataidha huecuana cuaja huamahuama ibuneda jabati taji, daja huecha pamapa hora su Diosu sa jabuetsuati cuana su puniuneti taji. Buetsuataidha huecuana parejatita bid'umimi jabuetsuati cuana neje. Daja huecha bahue papuenita huecuana Cristo neje eid'e yanienititayu.

Ye versículo cuana da ebia su saida quita ebuetsuati puji:

1.7,9

2.15,28

2.2,3

4.10-12

5.13-15

### *Diosu sa quisa saida*

<sup>1</sup> Ema da Juan. Cristo jepuiti equisa puji yama micuana peje su ye quirica ebeituinia. Ye mundo ajiji mahue su, Cristo anidha beju. Tueda ye mundo su cuinana su, ecuanaju mesa jaquisati quisa saida cuana id'abana. Ecuanaaju tu neje puniunetiana. Tueda ecuanaju bana ecuanaju sa etua quitaita neje. Tueda ecuanaju d'apabana ecuanaju sa eme quitaita neje. Tuahueda Diosu sa quisa saida cuana cristiano cuana equisatani. Quebata tueda quisa su jei epu su, eid'e epueni. Tu jepuiti bahui ecuana eid'e. <sup>2</sup> Cristo Diosu peje jenetia pue putsu, eid'e jabametiana ecuanaju bana. Ecuanaaju tu jepuiti micuana equisainia. Ecuanaaju duju su eid'e aniana. Cuaja micuaneda tu jepuiti eid'e pu cua ecuanaju micuana equisainia. Biahua tiempo ye mundo ajiji mahue su, Cristo, Tata Diosu neje cielo su anidha. Jiahue mu tueda ecuanaju peje su jabametiana. <sup>3</sup> Da putsu, ecuanaju micuana equisaninia ecuanaju bana, id'abana cuana micuaneda di ecuanaju neje tupupai Tata Diosu, mesa Ebacua Jesucristo neje eduneti puji. <sup>4</sup> Beju ecuanaju ye quisa saida cuana micuana equisainia micuaneda beidaji epu puji.

### *Diosu da hueda nime*

<sup>5</sup> Cristo ja mesa jabuetsuati cuana ecuanaju buetsuatana. Tueda jabuetsuati cuana ecuanaju micuana jiahue equisainia. Diosu da hueda nime Cristo ja ecuanaju buetsuatana. Aimue apuda tu peje su yani mahue. <sup>6</sup> Da su ecuaneda tu neje jaduneti putsu, hueda su, jucha mahue puniuneti

taji. Ecuáneda Cristo neje dunejiji epuani biame, apuda, jucha cuana su epuniunetiani su, da su ecuaneda bid'umimi puji epuani. Aimue ecuaneda ene quita emimiani mahue, madhada su epuniunetiani putsu. <sup>7</sup> Diusu mu hueda su yani. Ahua mesa quisa saida cuana su ecuaneda epuniuneti su, ecuaneda cama dunejiji epu. Daja huecha Jesucristo ja mesa ami neje ecuaana sa jucha cuana pamapa edhipatani.

<sup>8</sup> Ecuáneda juchaji cama epuani. Ahua ecuaneda, "Ecuáneda mu jucha mahue", epuani su, ecuaneda bid'umimi puji. Daja pu putsu, ecuaneda quitaita ebasetiani. <sup>9</sup> Ahua ecuaneda ecuaana sa jucha cuana Diusu peje su etuaquisa su, tuahueda ecuaana eperdonatayu, tueda da butsepi putsu. Daja huecha pamapa ai madhada cuana jenetia ecuaana d'ejí su yatayu. <sup>10</sup> Ahua ecuaneda, "Ecuáneda mu jucha a bue mahue", epuani su, ecuaneda Diusu bid'umimi puji pu cua nime yameinia. Ahua daja ecuaneda epu su, mesa mimi ecuaana sa muesumu su aimue yani mahue.

## 2

### *Cristo ja Diusu butse su ebajatani ecuaneseda puji*

<sup>1-2</sup> Ibuneda edue cuana, yama micuana daja jubida equisainia micuaneda jucha ya mahue puji. Daja biame, ahua quebata ja jucha yata su, Jesucristo ja Tata Diusu juchaji sa puji ebajatani Diusu ja tueda paperdonata puji. Beju Tata Diusu ja Cristo eid'abatayu, Cristo da nimebutsepi, ecuaana sa jucha cuana jepuiti manuana putsu. Aimue ecuaneseda puji bahui manuana mahue. Pamapa cristiano cuana sa jucha cuana jepuiti di manuana.

<sup>3</sup> Ahua ecuaneda Diusu ene quita eshanapainia su, tusa jacuatsasiati cuana ecuaneda ya. <sup>4</sup> Quebata, "Yama Cristo eshanapainia", epuani biame, Diusu sa jacuatsasiati cuana beju aimue yatani mahue su, tueda da bid'umimi puji. Aimue Diusu eshanapatani mahue. <sup>5</sup> Ahua quebata ja mu Cristo sa jacuatsasiati cuana yatani su, tuahueda Diusu saida ibuneda ebatani. Da neje da ecuaneda eshanapainia aidhe Diusu neje dunejiji yani. <sup>6</sup> Ahua quebata, "Ema mu Diusu neje dunejiji yani", epuani su, tuseda puji cuaja Cristo puniunetiana nime, puniuneti taji.

### *Jacuatsasiati eichacua*

<sup>7</sup> Edue cuana, aimue yama jacuatsasiati eichacua micuana ebuetsuainia mahue. Diusu ja ecuaana biahua tiempo jenetia tueda jacuatsasiati tiataidha. Ecuaana daja hue jiahue teje Diusu ja tueda jacuatsasiati quitaita etiatani. <sup>8</sup> Daja biame, yama micuana neicha tueda jacuatsasiati uja etiainia



eichacua pu cua nime: Meibunebatique micuaneda cama huamahuama. Daja Cristo puniunetiana. Daja huecha ecuaneseda di puniuneti taji. Diusu sa jabuetsuati cuana shanapa putsu, micuaneda apuda jenetia Diusu sa hueda su ecuinani.

<sup>9</sup> Quebata, “Ema mu Diusu sa jabuetsuati cuana su epuniuneti”, epuani biame, mesa edue eduininibatani su, aimue tueda Diusu sa jabuetsuati cuana su epuniuneti mahue. Apuda su tsuhu yani, Diusu sa jabuetsuati cuana mue shanapa putsu. <sup>10</sup> Ahua quebata ja mesa edue saida ibuneda ebatani su, tueda da Diusu sa jabuetsuati cuana su epuniuneti. Aimue jucha su edajaja mahue. <sup>11</sup> Ahua quebata ja mu mesa edue eduininibatani su, tueda da apuda su hue tsuhu epuniuneti, Diusu mue shanapa putsu. Padha nime fue mahue quepia epuhu, apuda su yani putsu.

<sup>12</sup> Ibuneda edue cuana, Diusu ja micuana sa jucha cuana perdonatana Jesucristo jepuiti. <sup>13</sup> Tata cuana, micuaneda Cristo eshanapainia. Tueda anidha, pamapa ai cuana aniji mahue su. Edeahue cuana, micuaneda Ishahua pishitiameana.

Edue cuana, yama micuana quirica su pamapa quisa-peana, micuaneda Diusu eshanapainia putsu. <sup>14</sup> Tata cuana, micuaneda Cristo eshanapainia. Tueda anidha, pamapa ai cuana aniji mahue su. Edeahue cuana, micuaneda da nimetucheda. Diusu sa quisa saida cuana su jei puana putsu, Ishahua pishitiameana.

<sup>15</sup> Be pamapa ye mundo sa ai madhada cuana tsada mebaji. Quebata ja ye mundo sa ai madhada cuana ebia su tsada ebatani su, aimue tuahueda Tata Diusu tsada ebatani mahue. <sup>16</sup> Mundo su aniji madhada cristiano cuana da ebia su aida ebatitani. Ai utsatada madhada cuana bahui mecuana sa tsada ya puji. Pamapa tuna ebatani ai cuana mecuana sa tsada. Pamapa tueda ai madhada cuana da ye mundo jenetia. Aimue Diusu peje jenetia mahue. <sup>17</sup> Beju ye mundo etiatanapeeni. Pamapa ye mundo sa ai madhada cuana di etaitanapeenitayu. Diusu sa tsada yatani cuana bahui tu neje eid'e yanienitiyu. Aimue etaitanapetayu huecuana mahue.

*¿Aidhe da bid'umimi puji?*

<sup>18</sup> Ibuneda edue cuana, tiempo beju epupe piba. Micuaneda id'abana Cristo neje jamajaitiji deja madhada, jucha aida epue Cristo sa puji madhada hue emimi puji. Tueda aida puja ebatani Cristo sa eturuca. Beju jahue daja nime quejucua biame Cristo neje jamajaitiji deja madhada cuana yanita. Da putsu, ecuaneda bahue tiempo beju epupe piba. Cristo epueicha. <sup>19</sup> Tuneda da ecuaneseda neje equene pudhaataniunetitaina. Cristo tsada mue ba putsu,

puderatana ecuana duju jenetia. Aimue ecuana nime putsu, netideratana. Ahua ecuana nime Diosu sa dharejiji puta cua puina huecuana su, aimue detse netideraja puta cua puina mahue. Daja putana huecuana, aimue Diosu sa dharejiji quitaita mahue putsu.

<sup>20</sup> Micuaneda mu aimue tuna nime mahue, Diosu sa dharejiji quitaita putsu. Cristo ja micuana Espiritu Santo tiatana putsu, micuaneda eshanapaeninia Diosu sa ene quita jabuetsuati cuana. <sup>21</sup> Tueda jabuetsuati su aimue bid'umimi yani mahue micuaneda bahue. Da putsu, yama micuana ye quirica etiamenia. Aimue detse jabuetsuati bid'umimi cuana Diosu sa ene quita jabuetsuati jenetia cuinana cue mahue.

<sup>22</sup> Ahua quebata, "Cristo da aimue Diosu sa jabeituti mahue", epuani su, tueda da deja madhada bid'umimi puji. Cristo neje emajaitiani. Tata Diosu, mesa Ebacua Jesucristo neje tupupai ejusiaderatani. <sup>23</sup> Aimue Tata Diosu eshanapatani mahue, Cristo jusiaderatana putsu. Quebata mu Diosu sa Ebacua Jesucristo jepuiti equisanetiacuinati su, tuahueda Tata Diosu eshanapatani.

<sup>24</sup> Da putsu, meaderatique Diosu sa ene quita jabuetsuati cuana. Tueda jabuetsuati cuana ecuanaju micuana equene buetsuapiruana. Ahua daja hue micuaneda tueda jacuat-sasiati cuana yaderati su, Ebacua Jesucristo, Tata Diosu neje micuaneda dunejiji epu. <sup>25</sup> Da su beju Cristo ja ecuana eid'e yameenitayu, cuaja mesa jamitsuti ecuana tiatana batame.

<sup>26</sup> Merejaenitique bid'umimi ebuetsuaji cuana neje. Tuneseda tsada micuana pia jabuetsuati cuana neje ebasea puji. <sup>27</sup> Micuaneseda mu Espiritu Santo yani. Jesucristo ja micuana tiatana. Da putsu, micuaneseda tsada epuani mahue pia cuana ja micuana ebuetsuata, Espiritu Santo ja quitaita micuana Diosu sa ene quita jabuetsuati cuana ebuetsuatani putsu. Tueda aimue bid'umimi puji mahue. Da putsu, daja hue medunederatique Cristo neje, cuaja Espiritu Santo ja micuana ebuetsuatani batame.

<sup>28</sup> Ibuneda edue cuana, Cristo neje medunederatique. Ahua daja jadunetijiji micuaneda yani su, tu epueicha su, aimue micuaneda tu ba putsu, ebidhu mahue. <sup>29</sup> Beju Jesucristo da butsepi micuaneda bahue. Daja huecha pamapa ai butsepi, saida yatani cuana da Diosu sa ebacua cuana eputani.

### 3

#### *Tata Diosu sa ebacua cuana*

<sup>1</sup> Mepibaenique Diosu ja ecuana ebia su ibuneda ebatani putsu, mesa ibuneda ebacua cuana ecuana atana. Da putsu,

ye mundo su aniji cristiano madhada cuana ja aimue ecuana eshanapatani mahue, Diusu eshanapatani huecuana mahue putsu. <sup>2</sup> Edue cuana, jiahue ecuaneda Diusu sa ebacua cuana. Bue mahue ecuaneda cuaja anime epu Diusu neje cielo su. Daja biame, ecuaneda bahue Cristo epueicha su, ecuaneda tu nime epu. Da hora su beju tu ba putsu cama, ecuaneda tu nime enimeturucapetiyu. Tu nime huecha ecuaneda epuyu beju. <sup>3</sup> Ahua ecuaneda daja Cristo peje su enimeid'uatiani su, aimue ecuaneda jucha cuana aja epu mahue, tu nime butsepi ecuaneda epu.

<sup>4</sup> Quebata ja mu jucha yatani, tuahueda Diusu sa jacuat-sasiati cuana aimue jei aja yatani mahue. <sup>5</sup> Beju micuaneda bahue Cristo ye mundo su pueana ecuana sa jucha cuana edhipa puji, tueda jucha mahue biame. <sup>6</sup> Quebata tu neje daja hue dunejiji epudera su, aimue tuahueda jucha cuana yata mahue. Quebata mu jucha cuana su epuniuneti su, aimue tuahueda Cristo eshanapatani mahue. <sup>7</sup> Edue ibuneda cuana, be aiya biame mebaseataji pia jabuetsuati cuana neje. Quebata ja ai saida cuana yatani, tueda da Cristo nime saida, nimebutsepi. <sup>8</sup> Jucha su epuniuneti cuana mu Ishahua sa cristiano cuana eputani, tueda equene jenetia juchaji puidha putsu. Da putsu, Diusu sa Ebacua Jesucristo ye mundo su pueana Ishahua sa ai madhada ajiji cuana etaitaname puji.

<sup>9</sup> Quebata Diusu sa ebacua epuani su, aimue tuahueda daja hue jucha cuana yaderatita mahue, tueda Diusu ja eid'e nimeeichacua atana putsu. Jucha mesa a taji mahue, Diusu sa ebacua putsu. <sup>10</sup> Beju Diusu sa ebacua cuana ebametitani. Daja huecha Ishahua sa ebacua cuana. Quebata ja ai saida cuana yatani mahue, daja huecha pia cuana ibuneda ebatani mahue, aimue tueda Diusu sa ebacua mahue.

### *Ibuneda mebatija huamahuama*

<sup>11</sup> Beju Cristo ja equene jenetia ecuana cuatsasiapirutana huamahuama ecuaneda ibuneda ebatu puji. <sup>12</sup> Be Caín chenu puidha nime mepuji. Tuahueda Ishahua sa tsada ataidha, mesa edue manuametaidha putsu. Caín chenu sa ai jaati cuana madhada hue Diusu butse su puidha. Mesa edue sa ai jaati cuana mu Diusu butse su saida puidha putsu, Caín chenu ja manuametaidha.

<sup>13</sup> Edue cuana, be menimetsatiji, Diusu mue shanapa cuana ja micuana eduinibata su. <sup>14</sup> Diusu ja ecuana nimeeichacua, eid'e aenitana cielo su tu neje yaneniti puji. Da putsu, ecuaneda edue cuana saida ibuneda ebatiani. Beju quebata ja mesa edue ibuneda ebatani mahue, aimue tueda nimeeichacua mahue. Tueda Diusu mahue putsu, emanu nime. <sup>15</sup> Ahua quebata mesa edue eduinibata su, tueda da

jamanuametiji nime. Jamanuametiji cuana da aimue Diosu neje cielo su eid'e yanitita mahue. <sup>16</sup> Cristo ja ecuana ebia su ibuneda ebatani putsu, ecuaneseda puji manuana. Daja huecha ecuaneseda edue cuana ibuneda ba taji emanu teje. <sup>17</sup> Quebata ai tupuji edue ja pia edue sa ai dia taji, ejud'uji cuana ehueitiani ebatani biame, mue tia su, ¿ai tuahueda Diosu ibuneda ebatani bata? <sup>18</sup> Ibuneda edue cuana, aimue mimi neje bahui ecuaneseda ibuneda jabati taji mahue. Jat-sahuati neje di ecuaneseda huamahuama jabati taji.

<sup>19</sup> Ahua daja ecuaneda ibuneda ebatiani su, ecuaneda da Diosu sa dharejiji saida cuana ebametiani. Da su Diosu peje su saida, beidaji epu, edue cuana neje saida ebatiani putsu. <sup>20</sup> Edue cuana, ahua ecuaneda juchaji ebatiani su, Diosu ebia su aida putsu, ecuana perdonata cua. <sup>21</sup> Daja huecha ahua jucha mahue ecuaneda ebatiani su, ecuaneda Diosu peje su jubida enimetuheatiani. <sup>22</sup> Pamapa ecuana sa jabajati cuana etiata, ecuaneda pamapa mesa jacuatsasiati, ai tsada cuana yainia putsu. <sup>23</sup> Beju uja mesa jacuatsasiati: Ecuana mesa Ebacua Jesucristo peje su jei mepuja, daja huecha huamahuama ibuneda mebatija. Daja ecuana cu-atsasiatana. <sup>24</sup> Quebata cuana ja tueda jacuatsasiati detse yatani su, tuneda da Diosu neje dunejiji eputaniuneti. Bahue ecuaneda Diosu ecuana neje dunejiji yani, mesa Espíritu Santo ecuana sa muesumu su yani putsu.

## 4

### *¿Aidhe sa Espíritu Santo yani?*

<sup>1</sup> Ibuneda edue cuana, quebata cuana, “Ecuana mu Diosu sa jabuetsuati cuana ebuetsuainia”, eputa su, be tipeida jei meaji huecuana. Equene aba taji huecuana, jucuada bid'umimi quisaquisa puji cuana ye mundo su yani putsu. Mebaenique tuna sa jabuetsuati cuana Diosu peje jenetia, ahua mahue. <sup>2</sup> Ahua quebata, “Diosu sa Ebacua Jesucristo ye mundo su ene quita deja bataji puana”, epu su, tueda Diosu sa ene quita mimi quisaquisa epuani. Mesa jabuetsuati cuana da Espíritu Santo peje jenetia. <sup>3</sup> Quebata mu aimue daja Cristo jepuiti quisaquisa epuani mahue su, da su aimue mesa jabuetsuati cuana Espíritu Santo peje jenetia mahue. Cristo neje jamajaitiji deja madhada, jucha aida sa jacuatsasiati cuana bahui quisaquisa epuani. Tueda Cristo neje jamajaitiji deja madhada bataji epu micuaneda id'abana. Beju jiahue quitaita jucuada bid'umimi quisaquisa puji cuana tusa jabuetsuati madhada cuana quisaquisa eputani pamapa ejude cuana je.

<sup>4</sup> Edue cuana, micuaneda da Diusu sa dharejiji cuana. Micuaneda tueda bid'umimi ebuetsuaji cuana pishitiameana, Diusu micuana sa muesumu su Ishahua ebia su aida tucheda yani putsu. <sup>5</sup> Tueda bid'umimi ebuetsuaji cuana da ye mundo jenetia putsu, cristiano cuana sa jabuetsuati bahui quisaquisa eputani. Cristiano cuana ja tipeida eid'abatani huecuana. <sup>6</sup> Ecuana mu Diusu peje jenetia putsu, Diusu sa quisa saida cuana bahui quisaquisa epuani. Da putsu, Diusu eshanapatani cuana ja ecuana eid'abatani. Diusu tsada mahue cuana ja mu aimue ecuana id'abaja yatani mahue. Da putsu, ecuaneda shanapaeni cua quebata sa Diusu sa Espíritu Santo yani, daja huecha quebata bid'umimi puji.

*Diusu ja cristiano cuana ibuneda batana*

<sup>7</sup> Edue cuana, jubida huamahuama ibuneda mebatique, daja Diusu ja ecuana ebuetsuatani putsu. Quebata ja edue cuana ibuneda ebatani su, tueda da Diusu sa ebacua. Diusu saida eshanapatani. <sup>8</sup> Quebata ja mu aimue pia cuana ibuneda ebatani mahue su, aimue tuahueda Diusu eshanapatani mahue, Diusu da ibuneda jabatiji putsu. <sup>9</sup> Diusu ja ecuana ebia su ibuneda batana putsu, mesa piada quita Ebacua ye mundo su beitutana ecuaneda tu jepuiti eid'e epueni puji. <sup>10</sup> Diusu ja ecuana equene ibuneda batana. Aimue ecuaneda tueda equene ibuneda bapiruana mahue. Tuahueda ecuana ebia su ibuneda ba putsu, mesa Ebacua beitutana ecuana sa jucha cuana jepuiti pamanu puji.

<sup>11</sup> Edue cuana, Diusu ja ecuana daja ebia su ibuneda batana putsu, ecuaneda di huamahuama saida jabati taji. <sup>12</sup> Aiya biame Diusu mue ba biame, ahua ecuaneda huamahuama ibuneda ebatiani su, Diusu ecuana sa muesumu su yani. Mesa jaibunebati butsepi ebametiani ecuana duju su. <sup>13</sup> Bahue ecuaneda Diusu ecuana neje dunejiji yani, Espíritu Santo ecuana tiatana putsu. <sup>14</sup> Ecuana ja bana Diusu ja mesa Ebacua ye mundo su beitutana cristiano cuana d'ejí su ya puji. Tueda bahui ecuanaju cristiano cuana equisainia. <sup>15</sup> Quebata, "Cristo da Diusu sa Ebacua", epu su, tueda Diusu neje dunejiji yani.

<sup>16</sup> Da su ecuaneda bahue Diusu ja ecuana ibuneda ebatani. Diusu da ibuneda jabatiji. Quebata ja pia cuana ibuneda ebatani su, da su mesa muesumu su Diusu yani. <sup>17</sup> Daja Diusu neje puniuneti putsu, ecuaneda huamahuama ebia su saida ibuneda ebatani. Da su Cristo epueicha su, aimue ecuaneda ebidhu mahue, ecuaneda ye mundo su Cristo nime saida, ibuneda neje puniunetiana putsu. <sup>18</sup> Quebata ja Diusu ibuneda ebatani su, aimue mesa iyuame yani mahue. Beju

iyuame taitanapeana, Diusu ibuneda ba putsu. Quebata ja mu Diusu ibuneda ebatani mahue su, tuahueda Diusu sa castigo eid'uatani, aimue Diusu ibuneda ebatani mahue putsu.

<sup>19</sup> Ecuana Diusu ibuneda ebainia tuahueda ecuana equene bapirutana putsu. <sup>20</sup> Ahua quebata, "Yama mu Diusu ibuneda ebainia", epuani biame, ahua aimue mesa edue ibuneda ebatani mahue su, tueda da bid'umimi puji. Ahua quebata ja mesa edue ba putsu biame ibuneda mahue ebata su, ¿cuaja ni da tuahueda Diusu ibuneda bame ata cua? <sup>21</sup> Beju uja Diusu ja ecuana cuatsasiataidha: Ahua quebata ja Diusu ibuneda baja su, daja huecha mesa edue ibuneda ba taji.

## 5

### *Cuaja pishitiame a taji ye mundo sa ai madhada cuana*

<sup>1-2</sup> Quebata, Jesucristo da Diusu sa jabeituti, jei epuani su, tueda da Diusu sa ebacua. Ahua ecuaneda Tata Diusu ibuneda ebainia su, ahua tusa jacuatsasiati cuana jei ya su, da su ecuana sa edue cuana di ecuaneda ibuneda eba. <sup>3</sup> Ecuana Diusu ibuneda ba putsu, tusa jacuatsasiati cuana jei a taji. Beju tusa jacuatsasiati cuana atadhada mahue ya puji. <sup>4</sup> Pamapa Diusu sa ebacua cuana ja ye mundo sa ai madhada cuana epishitiametani, Diusu peje su enimetucheatiani putsu. <sup>5</sup> Jesucristo da Tata Diusu sa Ebacua jei eputani cuana ja bahui ye mundo sa ai madhada cuana pishitiameta cua.

### *Diusu sa Ebacua Jesucristo jepuiti quisa*

<sup>6</sup> Beju Jesucristo ye mundo su pueana. Tueda da Diusu sa Ebacua ecuaneda bahue saisia. Yahui neje Diusu sa puji jaichaderatiana su, Diusu sa Ebacua jabametiana. Curusu su mesa ami jad'uichatiana su di, Diusu sa Ebacua jabametiana. Espíritu Santo ja di Cristo Diusu sa Ebacua equisanetiacuinatani. Aimue tueda bid'umimi pu bue mahue. <sup>7</sup> Beju quimisha Cristo quisanetiacuinaji cielo su yani. Tata Diusu, Jesucristo, Espíritu Santo, tuneda da Cristo da Diusu sa Ebacua equisanetiacuinatani. Tueda quimisha cuana da piada hue epuani. <sup>8</sup> Daja huecha yahua su di quimisha yani. Espíritu Santo, yahui, ami cuana ja tupupai saida equisanetiacuinatani Cristo da Diusu sa Ebacua. <sup>9</sup> Ecuana cristiano cuana sa mimi su jei epuani biame, Diusu sa mimi cuana su mu ebia su saida quita jei epu puji, tueda mesa Ebacua jepuiti emimiani putsu. <sup>10</sup> Quebata Diusu sa Ebacua Jesucristo peje su jei epuani su, tueda mimi mesa muesumu su yani. Quebata mu aimue Diusu peje su jei epuani mahue su, tuaheda Diusu bid'umimi puji yametani, tusa Ebacua jepuiti mimi cuana su jei puja mahue putsu. <sup>11</sup> Beju Diusu

ja ecuana eid'e ameenitana tu neje cielo su yanienitiyu puji, ecuaneda Cristo neje dunejiji yani putsu. <sup>12</sup> Quebata Cristo neje dunejiji yani, tueda da Diosu neje eid'e yanienitiyu. Quebata mu Cristo neje aimue dunejiji yani mahue, aimue Diosu neje eid'e yanienitiyu mahue.

*Tije quisa cuana*

<sup>13</sup> Edue cuana, micuaneda Cristo peje su jei puana putsu, yama micuana peje su ye quirica ebeituinia, micuaneda Diosu neje eid'e yanienitiyu bahue mepuque puji.

<sup>14</sup> Ecuanaeda bahue ahua pamapa Diosu sa tsada ai cuana ecuaneda Diosu ebaja su, tuahueda ecuana etiata. <sup>15</sup> Ecuana sa jabajati eid'abatani putsu, ecuana etiata.

<sup>16</sup> Ahua quebata ja mesa edue jucha yatani ebatani su, ahua tueda jucha ja aimue manu su edusuta mahue su, da su tuseda edue sa puji Diosu baja taji, Diosu ja tueda perdona putsu, eid'e paata puji. Aimue pamapa jucha cuana ja etse manu su edusutani mahue. Piada jucha bahui yani beju etse manu su edusu puji. Ahua quebata ja mesa edue tueda jucha yatani ebatani su, be Diosu pabajata tuseda puji. <sup>17</sup> Pamapa ai madhada cuana jucha puji epuani. Aimue pamapa jucha ja etse manu su edusutani mahue. Piada ja bahui manu su edusutani.

<sup>18</sup> Edue cuana, bahue ecuaneda Diosu sa ebacua cuana aimue jucha cuana su eputaniuneti mahue. Aimue Ishahua ja madhata cua huecuana mahue, Jesucristo ja einatsihuatani huecuana putsu.

<sup>19</sup> Edue cuana, bahue ecuaneda Diosu sa ebacua cuana ecuaneda epuani. Pamapa ye mundo su aniji cristiano cuana mu Ishahua sa eme su yanita.

<sup>20</sup> Ecuanaeda bahue Diosu sa Ebacua Jesucristo ye mundo su pueana. Tuahueda ecuana ene quita Diosu shanapametana. Tueda da ene quita Diosu, mesa tata neje tupupai. Tu neje ecuaneda dunejiji yani. Pamapa tu peje su jei eputani cuana eid'e cielo su yameenitayu. <sup>21</sup> Ibuneda edue cuana, be memit-sutsuaji bid'umimi diusu eimea cuana. Daja papu.

## SEGUNDA CARTA DEL APOSTOL SAN JUAN

Juan sa beta puji quirica da huai chidi hue. Piada capítulo bahui. Ebuetsuatani ecuana cuaja Cristo neje saida, ene quita butsepi ani taji. Daja huecha cuaja huamahuama ibuneda jabati taji ecuena ebuetsuatani.

Ye versículo da ebia su saida quita ebuetsuati puji: 9.

### *Huamahuama saida ibuneda jabati taji*

<sup>1</sup> Ema da Juan. Diusu peje su jei eputani cuana sa ehuidusuji edhi da ema. Ye quirica yama ebeituinia piada Diusu ja dharetana edue epuna peje su. Tusa ebacua cuana peje su di yama ye quirica ebeituinia. Yama ene quita ibuneda ebainia huecuana. Aimue yama bahui mahue. Pamapa pia Diusu peje su jei eputani cuana ja di ebia su ibuneda ebatani huecuana. <sup>2</sup> Edue cuana, yama micuana ibuneda ebainia Diusu ja pamapa ecuana sa muesumu su mesa ene quita mimi ichaenitana jepuiti. <sup>3</sup> Tata Diusu ja, mesa Ebacua Jesucristo neje meibunebataque. Menimepi-jajametaque tse. Tuatseda ebia su ene quita ibuneda mebataque.

<sup>4</sup> Piada piada mique ebacua cuana Cristo neje saida eputaniuneti putsu, ema beidaji epuani. Daja epuniuneti puji ecuana Tata Diusu ja cuatsasiatana. <sup>5</sup> Edue epuna, jiahue yama mi ebajainia ecuaneda huamahuama ibuneda mebatija puji, cuaja Diusu ja ecuana equene jenetia cuatsasiapirutana batame. Aimue tueda jacuatsasiati eichacua mahue. <sup>6</sup> Ahua ecuaneda Diusu ibuneda ebainia su, mesa jacuatsasiati yayu. Equene micuaneda id'abana jacuatsasiati da uja epuani: Ecuana huamahuama saida ibuneda mebatija puji.

### *Jabaseatiji cuana*

<sup>7</sup> Ebia su bid'umimi jabaseatiji ebuetsuaji cuana ye mundo su yani. Cristo cielo jenetia pueana ene quita deja epu puji aimue jei eputani huecuana mahue. Tuneda da jabaseatiji cuana beju. Cristo neje jamajaitiji huecuana. <sup>8</sup> Merejatique tuna neje. Be jei mepuji tuna nime. Be merijinetiaji ecuanaju micuana tiana jabuetsuati cuana. Ahua daja hue tueda jabuetsuati su epuderati su, Diusu ja micuana pamapa tusa ai saida cuana etiatayu.

<sup>9</sup> Ahua quebata Cristo sa jabuetsuati cuana jenetia enetidera su, Diusu peje jenetia di enetidera. Aimue Diusu neje



yani mahue. Ahua quebata ja mu daja hue Cristo sa jabuetsuati cuana yaderatita su, tueda da Tata Diosu, Jesucristo detse neje dunejiji yani. <sup>10</sup> Ahua quebata pia jabuetsuati neje micuana peje su ecuina su, be micuana sa ete cuana su saida mebatsuji. Be memitsuji. <sup>11</sup> Ahua quebata edue ja tueda bid'umimi ebuetsuaji cuana ebatsuta su, tueda di tuna nime madhada hue epu.

*Tije quisa cuana*

<sup>12</sup> Yani quema ebia su micuana equisa puji biame, aimue yama micuana jahue ye quirica su equisa mahue. Beju ema quitaita eputi micuana peje su tueda ai cuana quisape putsu, ecuana beidaji epueni puji.

<sup>13</sup> Ibuneda edue epuna, upia ema neje yani mique dudu sa ebacua cuana ja mi emitsuametani ye quirica su. Tueda mique dudu di mi dharetana nime, Diosu ja dharetana. Daja papu.

## TERCERA CARTA DEL APOSTOL SAN JUAN

Juan sa quimisha puji quirica da piada capítulo bahui. Ye quirica su Juan quisa epuani piada edue madhada, tueda quita jabatiji jepuiti. Daja huecha piada edue saida, butsepi jepuiti quisa epuani.

Ye versículo da ebia su saida quita ebuetsuati puji: 11.

### *Juan da Gayo jepuiti saida quisa puana*

<sup>1</sup> Ema da Juan. Diusu peje su jei eputani cuana sa ehuidusuji edhi da ema. Quema Cristo jepuiti ibuneda edue Gayo peje su yama ye quirica ebeituinia. Tueda yama ene quita ibuneda ebainia.

<sup>2</sup> Edue, yama Diusu ebajainia miqueda puji mi saida anique puji. Cuaja mique piba Diusu peje su saida epuani nime, daja huecha mique equita saida papu. <sup>3</sup> Piada piada edue cuana ema peje su cuina putsu, mida Diusu neje saida epuniuneti ema quisatana huecuana. Daja hue mesa ene quita jabuetsuati cuana su epuderaniuneti. Da putsu, ema ebia su beidaji epuani. <sup>4</sup> Ahua quebata quema edue cuana Diusu sa jabuetsuati cuana su eputaniuneti su, beidaji ema epuani.

<sup>5</sup> Edue, ema bahue Diusu sa quisaquisa puji cuana mique ete su ecuinatitani su, miada saida ebatsuinia huecuana. Piada piada eshanapainia mahue biame, saida ebatsuinia huecuana. <sup>6</sup> Tuneda quitaita upia aniji edue cuana dhitajiji anitaina su, mi jepuiti saida quisa putana. Cuaja miada saida batsuana huecuana ecuanaju quisatana huecuana. Daja hue tsahuaque huecuana. Tiaque huecuana mecuana sa edid'i je puji ai dia taji cuana, tueda da Diusu sa tsada putsu. <sup>7</sup> Pamapa ejude meamea eputaniuneti huecuana Diusu sa quisa saida cuana quisaquisa epu puji. Tuna sa ai dia taji cuana inatsuja mahue atana huecuana Diusu mue shanapa cristiano cuana peje jenetia. <sup>8</sup> Da putsu, ecuaneseda tsahua taji huecuana Diusu sa quisa saida cuana daja hue quisaquisa paputita huecuana puji. Ahua daja hue ecuaneda etsahua huecuana su, ecuaneda di tuna neje tupupai Diusu emebaja.

### *Diótrfes da aimue saida puniunetiana mahue*

<sup>9</sup> Beju mi yani ejude su aniji edue cuana peje su yama pia quirica beituana ai cuana tuna equisa puji. Diótrfes ja mu ema jei aja mahue atana, tueda ebia su aida puja epuani micuana duju su putsu. Micuana sa ehuidusuji puja. <sup>10</sup> Da su beju ahua ema mi peje su eputi su, Diótrfes ja ema eibuatani cuana yama mi eshanapamepe. Ed'ejí su, tuahueda aimue

Diusu sa quisaquisa puji cuana saida batsuja yatani mahue, micuana peje su ecuinatani huecuana su. Ahua quebata edue ja quisaquisa puji cuana saida ebatsutani su, Diótfefes ja tueda edue ejusiacuinatani jadhitati cuana jenetia aimue enubiyuicha mahue puji.

<sup>11</sup> Ibuneda edue, be Diótfefes nime puji. Ai saida cuana bahui aque. Quebata ja ai saida cuana yatani su, tueda da Diusu sa. Quebata ja mu ai madhada cuana yatani su, tuahueda aimue Diusu eshanapatani mahue.

*Demetrio saida puniunetiana*

<sup>12</sup> Beju edue Demetrio saida epuniunetiani putsu, pamapa su tuseda puji saida emimitani. Ya di tuseda puji saida emimiani. Aimue ema bid'umimi pu bue mahue beju micuaneda bahue.

*Tije quisa cuana*

<sup>13-14</sup> Edue, yani quema ebia su mi equisa puji biame, aimue jiahue ye quirica su mi yama equisa mahue, tipeida mi yama baja yainia putsu. Yama mi pamapa equisape, mi peje su cuinati putsu.

<sup>15</sup> Nimepijajajiji anique. Upia aniji edue cuana ja mi emit-suametani. Pamapa dapia aniji edue cuana mitsuque quema ebani su. Daja papu.

## LA CARTA DEL APOSTOL SAN JUDAS

Ye huai chidi quirica da Judas sa jadereti. Tueda Jesús sa edue puina. Mesa derejiji su quisa epuani bid'umimi jabuetsuati cuana jepuiti. Daja huecha Diusu ja tu peje su jei eputani cuana etucheametani quisa epuani.

Ye versículo detse da ebia su saida quita ebuetsuati puji: 24,25.

### *Judas ja quirica tiametana Diusu sa dharejiji cuana*

<sup>1</sup> Ema da Judas. Jesucristo sa emebajaji da ema. Ema da Jacobo sa edue. Yama ye quirica ebeituinia Tata Diusu sa dharejiji cristiano cuana peje su. Tuahueda ibuneda ebatani huecuana. Jesucristo sa puji ichaderatana huecuana. Cristo neje dunejiji yani putsu, saida ebatani huecuana. <sup>2</sup> Edue cuana, Diusu ja meichenubataque, menimepijajametaque. Ebia su ibuneda mebataque.

### *Bid'umimi ebuetsuaji cuana*

*(2 Pedro 2.1-17)*

<sup>3</sup> Edue cuana, Diusu ja ecuana d'ejí su yatani ai cuana jepuiti yama micuana quirica neje quisaja adhaana. Jiahue mu yama micuana pia ai cuana jepuiti equisa. Jubida Diusu sa jabuetsuati cuana cristiano cuana micuaneseda quisa taji. Tueda jabuetsuati cuana Diusu ja mesa dharejiji cuana peje su menajatiatana saida painatsihuata huecuana puji.

<sup>4</sup> Beju piada piada bid'umimi ebuetsuaji deja madhada cuana micuana neje eputaniuneti. Diusu sa dharejiji cristiano cuana uja ebuetsuatani huecuana: “Saida hue ai madhada cuana ya puji. Ahua micuaneda ai madhada cuana ya su, aimue Diusu ja micuana ecastigata mahue, tueda ebia su saida putsu.” Diusu ebia su saida putsu, ai madhada papu yatani huecuana. Tuahueda ecastigata mahue pepe hue eputani huecuana. Diusu tuna emetse mahue nime ebatani huecuana. Daja huecha ecuana sa Echua Puji Jesucristo tsada mahue ebatani. Biahua tiempo Diusu sa quirica su uja deretaidha tuna jepuiti: “Ye bid'umimi ebuetsuaji deja cuana Diusu ja ecastigatayu.”

<sup>5</sup> Edue cuana, mepibaenique cuaja israelita chenu cuana putaidha. Diusu ja Egipto yahua jenetia jemicuinataidha huecuana biame, tuna duju su tu peje su jei puja mahue putaidha cuana manunamepetaidha. <sup>6</sup> Daja huecha mepibaenique ángel a taji mahue cuana. Equene pamapa ángel cuana butsepi neje Diusu mebajataina. Da su piada

piada tuneda Diusu majaiji putaidha. Equene Diusu ja huaraji aida ichataidha huecuana putsu, Diusu ebia su aida puja putaidha huecuana. Da putsu, Diusu ja apuda su, risijiji equinatani huecuana tuna sa cuati castigo hora ecuina teje. <sup>7</sup> Daja huecha mepibaenique Sodoma, Gomorra ejude detse su anitaidha cuana. Tueda ejude detse naja su ejude cuana su anitaidha cuana di mepibaenique. Tuneda da ángel madhada cuana nime pamapa ai madhada cuana ataina. Deja, epuna cuana ja pamapa ai utsatada madhada cuana ataina. Deja cama jucha ai utsatada madhada adhida cuana ataina huecuana. Daja huecha epuna cuana ja ataina. Da putsu, Diusu ja cielo jenetia cuati beitutaidha. Pamapa tueda ejude cuana beju tiunepetaidha, cristiano cuana ja jucha aida cuana ataina putsu. Daja pamapa cristiano juchaji cuana Diusu ja ecastigaenitayu, cuati castigo su ebeituenitayu putsu. Dapia sufri epuenitita huecuana.

<sup>8</sup> Beju jiahue tsine bid'umimi ebuetsuaji cuana da Sodoma, Gomorra ejude detse su anitaidha cuana nime eputani. Daja hue ai utsatada madhada cuana yaderatani huecuana. Tuna sa equita emadhatiatitani huecuana. Aimue huaraji cuana id'abaja yatani huecuana mahue. Ángel huaraji cuana emadhabatani huecuana. <sup>9</sup> Beju ángel Miguel da huaraji ebia su aida biame, aimue Ishahua d'ayataidha mahue, Ishahua neje Moisés da equita jepuiti jasatsiatidha su. Uja Miguel ja Ishahua ataidha: "Diusu ja bahui d'ayataque." <sup>10</sup> Jiahue bid'umimi ebuetsuaji cuana pamapa shanapa bue mahue ai cuana jepuiti madhada hue emimitani. Tuneda da animalo cuana nime. Pamapa mecuana sa ai utsatada cuana bahui yatani huecuana. Da su tuneda quitaita hue enid'umadhatitani.

<sup>11</sup> ¡Aba tuneda! Cuaja biahua tiempo Caín chenu ja ataidha nime, daja madhada yatani huecuana. Biahua tiempo Balaam chenu ja ebia su chipilu tsada bataidha putsu, jeitid'uidha Diusu peje jenetia. Daja jiahue bid'umimi ebuetsuaji cuana eputani. Daja huecha Coré chenu nime di yatani huecuana. Coré ja huaraji Moisés chenu neje jamajaitidha putsu, Diusu ja tueda manuametaidha. Daja Diusu ja yata jiahue bid'umimi ebuetsuaji cuana. <sup>12</sup> Micuaneda edhitatiani su, Echua Puji sa ebani su ejanadiati puji, dapia tuneda di edhitatitani micuana neje tupupai. Iyuda mahue, bidhutada neje edusutitani huecuana micuana duju su. Id'apadada neje ediadiatani huecuana. Pia cuana peje su japibati mahue. Beidaji neje ediadiatani, eid'ititani huecuana. Tuna mehua bahui saida ebatitani. Tuneda mu beni ja judu nai mahue edusutani nime. Daja huecha equi jaja mahue nime ta huecuana. Tueda ai cuana nime mue ai puji saida ta huecuana.

Aqui emanu chu ed'auna mutsujiji nime ta huecuana. <sup>13</sup> Beni ja ena edhapujutani su, d'aida epuani nime ta huecuana. Tuna sa ai madhada cuana da ena sa ejuba adhida nime. Pamapa ai bidhutada cuana yatani huecuana. Jeitid'ujiji eputaniuneti huecuana. Da su Diosu ja matse putsu, apuda eni su ichaenitayu huecuana.

<sup>14-15</sup> Beju Adán chenu tije anina Enoc chenu. Uja quisa puidha Enoc chenu tueda bid'umimi ebuetsuaji madhada cuana jepuiti: “Echua Puji cielo jenetia epusiu mesa dueji ángel cuana neje pamapa Diosu tsada mahue cuana ecastiga puji. Tuahueda ecastigata huecuana, pamapa ai madhada cuana atana, Diosu sa puji madhada hue mimitana huecuana putsu.” <sup>16</sup> Tuneda mimicuicuina bahue, pia cuana mimimadhabaji eputani. Pamapa tuna sa ai utsatada madhada cuana bahui yatani huecuana. Cristiano cuana butse su tuneda quita puja eputani. Pia sa puji saida emimitani huecuana tuna sa ai saida cuana emejemi puji.

#### *Dharejiji cuana sa puji quisa saida cuana*

<sup>17</sup> Edue cuana, mepibaenique Echua Puji Jesucristo sa apóstol cuana ja micuana quisatana cuana. <sup>18</sup> Micuana uja quisatana huecuana: “Jesucristo sa esiapati hora enariatiani su, deja madhada cuana bataji epu. Diosu sa ai cuana aimue eiyubata huecuana mahue. Diosu sa ai cuana neje eshishatita huecuana. Tuna sa ai utsatada madhada cuana bahui aja yata huecuana.” <sup>19</sup> Edue cuana, tuneda da jasajajatiji cuana. Ye mundo sa ai cuana bahui mecuana sa tsada, Espíritu Santo mecuana sa aimue ani muesumu su putsu.

<sup>20</sup> Edue cuana, micuaneseda mu Diosu peje su bahui janimetucheati taji. Daja hue Diosu sa ene quita jabuetsuati cuana su mepuderaniunetique. Espíritu Santo sa tucheda neje Diosu mebajaque pamapa hora su. <sup>21</sup> Mepibaenique Diosu ja pamapa hora su micuana ebia su ibuneda ebatani. Paciencia neje Jesucristo epue hora meid'uaque. Diosu sa jaibunebati su meanique. Tu epue tsine meid'uaque. Da tsine ecuana cielo su edusuta tu neje eid'e yanienitiyu puji, ecuana ebia su eibunebatani putsu.

<sup>22</sup> Diosu peje su beta piba cuana paciencia neje jei meameque. <sup>23</sup> Pia cuana castigo jenetia d'ejí su meaque. Pia cuana di mebataichenubaque Diosu peje su edusu huecuana puji. Jarejati neje Diosu peje su medusuque huecuana. Tuna etsahuainia tupu, be tuna yatani ai madhada cuana meaji.

#### *Memitsutsuaque Diosu*

<sup>24-25</sup> Ecuana D'ejí su Aji Diosu da piada hue, bahue eni, tucheda, micuana equina puji, daja huecha micuana edajajame mahue puji. Tuahueda micuana cielo su tu butse su

jucha mahue beidaji neje edusutayu. Ecuana d'oji su atana ecuana sa Echua Puji Jesucristo jepuiti. ¡Gloria Tata Diosu! Tueda pamapa pia huaraji cuana ebia su aida, tucheda papueni. Mundo aniji mahue su, tueda huaraji ebia su aida puidha. Daja hue papuderaenitiyu. Daja papu.

## EL APOCALIPSIS O REVELACIÓN A SAN JUAN

Ye quirica Apocalipsis banime su quisa epuani ai nimetiuda cuana epu jepuiti. Juan ja deretaidha, Patmos edhapupu su anina su. Ye da Biblia sa tije puji quirica. Quisa epuani cuaja Cristo mitsutsuame a taji, pamapa ai cuana jepuiti tuseda cama epuani putsu.

2-3 capítulo detse da siete ejude su aniji jei eputani dharejiji cuana sa puji. Madhada puniunetiji cuana, daja huecha saida puniunetiji cuana jepuiti quisa epuani.

4-5 capítulo detse da quisa epuani cuaja cielo su Diusu sa Huisha Janana Nime Cristo emitsutsuatani huecuana.

6-18 capítulo cuana da quisa epuani cuaja Diusu ja tu jei aja mahue cuana ye mundo su sufri yametayu jepuiti.

19-20 capítulo detse da quisa epuani cuaja Cristo ye mundo su pue putsu, Ishahua epishitiametayu.

21-22 capítulo detse da cielo, mundo eichacua jepuiti quisa epuani. Dapia pamapa saida epueni. Diusu sa dharejiji cuana aimue emanuta mahue beju.

Ye versículo cuana da ebia su saida quita ebuetsuati puji:

2.10

3.20

5.9-10

12.10-11

20.6-15

21.4,8,22-27

### *Diusu ja Juan tahui su nime bametana*

<sup>1</sup> Ye quirica da ai cuaja epu quisa epuani. Tueda epu ai cuana Tata Diusu ja Jesucristo quisatana Cristo ja pamapa mesa emebajaji cuana pashanapameta puji. Ema da Juan. Jesucristo ja mesa ángel beitutana ema peje su tueda ai cuana equisa puji. <sup>2</sup> Pamapa tueda Tata Diusu, Jesucristo detse ja ai quisatana cuana yama butsepi dereana. Pamapa ema bametana ai cuana di yama dereana.

<sup>3</sup> Quebata cuana ja tueda quisa derejiji cuana emimiameta su, tuneda beidaji epu. Eid'abaji cuana di beidaji eputa. Tueda quisa cuana su jei eputa cuana di beidaji eputa, tueda ai cuana tipeida ecuina putsu.

*Juan ja siete ejude su aniji jei eputani dharejiji cuana peje su quirica beitutana*

<sup>4</sup> Ema da Juan. Asia yahua su siete ejude cuana su aniji jei eputani cuana peje su yama ye quirica ebeituinia. Edue cuana, Diusu ja meibunebataque, menimepijajametaque.



Tueda da chue pujianati eid'e jiahue teje. Daja hue eid'e yanieniderati. Diusu sa ani jude butse su netiji Espíritu Santo ja di meibunebataque, menimepijajametaque. <sup>5</sup> Jesucristo ja di meibunebataque, menimepijajametaque. Tuahueda pamapa ai cuana butsepi equisatani. Tueda equene manujiji cuana duju jenetia id'eibana. Tueda da pamapa ye mundo su huaraji aida cuana ebia su aida. Tuseda puji ebia su saida memimija, tuahueda ecuana ebia su ibuneda batana putsu. Curusu su manu putsu, mesa ami jad'uichatiana ecuana sa jucha cuana edhipa puji. <sup>6</sup> Tuahueda ecuana sacerdote nime ichatana Tata Diusu emebaja puji. Tueda da pamapa pia cuana ebia su aida quita. Tuahueda ecuatsasiaenitayu. Daja papu.

<sup>7</sup> Tueda epueicha judu cuana duje. Pamapa cristiano cuana ja tueda ebutesiu echamata. Tu manuameji cuana ja di echamata. Pamapa ejude cuana je aniji cuana ja tu ebutesiu chama putsu, ebia su iyuame pu putsu, epata huecuana. Enei hue, daja da epu.

<sup>8</sup> Uja Diusu aida epuani: "Yama equene pamapa ai cuana apiruidha. Daja huecha yama pamapa ai cuana apeyume ya." Beju tueda da ebia su aida, tucheda eni. Tueda da chue pujianati eid'e jiahue teje. Daja hue eid'e yanieniderati.

*Cristo ja Juan ai nimetiuda cuana bametana tahui su nime*

<sup>9</sup> Ema da Juan. Ema da micuana sa Cristo jepuiti edue. Ema Cristo jepuiti sufri epuani micuaneda nime. Yama quitaita ye quirica edereinia. Ema Patmos edhapupu su terijiji yani, Cristo jepuiti quisaquisa puana putsu. Ecuanaeda Cristo neje tupupai ecuatsasia epu, tu jepuiti paciencia neje ebia su sufri epuani putsu. <sup>10</sup> Beju Espíritu Santo ja cuaja epu ai cuana ema bametana, Cristo sa castigo tsine epue su. Tahui su nime etsui ja ema mitsutana. Ema tibeini su pututu nime etsui jubida yama id'abana.

<sup>11</sup> Uja tueda etsui puana: "Ai mi ebainia cuana dereque quirica su. Beituque tueda quirica siete ejude su aniji jei eputani dharejiji cuana peje su. Tueda siete ejude cuana da Efeso, Esmirna, Pérgamo, Tiatira, Sardis, Filadelfia, Laodicea banime." Daja ema tueda etsui jubida ja cuatsasiatana.

<sup>12</sup> Da su ema jababarereatiana aiya ema emitsutani eba puji. Jababarereati putsu, siete candelero cuana oro jenetia ajiji bana. <sup>13</sup> Da duju su piada deja nime eneti yama bana. Ejud'uji bauda ehuaitsi teje mesa puina yama bana. Etsedu mesa babujiji puina oro jenetia. <sup>14</sup> Mesa echuaina pasane, huapese nime puina. Mesa etua detse cuati utsu sa hueda nime puina. <sup>15</sup> Mesa ehuaitsi detse bronce cuati su ecuaracuarani su cuareda nime puina. Mesa etsui nai

sa id'apadada nime. <sup>16</sup> Mesa bai eni bene eme su siete atujai anitaina. Mesa ecuatsa jenetia beta tsequime espada cuinanana. Mesa ebu id'eti sa cuareda jubida nime puina.

<sup>17</sup> Yama tueda chamana su, tu butse su ema dajajana emanu nime, ebia su iyuda saida puina putsu. Tuahueda mesa bai eni bene eme ema bia su huana putsu, uja ema atana:

—Be iyuame puji. Yama equene pamapa ai cuana apiruidha. Daja huecha yama pamapa ai cuana apeyume ya. <sup>18</sup> Daja hue ema eid'e yani. Manuana biame, ema id'eibana eid'e yanienitiyu puji. Ema bahui bahue cristiano cuana emanu, ahua mahue. Ema da manujiji cuana emetse. <sup>19</sup> Jiahue dereque pamapa miada echama ai cuana. Pamapa cuaja epu ai cuana dereque. <sup>20</sup> Ye siete atujai cuana da tueda siete ejude su aniji jei eputani dharejiji cuana sa ehuidusuji cuana nime. Ye siete candelero cuana da tueda siete ejude su aniji jei eputani dharejiji cuana nime.

Daja ema quisatana.

## 2

### *Efeso ejude su aniji jei eputani dharejiji cuana*

<sup>1</sup> Daja hue tuahueda ema uja quisainiame atana:

—Efeso ejude su aniji jei eputani cuana dharejiji sa ehuidusuji quirica tiameque. Uja quirica su quisameque tueda: “Quema eme su yani siete atujai cuana. Daja huecha siete candelero cuana. <sup>2</sup> Bahue ema micuaneda ai yainia cuana. Bahue ema micuaneda cristiano madhada cuana tsada mahue ebainia. Bahue ema, ‘Ecuanaju da apóstol’, eputani cuana micuaneda abana. Beju aba putsu, bid'umimi puji huecuana micuaneda shanapana. <sup>3</sup> Bahue ema micuaneda paciencia neje quema puji ebia su sufri puana. Sufri epuani biame, mue micuana sa ema peje su janimetucheati cuana jataitanameti ema emebaja puji. <sup>4</sup> Daja biame, pia ai quema yani micuana neje. Aimue micuaneda ema ibuneda ebainia mahue equene su pupiruana nime. <sup>5</sup> Da putsu, mepibaturucatique ema peje su. Micuaneda ema neje equene su ibuneda bana nime, daja mepuichaque. Ahua mue micuaneda daja a su, ema micuana peje su eputi micuana ecastiga puji. Cuaja etse caitera candelero jenetia jemi putsu, enetiadera puji nime, daja yama micuana yayu. <sup>6</sup> Daja biame, micuaneseda puji piada ai saida yani. Nicolaíta cuana ja ai madhada yatani cuana aimue micuaneda tsada ebainia mahue, yama tueda ai madhada cuana tsada mahue ebainia nime. <sup>7</sup> Quebata id'ajararaji su, jei eputani dharejiji cuana peje su Espíritu Santo quisa epuani ai cuana paid'abata.

Quebata cuana ema peje su emanu teje daja hue enimetuc-headeratita su, yama equi eid'e jaametiji ejaja neje emihua huecuana cielo su.” Daja quirica su quisameque Efeso ejude su aniji jei eputani dharejiji cuana.

*Esmirna ejude su aniji jei eputani dharejiji cuana*

<sup>8</sup> Daja hue tuahueda ema uja quisainiame atana:

—Esmirna ejude su jei eputani dharejiji cuana sa ehuidusuji quirica tiameque. Uja quisameque tueda: “Yama equene pamapa ai cuana apiruidha. Daja huecha pamapa ai cuana yama apeyume ya. Ema manuana biame, beju id'eibana eid'e yanienitiyu puji. <sup>9</sup> Bahue ema micuaneda ema jepuiti ebia su sufri epuani. Micuaneda ye mundo su yani tupu puri epuani biame, pamapa Diosu sa ai cuana micuana sa muesumu su yani. Bahue ema, ‘Ecuanaju da Diosu sa dharejiji cuana’, eputani cuana ja micuana emadhabatani. Aimue tuneda Diosu sa dharejiji cuana mahue. Beju tuneda da Ishahua sa puji cuana ema bahue. <sup>10</sup> Be iyuame mepuji, micuaneda sufri epu putsu. Ishahua ja piada piada micuana eteriichameta yaba puji. Piada tunca tsine puji hue micuaneda sufri epu. Ahua micuaneda ema peje su enimetucheaderati su, memanuque biame, yama micuana eid'e yameeniyu cielo su. <sup>11</sup> Quebata id'ajararaji su, jei eputani dharejiji cuana peje su Espiritu Santo quisa epuani ai cuana paid'abata. Quebata cuana daja hue ema peje su emanu teje enimetucheaderatita su, aimue cuati castigo su eputita huecuana mahue.” Daja quirica su quisameque Esmirna ejude su aniji jei eputani dharejiji cuana.

*Pérgamo ejude su aniji jei eputani dharejiji cuana*

<sup>12</sup> Daja hue tuahueda ema uja quisainiame atana:

—Pérgamo ejude su jei eputani dharejiji cuana sa ehuidusuji quirica tiameque. Uja quisameque tueda: “Ema da beta tsequime espadaji. <sup>13</sup> Bahue ema micuana sa ejude Ishahua sa jacuatsasiati ema su yani. Daja biame, micuaneda daja hue ema emebajaderainia. Quema emebajaji Antipas man-uametana huecuana biame, micuaneda ema peje su daja hue jubida janimetucheatiana. <sup>14</sup> Daja biame, quema pia ai yani micuana neje. Piada piada micuaneda Balaam chenu sa jabuetsuati madhada cuana yainia. Tueda Balaam chenu ja Balac chenu quisataidha israelita chenu cuana ai madhada cuana pabuetsuatita puji, jucha paata huecuana puji. Tuahueda buetsuataidha huecuana bid'umimi diusu eimea peje su irutsuajiji aicha cuana padiata huecuana puji. Pamapa pia ai jucha madhada cuana buetsuataidha huecuana. Daja tueda ai puiti madhada cuana piada piada micuaneda yainia

tuna ataidha nime. <sup>15</sup> Daja huecha piada piada micuaneda nicolaíta cuana sa jabuetsuati madhada cuana yainia. Tueda jabuetsuati cuana da quema tsada mahue. <sup>16</sup> Da su beju mepibaturucatique ema peje su. Ahua micuaneda jucha yariji mahue su, tipeida ema micuana peje su eputi jubida ecastiga puji. Quema ecuatsa jenetia beta tsequime espada neje yama micuana ecastigatiyu. <sup>17</sup> Quebata id'ajararaji su, jei eputani dharejiji cuana peje su Espíritu Santo quisa epuani ai cuana paid'abata. Quebata ema peje su emanu teje daja hue enime-tuheaderati su, yama tueda nimetucheda yameyu. Tumu pasane su ebani eichacua derejiji etiayu. Aimue pia cuana mesa ebani eichacua bahue eputa mahue. Tueda bahui bahue epu." Daja quirica su quisameque Pérgamo ejude su aniji jei eputani dharejiji cuana.

*Tiatira ejude su aniji jei eputani dharejiji cuana*

<sup>18</sup> Daja hue tuahueda ema uja quisainiame atana:

—Tiatira ejude su aniji jei eputani dharejiji cuana sa ehuidusuji quirica tiameque. Uja quisameque tueda: “Ema da Diosu sa Ebacua. Quema etua detse da cuati utsu hueda nime. Quema ehuaetsi detse da bronce cuati su ecuarmacuarani su cuareda nime. <sup>19</sup> Bahue ema micuaneda ai yainia cuana. Ema ebia su ibuneda ebainia. Diosu peje su ebia su enime-tuheatiani. Paciencia neje ema emebajainia equene su meabajaina ebia su. <sup>20</sup> Daja biame, quema yani pia ai micuana neje. Micuana duju su yani piada epuna Jezabel banime. Tueda da, ‘Ema da Diosu sa quisaquisa puji’, epuani biame, aimue daja mahue. Tuahueda quema dharejiji cuana ebuetsuatani jucha paata huecuana puji. Tuahueda ebuetsuatani huecuana bid'umimi diosu eimea peje su irutsuajiji aicha cuana padiata huecuana puji. Ebuetsuatani huecuana ai madhada cuana paata huecuana puji. <sup>21</sup> Yama tueda epuna tupu d'ejí tiana tu papibaturucati puji. Beju aimue japibaturucatiya mahue puana. <sup>22</sup> Da putsu, yama tu neje equinatitani cuana neje tupupai jubida ecastigapeyu, ahua aimue ema peje su epibaturucati huecuana mahue su, ahua tueda madhada cuana yarijita huecuana mahue su. <sup>23</sup> Mesa ebacua cuana yama emanuameyu. Daja yama yayu pamapa jei eputani dharejiji cuana bahue paputa huecuana puji, yama pamapa sa ai piba cuana eshanapaeninia. Daja huecha bahue paputa huecuana yama micuana echujetiayu cuaja micuaneda anime puina. <sup>24</sup> Piada piada micuaneda mu aimue Jezabel sa jabuetsuati madhada cuana tije yainia mahue. Aimue tsuhu micuaneda Ishahua tije aji cuana yatani ai madhada cuana ana mahue. Yama micuana uja equisainia: Cuaja micuaneda saida epuniuneti nime, daja

hue meaderaque. <sup>25</sup> Ema peje su menimetuheatique ema epue teje. <sup>26</sup> Quebata cuana daja hue ema peje su enimetuc-headeratita su, ahua emanu teje quema ai tsada cuana yata su, yama ehuaratia huecuana pamapa ejude cuana pacuat-sasiata huecuana puji. <sup>27</sup> Cuaja quema Tata Diosu ja ema huaratiatana nime ecuatsasia epu puji, daja nime huecha yama ehuaratia huecuana. Jubida eni neje ecuatsasiata huecuana. Etse eicha jutu ped'uped'ua cua nime, daja jei puja mahue cuana sa tucheda yapeenimetayu huecuana. <sup>28</sup> Yama huena atujai etia huecuana. <sup>29</sup> Quebata id'ajararaji su, jei eputani dharejiji cuana peje su Espíritu Santo quisa epuani ai cuana paid'abata." Daja quirica su quisameque Tiatira ejude su aniji jei eputani dharejiji cuana.

### 3

*Sardis ejude su aniji jei eputani dharejiji cuana*

<sup>1</sup> Daja hue tuahueda ema uja quisainiame atana:

—Sardis ejude su aniji jei eputani dharejiji cuana sa ehuidusuji quirica tiameque. Uja quisameque tueda: “Diosu sa Espíritu Santo quema yani. Tueda siete atujai cuana di quema yani. Bahue ema micuaneda ai yainia cuana. Cristiano cuana ja micuaneda ema peje su saida enimetuheatiani ebatani biame, aimue daja mahue. Diosu ja micuana emanu nime ebatani. <sup>2</sup> Da su neicha eid'e mepuque Diosu peje su. Janimetuheatique ema peje su. Micuana sa huai chidi janimetuheatu cuana meyapacaque. Micuana sa ai jaati cuana da saida mahue Diosu butse su yama ebainia. <sup>3</sup> Da su mepibaenique equene micuaneda jabuetsuatiana cuana. Mepibaturucatique ema peje su. Ahua micuaneda daja aja mahue su, tipeida ema micuana peje su eputi ecastiga puji. Mue micuaneda ema id'ua hora su ema micuana peje su ecuinati. <sup>4</sup> Daja biame, piada piada micuaneda aimue ai madhada cuana ana mahue. Micuaneda ema neje epuniuneti ejud'uji pasane neje, nimebutsepi putsu. <sup>5-6</sup> Quebata cuana daja hue ema peje su emanu teje enimetuc-headeratita su, yama ejud'uji pasane neje ejud'uyu huecuana. Aimue yama edhipa mahue mecuana sa ebani cuana Diosu sa quirica jenetia. Pamapa Diosu sa quirica su ebani derejiji cuana beju cielo su Diosu neje eid'e epuenitayu. Quema Tata Diosu, ángel cuana butse su yama eshanapaeniyu huecuana. Quebata id'ajararaji su, jei eputani dharejiji cuana peje su Espíritu Santo quisa epuani ai cuana paid'abata." Daja quirica su quisameque Sardis ejude su aniji jei eputani dharejiji cuana.

*Filadelfia ejude su aniji jei eputani dharejiji cuana*

<sup>7</sup> Daja hue tuahueda ema uja quisainiame atana:

—Filadelfia ejude su aniji jei eputani dharejiji cuana sa ehuidusuji quirica tiameque. Uja quisameque tueda: “Ema da nimebutsepi, jucha mahue. David chenu sa lahui quema yani. Yama eterinia aimue detse aiya biame tsequed'iaata cua mahue. <sup>8</sup> Bahue ema micuaneda ai yainia cuana. Bahue ema aimue micuaneda nimetucheda mahue. Daja biame, pamapa quema jacuatsasiati cuana micuaneda ana. Saida ema mebajana cristiano cuana butse su. Da putsu, yama eteriji tsequed'iana micuaneseda puji. Aimue aiya biame terita cua mahue beju. <sup>9</sup> Ishahua tije aji cuana yama etururuame micuana butse su. Tuneda, ‘Ecuanaaju da Diosu sa cristiano cuana’, eputani biame, aimue daja mahue. Bid'umimi puji eputani huecuana. Cuaja yama micuana ebia su ibuneda ebainia eshanapame huecuana. <sup>10</sup> Micuaneda paciencia neje quema jacuatsasiati cuana ana putsu, yama micuana ebianetia sufrimiento epusiu cuana jenetia. Tueda sufrimiento aida cuana pamapa ye mundo su aniji cristiano cuana peje su ecuinati tuna yabape puji. <sup>11</sup> Beju ema tipeida mundo su esiapati. Micuana sa tucheda huai chidi biame, daja hue saida mepuderaque. Ahua daja hue micuaneda epuderati su, Diosu ja micuana echuje etiatayu. <sup>12</sup> Quebata cuana ema peje su emanu teje daja hue enimetucheaderatita su, yama nimetucheda yayu huecuana. Ema neje eid'e epuenititayu huecuana cielo su. Tuna bia su yama quema Tata Diosu sa ebani edereyu. Quema ebani di tuna bia su edereyu. Diosu sa ejude sa ebani di tuna bia su yama edereyu. Tueda ejude da Jerusalén eichacua banime. Tueda ejude da Diosu peje jenetia, cielo jenetia ebuteni. <sup>13</sup> Quebata id'ajararaji su, jei eputani dharejiji cuana peje su Espíritu Santo quisa epuani ai cuana paid'abata.” Daja quirica su quisameque Filadelfia ejude su aniji jei eputani dharejiji cuana.

*Laodicea ejude su aniji jei eputani dharejiji cuana*

<sup>14</sup> Daja hue tuahueda ema uja quisainiame atana:

—Laodicea ejude su aniji jei eputani dharejiji cuana sa ehuidusuji quirica tiameque. Uja quisameque tueda: “Yama micuana ye ai cuana butsepi equisainia: Diosu ja ema jepuiti pamapa cielo, yahua su aniji ai cuana ataidha. <sup>15</sup> Bahue ema micuana sa ai yainia cuana. Aimue micuaneda ema ibuneda quita ebainia mahue. Daja huecha aimue ema eduininibainia quita mahue. Tsada quema micuaneda ema ibuneda eba ahua eduininiba. <sup>16</sup> Daja micuaneda putsu, equedi neje yama quid'ua cua pu cua nime, micuana ejusiadera ema peje jenetia. <sup>17</sup> Micuaneda, ‘Ecuanaaju ebia su chipiluji eni putsu, aimue ecuanaaju ai biame etsainia mahue’, epuani biame, aimue daja mahue. Yama micuana puri, bataichenuda,

padha, jud'uji mahue pu cua nime ebainia. <sup>18</sup> Da putsu, yama micuana equisainia uja: Mebajaque ema oro saida eni micuaneda chipiluji ene quita epu puji. Mebajaque ema ejud'uji pasane ebiad'amati puji pia cuana ja micuana sa bidhu pachamata mahue puji. Mebajaque ema eidue micuana sa etua bia su eichati puji, eba puji. <sup>19</sup> Pamapa quema ibuneda cuana yama ecastigainia, tuna ai madhada cuana yatani su ebutsepia puji. Da putsu, mepibaturuca-tique ema peje su aimue yama micuana ecastiga mahue puji. <sup>20</sup> Beju ema eteriji eturubainia. Quebata ja quema etsui id'aba putsu, etsequed'iata su, da su ema mesa muesumu su enubi tu neje yanieniti puji. <sup>21</sup> Pamapa qema Tata Diosu ja ema cuatsasiatana ai cuana yama apeana putsu, tu neje mesa aniude bia su ema aniuteana da jenetia ecuatsasia epu puji. Daja huecha quebata cuana ema ema peje su emanu teje daja hue enimetuheaderatita su, quema aniude bia su yaniuteta huecuana ema neje tupupai ecuatsasia epu puji. <sup>22</sup> Quebata da id'ajararaji su, jei eputani dharejiji cuana peje su Espiritu Santo quisa ai cuana epuani paid'abata." Daja quirica su quisameque Laodicea ejude su aniji jei eputani dharejiji cuana.

## 4

### *Cielo su Diosu mitsutsuatana huecuana*

<sup>1</sup> Beju tuahueda ema daja mitsupetana su, yama etsequeini tsequed'iajiji bana cielo su. Neicha pututu nime etsui ja ema mitsutana. Uja ema atana:

—Huatsua puque. Yama mi ebame cuaja ai cuana epu.

<sup>2</sup> Da hora su tahui su nime Espiritu Santo ja ema piada aniude aida cielo su yani bametana. Tueda aniude bia su piada yani bana. <sup>3</sup> Tueda da tumu chujeneda, cuarecuare nime bana. Aniude pehue je susenabacua tumu esmeralda cuarecuare nime netina. <sup>4</sup> Aniude aida pehue je beta tunca pushi ejaitiana aniude cuana anitaina. Tueda aniude cuana bia su tata edhi cuana anitaina. Pamapa su jud'uji pasane cama putaina. Pamapa su oro jenetia coronaji cama putaina. <sup>5</sup> Aniude aida jenetia tserutseru hueda nime tiri neje cuinanana. Aniude aida butse su siete tea cuana utsu netiana. Tueda tea cuana da Espiritu Santo pu cua nime. <sup>6</sup> Aniude aida butse su bai aida cristal nime cuareda, cuarecuare saina. Aniude aida naja pehue je pushi ai eid'e cuana netina. Tuneda ebutse bene, etibeini bene etua neje sejeajiji putaina.

<sup>7</sup> Equene puji duqueji iba nime. Beta puji juye nime. Quimisha puji sa ebu deja sa nime. Pushi puji huipa ecuabet-saniuneti nime. <sup>8</sup> Pamapa su sucuta nabaime putaina. Ebia

bene, ema bene etua neje sejeajiji putaina. Tsine, dhidha satsutana huecuana uja:

Echua Puji, mida da Diosu aida, saida, butsepi, jucha mahue. Mida chue pujianati eid'e jiahue teje.

Daja hue eid'e yanieniderati.

<sup>9</sup> Pamapa hora su pushi ai eid'e cuana daja Diosu peje su esatsutani su, tueda beta tunca pushi ejaitiana edhi cuana Diosu sa aniude aida butse su etururutani eid'e eni Diosu diusulupai ya puji. <sup>10</sup> Edhi cuana tu butse su etururutani tu emitsutsua puji. Tuna sa corona cuana Diosu sa ehuatsi su eichatani huecuana, tuna esatsutani tupu. <sup>11</sup> Daja tuna yatani cama, uja satsupirutana:

Echua Puji, mida da ecuanaju sa Diosu.

Miada bahui ecuanaju sa satsu inatsu cua, miada pamapa ai cuana aidha putsu.

Mique tsada putsu, miada pamapa ai cuana aidha.

Pamapa miada ai aidha cuana miada equinainia, mique tsada putsu.

Tueda satsu neje Diosu mitsutsuatana huecuana.

## 5

### *Cuaja epu derejiji ai cuana*

<sup>1</sup> Beju bana yama quirica eina bubetana derejiji pidudiajiji aniude aida bia su aniji sa bai eni bene eme su. Quirica sa siete huini sello cuana anina. <sup>2</sup> Da su beju yama bana piada ángel tucheda. Etsui jubida neje tuahueda quisabatana uja:

—¿Aiya ni da ye huini sello cuana jemita cua?

<sup>3</sup> Mue aidhe biame ani cua cielo, yahua su quirica pirara putsu, emimiamie puji. <sup>4</sup> Da su ema jubida pana, mue aidhe biame ani putsu. <sup>5</sup> Ema epani cama, piada edhi ja ema uja atana:

—Be paji. Chamaque tueda Judá sa familia, David chenu sa familia jenetia. Duqueji iba nime tuchedame. Pamapa ai cuana su epishitiame puana. Beju epishitiameji putsu, tuahueda quirica pirarata cua. Siete huini sello cuana jemita cua.

<sup>6</sup> Beju daja hue yama baniame yainia. Aniude aida butse su edhi cuana, pushi ai eid'e cuana duju su manuamejiji Huisha Janana Nime eid'e eneti bana. Mesa siete edana, siete etua anina. Tueda siete etua cuana da Espíritu Santo pu cua nime puina. Diosu ja tueda Espíritu Santo pamapa yahua je beitutana. <sup>7</sup> Da su Huisha Janana Nime aniude aida su putiana. Aniude bia su aniji ja mesa bai eni bene eme neje Huisha Janana Nime quirica tiatana. <sup>8</sup> Huisha Janana Nime ja quirica einatsutani cama, pushi ai eid'e, edhi cuana tu butse su tururutana. Pamapa su harpaji cama putaina. Pamapa su



incienso meji cuana oro jenetia mecuana sa anitaina. Tueda inciense puida cuana da Diosu sa dharejiji cuana sa jabajati cuana pu cua nime. <sup>9</sup> Da su beju pamapa su satsu eichacua satsupirutana uja:

Miada bahui quirica inatsu putsu, huini sello cuana jemi cua. Miada bahui jemi cua, mida manuametana huecuana putsu. Mique ami jad'uichatiana putsu, miada ecuanaju Diosu peje su nimebutsepiana.

Tsapiapiati yana su mimiji cuana peje jenetia, pamapa ejude jenetia miada ecuanaju d'eji su ana.

<sup>10</sup> Miada ecuanaju sacerdote nime ana Diosu emebaja puji. Mi neje tupupai ecuanaju ecuatsasia epu.

<sup>11</sup> Da su beju yama id'abana jubida esatsutani. Ebia su dueji saida ángel cuana aniude pehue je, esatsutani bana. Tuna neje pushi ai eid'e, edhi cuana Huisha Janana Nime peje su esatsutani yama bana. <sup>12</sup> Jubida satsutana huecuana uja:

¡Gloria Huisha Janana Nime!

Mida manuametana huecuana biame, eid'e.

Mida bahui pamapa pia cuana ebia su tucheda.

Mida da pamapa ai cuana emetse.

Mida bahui pamapa pia cuana ebia su bahue eni.

Pamapa ja mida saida bataque.

Daja huecha mitsutsuaenitaque huecuana.

<sup>13</sup> Da su beju yama pamapa Diosu ja atana ai eid'e cuana cielo, yahua, yahua tipa, ena su emimitani id'abana. Uja putana huecuana:

¡Gloria aniude bia su aniji sa puji!

¡Gloria Huisha Janana Nime sa puji!

Pamapa cristiano cuana ja iyuda neje pabata tse.

Tucheda eni papueni tse.

<sup>14</sup> —Daja papu —putana pushi ai eid'e cuana.

Da su edhi cuana da tuatse butse su tururutana emitsutsua puji.

## 6

### *Huisha Janana Nime Ja huini sello cuana jemitana*

<sup>1</sup> Beju bana yama Huisha Janana Nime ja equene puji huini sello jemitana su, equene puji ai eid'e jubida tiri nime puana uja:

—Pueque. Chamaque.

<sup>2</sup> Daja equene puji epuani cama, caballo pasane bataji puana yama bana. Tu bia su piada anina. Pisa etsue dusutaina. Mesa echua bia su corona ichatana huecuana. Tueda putiana tusa majai neje jaicheti putsu, epishitiame epu puji yama bana.

<sup>3</sup> Beju Huisha Janana Nime ja beta puji huini sello jemitana su, beta puji ai eid'e uja puana:

—Pueque. Chamaque.

<sup>4</sup> Daja beta puji epuani cama, caballo dherena bataji puana yama bana. Tu bia su piada anina. Espada bauta inatsutana. Tueda yahua su puniunetiana cristiano cuana huamahuama emanuameme puji.

<sup>5</sup> Beju Huisha Janana Nime ja quimisha puji huini sello jemitana su, quimisha puji ai eid'e uja puana:

—Pueque. Chamaque.

Daja quimisha puji epuani cama, caballo dhehuena bataji puana yama bana. Tu bia su piada anina. Etupuaji metse anina. <sup>6</sup> Pushi ai eid'e cuana duju su yama etsui id'abana. Uja puana:

—Piada kilo arusu da piada mudu tsine chuje tupu. Quimisha kilo d'ije piada mudu tsine chuje tupu. Aceite, vino mu be pachujetsua.

<sup>7</sup> Beju Huisha Janana Nime ja pushi puji huini sello jemitana su, pushi puji ai eid'e uja puana:

—Pueque. Chamaque.

<sup>8</sup> Daja pushi puji epuani cama, caballo tid'itid'i bataji puana yama bana. Tu bia su piada anina. Tueda Emanu banime puina. Tu tije epusiu piada bana. Tueda da Manujiji Cuana sa Eti Jude banime puina. D'ejí tiatana mundo su pamapa pushi cristiano cuana jenetia piada pamanuameta puji. Espada, mid'e, chiqui cuana neje, animalo d'aida cuana neje di cristiano cuana pamanuameta puji d'ejí tiatana.

<sup>9</sup> Beju Huisha Janana Nime ja pishica puji huini sello jemitana su, da hora su Diosu sa quisa saida su jei eputani manuameta cuana altar ema su yanita bana. Cristiano cuana ja manuameta huecuana yahua su anitaina su, Diosu sa quisa saida cuana tuna quisaquisa putaina putsu. <sup>10</sup> Da su tsiatsia neje Diosu uja bajatana huecuana:

—Echua Puji, mida da aida, butsepi, ene quita. ¿Quetsunu jia miada ecuanaju manuameji cristiano cuana ecastiga?

<sup>11</sup> Da su tiatana huecuana metse su hue ejud'uji pasane. Diosu ja uja atana huecuana:

—Mejanahuaque tsuhu. Meid'uaque tsuhu yahua su yanita pia edue cuana emanuameta huecuana teje, cuaja micuana manuameta huecuana nime. Da su emanuamepeta huecuana su, yama tuna manuameji cuana ecastigayu.

<sup>12</sup> Beju Huisha Janana Nime ja sucuta puji huini sello jemitana su, da hora su yahua rirebatana jubida. Id'eti apunana. Badi ami nime jutidame puana. <sup>13</sup> Atujai cuana

dajajatana beni ja equi cuana ejujutani su, ejaja cuana edajajatani nime. <sup>14</sup> Buepa japidudiati putsu, beju taitana-peana pamapa. Pamapa emata, edhapupu cuana beju puder-apetana. <sup>15</sup> Mundo su huaraji aida, deja aida, soldado cuana sa echua puji, chipiluji, deja tucheda, esclavo, d'oji su deja cuana ebia su iyuame putana. Iyuame pu putsu, emata epa rara su nubitana huecuana erubuti puji. Emata cuana sa tumu aida cuana duju su jarubutitana huecuana. <sup>16</sup> Emata, tumu aida cuana uja bajatana huecuana:

—Medajaque ecuanaju bia su ecuanaju erubua puji Diosu sa castigo peje jenetia. Merubuaque ecuanaju, Huisha Janana Nime, ecuanaju neje eduiniani putsu.

<sup>17</sup> Beju tuna sa castigo tsine ecuina su, aimue aiya biame tucheata cua mahue.

## 7

### *144.000 israelita cuana d'oji su putana*

<sup>1</sup> Da su beju pushi ángel cuana Diosu ja mundo su beitutana beni panahuebata huecuana puji, yahua su aimue beni papu puji. Aimue eina cuana huajihuajitana mahue. Ena cuana pamapa mitanatana, beni mahue putsu. <sup>2</sup> Pia ángel id'eti ecuinanani bene jenetia epusiu yama bana. Eid'e eni Diosu sa emarcaji mesa anina Diosu sa dharejiji cuana emarca puji. <sup>3</sup> Tuahueda pushi ángel cuana uja atana:

—Be yahua, mar memadhatiaji tsuhu. Equene Diosu sa dharejiji cuana Diosu sa emarcaji neje emata cuana su marca taji tuneda Diosu sa puji cuana ebame puji.

<sup>4</sup> Da su yama id'abana quejucua dharejiji cuana marcajiji putana. Piada cien pushi ejaitiana mil israelita cuana marcatana huecuana. <sup>5</sup> Piada tunca beta ejaitiana mil Judá sa familia cuana jenetia marcatana huecuana. Piada tunca beta ejaitiana mil Rubén sa familia jenetia marcatana huecuana. Piada tunca beta ejaitiana mil Gad sa familia jenetia marcatana huecuana. <sup>6</sup> Piada tunca beta ejaitiana mil Aser sa familia jenetia marcatana huecuana. Piada tunca beta ejaitiana mil Neftalí sa familia jenetia marcatana huecuana. Piada tunca beta ejaitiana mil Manasés sa familia jenetia marcatana huecuana. <sup>7</sup> Piada tunca beta ejaitiana mil Simeón sa familia jenetia marcatana huecuana. Piada tunca beta ejaitiana mil Leví sa familia jenetia marcatana huecuana. Piada tunca beta ejaitiana mil Isacar sa familia jenetia marcatana huecuana. <sup>8</sup> Piada tunca beta ejaitiana mil Zabulón sa familia jenetia marcatana huecuana. Piada tunca beta ejaitiana mil José sa familia jenetia marcatana huecuana. Piada tunca beta ejaitiana mil Benjamín sa familia jenetia

marcatana huecuana. Daja ángel cuana ja Diosu sa emarcaji neje marcatana huecuana tuneda Diosu sa dharejiji cuana ebame puji.

*Dueji cristiano cuana jud'uji pasaneji cama putaina*

<sup>9</sup> Da su beju yama chamana. Dueji cristiano cuana aniude aida, Huisha Janana Nime butse su enetita bana. Tsapiapiati yana su mimiji cuana anitaina yama bana. Pamapa ejude cuana jenetia puetana huecuana. Aimue aiya biame cuaja idadape taji mahue batana huecuana, dueji saida putsu. Jud'uji pasaneji cama putanina huecuana. Tumi ina nime eina cuana jadasuti cama huecuana. <sup>10</sup> Uja tsiatsianetitaina huecuana:

—Ecuana ju sa Diosu aniude aida bia su yani.

Tuahueda bahui Huisha Janana Nime neje ecuana d'ejí su atana.

<sup>11</sup> Pamapa ángel cuana Diosu sa aniude aida pehue je netitaina. Edhi cuana, pushi ai eid'e cuana di pehue je netitaina. Beju ángel cuana tururutana aniude butse su Diosu emitsut-sua puji. <sup>12</sup> Uja putana huecuana:

¡Gloria Tata Diosu!

Diusulupai Tata Diosu.

Mida bahui bahue eni puque.

Pamapa cristiano cuana ja mida aida baenitaque.

Pamapa pia cuana ebia su tucheda eni puque.

Daja papu.

<sup>13</sup> Da su piada edhi ja ema quisabatana uja:

—¿Aidhe cuana da ye jud'uji pasaneji cuana? ¿Que jenetia tuneda?

<sup>14</sup> Da su yama uja jeutsuana:

—Tata, ema mu bue mahue. Mida bahue.

Da su ema uja atana:

—Ye cuana da sufrimiento aida mundo su jaitianatana. Diosu ja mecuana sa jucha cuana dhipatana, Huisha Janana Nime sa ami jad'uichatiana putsu. Jiahue beju nimeeichacua, rucuaajiji huecuana ejud'uji pupujiji nime, Huisha Janana Nime peje su jei putana huecuana putsu. <sup>15</sup> Da putsu, Diosu sa aniude aida butse su yanita huecuana. Tsine, dhidha daja hue Diosu emebajaderatani huecuana. Diosu ja ebiantiata huecuana, tuna neje yani putsu. <sup>16</sup> Aimue beju ed-hemanu, jaid'itija eputayu huecuana mahue. Aimue id'eti ja ecuahuitayu huecuana mahue, Huisha Janana Nime ja equinata huecuana putsu. <sup>17</sup> Tuahueda edusuta huecuana eid'e jaametiji ena putiputi su. Tuna sa tuana Diosu ja emuririameta. Aimue quetsunu su biame epatayu huecuana mahue.

## 8

*Siete puji huini sello*

<sup>1</sup> Beju Huisha Janana Nime ja siete puji huini sello jemitana su, cielo su edusetete hora puji pamapa mitanapeana. <sup>2</sup> Da su beju edusetete hora jaitianana su, siete ángel cuana Diosu butse su enetita yama bana. Diosu ja siete pututu cuana tiatana huecuana. <sup>3</sup> Pia ángel altar butse su mesa oro jenetia incensario metse putiana. Piada ja tueda incienso tiatana Diosu sa dharejiji cuana sa jabajati cuana neje ehuaru puji. Tueda huarujiji ángel ja Diosu butse su yani oro jenetia ajiji altar bia su d'uichatana. <sup>4</sup> Incienso judu jabajati cuana neje tsuatiana altar jenetia Diosu butse su. <sup>5</sup> Da su ángel ja incensario altar sa etid'e cuana neje sejeatana. Tueda etid'e cuana mundo su siajusiautetana. Da su beju pupirutana tiri, etsui, tserutseru cuana. Yahua beju rirebapirutana.

*Pututu cuana*

<sup>6</sup> Tueda siete ángel pututu cuana beju jabasetatitana eturu puji.

<sup>7</sup> Equene puji ángel ja mesa pututu turutana su, iyaru, cuati utsu cuana ami neje huarujiji mundo su siajusiautetana. Beju jajudipetiana mundo sa quimisha parte. Jajudipetiana aqui, nutsa cuana sa quimisha parte.

<sup>8</sup> Da su beju beta puji ángel ja mesa pututu turutana sa, emata aida nime jajuditinetina siajusiautetana mar su. <sup>9</sup> Mar sa quimisha parte ami nime puana. Mar su aniji eid'e cuana sa quimisha parte beju manuametana. Mar queque su saji barco cuana sa quimisha parte taitanapetana.

<sup>10</sup> Da su beju quimisha puji ángel ja mesa pututu turutana su, piada atujai aida tea nime utsu neje dajajana cielo jenetia. Ena, ena putiputi cuana sa quimisha parte su dajajana. <sup>11</sup> Tueda atujai da Patseda banime puina. Da su ena sa quimisha parte patseda puana. Ebia su cristiano cuana manutana, yahui patseda id'i putsu.

<sup>12</sup> Da su beju pushi puji ángel ja mesa pututu turutana su, id'eti, badi, atujai cuana sa quimisha parte apunana. Mecuana sa quimisha parte hueda taitanana.

<sup>13</sup> Da su beju yama piada ángel huipa nime buepa su ecua-betsaniuneti bana. Tueda jubida tsiatsiana uja:

—¡Aba, mundo su aniji cuana! Ebia su micuaneda sufri epu, pia tije quimisha ángel cuana ja mecuana sa pututu cuana eturuta su.

## 9

<sup>1</sup> Da su beju pishica puji ángel ja mesa pututu turutana su, piada atujai nime cielo jenetia buteana mundo su. Pia ja

riji mahue rara sa eteriji sa lahui tueda tiatana. <sup>2</sup> Tuahueda riji mahue rara sa eteriji tsequed'iatana. Da jenetia judu ebia su cuinanana. Tueda judu tsuana su, id'eti sa hueda dunupetana. Beju pamapa apunana. <sup>3</sup> Tueda judu jenetia cuinanatana dhaquere aida nime cuana. Mundo su butetana huecuana. Diusu ja asi sa jadiati nime tucheda tiatana huecuana. <sup>4</sup> Nutsa, aqui cuana aimue padiata huecuana mahue Diusu ja cuatsasiatana. Diusu ja emata su marcatana mahue cuana bahui padiata huecuana cuatsasiatana. <sup>5</sup> Tueda marcajiji mahue cuana pishica badi puji bahui sufri paameta huecuana cuatsasiatana. Aimue pamanuameta huecuana mahue cuatsasiatana. Tuna sa jadiati cuana asi sa jadiati nime. <sup>6</sup> Da tiempo su tueda cristiano cuana jubida manuja epudhaata, ebia su sufri eputa putsu. Cuaja manu taji mahue ebatita huecuana.

<sup>7</sup> Beju dhequere nime cuana da caballo cuana janimepitijiji guerra su eputi puji nime yama bana. Tuna sa echua cuana bia su corona nime cuana oro jenetia ajiji anitaina. Tuna sa ebu cuana da cristiano cuana sa ebu nime. <sup>8</sup> Tuna sa echuaina da bauda epuna sa nime. Tuna sa etse cuana da iba sa nime. <sup>9</sup> Tuna sa etsedu cuana piama neje penejiji putaina ebianetiati puji. Tuna sa enabai cuana da caballo cuana guerra su ejududutahu sa id'apadada nime putana. <sup>10</sup> Tuna sa etidha cuana da asi sa nime pishica badi tueda cristiano cuana sufri yameta puji. <sup>11</sup> Tuna sa echua puji da riji mahue rara sa emetse. Tusa ebani da Emadhatiaji puina.

<sup>12</sup> Daja equene puji sufrimiento jaitianana. Beju beta hue yani.

<sup>13</sup> Da su beju sucuta puji ángel ja mesa pututu turutana su, etsui altar sa pushi edana jenetia yama id'abana. <sup>14</sup> Tueda etsui ja sucuta puji ángel cuatsasiatana uja:

—Mesiaque Eufrates ena naja su aniji pushi ángel tucheda cuana.

<sup>15</sup> Da su sucuta puji ángel ja mesiatana huecuana. Da puji bahui Diusu ja tueda pushi ángel cuana ichasetatana cristiano cuana sa quimisha parte emanuameta puji. <sup>16</sup> Mecuana sa soldado cuana dueji eni putaina yama bana. Caballo bia je cama huecuana. Quejucua putaina huecuana yama id'abana. Beta cien millón putaina huecuana.

<sup>17</sup> Uja yama tahui su nime bana huecuana. Piada piada caballo bianiji cuana sa etsedu su piama jutijuti mecuana sa anitaina. Pia ebianiji cuana sa etsedu su piama udhuri mecuana sa anitaina. Pia ebianiji cuana sa etsedu su piama tid'ina mecuana sa anitaina. Caballo cuana sa echua iba sa echua nime. Mecuana sa ecuatsa jenetia cuati utsu, judu, azufre cuana cuinanatana. <sup>18</sup> Tueda cuati utsu, judu, azufre

cuana neje manuametana cristiano cuana sa quimisha parte. <sup>19</sup>Tuna sa etidha cuana da bacua nime. Da neje neda atana huecuana.

<sup>20</sup>Daja biame, mundo su mue manu putana cristiano cuana aimue japibaturucatitana mahue mecuana sa ai madhada cuana jenetia. Einid'u cuana mitsutsuarijija atana huecuana, daja huecha bid'umimi diusu eimea cuana. Tueda eimea cuana da tuna sa jaati quitaita oro, plata, tumu, bronce, aqui jenetia ajiji. Tueda eimea cuana da padha, mimi bue mahue, ase bue mahue biame, daja hue mitsutsuaderatana huecuana. <sup>21</sup>Emanuame puji, mau epu puji, pia sa ebutse neje equinati puji, tsi epu puji aimue rijinetiatana huecuana mahue.

## 10

### *Ángel ja quirica dusutana*

<sup>1</sup>Da su beju pia ángel tucheda judu neje biababujiji ebuteni cielo jenetia yama bana. Susenabacua mesa echua ebia su anina. Mesa ebu id'eti nime cuarecuare puina. Mesa etidada detse beta utsu bauda puneti cua nime. <sup>2</sup>Quirica chidi pirarajiji eme su dusutana. Mesa bai eni bene ehuatsi mar bia su retina. Mesa d'ani bai ehuatsi yahua su retina. <sup>3</sup>Beju tueda jubida tsiatsiana iba jubida ejijiani nime. Jubida tsiatsiana su, siete tiri cuana quisa pupirutana. <sup>4</sup>Tuna quisa eputani ai cuana yama edere puji yainia su, piada etsui id'abana. Tuahueda ema uja cuatsasiatana:

—Be dereji tiri cuana sa quisa cuana. Mique etsia enime su ichasetaque.

<sup>5</sup>Da su beju ángel mar, yahua bia su eneti ja mesa bai eni bene ebai jemitsuatana. <sup>6</sup>Cielo, yahua, mar, pamapa ai eid'e cuana aji eid'e eni Diusu jepuiti Diusu bahue puana. Uja puana:

<sup>7</sup>—Beju tiempo ecuina Diusu ja mesa tsada piba cuana yapeyu puji, siete puji pututu eturuta su. Cuaja Diusu ja mesa biahua tiempo profeta chenu cuana quisametaidha batame, daja jiahue yapetayu.

<sup>8</sup>Neicha cielo jenetia etsui ja ema cuatsasiatana uja:

—Putique ángel mar, yahua bia su eneti peje su. Mejemitique quirica chidi pirarajiji mesa eme jenetia.

<sup>9</sup>Da su ema putiana ángel peje su. Tu peje su cuinati putsu, yama bajana quirica. Tuahueda ema uja atana:

—U hue quirica. Diaque. Beju mique ecuatsa su huasa ena nime bitada epu. Mique edhe dume su mu beju patseda epu.

<sup>10</sup>Da su yama quirica mejemi putsu, diapeana. Quema ecuatsa su huasa ena nime bitada puana. Quema edhe dume

su mu patseda puana. <sup>11</sup> Neicha ema etsui ja cuatsasiatana uja:

—Daja hue Diusu sa ai quisa saida cuana mique quisaquisa pudera taji tsapiapiati yana su mimiji cuana peje su pamapa ejude cuana je.

## 11

### *Equisanetiacuinaji detse*

<sup>1</sup> Da su beju etupuaji huara nime piada ja ema tiatana. Uja ema atana:

—Netianaque. Putique Diusu sa templo su. Tupuaque templo. Altar di tupuaque. Idadaque quejucua Diusu mit-sutsuaji cuana yani. <sup>2</sup> Be tupuaji templo etsequeini. Tueda etsequeini su pamapa Diusu sa ejude su di Diusu tsada mahue cuana ja pamapa ai madhada cuana yatayu. Daja yatayu huecuana quimisha mara edusetete puji. <sup>3</sup> Da su quema emebajaji detse yama tucheda etiayu tuatseda quimisha mara edusetete quema puji quisaquisa papu puji. Cotensio ejud'uji neje quisaquisa epuniuneti tse.

<sup>4</sup> Tuatseda da beta olivo equi detse, candelero detse nime Diusu butse su. <sup>5</sup> Ahua aiya manuameja yata tse su, tuatse sa ecuatsa jenetia cuati utsu ecuinana tu emanuame puji. <sup>6</sup> Tuatseda tucheda eni cielo eteri puji nai padajaja mahue puji, tueda quimisha mara edusetete puji, tuatse quisaquisa epuniuneti tupu. Tuatseda tucheda eni ena cuana ami nime eturuca puji. Tuatseseda tsada su, ai neda papu yahua su bataji ameta cua tse. <sup>7</sup> Da su tuatseda quisaquisa epupe su, ai senida madhada riji mahue rara jenetia ecuinana emanuame tse puji. <sup>8</sup> Tuatse sa equita detse Jerusalén ejude duju su esati. Tueda ejude quitaita su equene tuatse sa Echua Puji curusu su tatatana huecuana. Tueda Jerusalén ejude su aniji cuana ja pamapa ai madhada cuana ataina Sodoma, Gomorra ejude detse su anitaidha cuana ataidha nime. <sup>9</sup> Quimisha tsine edusetete puji daja hue esati equita detse. Pamapa yahua cuana jenetia cristiano cuana epueta equita detse echama puji. Aimue papaja eputa huecuana mahue. <sup>10</sup> Tuatseda cristiano cuana ebia su sufri ametana putsu, beidaji eputa huecuana, tuatse emanu esa ba putsu. Tuneda cama huamahuama ai saida cuana cha jatiatiyu eputa, ebia su beidaji eputa huecuana putsu. <sup>11</sup> Beju quimisha tsine edusetete ejaitiana su, Diusu ja eid'emetayu tse. Neicha eid'e tuatseda ba putsu, ebia su iyuame eputa huecuana. <sup>12</sup> Da su eid'abata tse etsui jubida cielo jenetia. Uja etsui ja yata tse:

—Metsuaque upia.



Etsui id'aba putsu, cielo su etsuati tse judu duje. Pamapa tuatse sa majai cuana ja echamata etsuahu tse. <sup>13</sup> Da hora quitaita su tueda yahua erirebata jubida. Jerusalén ejude sa piada tunca parte edajajata. Siete mil cristiano cuana beju emanuta. Eid'e eputa cuana iyuame pu putsu, Diusu emitsutsuata huecuana.

<sup>14</sup> Daja beta puji sufrimiento jaitianana. Beju piada hue yani.

### *Siete puji pututu*

<sup>15</sup> Da hora quitaita su siete puji ángel ja mesa pututu turutana su, etsui cuana jubida cielo jenetia tsiatsiatana uja:

Ye mundo su ejude cuana su aniji cristiano cuana ja Diusu, Cristo detse jei yatani beju.

Cristo ja ecuatsasiaenitayu huecuana.

Aimue epupeyu mahue mesa jacuatsasiati cuana.

<sup>16</sup> Neicha tueda beta tunca pushi ejaitiana edhi cuana Diusu butse su tururutana. <sup>17</sup> Uja atana huecuana:

Diusulupai, Tata Diusu aida, tucheda.

Mida da chue pujianati eid'e jiahue teje.

Mida pamapa pia cuana ebia su Echua Puji aida beju.

Jiahue mida ecuatsasia epupiruaní.

<sup>18</sup> Pamapa mi duininibaji cuana mi neje duininitana biame, jiahue beju cuinaitia mecuana sa castigo tuna peje su.

Jiahue miada pamapa manujiji cuana ejuzgayu.

Cuaja ye mundo su tuna sa ai jaati cuana jepuiti eturuca tiayuque huecuana.

Daja huecha mique emebajaji, profeta, dharejiji cuana miada echuje saida etiayu, mundo su mi saida mebajatana huecuana putsu.

Pamapa mi iyubaji aida, ahua chidi puji cuana jiahue miada echuje saida etiayu.

Daja huecha jiahue miada mundo taitanameji cuana etitanamepeyu.

Daja etsui cuana putana cielo jenetia.

<sup>19</sup> Da su beju Diusu sa templo eteriji tsequed'iajiji yama bana. Diusu sa jamitsuti cacha nime edume su yani bana.

Beju bataji puana tserutseru, etsui, tiri, iyaru cuana. Yahua di jubida rirebatana.

## 12

### *Ishahua da bacua d'aida nime*

<sup>1</sup> Da su beju cielo su nimetiuda aida bataji puana. Epuna bataji puana cuarecuare id'eti sa hueda neje babujiji. Badi mesa ehuatsi ema su anina. Mesa echua bia su piada corona anina. Tueda corona su piada tunca beta ejaitiana atujai

cuana anitaina. <sup>2</sup> Tueda epuna da dheji puina. Tueda jubida tsiatsiana ebia su sufri epuani je, mesa nedaji pu taji putsu. <sup>3</sup> Da su beju pia nimetiuda aida bataji puana cielo su. Bacua dherena, aida, d'aida nime bataji puana. Tueda siete chuame puina. Piada tunca daname. Echua mea hue corona cuana anitaina. <sup>4</sup> Mesa etidha ja atujai cuana sa quimisha parte siajusiautetana mundo su. Tueda bacua aida, d'aida nime epuna butse su sasenana epuna sa yanana bataji puja su edia puji. <sup>5</sup> Beju epuna ja jabacuinatiana deja yanana chidi. Tueda mesa ebacua ja pamapa ejude su aniji cuana jubida neje ecuatsasiatayu, deja epu su. Aimue bacua d'aida nime ja yanana diatana mahue, Diusu ja yanana jemitsuadusutana putsu, tu neje yaniti puji. <sup>6</sup> Da su epuna jududuana d'anita yahua su. Dapia Diusu ja eti jude mesa basetatana quimisha mara edusete emihua puji.

<sup>7</sup> Da tiempo su jamajaititana cielo su. Miguel da mesa ángel cuana neje bacua d'aida nime, tusa einid'u cuana neje jaichetitana. Tueda bacua d'aida nime da Ishahua banime puina. <sup>8</sup> Beju Miguel ja Ishahua, tusa einid'u cuana neje tupupai pishitiametana. Da su Miguel ja jusiacuinatana huecuana cielo jenetia. <sup>9</sup> Jusiautetana huecuana mundo su. Jiahue beju Ishahua ja pamapa ye mundo su aniji cristiano cuana ebaseatani.

<sup>10</sup> Da su beju etsui yama id'abana cielo jenetia. Uja puana:

—Beju cuinaitia ecuanaju sa d'ejí su epu tiempo. Diusu ecuatsasiati tucheda cuinaitia. Cristo huaraji aida epu. Edue cuana sa etuaquisaji Ishahua cielo jenetia mundo su Miguel ja jusiautetana. Tueda etuaquisaji ja dhidha, tsine Diusu butse su edue cuana tuaquisa bahue puina biame, aimue daja yatayu mahue, mundo su jusiautetana putsu. <sup>11</sup> Edue cuana ja Ishahua pishitiametana, Huisha Janana Nime mesa ami jad'uichatiana putsu. Ishahua pishitiametana huecuana, Cristo jepuiti quisa saida cuana daja hue quisaquisa pud-eratana huecuana putsu. Tuneseda puji mue ai puji saida emanu puji Cristo jepuiti. <sup>12</sup> Da su pamapa cielo su aniji cuana ebia su beidaji eputa. ¡Aba, mundo su aniji cuana, Ishahua tuna peje su buteana putsu! Tueda ebia su eduininiani, huai chidi hue mesa tiempo yani putsu, yahua su ai madhada cuana ya puji.

Daja etsui cielo jenetia puana.

<sup>13</sup> Deja yanana bataji atana epuna Ishahua ja tije atana, duinini putsu. <sup>14</sup> Da su Diusu ja epuna beta enabai huipasa nime tiatana Ishahua peje jenetia d'anita yahua su pacuabetsa puji. Dapia Diusu ja tueda emihuata quimisha mara edusete puji. <sup>15</sup> Da su beju Ishahua ja ena aida

cuinanametana mesa ecuatsa jenetia epuna emanuame puji. <sup>16</sup> Daja biame, yahua ja epuna tsahuatana. Jadhedatiana da da ena aida panubipeti puji. <sup>17-18</sup> Da su beju Ishahua ebia su duininiana epuna neje. Duinini putsu, putiana epuna sa pia ebacua cuana neje eicheti puji. Diusu sa jacuatsasiati cuana atana huecuana, Cristo sa jabuetsuati cuana su butsepi puniunetitana huecuana putsu, Ishahua tuna neje jaichetija puana.

## 13

### *Senida madhada detse*

<sup>1</sup> Beju ema mar maje su eneti su, piada ai senida madhada yama bana mar jenetia ecuinanasa. Siete chuame puina. Piada tunca daname. Edana mea hue corona cuana anitaina. Emata cuana su Diusu madhabaji mimi cuana derejiji anitaina. <sup>2</sup> Tueda ai senida madhada da iba nime yama bana. Mesa ehua auna sa nime. Mesa ecuatsa duqueji iba sa nime. Bacua d'aida nime ja tueda ai senida madhada mesa tucheda quitaita ebia su tiatana. Huaraji aida ametana tu eturuca. <sup>3</sup> Piada echua mesa tsiji puina. Tueda etsi neda neje emanu bata yama bana. Aimue esaisi bata mahue puina. Beju daja biame, tueda saisibana. Pamapa cristiano cuana ba putsu, ebia su nimetiunetitana huecuana. Da su ai senida madhada tije atana huecuana. <sup>4</sup> Cristiano cuana ja bacua d'aida nime mitsutsuatana, tuahueda ai senida madhada huaraji aida ametana putsu. Ai senida madhada di cristiano cuana ja mitsutsuatana. Beju uja putana huecuana:

—¿Aidhe da aida pu cua ye ai senida nime tu neje eicheti puji?

<sup>5</sup> Beju bacua d'aida nime ja ai senida madhada cuatsasiatana Diusu pamadhabata puji. Quimisha mara edusete puji bahui ai senida madhada d'aji tiatana huaraji aida epu puji. <sup>6</sup> Da su beju ai senida madhada ja Diusu madhabapirutana. Pamapa cielo su yani ai cuana di madhabatana. <sup>7</sup> D'aji tiatana tueda Diusu sa dharejiji cuana neje pamajaiti puji epishitiame teje. Bacua d'aida nime ja ai senida madhada huaraji aida ametana pamapa tsapiapiati yana su mimiji cuana pamapa ejude cuana je pacuatsasiata puji. <sup>8</sup> Da putsu, pamapa cristiano cuana ja ai senida madhada mitsutsuatana. Huisha Janana Nime sa quirica su derejiji yanita cuana ja mu ai senida madhada mue mitsutsua atana. Diusu ja mecuana sa ebani cuana quirica su equene deretaidha, mundo ajiji mahue su. Tu neje eid'e yanienititayu huecuana, mecuana sa ebani tueda quirica su derejiji yani putsu.

<sup>9</sup> Quebata id'ajalaraji su, paid'abata. <sup>10</sup> Quebata ja Diusu sa dharejiji cuana eteriicha puji edusuta su, tueda di terijiji

epu. Daja huecha quebata ja Diusu sa dharejiji cuana emanuameta su, tuseda di daja emanu. Da putsu, Diusu sa dharejiji cuana sa paciencia aidaji pu taji.

<sup>11</sup> Da su beju pia ai senida madhada yahua jenetia ecuinanasa yama bana. Beta daname chidi puina huisha janana sa nime. Mesa etsui da bacua d'aida sa nime. Huaraji aida mimi neje mimiana. <sup>12</sup> Tueda da equene puji ai senida madhada nime huaraji aida puina. Tuahueda equene puji ai senida madhada pamapa cristiano cuana mitsutsuametana. <sup>13</sup> Nimetiuda ai cuana ataina cristiano cuana ja pabata puji. Cuati utsu buepa jenetia butemetana yahua su. <sup>14</sup> Tueda nimetiuda ai cuana ataina equene puji ai senida madhada butse su. Da ai cuana neje cristiano cuana ebia su baseatana. Equene puji ai senida madhada mesa echua su tsiji nedaji biame, saisibana. Da su beta puji ai senida madhada ja cristiano cuana cuatsasiatana equene puji ai senida madhada sa eimea paata puji. <sup>15</sup> Da su tuahueda eimea eid'e ame putsu, eimea mimiametana. Pamapa eimea mitsutsuaja mahue putana cuana manuametana. <sup>16</sup> Beju aida, chidi puji, chipiluji, puri, d'eji su, esclavo cuana pamapa mecuana sa bai eni bene eme su, ahua emata su, ai senida sa ebani sa número padereta cuatsasiatana. <sup>17</sup> Tueda númeroji cuana ja bahui bajata cua, iruta cua. <sup>18</sup> Quebata ja tueda quema mimi cuana eid'abatani su, papibaenita cuaja tueda ai senida madhada sa número epuani. Beju mesa número da sucuta cien sucuta tunca sucuta ejaitiana. Tueda número da deja sa ebani epuani.

## 14

### *Satsu eichacua*

<sup>1</sup> Neicha yama chamana. Huisha Janana Nime bana Sion Emata bia su eneti. Tu neje piada cien pushi tunca pushi ejaitiana mil cristiano cuana netitaina. Mecuana sa emata cuana su Diusu sa ebani, Huisha Janana Nime sa ebani di derejiji yani yama bana. <sup>2</sup> Da su beju etsui cielo jenetia nai id'apadada, tiri, dueji harpa cuana eturutani nime yama id'abana. <sup>3</sup> Satsu eichacua satsutana huecuana Diusu sa aniude butse su, pushi ai eid'e, edhi cuana butse su. Tueda piada cien pushi tunca pushi ejaitiana mil d'eji su pujiji cristiano cuana bahui satsu eichacua bahue putana. <sup>4</sup> Mundo su anitaina huecuana su, aimue chuamadhada epuna neje jaquinatitaina mahue huecuana. Tuneda pamapa nimebutsepi Huisha Janana Nime tije yatani huecuana, queje papu tu eputiani su. Diusu ja d'eji su atana huecuana tuseda puji paputa huecuana puji. Huisha Janana Nime sa puji di paputa huecuana puji. <sup>5</sup> Bid'umimi pu bue mahue putaina

huecuana. Diusu butse su jucha mahue, nimebutsepi eputani huecuana.

*Quimisha ángel cuana quisatana*

<sup>6</sup> Da su beju equene puji ángel buepa su ecuabetsani yama bana. Diusu sa quisa saida cuana dusutana pamapa tsapiapiati yana su mimiji cuana pamapa ejude cuana je equisati puji. <sup>7</sup> Tueda jubida tsiatsiana uja:

—Diusu meiyubaque. Memitsutsuaque tueda, juzga hora beju cuinaitia putsu. Tuahueda saida eturuca etiatayu saida a bahue putaina cuana. Daja huecha madhada a bahue putaina cuana eturuca castigo etiatayu. Memitsutsuaque tueda, tuahueda cielo, yahua, mar, pamapa ena cuana ataidha putsu.

<sup>8</sup> Da su beju beta puji ángel yama bana. Tueda uja puana:

—Babilonia ejude aida beju dajajaitia. Tueda ejude su aniji cuana ja pamapa yahua cuana su aniji cuana jucha ametana.

<sup>9-10</sup> Da su beju quimisha puji ángel yama bana. Tueda uja tsiatsiana:

—Ahua quebata cuana ja ai senida madhada emitsutsuata su, ahua tusa marca mecuana sa emata, ahua eme su eichametita su, Diusu tuna neje ebia su eduinini. Ángel cuana, Huisha Janana Nime butse su Diusu ja ecastigaenitayu huecuana cuati utsu, azufre neje. <sup>11</sup> Daja hue sufri epuenita huecuana. Tueda cuati castigo utsu sa judu daja hue etsuaeniti. Tsine, dhidha aimue mecuana sa janahua epu mahue ai senida madhada, mesa eimea di mitsutsuatana huecuana, daja huecha mesa ebani neje marcajiji huecuana putsu. <sup>12</sup> Da su Diusu sa dharejiji cuana sa paciencia aidaji pu taji sufrimiento cuana etuchea puji. Daja huecha Diusu sa jacuatsasiati cuana a putsu, Cristo peje su enimetuheaderati puji.

<sup>13</sup> Da su beju uja etsui ja ema atana cielo jenetia:

—Dereque ye mimi cuana yama etiainia: “Cristo peje su jei pu putsu emanutani cuana da beidaji eputa.”

Espíritu Santo ja uja jeutsutana:

—¡Ehe! Beidaji eni eputa huecuana, ejanahuata putsu. Mundo su ai saida cuana atana jepuiti Diusu ja echuje etiata huecuana.

*Ángel ja cristiano cuana manuamepirutana mundo su*

<sup>14</sup> Da su beju judu pasane yama bana. Tueda judu bia su piada yani bana. Tueda da Diusu sa Jabeituti Deja. Mesa echua bia su corona oro jenetia anina. Hoz queuda dusutaina. <sup>15</sup> Pia ángel cielo su yani templo jenetia cuinanana. Tuahueda judu bia su aniji jubida tsiatsia neje uja atana:

—Mique hoz queuda neje cristiano cuana manuamepiruque mundo su, beju emanuame hora cuinaitia putsu. Cuaja deja ja arusu erajatani nime, daja mique hoz queuda neje cristiano cuana a taji.

<sup>16</sup> Da su mundo su manuametana huecuana.

<sup>17</sup> Da su beju pia ángel cuinanana templo jenetia. Tuahueda di hoz queuda dusutaina. <sup>18</sup> Pia ángel macha altar jenetia cuinanana. Tueda da cuati utsu metse puina. Tuahueda hoz metse eneti ángel tsiatsia neje uja atana:

—Mique hoz queuda neje cristiano cuana manuamepiruque mundo su. Cuaja deja ja uva edu edheutani nime, daja mique hoz queuda neje cristiano cuana a taji.

<sup>19</sup> Da su ángel ja mundo su manuametana huecuana. Pamapa tueda ai cuana da Diosu sa castigo tucheda. <sup>20</sup> Cuaja uva sa ena ecuinanani epudutani huecuana su nime, daja mecuana sa ami cuinanana. Caballo sa etsedu teje ami puana quimisha cien kilómetro ejude jenetia uquedame.

## 15

### *Siete jamatseti cuana*

<sup>1</sup> Da su beju yama pia nimetiuda aida cielo su bana. Siete ángel cuana siete tije jamatseti cuana metse yama bana. Tueda siete jamatseti cuana neje Diosu ja mesa castigo jubida yapeta.

<sup>2</sup> Mar aida, cuareda, cristal nime, cuati utsu neje huaru yama bana. Ai senida madhada, eimea detse pishitameji cuana mar queque su anitaina. Diosu ja tiatana harpa metse cama putaina. <sup>3</sup> Moisés chenu ja dharetaidha satsu satsutanetina huecuana. Huisha Janana Nime jepuiti satsu di satsutanetina huecuana tu emitsutsua puji. Beju uja satsutanetina huecuana:

Echua Puji, mida da Diosu aida, tucheda.

Nimetiuda aida mique ai jaati cuana.

Mida da huaraji aida pamapa ejude cuana bia su.

Mida da saida, nimebutsepi.

<sup>4</sup> Pamapa ja iyubataque.

Saida bataque huecuana, mida bahui jucha mahue putsu.

Pamapa cristiano cuana pamapa ejude cuana jenetia epueta mi emitsutsua puji, mida da nimebutsepi batana huecuana putsu.

Daja satsutana huecuana.

<sup>5</sup> Da su neicha cielo su yani templo yama bana. Templo dume su Diosu sa ani jude iyuda yama bana. <sup>6</sup> Templo jenetia siete ángel cuana siete jamatsetiji cama cuinanatana. Jud'uji pasane cama huecuana. Oro jenetia eturisiji cuana etsedu teje babujiji putaina. <sup>7</sup> Piada ai eid'e ja tueda siete ángel cuana

siete emeji cuana oro jenetia ajiji tiatana. Tueda emeji cuana da Diosu sa duinini neje sejeajiji putaina. <sup>8</sup> Beju da hora su templo judu neje sejeana. Tueda judu Diosu peje jenetia cuinanana. Aimue aidhe biame templo su cuaja nubi taji mahue jabatitana siete ai iyuda cuana ed'uichapeta teje.

## 16

*Ángel cuana ja siete jamatseti cuana d'uichatana*

<sup>1</sup> Beju etsui jubida templo jenetia yama id'abana. Siete ángel cuana uja atana:

—Meputique mundo su. Siete emeji cuana jenetia Diosu peje jenetia epueni jamatseti cuana med'uichatique mundo bia su.

<sup>2</sup> Da su beju equene puji ángel putiana emeji yahua bia su ed'uichati puji. Tuahueda emeji d'uichatana su, ai senida madhada sa marca neje, eimea mitsutsuaji cuana pamapa mecuana sa equita cuana jabusubusuatitana. Tueda busubusu ja ebia su neda ametana huecuana.

<sup>3</sup> Da su beju beta puji ángel putiana emeji mar su ed'uichati puji. Tuahueda emeji d'uichatana su, mar manujiji sa ami nime japiatiana. Pamapa mar su aniji ai eid'e cuana beju manutana.

<sup>4</sup> Da su beju quimisha puji ángel putiana emeji pamapa ena cuana su ed'uichati puji. Tuahueda emeji d'uichatana su, pamapa ena cuana ami puji japiatitana. <sup>5-6</sup> Da su ena metse ángel ja uja Diosu atana:

—Mida da nimebutsepi. Mida da chue pujianati eid'e jiahue teje. Mique castigo cuana cristiano cuana peje su butsepi, mique profeta, dharejiji cuana manuametana huecuana putsu. Tuna sa ami d'uichametana huecuana putsu, jiahue miada ena cuana ami su eturucameinia paid'ita huecuana puji. Miada butsepi yainia. Eturuca etiainia huecuana, tuna sa ai madhada jaati cuana jepuiti.

<sup>7</sup> Beju altar jenetia yama etsui id'abana uja epuani:

—Ehe, Echua Puji Aida, mique castigo cuana da butsepi.

<sup>8</sup> Da su beju pushi puji ángel putiana emeji id'eti bia su ed'uichati puji. Tuahueda emeji d'uichatana su, id'eti ja cuahupirutana cristiano cuana. <sup>9</sup> Da su jubida Diosu madhabatana huecuana, tuahueda castigo cuana beitutana putsu. Daja biame, aimue Diosu peje su japibaturucatitana huecuana mahue. Mue Diosu iyuba atana huecuana.

<sup>10</sup> Da su beju pishica puji ángel putiana emeji quepia ai senida madhada ja ecuatsasiatani su ed'uichati puji. Tuahueda emeji d'uichatana su, beju apunapiruana quepia ai senida madhada ja ecuatsasiatani su. Cristiano cuana ja mecuana sa yana cachutadadatana, ebia su neda putana

putsu. <sup>11</sup> Diusu jubida madhabatana huecuana, pamapa tueda ai neda cuana jepuiti. Beju daja biame, aimue Diusu peje su japibaturucatiya mahue putana huecuana. Mecuana sa ai madhada ataina cuana rijinetiaya mahue atana huecuana.

<sup>12</sup> Da su beju sucuta puji ángel putiana emeji Eufrates ena bia su ed'uichati puji. Tuahueda emeji d'uichatana su, beju muritapeana ena. Ena muritajiji da edid'i puji puana echua puji cuana tuna sa soldado cuana neje id'eti ecuinanani bene jenetia papueta puji.

<sup>13</sup> Da su yama bana quimisha einid'u bururu nime cuinanatana. Piada bacua d'aida sa ecuatsa jenetia cuinanana. Pia ai senida madhada sa ecuatsa jenetia cuinanana. Pia profeta bid'umimi puji sa ecuatsa jenetia cuinanana. <sup>14</sup> Tueda quimisha einid'u madhada cuana ja ai nimetiuda cuana a bahue putaina. Beju putitana huecuana echua puji cuana peje su tuna edhita puji, Diusu sa castigo tsine ecuina su emajaiti puji. <sup>15</sup> (Uja Cristo puana: "Beju tipeida ema epue micuaneda ema eid'uainia mahue hora su. Quebata janimepitijiji yani su, tueda beidaji epu ema epueicha hora su. Ahua tueda saida, jucha mahue epu ema epueicha teje su, aimue tueda ebidhu mahue.") <sup>16</sup> Da su einid'u cuana ja pamapa yahua su aniji echua puji cuana eti jude Armagedón banime su dhitametana tuna emajaitita puji.

<sup>17</sup> Da su beju siete puji ángel putiana emeji buepa su ed'uichati puji. Tuahueda emeji d'uichatana su, Diusu sa etsui mesa eti jude iyuda jenetia templo su jubida mimiana uja:

—Beju pamapa apejiji.

<sup>18</sup> Da su beju pupiruana tserutseru, etsui, tiri cuana. Mundo rirebatana quetsunu su puicha mahue. <sup>19</sup> Babilonia ejude quimisha su japed'utiana. Pamapa ejude cuana beju dajajapetana. Babilonia ejude su aniji cuana sa jucha cuana jepuiti Diusu ja daja jubida castigatana huecuana, tuna neje ebia su duininiana putsu. <sup>20</sup> Pamapa edhapupu cuana beju taitanapetana. Emata cuana di pamapa japaipetitana. <sup>21</sup> Iyaru aida cuana buepa jenetia cristiano cuana bia su dajajatana. Tueda iyaru pushi tunca kilo cama biquedame putaina. Cristiano cuana ja Diusu ebia su madhabatana, iyaru aida cuana je dajajametana putsu.

## 17

*Ejude madhada su aniji cuana Diusu ja metsetana*



<sup>1</sup> Da su beju siete ángel cuana peje jenetia piada ema peje su pueana. Uja ema atana:

—Pueque. Mebameiti mar queque su yani ejude. Tueda ejude su aniji cuana da epuna chuamadhada nime. Ai madhada cuana atana huecuana putsu, cuaja Diosu ja ematsetayu huecuana yama mi ebame. <sup>2</sup> Mundo su aniji echua puji aida cuana dapia aniji cuana neje jucha aida putana. Pamapa cristiano cuana jucha ametana huecuana.

<sup>3</sup> Da su beju tahui su nime tuahueda ema dusutana d'anita yahua su. Dapia da yama bana piada epuna ai senida dherena bia su yani. Ai senida sa equita da Diosu sa puji mimi madhamadha neje derepejiji puina. Tueda siete chuame puina. Piada tunca daname. <sup>4</sup> Beju tueda epuna sa ejud'uji idhiria, dherena puina. Jucuada oro, joya chujeneda, perla cuana neje basetajiji puina. Eme su dusutaina emeji oro jenetia ajiji. Tueda emeji mesa jucha ai madhada cuana neje sejeajiji puina. <sup>5</sup> Mesa emata su derejiji anina nimetiuda mimi cuana. Tueda mimi cuana uja puana: “Babilonia ejude aida. Dapia aniji cuana da epuna chuamadhada nime, pamapa mundo su aniji cuana neje jucha atana huecuana putsu.” <sup>6</sup> Dapia aniji cuana beidaji putana, Cristo tije aji cuana manuametana huecuana putsu. Beju daja ba putsu, ema nimetiunetiana. <sup>7</sup> Da su ángel ja ema uja quisabatana:

—¿Jucuaja su mi enimetiuni? Beju yama mi eshanapame epuna ai senida jepuiti. <sup>8</sup> Beju tueda ai senida equene eid'e anina. Aimue jiahue yani mahue. Daja biame, tueda riji mahue rara jenetia ecuinana. Cuinana putsu, beju Diosu ja tueda cuati castigo su eichanubiaenitayu. Pamapa Diosu sa quirica su ebani mue ani cuana da enimetiutayu, tueda ai cuana ba putsu.

<sup>9</sup> Beju upia yani ai cuana eshanapa puji. Jiahue yama mi equisa cuaja tueda ai cuana epu. Tueda siete echua cuana da siete emata cuana pu cua nime. Da bia su tueda epuna yani. <sup>10</sup> Tueda siete echua cuana da siete echua puji huaraji cuana pu cua nime. Pishica tuneda beju dajajatana. Piada hue jiahue ecuatsasia epuani. Pia tije puji cuinaji mahue. Tueda ecuina su, ubu chidi tiempo hue ecuatsasia epu. <sup>11</sup> Tueda ai senida dherena da siete echua puji huaraji jenetia, piada echua puji puina manujiji mahue su. Tueda neicha hue eid'eyu su, ocho puji echua puji epu. Da su beju Diosu ja tueda cuati castigo su ebeituenitayu.

<sup>12</sup> Tueda piada tunca edana cuana da piada tunca echua puji huaraji cuana sa pue taji pu cua nime. Beju tuneda bataji epu su, piada hora hue pamapa su ecuatsasia eputa huecuana ai senida dherena neje. <sup>13</sup> Pamapa tueda piada tunca

echua puji cuana ja ai senida emebajata pamapa mecuana sa tucheda neje. <sup>14</sup> Huisha Janana Nime neje emajaitita huecuana. Da su Huisha Janana Nime ja epishitiameta huecuana, tueda pamapa pia echua puji huaraji cuana ebia su aida putsu. Tu neje yanita cuana da mesa jadhareti. Tu peje su ebia su enimetuheatitani huecuana. Tuna neje tupupai Huisha Janana Nime ja ai senida madhada epishitiameenitayu.

<sup>15</sup> Da su beju ángel ja ema daja hue quisainiame atana uja:

—Miada ai bana cuana jiahue mi yama equisa. Miada epuna chuamadhada bana ena bia su yani. Tueda ena da tsapiapiati yana su mimiji cuana pamapa ejude je nime. <sup>16</sup> Tueda piada tunca echua puji huaraji cuana ja ai senida neje chuamadhada epuna ebia su duininibatana. Pamapa su japaiti putsu, epuna emanuameta huecuana. Jud'uji mahue ejusiaichata huecuana. Tusa yami ediata huecuana. Cuati utsu su etiumeta huecuana. <sup>17</sup> Beju Diusu ja dhitamepetana huecuana mesa ai tsada cuana papeta huecuana puji. Da su ai senida madhada tucheda menajatiatana huecuana tueda ecuatsasia papu puji, pamapa Diusu sa tsada yape teje. <sup>18</sup> Tueda miada bana epuna da tueda ejude aida, tucheda pu cua nime. Dapia tueda ejude su pamapa yahua sa echua puji huaraji cuana jucha ya puji puti bahue putaina.

## 18

### *Ejude Babilonia dajajapeana*

<sup>1</sup> Da su beju pia ángel cielo jenetia ebuteni yama bana. Tueda huaraji aida puina. Pamapa yahua cuareda puana tu jepuiti. <sup>2</sup> Tueda etsui jubida uja puana:

—Beju dajajapeitia Babilonia ejude aida. U jenetia su da tsapiapiati einid'u madhada cama dapia yanitita. Pamapa ai cuabetsaji emanu diaji cuana di dapia yanitita. <sup>3</sup> Pamapa ejude cuana su aniji cuana ja tueda ejude su aniji cuana neje ebia su jucha aida cuana atana. Pamapa echua puji huaraji cuana tuna neje pamapa madhada ai cuana atana. Pamapa iruiruji cuana chipiluji saida ametana, jucha yameinia je.

<sup>4</sup> Da su beju pia etsui cielo jenetia yama id'abana uja epuani:

—Quema dharejiji cuana, mecuinanaque tueda ejude jenetia tueda ejude su aniji cuana sa jucha cuana aimue micuaneda ya mahue puji, Diusu sa castigo micuana peje su pacuina mahue puji. <sup>5</sup> Mecuana sa jucha cuana da dueji Diusu ja batana. Mecuana sa jucha cuana piba putsu, ecastigata huecuana. <sup>6</sup> Cuaja tuneda pia cuana madhada neje batana nime, daja Diusu ja eturuca etiatayu huecuana. Daja

huecha tuneda pia cuana ai madhada cuana tiatana ebia su Diusu ja etiata huecuana. <sup>7</sup>Tuna sa muesumu su ebia su aida jabatitana huecuana. Uja japibatitana huecuana: “Aimue ecuanaju ahue manujiji epuna nime mahue epu. Aimue da ecuanaju epadariti mahue, ecuanaju da echua puji cuana nime putsu.” <sup>8</sup>Da su beju piada tsine su jamatseti cuana tuna peje su ecuinata. Tsapiapiati neda, mid'e cuana tuna peje su tipeida ecuina. Tuneda epadaritita jubida. Ebia su echucuata epibapibata huecuana. Cuati utsu neje etiumeta huecuana. Daja Diusu aida, tucheda ja ematseta huecuana.

<sup>9</sup>Yahua su echua puji cuana ja Babilonia ejude etiuneti ba putsu, ebia su echucuata epibapibata huecuana. <sup>10</sup>Jamatseti cuana iyuba putsu, uqueda yanitita huecuana. Uja eputa huecuana:

—¡Ai, Babilonia ejude aida! Mique castigo beju cuinaitia. Diusu ja mi taitanamepetaitia piada hora su hue.

<sup>11</sup>Yahua su iruiruji cuana di epadaritita beju, aidhe biame iru taji mahue mecuana sa ai cuana putsu. <sup>12-13</sup>Beju ye cuana da tuneseda eiruji yanita: oro, plata, joya, perla cuana. Seda idhiria, dherena cuana di yanita huecuana. Aqui puida, marfil jenetia ai ajiji, aqui chujeneda jenetia ai ajiji cuana di yanita huecuana. Bronce, piama, marmol cuana di yanita huecuana. Canela, especie puida, incienso, mirra, ena puida cuana di yanita huecuana. Vino, etsei, harina, trigo cuana di yanita huecuana. Huaca, huisha, caballo cuana di yanita huecuana. Carro cuana di, cristiano esclavo cuana di yanita huecuana. Pamapa tueda ai cuana tuneseda yani eiru puji. Beju daja biame, ebia su epadaritita huecuana, aimue ebajaji cuana ani putsu. <sup>14</sup>Uja eputa huecuana:

—¡Ai, Babilonia ejude su aniji cuana! Pamapa micuana sa ai tsada ania chidi cuana beju taitanapetana.

<sup>15</sup>Iruiruji cuana uqueda enetitita, ebia su iyuame pu putsu. Jubida epadaritita huecuana, tueda ejude su aidhe biame iru taji mahue putsu.

<sup>16</sup>Uja eputa huecuana:

—¡Ai, Babilonia ejude su aniji cuana! Micuaneda ejud'uji chujeneda, idhiria, dherena jajud'uti bahue puina oro, joya, perla cuana neje. <sup>17</sup>Piada hora su hue micuana sa chipilu pamapa taitanapeana.

Beju pamapa barco emetse, capitán, marinero, mar bia su mudumuduji cuana di uqueda enetitita. <sup>18</sup>Ejude etiuneti sa judu ba putsu, mimi neje jubida etsiatsiata huecuana uja:

—Aimue pia ejude ye ejude aida nime anina mahue.

<sup>19</sup> Beju epadarititani cama, med'i jutujutuji mecuana sa echua bia su eichatita huecuana. Ebia su echucuata pibapiba putsu, uja eputa huecuana:

—¡Ai, Babilonia ejude sa aniji cuana! Pamapa barco emetse cuana ja micuana peje su tuna sa ai cuana irutaina. Ebia su chipilu inatsutaina huecuana. Beju jiahue piada hora su hue micuana sa ejude aida taitanapeana. Aimue bajabajaji cuana yanita mahue.

Daja eputa huecuana, ejude etiuneti ba putsu.

<sup>20</sup> Cielo su aniji, Diusu sa dharejiji, apóstol, profeta cuana, beidaji mepuque, Diusu ja Babilonia ejude su aniji cuana jubida matsetana putsu. Tuneda micuana ai madhada cuana atana putsu, Diusu ja matsetana huecuana.

<sup>21</sup> Da su beju piada ángel tucheda ja tumu butsama jemitsua putsu, mar su jusianubiatana. Daja a putsu, uja puana:

—Uja Babilonia ejude aida dajajame epu. <sup>22</sup> Ejude duje aimue harpa, guitarra, mui, pututu cuana eturutani eid'abata mahue. Mudu puji cuana aimue eputa mahue. Aimue edudududutani eid'abata mahue. <sup>23</sup> Ete cuana su hueda cuana aimue eutsuta mahue. Aimue ebutsenetita mahue. Tueda ejude sa iruiruji cuana da equene deja aida cuana putaina. Pamapa mundo je putitaina huecuana. Tueda ejude su aniji cuana ja pamapa pia ejude su aniji cuana baseatana ai madhada cuana neje.

<sup>24</sup> Tueda ejude su aniji cuana da Diusu sa dharejiji, quisaquisa puji ejude duju su manuametana cuana jepuiti juchaji eputani. Daja huecha pia ejude cuana su Diusu sa dharejiji cuana emanuametani huecuana jepuiti di juchaji eputani.

## 19

<sup>1</sup> Da su beju yama id'abana dueji cristiano cuana cielo su mimi neje jubida etsiatsiatani uja:

¡Aleluya! Ecuana sa Diusu ja ecuana d'ejí su atana.

Tueda da tucheda eni.

Pamitsutsuaenitija.

<sup>2</sup> Tuahueda butsepi, ene quita neje ejuzgatani.

Epuna chuamadhada matsetana.

Tueda epuna ja pamapa cristiano cuana yahua su nimemadhatana mesa jucha cuana neje.

Diusu sa emebajaji cuana manuametana putsu, Diusu ja tueda jubida matsetana.

<sup>3</sup> Neicha uja tsiatsia neje putana huecuana yama id'abana:

—¡Aleluya! Tueda ejude sa utsu judu etsuaenitiyu.

<sup>4</sup> Beju tueda beta tunca pushi ejaitiana edhi, pushi ai eid'e cuana Diosu yani aniude butse su tururutana tu emitsutsua puji. Uja putana huecuana:

—Daja papu. ¡Aleluya!

<sup>5</sup> Da su aniude jenetia da etsui uja puana:

Pamapa Diosu sa emebajaji cuana ja Diosu pamitsutsuata. Daja huecha pamapa aida, chidi puji, Diosu iyubaji cuana ja Diosu pamitsutsuata.

*Huisha Janana Nime sa jahuaneti tsine*

<sup>6</sup> Da su beju neicha dueji cristiano cuana etsiatsiatani yama id'abana. Tuna sa etsui cuana nai sa id'apadada nime id'abana. Tiri jubida nime tuna sa etsui id'abana. Uja putana huecuana:

¡Aleluya! Ecuana sa Diosu aida beju ecuatsasia pupiruitia.

<sup>7</sup> Beju beidaji mepuja.

Diosu pamitsutsuatija, Huisha Janana Nime sa ehuaneti hora beju pueitia putsu.

Mesa ehuanepu basetajiji yani beju.

<sup>8</sup> Da su ejud'uji pasane, cuarecuare, chujeneda mesa ehuanepu tiatana pajud'uti puji.

(Tueda ejud'uji pasane da Diosu sa dharejiji cuana sa ai saida atana cuana pu cua nime.)

<sup>9</sup> Da su beju ángel ja ema neicha uja atana:

—Dereque ye yama mi ai equisa cuana: “Huisha Janana Nime sa jahuaneti tsine su ihuajiji cuana da beidaji paputa.”

Ema daja hue quisainiame atana uja:

—Ye Diosu sa quisa cuana yama mi butsepi equisainia.

<sup>10</sup> Da su tu butse su ema tururuana tu emitsutsua puji. Beju tuahueda ema uja atana:

—Be tururuji ema butse su, ema mu da mi nime, mique edue cuana nime hue, Diosu sa emebajaji putsu. Diosu bahui mitsutsua taji.

Quebata ja Jesús jepuiti quisaquisa saida cuana equisaneti-acuinata su, tueda da Diosu sa ene quita quisaquisa puji.

*Caballo pasane bianiji*

<sup>11</sup> Da su beju cielo tsequed'iajiji yama bana. Piada caballo pasane bataji puana. Caballo bia su piada anina. Tueda banime Ene Quita Quisa Puji. Tuahueda butsepi neje ecuatsasiatani. Tu duininibaji cuana neje emajaiti. <sup>12</sup> Mesa etua detse cuati utsu nime. Mesa echua bia su jucuada corona cuana anitaina. Mesa emata su derejiji anina mesa etsia mimi ebani. Aimue pia cuana ja tueda ebani eshanapatani mahue. Tuahueda bahui eshanapatani. <sup>13</sup> Mesa ejud'uji ami su d'imiajiji puina. Mesa ebani da Diosu sa Mimi. <sup>14</sup> Diosu sa ángel soldado cuana ja caballo pasane bia je cama tije yatani

bana. Mecuana sa ejud'uji pasane, chujeneda cama. <sup>15</sup> Mesa ecuatsa jenetia espada queuda cuinanana. Tueda espada neje pamapa ejude cuana nedaneda yatayu. Jubida ecuatsasiata huecuana. Diusu sa jubida duinini putsu, tuahueda tu jei aja mahue cuana jubida ematsetayu. <sup>16</sup> Mesa ejud'uji bia su daja huecha etidada yami su pia mesa ebani derejiji yani. Uja tueda ebani epuani: "Pamapa Echua Puji Cuana sa Echua Puji."

<sup>17</sup> Da su beju pia ángel yama bana id'eti su eneti. Tuahueda aicha diaji cuabetsaji cuana jubida tsiatsia neje ihuatana uja: —Mepueque. Medhitatique. Diusu ja micuana ebia su emihuata. <sup>18</sup> Beju yahua su echua puji manujiji cuana sa yami micuana etiata mediaque puji. Capitán, deja tucheda, caballo bianiji, manujiji cuana sa yami micuana etiata mediaque puji. Pamapa d'eji su, esclavo, deja aida, deja chidi puji cuana sa yami micuana mediaque puji. Mecuana sa caballo cuana sa aicha di micuana etiata.

<sup>19</sup> Da su beju ai senida madhada, yahua sa echua puji cuana yama bana. Tuneda pamapa mecuana sa soldado cuana neje dhitatana caballo pasane bianiji neje, tusa soldado cuana neje di eicheti puji. <sup>20</sup> Beju caballo pasane bianiji ja pishiti-ametana huecuana. Ai senida madhada inatana. Tusa profeta bid'umimi puji di inatana. Tueda profeta da ai nimetiuda cuana aji puina cristiano cuana ja ai senida madhada pamitsutsuata puji. Equene emata su ai senida madhada sa ebani derejiji cuana ebasea puji ai nimetiuda cuana ataina. Diusu ja ai senida madhada, tusa profeta bid'umimi neje bai azufre neje huarujiji eutsuneti su eid'e ichanubiatana. <sup>21</sup> Ai senida madhada sa soldado cuana pamapa manuametana mesa ecuatsa jenetia ecuinanani espada neje. Da su beju pamapa aicha diaji cuabetsaji cuana ja tueda manujiji soldado cuana sa equita cuana diapetana.

## 20

### *Mil mara*

<sup>1</sup> Da su beju pia ángel cielo jenetia yama bana. Riji mahue rara sa eteriji lahui eme su dusutaina. Cadena aida di dusutana. <sup>2</sup> Bacua d'aida nime inatana. Tueda bacua d'aida nime da Ishahua banime. Cadena neje ángel ja tueda risitana. Risi putsu, riji mahue rara su teriichatana mil mara puji. <sup>3</sup> Rara su biu putsu, lahui netiatana. Dapia tu yani tupu, aimue cristiano cuana mil mara puji tuahueda ebaseata mahue puji. Tueda mil mara ejaitiana su, neicha etsequed'iata cristiano cuana quejucua tiempo chidi puji, pabaseata puji.

<sup>4-5</sup> Da su beju yama aniude cuana bana. Tueda aniude cuana bia su ejuzgaji cuana anitaina. Diusu ja huaratiatana

huecuana cristiano cuana pajuzgata puji. Pamapa ai saida atana cuana echuje saida eturuca etiata huecuana. Daja huecha pamapa ai madhada atana cuana echuje madhada eturuca etiata huecuana. Da su beju Jesús jepuiti manuamejiji cuana bana. Beju id'etaibana huecuana yama bana. Eid'e yahua su anitaina su, aimue ai senida madhada sa eimea mitsutsuatana huecuana mahue. Aimue jaderemetitana mahue emata su, eme su ai senida madhada sa marca. Beju id'etaibana huecuana putsu, Cristo neje ecuatsasia putana huecuana mil mara puji. Tuneda da equene id'etaibana cuana. Pamapa pia manujiji cuana mil mara ejaitiana su chu, eid'etayu. <sup>6</sup> Beidaji equene eid'etayu cuana, aimue cuati castigo su eputita huecuana mahue putsu. Diusu, Cristo detse sa emebajiji cuana eputa huecuana. Mil mara puji Cristo neje ecuatsasia eputa huecuana.

<sup>7</sup> Beju mil mara ejaitiana su, Ishahua rara jenetia ejemicuinata. <sup>8</sup> Da su tueda ecuinana su, pamapa ejude su aniji cuana ebasepiruta. Echua puji Gog, Magog detse di ebaseata. Tuatse sa soldado cuana edhitameta Diusu sa dharejiji cuana neje paichetita puji. Tuatse sa soldado cuana da dueji ena sa jutujutuji nime. <sup>9</sup> Da su tueda soldado cuana putitana. Diusu sa dharejiji cuana mesa ejude ibuneda sa baretana huecuana. Daja biame, cuati utsu cielo jenetia tuna bia su dajajana. Beju tiupetana huecuana. <sup>10</sup> Da su Diusu ja Ishahua bai azufre neje huarujiji eutsuneti su ichanubiatana. Dapia ai senida madhada, profeta bid'umimi detse di yani. Dapia tsine, dhidha ebia su sufri epuenita huecuana.

### *Diusu sa aniude pasane butse su*

<sup>11</sup> Da su beju aniude aida pasane yama bana. Da bia su aniji butse su mundo, buepa taitanapeana. Taitanape-saisiana. <sup>12</sup> Beju pamapa manujiji cuana yama bana aniude aida pasane butse su enetita. Pamapa aida, chidi puji cuana enetita beju yama bana. Da su beju Diusu ja mesa quirica cuana piraratana. Piada quirica piraratana. Tueda quirica su pamapa mesa dharejiji cristiano cuana sa ebani cuana derejiji anina. Tueda quirica cuana su pamapa cristiano cuana sa ai atana derejiji anina. Da neje Diusu ja juzgatana huecuana, cuaja ye mundo su atana huecuana batame. <sup>13</sup> Pamapa mar tipa su manutana, yahua su papajiji cuana, cuinanape putsu, beju tsuatitaibana. Diusu ja pamapa tuneda juzgatana, cuaja tuna sa ai atana cuana batame. <sup>14-15</sup> Da su Diusu sa quirica su mue ebani ani cuana Diusu ja bai eutsuneti su ichanubiaenitana castigo jubida sufri papuenita huecuana puji.

## 21

*Buepa, yahua eichacua*

<sup>1</sup> Da su beju pia buepa, yahua eichacua yama bana. Equene buepa, yahua beju taitanapeeniana. Beju aimue mar anina mahue. <sup>2</sup> Jerusalén ejude iyuda, eichacua cielo jenetia, Diosu peje jenetia ebuteni yama bana. Tueda ejude ania, basetajiji ehuanepu mesa yahue epu peje su epuhu nime puina. <sup>3</sup> Da su beju etsui jubida cielo jenetia yama id'abana uja:

—Jiahue jenetia su Diosu cristiano cuana neje yaniti. Tuseda puji bahui eputa huecuana. Tueda mecuana sa Diosu epueni. <sup>4</sup> Daja huecha tuahueda emuririameta tuna sa tuana. Aimue neicha emanuta, epata, epadaritita, neda eputa huecuana mahue, pamapa equene yahua su puina ai cuana beju taitanapetana putsu. Pamapa ai cuana eichacua epu.

<sup>5</sup> Da su aniude bia su aniji uja puana:

—Chamaque, yama pamapa ai cuana eichacua yainia. Dereque quema mimi cuana quirica su. Quema mimi cuana da ene quita, butsepi. Cuaja ema puana batame, beju epu.

<sup>6</sup> Daja hue ema quisainiame atana uja:

—Beju pamapa ai cuana apejiji. Yama equene pamapa ai cuana apiruidha. Daja huecha pamapa ai cuana yama apeyume ya. Quebata da jaid'itija epuani yama eid'e jaametiji yahui cha tia hue ya. Quebata ema shanapaenija epuani, tu neje ema eshanapameenitiyu. <sup>7</sup> Quebata cuana da daja hue ema peje su enimetucheatita su, yama pamapa tueda ai cuana etia huecuana. Ema da tuna sa Diosu epu. Quema ebacua cuana di eputa huecuana. <sup>8</sup> Beju pamapa ema peje su janimetucheatija mahue cuana aimue daja epu mahue. Pamapa nimetucheda mahue, jei puja mahue, nimemadhada, jamanuametiji, ai madhada yatani, pia sa ebutse neje jaquinatiji, mau, eimea mitsutsuaji, bid'umimi puji cuana beju bai azufre neje huarujiji eutsuneti su epuenitita.

*Jerusalén ejude eichacua*

<sup>9</sup> Da su beju siete ángel cuana peje jenetia piada pueana. Tueda siete ángel cuana sa siete jamatseti emeji cuana anitaina. Tuahueda ema uja atana:

—Pueque. Mebameiti Huisha Janana Nime sa ehuanepu.

<sup>10</sup> Da su beju tahui su nime Espíritu Santo ja ema bametana. Ángel ja ema dusutana emata aida baqui bauda su. Bametana ema Jerusalén ejude aida, iyuda cielo jenetia, Diosu peje jenetia ebuteni. <sup>11</sup> Tueda ejude cuarecuare puana Diosu sa hueda neje. Joya chujeneda, jaspe nime cuaredame puina. Cristal nime cuareda puina. <sup>12</sup> Ejude tsahua sa tumu pirica



baqui bauda anina. Tumu pirica sa piada tunca beta ejaitiana eteriji cuana anina. Eteriji mea hue piada ángel anina. Tueda eteriji cuana su Israel sa piada tunca beta ejaitiana familia cuana sa ebani cuana derejiji anitaina. Eteriji mea hue piada ebani derejiji anina. <sup>13</sup> Beju pirica su quimisha eteriji id'eti ecuinanani bene, quimisha nai bene, quimisha beni bene, quimisha id'eti enubihu bene anitaina. <sup>14</sup> Pirica sa piada tunca beta ejaitiana yapiruji tumu anina. Tueda yapiruji tumu cuana su piada tunca beta ejaitiana Huisha Janana Nime sa apóstol cuana sa ebani cuana anina. Tumu mea hue piada ebani derejiji anina.

<sup>15</sup> Ema neje jamitsutiji ángel sa piada huara oro jenetia ajiji anina ejude, etibeini cuana, pirica etupua puji. <sup>16</sup> Beju ejude da beta mil beta cien kilómetro baudame puina. Daja huecha mesa baqui bauda, pahaida puina. <sup>17</sup> Tumu pirica di tupuatana. Mesa baqui bauda sucuta tunca pushi ejaitiana huara puina.

<sup>18</sup> Tumu jaspe cuana jenetia tueda pirica ajiji puina. Ejude da oro quitaita ania, cuareda jenetia ajiji puina. <sup>19-20</sup> Tumu pirica epa su, yahua naja su beju tsapiapiai joya cuana ribaichajiji anitaina. Jaspe, zafiro, ágata, esmeralda, ónice, cornalina, crisólito, berilo, topacio, crisoprasa, jacinto, amatista cuana anitaina. Tueda joya cuana pirica su ribaichajiji anitaina. <sup>21</sup> Eteriji cuana da piada tunca beta ejaitiana perla cuana putaina. Eteriji mea hue piada perla jenetia ajiji puina. Pamapa ejude sa calle cuana da oro cuareda jenetia ajiji puina.

<sup>22</sup> Dapia ejude su aimue templo anina mahue yama bana, Diosu, Huisha Janana Nime detse quitaita dapia anina putsu. <sup>23</sup> Aimue id'eti, badi yama bana mahue, Diosu, Huisha Janana Nime detse sa huada ja jurabapetaina putsu. <sup>24</sup> Tueda huada ja pamapa mundo su ejude cuana jurabapetaina. Pamapa echua puji cuana Huisha Janana Nime peje su mecuana sa ai chujeneda dusutaina. Diosu mitsutsuataina huecuana. <sup>25</sup> Aimue tueda ejude sa eteriji cuana tsine eteritita mahue. Dapia mu aimue dhidha mahue epu. <sup>26</sup> Pamapa ai chujeneda saida cuana pamapa mundo jenetia cristiano cuana ja tueda ejude su edusuta. <sup>27</sup> Aimue ai madhada aji, bid'umimi puji cuana enubita mahue. Pamapa Huisha Janana Nime sa quirica su ebani derejiji yanita cuana bahui enubita.

## 22

<sup>1</sup> Da su beju ángel ja ema eid'e jaametiji ena nacuarda yahui bametana. Tueda ena da Diosu, Huisha Janana Nime detse sa aniude jenetia cuinanana. <sup>2</sup> Ejude dusete je ena

satiana. Ena queque je eid'e jaametiji equi cuana netitaina. Pamapa badi jajaji putaina. Tuna sa eina cuana da eidue puji putaina pamapa ejude su aniji cristiano cuana esaisiame puji. <sup>3</sup> Tueda ejude su aimue ai madhada cuana yanita mahue. Diusu, Huisha Janana Nime detse dapia aniude bia su yaniti. Huisha Janana Nime sa emebajaji cuana ja tu emitsut-suatani. <sup>4</sup> Dapia huamahuama ebuchamatitayu. Tusa ebani mecuana sa emata su derejiji edusutita. <sup>5</sup> Dapia aimue apuda epuyu mahue. Tueda ejude su aniji cuana sa caitera, id'eti sa hueda tsada mahue epu, Diusu quitaita mecuana sa hueda epu putsu. Beju tu neje ecuatsasia epuenita huecuana.

*Jesucristo sa pue taji tsine enariatiani*

<sup>6</sup> Da su beju ángel ja ema uja atana:

—Tueda pamapa mi derejiji mimi cuana da ene quita, butsepi jei ya puji. Cuaja Diusu ja mesa profeta chenu cuana butsepi quisametaidha batame, daja ema beitutana mi equisa puji. Da su dereque tueda ai quisa cuana Diusu sa emebajaji cuana ja cuaja ai cuana tipeida epu pashanapata puji.

Ema da Juan. Uja Jesús ja ema atana:

<sup>7</sup>—Tipeida ema epue. Quebata ye quirica su ai quisa cuana su jei epu su, tueda beidaji epu.

<sup>8</sup> Yama quitaita bana, id'abana tueda ai cuana. Id'aba putsu, ema tururuana ema ai cuana bametana ángel butse su tu emitsutsua puji. <sup>9</sup> Da su ángel ja ema uja atana:

—Be tururuji ema butse su, ema mu mi nime hue, daja huecha mique edue cuana nime hue Diusu sa emebajaji putsu. Pamapa ye quirica su derejiji yani cuana jei yatani cuana nime da ema. Be ema mitsutsuaji. Diusu bahui mitsutsua taji.

<sup>10</sup> Daja hue ángel ja ema quisainiame atana uja:

—Be ichasetaji ye quirica su ai quisa cuana, beju tueda ai quisa cuana epupe tiempo enariatiani putsu. <sup>11</sup> Da cama, cristiano madhada cuana ja daja hue ai madhada cuana yaderata. Daja huecha nimebutsepi cuana ja ai saida cuana yaderata. Daja hue Diusu peje su panimetuheaderatita huecuana.

<sup>12</sup> Neicha Jesús ja ema atana uja:

—Ema tipeida epue, cuaja tuna ai atana cuana batame, metse su hue echuje etia puji. <sup>13</sup> Ema da yapiruji, daja huecha yapeyuji. Yama da equene pamapa ai cuana apiruidha. Daja huecha yama pamapa ai cuana apeyume ya. <sup>14</sup> Pamapa nimebutsepi cuana beidaji eputa, tuneda bahui eid'e jaametiji equi sa ejaja cuana ediatayu putsu. Diusu sa ejude sa eteriji cuana je enubitayu huecuana. <sup>15</sup> Ejude etsequeini su jei

puja mahue, mau, ai madhada aji, jamanuametiji, eimea mitsutsuaji, pamapa bid'umimi puji cuana yanitita.

<sup>16</sup> Neicha Jesús ja ema atana uja:

—Ema da Jesús. Yama quema ángel beituana pamapa ema peje su jei eputani dharejiji cuana peje su tueda quema ai quisa cuana paquisata huecuana puji. Ema da David chenu sa familia jenetia. Ema da huena atujai cuarecuare nime.

<sup>17</sup> Espíritu Santo, Huisha Janana Nime sa ehuanepu detse da:

—Mepueque —epuani.

Pamapa tuatse id'abaji cuana di uja:

—Mepueque —paputa.

Quebata jaid'itija su, papue. Cha jaid'iti hue papu eid'e jaametiji yahui su.

<sup>18</sup> Beju ema da Juan. Ye quirica su Jesús sa quisa id'abaji cuana yama jubida equisainia uja: Ahua quebata ja tusa quisa cuana eyapacata su, Diosu ja ye quirica su quisa epuani ai jamatseti cuana tu bia su eyapacatayu. <sup>19</sup> Daja huecha quebata ja tusa quisa cuana ejemita su, Diosu ja tueda padiata mahue yata eid'e jaametiji equi sa ejaja. Daja huecha ejude iyuda su panubi mahue yata. Daja Jesús ja ema quisatana yama edere puji. Pamapa mesa ai quisa cuana yama dereana ye quirica su.

<sup>20</sup> Beju tuahueda ema tije mimi neje uja atana:

—Ene putsu, ema tipeida epue.

Daja papu. ¡Pueque, Echua Puji Jesucristo!

<sup>21</sup> Ecuana sa Echua Puji Jesucristo ja pamapa mesa dharejiji cuana paibunebata. Daja papu.